

Holy Bible

Aionian Edition®

አማኞ ኦኡሱብ

Baiso Bible

AionianBible.org

The world's first Holy Bible untranslation

100% free to copy and print

also known as “ The Purple Bible ”

Holy Bible Aionian Edition ®

እማቶ ኦኡሱብ

Baiso Bible

Creative Commons Attribution ShareAlike 4.0 International, 2018-2025

Source text: eBible.org

Source version: 4/29/2025

Source copyright: Creative Commons Attribution ShareAlike 4.0

The Word for the World International, 2024

Formatted by Speedata Publisher 5.1.3 (Pro) on 5/4/2025

100% Free to Copy and Print

TOR Anonymously

<https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

Bayso at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Bayso at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēśē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
05/04/25 - 393 translations now available in 175 languages.

Table of Contents

NEW TESTAMENT

ማቶሳ	11
ማርቆሳ	65
ሉቃሳ	98
ያንሳ	155
ኦፋራሜራንኮኒዕ ፈሎ	196
ካሮም ቶስ	253
1 ቆሮንቶሳ	276
2 ቆሮንቶሳ	299
ጋላትያ	314
ኤፈሶን	322
ፍልጲስዮሳ	330
ቆላሰያሳ	336
1 ተስሎንቄ	342
2 ተስሎንቄ	347
1 ጢሞቶሳ	350
2 ጢሞቶሳ	357
ቲቶ	362
ፍልሞና	365
ኢብራዊ	367
ያይቆባ	385
1 ጴጢሮሳ	391
2 ጴጢሮሳ	397
1 ያንሳ	401
2 ያንሳ	407
3 ያንሳ	408
ይሁዳ	409
ራጋ ካያንሳ	411

APPENDIX

Reader's Guide


Glossary

Maps

Destiny

Illustrations, Doré

NEW TESTAMENT



Ինչո՞ւ: “ԱՐԻՒՆՆԻ ԿՃԱԿՆԻ ՎԻԿՈՂՆ ԼՈՂՆ ՍՅՈՒՆ ԼԳՈՐՆ” ԽԾԻ: ԼՈՂՆ ԴՐՈՒՆՈՂ ԿՂԵՍ ԿԵԶԾՈՂ: ԼՔՈՂ 23:34

ማቶሳ

1 ታዳዊተና ካለብራመ ሳኒ ካሌሮ ካየሱሳ ክርስቶስ አላታንኮክ ህዲድ ሃያ፤
2 አብራመ ይሳቃ ኡሙለ፤ ይሳቃ ያይቆባ ኡሙለ፤ ያይቆባ ይሁዳና አቢላል
ኡሙለ፤ **3** ይሁዳና ትኢማርኮ ፋረስና ዛራ ኡሙለ፤ ፋረስ ኤስሮም ኡሙለ፤
ኤስሮምና አራም ኡሙለ፤ **4** አራምና አምናዳብ ኡሙለ፤ አምናዳብና ነአሶን
ኡሙለ፤ ነአሶንና ሰለሞን ኡሙለ፤ **5** ሰለሞንና ረአብኮ ቦኤዝ ኡሙለ፤
ቦኤዝና ሩትኮ ኢዮብድ ኡሙለ፤ ኢዮብድና እስይ ኡሙለ፤ **6** እስይ ዋኖ ዳዊተ
ኡሙለ፤ ዳዊተና ታኦርዮ ኦርኮ ሶሎሞን ኡሙለ፤ **7** ሶሎሞንና ሮብአም
ኡሙለ፤ ሮብአምና አብያ ኡሙለ፤ አብያና አሳፍ ኡሙለ፤ **8** አሳፍና ኢዮሳፍጢ
ኡሙለ፤ ኢዮሳፍጢና ኢዮሆራም ኡሙለ፤ ኢዮሆራምና ኦዝያን ኡሙለ፤ **9**
ኦዝያንና ኢዮአታም ኡሙለ፤ ኢዮአታምና አካዝ ኡሙለ፤ አካዝ ሕዝቅያሳ
ኡሙለ፤ **10** ሕዝቅያሳ ምናስ ኡሙለ፤ ምናስ አሞጽ ኡሙለ፤ አሞጽና እዮሲያስ
ኡሙለ፤ **11** እዮሲያስ ጎሳ ካእስራኤል ባብሎን ቶስ ካኮቦጃመረ ጎራታ እኮንያንና
አቢላል ኡሙለ፡፡ **12** ካባብሎን ቦጃማኖኮ አባባተረ እኮንያን ሰላትያል ኡሙለ፤
ሰላትያንና ዙርባቤላ ኡሙለ፤ **13** ዙርባቤላ አብዩድ ኡሙለ፤ አብዩድና
ኤልያቀም ኡሙለ፤ ኤልያቀምና አዛር ኡሙለ፤ **14** አዛር ሳዶቅ ኡሙለ፤ ሳዶቅ
አኪም ኡሙለ፤ አኪምና ኤልዩድ ኡሙለ፤ **15** ኤልዩድ አላዛር ኡሙለ፤ አላዛር
ማታን ኡሙለ፤ ማታን ያይቆባ ኡሙለ፤ **16** ያይቆባ ዮሴፋ ኡሙለ፤ ዮሴፋና
ካፋይሳሮ ክርስቶስ የሱሳኮት አዬ ማይራመ ካኤራተሮዮ፡፡ **17** ጎርታ አብራመኮ
ታ ዳዊተ ጌሮን አላታን ቶሞንኮ አፋርታ፤ ዳዊተኮ ታ ካባብሎን ቦጃማኖ
ጌሮን አላታን ቶሞንኮ አፋርታ፤ ካባብሎን ቦጃኖኮ ታ ታክርስቶስ አላታን ጌግን
ቶሞንኮ አፋር አላታንታ፡፡ **18** ታየሱሳ ክርስቶስ አላታንኮት ጅርት ሂካማሌታ፤
አየቴሳ ማይራመ ዮሴፋን ኤራንተጉደ ሀኤስሎን አያና ቁሉክ ፋቶ ቶታተ ሙተ፡፡
19 ኤስ ካኤራተራ ዮሴፋ ቃጂላክ አባዶት ማንኮሌሮ ማራን ማይራመ አባዶ
ሆረ ፋንቸይሲን ማንኮዶቶን ማራን ሀኤስሎን እስን ሙርቴስ፡፡ **20** ኡሱ ጎአመን
ሂካ ቆፓ ግራን ካጎታ ኤርግቻ ሀሰሎይ ኡሱን ሙተ፤ ሃና አመ፤ “ሳኒ ታዳዊተ
ካሉተታ ዮሴፋ፤ ታኤራተቶ ማይራመ አታይ ኦር የላዩን አሮአብሳተ ኣላንቲና ኤስ
ካኮቶታተታ ቁሉክ አያናኮያ፡፡ **21** ባባርትትና ኡሙልናታ፤ መገኬሳና የሱሳ አም
ኡምናታ፤ ኣላንቲና ኡሱ ጎሳኬሳ ጨቦክሶኮ ማንኮሃስናሮ ማራንያ፡፡” **22** ጎታ

ጋራ ካሄገሮን ሃ እመ ካእዬሰራ ፈሎይ ጎሳህይሮን እመጉረ ሂክ ዱባ ሌ። 23
 “ሀክና፡ ዴለልትቲ ፋቶ ቶታይናታ ባባርትትና ኡሙልናታ መገኬሳና እማኑኤል
 እማምናራ።” ፋረንና “ዋ ኖኔ ዋታ ግራ እማኖያ።” 24 ዮሴፋና ሁዲሮኩ ናባደ፡
 ኤሰኮና ካጎታ ኤርግቻ ጎሳሰጌሮይ ማይራመ ኦር የላዪን ምንኬሳ ቶስ እታተ
 ሴተ። 25 ሀሌዋ ኳሬ ኤረክሴ ታኡሙልቶይ ኤሰነ ዋታ ላኮሁዲረሮ ካእላተሮ
 ይትትና የሱሳ እመ ኡመ።

2 ዋኖ ሄሮዶሳ ሬደ ካኮግሬ ገሰ የሱሳ ታቤተሌም ካታማይ ካይሁዳ
 ኡሊ ካኮአላታረ ጎራታ ባራጃ ኦቆቆራሬን ምና ታብያንኮ ኢየሩሳሌም ቶስ
 ኤመተንጉረን፡ 2 ካይሁዳ ዋኖ ሊን ካእላተራ ይትት ሀጌ ግራ? ምና ታብያንኮ
 ባካላ ዴነጉነ ኡሱን ሳጋድን ኤሜነና እመን ሆሳተን። 3 ዋኖ ሄሮዶሳ ሂካ
 እየሰ ካኮማላረ ጎራታ ኔ። ኡሱማለና ካእየሩሳሌም እባዶ ዱባ ኔ። 4 ኡሱ
 ካቱቃዋል ዋይቻልና ሴራ ካእይሁድ ኦአጋልሰሳራን ዱባ ኩኩይሰረ ክርሰቶሳ
 ሀጌ እላይናሮ ሆሳተ። 5 እሶና፡ “ካይሁዳ ኡሊ ታግቶ ታቤተሌም ካታማይያ፤”
 ካሄገሮይ ሃ እማመ ጸፋመራ፤ 6 “ኡል ካይሁዳይ ታግታ እት ቤተሌም! ካካለ
 ታይሁዳ ካታማልኮ ዱዶ ላኮየራታቶ፡ ጎሳኬ እሰራኤል ካፎፍናራ ሞቲ ኩኮ
 ብናራ እመን።” 7 ኤሰኮና ሄሮዶሳ ባራጃ ኦቆቆራሬን ጎልሰ ኡምሰጉረ ክዬሰሳ
 ባካላ ካኮሙተሮ ልክኪ ጎራታ ሆሳተ ማለ። 8 ባራጃ ኦቆቆራሬና ቤተሌም ቶስ
 ፋረጉረ “ሴየንጉዴን ይትት ማለ ዶታ፡ እንና አድ ሴይጉረ ኡሱን ጎሳሳጋድሮን
 ኡሱ ጎሳሄልቲን እን ቶስ እባባይዴን ኤቲ ግሮ እን ሰጋ” እመ። 9 ባራጃ ኦቆቆራሬና
 ዋኖ ካእመሮ ማለን እባባቲንጉረን ሰሴታን ሆረዴን። ሀክና ምና ታብያንኮ
 ካዴራን ባካላ ራ ቃጃልሳ ይትት ማንኩግሮ ባንኤ ጌረ አሌ። 10 ባካላና
 ካኮድያረን ጎራታ ኣሎ ገቤላተን። 11 ምን ኦሮ ካኮታባሬን ጎራታ ይትትና ኣየቴሳ
 ማይራመን ዋታ ካግሮ ዴን፡ ግልቢሰንጉሬን ሳጋደን። ሳጢነክሶና ባናተንጉረን
 ዋርቂ፡ ኢጣና፡ ኡርት ታኢዳን ካእቦ ቅባት ሰሰን። 12 እሶና ሄሮዶሳ ቶስ
 ጎሳእባባኖንኮ ዋ ሀሰሎይ አታይሰ እሶን ማንኩሰጌሮ ማራን ራ ኢግልሳቲን
 ኡልክሶ ቶስ እባባተን። 13 ባራጃ ኦቆቆራሬን ሴተን ካኮቡዋረን ጎራታ ኤርግቻ
 ካዋ ዮሴፋን ሙተጉረ ክ እት ታኮእባባቶ አሪ እን ኩን ታ ሰግሮን ይትት ኣየቴሳ
 ዋታ እት ግብጽ ቶስ ባቃጉደ ኤሰ ግሮ። “ሄሮዶሳ ይትት ላጋዲን ዶታራ” እመ።
 14 ሃንሱን ኡሱና ኬጉረ ይትትና ኣየቴሳና ኣተጉረ ሄመን ግብጽ ቶስ ሴተ። 15

ኤሴና ሄሮዶስ ታገሮ አዳላተ። ሂካኒና “ኤረኬና ኡል ካግብጽኮ ኡማየ” እማ ጎታ ካሄገሮኮት ህኢ ካእዬስራ ሃፋራ ፈሎ ሀየ። **16** ሄሮዶስ ባራጃ ኦቆቆራሬን ኡሱ ሶባኖ አዳሰጉረ ኣሎ እማራተ፤ ባራጃ ኦቆቆራሬን ባራጃ ካኮሙተሮ ጎራታ ጎጎስጌራንክ ማለ ጌስ ላማና ኤስኮ ሄገልባን ካሌሮ ቤተሌምና ኡሱ ጎቦቢ ካግሮ ማማንጃልኮክ ባባር ይስ ዱባ ኩኩይስረ ፋረ ላጋዲስስ። **17** ሀሱ ጎራታ ካሄገሮ ኤርማሳ ሃ እማመ ካሰጋመራ ፈሎ ሀየ። **18** ካኦታኔና ካእቲ ኢያኮት ያየ ራማይ ማልሳንተ። “ራሄልና ይስክሴ ማራን ኦተ፤ ጎጎኢና የላዪን ላኮዳንዴተ፤ ኣላንቲና ይስክሴ ማንኮጎየ ማራንያ።” **19** ጎይ ካሄሮዶስኮ አባባተረ ካጎታ ኤርግቻ ዮሴፋን ሀስሎይ ሙተጉረ፤ **20** “ክንጉዳ ይትትና ኣየቴሳ ኣትጉደ ኡል ካእስራኤል አባባ፤ ይትት ላጋዲን ኦዶታሬን ጎዬራን” እመ። **21** ዮሴፋና ኬጉረ ይትትና ኣየቴሳ ኣተጉረ ኡል ካእስራኤል ቶስ አባባተ። **22** አየሱን ጎአመን አርክሎሳ አቦኬሳ ሄሮዶስኮት ባንኤ ኡል ካይሁዳ ዋኖ ሌ ሬዳኖ ካኮማላረ ጎራታ ዮሴፋ ኤስራ ሴይን አብሳተ። ሀስሎይ ኡሱን ካኮስጋማረ ጎራታ ታጋሊላ አዉራጃ ቶስ ሴተ። **23** ናዝረት ታእማማቶ ካታማ ቶስ ሴተጉረ ሀማጼ። ሂካኒና ካሄገሮል፤ “ካናዝረት እማምናራ” እማማን ኦስጋመራን ሄገሮ ፈሎይ ሀዬን።

3 ኡሱ ጎራታ ካጣማቃራ ያንሳ ካይሁዳ ቃሉላቶክ ኡሊ ላላባ ኤመተ። **2** ላላባኖኬሳና፤ “ዋኖናት ካዳሩረ ጋባላመራ ጨቦኮ ጉላ ጋላ” ካእማሮያ። **3** ካሄገሮ እስያሳይ ሃ እማመ ካሰጋመራ ኡሱያ፤ “ቃሉላቶክ ኡሊ ‘ራ ካዋና ኤካሳ ቦባና ቱኩል ኡምሳ’ እማ ታኣካቶ ያየ።” **4** ካያንሳ ሳርስና ኦጎሮ ኦጋላኮ ካፈላመሮ ጎሌሮ ሞኦቲሳይና ጊ ሞዋታረ። ባቦኬሳና ከንተፋሮና ካጋዶ ማላብየ። **5** ኢየሩሳሌምኮ፤ ካይሁዳ ኡል ዱባኮና ላጋ ካዮርዳኖስ ጎቦቢ ካግሮ ኡልኮ አባዶ ዱባ ያንሳ ቶስ ጉራማረ። **6** ጨቦክሶኮና ጉላ ጋላ ላጋ ካዮርዳኖሲ ገነቴሳይ ጣማቃማ ግረን። **7** ፋራሳውልኮና ሶዶቃውልኮ ካሞጋን አባዶ ኡሱ ታኮጣማቃረ ባንኤ ካኤማታሮ ካኮድያረ ጎራታ ሃ እመ፤ “እስን ይስ ካሀበሳ ታኤማቶ ኤንገ ታዋኮ ጎጎሄሳኑን አዮያ እስን ካጎርሴ?” **8** ጎርታኑን ጨቦኮ ጉላ ጋላኖክስን ኦቱሳራን ፈሎ ፈላ. **9** ‘አብራመ ኣቦካንያ’ ታኤማታን ቆፋይ እስኦትስን አሮሶባቴን፤ ዋ ሂካ ኤኤሞልኮ አብራመን ይስ ኬስን ዳንዳራ። **10** ጎርታ ማሳር ካጋዶል ህዲድ ጎስን ኤካተታ፤ ኤል ታኢዳን ካዱባሞን ጋ ዱባ ጎሳምናራ፤ ኤሊን ኦሮና ሻፋምናራ። **11** “እን እስን ጨቦኮ ማንኮ ጉላ ጋልቲታን

ማራን በከይ ጣማቅናራ፡ እየሱን ጎአመን ከፈሮ ኦቴሳና ሰድን እን ካዶትሶን፡ እነኮ ካራራሮ ሁና ካእባ እነኮ ሃሬ ኤመታራ፡ ኡሱና ቁሉክ እያናይና ኤለኒ እሲን ጣማቅናራ፡ **12** ካኮባንጳራና ገነቴሳይ ግራ፡ አዲማ ባሳምጉደ ባንጳምናታ፡ ዳርጋማና ጎታራይ ክባምናታ፡ ጋላባ አደ ታባኖን ኤለኒ ጉባምናታ፡” **13** ሀሱ ጎራታ የሱሳ ገነ ታያንሳ ጣማቃምን ጋሊላኮ ላጋ ካዮርዳኖስ ቶስ ኤመተ፡ **14** ያንሳ ጎአመን፡ “ሂክ ሃ ሊን ላኮዳንዳሮ፡ እን ገነታይ ጣማቃምን ዶትሳ ግራን አት ምሲ እን ቶስ ኤማታ?” አመ እስ ትራተ፡ **15** የሱሳና፡ “ኮና ላኮግሮ አት እ አም፡ ሂካ ፈላኖይ ኦቁሉማ ፈሎ ዱባ ፈላኖ ኖን ዶትሳራ” አመ፡ ያንሳና እየሱን እ አመ፡ **16** የሱሳና ጎርሰዋ ጣማቃመ በከኮ ጎሳቤይ ዳሩርና ባናንተጉደ እያና ካዋ አራበ እን ኡሱ ጉት ዳጋ ግራን ዴ፡ **17** ኡሱ ጎራታ፡ “እን ካኮገለላይናራ፡ እን ካጌላታራ ኤረክ ሂካያ” ታአማታ ያየ ዳሩርኮ ማልሳንተ፡

4 ሂካኮ አባባተረ እያና ቁሉክ የሱሳ ዱርሳይ ጎሳጫፋምሮ ቃሉላቶክ ኡል ቶስ አተ ቤ፡ **2** ሄመን አፋርታምና አሪ አፋርታም አጋቡኮ አባባተረ ኡኤ፡ **3** ካጫፋረክና የሱሳ ቶስ ጋባላመረ “አት ኤረ ካዋ ጎሌተ ሂካ ኤኤሞል ባቦ ጎሳሌሮ አጃጂ” አመ፡ **4** የሱሳና፡ “አባዶ ህኢ ታዋኮ ካብያሮ ሃፋራ ዱባ ኳሬ ባቦ ካላሊ ላኮግራሮ እማመ ማጻፋ ቁሉክ ጻፋመራ” አመ አባበ፡ **5** አደና ዱርሳ የሱሳ ቁሉት ካታማ ኢየሩሳሌም ቶስ አተ ሴተጉረ ቁሉክ ምን ካዋይ ብርጠ አተ ቤጉረ፡ **6** “አት ኤረ ካዋ ጎሌተ” “ሄገልዴ እሲ ፍርም፡ ሉቃኦታ ኤኤሞይ ጎሳህንዱዱፋኖንኮ እሶ ገነትሶይ ጎሳኬስናዉን ኤርግቻል ኩ ማራን አጃጅናራ እማመ ማጻፋ ቁሉክ ጻፋመራ አመ፡” **7** የሱሳና፡ አባበረ፡ “ጎታ ሄዶካ እሮጫፍተ እማመ አደ ማጻፋ ቁሉክ ጻፋመራ” አመ አባበ፡ **8** አደና፡ ዱርሳ የሱሳ ኣሎ ጦቂ ታእንተ ዋዳሚ ኮርሰጉረ አላምኮክ ዋኖላል ካባጃትሶን ዎታ ኡሱን ቱሰጉረ፡ **9** “አት እን ሆረ ኢጉደ ግልቢስ ጎሳጋደ ሂካ ዱባ እን ኩን ሰሰናራ አመ፡” **10** የሱሳና፡ “አት ጸላየ እን ሆረኮ ፋክአም! ‘ዋ ሄዶካዉን ጎጋድ፤ ኡሱ ካላልና ሄዶይሳ’ እማመ ማጻፋ ቁሉክ ጻፋመራ” አመ፡ **11** ኤስኮና ዱርሳ ኢስ ሴተ፤ ኤርግቻልና ኤመተጉረ ኡሱን ሀንዳየ፡ **12** የሱሳ ሻማኖ ካያንሳ ማለረ ኡል ካጋሊላ ቶስ አባባተ ሴተ፡ **13** ታናዝረት ካታማ ኢሰጉረ፤ ዛብሎንና ንፍታሌምኮት አዉራጃይ ታጋሊላ ላቡ ግርዲ ታግቶ ታቅፍረናሆም ካታማይ ግራኖ ሀጋአበ፡ **14** ሂካኒና ካሄገሮ እሰያሳይ ሃ እማማን ኦስጋመራን

ሄገሮ ፈሎ ሀዬን። **15** “ኡል ካዛብሎንና ኡል ካንፍታሌም፣ ዮርዳኖስኮ ጋማ ላቡ ግሪ ካግሮ ራ ዶሌ ካጋሊላ እይዛብ። **16** ሙጉዲ ካግረ ጎሳ ካአቲ ኢፋ ዴ፤ ሆስ ታጎይ ካግረ እባዶና ኢፋ ቤ።” **17** ሀሱ ጎራታኮ ሀጋአበረ የሱሳ፡ “ዎኖናት ካዳሩረ ጋባላመራ ጨቦኮ ጉላ ጋላ” እመ ላላባኖ ሀጋአበ። **18** የሱሳ ታጋሊላ ላቡ ግርንደ ሮራ ግራን አቢላል ላማ ጴጢሮሳ ካእማማሮ ሰሞናን አቢኬሳ አንድራሳን ዴ። ኩኑኡብ ኦአባታሬን ማንኮሌን ማራን ማራብትሶ በከሮ ሉጉዳታ ግረን። **19** የሱሳና “ኮዬን እን ዴበ ሰሴዬን” እባዶ ዎኖናት ካዋ ቶስ ጎንኬንታኑን እን እስን የልናራ እመ። **20** ጎርሰዋ ማራብትሶ ኢሴንጉሬን ኡሱ ዴበ ሰሴተን። **21** ኤስኮ ጎጎሮረይ ታካለ አቢላል ላማ ኤረ ካዛብዶሳ ያይቆባና አቢኬሳ ያንሳን ዴ። አቦክሶ ዛብዶሳን ዎታ ዎላቦ ኦሮ ማራብትሶ ኤካሳታ ግረን፤ የሱሳና እሶ ኡመ፤ **22** ጎርሰዋ እሶ ዎላቦትሶና አቦክሶ ኢስን የሱሳ ዴበ ሰሴተን። **23** የሱሳና አይሁድኮክ ምን ካኤብ ዎኖናት ካዋኮክ ካገጌሎ ሃፋራ አጋልሰሳና ላላባ፤ ጎሳ ኦሮ ካግሮ ማምሰክ ሀወአምኮና ማሪ ጉት ታግቶ ራኮ ታሞጋንኮ ፋይሳ ካጋሊላ ኡል ዱባ ማራሙራ ግረ። **24** ሂካኮ ካከይ አታንኬሳ ካሶርያ ኡል ዱባ ማልሳመ፤ ጎሳና ካለካለክ ሀወአም ሀወአማ ካግረና፤ ማር ኦሮክ ሀወአም ካሜላኒ አቦሳማረን፤ ዱርሳ ጉት ካኮግረና ካጋጋዱ ሀወአም ኦአባናየን፤ ናፋለሳል ዱባ ኡሱ ቶስ ከነን፤ ኡሱና እሶ ፋይሰ። **25** ሂካኮ ካከይ፤ ጋሊላኮና፤ ካታማ ቶሞንኮ ኢዩሩሳለምኮ፤ ይሁዳኮና፤ ላጋ ካዮርዳኖስ ጋማኮ ካኤመተራ ካሞጋን እባዶ የሱሳ ዴበ ሰሴተ።

5 የሱሳ ጎሳ ካኮድያረ ጎራታ ዎዳም ቶስ ቤጉረ ሀማጼ፤ ኡሱኮ ኦአጋልሳታረን ኡሱ ቶስ ኤመተን። **2** ሃ አማ አጋልሰሳኖ ሀጋአበ። **3** “አያናክሶይ ዋ ኦዶታታራን ኦሶማሳመንያን፤ ዎኖናት ካዳሩረ ካክሶያ። **4** ኦጋዳራን ኦሶማሳመንያን፤ ዋኮ ጎሳኢና ሄላይናራን። **5** ፋያንካኒዕ ኦሶማሳመንያን፤ ኡልና ኤልናራን። **6** ቁሉማ ኦኡኣራና ኦሱጉባታራን ኦሶማሳመንያን ባራራንዋ። **7** ሻጋ ኦየላራን ኦሶማሳመንያን፤ ዋኮ ሻጋ ሄላይናራን። **8** ዎዳና ቁሉ ኦኮንሌተታ ኦሶማሳመንያን፤ ዋ ድናራን። **9** ኦዎጋርሳራን ኦሶማሳመንያን ይስ ካዋ አማም ኡማምናራን። **10** ቁሉማ ማራን እመረነ ኦሆሮራማራን ኦሶማሳመንያን፤ ዎኖናት ካዳሩረ ካክሶያ። **11** “እባዶ ላላንቲቲይ እስን ጎሀባረ ጎሆሮረና፤ ሜላኒ ዱባ እስን ጉት ጎአዬስ ኦሶማሳንቲታን። **12** ዳሩሪ እስን ታአታይናታን ሙራ ታአቲ ማንኮሌተ ማራን

ገበላየን፤ ገበሎ ቱሳ። እስንኮ ሆረን ኦግረን ኦሄገሮል ሂካማሌ ሆሮረራን።” **13**

“እስን ታኡሌ ኤስቦታን። ኤስቦ ታኤስቦ ኦኖሞንጀ ጎዋተ አባባይ ኦኖሞንጀ የላዪን ዳንዳታ? ሳር ሻፋምደ ሉክ ታአባደይ ዳዳራምን ኳሬ ላኦ ላኮአብቶ።

14 “እስን ካአላም ኢፋታን። ዋዳም ጉት ታግታ ካታማ ሰያምን ላኮዳንዴቶ።

15 ዱብ ሀንቃይሳተረ ዳቾ ሄገሊ ጎልሳተ ካካታራ አባደ ላኮግሮ። ምን ኦሮ ካግሮ ዱባን ጎንሀንቃይሮ ቦላንሶ ጉት ካይን ኳሬ። **16** ሂካማሌና አባደ ኦኢዳን ፈሎኦትስን ዲጉረ ዳሩሪ ካግሮ አቦክስን ጎንካባጅሮን ኢፋክስን አባደ ሆረ ሀሃንቃዎ።”

17 “እን ሴራ ካሙሴና ካሄገሮ ኢግልስን ካኤመየሮ እን እስኩን አሮሌኖ፤ ፈሎ ሀይስን ኳሬ ኢግልስን ላኮኤማየሮ። **18** እን ሩምና እስኩን አማራ፤ ኡልና ዳሩርና ታ ሮራኒ ሴራ ዱባ ፈሎ ሀይናራ ኳሬ ሴራኮ ፍዳለ ቶ ጎርቱን ኤጋኖ ኮ ዱደ ላኮኢግልሳምሮ። **19** ሃንሱን ማዮና ሂካ አጃጃ ዱባኮ ክጫርክ ጎባስ ካካለና ጎንባሰሮ ጎአጋልሰሰ ዋኖናት ካዳሩረይ ዱባንኮ ክጫርክ አማም ኡማምናራ። እየሱን ጎአመን ሂካ አጃጃል ፈሎ ሀይሳ ኦካለና ፈሎይ ጎንሀይሰናውን ካአጋልሰሳራ ሀሱ ዋኖናት ካዳሩሬት ካንጂንክ አማምናራ። **20** ቁሉማትስን ታፋራሳውልኮና ሴራ ካሙሴ ኦአጋልሰሳራንኮት ቁሉማኮ ሮር ጎሙቶን ዋኖናት ካዳሩረ ቶስ ኢጂ ታብን ላኮዳንዳታን እን አማራ።”

21 “ካሆሬ አባደን ‘አባደ አሮላጋዴን ካአማመሮ እስን ማልቲታን፤ አባደ ካላጋዳራ ፍርዳምናራ ካአማመሮ ማልቲታን።’ **22** እን ጎአመን ሃ አማራ፤ አቢኬሳ ራካሊ ካኢንጋማራ ዱባ ፍርዳምናራ፤ ጎርቱን አቢኬሳ ‘ካማድኖን’ ካአማራ ታአይሁድ ሾንጎይ ሆሳምናራ፤ ‘ታቶዋ’ ካአማራ አደ ታጋንም ኤሌንኮክ ፍርዳ ኡሱ ኦራታራ።

(Geenna g1067) **23** “ሃንሱን ጃርሶካ ባንኤ ታፋላ ጉት ካይተደ ዋወን ካኮሰሳቶ ጎራታ አቢካ ኩ ካኮቁቃመራ እየስ ኩን ቃል ጎአመ። **24** ጃርሶካ ኤስ ባንኤ ታፋላ ሆረ ኢሳግጉደ ሆራርጀ ሴጉዴ አቢካን ዋታ ዋጋር፤ ኤስኮ አባባይ ጃርሶካ ዋወን ሰሰ። **25** “ኩ ካሞታራ ባራጋራካ ኩ ጎንፍርድሶንኮ፤ ዳናና ካሻሮን ሮርስ ኩ ጎንሰሶንኮና ምን ካሻኖ ጎንታብሶንኮ ራድ ግራን ሳም ባራጋራካን ዋታ ዋጋር። **26** እን ኩን ሩምና አማራ፤ ኡሱ ኩ ጎፍርድሰ አድ ማራጋደ ዱባ አት ሙር ታጉድሶ ኤስኮና ላኮብናቶ።”

27 “አሮሻርሙጢቲን ካአማመሮ ማልቲታን። **28** እን ጎአመን እስኔ ሃ አማራ፤ ሄለል ታሀልቻ አሊ ካድያራ ዱባ ዋዳናቴሳይ ኤስኮ ዋታ ሻርሙጠራ አማኖያ። **29** ታመርገ እልታታ

ጨቦን ኣላንቲ ጎሌተ ጎርብዋ ቤስ ሻፍ፡ ማርካ ዱባ ታጋነም ኤለን ቶስ ሻፋማናኮ
 ማርካኮ ባንኤ ቶ ዋታኖያ ሆረክ። (Geenna g1067) 30 ገነ ታመርገታታ ጨቦን
 ኣላንቲ ጎሌተ ጎሰጉደ ሻፍ! ማርካ ዱባ ጋነም ቶስ ሻፋማናኮ፤ ማርካኮ ባንኤ
 ቶ ዋታኖ ሆረክ።” (Geenna g1067) 31 “ኦርቴሳ ከልክ እመ ካቤሳራ ዱባ
 ከልክ ካኮእመሮ ዋራቃታ ኤስን ሰሳኖ ዶትሳራ እማመራ።” 32 እን ጎእመን እስኔ
 ሃ እማራ፤ ኤስ ካካለኔ ዋታ ሻርሙጣ ግራን ጉት ጎእበ ኳሬ፤ ኦርቴሳ ከልክ
 እመ ካቤሳራ ዱባ ኤስ ካካለኔ ዋታ ጎጎሻርሙጢቶ ካየላሮያ። ሂካ ጋራይ
 ከልክ እማንተ ታቤተቶ ሄለልትቲ ካእታታራና ካሻርሙጣሮ እን ቶታማራ።” 33
 ካሆሬ እባዶን፡ “ጣራ እሮእማቴን፤ እየሱን ጎእመን ዋይ ሆረ ካእማተቶ ኦራ”
 ካእማመሮ ማልቲታን። 34 እን ጎእመን እስኔ፤ “ሱረ እሮእማቴን” እማራ። ዳሩሪ
 ጎሌና እሮእማቴን፡ ኮርፍንጀ ካዋታ። 35 ኡሊ ጎሌና እሮእማቴን፤ ሉክ ታዋ
 ታኮፎልሳቶያ፤ እየሩሳሌምና እሮእማቴን ታንጂንት ታዋኖ ካታማታ። 36 እስከታይ
 ጎሌና እሮእማተ፤ መተካክ ፊጣ ኮ ጉማራ ጎርቱን ጋምባላ የልን ላኮዳንዳቶ።
 37 ሃንሱን እዬሳ ግራን እዬሰክሰን ጎእማና “እ” እደ ጎላእማና “ላ” ሀሌዎ።
 ሂካኮ ካካለ ዱባ ካሜላንኮ ካኤማታሮያ። 38 “እል ማራን ኢል፡ ኢልኮ ማራን
 ኢልኮ።” ካእማመሮ እስን ማልቲታን። 39 እን ጎእመን እስኔ ሃ እማራ፤ ታማላን
 ካፈላሮ እባዶት እሮኔባቴን፤ እየሱን ጎእመን ሀንጎሮጫካ ካመርጌ ካባሳሮን
 ካካለ ሀንጎሮጫ ካበተ እድ ቱሳ። 40 እባዶት ኮ ቆሎካ እታይን ኩ ጎሞቴ
 ሳርሰ ካባን እድጉደ ኡሱን ሰሰ። 41 እባዶት ኮ ኩኔ ባንኤ ቶ ሴና እም ኩ ጉት
 ጎሁኖመ ኡሱ ራኮክ እምባ ኡሱን ዋታ ሴ። 42 ኩኮ ካኤባታሮን ሰሰ፤ እምእይን
 ካደታታሮኮና እሮትራተ። 43 “ኦላታ ጌላ ዲናካ ዲድ ካእማመሮ ማልቲታን።”
 44 እን ጎእመን ዲናጃልክሰና ጌላየን፤ እስን ኦሆሮራራውና ኤባየን እማራ። 45
 ሂካ ማለ ማንኮ የላታን ማራንትኩን ዳሩሪ ካግሮ እቦክሰኩን ይሳሰ ልናታን። ኡሱ
 ካኢዳኑና ካሜላኑን ዱባን አርት ቤሳራ፤ ኢዳምና ጨባለሳሉና ቁሎሌውን
 ኡብሰሰሳራ። 46 ካጌላታሮ ካላል ኦጌላታታን ጎሌተን መ ሙራ ሄላይናታን?
 ቃራጣ ኦኩኩይሳራና ላ ኡሱማሌ የላ ግራና? 47 እቢላልትሰን ታላልን ኖጎዳ
 ኦኦታታን ጎሌተን ኦካለኮ መይ ኢዳታን? አይዛብልና ላ ሂካ የላ ግራና? 48
 ሃንሱን ካዳሩረ እቦክሰን ቁሉክ ጎጎሌሮይ እስና ቁሉኒዕ ላ።

6 “እባዶ እስን ጎሳዬሮ አምዴን ‘ኦኢዳን ፈሎ ኦትሰን’ እባዶ ሆረ ፈላታናኮ እስ ኦትሰን ኦራዬን፤ ኡሱማሌ ጎፈልተን ካዳሩረ አቦክሰንኮ ሙራ ላኮሄላታን። **2** “እፍሳዶሌል እባዶ ሆረ ካባጃሚን አመንጉረን ራዲና ባንኤ ታኤቢ ጎሳሰሳናንክ ማለ እት ህየሳን ኮኮ ካኮሰሶ ጎራታ ሀሙቶ አምደ አሮአዋጅተ፤ እን ሩምና አማራ፤ ሂካማሌ ኦላራን ሙራትሶ ዱባ አታቴራን። **3** እስን ጎሳመን ህየሳን ሰሳግራን ገነ ታመርገትሰን ካሰሳቶ ገነ ታበተ አሮአዳሶ። **4** ህየሳን ሰሳግራን ጎላታ ሀሌዎ፤ ጎላታ ካፈላመሮ ካድያራ አቦክሰን ሙራትሰና ሙሮዋ።” **5** “ኤባታ ግራን እፍሳዶላ እን አሮሌተን፤ እሶ አባዶን ሙትን አመንጉረን ባንኤ ታኤቢና ራድ ቃርቃራይ ኣል ኤባታኖ ጌላታናን። እን ሩምና አማራ፤ ሙራትሶ ዱባና አታቴራን። **6** እት ጎሳመን ኤባይን ጎእንተ፤ ክፍሊ ቶስ ታብ፤ ኡፋና ጨፋጉደ ጎላታ ካግሮ አቦካ ቶስ ኤባ፤ ጎላታ ካፈላመሮ ካድያራ አቦካ ሙራታ ጋቾሙራ። **7** እስን ኤባታ ግራን ካማድኖን ሃፋራይ አባብ አባብ ኤባታኖይ ኤብ ካማልሳማሮ እን ካላሮ አይዛብ እን እየሰ ጂናሳታ አሮኤራሳተን። **8** እሶ እን አሮሌተን፤ አቦክሰን እስን ሀኤባኖን ግራን ሆረንዋ እስኩን መ ዶትሳሮ ካሶዋ። **9** “እስን ጎሳመን ሃ አማ ኤባየን፤ “ዳሩሪ ካግታ አቦካን! ቁሉክ መገካ ሀካባጃመ፤ **10** ዋኖናትካ ሀኤመቶ፤ ፈኢታ ዳሩሪ ጎሳሌተቶይ ኡሱማሌ ኡሊና ሀሌቶ፤ **11** ካህታርቴ ባቦካን ህታር ኖን ሰሰ። **12** ኖና ኖ ካሚረኤሮ ሀሄሶ ጎሳአማኖ፤ ባሰካን ሀሄሶ አምና፤ **13** ካሜላንኮ ሃሰ ኳሬ፤ ጫፍት ኦሮ ኖ አሮታብሰ፤ [ዋኖናት ካካያ፡ ሁናና ካባጃና ጅሩ ጅሮማን ካካያ፤ ሀሚኒዕ።] **14** እስን ባሰ ካእባዶ ሀሄሶ ጎእንቴን ካዳሩረ አቦክሰን አደ እስኩን ሀሄሶ አምሮዋ። **15** እየሱን ጎሳመን እስን ጨቦ ካእባዶ ሀሄሶ ካእሞን ጎሌተን አቦክሰና ጨቦክሰን ሀሄሶ ላኮአምሮ።” **16** “ኤብ ካእጋቡይ እፍሳዶላ እባዶ እን አሮህንግግዳን፤ እሶና ኤብ ካእጋቡይ ጎሳአዳሳምሮውን አመን ጉሬን በቤድትሶይ ጉት ጋዳኮክ ማላታ ቱሳታራን። እን ሩምና አማራ፤ ሂካማሌ ኦላራን ሙራትሶ ዱባ አታቴራን። **17** እት ጎሳመን ካኮእጋቡይተ ጎራታ፤ በቤድታ ኣል፡ መተካና ሽግዳ። **18** ሂካኒና እጋቡዋኖካ ጎላታ ካግሮ አቦካ ካላልያ ካካሳ፡ አባዶኮ ጎሳመን ካጎላተ ላራ፤ ጎላታ ካፈላመሮ ካድያራ አቦካ ሙራታ ኩን ሙሮዋ።” **19** “ቆቃና ካአማሮን፤ ማርጮ ታኡዱዶተ እን ካባሮን፤ ሄቶና ኦሽ ሄትን ካዳንዴቶ፤ ሂካ ኡሊ ጉት እስ ኦትሰኩን ዱሩማ አሮኩኩይሳቴን። **20** እየሱን ጎሳመን ቆቃና ካእሞን፤ ማርጮ

ታሁዲደተ እን ካባኖን፡ ሄቶና ኦሽ ሄትን ካዳንዴኖን፡ ኤለ ዳሩሪ እስ ኦትሰኑን ዱሩማ ኩኩኢሳዬን። 21 ዱሩማታ ማንኮግቶ ዋዳናታና ኤስ ግታ።” 22 “ኢልኦ ማሩን ኢፋያን፤ ሃንሱን ኢልኦ ፋያሌሳ ጎሌን ማርካ ዱባና ኢፋይ ካኦማጋመ ላራ። 23 እልኦ ኦታ ኦሀወአራን ጎሌን አደ ማርካ ዱባና ሙጉድ ላራ። ጎርታኑን ኩ ኦሮ ካግራ ኢፋ ሙጉድ ጎሌ፤ ሙጉድ አደ ምስምሲ ጠልንጋክ ሙጉድ ላራ!” 24 “አባዶት ኮ ጎታ ላማን ሀንዳይን ላኮዳንዳሮ፡ ኮ ዲደጉረ ካካለ ጌላታራ፡ ጎርቱን ኮ ካባጃጉረ ካካለ ቱፋታራ፡ ዋወና ማራጋዴን ራቶ ሀንዳይን ላኮዳንዳማሮ። 25 “ሃንሱን እን እስኔ ሃ አማራ፤ ባርሳኖ ኦትሰን ማራን መ አምና? መ ጣምና? መ ሳርሳይናና? አማ አሮጫናቃንቴን፤ ኔፎ ባቦኮ፡ ማር አደ ሳርሰኮ ላኮሮራሮያ? 26 አላ ክምብር ዲያ፤ ላኮወጣታናን፡ ላኮኩኩይሳታራን፡ ጎታራይና ላኮክባታራን፡ አየሱን ጎአመን ካዳሩረ አቦክሰና እሶ አምሳራ። እሰን እሶኮ አሎ ላኮሮራታንያ? 27 ጎሌና እሰን ኦሮኮ ጫናቃመጉረ ገሰኬሳ ጉት አሪ ቶ አድን ካዳንዳራ ግሮ? 28 “አደና ሳርሰ ማራን ሙን ጫናቃማታን? አላ ታዲዳ ዳራራ ምስ ምሲ ጂናቶ ዲያ፤ ላኮዳፋራናን፡ ጎርቱን ላኮሱቃታራን፤ 29 አየሱን ጎአመን እን እስኔ ሃ አማራ፤ ሀሴ ግታት ካባጃ ካአባናዩ ዋኖ ሶሎሞን ጎሌና ህታ ዳራራልኮ ቶ እን ላኮሳርሳተሮ። 30 እሰን አማኖ ኦኮንህንቃተራ ዋ ህታር ሙተጉረ ጌባር ኤለን ኦሮ ካሻፋማሮ ኤስ ካዲዳ ሂካማሌ ጎሳርሰሰሮ እሰን አደ ምሲ ሮርሰ ሳርሰሳና ዋታራ? 31 ሃንሱን ‘መ አምና?’ ‘መ ጣምና?’ ‘መ ሳርሳና?’ አም አሮጫናቃንቴን። 32 አይዛብ ሂካ አየሰ ዱባ ሄላይን ጫናቃማራ፤ ካዳሩረ አቦክሰና ሂክ ዱባ እሰኑን ካዶትሳሮ ላኖ ካሶዋ። 33 ካመን ዱባኮ ጣ ዋኖናት ካዋና ቁሉማቴሳ ዶታዬን፤ ካሄሰ ዱባና ጋቾ አዳምራ። 34 ሃንሱን ጌባርቱን አሮጫናቃንተን፤ ጌባርቱን ጫናቃማኖ ጌባርቱን ሀባሮ፤ አሪ መተመተይ ታትሴ ታሌተ ራኮ አብታ።”

7 “እሰን ጉት ጎሳፍርዳምንኮ ማኖ ጉቲና አሮፍርድቴን፡ 2 እሰን ጎሳፍርዳታንክ ማለ ፍርዳምናራ፤ ካኮኤካሳታን ሁይ እሰኑን ኤካሳምናራ። 3 “እልታይ ኦሮ ካግሮ ጋ ሀድያኖን አቢካ ኮት ኢል ኦሮ ካግሮ ሁራ ሙን ድያታ? 4 እልታይ ጋ ግራን አቢካኮት ኢል ኦሮ ካግሮ ሁራ ኩን እን ቤሰሮ አምን ምሲ ዳንዳታ? 5 እት ኢፍሳዳ ጣይ እልታይ ኦሮ ካግሮ ጋ ቤሳ፡ ኤስኮ አቢካኮት እሊ ኦሮ ካግሮ ሁራ ቤሰን ማዳር ድን ዳንዳታ። 6 “ሉቃ ኦትሶይ ጎሳዳዳርንኮ አባባይ

ኢልኮ አባይ ጎጎታታርሽኖንኮ ካሰማሳመ ኮኮ ከሮሩን አሮሰሴን፤ አወአሎክ ኮኮ ቦዬ ሆረ አሮሎጉዳን።” 7 “ኤባየን ሰሳምሮዋ፥ ዶታዬን ሄላታንዋ፥ ባባሳየን ኡፋና ባናምሮዋ፤ 8 ካኤባታራ ዱባ አታታራ፥ ካዶታታራና ሄላታራ፥ ካባባሳታሮና ኡፋ ባናምሮዋ። 9 “እስን ኦሮኮ ኤረኬሳ ባቦ ጎኤባተ ኤኤሞ ካሰሰራ ኦዶ ግሮ? 10 ጎርቱን ኩኩኤብ ጎኤባተ ሀበሳ ካሰሳራ ግሮ? 11 ሀያ እስን ኦሜላን ሌቱን ግራን ይሰ ካክሰኩን ካእዳን ኮኮ ሰሳኖ ጎማላብቴን ካዳሩረ አቦክሰን እስን ካኤባታታን ኮኮ ካእዳን ምሲ ሮርሰ እስኩን ሰሳናዋታራ? 12 ካካለ እባዶ እስኩን ጎጎፈሎን ካዶታታን ኮኮ እስና ፈላ፤ ሴራና ካሄገሮል ኮክ አጋልሰሰ ሂካዋያ።” 13 “ጎጫ ካኤባንክነ ታባ፤ ባሰ ቶሰ ካጌሳራ ራ ካንጂንክና ጎጫና ካባላኣንያ፥ ኡሱ ኦታበራና ኦሞጋንያን። 14 ግር ካኔፎ ቶሰ ካጌሳራ ራ ጎእመን ካጭሚንክ ጎጫና ካኤባንያ፤ ኦታባራና ኡጫር ኦላልያን።” 15 “ጫላ ታእዳድ ሳርሳተ ካኤሜታሮ፤ ኦሮኦትሶ ጎእመን ሀዬይ ኣን ባሰ ኣትን ካኤሜታሮ ካጣራ ካሄገሮልኮ እስ ኦራዬን። 16 ፈሎ ኦትሶኮ እሶ አዴሰን ዳንዳታን። እላንጅኮ ዋይኒ፥ ቂንጮኮ በለሰ ታእማማቶ ኢል አባባናን? 17 ኡሱማለና ጋ ካእዳን ዱባ ኢል ታኢዳን፥ ጋ ካሜላን አደ ኢል ታሜላን ዱባማራ። 18 ጋ ካእዳን ኢል ታሜላን፥ ጋ ካሜላና ኢል ታኢዳን ዱባምን ላኮዳንዳሮ። 19 እል ታኢዳን ካዱባምን ጋ ዱባና ጎሳማራ፥ ኤለን ኦሮዴና ሻፋማራ። 20 ሃንሱን ካጣራ ካሄገሮል ፈሎ ኦትሶይ እዳሰናታን። 21 “ዳሩሪ ካግሮ አቦኬ ኮት ፈኢ እንፈሎን ግራን ‘ጎታ፥ ጎታ’ እን ካእማራ ዱባ ዋኖናት ካዳሩረ ላኮታባሮ። 22 ካጋቾ ፍርዳኮት አሪ ኦሞጋን ‘ጎታ፥ ጎታ፥ መገካይ ሄገሮ ላ እዬንሰላ?’ መገካይ ዱርሳ ላቤንሰላ? መገካይ ካሞጋን ባሳ ኖ ላፈልነላ? አምናራን። 23 ሀሱ ጎራታ ጎን ዱዶ እስን ላካሶ፥ እስን ታሜላን ኦፈላታን እንኮ ፋክ አማ አም አዴሰሰ ሰግናራ። 24 “ጎርታኩን ሂካ ሃፋራኬ ማለጉረ ፈሎ ካሀይሳራ ዱባ፤ ምን ኤኤሞ ጉት ካማዳራተሮ ቃሮክ እባዶት ኣን ላራ። 25 ኢዳሞ ካእትና ኡባተ፥ ዳድና ዳገ፥ አምባልና ኬተጉደ ኡሱ ምን ሻፍተ፥ ኤኤሞ ጉት ማንኮ ማዳራመሮ ማራንትኩ ላኮኢየሮ። 26 ሂካ ሃፋራኬ ማለጉረ ፈሎ ካሀይሶን አደ፤ ጨካሌ ጉት ምን ካማዳራተሮ ጎዋክ እባዶት ኣን ላራ። 27 ኢዳሞ ካእት ኡባተ፥ ዳድና ዳገ፥ አምባልና ኬተጉደ ኡሱ ምን ሻፍተ፥ ምና እዬ፥ ኢያኖና ጎሜላን ሌ።” 28 የሱሳ ሂካ እየሰ እዬሰ ካኮጉድሳረ ጎራታ ጎሳና አጋልሰሰኬሳ ሳደ። 29 ኣላንቲና

አይሁድኮክ ሴራ ካአጋልሰሳር እን ሀሌኖን ግራን ኦዶናት ካአቦ ኣን አጋልሰሳ
ማንኮግሬ ማራንያ።

8 የሱሳ ዋዳምኮ ካኮዳጋረ ጎራታ ጎሳ ካሞጋን ኡሱ ዴበ ሰሴተ። **2** ሀሱ ጎራታ
ማሪ ባር ካአባናየ እባዶት ኮ የሱሳ ቶስ ኤመተጉረ ሆረ ግልቢስ ሳጋዳ፡ “ጎታ!
ፈኢታ ጎሌተ እን ሙጭሰን ዳንዳታ” አመ። **3** የሱሳና ገነቴሳ ድሪርሳተጉረ
ድንድና፡ “እን ኩን ፈኢ ሰሰራ! ሙጭም!” አመ። እባዶትና ጎርሰዋ ባርኮ
ሙጭመ። **4** ኤስኮና የሱሳ፡ “ፋያኖካ ማዮና አሮሰግተ፤ እየሱን ጎአመን ሴጉዴ
እስኦታ ቱቃሞን ቱሳ፡ ሙሴ ኩን ካእጃጃሮ ሜባ ሰሰ ህክና እሶን እቶ ሌራ”
አመ። **5** የሱሳ ቅፍረናሆም ቶስ ጎጎታቤ፡ ካቦሎ ዋይቻት ካሌረ ኮ ኡሱ
ቶስ ጋባላመረ፤ ሃ አመ ኤባተ። **6** “ጎታ፡ ኢን ካሀንዳረክ ናፋለሳ ሌጉረ አሎ
አቦሳ ዲያ ምንኬይ ሁዱረ ግራ” አመ። **7** የሱሳና፡ “እን ኤሜይጉረ ኡሱ
ፋይሰናራ” አመ። **8** ካቦሎ ዋይቻትና አባበረ፡ “ጎታ፡ አት ምንኬ ቶስ ታብን
እን ላኮካዶትሳሮዮ፤ እየሱን ጎአመን ህታኒ ግራን ሃፋራ ኮ ካላል አዬሰና፤
እዬን ካሀንዳረክና ፋይሮዋ። **9** እን መተኬሙን ካካለቱን ካሀንዳሮ ዋይቻያ፡
እንና እንኮ ሄገሌ እዬን አሀንዳራን አባ፤ እሶኮ ኮኔ ሴ እን ጎአምሮ ሴታራ፡
ካካለና ኮያ ጎአምሮ ኤመታራ፡ ኢን ካሀንዳሮን ሂካ ፈል ጎአምሮ ፈላራ።” **10**
የሱሳና አባብኬሳ ሳደጉረ፡ ዴበ ሰሴታ ኦግሬነ ሃ አመ፡ “እን ሩምና አማራ፡ ኡል
ካእሰራኤል ኦሮኮ ሂካ ኣንክክ አማኖ ካአቦ እባዶ ኮና እን ላኮሄለሮ። **11** ኦሞጋና
ምና ታብያንኮና ምና ታኢያንኮ ኤሜይናራን ዋናናት ካዳሩረይ ባቦ አምን
አብራመነ፡ ይሳቃነ፡ ያይቆባነ ራቶ ሀማጽናራን። **12** ዋናናት ካዳሩረ ኤካተ
ኦኮንግረ አደ ሳርድ ጢልንጋክ ሙጉድ ቶስ ሻፋምናራን፡ ኤስ እሶን ኦታና ኢልኮ
ፎጫና ሌራ።” **13** የሱሳና ካቦሎ ዋይቻትን፡ “ሴ አማኖካ ማለ ኩን ሀሌዎ”
አመ። ካሀንዳረኬሳና ጎርሰዋ ፋዬ። **14** የሱሳ ምንካ ጴጢሮሳ ቶስ ካኮታባረ
ጎራታ ሶዶ ታጴጢሮሳ ማር ጉበ ሀዉኣማ ታሁዱርተቶ ዴ። **15** ኡሱና ገነትሴ
ካኮድንድናረ ጎራታ፡ ማር ካጉባረና ጋፋረ፤ ኬተጉደ ኡሱን ሀንዳይተ። **16** ሄመን
ላ ካኮሴታረ ጎራታ ዱርሳ ካአባመሮ ካሞጋን እባዶ የሱሳ ቶስ ከነን፡ ኡሱና
ባቲክ እያናጃል ሃፋራኬሳ ቤሰ፤ ዱኩባሌሳል ዱባና ፋይሰ። **17** ሂካኒና ካሄገሮ
እስያሳ ሃ አመ ኦአዬሰረ ሄገሮ፡ “ኡሱ ማር ኦሮክ ዱኩባ ካን አታተ ሀራኖካንና
ሰዳተ” ኦአማሜረን ሄገሮ ፈሎ ሀዬን። **18** የሱሳ፡ ካሞጋን እባዶ ኡሱ ማራሙረ

ኩኩ ካለመሮ ካኮ ድያረ ጎራታ በከኮ ጋማ ጎጎናቅናውን አጃጁ። 19 ሀሱ ጎራታ ሴራ ካሙሴ ካአጋልሰሳራ ኡሱ ቶሰ ኤመተጉረ፤ “ካአጋልሰሳቶ! እት ማንኮ ሰያቶ ዱባ እን ኩ ዴበ ሰሴይናራ” አመ። 20 የሱሳና፡ “ጌዳላጆል ጉምቢ አባ፡ ካቡባራ ክምቢርና ምን አባ፡ ኤረ ካአባዶ አደ አሰኦቴሳ ታኮፎልሲሳሮ ባንኤ ላኮአቦ” አመ አባበ። 21 የሱሳኮ ካአጋልሳታሮ ካሌራ ካካለ አባዶት ኮ አደ፡ “ጎታ! ጣይ ሴይረ እን አቦኬ ጎጎቃማላሮን እን ፈኢ ሰሰ” አመ። 22 የሱሳ አደ፡ አጎይናራን ሬስክሶ ሀቃማሌን፤ “እት ጎአመን እን ዴበ ሰሴ” አመ። 23 ኤሰኮ የሱሳ ዋላቦ ኦሮ ታበ፡ ኡሱኮ ኦአጋልሳታረና ኡሱ ዴበ ታቤን ሴተን። 24 ደራኣ ካአቲ ኢርጋዶ ኬጉረ ጋሽማሎ ዋላቦ ታ ልቕሰሮ ሻላጋመ፡ ሀሱ ጎራታ የሱሳ አደ ሁዱረ ግረ። 25 ኡሱኮ ኦአጋልሳታረና ጋባላመን ኡሱ ናባድሰን ጉሬን፡ “ጎታ! ባነዋ፡ ኖ ሃሰ” አመን። 26 የሱሳና፡ “እሰን አማኖ ኦኮንሀንቃተራ! ሙን ሂካማሌ አብሳታን?” አመ። ኤሰኮ ኬጉረ ኢርጋዶና ጋሽማሎ ሀድሰ፡ ጎርሰዋ በከ ቆደን። 27 አባዶና፡ “ሂክ ኢርጋዶና ጋሽማሎና ካኮን አጃጃማራን ምስክ አባዶትያ?” አማ ሳደን። 28 የሱሳ በከኮ ጋማ ናቀጉረ፡ ገርገሰኖ ካአማራን ኡል ጎጎጌይ ባቲክ አያናይ ኦአባማረን አባዶጃ ላማ ታኮግሬን ባንኤ ታህዌልኮ ቤንጉሬን ኡሱን ዋታ ኤሰሌን፤ አባዶና ኡሱ ራኔ ሮርን ታዋሮ ጊን ኣሎ ኦሜላንየን። 29 አሶና፡ “እት ኤረ ካዋ! ኖኔ ዋታ ሃጃ ታሜ አብታ? ጎራታ ሀጌኖን ግራን ኖ አቦሰሰን ኤመተ?” አመን ኦኬን። 30 አሶኮ አባራን ፋክንተ ታዋጋን ቦዬ ቦባይተ ግቴ። 31 ዱርሳና የሱሳን፤ “ኖ ካቤሰናቶ ጎሌተ ታዋጋን ቦዬ ኦሮድ ጎጎታብኖ ኖ ጋፋርና” አመን ኤባተን። 32 የሱሳና “ሰዬን!” አመ። ዱርሳና አባዶጃኮ በጉረ ቦዬ ኦሮዴ ታበ፡ ቦዬል ዱባና ላጋ ቃርቃራኮ ሄገልዴተ ጋንጋላተ በከ ኦሮዴተ ኡባተደ ኤነጋንተ ጎተ። 33 ቦዬል ኦፎፋሬና ባቃተን ካታማ ቶሰ ሴተን ጉሬን ካሌሮ አዬንሳ ዱርሳይ አባማን ኦግረን አባዶጃ ጉት ካፈላመሮ አየሰ ዱባ ሰሴጌን። 34 ሂካ ጋራይና ካካታማ አባዶ ዱባ የሱሳን ዋታ ኤሰልን ቤ፡ ኡሱ ካኮድያረን ጎራታ ኡልክሶ ጋፋር ጎጎቤሮን ኤባተን።

9 ኤሰኮ አባባተረ የሱሳ ዋላቦይ ታበ በከኮ ጋማ ናቀ ካታማቴሳ ቶሰ ኤመተ። 2 ኤሰኮ አባዶ ናፋለሳት ኮ አልጋይ ሰዴንጉሬን ኡሱ ቶሰ ኣተን ኤመተን። የሱሳና አማኖክሶ ዴጉረ ናፋለሳትን “ኮ አላማንደ! ጨቦካ ሀሄሶ አማመራ” አመ። 3 ሀሱ ጎራታ ሴራ ካሙሴ ካአጋልሰሳራ፡ “ሂክ ዋ ሀባራኖያ” አማ

ዋዳናትሶይ ጉምጉሙን። 4 የሱሳ ቆፋትሶ አዳሰጉረ ሃ አመ፤ “ካሜላን እየሰ ዋዳናትሰኒ ሙን ቆጋታን? 5 እፎ፤ ‘ጨቦካ ሀሄሶ አማመራ አማኖኮና’ ‘ክንጉዴ ሰሴ አማኖኮ ኤክያ ኤነ ካላራ’? 6 እየሱን ጎአመን ኤረ ካእባዶ ኡል ጉት ጨቦ ሀሄሶ ካኮአምሮ ኦዶናት ካአቦ ላኖ ጎጎአዳሳኑንያ” አመጉረ፤ ናፋለሳትነ “ክ አልጋታ ሰዳዴ ምን ጋል” አመ። 7 ናፋለሳትና ኬጉረ ምንኬሳ ጋለ። 8 ጎሳና ሂካ ካኮድያረ ጎራታ ሳደ፤ አብሲና አማጋሜንጉሬን ሂካ ኣንክክ ኦዶናት አባዶን ካሰሰሮ ዋ ጋላተን። 9 የሱሳ ኤስኮ ኬጉረ ሴታ ግራን ማቶሳ ካአማማረ አባዶት ኮ ቃራጣ ታኮሙራኔን ባንኤ ካሀማዴሮ ዴጉረ “እን ዴበ ሰሴ” አመ፤ ኡሱና ኬጉረ የሱሳ ዴበ ሰሴተ። 10 የሱሳ ምን ካማቶሳ አሞ ጉት ግራን ኦሞጋን ቃራጣ ኦኩኩይሳሬና ጨባሌይል ኤመተንጉረን ኡሱነ ዋታና ኡሱኮ ኦአጋልሳታራን ዋታ ባቦ አሞን ሀማዴን። 11 ካፋራሳው አባዶና ሂካ ካኮድያረን ጎራታ የሱሳኮ ኦአጋልሳታረ፤ “እሰን ካአጋልሰሳራ ቃራጣ ኦኩኩይሳራናና ጨባሌይልነ ዋታ ምሲ አማራ?” አመን ሆሳተን። 12 የሱሳና እሶ ካአዬሳራን ማለጉረ ሃ አመ፤ አከም ካኮንዶትሳራ ዲኩባሌሳሉንያ ኳሬ ፋያሌሳን ላኮኖ። 13 ሴየንጉዴን፤ “እን ጃርሶኮ ሮርሰ ሻጋ ጌላታራ ካአማመሮ ሃፋራኮክ ፋሬን አጋልሳዬን። እን ካኮንኤሜየራ ጨባለሳሉን ኳሬ ቁሉክ ኡምን ላኮኤሜየሮ” አማመ ማጻፋ ቁሉክ ማንኮጻፋመሮ ማራንያ አመ። 14 ሀሱ ጎራታ ካጣማቃሮ ያንሳኮ ኦአጋልሳታራን የሱሳ ቶስ ኤመተንጉረን “ኖና ፋራሳዊልና አርጌቶ ጎአጋቡይኖ ኩኮ ኦአጋልሳታራን አደን ሙን አጋቡዋና ዋታራን?” አመን የሱሳ ሆሳተን። 15 የሱሳና፤ “ካማሻሽ እሶነ ዋታ ግራን ሃሰኖን ታኤመተታ ማርት ምሲ ጋድን ዳንዳታ? ካማሻሽ እሶኮ ካኮአታምናራ ጎራታ ኤመታራ፤ ሀሱ ጎራታ አጋቡይናራን አመ። 16 “ሳርሰ ካዶእን ጉት ታኡሱብት ኤርበ ካካታራ አባዶ ላኮግሮ፤ ካካተ ጎሌ አድ ታኡሱብት ኤርበ ካዶእን ሳርሰ ጉኮ ታታርሽተጉደ ቡቶ ኢቱ ባላኣታራ። 17 ካዶእን ድንቢቶ ካኡሱብ ጣሞ ካዎይኒ ማኖና ላኮክባታሮ፤ ጎክባተ አደ ድንቢቶ ኤባራ፤ ጣሞ ካዎይኒና ኡባታራ፤ ድንቢቶና ላኦ ላኮአቦ፤ እየሱን ጎአመን ካኡሱብ ጣሞ ካዎይኒ ካኡሱብ ድንቢቶ የላማራ፤ ሂካ ጋራይ ጣሞ ካዎይኒና ድንቢቶና ጎሊዳን እስኦረ አዳላታራ።” 18 የሱሳ አባዶ አዬሰሳ ግራን፤ አይሁድኮክ ዋይቻት ኮ ኡሱ ሆረ ግልቢሰጉረ፤ “ኡኑት ግዳ ጎተታ ኔፎን ጎጎሄሶ ኤሜደ ገነታ ኤስ ጉት ካይ” አመ። 19 የሱሳና ኬጉረ ዋይቻትነ ዋታ ሴተ፤ የሱሳኮ ኦአጋልሳታረና ኡሱ ዴበ

ኬን። 20 ኤስኮ ጌስ ቶሞንኮ ላማ ዱባ ኢግ ኡባታ አቦሳ ዲያ ታግቱ ሄለልትቲ ቶ ሃሬ ኤማተጉደ ሳርስኬሳ ድንተ። 21 ኤስና ዋዳናትሴይ፡ “ሳርስኬሳ ጎድነ ሱረ ፋይናራ” አማ ግቱ። 22 የሱሳና ሃር አባባተ ሄለልትቲ ዴጉረ፡ “አላማንደ ኡኑት! አማኖካ ኩ ፋይሰራ” አመ። ሄለልትቲና ጎርሰዋ ፋይተ። 23 የሱሳና ምን ዋይቻት ቶስ ጎጎጌይ ማላካታ ኡፋፋ፡ ኦታና ኦይሳ ካግረ ጎሳ ዴጉረ፡ 24 “ዱባና ሂታኮ ብያ ኡኑ ሁዱርተታ ኳሬ ላኮጎተቶ” አመ። እሶ ጎአመን ቃጭፋታ ኦሶሌን። 25 እባዶ ምን ኦሮኮ ካኮብያረ ጎራታ ምን ኦሮዴ ታበጉረ ገነትሴ አበ፡ ኡኑና ኬተ። 26 ኦዱና ኡሱ ኡል ዱባ ዳርኣንተ። 27 የሱሳና ኤስኮ ቤ ሴታ ግራን ኢልኦ ካድያኖን እባዶ ላማ፡ “ኤረ ካዳዉተ! ማር” አማ እያ ኡሱ ዴበ ሰሴተን። 28 ኢልኦ ኦደያኖና የሱሳ ካታበሮ ምን ቶስ ዴበ ታቤን፤ የሱሳና፡ “እን ኢልኦ ኦትሰን ደንዴሲን ካዳንዳሮ ላኖ አማናታን?” አመ እሶ ሆሳተ። እሶና “እእ ጎታ” አመን አባበን። 29 ኤስኮና የሱሳ ኢልኦ ኦትሶ ድንድነጉረ፡ “አማኖክሰንክ ማለ ሀሌዎ” አመ። 30 ኢልኦ ኦትሶና ዴንዴን፤ የሱሳና፡ “ሂካ ማዮና አሮአዴሶ” አመ አታይሰ ሰገ። 31 እሶ ጎአመን ኤስኮ ቤንጉሬን ኡሱ ኡሊ ካግሮ እባዶ ዱባን ጋራ ካየሱሳ አይሴን። 32 ኢልኦ ኦኮንባናማራን እባዶጃ ኤስኮ ብያግራን ባቲክ እያና ካአባመረ ሀኢ ካአዬሶን እባዶት ኮ የሱሳ ቶስ ከነን። 33 ባቲክ እያናና ካኮብያረ ጎራታ ሀኢ ካአዬሶን አዬሳኖ ሀጋአበ፤ ጎሳና ሳደጉረ፡ “ሂካ ኣንክክ እየሰ ኡል ካአሰራኤል ሙተ ላካሶ” አመ። 34 ካፋራሳውል እባዶ አደ፡ “ኡሱ ዱርሳ ካኮቤሳራ ካዱርሳ ዋይቻይያ” አመን። 35 የሱሳ ካአይሁድ ምን ካኤብ አጋልሰሳ ግራን፡ ዋናናት ካዋኮክ ገጌሎ ላላባ ግራን፡ አደና ማር ኦሮክ ዱኩባ ካሀዉአማሮ ዱባ ፋይሳ፡ ካታማሊና ማማንጆሊ ማራሙረ። 36 ጎሳና ካፎፍሮ ካዋተ አዳድ ኣን ያዳና ካዴሮ ካሊክ ሌን ኦግራን ካኮድያረ ጎራታ ነኤይሳተ። 37 የሱሳና ኡሱኮ ኦአጋልሳታራን ሃ አመ፡ “ካኩኩአምናራ ካም ካሞጋንያ፡ ኦፈልናራን ጎአመን ኡጫርያን፡ 38 ሃንሱን ካኩኩምናሮ ካምኮክ ጎታ ኦፈላራን ካኩኩአማሮ ካም ቶስ ጎጎፋሮን ኤባየን” አመ።

10 የሱሳ ኡሱኮ ኦአጋልሳታራን እስ ቶስ ኡመጉረ ባቲክ እያናጆል ጎጎቤሰናዉና ማር ኦሮክ ዱኩባና ሀዉአም ዱባ ጎጎፋይሰናዉን እሶን ኦዶናት ሰሰ። 2 ቶሞንኮ ላማ ኦፋራማራንኮኒዕ መገክሶ ሂካያ፡ እሶና [ጴጢሮሳ ካአማመሮ] ሰሞናና አቢኬሳ እንድራሳ፡ ይሰ ካዛብዶሳ ያይቆባና አቢኬሳ ያንሳ፡ 3 ፍልጶሳና

በርተሎሜዎች፡ ቶማስና ቃራጣ ካኩኩይሳረ ማቶሳ፡ ይስ ካኢልፎሳ፡ ያይቆባና ታድዮሳ ካእማማሮ ልብድዮሳ፡ **4** ኡልኬሳን ካዉድታማሮ ሰሞና፡ ሃሬ የሱሳ ሮርስ ካስሰሮ ካእስቆሮቱ ይሁዱ። **5** የሱሳ ሂናኦ ኦፋራመራን ቶሞንኮ ላማ ሃ ካእማሮ ሀንዳነ ዎታ እሶ ፋረ፡ “እይዛብ ቶስ አሮሴቴን፤ ማኤት ታሳማርያ ካታማ ቶንሳ አሮታብቴን፤ **6** ሴቶ ጎሄሶን እዳድ እን ምን ካእሰራኤልኮ ካባየሮ ጎሳ ቶስ ሴዬን። **7** ሴየንጉዳን ‘ዎናናት ካዳሩረ ጋባላመራ’ አማ ላላባ። **8** ዲኩባሌሳልና ፋይሳ፡ ካጎየሮ እባዶና ኬሳ፡ ማሪ ባር ካእቦና ባርኮ ሙጭሳ፡ ዱርሳና ቤሳ፡ አዱ ካእታቲታና አዱ ሰሳ። **9** ኪሲትሰን ዎርቂ ሌረ ብር ታእማማቶ ማርጮኮ ጎርቱን መዳብኮ ካፈላመሮ ማራጋይ አሮክባቴን። **10** ራክሰኑና ሸለ፡ ቆሎ ላማ፡ ጎርቱን ከፈረ ጎርቱን ዳማ አሮክባቴን፤ አላንቲና ካፈላሮን ባቦ ሰሳምን ዶትሳራ። **11** “ካታማ ጎርቱን ማማን ኮ ቶስ ጎታብቴን እሰን ቆጶይን ፈኢ ካእቦ እባዶት ዶታጉዳን ኡሱ ምኒ ፎልሳዬን፤ ታቤታን ኤሰ አዳላየን። **12** ምን ካማካዮና ጎታብቴን ኖጎዳ አታ። **13** እሰን ካቆጶታራን ጎሌ፡ ኖጎዳትሰን ኡሱ ምን ሀሌቶ፡ እሰን ካቆጶኝን ጎሌ አድ፡ ኖጎዳትሰን እሰኑን ሀእባባቶ። **14** ማምሰክ እባዶትና እሰን ቆጶታና ጎዋተ ጎርቱን እሰን ካእዬሳታን ማላና ጎዋተ ሀሱ ምንኮ ጎርቱን ሀሴ ካታማኮ ብያግራን እሶን ሴርሳኖ ጎጎሌሮን ሉቃኦትሰንኮ ጎራ ሀርጉፋየንዴን ብያ። **15** አን ሩምና አማራ፡ ታፍርዳ አሪ ሀሴ ካታማይ ታግናቶ ሙሮኮ ሶዶምና ጎሞራይ ታግናታ ሙሮ ታፋፋዳተ ለታ።” **16** “እዳድ እን ሀዬይ ኦሮ እን እሰን ፋርናራ፡ ሃንሱን ሀበሳ እን ቃሮሌ፡ አራብ እን ፋያንካኒዕ ላ።” **17** “እባዶና እሰን አብጉረ ፍርዳዉን ሾንጎ ቶስ ጌሰናራን፤ አይሁድኮክ ምን ካኤብና እሰን ቦጭናራን፡ ሃንሱን እሶኮ እስኦራዬን። **18** አላንቲቲይ ሞትጆል ቶንሳ ዎኖላል ቶስ ፍርዳን እሰን ጌሰናራን፤ እሶ ሆረና አይዛብ ሆረ እን አቶ ልናታን። **19** ፍርዳን ሾንጎ ቶስ እሰን ካኮጌሴን ጎራታ መም እዬንሳ? መ አም አባብና? አም አሮያዴን፤ ሀሱ ጎራታ ታእም እዬሳን እሰኑን ሰሳንቶዋ። **20** እሰኒ ካእዬሰናራ ካዳሩረ አቦክሰንክ አያና ካዋያ ኳሬ ላኮእሰንታን።” **21** “እቢ አቢኬሳ ጎይን ሮርስ ሰሰናራ፡ ኦዶና ኤረኬሳ፡ ይንሳ እሶ ኦኡሙላራን ጉት ኪናራን፡ ላጋድሰናራን። **22** አላንቲቲይ እባዶ ዱባ እሰን ዱድናራ፤ አየሱን ጎእመን ታጋቾ ጌሮ ካእታተ ኡሱ ፋይናራ። **23** ባንኤ ቶኮ ጎሆሮሬን ባንኤ ታካለ ቶስ ባቃዬን፤ አን ሩምና አማራ፡ እሰን ታእሰራኤል ካታማል

ፈሎኦትሰን ፈል አንጉሳኖን ግራን ኤረ ካእባዶ ኤመይናራ።” **24** “ካእጋልሳታራ፡ ካእጋልሰሳሮ ካሃንዳራ ጎታኬሳኮ ላኮሮራሮ። **25** ካእጋልሳታራ ካእጋልሰሳሮ እን፡ ካሃንዳራ ጎታኬሳ እን ጎሌ ሌራ። ኦዶምኔክሶ ‘ብኤልዘቡል’ እም ጎኡመ፡ ካምን እባዶ ሂካኮ ካሮረ ካሜላን መገ ምሲ ኡምን ዋታራን?” **26** “ሃንሱን እባዶ አሮኡብሳቴን፡ ጎላተ ካግራ ዲዳ ሀቤኖን፡ ሰያመ ካግራ ሀሙቶን ላኮሂሰሮ። **27** ሃንሱን እን እስኩን ሙጉዲ ካሰገሮ ኢፋይ እዬሳ፡ ነበትሰኒ ካማልቲታን ዲዳ ቤሳ አዋጅ። **28** ሶ ላጋዲን ኳሬ ኔፎ ላጋዲን ካዳንዴኖን እባዶኮ አሮኡብሳቴን፤ ሀሱኮ ኔፎና ሶና ታባኖን ኤለኒ ባሰን ካዳንዳሮ ዋ አብሳዬን። (Geenna g1067) **29** ዶልቺ ቶይ ካዳዳላማሮ ክምብር ላማኮ ቶና ካዳሩረ ኣቦክሰንኮት ፈኢ ካላይ ኡሊ እ ላኮሂሶ። **30** መተክሰንክ ብናናኮ ዱዶ ኮና ሀሄሶን ዱባ ካቶታመያ። **31** ሃንሱን አሮኡብሳቴን፡ ካምጋን ክምብርጃልኮ ሙራትሰን ታካባጃንተታ።” **32** “እን ካክርስቶሳያ እመ ጋራኬ እባዶ ሆረ ካእቶታሮን እንና ዳሩሬ ካግሮ ኣቦኬ ሆረ አቶትናራ። **33** እየሱስ ጎእመን እባዶይ ሆረ እን ካካታሮን እንና ዳሩሬ ካግሮ ኣቦኬይ ሆረ ኡሱ ካካይናራ።” **34** “እን ካኮንኤማየራ ኡሉን ኖጎዳ ኬኒን ላኮዮ፤ ካለካለ ቤሰን ኳሬ ኖጎዳ ኬኒን ካኤመየሮ እን እስኩን አሮሌኖ። **35** እን ካኮንኤማየራ፡ ኤረ ኦዶኬሳኮ፡ ዴለልትቲ ኣየትሴኮ፡ ኦርኤረና ሶዶትሰኮ እሰኮ ዳርኢንያ። **36** እባዶን ዲና ካላራ ካኬሳ ካምን እባዶዋያ።” **37** “እንኮ ሮርስ ኣቦኬሳ ጎርቱን ኣየቴሳ ካጌላታራ ካኬ ሊን ላኮዶትሳሮ፡ እንኮ ሮርስ ባባርትት ጎርቱን ዴለልትቲ ካጌላታራ ካኬ ሊን ላኮዶትሳሮ። **38** ማሰቃልተሳ ሰዳይረ ታጎሮን እን ዴበ ካሰሰኖን ካኬ ሊን ላኮዶትሳሮ። **39** እስኦቴሳ ፋይሳይን ካዶታታራ ባሳታራ፡ እስኦቴሳ እን ማራን ሮርሳይ ሰሳይን ካዶታታራ እደ ፋይሳታራ። **40** “እሰን ካእታታራ እን አታታራ፡ እና ካእታታራ እደ እን ካፋረሮ ኦዶ አታታራ። **41** ካሄገሮና ካሄገሮኮክ መገይ ካእታታራ ካሄገሮኮት ሙራ ሄላታራ፡ ቁሉክና ቁሉማኮክ መገ ካቆጳታራ ቁሉማኮት ሙራ ሄላታራ። **42** ሃንሱን እን ሩምና አማራ፤ ማምሰክ እባዶና ሂናኣ ኦትዲጫርኮ ኮ እንኮ ካእጋልሳታሮን ቁልዱቦ ቶ በከ እምባልኒዕ ካሰሰ ኡሱ ሙራ ላኮዋሮ።”

11 የሱሳ ኡሱኮ ኦእጋልሳታራን ቶምንኮ ላማን አጃጃ ስሰ አባባተረ፡ አጋልሰሰና ላላብን ካታማልትሶ ቶሰ ሴተ። **2** ካጣማቃረ ያንሳ ምን ካሻኖ ግራን ክርስቶሳ ፈላ ኦግሮ ፈሎ ካኮማላረ ጎራታ ኡሱኮ ኦእጋልሳታራን ኡሱ ቶሰ

ፋረጉረ፡ 3 “ኤመታራ አማማት ካኑራማት ክርስቶስ አትታ? ሙ ካካለ ኡራና?” አመን ሆሳተን። 4 የሱሳና አባበረ፤ “ሴየንጉዴን ካማላታና ካድያታን ያንሳን ሰጋ። 5 እልኦ ኦድያኖና ድናራን፡ ናፋለሳልና ሰሴይናራ፡ ማሪ ባር ኦአባና ሙጭአምናራን፡ ነቤ ኦማሎና ማልናራን፡ ኦጎየራና ኪናራን፡ ህየሳሉና ካገጌሎ ዋንጋላ ላላባምናራ፤ 6 እን ካሄዳኖን ካሶማሳመያ” አመ። 7 ያንሳኮ ኦአጋልሳታራን ሴተን ካኮቡዋሬን ጎራታ፤ የሱሳ ጋራ ካያንሳ ጎሳን ሃ አመ አዬስ፡ “ቃሉላቶክ ኡል ቶስ መ ድን ቤተን? አምባል ካኦኢሳቶ ፊቀ ዲንያ? 8 ሀያ መ ድን ቤተን? ሳርስ ካኢዳሮ ካሳርሳተሮ አባዶያ? ሳርስ ካኢዳን ሳርሳቴን ኦኢዳራን ምን ካዋኖላል ግራንዋ። 9 ሀያ መ ድን ቤተን? ካሄገሮ ዲንያ? እ ዱዶዋ ካሄገሮኮና ካሮረያ። 10 ሃ አማመ ማጻፋ ቁሉክ ካኮንጻፋመራ ኡሱያ፡ ‘ራካ ጎጎኤካሰሮን ኤርግቻ ኩኮ ሆረነ ፋርናራ።’ 11 “እን ሩምና አማራ ሄለልኮ ካአላተሮ ኦሮኮ ካጣማቃሮ ያንሳ ኣንክክ ላኮግሮ። አየሱን ጎአመ ዋኖናት ካዳሩረይ ዱባንኮ ካየራታራ ኡሱ ጂናታራ። 12 ያንሳ ካኮጣማቃረ ጌሰኮ ሀጋአበረ ህታር ታ ጌሮ ዋኖናት ካዳሩረ ካሞጋን ዲዳምናራ፡ ኣሎ አታቴን ኦዶታታራን ሄላይናራን፡ 13 ኣጋልሰሰ ካሄገሮል ዱባና ሴራ ካሙሴ ታ ካጣማቃረ ያንሳ ገራኒ ሄገሮ አዬሰራን። 14 ጎርታ እሶ ካአዬሰናን አታይን ጎዶታቴን ኡሱና ኤመይናራ ካአማመረ ኤላሳ ሂካ ያንሳያ። 15 ነባ ካኦባ ሀማሎ! 16 “ህታ አላታን መነ ዋታ ሄሬግሰራ? ግያይ ሀማጼንጉሬን ሃ አማ እስ እስ ካኡማታሮ ይሰ ኣን ላራን።” 17 “ሱሱሌ ኡፋፍን ላኮዱዱርተታን፡ ቦቾ ቦቾንዋ ላኮኦቴን” 18 ያንሳ አሞኮና ጣሞኮ እስኦራተ ማንኮኤማተ ማራን ኡሱ ባቲክ አያናጃል አባ! አመን። 19 ኤረ ካአባዶ አማና ጣማ ኤመተ፡ እሶና ኡሱ ‘ካአማሮና ካጣማሮያ! ኡሱማሌ፡ ቃራጣ ኦኩኩይሳራና “ጨባለይጃል” ካጌላታሮያ አመን። ቃሩማ ጎአመን ፈሎኦትሴይ አዳሳንተ።” 20 ኤሰኮና የሱሳ ካሞጋን ባሳ ታኮፈለሮ ካታማል ጨቦኮ ማንኮ ጉላ ጋላናዋተን ማራን ሃ አመ ዋቃሴ፡ 21 “ኣኔ ኮራዝ! ኣኔ ቤተሳይዳ! እስኒ ካፈላመራ ባሳ ጢሮሲና ሰዶናይ ካፈላመሮ ሊ ግረዋ፡ ሆርኮዋ ሳርስ ጋምባላክ ሳርሳይ ቡሉሎ ማሪ ክክባይ ጨቦኮ ጉላ ጋል ግራሬንዋ። 22 ሃንሱን እን እስኔ ሃ አማራ፡ ታፍርዳ አሪ እስንኮ ሮር ጢሮስዉና ሰዶናዉን ሙሮ ሱረ ፋፋዳይናራን። 23 እት ቅፍረናሆም ዳሩር ቶስ ጦቂ ጦቂ አምን ዶታተ? አየሱን ጎአመን ቦዋ ኦሮድ ኢናታ! ኩዬ ካፈላመራ

ባሳ ሶዶሚና ፈላም ግረዋ ህታር ጊን ኤስ ካታማ ግራተዋ። (Hadēs g86)

24 ሃንሱን እን ሩምና ኩን ሃ አማራ፡ ታፍርዳ አሪ ታግናታ ሙሮ ታታኮ ሮር ሶዶሚን ፋፋዲይናታ!” 25 ሀሱ ጎራታ የሱሳ፡ “ካዳሩረና ካኡሌ ጎታ አቦ! ሂካ ቃሮሌልኮና ኦካሳንኮ ጎሊሰደ ይሱን ማንኮቱሰ ማራን እን ኩ ጋላታራ፡ አመ። 26 እ አቦክ! ሂክ ኩ ሆረ ፈኢ ታኢዳን ሌተ ኩን ሙተ። 27 “አቦክ ካመን ዱባ ኢን ሰሰራ፡ ኦዶኮ ካካለ ኤረ ካካሳ ማዮና ላኮግሮ። ኡሱማለና ኤረኮ ካካለ ኦዶ ካማላብራ ላኮግሮ፡ ኤረ ኦጌላተሮን ጎቱሰ ኳሬ ኦዶ አዴሰን ካዳንዳራ ማዮና ላግሮ። 28 “አሰን ሰዳን ካኮንኢሰላተታ! ኦሀርቱታን ዱባ እን ቶሰ ኮዬን! እንና ፎልሲ ሰሰናራ። 29 ሀርቆታኬና ሰዳዬን፡ ኢንኮና አጋልሳዬን፡ እን ዋዳናቴይ ፋያንካና ካኡብሳሮያ፡ ኔፎትሰኑና ፎልሲ ሄላይናታን። 30 ሀርቆታክ ካአሰላኖን ሰዳነትና ታፋፋድታ።”

12 ኤስኮ አባባተረ የሱሳ ታፎልሲ አሪ ዉጣ ኦሮ ማረ ሮረ፡ ኡሱኮ ኦአጋልሳታራና ማንኮኡኤሬን ማራንትኮ ሻዉዬኮ ኤብሳቴን አተን አማኖ ሀጋአበን። 2 ፋራሳዊልና ሂካ ዴንጉሬን፤ “ሂካ ዴ! ኩኮ ኦአጋልሳታራን ታፎልሲ አሪ ፈላሚን ኦዶትሶን ፈሎ ፈላ ግራን” አመን። 3 የሱሳና፡ “ዳዉተና ኡሱኮ ዋታ ካግረ አባዶ ካኮኡኤረ ጎራታ ዳዉተ ካየለሮ ላኮናባብቴታንያ? 4 ምን ካዋ ታቦ፡ ቱቃዋሉን ኳሬ ኡሱና ሌረ ዋታ ኦግሬቱን አምን ፈኢ ካሰሳምን ግሮ ካሶማሳመ ባቦ አመ። 5 አደና ቱቃዋሉን ታፎልሲ አሪ ኢግልሰንጉረን ቁሉክ ምን ካዋ ኦሮ ፈሎ ጎፈሌን ጨቦ ላናዋት ሴራ ካሙሴ ላኮናባብቴታንያ? 6 አየሱን ጎአመን እን ሃ አማራ፤ ቁሉክ ምን ካዋኮ ካሮራራ ህታኒ ግራ። 7 እን ‘ጃረሶኮ ሱረ ሻጋ ጌላታራ’ ካአማማሮ ሃፋራ መ አማኖኖ ኦአዳሳታን ሌቴንዋ ቁሉኒዕ ጉት ላኮፍርዳቴን። 8 ኤረ ካአባዶ ታፎልሲ አርዉን ጎታያ።” 9 የሱሳ ኤስ ባንኤኮ ሮረ ሴተጉረ፡ አይሁድኮክ ምን ካኤብ ታቦ፤ 10 ኤሴና ገነ ካኮናፋተተ አባዶት ኮ ግረ፤ የሱሳ ሞትን ዶተንጉሬን፡ “አይሁድን ታፎልሲ አሪ አባዶ ፋይሰን ፈኢ ሰሳንተታ?” አመን ሆሳተን። 11 የሱሳና፡ “አሰን ኦሮኮ አባዶት ኮኮት ኢዳዶ አይሁድን ታፎልሲ አሪ ጉምቢ ኦሮድ ጎኢተ፡ ኢዳዶ ካኮኢተቶ ጉምቢ ኦሮኮ ናት አሰን ላኮቤሳንያ? 12 ሀያ፡ አባዶ ኢዳዶኮ ላኮሮራሮያ? ሃንሱን ታፎልሲ አሪ ታኢዳን ፈልን ፈኢ ሰሳንተታ” አመ። 13 ኤስኮና የሱሳ አባዶት፡ “ገነታ ድሪርሳ” አመ፡ አባዶትና ገነቴሳ ድሪርሳተ፡ አንት ገነ ታኢዳንት እን ሌተ። 14 ፋራሳዊል ጎአመን

ኤስኮ በንጉራን የሱሳ ምስ ምሲ ላጋድናን ማላክዬን። 15 የሱሳ ቆፋትሶ አዴሰረ ኤስኮ ፋክ አመ። ጎሳ ካሞጋና ኡሱ ዴበ ሰሴተ፤ ካህወአማረ ዱባ ፋይሰ። 16 እስኦቴሳ ማዮና ጎሳጎግኖንኮ አታይሰ እሱን ሰገ፤ 17 ሂክ ካኮንሌራ ካሄገሮ እስያሳይ ሃ አማማን ኦሴጋመራን ሄገሮ ፈሎ ጎሳህይራውንያ። 18 “ሂክማ! እን ካአሳባዬራና እን ካጌላታራ ኡሱያ፤ ኡሱ እን ካጌላታሮና ካኮገገላታሮና፤ እያናኬ ኡሱ ጉት ካይናራ። ኡሱና ጎሳን ካሩም ፍርዳ አዋጅናራ። 19 ኡሱ ላኮደጋምናሮ ላኮናኦክናሮ፤ ራድና ያየቴሳ ካማላ ላኮግሮ። 20 ካሩም ፍርዳ ታአዎዶን ጌግን፤ ካጫንጫናመ ዕቀና ላኮኤብሰሮ። ካኢዮታሮ ካሙቃደ ሻሎና ላኮባሰሮ። 21 አይዛብና መገኬሳይ አብድ የላሮዋ።” 22 ኤስኮ አባባተረ ባቲክ እያናይ አባማኖይ ኢልኦ ድያይና ህኢ አዬሰን ካዋተሮ አባዶት ኮ የሱሳ ቶሰ አተን ኤመተን፤ የሱሳና ኡሱ ፋይሰ፤ አባዶትና ዲና አዬሰን ዳንዴ። 23 ጎሳ ዱባ ሳደጉረ፤ “ሂክ አባዶት ኤረ ካዳዉተ ሌዉና?” አመ። 24 እየሱን ጎአመን ፋራሳዊል ሂክ ካኮማላረ ጎራታ “ሂክ አባዶት ዱርሳ ካኮቤሳራ ካዱርሳ ዎይቻ ካሌሮ ብኤልዘቡልኮክ ሁናያ” አመን። 25 የሱሳና ቆፋትሶ አዴሰጉረ “እስ ኦሮ ካለካለ ካብያራ ዎኖናት ዱባ አናራ። እስ ኦሮ ካለካለ ታቤተ ካታማ ጎርቱን ምን አታይ ግርን ላኮዳንዴሮ አመ። 26 ጸላዬና ጸላየ ካቤሳቶ ጎሌተ፤ እስሰኦሮ ካለካለ ቤራን አማኖያ፤ ሃ ጎሌ አደ ዎኖናት ምስ ምሲ አታይ አልን ዳንዳራ? 27 እን ዱርሳ ካኮቤሳራ ዱርሳኮክ ዎይቻ ጎሌ፤ እስን ዴበ ኦስሰታራን አደ መይ ቤሰናራን? ሃንሱን ይሰክሰንዋ እስን ጉት ፍርድናራ። 28 እን ጎአመን ዱርሳ ካኮቤሳራ እያና ካዎይ ጎሌ ጎርታ ዎኖናት ካዋ እስን ቶሰ ኤመተራ አማኖያ። 29 “ጎርቱን አባዶት ኮ ካአቲ አባዶትኮክ ምን ታብጉረ ኡራዎኦቴሳ ሳሚን ጎዶተ፤ ጣይ ሀሱ ካአቲ አባዶት እንሺኖን ግራን ምሲ ኡሱን ኤካታ? ኡሱ ሺ ጎአባባተ ኡራዎኦቴሳ ሳሚን ዳንዳራ። 30 “ኢነ ዎታ ካሌኖን ዱባ እን ካኔባታሮያ፤ ኢነ ዎታ ካኩኩይሳኖን ዱባ ዳርአታራ። 31 ሃንሱን እን ሃ አማራ፤ ጨቦ ፈላኖና እባዶ ሀባራኖ ዱባ እባዶን ሀሄሶ አማምናራ፤ እየሱን ጎአመን እያና ቁሉክ ካሀባራሮን አደ ጨቦ ሀሄሶ ላኮአማማሮ። 32 ማዮና ኤረ ካእባዶ ጉት እየሰ ካሜላን ካአዬሳሮ ዱባን ሀሄሶ አማማራ፤ እያና ቁሉክ ጉት እየሰ ካሜላን ካአዬሳሮን አደ ሂካ አላምና ሌረ ካኤሜታሮ አላም ጨቦ ሱረ ሀሄሶ ላኮአማምሮ። (aiōn g165) 33 “ጋ ዱባ ኢልቴሳ ማንኮአዴሳማሮ ማራን

ኢል ታኢዳን ጎሳሃላታኑን ጋ ካኢዳን እስኩን ሀንግረ፤ ጋ ካሜላን እስኩን ጎሳረ
 እደ ኢል ታሜላን ሄላይናታን። 34 እስን ይስ ካሀበሳ፤ እስን ኦሜላን ጎሌታን
 ካኢዳን እየስ እዩስን ምሲ ዳንዳታን? እባዶ ዋዳናቴሳ ኦሮ ካእማጋመሮ ህኢ
 እዬሳራ። 35 ካኢዳንክ እባዶ ዋዳናቴሳይ ካእማጋመሮ ካኢዳን እዬስኬሳኮ
 ታኢዳን ቤሳታራ፤ ካሜላንክ እባዶና ዋዳናቴሳይ ካእማጋመሮ ካሜላን እየስኮ
 ታሜላን ቤሳታራ። 36 እየስኑ ጎእመን እን ሃ እማራ፤ እባዶ ካእዬሳሮ ካማድኖን
 እየስ ዱባ ማራንትኑ ታፍርዳ አሪ ሆሳምናራ። 37 ኣላንቲና እዬስካኮ ካከይ
 ቁሎይናታ፤ እዬስካኮ ካከይ እት ፍርዳምናታ።” 38 ኤስኮና ሴራ ካሙሴ
 ኦኦጋልሰሳራንኮና ፋራሳውልኮ ኮኮ የሱሳነ፤ “ካኦጋልሰሳቶ! ኖ ኩኮ ባሳክ ማላታ
 ድን ዶታና” እመን። 39 ኡሱ እደ እባበጉረ እሶነ፤ “ታሜላና ታእማኖን አላታን
 ማላታ ድን ዶታታ፤ እየስኑ ጎእመን ካሄገሮ ካዮናሳ ማላታ ኳሬ ካካለ ማላታ
 ላኮሰሳምናሮ። 40 ዮናሳ አሪ ሴንዳ ሄመን ሴድ ካንጂንክ ኩኩሉብኮክ ቦግ ኦሮ
 ጎሳኢዳላተሮይ፤ ኤረ ካእባዶ ኡሱማሌ አሪ ሴንዳ ሄመን ሴድ ኤሬ ኦሮ ቃማላም
 እዳላይናራ። 41 ካነኔዌ እባዶ ታሙርት አሪ ህታ አላታን ዋታ ከጉሬን ኡሱ ጉት
 ፍርድናራ፤ ካነኔዌ እባዶ ካዮናሳ ላላባኖ ማለንጉረን ጨቦኮ ኦጉላ ጋሌራን፤
 ግዳ ጎእመን ዮናሳኮ ካሮራራ ህታኒ ግራ። 42 ታፍርዳ አሪ ኦሮ ዋኖ ሳባ ህታ
 አላታን ዋታ ከጉደ ኡሱ ጉት ፍርድናታ፤ ታሶሎሞን ቃሩማ ማልን ኡልኮት ጋቾኮ
 ኤሜተታ፤ ግዳ ጎእመን ሶሎሞንኮ ካሮራራ ህታኒ ግራ” እመ። 43 “ባቲክ
 እያና እባዶትኮ ካኮብያረ ጎራታ ታኮፎልሳሮ ካላይ ታእንጋይደ ባንኤ በከ ዶታታ
 ካፋፋረ፤ ታዶታታረ ፎልሲ እደ ላኮሄላተ። 44 ኤስኮና ‘ካኮግረ ምን ቶስ እባባይ
 ሴዉ’ እማራ፤ እባባይ ካኮሴሮ ጎራታ ምን ሀላል ሌ፤ ሻካራመ ካሙጭመሮና
 ካኤካተሮ ሄላይናራ። 45 ኤስኮ ሴተጉረ ኡሱኮ ካሮረ ካካለ ቶዶባ ባቲክ
 እያናጆል ካሜላን አታይረ ኤመይናራ። እሶና እባዶት ኦሮ ታብጉሬን ግርናራን።
 ሀሱ እባዶትዉና ግር ካሆሬኮ ግር ካሃረ ካሜላን ልናራ። ህታ ታሜላን አላታን
 ጉት ሂካማሌ ልናራ።” 46 የሱሳ ጎሳን እዬሳ ግራን፤ ኣየቴሳና አቢላልቴሳ ኡሱነ
 ኤስልን ዶተንጉሬን ሳሬ አሌን ግረን። 47 እባዶት ኮ የሱሳነ፤ “ኣየታና አብላልታ
 ኩኔ ዋታ እዬስን ዶተንጉሬን ሳሬ አሌናን” እመ። 48 የሱሳና፤ “ኣየት አዮታ?
 አቢላልትና እዮስያን?” እመ እባበ። 49 ገነተሳና ኡሱኮ ኦኦጋልሳታራን ቶስ ቱሳ

“አየትና አበላልት ሀናኢያን፤ **50** ዳሩሪ ካግሮ አቦኬኮት ፈኢ ካፈላራ ዱባ፥ አበላልቱ አባላልቱና አጮላልቱኔያን፡፡”

13 ኤስ አሪዋ የሱሳ ምንኮ ቤጉረ ላቡ ግርዲ ሀማጼ፡፡ **2** ካሞጋን ጎሳና ኩኩአማኖኮ ካከይ ኡሱ ማረ ማንኩአበረ ማራን እሶ ባጋ ኢስጉረ ዋላቦይ ታበ ሀማጼ፡፡ **3** ካሞጋን አይንሳ ማሱሳይ ሃ አመ ሰገራ፥ “ኦታተ ካባራረ አባዶት ኮ ወጣ ወጣዬን ቤ፡፡ **4** ወጣታ ግራና ወጣ ጋምሳ ራ ግርዲ እዬ፥ ክምብርና ኤመተጉረ አባባተ አመ፡፡ **5** ጋምሳ ወጣ ታፋፋድ ሻቁሞልት ኤሬ እዬ፥ ኤሬና ታፋፋድ ማንኩሌተተ ማራን ወጣ ሳመ አላተ፡፡ **6** አየሱን ጎአመን እርት ካኩብያተ ጎራታ ቆረ ሀዲድ አሎ ዳግሳናዋትኮ ካከይ አንጋገ፡፡ **7** ጋምሳ ወጣና ኤኤን ካአቦ ሁራ ኦሮ እዬ፥ ኤኤንና ጂናተጉደ ካአላተሮ ወጣ ማርግሰ ኦሮ ሃሰ፡፡ **8** ካካለ ወጣ አደ ታኢዳን ኤሬ ጉት እዬ፥ አላተጉረ ኢል የላተ፥ ኮ ቦል፥ ኮ ሎታም፥ ኮና ሶንዶም ኢል ሰሰ፡፡ **9** ነበ ካአባ ሀማሎ!” **10** ኤስኮ የሱሳኮ ኦኦጋልሳታራና ኡሱ ቶስ ጋባላመንጉረን፥ “መወን ጎሳን ማሱሳ አይሳታ?” አመን፡፡ **11** የሱሳ አባበረ፥ “እስኩን ዎኖናት ካዳሩረኮት ሆል ማላባኖ ሰሳመራ፥ እሶን ጎአመን ላኮሰሳመሮ፡፡ **12** ካኮግሮን አዳማራ፥ ሞጋታራ፥ ካላይክኮ ጎአመን ሀሱ ካግራዋ ሱረ ኡሱኮ እታማራ” አመ፡፡ **13** ሃንሱን ሃ አማ እን ማሱሳይ ካኮን ሰገራ ሂካኩንያ፥ ዲያ ግራን ኦዴኖን ማንኩሌን ማራን፥ ማላ ግራን ኦማሎን ማንኩሌን ማራን፥ ጎርቱን ሻዳና ማንኮዋቴን ማራንያ፡፡ **14** ካሄገሮ እስያሳይ ካሰጋመራ፥ “ማላኖ ማልናታን፥ አየሱን ጎአመን ላኮሻድናታን፥ ድያኖና ድናታን፥ አየሱን ጎአመን ዎዳና ላኮአባታን፥ ሃ አማመ ካጻፋመራ እሶ ጉት ፈሎ ሀይራ፡፡ **15** ሂካ ጎሳኮት ዎዳናና ዱደታ፤ ነበትሶና ላኮማላቶ፥ ጎሳዴኖንኮ እልኦ ኦትሶ ጢጲሜራን፥ ሃ ሊ ዋተዋ ኢልኦ ኦትሶይ ዲጉረን፥ ነበትሶይ ማልጉሬን፥ ዎዳናትሶይና ሻድጉሬን፥ እን ቶስ አባባተንዋ እን እሶ ፋይሳረዋ፡፡” **16** እልኦ ኦትሰን ማንኩድያራን ማራን፥ ነበትሰና ማንኮማላቶ ማራን አደ እሶማሳንቴታን፡፡ **17** እን ሩምና አማራ፥ ኦሄገሮልና ካሞጋን ቁሉክ እባዶ፥ እሰን ካድያታን ድን፥ እሰን ካማልቲታን ማልን ሀልቻሬን፥ አየሱን ጎአመን እሶን ላኮኤካተ፡፡ **18** “ጎርታኩን እሰን ወጣ ካወጣታሮ አባዶትኮት ማሱሳ ማላ፥ **19** ዎኖናት ካዋኮክ ሃፋራ ማለጉረ ካሻዶን ማታዮት ዎዳና ኦሮኮ ካሜላን ኤሜይጉረ ካወጣመሮ ወጣ አትናራ፡፡ ጎርታ ሂክ ራ ግርዲ ካኢየሮ ወጣያ፡፡ **20** ሻቁሞልት ኤሬ ጉት

ካኢየራ አደ፤ ሃፋራ ማለጉረ ጎርሰዋ ገጌሎይ ካኢታታሮ እባዶ እን ላራ። 21

እየሱስ ጎእመን ህዲድ አሎ ዳግሰን ማንኮዋ ታንጂን ላኮአዳላታሮ፤ ሃፋራኮክ ኣላንቲ ራኮ ጎርቱን ባቃታኖ ጎኤማሮ ጎርሰዋ ሳመ ሀንዲዲፋታራ። 22 ኤኤን ሁራ ኦሮ ካኢየራ ወጣ ሃፋራ ማለጉረ ሂካ አላም ያዳኖይና ዲሩማኮት ቆፋይ ሶባማ ማርጋት ኢል ካሰሶን ወጣ እን ላራ። (aiōn g165) 23 ኤሬ ታኢዳን ጉት ካወጣመራ ወጣ ጎእመን ሃፋራ ካዋ ማለጉረ ካሻዳሮ እባዶ እን ላራ፤ ሀሱና ኢል የላታራ፤ ኮ ቦል፤ ኮ ሎታም፤ ኮና ሶንዶም ሰሰናራ።” 24 የሱሳ ካካለ ማሱሳ ሃ አመ ሰገ፤ “ዋኖናት ካዳሩረ ኢራይ ወጣ ካኢዳን ካወጣተሮ እባዶት እን ላራ።

25 እየሱስ ጎእመን እባዶ ዲባ ሁዲረ ግራን ዲናኬሳ ኤመተጉረ ዳርጋማቴሳ ኦሮ ሻራፋ ወጠ ሴቱ። 26 ዳርጋማና አላተዴ ኢል የላታኖ ካኮሀጋአባተ ጎራታ ሻራፋና ዋታ ሙተ። 27 “ኦዶ ኢራን ኦፈላራን ኡሱ ቶሰ ኤመተንጉረን ‘ጎታ! እራ ኦሮ ላ ወጣ ካኢዳን ወንጠነላ? ሀያ ሻራፋ ሀገኮ ኤመተ?’ አመን። 28 “ኡሱና፤ ሂኒዕ ፈሎ ኦዲናያን’ አመ። “ኦሀንዳሬና ‘ሴይጉክ ሻራፋ ጎጎታታግኖን ዶታታ?’ አመን ሆሳተን። 29 “ኡሱ ጎእመን ላ’ አመ፤ ‘ኣላንቲና እሰን ሻራፋ ታታጋና አማ ዳርጋማ ዋታ ታታይዳንዋ፤ 30 እሳጋ፤ ካም ኩኩ ታኮአማሮ አሪ ታ ጌሮን ራቶ ሀጂናተ፤ ኤሰሪ ኦማጣራናኔ ጣ ሻራፋ ታታጋ፤ ኤለኒ ጎጎጉባምሮ ካባል ካባሊ ሻ፤ ዳርጋማ ጎእመን ኩኩይሳጉዴን ጎታራቴይ ክባ እን አምናራ አመ።” 31 የሱሳ ካካለ ማሱሳ፤ “ዋኖናት ካዳሩረ እባዶት ኮ አተረ ኢራኬሳይ ታወጣተሮ ትጫርት ታሰናፍጭ ኢል እን ላታ። 32 ሰናፍጭኮት ኢል ካካለ ወጣጆል ዲባኮ ታየራታቶ ኢል ጎሌተና፤ አላይደ ጎጂናቶ አደ ጋጆል ዲባኮ ሙይተጉደ፤ ጉንተ ካቡባራ ክምብርጆል ኤመተጉረ ባላል ጉት ምን ካኮማዳራሮ ጋ እን ላራ” አመ። 33 ግዳና የሱሳ ካካለ ማሱሳ፤ “ዋኖናት ካዳሩረ ሄለልትቲ ቶ ጣመ ሴድ ጋልተ ኤካሰ አተዴ ርግደ ታለሌደቶ ኢርሾ እን ላታ” አመ። 34 የሱሳ ጎእመን ሂካ ዲባ ጎሳን ማሱሳይ እዬሰ፤ ማሱሳ ካላይ ካእዬሳመራ እየሰ ኮና ላኮግረ። 35 ህክና ካሄገሮይ ሃ አማመ ካእዬሳመረ ፈሎ ሀዩ። ህክና፤ “ህኢቲ ማሱሳይ ባናይናራ፤ አላም ታኮመጣመሮኮ ሀጋእበረ ሰያመ ካግሮ እዬሰናራ።” 36 ኤሰኮ የሱሳ ጎሳ ኢሰጉረ ምን ታበ፤ ኡሱኮ ኦኢጋልሳታረና ኡሱ ቶሰ ጋባላመንጉረን “እራ ኦሮ ካግሮ ሻራፋ ማራን ካእዬሰቶ ማሱሳኮት ፋሬን ኖን ሰጊና” አመን። 37 የሱሳና፤ “ካኢዳን ወጣ ካወጣተራ ኤረ ካእባዶያ፤ 38 እራና ሂካ አላምያ፤ ካኢዳንክ

ወጣና ዋናናት ካዳሩረኮክ እባዶ ቱሳራ፥ ሻራፋና ካጸላየ እባዶኮክ ጋራ ቱሳራ፤

39 ዉጠጉደ ታሴተታ ዲና ጸላዬታ፤ ዉጣ ታኮኩኩአምናራና አላምኮክ ጋሻ ጎሌሮ ኦማጣርናራና አደን ኤርግቻልያን። (aiōn g165) **40** “ሻራፋና ታታጋመጉረ ኤለኒ ጎጎጉባማሮ አላምኮት ጋሻ ሂካማሌ ልናታ። (aiōn g165) **41** ኤረ ካእባዶ ኤርግቻኬሳ ፋርናራ፥ እሶና ጨቡን ኣላንቲ ኦሌራና ታምላን ኦፈላራን ዱባ አባብጉረ ዋናናትኬሳኮ ቤስናራ። **42** ኦታና ኢልኮ ፎጫኖ ማንኮግሮ ታቤባቶ ኤለኒ ኦሮዴስ እሶ ሉጉድናራ። **43** ሀሱ ጎራታ ቁሎለ ኣቦክሶክ ዋናናት አርት ኣን ሀንቃይናራን። ነበ ካእባ ሀማሎ። **44** “ዋናናት ካዳሩረ አራ ኦሮ ኦስያምራን ኡራዋ ኣን ላራ። እባዶት ኮ ኦሄላተሮ ሂናኣ ኡራዋ አባበ ሰያንሳተ፥ ገጌላታኖኮ ካከይ ካእቦ ዱባ ዳዳላተጉረ ኤስ ታኢራ ባንኤ አምናተ። **45** “ኡሱማለና ዋናናት ካዳሩረ ካእዳንክ ኢንቁ አምናይን ካዶታታሮ ናጋደት ኣን ላራ። **46** ኣሎ አዉኣሎክ ኢንቁ ካኮሄላታረ ጎራታ ቤተጉረ ካእቦ ዱባ ዳዳላተጉረ ኡሱ ኢንቁ አምናተ። **47** “አደና ዋናናት ካዳሩረ በከ ኦሮ ጎሉጉድራን ሳኒ ካሞጋን ኩኩሉብ ታአባቶ ማራብ ኣን ላራ። **48** ኩኩሉብ ኦአባታራና ኩኩሉብ ማራብ ካኮአማጋማረ ጎራታ ጊቲን ባጋ ቶስ ቤስን፥ ኤስኮ ሀማጽንጉሬን ካእዳን ካእዳን አሳቤን ዳቕል ኦሮዴሴን ክበክ፤ ካሜላን ካሜላና ጎአመን ቤስን ሻፌን። **49** ካጋቕ ጌስና ሂካማሌ ልናራ፥ ኢርግቻና ኤሜይጉረ ጨባለይ ቁሎሌኮ አሳብጉረ፤ (aiōn g165) **50** ኦታንና ኢልኮ ፎጫኖ ማንኮግሮ ታባኖን ኤለን ቶስ ሉጉዳምናራ።”

51 የሱሳና፥ “ሂክ ዱባ እስኩን ታበራ?” አመ። እሶና “እ” አመን። **52** የሱሳ ሃ አመ አባበ፥ “ሂክ ሃ አማኖ መተመቲ ቤራ ካሙሴ ካአጋልሰሳራ ኡሱና ዋናናት ካዳሩረ ኡሱኮ ካአጋልሳታሮ ካሌራ ካኡሱብክና ካዶኣንክ ጎታራኮ ካቤሳሮ ኦዶ ኣን ላራ” አመ። **53** የሱሳ ሂናኣ ማሱሳጆል አዬስ ጎጎጉድሴይ ኤስ ባንኤኮ ኬጉረ ሴተ። **54** ኡልኬሳ ቶስ ኤመተጉረ አይሁድኮክ ምን ካኤብ ኦሮ ጎሳ አጋልሰሳኖ ሀጋአበ፥ እሶና ማማ ሃ አመን፥ “ሂክ እባዶት ህታ ቃሩማና ሂካ ባሳ ካኮፈሎ ሁና ሀየኮ ሄላተራ?” **55** “ሂክ ላኤረ ካእናጢትዮላ? ኣየቲሳክ መገ ላ ማይራመ አማራና? አቢላልቲሳ አደ ያይቆባ፥ ዮሴፋ፥ ሰሞናን ይሁዳኔያና? **56** አባላልተሳና ዱባ ላ ኖኔ ዋታ ግራና? ሀያ ሂክ እባዶት ሂካ ዱባ ሀየኮ ሄላተ?” **57** ሃንሱን ኡሱ ሀአታኖን ሄሴን። የሱሳ ጎአመን “ካሄገሮ ካኮካባጃሞን

ኡልኬሳይና ምንኬሳ ካላልያ” አመ። 58 እሶ አማናናዋትኮት ኣላንቲ ካሞጋን ባሳ ኤስ ላኮፈለ።

14 ኡሱ ጎራታ ካጋሊላ ኡል ቃላዳኬሳ ካባሪሳረ ሞት ሄሮዶስ፡ አታን ካየሱሳኮክ ጋራ ማለ፡ 2 ኡሱን ኦሀንዳሬን፤ “ሂክ ሃ ጎሌ ካጣማቃራ ያንሳ ጎይኮ ኬጉረ ኤመተራ አማናያ፡ ሂክ ካሳዳማራ ባሳ ዱባ ካኮፈለመራ ኡሱያ” አመ። 3 ጣየ ሄሮዶስ ኢቢኬሳ ፍልጶሳኮት ኦር ሄሮድያዳኮት ኣላንቲ ያንሳ ኡብስስጉረ ምን ካሻኖ ታብሰረ። 4 ኣላንቲና ያንሳ ሄሮዶስ፤ “ኢቢካት ኦር ጎሳኦታቶ ሴራ ፈኢ ላኮስሳሮ አማ ግረ።” 5 ሃንሱን ሄሮዶስ ያንሳ ላጋዲን ዶተጉረ ጎሳና ኡሱ ካሄገሮ እን ማንኮድያሮ ማራንትኮ ኡብሳተ። 6 ሄሮዶስ ኡሱ ታኮአላተሮ አሪ ካባጃታ ግራን ታሄሮድያዳ ኤረ ኤመተዴ ማርት ሆረ ማዳር ካዱዱሮይ ማንኮገጌላይስ ማራን፡ 7 ኤስ ካሆሳተ ዱባ ኤስን ሰሰን አማቶ ታብ። 8 ኡኑትና ኣየትሴት ማርካ አታተደ፡ “ካጣማቃሮ ያንሳኮክ መተ ታላኣይ ጉት ካይጉደ እን ሰሰ” እንተ። 9 ሀሱ ጎራታ ዋናና ጋዴ፡ ሀሌዋ ኳሬ አማቶኦቴሳ ማራና ኡሱካ ዋታ ታግቴ ማርት ማራን ሆስንትሴ ጎሳኣባባቶ አጃጂ። 10 ምን ካሻኖ ቶስ እባዶ ፋረጉረ ካያንሳ መተ ማርግኮ ጎሰሰ። 11 ካጎሳመሮ መተና ታላኣይ ካየጉረ ኡኑቲን ሰሰ፡ ኡኑትና ኣተጉዴ ኣየትሴዉን ሰሰ። 12 ያንሳኮ ኦኦጋልሳታረና ሬስ አታቴንጉሬን ቃማሌን፤ ኤስኮና ሰተንጉረን ካሌሮና የሱሳን ሰገን። 13 የሱሳና ካሌሮ እየሰ ካኮማላረ ጎራታ ታኮግረኮ ኬጉረ ካለት ባንኤ ቶ ቶስ ዋላቦይ ታብ ሴተ። ጎሳና ሂካ ማለጉረ ካታማልኮ ሉኪ ኡሱ ዴብ ሰሴተን። 14 የሱሳና ዋላቦኮ ዳጋግራን ካሞጋን ጎሳ ዴጉረ ነኤኤይሳተ፤ ዱኩባልክሶኮና ፋይሰ። 15 ኡል ሄመን ላ ካኮሴታረ ጎራታ የሱሳኮ ኦኦጋልሳታረና ኡሱ ቶስ ጋባላመንጉረን “ሀት ባንኤ ኮና ታኮግሮን ቃሉላቶክ ኡልያ፤ ጎራታና ሄመን ማንኮላሮ ማራን፤ ማማንጂልኮ ሴይጉሬን ካአምራን ባቦ ጎሳአምናራዉን ጎሳ ጋፋርና” አመን። 16 የሱሳ ጎአመን “እሶ ሴይን ላኮዶትሳሮ፡ እሶ ካአምራን እስንዋ ሰሳ” አመ። 17 እሶና፡ “ኖ ሀታኒ ካአብና ባቦ ብጠ ከና ኩኑኡብ ላማ ካላል አብና” አመን። 18 የሱሳና፡ “እላ ካአብታን እን ቶስ ኬና” አመ። 19 ኤስኮና ጎሳ ኤስ ጉት ጎሳሀማጽሮን አጃጂ ሰሰ፤ ባቦ ብጠ ከና ኩኑኡብ ላማና ኣተጉረ ኤልዴ ዳሩሪ ቶስ ዱያ ጋላቴረ ባቦኮ ኢብስ ኣተጉረ ኡሱኮ ኦኦጋልሳታረና ሰሰ፡ እሶና ጎሳን ሰሰን። 20 ዱባና አመን ባራረን፤ ኤስኮና ኡሱኮ ኦኦጋልሳታረና ታሄስቶ ሀንባ

ዱጉድ ቶሞንኮ ላማ ምግ ኬሴን። **21** ካኣመረ አባዶ ሄለልና ይሰ ካላይ ኩማ ከን ካሌሮ ባባርዮ። **22** ጎርሰዋ ኡሱኮ ኦኦጋልሳታረን ዋላቦይ ኮራይጉሬን ኡሱኮ ጣይ በከኮ ጋማ ጎናቅናውን አጃጃጉረ፤ ኡሱን አደ ጎሳ ጋልሰን ሃር ሄሰ። **23** የሱሳ ጎሳ ጋልሰ አባባተረ ኤባይን ኬ ዋዳም ቶሰ ቤ። ኡል ታሙጉድ ሌሮን ካለካለ ኤሰ ግረ። **24** ሀሱ ጎራታ ዋላቦና ባጋኮ ፋክ አንተ ጎሰ ሴታ ግራን አምባል ኬተጉደ ጋሽማሎና ሆረ ሃር ሻፋኖ ሀጋአበ። **25** ሄመንኮ ሳቲ ሳጋልኮ አባባተረ የሱሳ በከ ጉት ሰሴታ ኡሱኮ ኦኦጋልሳታረን ቶሰ ኤመተ። **26** ኡሱኮ ኦኦጋልሳታረና ኡሱ በከ ጉት ሰሴታ ካኤሜታሮ ካኮድያረን ጎራታ አብሳተንጉረን፤ “ህት ጋርታ” አማ ኦኬን። **27** ጎርሰዋ የሱሳ እሶነ፤ “አላማንደ! አንያ። አሮአብሳቲን” አመ። **28** ጴጢሮሳና፤ “ጎታ! ጎአትቶ አን በከ ጉት ሰሴታ ኩ ቶሰ ጎሳኤሜሮን እን አጃጃ” አመ። **29** ኡሱና፤ “ኮያ” አመ። ጴጢሮሳና ዋላቦኮ ዳገጉረ በከ ጉት ሰሴታ የሱሳ ቶሰ ኤመታኖ ሀጋአበ። **30** አየሱን ጎአመን አምባልኮክ ሁና ካኮድያረ ጎራታ አብሳተ፤ በከይ ኤንጋማኖ ካኮሀጋአባረ ጎራታ “ጎታ! አን ሃሰ” አመ ኦኬ። **31** የሱሳ ሳመ ገነቲሳ ድሪረሳተ ኡሱ አበጉረ፤ “አት አማኖ ካኮህንቃተራ! ሙን ሄዳተ?” አመ። **32** የሱሳና ጴጢሮሳ ዋላቦ ጉት ኮራታዋ አምባል ጫልኢ አንተ። **33** ዋላቦይ ኦሮ ኦግረን፤ “ሩምና አት ኤረ ካዋታ” አመንጉረን ግልቢሴን ኡሱን ሳጋደን። **34** የሱሳና ኡሱኮ ኦኦጋልሳታረን በከኮ ጋማ ናቄንጉሬን ገንሳረጢ ታአማማቶ ባንኤ ቶሰ ጌን። **35** ኡሱ ኡልክ አባዶ የሱሳ ላኖ ካኮአዴሳረ ጎራታ ጎበቢ ካግሮ ማማንጆል ዱባን ሀንዳ ፋረን፤ ካህወአማሮ አባዶ ዱባ ኡሱ ቶሰ ኬንሰሴን። **36** ኦህወአማራና ሳርስኬሳኮት ሻርፍ ታላል ድንኒን ፈኢ ጎሳሰሰሮን ኤባተን። ኡሱ ኦድኔን ዱባ ዱዶ ፋዬን።

15 ኤስኮና ኢየሩሳሌምኮ ኦኤሜተራን ፋራሳዊልና ሴራ ካሙሴ ኦኦጋልሰሳራን የሱሳ ቶሰ ጋባላመንጉረን፤ **2** “ኩኮ ኦኦጋልሳታራን ዋጋ ካኦዶላል ካኮኢግልሳራን መወንያ? ባቦ አምን ገነትሶ ላኮአላራን” አመ። **3** የሱሳና ሃ አመ አባበ፤ “አሰና ዋጋክሰኑን እንቴንጉደን አጃጃ ካዋ ሙን ኢግልሳታን? **4** ዋ፤ ‘ኣቦካና ኣየታ ካባጁ’ ማዮና ኣቦኬሳ ጎርቱን ኣየቱሳ ጉት ካሜላን ሃፋራ ካኤንጌ ካአዬሳራ ሀጎየ አም አጃጃ ጎሰሰሮ፤’ **5** አሰን ጎአመን ኣቦኬሳ ጎርቱን ኣየቱሳ፤ ‘አን እሰኑን ሰሰን ካዶትሳሮ ጋርጋርሳ ዋወን ጃርሶ የለ አን ሰሰራ’ ጎአመ። **6** ሀሱ አባዶት ‘ኣቦኬሳ ጎርቱን ኣየቱሳ ካባጅን ላኮዶትሳሮ’ አማታን፤ ሃንሱን ዋጋክሰኑን

እንቴንጉደን ሃፋራ ካዋ ኢግልሳታን። 7 እሱን ኢፍሳደለ እስያሳ እሱን ማራን ሄገሮ ካእዬስራ ሩምያ። 8 “ሂክ ጎሳ እን ህኢ ካባጃራ፤ ዋዳናትሶ ጎእመን እንኮ ፋክ ታእንተታ፤ 9 እሶ እን አዲ ሄደይሳታራን፤ አጋልሰስክሶና ዋጋ ካእባዶ ማሌያ።” 10 የሱሳ ጎሳ እሰ ቶስ ኡመጉረ ሃ አመ፥ “ማላ! ሻዲ! 11 እባዶ ካባቶይሳራ ህኢኮ ካበያሮ ኳሬ ህኢ ኦሮዴ ካታባሮ ላኮዮ!” 12 ኤስኮና ኡሱኮ ኦአጋልሳታረን ኡሱ ቶስ ጋባላመንጉረን “ፋራሳዊል እት ካእንተቶ ማለንጉሬን ጎጎእማራቴራን ዴተ?” አመን። 13 የሱሳ ጎእመን፥ “ካዳሩረ ኣቦክ ካእባሮን አላት ዱባ ታጋምናራ። 14 አሳጋ፥ ኢልኦ ኦድያኖን ኦቃጄልሳራን እሶ ኡሱን ኢልኦ ኦደያኖንያን። እልኦ ካድያኖን ኢልኦ ካድያኖን ጎገጌስሮ እሶ ላማ ራቶ እሰ አባተን ላጋ ኦሮዴን ኢያራን።” 15 ጴጢሮሳና የሱሳን፥ “ማሱሳኮት ፋሬን ኖን አዴሰሰ” አመ። 16 የሱሳና ሃ አመ፥ “እሱን ግዳግን ላኮሻዴታን አማኖ?” 17 “ህኢኮ ካታባራ ዱባና ቦግ ኦሮዴ ታበጉረ ኤስኮና ሳርዴ ካበያሮ ላኮካሳንያ? 18 ህኢኮ ካበያራ ጎእመን ዋዳናኮ ካበያሮያ፥ እባዶና ‘ካባቶይሳራ’ ኡሱያ። 19 ታማላን ቆፋ፥ ኔፎ ላጋዳኖ፥ ላይማኖ፥ ሻርሙጣኖ፥ ሄታኖ፥ ጣራ አቶታኖና መገ ባሳኖ ሂክ ዱባ ዋዳናኮ ክያራ። 20 እባዶ ‘ካባቶይሳራ’ ሂካያ ኳሬ ገነኖ ህኢኡን ባቦ ኣማኖ አባዶ ላኮ ባቶይሳሮ።” 21 የሱሳና ኤስኮ ቤጉረ ጢሮስ ቶንሳ ሰዶና ካእማማሮ ካካታማ ጎቦብ ቶስ ሴተ። 22 ካካናእን ኡልኮት ሄለልትቲ ቶ ኡሱ ማማንኮ ቤተጉደ የሱሳ ቶስ ኤመተዴ “ጎታ! ኤረ ካዳወተ ኢን ነኔኤይሳና፥ ኤረት ባቲክ አያይ አባንተጉደ ኣሎ አቦሳታ አንተ ኦኪተ።” 23 የሱሳ ጎእመን ሃፋራ ኮና ላኮአባበ፥ ሀሱ ጎራታ የሱሳኮ ኦአጋልሳታረን ኡሱ ቶስ ኤመተንጉረን “ህት ሄለልትቲ ኖ ዴበ ሰሴታ ኢያታ ኤስ ጋልሰዋኢስ?” አመን ሆሳተን። 24 የሱሳና አባበረ፥ “እን ካኮንፋራመራ ምን ካእስራኤልኮ ካባየሮ አዳድጆል ካላሉንያ” አመ። 25 ሄለልትቲና ሉክቴሳ ጉት ኢተጉደ “ጎታ ኢን ጋርጋርና!” እንተ። 26 የሱሳና አባበረ፥ “ባቦ ካይስ ኣትጉረን ከሮሩን ሻፋኖ ላኮ ዶትሳሮ” አመ። 27 ኤስና፥ “እ ጎታ!” “ከሮርና ኦዶኬሳት ዱጉድኮ ታኢተቶ ኦሮንት አማራ” እንተ። 28 ሀሱ ጎራታ የሱሳ፥ “እት ሄለልትቲ አማኖካ ካእቲያ! ሀልቻካክ ማለ ኩን ሀሌዎ” አመ። ኡኑትና ሀሱ ጎራታኮ ሀጋኣብተደ ፋይተ። 29 የሱሳ ኤስኮ ኬጉረ ታጋሊላ ላቡ ግሪ ታግቶ ባንኤ ሴተጉረ ዋዳም ቶስ ቤ ኤስ ሀማጼ። 30 ቶቶይ ካሞጋን ካሌ ጎሳና ካኤሳረ፥ ኢልኦ ካድያኖን፥ ናፋላሳል፥ ህኢ ኦእዬሶን፥

ኡሱማለና ካካለክ ካሞጋን ዲኩባሌሳል አበን ኡሱ ቶስ ኬንጉረን ሉቃቴሳ ሄገሊ ሀማጽሴን፤ ኡሱና ፋይሰ። **31** ጎሳና ህኢ ካእዬሶና አዬሳኖ፣ ናፋለሳልና ኢዳኖ፣ ካኤሳረና ቱኩል ኣል ሰሴታኖ፣ ኢልኦ ካድያኖና ድያኖ፣ ካኩደያረን ጎራታ፣ ካእሰራኤል ሄዶ ጋላተን። **32** የሱሳ ኡሱኮ ኦአጋልሳታራን ኡመጉረ “ጎሳ ኢነ ዋታ አሪ ሴድ ማንኮሀየሮ ማራን ካእምራን ማንኮዋተናን ማራን እን እሶን ነኤይሳታራ፣ ራድ ኡኢጉሬን ኡል ጎጎኢኖንኮ ኡኢነ ጋፋርን እን ፈኢ ላኮሰሰናሮ” አመ። **33** ኡሱኮ ኦአጋልሳታረና “ሂካ ኮና ካላይክ ቃሉላቶክ ኡል፣ ሂካ ጎሳ ዱባን ካሌሮ ባቦ አምሰን ኖ ሀየኮ ሄልናና?” አመን። **34** የሱሳና፣ “ጎሌና እሰን ባቦ ብጠ ምያ አብታን?” አመ ሆሳተ። እሶና፤ ባቦ ብጠ ትትጫር “ቶዶባና” “ኩኩብፈጃ ኦትትጫር አብና” አመን። **35** ኡሱና ጎሳ ኡል ጎጎሀማጽኖን ፈኢ ሰሰ፤ **36** ባቦ ብጠ ቶዶባና ኩኩብፈጃ አበጉረ ዋ ሶማሳተ አባባተጉረ ባቦ ኤኤብሰ ኡሱኮ ኦአጋልሳታራን ሰሰ፣ እሶና ጎሳን ሄደደን። **37** ዱባና አመን ባራረን፣ ኡሱኮ ኦአጋልሳታረና ታሄሰቶ ሀንባ ዱጉድ ቶዶባ ምግ ኬሴን። **38** ካአመረ አባዶና ሄለልና ይንሳ እንቶታሞኒ ኩማ አፋር ባባርየ። **39** የሱሳ ጎሳ ጋልሰ አባባተረ ዋላቦይ ታበረ ካመገደል ኡል ቶስ ሴተ።

16 ፋራሳዊልና ሶዶቃውል የሱሳ ቶስ ጋባላመንጉረን ጫፍን ዶተንጉሬን፣ “ዋኮ ማላታ ኖን ቱስ” አመን ሆሳተን። **2** ኡሱና አባበረ፣ “ሄመን ‘ዳሩር ሄላ ጎሌቶ ጫምናራ’ አማታን። **3** ባባርንሳ ‘ዳሩር ጋምባላ ሌተ እስላተታ፣ ሃንሱን ኢዳሞ ኡባይናራ’ አማታን፣ ታዳሩረ ምዲ ማላቢን ዳንዳታን፣ አየሱን ጎአመን ጌሰኮክ ማላታ አዴሰን ላኮዳንዳታን። **4** ታሜላና ታሻርሙጣታ አላታን ማላታ ዶታታ፣ አየሱን ጎአመን ካዮናሳ ማላታ ኳሬ ካካለ ማላታ ላኮሰሳማሮ” ኤሰኮ የሱሳ እሶ ኢሰ ሴተ። **5** የሱሳኮ ኦአጋልሳታረን በከኮ ጋማ ካኮናቃሬን ጎራታ ባቦ አባታኖ ኢሎተሬን። **6** የሱሳና፣ “እስኦራዬን” “ታፋራሳውልና ታሶዶቃውልኮት ሜላነኮ እስኦትሰን ኦራዬን” አመ። **7** እሶና እስእስኦሮ፣ “ኖ ባቦ ሀአባኖኒ ማንኮማኖ ማራን ሌራ” አመን። **8** የሱሳና ቆፋትሶ አዴሰረ፣ “እሰን አማኖ ኦኮንሀንቃተራ! እሰን እስእስኦሮ ባቦ አባታናዋት ሙን አዬሳታን? **9** ባቦ ብጠ ከኖ ኩማ ከን አባዶን ሌጉረ ዱጉድ ምያ ፋላይተ ካኬሰታን ላኮሻዳታንያ? **10** ኡሱማለና ባቦ ብጠ ቶዶባ ኩማ አፋር አባዶን ሌጉረ ካፋላየሮ ዱጉድ ምያ ሆረኮ ኬሰታን ዋዳናይ ላኮአባተታን አማኖያ? **11** ሀያ እን እስኩን ካሰጌራ ጋራ

ካባቦ ላናዋት ምሲ ሻዳናዋታን? ግዳና ታፋራሳውልኮና ታሶደቃውል መላነኮ
 እስኦራዬን።” **12** ኡሱ እሱን እስኦራዬን ካኮንእመራ ካሚ ታክባማቶ ኢርሾ
 እንሌኖን ግራን፤ ፋራሳውልኮክና ሶደቃውልኮክ እጋልሰሰኮ እስኦራዬን ካእማሮ
 ላኖ እሱን አዳሳመ። **13** የሱሳ ኡል ካፍልጺሰዮሳ ቅሳርያ ካእማማሮ ኡል
 ካኮግያረ ጎራታ ኡሱኮ ኦእጋልሳታረን፤ “እባዶ ኤረ ካእባዶ እዮያ አማራን?” አመ
 ሆሳተ። **14** እሱና፤ “ኮኮ ካጣማቃሮ ያንሳያ፤ ካካለ አደ ኤላሳያ፤ ኩክና አደ
 ኤርማሳያ፤ ጎርቱን ካሄገሮልኮ ኮያ” አማራን አመን። **15** የሱሳና፤ “እሰን አዴን
 እን እዮያ አማታን?” አመ። **16** ሰሞና ካእማማራ ጴጢሮሳና፤ “አት አርዶክ
 ኤረ ካዋ ክርሰቶሳታ” አመ አባባ። **17** የሱሳና ሃ አመ “ኤረ ካዮና ሰሞና! አት
 ካሶማሳንተታ፤ ሂካ ኩን ካቱሰራ ዳሩሪ ካግሮ እቦኬ ኳሬ እባዶ ላኮዮ።” **18**
 አት ጸጢሮሳታ፤ ሂካ ኤኤሞ ጉት አማኒል ካኮኩኩአምሮ ምን እን ማዳርናራ፤
 ታባኖን ኤሌንኮክ ሁናና ኡሱ ምን ላኮአዎድሮ። (Hadēs g86) **19** ዎኖናት
 ካዳሩረ ካኮባናራን ቁልፍ እን ኩን ሰሰናራ፤ አት ኡል ካሺተ ዳሩሪ ካሽያመ
 ልናራ፤ አት ኡሊ ካፋርተና ዳሩሪ ካፋራመ ልናራ።” **20** ኤሰኮ አባባተረ ኡሱ
 ክርሰቶሳ ላኖኬሳ ማዮና ጎሳእዬሶንኮ ኡሱኮ ኦእጋልሳታሬኑን አታይሰ ሰገ። **21**
 የሱሳ ሀሱ ጎራታኮ ሀጋእበጉረ “ኢዮሩሳለም ቶሰ ሴይጉረ ኤሴና ገነ ታጃርሶላይ፤
 ቱቃሞልኮክ ዎይቻልና ሴራ ካሙሴ ኦእጋልሰሳራንኮት ገነይ ራኮ አታይረ
 ካጎይናሮና አሪ ታሴድ ጎይኮ ክያኖ” ካዶትሳሮ ላኖ ኡሱኮ ኦእጋልሳታሬኑን ሰጋኖ
 ሀጋእበ። **22** ጴጢሮሳና የሱሳ ካለ አተ ቤጉረ፤ “ጎታ! ሂካ እንክክ እየሰ ኢጂ ኩ
 እሮጌኖ” አማ ሀዲሳኖ ሀጋእበ። **23** የሱሳና ጴጢሮሳ ቶሰ ካምባል አመረ፤ “አት
 ጸላየ ሂታኮ ቡይ! ቆፋ ታእባዶ ኳሬ ቆፋ ታዋ አዴሰን ማንኩዳንዴኖን ማራን አት
 እን ሀንዱዱፎ ላታ አመ።” **24** ኤሰኮና የሱሳ ኡሱኮ ኦእጋልሳታረን፤ “እን ዴበ
 ሰሰዪን ካጌላታራ እስኦቱሳ ሀካካቶ፤ ራኮዉና ጎይን እስኦቱሳ ሮርሳይ ሰሳይረ እን
 ዴበ ሀሰሴቶ አመ። **25** ኔፎቱሳ ሃሳይን ካዶታታራ ዱባ ባሳታራ፤ እየሱን ጎእመን
 ኔፎቱሳ እን ማራን ካባሳታራ ዱባ ሄላታራ። **26** እባዶ አላም ዱባኮ ዎረኤ
 ጎሄላተ፤ ኔፎ ጎእመን ጎዋተ መ ላኦ ሄላታራ? ጎርቱን ኔፎኮት ባንኤ መ ሙራ
 ሄላይናራ? **27** ኤረ ካእባዶ እቦኬሳኮት ካባጃይ ኤርግቻን ዎታ ኤመይናራ፤
 እባዶን መተመተይ ፈሎኦቱሳክ ማለ ሙራ ሙርናራ። **28** እን ሩምና አማራ፤

ህታኒ ካግሮ እባዶኮ ኤረ ካእባዶ ዋኖ ሌ ኤመታ ግራን ታ ዳሮን ካጎኖን እባዶ ግራ።” አመ።

17 አሪ ሌኮ አባባተረ የሱሳ ጸጢሮሳኔ፥ ያይቆባነ፥ ኡሱማሌ ካያይቆባ አቢ ያንሳኔ ዋዳም ቶ ታንጂንት ጦቂ ታአንተ ቶስ ካለ አተ ቤ። **2** ኤስ እሶ ሆረ ምዲቲሳና ኢግልሳንተ፥ ሆረቲሳ አርት እን ሀንቃይተ፥ ሳርስኬሳና ኢፋ እን ዋላ አመ ሀንቃዩ። **3** ኤስኮና ሙሴና ኤላሳና የሱሳን ዋታ አዬሳ ግራን ሙተን። **4** ጸጢሮሳና የሱሳነ፥ “ጎታ! ኖ ህታኒ ግርነዋ ኖዬን ካእዳንያ፤ ፈኢታ ጎሌተ ዳስ ቶ ኩዬን፥ ቶ ሙሴን፥ ቶ ኤላሳን ዳስ ሴድ እን ማዳሮ” አመ። **5** ኡሱና አዬሳ ግራን ካሀንቃራ ዳማንቻ ካጉማር እሶ ሆጎግሰረ ዳማንቻይ ኦሮ፥ “እን ኡሱይ ካኮገገላይናራና እን ካጌላታራ ኤረክ ሂካያ፥ ኡሱና ማላ” ታአማታ ያየ ማልሳንተ። **6** ኡሱኮ ኦአጋልሳታረና ሂካ ካኮማላረን ጎራታ ኔንጉረን ሆረሆረ ኡል እዬን። **7** የሱሳና እሶ ቶስ ጋባላመረ ድንድንጉረ፥ “ክያ፥ አሮአብሳቴን” አመ። **8** እሶ ጦቂ አም ጎዴራን የሱሳ ኳሬ ካካለ ማዮና ላኮዴራን። **9** ዋዳም ጉኮ ዳጋግራን የሱሳ፥ “ኤረ ካእባዶ ጎይኮ ታኬሮ ጊን ካዴተታን ማዮና አሮአዬሴን” አመ አጃጃ። **10** ኡሱኮ ኦአጋልሳታረና፥ “ሀያ ሴራ ካሙሴ ኦአጋልሰሳራን ኤላሳ ጣይ ኤመታኖ ዶትሳራ ካኮአማራን ሙንያ?” አመን የሱሳ ሆሳተን። **11** ኡሱና እሶን አባበረ፥ “ኦግራን ኤላሳ ኤሜይጉረ ካእመን ዱባና ጋቾኤካሰራ፤ **12** እየሱን ጎእመን እን ሃ አማራ፥ ኤላሳ ጣየ ኤመተራ፥ ጎሌና ካዶታተራን እየሰ ፈላቴራን ኳሬ ላኮአዴሴራን፤ ኡሱማለና ኤረ ካእባዶ ገነትሶይ ራኮ አታይናራ።” **13** ሀሱ ጎራታ የሱሳኮ ኦአጋልሳታረን ኡሱ ካእዬሰራ እየሰ ካጣማቃሮ ያንሳኮክ ጋራ ላኖ አዴሰን። **14** የሱሳና ሴዶ ኡሱኮ ኦአጋልሳታረን ጎሳ ቶስ ካኮአባባቴረን ጎራታ እባዶት ኮ የሱሳ ቶስ ጋባላመ ሆረ ግልቢሰረ ሃ አመ፤ **15** “ጎታ! ማጋኔ ኡኑኬዉን ነኔኤይሳ፥” ኡሱ “ካጋጋዱ ሀዉአሚ አበሳራ፥ ጋማ ካሆር ኤለን ኦሮዴ ኢያና በክ ኦሮዴ ታባራ። **16** ኩኮ ኦአጋልሳታራን ቶንሳ እን ኬነራ እየሱን ጎእመን እሶ ፋይሰን ላኮዳንዴራን።” **17** የሱሳና፥ “እሰን ኦአማኖና ታዋጫጫንተ አላታን እን ሀጌ ታጌሮን እሰኔ ዋታ ግርናራ? ሀጌ ታ ጌሮን ኦብሰናራ? ኡኑ ሂታራ እን ቶስ ኬና” አመ። **18** ኤስኮና የሱሳ ባቲክ እያና ሀድሰጉረ ቤስ። ኡኑና ሀሱ ጎራታኮ ሀጋአበረ ፋዬ። **19** ኡሱኮ ኦአጋልሳታረን ካለ ቤን የሱሳ ቶስ ጋባላመንጉረን፥ “ኖ ባቲክ እያና ኡኑኮ ቤስን ካኮዋኔና መዉንያ?” አመን ሆሳተን። **20** የሱሳና፥

“እማኖስን ማንከህንቃተሮ ማራንያ፡ እን ሩምና አማራ፡ ታሰናፍጭ ኢል ግታክ
 እማኖ እስኩን ግረዋ፡ ህታ ዋዳም፡ ‘ሂታኮ ክንጉዴ ቶላዴ ሴ!’ ጎእንቴን ሴታተዋ፡
 እስኩን ካሌኖን ኮኮ ላኮግሮ፡ [21 ሂካ አንክክ ጎእመን ኤብና ካአጋቡይ ጎሌ
 ኳሬ ላኮቤር] አመ፡” 22 ኡል ካጋለላይ ኡሱኮ ኦአጋልሳታራን ኩኩሜን ግራን
 የሱሳ እሶነ ሃ አመ፡ “ኤረ ካአባዶ ገነ ታአባዶይ ሮር ሰሳምናራ፤ 23 ላጋድናራን፡
 ኡሱና ታሴድ አሪ ጎይኮ ኪናራ” ኡሱኮ ኦአጋልሳታራን ኣሎ ጋዴን፡ 24 የሱሳና
 ኡሱኮ ኦአጋልሳታራን ቅፍረናሆም ቶሰ ካኮግያረን ጎራታ ቁሉክ ምን ካዋኮክ
 ገራ ኦአባባሬን ጴጢሮሳ ቶሰ ጋባላመንጉረን፡ “ካአጋልሰሳራክሰን ቁሉክ
 ምን ካዋኮክ ገራ ላኮሙራሮያ?” አመን፡ 25 ጴጢሮሳና፡ “እ ሙራራ” አመ፡፡
 ጴጢሮሳ ምን ኦሮዴ ጎጎታቤይ፡ የሱሳ ሆራርጀ፡ “ሰሞና! ካኡሌ ዋኖጆልኮክ
 ገራ ጎርቱን ቃራጣ ካኮአትናራን ካኡሌ እባዶኮያ ሙ ካካለኮ እን ላራ?” አመ፡፡
 26 ጴጢሮሳና፡ “ካካለኮያ ካኮአታማራ” አመ፡፡ የሱሳና፡ “ጎርታኑን ይሳሰክሰን
 ታገራ ሙራኮ ሄሰራ፡ 27 “ጎሌና ኖ እሶን ሀንዱዱፎ ጎጎሌኖንኮ ላቡ ቶሰ
 ዳግጉደ ማንጣቆ ሉጉዳ፡ ሆራርጀ ካአባቶ ኩኩኡብ ኣትጉደ ህኢ ጎጎባንተይ
 ማራጋደ ሄልናታ፡ ሀሱ ኣትጉደ እን ማራንትኩና መገካ ማራን ሙር” አመ፡፡

18 ሀሱ ጎራታ የሱሳኮ ኦአጋልሳታራን የሱሳ ቶሰ ጋባላመንጉረን፡ “ዋኖናት
 ካዳሩረይ ዱባንኮ ካሮራራ እዮያ?” አመን ሆሳተን፡፡ 2 የሱሳና ይትት ኮ ኡመጉረ
 እሶ ጠኤ ኣልሰረ፡ 3 “እን ሩምና አማራ፤ ጎአግልሳሞና ይሳሰ እን ጎሌኖን ዋኖናት
 ካዳሩረ ቶሰ ሱረ ላኮታብታን፡፡ 4 ሃንሱን ዋኖናት ካዳሩረይ ዱባንኮ ካሮራራ
 ሂካ ይትት እን እስኦቴሳ ካሁሰሳታሮያ፡፡ 5 “ሂካማሌክ ይትት መገኬይ ካአታታራ
 እና አታተራ፡፡” 6 አየሱን ጎእመን እዬ ኦአማናራን ሂናኣ ኦትድጫርኮ ኮ ጨቦ
 ኦርዴሰ ካታብሳራ ካንጂንክ ኤኤሞ ካሪማ ማርግቴሳ ሸያምጉረ በከ ባድ ጠኤ
 ሻፋም ልቕ ጎእመ ኢዳረ፡፡ 7 “ሂክ አላም ጨቦን ኣላንቲ ማንኮሌሮ ማራን ኣኔ
 ኡሱን! ጨቦ ኦርዴሰ ካታብሳራ ኤመታኖ ላኮሄሰሮ፤ አየሱን ጎእመን ጨቦን
 ኣላንቲ ካላሮ እባዶን ኣኔ! 8 ገነታ ጎርቱን ሉክታ ኩን ጨቦን ኣላንቲ ጎሌተ ጎሰ
 ሻፍ፡፡ ገነ ላማ ጎርቱን ሉቃ ላማ ኩን ግርጉረን ጅሩ ጅሮማን ታባኖን ታጋነም
 ኤለን ቶሰ ሻፋማናኮ ካኤሳቶ ጎርቱን ናፋለሳ ሊጉደ ጅሩ ጅሮማክ ግር ቶሰ ታባኖ
 ካኤዳንክያ፡፡ (aiōnios g166) 9 ኡሱማሌ ኢልታ ጨቦን ኣላንቲ ጎሌተ ቤሰ ሻፍ፡
 ኢልኦ ላማ ኩን ግርጉረን ታጋነም ኤለን ቶሰ ካሻፋማቶኮ ኢል ቶ ኩን ግርደ

ጅሩ ጅሮማክ ግር ቶስ ታባኖ ካእዳንክያ።” (Geenna g1067) 10 ዳሩሪ ካግራ ኤርግቻልክሶ አርጌቶ ዳሩሪ ካግሮ አቦኬ ሆረ ማንኮግራን ሂናኣ ክጨጫኮ ኮና ጎጎቱፋኖንኮ እስኦራዬን። [11 ኤረ ካእባዶ ኦባዬራን ሃሰን ኤመተራ።] 12 የሱሳና አደ፡ “አላ ኢን ሰጋ፤ አባዶት ኮ እዳድ ቦል ካአቦ ጎሌ፤ እሶ ኦሮኮ ኮ ጎባየ ሳጋልታምኮ ሳጋሊ ዋዳሚ ጉት ኢሰጉረ ካባየሮ ኮ ዶታዬን ላኮሴታሮያ? 13 እን ሩምና አማራ፡ ካባየሮ ኢዳዶ ጎሄላሮ ኦግራን ሳጋልታምኮ ሳጋሊ እዳድኮ ሱረ ሀሱ ካሄላመሮን ገጌላታራ። 14 ኡሱማለና ሂካ ክጨጫር ኦሮኮ ኮ ጎጎባሮን ዳሩሪ ካግሮ አቦክሰንት ፈኢ ላኮቶ። 15 “አቢካ ኩ ሚርኢ ጎግረ ሴጉዴ ኡሱን ዋታ ላማ ላዳን ባሰኬሳ ሰጊ፡ ኩ ጎማለ አባባተደ አቢካ የላታ። 16 ማለና ጎዋተ አደ እባዶ ላማ ጎርቱን ሴድ ካእቶቴራ እየሰ ዱባ ማንኮአታታሮ ማራን እባዶ ኮ ጎርቱን ላማ አት ሴጉዴ ጋፋቶሰ። 17 እሶና ማለና ጎዋተ ምን ካዋክ እባዶን ሰጊ፡ ምን ካዋክ እባዶ ካማሎን ጎሌ እይዛብ እንና ቃራጣ ካኩኩይሳሮ እን ቶቲ። 18 “እን ሩምና አማራ፡ እሰን ኡል ካሺተን ዱባ ዳሩሪ ካሸያመ ላራ፡ እሰን ኡል ካፋርቱን ዱባ ዳሩርና ካፋራመ ላራ። 19 “አደና እን ሩምና አማራ፡ ኡል ጉት ላማ ሊዴን ማምሰክ እዬንሳ ዋታ እሰአት ዋ ጎሌባቱን ዳሩሪ ካግራ አቦክ ማልረ እሶን ፈሎዋ። 20 ላማ ጎርቱን ሴድ ሊጉሬን መገኬይ ታኮኩኩአማራን ባንኤይ እን እሶ ኦሮ ሙትናራ።” 21 ሀሱ ጎራታ ጴጢሮሳ የሱሳ ቶስ ጋባላመረ “ጎታ! አቢክ እን ጎሚረኤ ምያ ጋል ኡሱን ሀሄሶ አምራ? ታ ቶዶባ ጌሮይያ?” አመ ሆሳተ። 22 የሱሳና፡ “ቶዶባታም ጋል ቶዶባ ኳሬ ቶዶባ ጋል ካላል እን ላኮአማሮ” አመ። 23 “ሃንሱን ዋኖናት ካዳሩረ ኡሱን ኦሀንዳራንኮት ገነ ካግሮ ማራጋደ ቶት ድን ካዶታታሮ ዋኖ እን ላራ። 24 ዋኖና ማራጋደኬሳ ቶታይን ካኮሀጋአባረ ጎራታ ኩማ ካሞጋኒ ካቶታምሮ ማራጋደ እንዛ ካአቦ አባዶት ኮ ኡሱ ቶስ አተን ኤመተን። 25 ሂክ ካሀንዳረክና እንዛ ሙርን ማንኮዋተሮ ማራን ኡሱኔ፡ ኦርቱሳን፡ ይሰኬሳን፡ ኡራዎኦቲሳን ዱባ ዳዳላም እንዛ ጎጎሙራንቶ ጎታ አጃጃ። 26 “ሀሱ ጎራታ ካሀንዳረክና ጎታከሳኮት ሉኪ ኢየጉረ ኦብሲ፤ ታአቦ እንዛ ዱባ ጋቾ ኩን እን ሙራ አመ ኤባተ። 27 ጎታኬሳና ነኔኤይሳተጉረ ኡሱ ጋፋረ፡ እንዛተሳና ኢሳገ። 28 “ሀሱ ካሀንዳረክና ጎታ ሆረኮ ጎጎቤይ ማራጋደኬሳ ጣጋራ ካአቦ እንዛ ካአባናየ ኡሱን ዋታ ካፈላረ ኡናቲሳ ካሌራ አባዶት ኮ ሄለጉረ ጨልኤ አበረ ታአብቶ እንዛ ህታኒ ኢን ሙር!” አመ። 29 “ሀሱ ሳትኬሳና ኡሱ

ሆረ ኢየጉረ፡ ‘ማጋኔ ኦብስ እን ኩን ሙሮዋ’ አመ ኤባተ። **30** “እየሱን ጎአመን ታአቦ እንዛ ኡሱ ሙር ታጉድሰሮይ ኦብሳና ዋተረ ምን ካሻኖ ኡሱ ታብስ። **31** ካሌሮ እየስ ካዴራ ካካለ ካፈሎ እባዶና ነኔኤይሳተ፡ ካሌሮ ዱባና ሰተንጉረን ጎታክሶውን ሰገን። **32** “ኡሱ ጎራታ ጎታና ሀሱ ካህንዳሮ ኡምሰሰጉረ ሃ አመ፡ ኣት ካሜላን ካህንዳታ!’ ኣት እን ማንኩኤባተተ ማራን ሀሴ እንዛ ዱባ እን ኩን ኢስረ፤ **33** እን ኩን ጎጎኢሰሮ እትና ካጌላታቶካውን ነኔኤይሳይን ላኮዶትሳረየ?’ **34** እተረ ታአቦ እንዛ ዱባ ሙር ታጉድሰሮን ካሻሮና ካሙርሳሮን ሮርስ ኡሱ ሰስ። **35** “ሃንሱን እስን መተመቲ አቢላልትሰኑን ዋዳናኮ ሀሄሶ ጎአሞን ካዳሩረ ኣቦክስን እስና ሂካማሌ የልናራ።”

19 የሱሳ ሂካ አዬስ ጉድሰጉረ ኡል ካጋሊላኮ ኬጉረ ላጋ ካዮርዳኖስኮ ጋማ ካግሮ ኡል ካይሁዳ ሴተ። **2** ጎሳ ካሞጋና ኡሱ ዴቦ ሰሴተ፡ ኤሴና እሶ ፋይስ። **3** ፋራሳዊልና የሱሳ ጫፍን ዶተን ኡሱ ቶስ ጋባላመንረን፡ “እባዶት ኮ ማምሰት ኣላንቲና ኦርቴሳ ከልክ አም ቤስን ፈኢ ሰሳንተታ?” አመን ሆሳተን። **4** የሱሳና እሱን አባበረ፡ “እሶ ካመጠራ ዋ ሆራርጀ ባባርና ሄለል የለ ካመጠሮ ላኮናባብቲታንያ? **5** ሃንሱን፡ ‘እባዶ ኣቦኬሳና ኣየቴሳ ኢስጉረ ኦርቴሳን ዋታ ቁራናማራ፡ እሶ ላማና ማር ኮ ላራን ካአማመራ ላ ሂካኮት ኣላንቲዮላ’? **6** ጎርታኑ ማር ኮያን ኳሬ ላኮላማያን። ሃንሱን ዋ ካቁራኔሮ እባዶ ላኮፋሮ።” **7** ፋራሳዊልና፡ “ሀያ ሙሴ ባባርትት ኮ ኦርቴሳ ከልክ አማኖን ካሌሮ ዋራቃታ ሰስ ኦርቴሳ ጎጎጋፋሮን ‘ሙን አጃጃ?’ አመን።” **8** የሱሳና፡ “ሙሴ ዋዳናትሰንኮክ አታን ዴጉረ ኦርጃልክስን ከልክ ጎጎአንታኑን ፈኢ ሰስራ ኳሬ ጣየ ላኮሃየ።” **9** እን ጎአመን ሃ አማራ፡ ኤንተርክስ ግራን ካካለኔ ዋታ ሻርሙጣ ጎሙተ ኳሬ ኦርቴሳ ከልክ አመ ጋፋረጉረ ታካለ ሄለልትቲ ኦር ካየላታራ ዱባ ካሻርሙጣሮያ” አመ። **10** የሱሳኮ ኦአጋልሳታረና፤ “ታኤንተሬና ታኦሪ ሃጃ ሂካማሌ ጎሌተ ኦር አታታኖ ኢሳጋኖ ሆረክ” አመን። **11** የሱሳ ጎአመን፡ “ሂክ ዋኮ ካስሳመ ጎሌ ኳሬ ሂካ አየስ ማዮና አታይን ላኮዳንዳሮ።” **12** ኣላንቲና ኮኮ አላታ ሳንጎመ ካአላታራ ግራ፡ ካካለ ገነ ታአባዶቲ ጎሳመ ካሳንግሳማራ ግራ፡ አደና ዋኖናት ካዳሩረውን አመንጉረን ኦር ሀአታኖን ኦግራን ግራን፡ ሂካ አታይን ካዶታታራ ሀአታቶ” አመ። **13** ኤስኮና ገነቴሳ እሶ ጉት ካይጉረ ጎጎኤባሮን እባዶ ይሳስ የሱሳ ቶስ ኬን፤ ኡሱኮ ኦአጋልሳታረና አደን ይሳስ ካኬናሮ እባዶ ሀድሴን። **14** የሱሳና፡ “ኢሳ

ይሰ እን ቶስ ሀኔመቶ አሮትርቲን፡ ዋኖናት ካዳሩረ እሶ አንክክንያ።” **15** ገነተሳና እሶ ጉት ካየ አባባተረ ኤስ ባንኤኮ ኬጉረ ሴተ። **16** ኤስኮና አባዶት ኮ የሱሳ ቶስ ኤመተጉረ፡ “ካአጋልሰሳቶ! ጅሩ ጅሮማክ ግር ሄላይን መ ካእዳንክ እየሰ ፈላ?” እመ ሆሳተ። (aiōnios g166) **17** የሱሳና፡ “ካእዳን እዬስኮክ ጋራ እን መን ሆሳታ? ካእዳንክ ካሌራ እየሰ ኮ ካላልያ፡ ጅሩ ጅሮማክ ግር ቶስ ታብን ጎዶታተ አድ አጃጃኬ ኦራ።” እመ። **18** ዋዳላትና፡ “ኤክ አጃጃ?” ሃ እመ ሆሳተ። የሱሳና፡ “አሮላጋደ፡ አሮሻርመጢተ፡ አሮሄቴ፡ ጣራ አሮአቶቲተ፡ አመ። **19** እቦካና እየታ ካባጂና፡ ኦላታና እሰኦታ ኣን ጌላ” እመ። **20** ዋዳላትና፡ “ሂካ ዱባ ኦራዬራ።” ሂካኮ ካካለ “ካሀንቃተራ መያ ካግራ?” እመ። **21** የሱሳና፡ “ቁሉ ሊን ጎዶታተ ሴጉዴ ኦክብቶ ኡራዎኦታ ዱባ ዳዳልደ ማራጋደ ህየሳን ሰሰ፤ ዳሩሪ ኡራዎ ሄላይናታ። ኤስኮና ኤማጉደ እን ዴበ ሰሴ” እመ። **22** ሂክ ዋዳላት ሂካ ካኮማላረ ጎራታ ኡራዎ ኦሞጋን ማንኮእቦ ማራን ያዳ ኢሰ ሴተ። **23** የሱሳና ኡሱኮ ኦአጋልሳታረን፡ “እን ሩምና አማራ፤ ዱረሳ ዋኖናት ካዳሩረ ቶስ ታባኖ አሎ ቃራያ። **24** አደና እን አማራ፡ ዱረሳ ዋኖናት ካዳሩረ ታባኖኮ ጋላ ቡቶ ካማርፍ ታባኖያ ኤን ካሌራ” እመ። **25** የሱሳኮ ኦአጋልሳታረን ሂካ ማለንጉረን ኣሎ ማማ፡ “ሀያ እዮያ ፋይን ካዳንዴራ?” እመን ሆሳተን። **26** የሱሳና እሶ ቶስ ዲያ፡ “ሂክ እባዶ ዶሌ ላኮዳንዳምሮ፡ ዋይ ዶሌ ጎአመን እየሰ ዱባ ዳንዳማራ አመ።” **27** ጴጢሮሳና አባበረ፡ “ኖ ካመን ዱባ ኢንሰጉኑ ኩ ዴበ ሰሴታና፡ ሀያ ኖ መ ሄላይናና?” እመ። **28** የሱሳና፡ “እን ሩምና አማራ፤ ካኤማይናሮ ካኡሱብ አላም ኤረ ካአባዶ ካካባጃ ኮርፍንጃ ጉት ካኮሀማጼ ጎራታ እን ዴበ ኦሰሰያታን እሰና ቶሞንኮ ላማ ኮርፍንጃ ጉት ሀማጺጉዴን ቶሞንኮ ላማ ታእሰራኤል ኣኒ ጉት ፍርድናታን። **29** መገኬ ማራን አምረ ምንጆል፡ ጎርቱን አቢላል፡ ጎርቱን አባላል፡ ጎርቱን ኣቦ፡ ጎርቱን ኣዬ፡ ጎርቱን ይሰ፡ ጎርቱን እራ ካኢሳራ ዱባ ቦልኮክ አምባ አታይናራ፡ ጅሩ ጅሮማክ ግርና ኤልናራን። (aiōnios g166) **30** እየሱን ጎአመን ካሞጋን ካሆሬ ካሃረ ልናራን፤ ካሞጋን ካሃረና ካሆሬ ልናራን” እመ።

20 “ዋኖናት ካዳሩረ ዋይንኮት ባንኤ ካፈላሮ ካፈሎ አባዶን ፈሎ ሰሰን ባር ቡላን ኬ ካቤሮ ካዋይኒ እካክልተኮክ ኦዶ ኣን ላራ። **2** ኡሱና ኦፈላራውን አሪ ቶይ ጣጋራ ቶ ቶ ሙርን ኤካተጉረ ካፈሎ አባዶ ታዋይኒ ባንኤ ቶስ ታብሰ። **3**

“ባርኮ ሳቲ ሴድና ቤጉረ ፈሎ ዋተን ታግያ ባንኤ ካአሌሮ ካካለ እባዶ ሄለጉረ፤
4 እስና ‘ሰዬንጉዴን ካዎይኒ ኢራኬይ ፈሎ ፈላ፤ ታዶትሳቶ ሙራ እስኩን እን
 ጋቾሙራ’ አመ። **5** እሶና ሴተን፤ “እሪኮ ሳቲ ሌይና ሳቲ ሳጋሊ ኤመተረ ካካለ
 ፈላተ ካባራሮ እባዶን እማለኩኒዕ ፈሎ ሰሰ። **6** ሜርት ሳቲ ቶሞንኮ ኮክ
 ጎራታ ቤጉረ እሌ ካግሮ ካካለ እባዶ ሄለጉረ ‘እሪ ዱዶ ፈሎ ካላይ ህታኒ
 ሙን እልቲታን?’ አመ ሆሳተ። **7** “እሶና፤ ኖን ፈሎ ካሰሰሮ እባዶ ማንኮዋኔኖ
 ማራንያ’ አመን። “ኡሱና ‘እስና ሰዬንጉዴን ካዎይኒ ኢራኬይ ፈላ’ አመ። **8**
 “ኡል ሄመን ካኮላረ ጎራታ ካዎይኒ እካክልተኮክ ኦዶ ኡሱን ኦፈላራን ኦዶናቲ
 ካዴሮ እባዶትን ሰሰጉረ፤ ‘ዳንበኔ ካኤሜተሮኮ ሀጋአብደ ሆራርጀ ካኤመተሮ
 ታ ጌሮ ካግሮ ካፈሎ እባዶ ዱባ ኡምጉደ ዳሞዛክሶ ሙሮ’ አመ። **9** “ሳቲ
 ቶሞንኮ ኮይ ፈሎን ኦታቤራን ኤመተንጉረን መተመቲ ጣጋራ ቶቶ አታቲን። **10**
 ሆራርጀ ፈሎን ኦታቤራን ኤመተንጉረን ጣጋራ እንጂ ሙራ ኦሄላይናራን እን
 እሶን ሌረ፤ እየሱን ጎአመን እሶና መተመቲ ጣጋራ ቶቶ ሙራንተ። **11** ሙራ
 አታታግራን ካዎይኒ እካክልተኮክ ኦዶ ጉት ጉምጉመን። **12** ሂኒዕ ዳንበኔ ፈሎን
 ኦታቤራን ሳቲ ቶ ታላል ጎፈላን፤ እሪ ዱዶ ፈሎይ ሀራና አርቲ ጉባታ ኦሀይናኖ
 ኖኔ ዋታ ሞሲ እማለኮይ ሙራታ? አመን ሆሳተን። **13** “ኡሱና ፈላተ ካባራሮ
 ኮኔ ሃ አመ፤ ‘ካጌላታሮኬ! እን ኩን ሚራኣ ላኮጌግሰሮ፤ ጣጋራ ቶይ ፈልን አት
 ኢን ዋታ ላኮኤካተያ? **14** ኩ ካገያሮ አታጉደ ሴ፤ ኩን ካሰሰሮ ግታክ ዳንበኔ
 ካኤመተሮ እባዶትና ሰሰን ዶትሳራ። **15** ሀያ ማራጋደኬይ ካጌላየ ፈላይን እን
 ላኮዳንዳሮያ? ጎርቱን እን ካአዳን ማንኮፈለሮ ማራን ሞጌ ታሜላን ኩ አብተ?’
16 “ሃንሱን የሱሳ፤ ካሃረ ካሌራ ካሆሬ፤ ካሆሬና ካሃረ ልናራ አመ።” **17** የሱሳ
 ኢየሩሳሌም ቶሰ ሴታ ግራን፤ ቶሞንኮ ላማ ኡሱኮ እአጋልሳታረን ካለ ኣተ ቤጉረ፤
18 “ጎርታኑ ኖን ኢየሩሳሌም ቶሰ ብያኖያ፤ ኤረ ካእባዶ ቱቃሞልኮክ ዋይቻሉና
 ሴራ ካሙሴ እአጋልሰሳራኑን ሮር ሰሳምናራ፤ እሶና ኡሱ ጎጎ ጎሮን ፍርድናራን።
19 ጎጎቃጭፋራውን፤ ጎጎባጭራውና ጎጎሱይራውን አይዛብውን ሮርሰ ሰሰናራን፤
 ኡሱና ታሴድ እሪ ጎይኮ ኪናራ” አመ። **20** ኤስኮና ይሰ ካዛብደሳኮት ኣዎ
 ይሰክሴን ዋታ የሱሳ ቶሰ ኤመተዳ ሆረ ግልቢሰ ሳጋዳ እየሰ ኮ ኡሱ ኤስን
 ጎጎፈሎ ኤባተ። **21** የሱሳና ኤስን፤ “መ ዶታታ?” አመ። ኤስና፤ “ሂካ ይሰኬ ላማ
 ዋኖናትካይ ኮ መርገታይ፤ ኮ በተታይ ጎጎሀማጸራውን ፈኢ ሰሰ” አንተ። **22**

የሱሳና፡ “እስን ካኤባታን ላኮካሳን፡” “እን ታጣምናሮ ታራኮ ጡጋ እስን ጣምን ዳንዴታን?” እመ ሆሳተ፡ እሶና “እእ ዳንዴኖዋ!” እመን፡፡ 23 ኡሱና፡ “ታራኮ ጡጋቴኮ ጎሌና ጣንታንዋ፡ እየሱን ጎእመን መርገቴይና በተቴይ ሀማጸኖ ጎእመን አቦክ ካኮንኤካሰሮንያ ኳሬ እን ፈኢ ካሰሳሮ እየሰ ላኮዮ” እመ፡፡ 24 የሱሳኮ ኦክጋልሳታረን ቶምኖና ሂካ ካኮማላረን ጎራታ አቢላል ላማ ጉት አማራቴን፡፡ 25 የሱሳና እሶ ዱባ ኡመጉረ፡ “እይዛብኮክ ሞትጆል ጎሳክሶ ጉት ሞት ጎጎሌራውን ኦዶናት ኦባሪሳራና ሁናይ ካባርሳራን ላኖ ካሳንዋ፡፡ 26 እስን ኦሮ አደ ሂካማሌ ላኖ ላኮዶትሳሮ፡፡ እየሱን ጎእመን እስኒ ኦሮ ካንጂንክ ሊን ካዶታታራ እሰኑን ካሀንዳሮ ሀሌዋ፡፡ 27 እሰንኮ መተ ሊን ካዶታታራና እሰኑን ድይ ሀሌዋ፡፡ 28 ኤረ ካእባዶ ካኮንኤመተራ ኖ ኡሱን ጎጎሀንዳይኖን እንሌኖን ግራን ሀንዳይና ኔፎቴሳ ካሞጋኑን ዋዶ የላይ ሰሳይን ኤመተራ” እመ፡፡ 29 የሱሳና ኡሱኮ ኦክጋልሳታረን እያርኮኮ ቤን ቤታ ግራን ጎሳ ካሞጋን ኡሱ ዴበ ሰሴተ፡፡ 30 ኤሴና ኢልኦ ኦደያኖን እባዶጃ ላማ ራድ ሀማጸን ግረን፡ የሱሳ ኤሰን ሮራኖ ካኮማላረን ጎራታ፤ “ጎታ! ኤረ ካዳወተ፤ ኖን ነኤኤይሳና” አማ እዬን፡፡ 31 ጎሳና እሶ ጫልኢ ጎጎእምራውን ሀድሰ፡ እሶ ጎእመን፡ “ጎታ ኤረ ካዳወተ ማጋኔ ኖን ነኤኤይሳና” አማ አሎ እዬን፡፡ 32 የሱሳና ታክ እመ አሌ እሶ ኡመ “እን እሰኑን መ ጎጎየሎ ዶታታን?” እመ፡፡ 33 እሶና “ጎታ!” “ኖ ኢልኦኦታን ጎጎዴራውን ዶታታና እመን፡፡” 34 የሱሳና እሶን ነኤኤይሳተጉረ አልኦ ኦትሶ ድንድንጉረ ጎርሰዋ አልኦ ኦትሶ ዴንዴን፡ እሶና ኡሱ ዴበ ሰሴተን፡፡

21 ኢየሩሳሌም ቶስ ጋባላማ ዛይቲ ካበያራ ጋ ታኮአላታሮ ዋዳም ጉት ካግሮ ማማን ካፋገ ታአማማቶ ባንኤ ጎጎጌይ የሱሳ ኡሱኮ ኦክጋልሳታረንኮ ላማ ፋረ፡፡ 2 ሃና እመ፡ “እስን ሆረ ካግሮ ማማን ቶስ ሴዬን፡ ጎጎጌቴን ደሜርትት ቶ ዳርሜን ዋታ ታሻንተቶ እስን ሄልናታን፡ ፋራዴን እን ቶስ አታ ኮዬን፡፡ 3 ማዮና እስኔ ሃ ሙን የላታን ጎእመ፡ ‘ጎታ ዶታታራ’ አማ፡፡ ጎርሰዋ ጋፋራንዋ፡፡” 4 ሂክ ካኮንሌራ ካሄገሮይ ሃ አማመ ካሰጋመራ ጎጎጉዳሮንያ፡፡ 5 “ጽዮን ታአማማቶ ታኢየሩሳሌም ካታማውን ሃ አም፡ ‘ሂክማ ዋኖካ ፋያንካ ሌጉረ፡ ደሜርትትና ዳርሜት ጉት ሀማጸጉረ ኩ ቶስ ኤመታራ’ አማዴን ኤሰን ሰጋ፡፡” 6 ኡሱኮ ኦክጋልሳታረና ሰተንጉረን የሱሳ አጃጃ እሶን ጎጎሰሰሮክ ማለ የሌን፡፡ 7 ደሜርትትና ዳርሜት ኬንጉረን ሳርሰክሶ ካደሜሬ ባጋድ ጉት ካዬን፤ የሱሳና ኤሰ ጉት ሀማጸ፡፡ 8

ጎሳኮና ጋምሳ ሳርስክሶ ራድ ያዩን፤ ካካለና አደ ባላል ታታርሼን ኣተን ራድ ሉሉጉዳን። **9** ሆረሃየ ካሰሰታረና ሃሬ ኡሱ ዴበ ሰሌታ ካግረ ጎሳና፡ “ሆሳኢና ኤረ ካዳዉተ!” “መገ ካዋይ ካኤመታራ ኡሱ ካሶማሳመያ፡” “ሆሳኢና ኤለ ዳሩሪ ሃ አማ ኢያረን።” **10** ኢየሩሳሌም ቶንሳ ካኮታባረ ጎራታ ካካታማ አባዶ ዱባ፡ “ሂክ እየያ?” አማ ሻላጋመ። **11** ጎሳና፡ “ሂክ ጋሊላይ ታግቶ ታናዝሬት ካታማኮ ካኤመተሮ ካሄገሮ የሱሳያ” አመን። **12** ኤስኮ የሱሳ ቁሉክ ምን ካዋ ታበጉረ ቁሉክ ምን ካዋይ ኦሮ አምናታና ዳዳላታ ኦግረን ቤስ ሆሮረ፡ ማራጋደ ኦኢግልሳታረንኮክ ጣራጴዛልና አራብ ኦዳዳላታረን ካኮሀማጴራን ቦርቦኖ ምና ምና አባበ ሉጉደረ። **13** “ምን ካክ ካኤብ ምን አማማራ አማመ ማጻፋ ቁሉክ ጻፋመራ፡ እስን አዴን ካኮሳማራን ላጋ ካሽታ የልተታን” አመ። **14** ቁሉክ ምን ካዋይ ኦሮ ኢልኦ ኦድያኖና ናፋለሳል ኡሱ ቶስ ኤመተን፡ ኡሱና ፋይሰ። **15** እየሱን ጎአመን ቱቃሞልኮክ ዎይቻልና ሴራ ኦኢጋልሰሳራን የሱሳ ካፈላመሮ ባሳና፡ “ሆሳኢና ኤረ ካዳዉቴን” አማ ቁሉክ ምን ካዋ ኦሮ ካኢያረ ይስ ካኮደያረን ጎራታ ኣሎ አማራቴን። **16** እሶና የሱሳን “ሂክ ይስ ታአማሮ ማላታ?” አመን። የሱሳና፡- “እ” ማላራ አመ፡ “ይስኮና ናስ ካኢላታሮ ይስኮት ህኢኮ ጋላታ ኤካስ ካአማሮ ሱረ ላኮናባብቱታንያ?” አመ። **17** ካታማኮ ኢስ ቤጉረ ብታንያ ካአማራን ማማኒ ሴተ ኤስ ባሬ። **18** የሱሳ ባር ቡላን ካታማ ቶስ አባባተ ስታ ግራን ኡኤ፤ **19** ራድ ግርዲ ካግረ ጋ ካባላስ ኮ ዴጉረ ካኮሴሮ ጎራታ ባላሎ ኳሬ ኢል ቶና ሄላይን ዋተጉረ፤ “ጎርታ ጅሮማን ኩን ኢል አሮግኖ!” አመ። ጋ ካባላስና ጎርሰዋ አነጋገ። (aiōn g165) **20** ኡሱኮ ኦኢጋልሳታረና ካሌሮ ዴጉረን ሳደን፡ “ጋ ካባላስ ምሲ ኮይክ አነጋግን ዳንዴ?” አመን። **21** የሱሳና፡ “እን ሩምና አማራ፤ አማኖ እስኩን ግረዋ ላኮሄዳታቴን፤ ጋ ካባላስ ጉት ካሌሮ ኣን ፈላኖ ካላል እንሌኖን ግራን ህታ ዎዳም ሂታኮ፡ ‘ታጋምጉደ በከ ኦሮዴ ታብ’ ጎአንቴን እስኩን ላረዋ።” **22** አማናቴዴን ኤቢ ካኤባታን ዱባ አታይናታን።” **23** የሱሳ ቁሉክ ምን ካኤብ ቶስ ታበጉረ ኢጋልሰሳ ግራን ቱቃሞልኮክ ዎይቻልና ካጎሳ ጃርሶላ ኤመተንጉረን፡ “ሂካ እየሰ ዱባ ካኮፈላታ ኤክ ኦዶናትያ? ኦዶናትና ኩዬን ካሰሰራ እየያ?” አመን ሆሳተን። **24** የሱሳና፡ “እንና ሆሲን ቶ እስን ሆሳይናራ፡ አባብ ኢን ጎሰጊቴን እንና ሂካ እየሰ ኤክ ኦዶናት እን ፈላሮ እስኩን ሰግናራ።” **25** ካያንሳ ጥንቃታ ሀገኮ ኤመተራ?

ዳሩርኮያ ሙ እባደኮያ?” አመ ሆሳተ። እሱና እስ እስ ኦሮ አዬሳ፡ “ኖ ‘ዳሩርኮያ’ ጎእምኔ ሀያ ‘ሙን አማናና ዋተታን?’ አምናራ። 26 ‘እባደኮያ’ ጎእምኔ እደ ጎሳና ያንሳ ካሄገሮ አመ ማንኮአማናሮ ማራን ኖ ጎሳ አብሳታና” አመን። 27 ሃንሱን “ኖ ላኮካንሶ” አመን የሱሳን አባበን። ኡሱና፡ እንና ሂካ እየሰ ኤክ ኦዶናት እን ፈላሮ ላኮሰግናሮ አመ። 28 የሱሳና፡ “መ ኣን ላራ? ባባሮ ላማ ካእባ አባዶት ኮ ግረ፤ ካሆሬ ኤረ ቶስ ሴተጉረ፤ ‘ኡኑኬ! ሀታር ታዎይኒ ታእካክልተ ባንኤ ቶስ ሴጉዳ ፈሎ ፈልና አመ።’ 29 “ኡኑና፡ ላኮዳግናሮ” አመ። ባስኬሳ ማላባተረ አባባተ ሴተ። 30 “እደ ካላምክ ኤረ ቶስ ሴተጉረ ሂካማሌዋ አመ፤ ኡኑኬሳና፡ ‘እ አቦክ! ሴሮዋ’ አመ። አየሱን ጎእመን ሀሴኖን ሄሰ። 31 “እሶ ላማ ኦሮኮ ታኦዶ ፈኢ ካአማገራ ኤክያ?” እሱና “ካሆሬ ኡኑያ” አመን። የሱሳና፡ “እን ሩምና አማራ ቃራጣ ኦኩኩይሳራና ኦሻርሙጣራን ዋናናት ካዋ ቶስ ታብን እስንኮ ጣይናራን። 32 ካጣማቃራ ያንሳ ቁሉክ ራ ቱስን እስን ቶስ ኤመተራ። እስን አዴን ላኮአማንቴታን፤ ቃራጣ ኦኩኩይሳራና ኦሻርሙጣራን ጎእመን አማነራን። እስን ሂካ ዴተን ግራን ዱዶ ጨቦኮ ጉላ ጋልቴን ላኮአማንቴታን አመ። 33 “ካካለ ማሱሳ ማላ፤ ካዎይኒ ኢራኮክ ኦዶ ኮ ግረ፤ እራ ማራሙርስ ኦት ካተ፤ ዎይኒ ካኮሚጭራን ጉምቢና ኦሻተ፤ ዎይኒ ኦኦራራውን ዴር ማዳረ፤ ኤሰኮ ኢራኬሳ ኦታተን ኦባራራውን ክራይ ሰሰጉረ ኡል ካካለ ኢስ ሴተ። 34 ካም ታኮኩኩይሳታራን ድግኒ ካኮግያተ ጎራታ ታዱባንተቶ ኢልኮ ቆባኬሳ አታይን ኡሱን ኦሀንዳረን ኦታተን ኦባራራን ቶስ ፋረ። 35 “ኦታተን ኦባራራና ኡሱን ኦሀንዳራን አበንጉረን ኮ ቦጨን፤ ኮ ላጋዴን፤ ኮ እደን ኤኤሞይ ኤጌን። 36 ኡሱና ኦሆሬኮ ቶቶይ ኦሮራራን ኦካለ ኦሀንዳራን ፋረ፤ ኦታተን ኦባራራና ግዳና ኡሱማሌዋ የሌን። 37 ጎርታኑ ‘እሶ እድ’ ኡኑኬ ላካባጂራና፤’ አመረ ዳንበኔ ኡኑኬሳ ፋረ። 38 “አየሱን ጎእመን ኦታተን ኦባራራና ኡሱ ኡኑኬሳ ካኮድያረን ጎራታ ሂክ ካኤልናሮያ፤ ኮዬን ላጋድጉኔ ርቲቱሳ ኤልና” አመን እስኦሮ አዬሴን። 39 አበንጉረን ካዎይኒ ኢራኮ ሳር ቤሰንጉሬን ኡሱ ላጋዴን። 40 “ሀያ ካዎይኒ ኢራኮክ ኦዶ ካኮኤሜተ ጎራታ ሀኑኡ ኦታተን ኦባራራን ኡሱ ሞስ ካየልናሮ ኣን እስኑን ላራ?” 41 እሱና “ሀኑኡ ኦሜላን አካማሌ ላጋድጉረ ካዎይኒ ኢራኮ ታዶትሳቶ ኢልኮ ቆባ ጎራታይ ኦአባባራውን ኦካለ ኦታተን ኦባራራውን ክራይ ሰሰናራ” አመን። 42 የሱሳና፡ “ኦግንባራን ካቱፋተን ኤኤሞ፤ ሞኑን ምና አፋሩን

ካዶትሳሮ ሌ፥ ሂካና ካየለራ ዋያ፥ ኢልኦኦታኑን ባሳያ፤ አማመ ቁሉክ ማጻፋል ካጻፋመሮ ላኮናባብቲታንያ?” አመ። **43** “ሃንሱን እን ሃ አማራ፤ ዋኖናት ካዋ እስንኮ አታምጉረ ኢል ካየላታሮ ጎሳን ሰሳምናራ። **44** ሂካ ኤኤሞ ጉት ካኢያራ ኤኤባራ፤ ኤኤሞና እሶ ጉት ካኮኢያራ እባዶ እደ ቡቱትናራ።” **45** ቱኤቃሞልኮክ ዋይቻልና ፋራሳዊል፥ ሂካ ማሱሳጆል ካኮማላረን ጎራታ የሱሳ ካእዬሳራ ጋራክሶ ላኖ አዳሰን። **46** እየሱስ ጎአመን አብ ሺን ጎዶቴና ጎሳ እደ የሱሳ ካሄገሮ እን ማንኮድያረ ማራን አብሳተን።

22 የሱሳ እደ ማሱሳይ አባዶን ሰጋኖ ሀጋአበ፥ **2** ዋኖናት ካዳሩረ ኤረኬሳት ሃሰኖን አሞ ካኤካሳተሮ ዋኖ እን ላራ፥ **3** ዋኖና ሃሰኖን ካኮንሰጋተሮ እባዶ ከኬሲን ኦሀንዳረን ሀንዳ ፋራተ፥ አባዶ ጎአመን ላኮኤሜይናኖ አመ። **4** “እደና ኦካለ ኦሀንዳራን ፋረጉረ ኦኤማመራን ጎርታ አራርና ካቃባን ‘ግድኬ ኤናኦየጉረ ኤካሳየራ ካመን ዱባ ማንኮኤካተሮ ማራን ሃሰኖን ኮዬን፥ አማራ አማ ሰጋ።” **5** “ኦኤማሜራን ጎአመን ኡሞት ዲደንጉሬን፤ ኮ እራ ቶስ፥ ካካለ ዶክ ዳዳላይን ሴተ፥ **6** ኦሄሴራን እደን ኦሀንዳራን እቤንጉረን እቦሰሴን ላጋዴን። **7** ዋኖና አማራተጉረ ዋታዳራ ፋረጉረ ሀኩኡ ኦላጋዴራን ላጋዲሰሰ፤ ካታማትሶና ኤለኒ ጉብ። **8** “ኤሰኮና ኦሀንዳራን ሃ አመ፥ ‘ካሃሰኖ አሞ ኤካተራ፥ እየሱስ ጎአመን ኦኤማሜራና አሞን ኦዶትሳራን ሌን ማንኮሙታናዋተራን ማራን፤ **9** ካኮሰሴታራን ራድ ብያጉደን ካሄልቲን እባዶ ዱባ ካጅላ አሞ ቶስ ኡማ’ አመ። **10** ኦሀንዳራና ራድ ቤንጉሬን ካሄሌን እባዶ ካኢዳና ካሜላን ዱባ ከኩይሰንጉረን ካሃሰኖ ምን ማርት አማጌን። **11** “ዋኖና ታኤማንተቶ ማርት ድን ምን ኦርድ ጎታብሮ እባዶት ኮ ካሃሰኖ ሳርሰ ሀሳርሳኖን ካግሮ ዴ። **12** ሃና አመ፤ ‘እን ካጌላታሮ!’ ካሃሰኖ ሳርሰ ሀሳርሳኖን ምሲ ሂታራ ታብን ዳንዴተ? እባዶትና ጎአመን ታአምአባብሮ ዋተ። **13** “ዋኖና ኦሀንዳራን፤ ‘ገነና ሉቃና ሸያጉደን ሳሬ ካግሮ ጠልንጋክ ሙጉድ ቶስ ቤሳዴን ኡሱ ሻፋ፥ ኤሴና ኦታና ኢልኮ ፎጫኖ ልናራ’ አመ። **14** ኤሰኮ የሱሳ፥ “ኦኤማሜራና ኦሞጋንያን፥ ኦኦሳባሜራን ጎአመን ሁጫረያን” አመ። **15** ኤሰኮ ፋራሳዊል ቤን ሴታ ግራን ምስምሲ የሱሳ አዬስከሳይ ጦይ ታአም አብናራን ማካረን። **16** እሶኮ ኦኦጋልሳታረና ታሄሮዳሳ ኡናን ዋታ የሱሳ ቶስ ፋሬንጉሬን፥ “ካኦጋልሰሳቶ!” “አት ካሩም ላኖና ራ ካዋ ሩሚ ካኦጋልሰሳቶ ላኖ፥ እባዶ አብሳታ ካኡሉልሶን ዱባና ኢል ቶይ ካድያቶ

ላኖ ኖ ካንሶዋ። 17 ካሮም ዋኖላልኩክ ዋኖውን ገራ ሙራኖ ዶትሳራ ሙላኩዶትሳሮያ አላ ኖን ሰገ? አመን ሆሳተን።” 18 የሱሳና ምጌትሶ አዳሰረ፤ “እሰን ኢፍሳዶላ መውን አዬሲ እን ጫፍን ዶታታን? 19 ገራ ታሙራታን ማራጋደ አላ ኢን ቱሳ?” እሱና ጣጋራ ቶ ከኔን። 20 ኡሱና፤ “ህታ ማራጋዳይ ጉት ታሙታታ ምዲ ታዮታ? ጽፍና አደ ታዮታ?” አመ። 21 እሱና አባበን “ካሮም ዋኖያ” አመን። ኡሱና አባበረ “ካሮም ዋኖኩክ ካሮም ዋኖን፤ ካዋና ዋውን ሰሳ” አመ። 22 እሱና ሂካ ማለንጉሬን አዬሰኬሳ ሳዳ ኢሰን ሴተን። 23 ኤሰ አሪ ጎይኮ ክያኖ ላግሮ አመ ካእማናራ ካሶዶቃውል አባዶ የሱሳ ቶሰ ኤሜተንጉረ ሃ አመ ሆሳተ፤ 24 “ካእጋልሰሳቶ!” ሙሴ፤ “እባዶት ኮ ኦርቴሳኮ ይሰ ሀኡሙሎን ጎሳየ፤ ካጎየሮ አቢኬሳኮት ኦር አቢኬሳ አታይጉረ ኡሱን ሳኒ ሀካየ አመራ። 25 አቢላል ቶዶባ ኖ ዶሌ ግታ፤ ካሆሬ ኦር አታተጉረ ይሰ ሀኡሙሎን ካኮሳዋረ ጎራታ አቢኬሳና ኦር የላተ፤ 26 ሂካማሌ አደ ካሴድኮ ታ ቶዶባ ጌሮ ሂካማሌ ጎዬን። 27 ዱባንኮ ሃሬ ሄለልትቴና ጎተ። 28 ሃንሱን ኤሰ ዱባን ማንኮኬሳንተቶ ማራን ጎይኮ ታክያኖ አሪ እሶ አቢላል ቶዶባ ኦሮኮ ኤኪን ኦር ልናታ?” 29 የሱሳና እሱን አባበረ፤ “እሰን ቁሉክ ማጸፋጆልና ሁና ካዋ ማንኮኬሳናዋተታን ማራን ሸር አማታን። 30 ኦጎየራን ጎይኮ ኪ ጎአባባቴን ዳሩሪ ካግሮ ኤርግቻል ኢን ልናራን ኳሬ ላኮአታይናራን፤ ላኮናኬሳምናራን። 31 ኦጎየራን ጎይኮ ክያኖኩክ ጋራ ዋ እሰኑን ካአዬሰሮ ላኮናባብቴታንያ? 32 ‘እን ካአብራመ ሄዶ፤ ካይሳቃ ሄዶ፤ ካያይቆባ ሄዶያ’ ሃንሱን ዋ አርዶክ ሄዶያ ኳሬ ላኮካጎይ ሄዶዮ።” 33 ጎሳና ሂካ ካኮማላረ ጎራታ አጋልሰሰኬሳ ሳደን። 34 የሱሳ ሶዶቃውል አባብ ትር ጫልኢሳኖ ካኮማላረን ጎራታ ፋራሳዊል ራቶ ኩኩአመን። 35 እሶኮ ኮ ሴራ ካሙሴ ካእጋልሰሳረ የሱሳ ጫፍን ዶተጉረ ሃ አመ። 36 “ካእጋልሰሳቶ! ሴራል ካሙሴ ዱባኮ ካሮራራ ኤክ አጃጃያ?” 37 የሱሳና እሱን አባበረ፤ “ጎታ ሄዶካ ምግት ዋዳናይ፤ ምግት ኔፎይ፤ ምግት ቆፋይ ጌላ።” 38 ሂክ አጃጃ ካሆራርጃና ዱባንኮ ካሮራሮ አጃጃያ። 39 ካላም አጃጃና ሂካ ኢን ላራ፤ ህክና ‘ኦላታ እሰኦታ ኢን ጌላ’ ካእማሮያ። 40 ሴራ ካሙሴና ካሄገሮልኩክ አጋልሰሰ ዱባ ሂካ አጃጃ ላማ ጉት ዳባቴን ግራን አመ።” 41 ፋራሳዊል ኩኩአመንጉረን የሱሳ ሃ አመ እሶ ሆሳተ፤ 42 “ጋራ ካክርሰቶሳ መ ኢን ላራ? ሳኒ ታዮያ?” አመ እሶ ሆሳተ። “እሶና ሳኒ ታዳውተያ” አመን። 43 የሱሳና፤ “ሀያ ዳውተ አያና ቁሉክና

ሁናይ ሙን ኡሱ፡ ‘ጎታ!’ አማራ? አመ። 44 “ጎታ ጎታኬውን! ዲናካ ሉክታ ሄገሊ ታዳዳሪምሮ፤ “መርገቴይ ሀማጺ አመራ።” 45 ሃኑን ዳዉተ፡ ‘ጎታ!’ አም ጎኡምሮ ሀያ ክርስቶስ ምሲ ሳኒቴሳ ሊን ዳንዳራ?” 46 ሃፋራ ኮና አባብን ካዳንዴራ ጎርቱን ኤስ አርኮ ሀጋአበረ ሆሳይን ካጀባተ ማዮና ላግሮ።

23 ኤስኮ የሱሳ ጎሳና ኡሱኮ ኦኦጋልሳታረነ ሃ አመ አዬስ፡ 2 “ሴራ ካሙሴ ኦኦጋልሰሳራና ፋራሳዊል ሙሴ ኣን ሴራ ጎንኦጋልሰሰራውን ኦዶናት እሱን ሰሳመራ። 3 ሃኑን እሶ እሰኑን ካሰጋራን ዱባ ፈላ፡ ኦራዬን፡ አየሱን ጎአመን ጎጎአዬሳራንክ ማለ ላኮፈላራን፡ እሶ ኦፈላራን ፈሎ አሮፈልቴን። 4 አደና ሰዳሚን ታዳንዳሞን ሰዳን ታኦቲ ሸዬንጉረን ሃን ካአባዶ ጉት ካራን፤ እሶ ጎአመን ፈሪና ዱዶ ድኒን ላኮዶታራን። 5 “አባዶን ሙትን አመንጉረን ፈሎኦትሶ አባዶ ሆረ ቱሳይን አመረን፡ ሻሺ ኣን በቤድትሶይ ሻታራን፡ ማልድያ ኣን ገነትሶይ ሻታራን፡ ጋሽኮት ሻርፍና ኤራሳታራን፤ 6 ታአሞ ባንኤ፡ ታካባጃንተ ባንኤ፡ አይሁድኮክ ምን ካኤብ ካሆራርጂ ባርጨማ ሀማጺን ጌላታራን። 7 ኡሱማለና ግያ ኦሮ ፍጎዳ አታኖና ሀኢ ታአባዶኮ ‘ካኦጋልሰሳቶ!’ አማም ኡማምን ዶታታራን። 8 “እሰን ጎአመን ‘ካኦጋልሰሳቶ!’ አማም ላኮኡማምናታን፡ እሰን ካኦጋልሰሳራ ኮ ካላልያ፡ እሰን ዱባና አቢላልታን። 9 ዳሩሪ ካግሮ ኣሶ ኮ ማንኮአብታን ማራን ኡሊ ማዮና ‘ኣሶ’ አም አሮኡንቴን። 10 እሰኑን ባሊክሰን ክርስቶሳ ማንኮሌሮ ማራን ‘ባሊ’ አማም አሮኡማንቴን። 11 እሰን ኦሮኮ ዱባንኮ ካንጅንክ ካሌራ እሰኑን ካሀንዳሮ ልናራ። 12 እሰኑቴሳ ጦቂ ጦቂሳታራ የራታራ እሰኑቴሳ ካየራሳታራ አደ ካባጃማራ። 13 “እሰን ኢፍሳዶላ ሴራ ኦኦጋልሰሳታና ፋራሳዊል ሞናት ካዳሩረ ቶሰ አባዶ ጎጎታቦንኮ ኡፋ ማንኮጨፋታን ማራን ኣኔ እሰኑን! እሰን መተክሰኑን ላኮታብታን፤ ታብን ካዶታታሮና ላኮታብሳታን። [14 እሰን ኢፍሳዶላ ሴራ ኦኦጋልሰሳታና ፋራሳዊል ኣኔ እሰኑን! ምን ካጋልታንተል ሀዉአይ የላ፡ አባዶን ሙትን ኡብ ኤራሰን ማንኮኤባታን ማራን ካሜላን ፍርዳ እሰን አታይናታን።] 15 “እሰን ኢፍሳዶላ ሴራ ካሙሴ ኦኦጋልሰሳታና ፋራሳዊል፡ እሰን አባዶት ኮ እሰኑን ካኦጋልሳታሮ የልን በከይና ኡል ጉት ማንኮማራሙራታን ማራን እሶ ካኮታብሰን ጎራታ እሰኑን አምባ ካሮረ ታጋነም ኤሊኒ ጎጎኢሮን ማንኮየላታን ማራን ኣኔ እሰኑን! (Geenna g1067) 16 “እሰን ጃማሰ ጃማሰ ሆረ ሀይቴን ኦገጌሳታን፤ ኣኔ እሰኑን! ‘ማዮና ቁሉክ ምን ካዋይ ጎአማተ ኮና

ላኮዮ፤ እየሱስ ጎረቤቱን ምን ካዋ ኦሮ ካግሮ ዋርቂ ጉት ጎረቤቱን እደ አማቶ ግያራን' አማታን። **17** እስን ጃማሊልና ጎዋሌ ዋርቂኮና ዋርቂ ካቁሎይሳሮ ቁሎክ ምንኮና ኤክያ ካርራራ? **18** ኡሱማለና ታፋላ ባንኤ ካአማታሮ እባዶን ኮና ላኮግሮ፤ እየሱስ ጎረቤቱን ታፋላ ባንኤ ካግሮ ጃርሶይ ጉት ጎረቤቱን አማቶ ሀኩኡ ግያራን አማታን። **19** እስን ጃማሊሳ ፋላኮና ታቁሎይሳቶ ታፋላ ባንኤኮ ኤክያ ካርራራ? **20** ሃኩን ታፋላ ባንኤይ ካአማታራ ካኮፋላታራን ጉት ካግሮ ዱባይ አማታራ። **21** ኡሱማለና ቁሎክ ምን ካዋይ ካአማታ ቁሎክ ምን ካዋይ ኦሮ ካግሮና አማታራ። **22** ዳሩሪ ካአማታ ኮርፍንጀ ካዋይ ጉት ካሀማጼሮይና አማታራ። **23** “እስን ኢፍሳዶላ ሴራ ካሙሴ ኦኢጋልሰሳታና ፋራሳዊል ኣኔ እስኩን! እኩጋኮ፤ ዴቦኮና ኦካሽኮ ካሆራርጃ ሆራ ዋዉን ሰሳታን፤ ሴራ ኦሮ ካግሮ መተክ እየሰ ካሌሮ፤ ፍርዳ ካሩም፤ ሻጋና፤ ኡብዳማኖ አደን ቱፋተታን። ኣኒዕ ሀኢሶን ሀናኣና ፈልቴንዋ ካአዳንዮ። **24** እስን ጃማሊሳ ጃማሊሳ ሆረ ሀይቱን ኦገጌሳታን! ቢንኢ ኣን ካላሮ እየሰ ኣሳብቱን ሻፋታን፤ ጋላ ኣን ካለያሮ እየሰ አዳን ኤኔጋታን። **25** “እስን ኢፍሳዶላ ሴራ ኦኢጋልሰሳታና ፋራሳዊል፤ ኣኔ እስኩን! ካፋላ ያላኣና ካጡጋ ሁ ምና ታሳሬ ታላል ሻሻካራታን፤ ኦሮኦትሶ ጎረቤቱን ሳማኖይና እስከዋዳይዋቲ አማጋመራ። **26** እት ጃማክ ፋራሳውት ጣይ ሁ ካፋላ ያላኣና ካጡጋ ሁ ኦሮ ሙጭሰ፤ ኤሰኮ ጉትክሶና ካሙጭመ ሌራ። **27** “እስን ኢፍሳዶላ ሴራ ኦኢጋልሰሳታና ፋራሳዊል ጉትክሶ ባርሳ ጣላላመ ካኢዳሮ፤ ኦሮኦትሶ ጎረቤቱን ካጎየ እባዶኮክ ለፋልና ባቲክ እየሰ ዱባ ካአማጋመ ሂዬል ኣን ማንኮላታን ማራን ኣኔ እስኩን። **28** እሰና ሳሬ እባዶን ቁሎክ ኣን ላታን፤ ኦሮኦትሰን ጎረቤቱን ኢፍሳዳይና ማላነይ ኦአማጋማንያን። **29** “እስን ኢፍሳዶላ፤ ሴራ ካሙሴ ኦኢጋልሰሳታና ፋራሳዊል ኣኔ እስኩን! ካሄገሮል ኮክ ቃማል ግምባ ካቁሎሌ ቃማል ኢሳድሳ፤ **30** ‘ካጣዎ ኦዶላልካንክ ጌሲ ካግነ ሌነዋ፤ ካሄገሮል ኮክ ኢግ ኡባኖይ እሶን ዋታ ላኮላኔ’ አማታን። **31** ሂካኒና ካሄገሮል ላጋዴን ኦግረን ኦዶላልካንዉን ሳኒ ላኖክሰን እስ ኦትሰን ጉት እቶትናታን። **32** ጎርታኩን ኦዶላልክሰን ፈልን ኦሀጋክቤረን ፈሎ ጉድሳ። **33** “እስን ሀበሳል! ይሰ ካጃራ ታባኖን ታጋነም ኤሌንኮት ሙርትኮ ምሲ ሄሲን ዳንዴታን? (Geenna g1067) **34** ሃኩን ካሄገሮ፤ ቃሮሌልና ሴራ ኦኢጋልሰሳራን ፋርናራ፤ ሀናኣኮ ኮኮ ላጋድናታን፤ ኮኮና ሱይናታን፤ ካካለና አይሁድኮክ ምን

ካሌብ ኦሮ ቦጭናታን። ካታማ ቶኮ ካታማ ታካለ ቶሰ እሰን እሶ ሆሮርናታን።
35 ሃኑን ቁሉክ ካኣቤላ ኢግኮ ሀጋአበረ ቁሉክ ምኒና ፋላ ማንኮፈላታራን
 ጠኤ ካላጋዴታን ኤረ ካበራክዩኮ ታ ካዛክራሳ ኢግ ጌሮ ኡሊ ጉት ካኡባተሮ
 ቁሉክ ኢግ ዱባን እሰን ኦሆሳማታንታን። **36** እን ሩምና አማራ ካሮረሮ እየሰ
 ዱባን ህት አላታን ሆሳማታን። **37** “እት ኢየሩሳሌም፣ ካሄገሮ ታላጋዳታ፣ ኩ ቶሰ
 ኦፋራመራና ኤኤሞይ ታኤጋታ እት ኢየሩሳሌም ሉካለ ጨጨተክሴ ባልክሰ
 ሄገሊ ጎሳኩኩይሳቶይ፣ እባዶካ ኩኩይሰን ምያ ጋለ እን ዶተ፣ እሰን ጎአመን እ
 ላኮእንተታን። **38** ጎርታ ቁሉክ ምን ካሌብካክሰን ኦና ሊ ሄሰናራ። **39** ሃንሱን፣
 ‘ካጎታ መገ ካኤመታራ ካሶማሳመያ’ ታ አንታኒ ጊን ሂካ ጎራታኮ ሀጋአብረ እሰን
 ካላም እን ላኮዴታን።”

24 የሱሳ ቁሉክ ምን ካዋኮ ቤጉረ ሴታ ግራን ኡሱኮ ኦአጋልሳታረን ቁሉክ
 ምንኮክ ግምበ ቱሰን ኡሱ ቶሰ ኤመተን። **2** ኡሱ ጎአመን፣ “ሂካ ዱባ ድያታን?”
 “እን ሩምና አማራ ኤኤሞ ኤኤሞ ጉት ካግንባመራ ጎሳድያታኒ ሀዳርአሞን
 ሂካማሌ ጎሳግሮይ ካሄሰራ ኤኤሞ ኮና ላግሮ” አመ። **3** የሱሳ ዛይቲ ካበያራ ጋ
 ታኮአላታሮ ዋዳም ጉት ሀማጼ ግራን፤ ኡሱኮ ኦአጋልሳታረን ካለ ቤን ኡሱ ቶሰ
 ሰተንጉረን “አላ ኖን ሰጊላ” “ሂክ እት ካአማታ ዱባ ጎረ ልናራ? ኤሜቶታና
 አላምኮት ጋቾን ማላታ መያ?” አመን። **(aiōn g165)** **4** የሱሳና አባበረ ሃ
 አመ፤ “ማዮና እሰን ጎሳሶባንኮ እሰኡራዬን።” **5** ካሞጋና እን ክርሰቶሳያ አማ
 መገኬይ ኤመይናራ ካሞጋና ሸርሰናራን። **6** ጀሬና ጋራ ካጀረነ ታአዬሳማቶ
 ኦዱ እሰን ማልናታን፤ ሂክ እየሰ ላኖ ካሄሶንያ፣ ሀሌዎ ኳሬ ጋቾ ጋና ማንኮሌተ
 ማራን ሂካኒ እሰን ጎሳነይኖኮ እሰኡራዬን። **7** ጎሳ ጎሳይ ጉት፣ ዋኖና ዋኖ ጉት
 ከናራ፣ ባንኤ ባንኤይ ኡኢና ኡልኮክ አኣኖ ልናራ። **8** ሂክ ዱባ ጎአመን ቃኒን
 ካኡሙላኮት ራኮኮ ታሆራርጂታ። **9** “ሀሱ ጎራታ እባዶ እሰን ራኮዉን ሮርሰ
 ሰሰናራ፣ ላጋድናራን፤ መገኬኮት ኣላንቲ ጎሳ ዱባ ዶሌ ኦዱዳንቴን ልናታን። **10**
 ሀሱ ጎራታ ካሞጋን አማኖክሶ እሰናራ፣ ኮ ካካለ ሮርሰ ሰሰናራ፤ እሰ እሰኡሮና
 ኮኮ ዲድናራን። **11** ካሞጋን ካጣራ ካሄገሮል ከናራ፣ ካሞጋና ሶሶይሰናራን።
12 ታሞጋን ሜላነኮ ካከይ ካሞጋን እባዶኮት ጌላንጀ አምባል ልናታ። **13**
 ታጋቾ አሪ ታ ጌሮን ካአታተ ሀሱ ፋይናራ። **14** ጎሳ ዱባን እቶ ጎሳሌሮን
 ሂክ ዋኖናት ካዋኮክ ዋንጋላ አላም ዱባይ ላላባምናራ፣ ኤሰኮና ታጋቾ አሪ

ኤመይናታ። 15 “ጎርታኑ ካሄገሮ ዳነላን ጎሳጋመሮክ ማለ፡ ‘ካባቶይሰራ ካሜላን እየሰ ታቁሎይተቶ ባንኤ ካለሌሮ ካኮዳተን ጎራታ ካናባባራ ሀሻዶ!’ 16 ሀሱ ጎራታ ኡል ካይሁዳይ ካግራና ዋዳም ቶሰ ሀባቃቶ፡ 17 ምኒ ፎቂ ጉት ካግራ ማምሰክ እባዶና ሁ ምንኮ እታይን እሮዳጎ፡ 18 እራ ካግራ እባዶትና ሳርስኬሳ እታይን እሮእባባኖ። 19 ኤስ አሪ ሄለል ካፋቶዉና ካኢልሳሮን ራኮ ታኦቲ ለታ። 20 ጎርታኑ ባቃታኖክሰን ባጠሳይ ጎርቱን እይሁድን ታፎልሲ አሪ ጎሳሌኖንኮ ኤባየን። 21 ሀሱ ጎራታ አላም ታኮመጣመሮ አርኮ ሀጋእበረ ታ ህታር ጌሮ ሊ ካካሶን ኤሰኮና ሆረንባን ኤስ ራኮን ዋታ ካኮኤካሮ ካላይት ራኮ ታኦቲ ልናታ። 22 ሀሱ አሪል ጋባባይ ዋተና እባዶ ዱባ ላኮሄሳረ። ካእሳባመሮ ማራን ጎእመን ሀኑኡ እርጃ ጋባባቱን። 23 ሀሱ ጎራታ ማዮና ሂክማ ክርስቶሳ ህታኒ ግራ ጎርቱን ሀሴ ግራ ጎእመና እሮእብዳቱን። 24 ካጣራ ክርስቶሳልና ካጣራ ሄገሮል ከናራን፡ እሶን ጎኤካተ ካእሳባመሮና ሸርሲን እምሬን ካኦቲ ባሳክ ማላታልና ቱሰናራን። 25 ጎርታ እን እሰኑን ጣየ ሰጋራ። 26 “ሃንሱን ጎኤክማ ጋ ኦሮ ግራ፡’ ጎእመና ኤሰራ እሮቤተን፡ ሂክማ ምን ኦሮ ግርዲ ግራ ጎእመን እሮእብዳቱን። 27 ሀንቃ ምና ታብያንኮ ቤጉረ ምና ታኢያን ቶሰ ታጌሮ ጎሳህንቃሮ ኤረ ካእባዶኮት ኤመቶ ሂክማሌ ልናታ። 28 ራቃ ታኮግሮ ባንኤ ዱባ አላትል ኩኩእማራ። 29 “ሀኑኡ ታራኮ እርጃኮ እባባይረ ጎርስዋ “እርት ሙጉድ ልናታ፡ ድግንና ኢፋክሴ ትራይናታ፡ ባራጃና ዳሩርኮ ኡባይናራ፡ ካዳሩረ ሁናና ሻላጋምናራ።” 30 “ሀሱ ጎራታ ኤረ ካእባዶ ማላታ ዳሩሪ ጉት ሙትናራ፡ ሀሱ ጎራታ ኡሊ ታግታ ኣኒ ዱባና ዋ ዋ እም ኦይናራ። ኤረ ካእባዶና ካዳሩረ ዱማንቻይ ኦሮ ሁናይና ታኦቲ ካባጃይ ኤመታ ግራን ድናራን። 31 ኤርግቻልና ታኦቲ ታማላካታ ያየን ዋታ ፋራምናራ፡ እሶና ኦእሳባመራን አላም ምና አፋርኮ ዳሩርኮት ጋቾኮ ታ ዳሩርኮት ጋቾ ጌሮ እባዶ ኩኩይሰናራን። 32 “ካባላስ ጋኮ ሂካ አጋልሰሰ አጋልሳዬን፡ ባላል ጎሁርስሮ ባላሎ ጎጫሪድራን ሀሱ ጎራታ ባጤሳ ጋባላማኖ አዳሳታን። 33 ሂክማሌና ሂካ ዱባ ጎዳተን ኤስ አሪ ጎጫቲ ጋባላማኖ አዳሳ። 34 እን ሩምና እማራ ሂክ ዱባ ታጉዳሮ ህት አላታን ላኮሮርቶ። 35 ኡልና ዳሩርና ሮራንዋ ሃፋራክ ጎእመን ሱረ ላኮሮሮ። 36 “ሀሴ አርና ሀሴ ሳቲ ጎእመን ኦዶ ኳሬ ካዳሩረ ኤርግቻል ጎሌና፡ ኤረ ጎሌና ኮና ላካሶ። 37 ካኖሄ ጌሲ ጎሳሌሮይ ኤረ ካእባዶኮት ኤመቶ ኡኩማሌ

ልናታ። 38 ኡሱ ጌሲ በከ ሚራኣ ጌግሳናኮ ሆረነ ኖሄ ማርካፋ ቶስ ታኮታብናሮ አሪ ታ ጌሮን አባዶ አማና ጣማና፤ ኦር አታታና ኬሳታ ጎጎግሬንክ ማለ፤ 39 ሀሴ አሪ ታጌቶ መ ኤሜይናሮ ሀአዴሶን ሚራኣ ታበከይ ጎጎኤነጋመራን ኤሪ ካአባዶኮት ኤመቶ ኡሱማሌ ልናታ። 40 ኡሱ ጎራታ አባዶጃ ላማ አራ ሀይናራን፤ ኮ አታምናራ ኮ ሄሰናራ። 41 ሄለል ላማ ሪም ኮይ ሪታይናራን ቶ አታምናታ፤ ታካለ ሄሰናታ። 42 “ጎርታኑ ጎታክሰን ታኮኤሜይናሮ አሪ እሰን ማንኮካሶን ማራን ናባዳ ኦሳዬን፤ 43 ሂካ ዋዳና አባዬን፤ ኦዶ ምኔ ሄቶ ሄመን ማጎራታ ኤሜይናቶ አዴሰ ግረዋ ናባድ ምን ጎጎሳማሞንኮ ኦራታረዋ። 44 ኤሪ ካአባዶና እሰን ካኮሻዶን ጎራታ ማንኮኤሜይናሮ ማራን፤ እሰና እስኤካሳዬን ኦራ። 45 “ባቦክሶ እሶን ካኮዶትሳሮ ጎራታ ጎጎሰሰሮ ጎታ ምንኬሳክ አባዶ ጉት ካሹማተራ ካክብዳመና ቃሮክ ካሃንዳራ አዮያ? 46 ጎታኬሳ አባባይ ካኮኤሜሮ ጎራታ ታሰሳንተቶ ሀዳራ ፈለ ጉድሰ ግራን ካሄልናራ ሀሱ ካሃንዳራ ካሶማሳመያ። 47 እን ሩምና አማራ ኦግራን ኡራዋ ዱባይ ጉት ኡሱ ሾሚናራ። 48 እየሱን ጎአመን ካሃንዳራ ሀሱ አባዶት ካሜላን ጎሌና ኡሱ መተኬሳን፤ ‘ጎታ አዳላይናራ’ አማ፤ 49 ኪጉረ ካካለ ካሀንዳሮ ጃሌተሳ ቦጫኖ ጎሀጋእበ ጣሜን ኦሰታራነ ዋታ ጎአመና ጎጣመ፤ 50 ሀሱ ካሀንዳሮኮክ ጎታ ኡሱ ታኡራኖን አሪና ታኮሻዶን ሳቲ ኤሜይጉረ፤ 51 ሀሱ ካሀንዳሮክ ጎታኬሳ ሙርሰናራ፤ ኢጣተሳና ኢፍሳዶሌነ ዋታ የልናራ፤ ኤሰ ባንኤ ኦታና ኢልኮ ፎጫኖ ልናራ።

25 “ሀሱ ጎራታ ዋናናት ካዳሩረ ዳብ አባተንጉረን ማሻሻ ቆጶይን ኦቤራን ዴለልጃ ቶሞን እን ላራ። 2 እሶ ኦሮኮ ዴለልጃ ከኖ ጎዋ፤ ዴለልጃ ከኖ አደን ቃሮሌየን። 3 ጎዋሌ ዳብ አባተንጉረን ላንባ ምንጃ ላኮአባቴረን፤ 4 ቃሮሌ ጎአመን ዳብክሶን ዋታ ላንባ ምንጃ ጣርሙሰይ አባተን ግረን። 5 ካማሻሻ ካኮአዳላተረ ጎራታ ዱባና ሁዱሮ ካኮዱትሳተ ጎራታ ሁዱረን። 6 “ኡል ሄመን ጠኤ ካኮላረ ጎራታ ‘ካማሻሻ ኤመታራ ብያ ቆጶይን ታአማታ ኡምት ማልሳንተ።’ 7 “ሀሱ ጎራታ ዴለልጃ ዱባ ኬንጉረን ዳብክሶ ሀንቃይሳተን ኤካሳቴን። 8 ጎዋሌ ቃሮሌነ ‘ዳብካን ባይናራ ላንባትሰንኮ ኖን ሰሳ፤’ አመን። 9 “ቃሮሌኒዕ ዴለልጃ ጎአመን አባበንጉረን ኖ ታኡብና ላንባ ‘ኖዬና እስኩና ላናዋይን ዳንዳታ፤ ሰዬንዴነ ላንባ ካዳዳላታሮኮ ኡሱን አምናዬን’ አመን። 10 “ላንባ አምናይን ካኮብያረን ጎራታ ካማሻሻ ኤመተ፤ ኤካሳቴን ኦግረን ዴለልጃና ካሃሰኖ አሞ

ታኮኤካተሮ ባንኤ ኡሱነ ዋታ ታቤን፡ ኡፋና ጨፋመ። **11** “አዳላተን ኦኤማተራን ኦካለ ዳለልጃ፡ ‘ጎታ! ጎታ!’ ማጋኔ ‘ኖን ኡፋ ባንና’ አመን። **12** “ኡሱ ጎአመን፡ ንን ሩምና አማራ ኣን እሰን ላካሶ’ አመ እሶን አባበ። **13** “ጎርታኑ እሰን አሪ ጎርቱን ሳቲ ማንኮካሶን ማራን እሰኤካሳዬን ኦራ። **14** “ዋኖናት ካዳሩረ እባዶት ኮ ኡሱን ኦሀንዳረን እሰ ቶሰ ኡመጉረ ኦአቦ ኡራዋኦቴሳ ሀዳራ ሰሰጉረ ኡል ካካለ ሴይን ካኬሮ እባዶት ኣን ላራ። **15** ኦዶ ኦዶ ፈሎኦትሶክ ማለ ኮዉን ጣጋራ ከን፡ ኮዉን ላማ፡ ኮዉን አደ ጣጋራ ቶ ሰሰጉረ ጎርሰዋ ኡል ካካለ ኢሰ ሴተ። **16** ጣጋራ ከን ካአታተራ እባዶት ጎርሰዋ ዳዳላታኖ ሀጋአበረ ታካለ ጣጋራ ከን ዋረኤ ሄላተ። **17** ኡሱማለና ጣጋራ ላማ ካአታተረና ጣጋራ ላማ ዋረኤ ሄላተ። **18** ጣጋራ ቶ ካአታተራ ጎአመን ኡል ኦሽጉረ ማራጋደ ካጎታ ቃማለ። **19** “ኦሀንዳራንኮክ ጎታ ማንኮሴተሮ ታንጂን አዳላተ ኤመተረ ታሰሰሮ ጣጋራ ቶታይ ድን ሀጋአበ። **20** ጣጋራ ከን ካአታተረ ታካለ ጣጋራ ከን ዋረኤ ሄላተ ኣተ ኤመተጉረ፡ ‘ጎታ!’ ኣት ኢን ጣጋራ ከን ሰሰተ፡ ሂክማ ታካለ ጣጋራ ከን ዋረኤ ሄለራ አመ። **21** “ጎታኬሳና ‘ጎኢዳን ፈልተታ፡ ኣት ካአዳንክ ካአብዳንተ፡ ክጫርክ አዬሲ ካአብዳንተ ማንኮሌተ ማራን ካሞጋን አዬሲ ኣን ኩ ሹምናራ፡ ጎታካኒዕ ገጌሎ ቶሰ ታብ’ አመ። **22** “ኡሱማለና ጣጋራ ላማ ካአታተራ ካሃንዳራ ኤመተጉረ ‘ጎታ!’ ኣት ኢን ጣጋራ ላማ ሰሰተ፡ ሂክማ ጣጋራ ላማ ዳዳላጉረ ታካለ ጣጋራ ላማ ዋረኤ ሄለራ አመ። **23** “ጎታኬሳና ‘ጎኢዳን ፈልተታ፡ ኣት ካአዳንክና ካአብዳንተ ካሀንዳታ ክጫርኪን ካአብዳንተ ማንኮሌተ ማራን ካሞጋን እየሰ ጉት ኣን ኩ ሹምናራ፡ ጎታካኒዕ ገጌሎ ቶሰ ታብ’ አመ። **24** “ጣጋራ ቶ ካአታተረ ካሀንዳሮክና ኤመተጉረ ‘ጎታ!’ ኣት ካዉጣኖን ግቶ ካማጣራቶ፡ ካዳርኖን ግቶ ካኩኩይሳቶ ለግካኢቲ እባዶት ላኖ ካሶዋ፡ **25** ሃኑን አብሳየረ፡ ‘ጣጋራታ ኤሬ ቃማለራ፡ ሂክማ ማራጋደካ’ አመ። **26** “ጎታኬሳና አባበረ፡ ‘ኣት ካሜላንክና ቦዛክ ካሀንዳታ፡ ካዉጣኖን ግሮ ካማጣራታሮና፡ ካዳርኖን ግሮ ካኩኩይሳታሮ ላኖኬ ካሶ? **27** ሀያ ኣን ካኩአባባታሮ ጎራታ ጣጋራቲ ዋረኤን ዋታ ጎጎአታሮ ኦዳዳላታራዉን ሰሳኖ ዶትሳረ። **28** “‘ጎርታኑ ጣጋራ ኣታጉደን ጣጋራ ቶሞን ካአቦን ሰሳ፡ **29** ካአቦን አዳማራ፡ ሞጋታራ፡ ካላይክኮ ጎአመን ሀሱ ካግራዋ ኣታማራ። **30** ሂካ ላኦ ካላይክ ካሀንዳሮ ኣታና ኢልኮ ፎጫኖ ማንኮግሮ ሳሬ ካግሮ ጢልንጋክ ሙጉድ ቶሰ ቤሳ ሻፋ’ አመ። **31**

“ኤረ ካእባዶ ኤርግቻልኬሳ ዱባነ ዎታ ካባጃ ጎኤመተ ካካባጃ ኮርፍንጃይ ጉት ሀማጸናራ። 32 ጎሳ ዱባ ኡሱ ሆረ ኩኩምናራ፥ ኡሱና፥ ካፎፌ እዳድ ኦሬንኮ ጎጎአሳባሮይ፥ ጎሳ ኮ ካካለኮ አሳብናራ። 33 እዳድ ምና ታመርገነ ኦሬን ምና ታበተነ አሊሰናራ። 34 “ሀሱ ጎራታ ዎኖ ምና ታመርገነ ኦግራነ ሃ አምናራ፥ ‘እሰን አቦክ አሶማሳተራ ኮዬን አላም ታኮመጣመሮኮ ሀጋአበረ እሰኑን ካኤካተሮ ዎኖናት ሌላ። 35 አላንቲና እን ኡኤ አምሴታን፥ ሱጉባዩ ጣምሰታን፥ እን ማርት ሌ ጎኤማየ ቆጵቲታን፥ 36 እን ሀወአይ ጎሌ ሳርሰሴታን፥ እን ሀወአመ ዴተታን፥ ሻመ ጎሌ እን ቶሰ ኤማቴን ሆሳተታን።” 37 “ቁሎለና አባበን ሃ አመን፥ ‘ጎታ! እት ኡኢተ ዴነ ጎረ ኖ ኩ አምንሰ? ጎርቱን ሱጉባተ ዴነ ጎረ ኖ ኩ ጣምንሰ? 38 ማርት ሌተ ዴነ ጎረ ኖ ኩ ቆጵነ? ጎርቱን ሀወአይ ሌተ ዴነ ጎረ ሳርሰሰን? 39 ኡሱማለና ሀወአንተ ጎርቱን ሻንተ ጎረ ሴነ ኖ ኩ ሆሳኔ?’ 40 “ዎኖና አባበረ፥ ‘እን ሩምና አማራ ሂናኣ ሁጫር ኦሌራን አቢላልቲኮ ኮወን ካየልቲታን ኢን ካፈልቲታን አንያ’ አመ አባበ። 41 “ኤሰኮና ምና ታበተነ ኦግራነ አደ ሃ አምናራ፥ ‘እሰን ኦቃንጋንተታን፥ ዱርሳና ኤርግቻኬሳወን ታኤካተቶ ጅሩ ጅሮማን ኤለን ቶሰ እንኮ ካለ ብያደን ሴዬን። (aiōnios g166) 42 አላንቲና እን ኡኤ ላኮአምሴታን፥ እን ሱጉባዩ ላኮጣምሰታን፥ 43 እን ማርት ሌ ጎኤማየ ላኮቆጵተታን ሀወአይ ሌ ላኮሳርሰሰታን፥ እን ሀወአመና ሻመ ጎሌ እን ቶሰ ኤማቴን ላኮሆሳቲታን።” 44 “እሶና አባበሬን፥ ‘ጎታ! እት ኡኢተ ጎርቱን ሱጉባተ፥ እት ማርት ሌተ ጎርቱን ሀወአይ ሌተ፥ ሀወአንተ ጎርቱን ሻንተ ዴነኔ ጎረ ጋርጋራና ዋኔ?’ 45 “ሀሱ ጎራታ ዎኖ አባበረ፥ ‘እን ሩምና አማራ ሂናኣ ሁጫር ኦሌራንኮ ኮወን ፈላና ዋቲ እና ላኮፈልተታን’ አምናራ። 46 “ሂናኣ ጅሩ ጅሮማት ሙሮ ቶሰ፥ ቁሎለ አደን ጅሩ ጅሮማክ ግር ቶሰ ሴይናራን።” (aiōnios g166)

26 የሱሳ ሂካ እየሰ ዱባ አዬሰ ካኩጉድሳረ ጎራታ፥ ኡሱኮ ኦአጋልሳታረነ፥ 2 “እሪ ላማኮ አባባይረ ካፋሰካ ባለ ካካባጃምናሮ ላኖ ካሳንዋ፥ ኤረ ካእባዶና ሱዋሚን ሮር ሰሳምናራ” አመ። 3 ኤሰኮ አባባተረ ካቱቃሞል ዎይቻልና ጃርሳ ካኡሌ ቀያፋ ካአማማሮ ቱቃሞሉን ኦዶናት ካአቦኮክ አዉዲ ኦሮ ኩኩአመንጉረን፥ 4 ሚጌይ የሱሳ አቢና ላጋድሰሰን ማካረን። 5 “እየሱን ጎአመን ጎሳ ኦሮ ሻላጎ ጎጎኬኖንኮ ታባላ አሪ አሮሌኖ” አመን ሀኢ ቶ ሌን። 6 የሱሳ ብታንያይ ማሪ ባር ካአቦ ሰሞናኮክ ምኒ ግራን፥ 7 ሄለልትቲ ቶ ዶክ አሎ

አዉኣሎ ታሌተቶ ሸቶ ካአልባሰጢሮስ ብልቃደ ኮይ ኣተ የሱሳ ቶስ ጋባላንተ፡
 ባቦ እማ ሀማጼ ግራን መተኬሳ ጉት ሸቶ ክክብተ፡፡ 8 ኡሱኮ ኦኦጋልሳታረን ሂካ
 ካኮድያረን ጎራታ እማራቴን ሃ እመን፡ “ሂክ ዱባ ዳርኣኖ ሙንያ?” 9 “ሀት ሸቶ
 ካሞጋን ማራጋዴይ ዳዳላምጉደ ህየሳን ሰሳምን ዶትሳተ” እመን፡፡ 10 የሱሳና
 እሶ ካአመራን አዴሰረ፡ “ህታ ሄለልተቲ ሙን ራክሳታን? ኤስ ኢን ፈሎ ኦኢዳን
 ፈልተታ እመ፡፡ 11 ህየሳል ማጎሬና እስኔ ዋታ ግራን፡ እን ጎአመን አርጌቶ እስኔ
 ዋታ ላኮግርናሮ፡፡ 12 ኤስ ህታ ሸቶ ማርኬይ ጉት ክክባኖ እን ቃማልኬዉን
 ኤካሳኖያ፡፡ 13 እን ሩምና እማራ ሂክ ዋንጋላ ማንኮላላባማሮ አላም ዱባ፡
 ማራሙር ማኤት ባንኤና ኤስ ኢን ካፈልተታ ኤስ ሻዳኖ ሊ ሰጋምናራ” እመ፡፡ 14
 ሀሱ ጎራታ ቶሞንኮ ላማኮ ኮ ካሌራ ካእስቆሮቱ ይሁዳ ካአማማራ ካቱቃሞል
 ዋይቻል ቶስ ሴተጉረ፡፡ 15 “እን የሱሳ እስኩን ሮርስ ጎሰስ እስን አዴን ኢን መ
 ሰሰናታን?” እመ፡፡ እሶና ብር ሶንዶም ኡሱን ቶቴን ሰሰን፡፡ 16 ሀሱ ጎራታኮ
 ሀጋአበረ ይሁዳ የሱሳ ሮርስ ካኮሰሰሮ ካኤካሮ ጎራታ ዶታ ግረ፡፡ 17 ካባቦ ባላን
 ታሆራርጄ አሪ የሱሳኮ ኦኦጋልሳታረን ኡሱ ቶስ ኤመተንጉረን “እት ካፋሰካ ክታ
 ካሄመን ጎጎእንቶን ኤቲ ኖ ጎጎኤካንሶን ዶታታ?” እመን፡፡ 18 ኡሱና፡ “ካታማ ቶስ
 ሴየንጉዴን እስኔ ካኤሰለ አባዶት ኮኔ፡ ‘ካኦጋልሰሳራ ጎራታክ ጋባላመራ እንኮ
 ኦኦጋልሳታራን ዋታ ካፋሰካ ባላ ሞንካይ ካባጃይናራ እማራ እማ እመ፡፡” 19
 የሱሳኮ ኦኦጋልሳታራና ኡሱ ጎጎአጃጃሮክ ማለ ካፋሰካ ባላኮክ ክታ ኤካሰን፡፡
 20 ኡል ሄመን ካኮላረ ጎራታ የሱሳ ቶሞንኮ ላማ ኦፋራማራን ዋታ ባቦ ኣምን
 ሀማጼ፡፡ 21 የሱሳ ኣሞ ጉት ግራን፡ “እን ሩምና እማራ እስን ኦሮኮ ኮ እን ሮርስ
 ሰሰናራ” እመ፡፡ 22 እሶና ኣሎ ያደንጉሬን ቶቶል “ጎታ! እን ሌዉና?” እመን፡፡ 23
 የሱሳና አባበረ፡ “እን ሮርስ ካሰሰናራ ኢን ዋታ ያላኣይ ገነ ካዳግሳተሮያ፡፡ 24
 ኤረ ካአባዶ ኡሱ ማራን ጎጎጸፋመሮይ ጎይናራ፡ አየሱን ጎአመን ኤረ ካአባዶ
 ሮርስ ካሰሳሮን ሀሱ አባዶትን ኣኔ! ኡሱ አባዶት ሀኣላኖን ሄስ ግረዋ ካአዳንየ”
 እመ፡፡ 25 ሮርስ ካሰሰናራ ይሁዳና፡ “ካኦጋልሰሳቶ! እን ሌዉና?” እመ፡ የሱሳና፡
 “እት ካአማታ” እመ፡፡ 26 እሶ እማ ግራና የሱሳ ባቦ ኬሰጉረ ሶማሳተ ኢብስ
 ኣተጉረ ኡሱኮ ኦኦጋልሳታራዉን ሰሳ፡ “አህኣይ አታዬን አማ፡ ሂኒዕ ሶኦተያን”
 እመ፡፡ 27 ኤስኮ ጡጋ ኬስ ዋ ጋላተጉረ፡ ኡሱኮ ኦኦጋልሳታራዉን ሰሳ ሃ
 እመ፡ “እስን ዱባና ህታ ጡጋኮ ጣማ፡ 28 ካሞጋንኮክ ጨቦን ሻጋ ማራን

ካሉባይናራ አማቶ ኦሎሎብ ካአዴሰሳራ ኢግክ ሂካያ። 29 እን ጎአመን ሃ አማራ
 አቦኬክ ዋናናቲ እስኔ ዎታ ሂካ ካሉሎብ ካዎይኒ ጣሞ ታኮጣምናሮ እሪ ታ ጌሮ
 ህታ ጡጋኮ ሆረንባን ካዎይኒ ጣሞ ላኮጣምናሮ።” 30 ማዛሙር ዛማሬን
 አባባቴንጉረን ዛይቲ ካበያራ ጋ ታኮአላታሮ ዋዳም ቶሰ ቤን። 31 የሱሳ አደ፥
 “ህታ ሄመን እስን ዱባ እን ካካይናታን፥ ‘እን ካፎሬ ባሰናራ ካፎፋማራ ኢዳንዳ
 ዳርአምናራ አማመ ቁሉክ ማጻፋ ጻፋመራ።’ 32 “እየሱን ጎአመን እን ጎይኮ
 ካኮኬ ጎራታ እስንኮ ጣይ ጋሊላ ቶሰ ሴይናራ።” 33 ጴጢሮሳና አባበረ፥ “ካካላ
 ዱባ አላንቲታይ ኩ እስ ጎሴተና እን ጎአመን ዱዶ ኩ እስ ላኮሴሮ” አመ። 34
 የሱሳና ጴጢሮሳን፥ “እን ሩምና አማራ ህታማን ሉካላ ሀኦይኖን ግራን አት
 እን ሴድ ጋል ካካይናታ” አመ። 35 ጴጢሮሳ ጎአመን “እን ኩኔ ዎታ ጎይን
 ካዶትሳሮ ጎሌና ሱረ እን ኩ ላኮካካይናሮ” አመ። ኩኒዕ ኡሱኮ ኦአጋልሳታረን
 ዱባና ኡሱማሌዋ አመን። 36 ኤስኮ አባባተረ የሱሳ ኡሱኮ ኦአጋልሳታረን ዎታ
 ጌተሰማኒ ታአማማቶ ባንኤ ቶ ሴተ፥ እሱን “እን አራ ሴይጉረ ታ ኤባሮይ እስን
 ህታኒ ግራ” አመ። 37 ሴታ ግራን ጴጢሮሳና ይስ ካዛብዶሳ ላማ ዎታ አተ
 ሴተ፥ ጋዳና ጫናቃማኖ ሀጋእበ። 38 ኤስኮና “እን ታኅሮ አሎ ጫናቃመራ፥
 ኢነ ዎታ ናባዳ ህታኒ ግራ” አመ። 39 አባራንቲ ሸጺመጉረ ሆረሆረ በቤዱ
 ኡል ኦየረ “አቦኬ! ህት ታራኮ ጡጋ እንኮ ሀቡይቶ፥ እየሱን ጎአመን ፈኢቲ ማለ
 ሀሌኖን ግራን ፈኢታ ማለ ሀሌዎ” አመ ኤባተ። 40 ኤስኮ አባባተጉረ ኡሱኮ
 ኦአጋልሳታራን ቶሰ ጎኤማሮ ኦሁዱሬራን ዳጉረ ጴጢሮሳን፥ “ዱዶ ኢነ ዎታ
 ሳቲ ቶና ናባድ ግራና ዋተን?” 41 “ጫፍት ኦሮድ ጎጎታቦንኮ ናባዳ ኤባየን፥
 አያና ኤካተ ግራ፥ ሶ ጎአመን ሀራራን” አመ። 42 አደ ካላም ሴተጉረ “አቦኬ!
 ህት ታራኮ ጡጋ እን ሀጣሞን ግራን ታሮሮን ጎሌተ ፈኢታክ ማለ ሀሌቶ” አመ
 ኤባተ። 43 ካላም አባባይ ካኮኤማሮ ጎራታ ሁዱሮ ማንኮጌተተ ማራን ሁዱረን
 ኦግራን ዴ። 44 ግዳና እሶ ኢሰጉረ አደ ካሴድ ሴተጉረ ሆረ ካኤባተረ ኤብ
 አደ ኤባተ። 45 ኤስኮና ኡሱኮ ኦአጋልሳታረን ቶሰ አባባተ ኤመተረ፥ “ግዳና
 ሀራፍንቴን ሁዱርቴታን? ህትማ ሳቲ ጋባላንተታ፥ ኤረ ካአባዶ ጨባለይኮት
 ገነይ ሮር ሰሳምናራ። 46 ክያ ሴኖ፥ ሮርሰ ካሰሰናራ ኤመታ ግራ!” አመ። 47
 የሱሳ እዬሳ ግራን ቶሞንኮ ላማኮ ኮ ካሌራ ይሁዳ ካቲቃሞል ዎይቻልና ታኡሌ
 ጃርሶለኮ ኦፋራመራን ሺፋና ዱላ ካእበራ እባዶ ካሞጋና ዎታ ግረ። 48 የሱሳ

ሮሮስ ካሰሰራ ይሁዳና፡ “እን ካእንጋታራ ኡሱያ አባ” አመ ማላታ ሰሰ ማንኮግረ
 ማራን፡ 49 ጎርሰዋ የሱሳ ቶሰ ሴተጉረ፡ “ካእጋልሰሳቶ! ሮጎዳ ኢደግቶ” አመ
 ኡሱ እንጋተ፡ 50 የሱሳና፡ “እን ካጌላታሮ! ታኮንኤመተቶ ሃጃ ጉሳ” አመ፡
 ሀሱ ጎራታ አባዶ ጋባላመጉረ የሱሳ አበ ሸየ፡ 51 የሱሳን ዋታ ካግረኮ ኮ ገነ
 ኬሰጉረ ሺፋይ ቱቃሞልኮክ ዋይቻቲን ካሀንዳረኮት ነበ ጎሰ፡ 52 የሱሳና፡
 “ሺፋካ ኮፎ ኦሮ ታብሰ፡” “ሺፋ ካሞእታራ ሺፋይ ጎዋራ፡ 53 ጎዶተሰ እን አቦኬ
 ጎኤባየ ኩማ ካሞጋን ካቶታሞሮ ኤርግቻል እን ካፋርን እን ላራ? 54 ሂክ ሃ
 ጎሌ አደ ቁሉክ ማጻፋ ልናራ አማመ ካጻፋመራ ሞሲ ጉዳታራ?” አመ፡ 55 ሀሱ
 ጎራታ የሱሳ ጎሳነ፡ “ሽታ አብን ካኤማታሮ አባዶ እን ሺፋልና ዱላል አብቴንደን
 እን አብን ኤማቴን? አርጌቶ ቁሉክ ሞን ካኤብ ሀማጼ እን እሰን ጎእጋልሰሳረ
 ላኮአብተቴን፡ 56 እየሱን ጎእመን ሂክ ዱባ ካኮንሌራ ቁሉክ ካሃገርልኮክ
 ማጻፋይ ካጻፋመራ ጎጎጉዳሮንያ” ሀሱ ጎራታ ኡሱኮ ኦእጋልሳታረን ዱባ ኡሱ
 ኢሰን ባቃተን፡ 57 ሀሱ ጎራታ የሱሳ ካእበራ አባዶ ሴራ ካሙሴ ኦእጋልሰሳራና
 ጃርሳ ካኡሌ ኩኩመ ታኮግረ ቱቃሞልኮክ ዋይቻት ቀያፋ ቶሰ ኡሱ ጌሰን፡ 58
 እየሱን ጎእመን ጴጢሮሳ ፋክመጉረ ካቱቃሞል ዋይቻትኮክ አዉድ ታ ጌሮ ኡሱ
 ዴበ ሰሴታ ግረ፡ ኦሮዴ ታበጉረ እየሰ ታልናሮ ድን ኦኦራኔን ዋታ ሀማጼ፡ 59 ሀሱ
 ጎራታ ቱቃሞልኮክ ዋይቻትና ካአይሁድ ሾንጎ ዱባ የሱሳ ላጋድሰሰን ካጣራ
 አቶ ዶታ ግረን፡ 60 ካሞጋን ካጣራ አቶጆል ጎኤማተና አቶ ካሌሮ ላኮሄላቴራን፡
 ዳንበኔ ጎእመን አባዶ ላማ ጋባላመረ፡ 61 “ሂክ እባዶት ቁሉክ ‘ሞን ካኤብ
 ባሰጉረ አሪ ሴድ ኦሮ አባብ ማዳርን ዳንዳራ’ አመራ” አማ አዬሴን፡ 62 ሀሱ
 ጎራታ ቱቃሞልኮክ ዋይቻት ኬ አሌጉረ፡ “ሂክ እባዶ ካአቶቴሮ ዱባን ኮና አባብ
 ላኮአባባቶያ?” አመ፡ 63 የሱሳና ጎእመን ጫልኢ አመ፡ ቱኡቃሞልኮክ ዋይቻት
 የሱሳነ፡ “እን ኩ አርዶክ መገ ካዋይ አበራ፡ አት ክርሰቶሳ ኤረ ካዋ ጎሌተ ሮን
 ሰጊ?” አመ፡ 64 የሱሳና፡ “እትዋ እሲ እንተታ፡ እየሱን ጎእመን እሰን ዱባና ሰጊሮ
 ሂታኮ ሆረንባን ኤረ ካአባዶ ሁና ካዋኮት መርጌ ሀማጸረ ካዳሩረ ዱማንቻይ
 ኦሮ ኤመታ ግራን ድናታን” አመ፡ 65 ሀሱ ጎራታ ቱቃሞልኮክ ዋይቻት ሳርሰኬሳ
 ፊለጉረ፡ “ሂክ ዋ ሀባረራ፤ ሂካኮ ካካለ ሞሰክ አቶ ዶትሳራ? ኡሱ ዋ ሀባራ
 እዬሳኖ እሰንዋ ማልቴታን አመ፡ 66 መ እን እሰኩን ላራ?” አመ፡ “እሶና ጎይን
 ዶትሳራ” አመን አባበን፡ 67 ሀሱ ጎራታ በቤድቴሳ ሀንጨፈ ቱፋ ባላባንጃ ባሳ፡

68 “ክርስቶስ! እየኛ ኩ ካባሰ? አላ ሄገሮ እየሰ” አመን። 69 ኤስኮ አባባተረ ጴጢሮሳ ካቱቃሞል ወይቻትኮክ እዉዲ ኦሮ ሀማጼ ግራን ድይት ቶ ኡሱ ቶሰ ጋባላንተጉደ “እት ካጋሊላ የሱሳነ ዎታ ግቴዎ” አንተ። 70 ኡሱ ጎአመን፡ “እት ማመ እማቶ እን ላካሶ እማ ዱባይ ሆረ ካካተ።” 71 አዉድኮ ካኮበያራን ካራን ብን ሴታ ግራን ታካለ ድይት ጴጢሮሳ ዴተጉዴ ኤስ ካግረ እባደዉን “ሂክ እባዶት ካናዝረት የሱሳነ ዎታ ግረ” አንተ። 72 ጴጢሮሳን ካእማቶ ሃፋራይ “ሂካ እባዶት እን ላካሶ” አማ ካላም ካካተ። 73 አባራን ጋጭመጉረ ኤስ አሌ ካግረ እባዶ ጴጢሮሳ ቶሰ ጋባላመንጉረን፡ “እዬስካዋ እዴሰሳራ፡ እግራን እትና እሶኮ ኮታ” አመን። 74 ኡሱና እማታና ቃንጋ “እን ኡሱ እባዶት ላኮካሶ” አመ። ሀሱ ጎራታ ሉካለና ኦየ። 75 ጎርሰዋ፡ ጴጢሮሳ “ሉካለ ሀኦይኖን ግራን ሴድ ጋል እት እን ካካዪናታ” አመ። የሱሳ ካእዬሰራ ሃፋራ ኡሱን ቃል አመ። ጴጢሮሳና ሳርዴ ቤጉረ ዩሩሩ አመ ኦተ።

27 ባር ባባርሰ ካቱቃሞል ወይቻልና ጃርሳ ካኡሌ ዱባ የሱሳ ታየል ላጋድራን ማካረን። 2 የሱሳ ሸዬን ጌሰንጉረን ካሮም ሞት ጲላጦሳን ሮርሰን ሰሰን። 3 ሮርሰ ካሰሰራ ይሁዳና የሱሳ ጎይን ፍርዳማኖ ካኮድያረ ጎራታ ጋቤ። ብር ሶንዶም ካቱቃሞል ወይቻሉና ታኡሌ ጃርሶለዉን አባበ ሰሰጉረ። 4 “እን ቁሉክ እባዶት ጎይን ሮርሰ ማንኮሰሰሮ ማራን ባሰራ” አመ። እሶና “ሀያ ኖ መ ካታብሳራ፡ ሀሱ ያዳካያ” አመን። 5 ሃኑን ይሁዳ ብር ቁሉክ ሞን ካኡብ ኦሮ ሻፈ ኢሰ ቤጉረ እሰ ሱላተ ጎየ። 6 ካቱቃሞል ወይቻልና ኤስ ብር አቴንጉረን፡ “ህት ብር ዶክ ካኢጌኮት ማንኮሌተቶ ማራን ሞን ካዋዉን ሉጉድን ሴራካን ፈኢ ላኮሰሳሮ” አመን። 7 ማካረንጉረን ማርት ታኮቃማላን ታቃማል ባንኤ ጎጎሌቶን ኡሱ ማራጋዴ ኤሬኮ ሁ ካመጣሮኮት ባንኤ አምኔን። 8 ሃኑን ሀሴ ባንኤ ህታር ታጌቶይ፡ “ኡል ካኢጌ” እማማተ ኡማማታ። 9 ሂካ ጋራይ ካሄገሮ ኤርማሳይ፡ ይሁዳን ሙራ ጎጎሌቶ፡ ጎሳ ካእሰራኤል ታሄረገሮ “ብር ሶንዶም አታቴን። 10 ጎታና እን ጎጎአጃጃሮክ ማለ ኤሬኮ ሁ ካመጣሮኮት ባንኤን ሙሬን” እማመ ካሰጋመራ ጉዳተ። 11 ሀሱ ጎራታ የሱሳ ካሮም ሞት ጲላጦሳ ሆረ አሌ፡ ካሮም ሞትና “እት ካእይሁድ ዋኖታ?” አመ ሆሳተ፡ የሱሳና “እት ጎጎአማቶያ” አመ አባበ። 12 ካቱቃሞል ወይቻልና ጃርሶላ ጎሞተና ኡሱ አደ ኮና አባብ ላኮሰሰ። 13 ሀሱ ጎራታ ጲላጦሳ “ምያ እቶ ከነን እቶቴራን ላኮማላቶያ?”

እመ። 14 የሱሳ ጎደሙን ካሮም ሞትና አሎ ታ ማምሮን ካሞታመሮ ሞቶን ሃፋራ ኮና ሱረ ላኮአባበ። 15 ካሮም ሞትና ጎሳ ካፋሰካ ታባላ እሪ ጎጎፋራምሮን ካደታታሮ ኦዶ ኮ ሻኖኮ ካኮፋራሮ ዋጋ አባናየ። 16 ሀሱ ጎራታ ባስ ፈላኖይ ካአዳሳመረ ባርባነ ካአማማራ ካሸያመረ ኮ ግረ። 17 ጎሳ ኩኩ ካኮአማረ ጎራታ ጸላጦሳ፡ “ባርባነኩና፡ ክርስቶሳ ካአማማሮ የሱሳኩ፡ እዮ እን ጎጎፋሮን ዶታታን?” እመ። 18 ጸላጦሳና ሂካ ካኮንአመራ እሶ ቃናቴን ሮርሰን ካሰሰራን ማንኮአዳሳረ ማራንያ። 19 ጸላጦሳ ካፍርዳ አርጃታ ጉት ሀማዬ ግራን ኦርቴሳ፡ “አላንቲ ቴሳ ሄመንካ ሀሰሎይ ራኮ ታሜላን እን ማንኮዳሮ ማራን ሀሱ ቁሉክ እባዶት ጉት ኮና እየሰ ጎጎየሎንኮ ካአማሮ ሀንዳ ኡሱን ፋርተ።” 20 እየሱን ጎደሙን ካቱቃሞል ዋይቻልና ታኡሌ ጃርሶለል ባርባነ ጎጎፋራምሮ የሱሳ እድ ጎጎ ጎሮን ጎሳ ጸላጦሳ ጎጎሆሳሮን ከኬሳ ግረን። 21 ካሮም ሞትና፡ “እሶ ላማኮ እዮ እን ጎጎፋሮ ዶታታን?” እመ ካላም ሆሳተ። እሶና፡ “ባርባነ” እመን አባበን። 22 ጸላጦሳና፡ “ሀያ ክርስቶሳ ካአማማሮ የሱሳ ሞሰ የላ?” እመ። እሶ ዱባና “ሀሱዋሞ” እመን። 23 ጸላጦሳና፡ “ሙን? መ ታሜላን ፈለራ?” እመ ሆሳተ። እሶና እደን አሎ ኦካ፡ “ሀሱዋሞ” እመን። 24 ጸላጦሳና ኦኮ አዳማኖ ኳሬ ኮና እየሰ ካጋርጋሮን ላኖ ዴጉረ “እን ሂካ እባዶትኮክ ኢግኮ ባልቻያ።” እሰን እስኦትሰን ኦራዬን፡ “ጎርታኑ ኦዶናት ካክሰንያ” እመጉረ በከ ኬንሰሰጉረ ጎሳ ሆረ ገነኖኦቴሳ አለ። 25 ጎሳ ዱባና፡ “ኢግኬሳ ኖየና ይሰካን ጉት ሀሌዎ” እመ አባበ። 26 ሀሱ ጎራታ ባርባነ ፋረ ጋፋረረ፡ የሱሳ እደ ቦጪሰረ ጎጎሱዋምሮ ሮርሰ ሰሰ። 27 ኤሰኮ ካሮም ሞቲኮክ ዋታዳራ የሱሳ ካሞትት አዉድ ቶሰ ጌሰን፡ ዋታዳራል ዱባ የሱሳ ማራሙር ጎጎአልሮን ኩኩይሰ። 28 ሳርሰኬሳና ቃረንጉሬን ሄላት ካባ ሳርሰሴን፡ 29 ኤኤን ማማረን ካላቻ ፈሌንጉሬን መተኬሳይ ጉት ካዬን፡ ታሌማ ዳማ ገነ ታመርጌይ አብሰሴን ሆረ ግልቢሰንጉሬን “አይሁድኮክ ዋኖ! ኖጎዳ ኩን ሀሌቶ” እማ ቃጭፋታረን። 30 ሀንጩፈ ኡሱ ጉት ቱፋ ታሌማ ዳማ ገነኮ ኣተንጉረን ታሌማ ዳማይ መተኬሳ አባበን አባበን ባሰን፡ 31 ቃጭፋቴን አባባቴንጉረን ሄላት ካባ ቃረንጉሬን ካሆሬ ሳርሰኬሳ ኣተን ሳርሰሴን፡ ሱይና አበን ሴተን። 32 አበን ሴታ ግራን ሰሞና ካአማማረ ካቀሬና ኡልኮክ እባዶት ሄሌንጉሬን፡ ማሰቃሊ ጎጎሰድሮ ሁኖመን። 33 ፋረንና፡ [ቡቀ ታመተ] ታሌተቶ ጎልጎታ ታአማንተቶ ባንኤ ካኮግያረን ጎራታ፡

34 ካኦኮኮታሮ ኮኮነ ዋታ ካለዳመሮ ካዋይኒ ጣሞ ኡሱ ጎጎጣምሮ ሰሰን፤
 ኡሱ ጎአመን ሀኢ እበ ዴረ ጣምን ላኮዶተ። **35** የሱሳ ሱዬን አባባቴንጉረን
 ኢጣ ቤሳተን ሳርሰልኬሳና ሄዴዳመን፤ **36** ኤሴና ሀማጼን ኦራ ግረን። **37**
 “ሂክ ካእይሁድ ዋኖ የሱሳያ” ታአማቶ ታሞቶ ጹፊ መተኬሳኮ ጉንቴ ካዬን።
38 ሸቶሌ ላማ ኮ ምና ታመርገን፤ ኮ ምና ታበተነ ኡሱነ ዋታ ሱዬን። **39** ራኔ
 ካሮራራ አባዶ አሎ ኡሱ ሀባራ ቃጭፋታ፤ **40** “ቁሉክ ምን ካኤብ ባሰጉደ አሪ
 ሴድ ኦሮ ካማዳርናታ፤ አላ እሰኦታ ሃሳ? ኤረ ካዋ ጎሌተ አላ ማስቃሊ ጉኮ
 ዳግ” አማ ግረን። **41** ኡሱማለና ቱቃሞልኮክ ዋይቻል፤ ሴራ ኦአጋልሰሳራና
 ጃርሶለነ ዋታ ሌንጉረን ቃጭፋታ ሃ አማ ግረን፤ **42** “ካካለ ፋይሳራ” እሰኦቴሳ
 አደ ፋይሳይን ላኮዳንዳሮ፤ ኡሱ ካእሰራኤል ዋኖ ጎሌ ግዳ ማስቃሊኮ ሀዳገ፤
 ኖና አማንናና። **43** ኡሱ ዋይ አማናታራ እን ኤረ ካዋያ አማ ማንኮግረ ማራን፤
 አላ ዋ ኡሱ ካጌላታሮ ጎሌ ግዳ ሀሃሶ። **44** ኡሱነ ዋታ ኦሱዋሜሬን ሸቶሌና
 ኡሱማሌዋ ሀባር ካሞጋን ሀባራረን። **45** ሳቲ ሌኮ ሀጋአበረ ታ ሳቲ ሳጋሊ ጌሮ
 ኡል ዱባ ጉት ሙጉድ ሌ። **46** ሳቲ ሳጋሊ የሱሳ ያየቴሳ ጦቂሰረ “ኤሎሄ ኤሎሄ
 ላማሰበቀታኒ?” አማ ኦኬ። ፋረንና “ሄዶኬ! ሄዶኬ! እን ሙን ኢሰ?” አማኖያ።
47 ኤስ አሌን ኦግራንኮ ኮኮ ማለንጉሬን “ኤላሳ ኡማራ” አመን። **48** ጎርሰዋ እሶ
 ኦሮኮ ኮ ትያ ኤመተጉረ እሰፎንጅ ኣተጉረ ካኦኮኮታሮ ጣሞ ካዋይኒ ኦሮዴሰ
 ናካረጉረ እሰፎንጅ ሌማ ብርጠ ካየጉረ የሱሳ ጎጎጣምሮ ሰሰ። **49** ኦካለና
 አደን “እሳጋ አላ ኤላሳ ኤሜይጉረ ኡሱ ጎሃሰናሮ ድናና” አመን። **50** የሱሳ አደ
 ካላም ያየ ጦቂሰ ኦኬጉረ ኔፎ ቤተ። **51** ሀሱ ጎራታ ቁሉክ ምን ካዋኮት ጎጎሎ
 ኤለኮ ታ ሄገል ጌሮ ባንኤ ላማ ቤ ፊላመ፤ ኡልና ሻላጋመ፤ ኤሌሞልና በበልኤ፤
52 ሀየልና ባናመ፤ ጎየ ካግረ ካሞጋን ቁሉለና ኬን፤ **53** ሀየልኮ ቤጉረን ጎይኮ
 ክያኖ ካየሱሳኮ አባባተረ ቁሉት ካታማ ኢየሩሳሌም ቶሰ ታቤንጉረን ካሞጋን
 አባዶን ሙተን። **54** ካቦሎ ዋይቻልና ኡሱነ ዋታ የሱሳ ኦራ ካግረ ዋታዳራል
 ኡል ሻላጋማናና ካሌሮ አየሰ ዱባ ካኮድያረን ጎራታ ኣሎ አብሳቴንጉረን፤ “ሂክ
 ኦግራን ኤረ ካዋየ” አመን። **55** ጋሊላኮ ኦኤሜተራና የሱሳን ካዶትሳሮ አየሰ
 ሀንዳይን ዴበ ካሰሰታረ ሄለል ካሞጋን አየሰ ታልናሮ ዲያ ፋክሜን ኡሱ ጎቦቢ
 ግረን። **56** እሶ ኦሮኮ ካመግደላ ኡልኮት ማይራመነ ታያይቆባና ታዮሴፋ እዬ
 ማይራመኔ ግረን። ኡሱማለና ኦር ታዛብደሳነዬን። **57** ኡል ሄመን ካኮላረ

ጎራታ ዮሴፋ ካአማማራ ዱሬሳት አርማትያስ ታአማና ካታማኮ ኤመተ፡ ኡሱና እደ የሱሳኮ ካእጋልሳታረየ፡ **58** ኡሱና ጲላጦሳ ቶስ ሴተጉረ ሬስ ካየሱሳ ኤባተ፡ ጲላጦሳና ኡሱን ጎሳሰሰራውን አጃጁ። **59** ዮሴፋና ሬስ አተጉረ ጋሽ ታኡሱቢ ማረ ኢድሰ። **60** ኤኤሞኮ ቆራመ ካአሻመረ ጉምቢ ኦሮ ቃማለ፡ ኤሰኮና ኤኤሞ ካንጂንክ ኦቶቶልሰጉረ ካቃማል ጉምቢኮት ህእ ዱድሰ ሴተ። **61** ሀሱ ጎራታ ካመግደላ ኡልኮት ማይራመና ታካለ ማይራመ ቃማል ሆረ ሀማጸን ግረን። **62** ታላሞ አሪ ታያሱማ ማንኮሌተ ማራን ካቱቃሞል ወይቻልና ፋራሳውልን ራቶ ጲላጦሳ ቶስ ሰተንጉረን ሃ አመን፡ **63** “ጎታ! ሀሱ ካሶሶይሳራ ጣየ ኔፎን ግራን ‘ታሴድ አሪ ጎይኮ ኪናራ’ ካአማራ ኖን ቃል አመራ። **64** ሃኑን የሱሳኮ ኦእጋልሳታረን ሬስ ሄት አትጉረን ጎሳነ፡ ጎይኮ ኬራ እም ጎንአዬሶንኮ ቃማልኬሳ ታ አሪ ሴድ ጌሮ ጎንኦራምሮ አጃጁ፡ ጎርቱን ካሃረ ሶሶዋኖ ካሆሬኮ ካረረ ሌራ።” **65** ጲላጦሳና፡ “ካኦሮ እስን አብታንዋ ሴየንጉዴን ካካሳን ራድ ኦርሰሳዬን” አመ። **66** እሶና ሰተንጉረን ቃማል ጉት ማታማ ካዬንጉሬን ካኦሮ አልሴን።

28 አይሁድን ታፎልሲ አርኮ አባባተረ ታዋጋ አሪ ባር ቡላነ ካመግደላ ኡልኮት ማይራመና ታካለ ማይራመ ቃማል ድን ሴተን። **2** ደራኣ ካአቲ ኡልኮክ አኣኖ ሌ፡ ካጎታ ኤርግቻትና ዳሩርኮ ዳገጉረ ቃማል ቶስ ሴተ ኤኤሞ ኦቶቶልሰጉረ ጉት ሀማጸ። **3** ታኤርግቻ በቤድቴሳና ሀንቃ ኣን ታሀንቃቶ፡ ሳርሰኬሳና በለት ኣን ጉማራክየ፡ **4** ኦኦራኔና ኤርግቻት አብሳታናኮ ካከይ ሀረኤን ካጎየሮ አባዶ ኣን ሌን። **5** ኤርግቻትና ሄሌልጂን ሃ አመ፡ “እስን አሮአብሳቴን እስን ካሱዋመረ የሱሳ ካዶታታን ኣን ካሶዋ፡ **6** ሃኑን ህታኒ ላኮግሮ፡ ጎንአዬሰሮይ ኬራ፡ ኮዬን ኡሱ ታኮቃማላመረ ባንኤ ዲያ። **7** ግዳ ሳማ ሴየንጉዴን ኡሱኮ ኦእጋልሳታሬውን የሱሳ ጎይኮ ኬራ፡ እስንኮ ጣይ ጋሊላ ቶስ ሴይናራ ጎርታኑን ኣን ሰገራ።” **8** ሄሌልጂና አብሲና ገጌሎይ አማጋማንጉሬን የሱሳኮ ኦእጋልሳታራውን ሰግን አሎ ትያ ታቃማል ባንኤኮ ኢስን ሴተን። **9** ጎርሰዋ የሱሳ እሶ ሄለጉረ፡ “ኖጎዳ ግታን” አመ። እሶና የሱሳ ቶስ ጋባላመንጉረን ሉክቴሳ አባተን ሳጋደን። **10** የሱሳና “አሮአብሳቴን ሴየንጉዴን ጋሊላ ቶስ ጎንሴራውን አብላልቴውን ሰጋ፡ ኤስ ኣን ድናታን” አመ። **11** ሄሌልጂና ራድ ሴቶ ጉት ግራን ኦኦራኔንኮ ኮኮ ካታማ ቶስ ቤንጉሬን ካሌሮ ዱባ ካቱቃሞል ወይቻሉን ሰገን። **12** ካቱቃሞል ወይቻልና

ጃርሶላነ ዋታ ኩኩአመን ማካረንጉረን ዋታዳራን ማራጋደ ካሞጋን እሶ ሰሳ ሃ
 አመን፤ **13** “ኖ ሁዱርን ግራን ‘ኡሱኮ ኦአጋልሳታረን ሄመን ኤመተንጉረን ኖኮ
 ሄቴን አማ አመን፡፡” **14** ህት ኦዱ ሞቲ ዶሌ ጎማልሳንተና ሱረ ኖ ጋቾ አዳሰንሳ፡
 ኮና ካሜላን አየሰ እሰን ጎጎጌኖንኮ የልኖዋ” አመን፡፡ **15** ዋታዳራልና ማራጋደ
 አታቴንጉሬን ጎጎአጃጃመራን ማለ የሌን፡ ህት ጅርት ህታር ጊን አይሁድ ዶሌ
 ጋምባንተ ዳርአንተ፡፡ **16** ኤሰኮና ቶሞንኮ ኮ የሱሳኮ ኦአጋልሳታረን ጋሊላይ
 ታግቶ የሱሳ እሶን ታቱሰሮ ዋዳም ቶሰ ሴተን፡፡ **17** ኡሱ ካኮድያረን ጎራታ
 ሳጋደን፡ ኮኮ አደን ሄዳቴን፡፡ **18** የሱሳና ኡሱኮ ኦአጋልሳታረን ማንኮግሬን ቶሰ
 ኤመተጉረ፡ “ኦዶናት ዱባ ዳሩርና ኡሊ ኢን ሰሳመራ፡ **19** ሃኑን ሴዬንዴን ጎሳ
 ዱባ ኦዶይ፡ ኤረይና አያና ቁሉኮክ መገይ ጣማቃ አንኮ ኦአጋልሳታራን የላ፡፡ **20**
 አን እሰኑን ካሰሰሮ አጃጃ ዱባ ጎጎኦራናዉን አጋልሰሳ፡ አንና አላምኮት ጋቾ ታ
 ጌሮ አርጌቶ እሰኔ ዋታ ግራ” አመ፡፡ (aiōn g165)

ማርቆስ

1 ሂክ ሌረ ካዋ ካየሱሳ ክርስቶስክ ዋንጋላ ካሆሬያ። **2** ካሄገሮ እስያሳ፡ “ራ ካኤካስሮ ካህንዳሮካኬ ኩኮ ጣይ እን ፋሮዋ እማመ ጸፋመራ።” **3** “ህክና፤ ‘ራ ካጎታ ሌካሳ፤ ሻካራ ሊድሳ እማ ጋድ ታኢያተ ያየ።” **4** ሃንሱን ካጣማቃረ ያንሳ ቃሉላቶክ ኡል ጣማቃና ጨቦኮ ሀሄሶ እማማኖን ጉላ ጋላኖኮክ ጥንቃታ ላላባ ሌመተ። **5** ይሁዳኮና ካኢየሩሳሌም ማማን ዱባኮ እባዶ ራቶ ኡሱ ቶስ ሴተረ ጨቦክሶኮ ጉላ ጋላ ላጋ ዮርዳኖስ ገነ ታያንሳ ጣማቃመን። **6** ሳርስ ካያንሳ ኦጎሮ ኦጋላኮ ካፌላማሮዬ፤ ሞኢና ጊ ሙዋታረ፤ ባቦከሳና ከንተፋሮና ማላብ ካጋዶየ። **7** ላላባኖኬሳና፡ “እን ሁሰም ከፈሮኦቴሳኮክ ሻኖ ፋርን ካኩዳንደኖን እንኮ ካሮራራ እንኮ ሃሬ ሌመታራ።” **8** እን እስን በክ ጣማቅናራ፤ ኡሱ ጎእመን እያና ቁሉክ ጣማቅናራ ካእማረያ።” **9** ኡሱ ጎራታ የሱሳ ታጋሊላ ካታማ ታሌተቶ ናዝረትኮ ሌመተረ ላጋ ካዮርዳኖስ ገነ ታያንሳ ጣማቃመ። **10** በከኮ ካኩብያረ ጎራታ ዳሩር ባናንተደ እያና ቁሉክ አራብ እን ኡሱ ጉት ዳጋ ግራን ዴ። **11** እን ካጌላታራ “ኤረክ አትታ ኩዬ ገጌላታራ ታእማተ ያየ ዳሩርኮ ማልሳንተ።” **12** ጎርሰዋ እያና ቁሉክ ጋ ቶስ ኡሱ ቃጃልሰ። **13** ጸላዬና ጫፋማ አሪ አፋርታም ጋድ አዳላተ ሱላሊን ዋታ ግረ፤ ኤርግቻልና ኡሱን ሀንዳዬን። **14** ያንሳ ምን ካሻኖ ካኮታባረ ጎራታ የሱሳ ዋንጋላ ካዋ ላላባ ኡል ካጋሊላ ቶስ ሴተረ፤ **15** “ጎራታ ጌራ፤ ዋኖናት ካዋ ጋባላመራ፤ ጨቦኮ ጉላ ጋላ፤ ዋንጋላ እማና!” እማ ላላባ ግረ። **16** የሱሳ ላቡ ታጋሊላ ኤነ ማረ ሮራ ሰሞናና አቢኬሳ እንድራሳ ከኩኡብ ኦክባታሬን ማንኮሌን ማራን፤ ማራብ በክ ሉጉዳታ ግራን ዴ። **17** የሱሳና “እን ዴበ ሰሴዬን፤ እባዶ ኦክብታን የልናራ” እመ። **18** እሶና ባኔዋ ማራብ ታትሶ ኢሰን ኡሱ ዴበ ሰሴተን። **19** ኤሰኮ አባራን ሸጺ ጎጎእመ፤ ካዛብዶሳ ኤረ ያይቆባና አቢኬሳ ያንሳ ዋላቦ ሀማጼሬን ማራብትሶ ኤካሳታ ግራን ዴጉረ፤ **20** ባኔዋ እሶ ኡመ፤ እሶና አቦክሶ ዛብዶሳና ማራጋደወን ኦፈላሬን ዋታ ዋላቦ ጉት ሉጉደን ኢሰን ኡሱ ዴበ ሰሴተን። **21** ኤሰኮና ካቅፍረናሆም ማማን ቶስ ሴተን፤ የሱሳ ባኔዋ እይሁድን ታፎልሲ አሪ እይሁድኮክ ምን ካኤብ ታበረ አጋልሰሳኖ ሀጋአብ። **22** ሴራ ካሙሴ ኦክጋልሰሳራን እን ሀሌኖን ግራን ኦዶናት ካአቦ እን አጋልሰሳኖይ ጎሳና አጋልሰሳኖኬሳ ሳደ። **23** ኡሱ ጎራታ እይሁድኮክ ምን ካኤብ ኦሮ ካግረ ባቲክ እያና ካኮግረ እባዶት ኮ ሃ እማ ኦኬ። **24** “ካናዝረት

የሱሳ፡ አት ኖኮ መ ደታታ? ኖ ባሰን ኤማተታ? አት አዮቶ አን ኩ ካሶዋ፡ አት ካዋ ቁሉክታ።” **25** የሱሳና፡ “ጫልኢ አምና፡ ኡሱኮና ቤና!” አመ ሀድሰ።

26 ባቲክ አያና አባዶት አሎ ኡለ ቦጩ አባባተረ ኤሰኮ እያ ቤ። **27** ጎሳ ዱባ ሳዳኖይ፡ “ሂክ አየሰ መያ? ኦዶናት ካአቦ ካኡሱብ አጋልሰሳኖ ላኖያ! ባቲክ አያናጃል ኡሱ ጎአጃጅሮ እሶና ብያራን!” አማ እስኦሮ እስእስ ሆሳተን። **28** ባኔዋ አታንኬሳ ጋሊላ ጎቦቢ ካግሮ ባንኤጃል ዱባ አዳሳመ። **29** ባኔዋ ምን ካኤብ ካአይሁድ ጎሳቤኒ፤ ያይቆባነ ያንሳነ ዋታ ምን ካሰሞና ካእንድራሳ ታቤን። **30** ታሰሞና ሶዶ ማር ካጉባሮ ሀወአም ሀወአማ ሁዱርተ ግቲ፤ ጋራክሴና የሱሳን ሰገን። **31** ሃንሱን ኡሱና ኤሰ ማንኮሁዱርተተ ቶሰ ሴተረ ገነትሴ አበ ኬሰ፤ ማር ካጉባረና ኢሰ፤ ኬተጉደ ሀንዳኖ ሀጋአብተ። **32** አርት ካኮኢያተ ጎራታ፡ ሄመንክ ኡሊ አባዶ ማማንጃልኮ ካሀወአማረና ጸላዬ ካአባመረ አባዶ ዱባ ኡሱ ቶሰ ኬን። **33** ካታማኮ ጎሳ ዱባ ምን ጎጫ ሆረ ኩኩ አመን ግረን **34** የሱሳ ካላካለክ ሀወአም ካሀወአማረ ካሞጋን እባዶ ፋይሰ ዱርሳና ቤሰ፡ አየሱን ጎአመን ዱርሳና ካየሱሳ አዮናት ማንኮካሳናየ ማራን የሱሳ እሶ ጎሳኤሰራውን ፈኢ ላኮሰሰረ። **35** ባባርሰ ቡላን፡ የሱሳ ኬረ ምንኮ ቤ ባንኤ ካለት ቶሰ ሴተረ ኤብ ሀጋአበ። **36** ሰሞናና ኡናቴሳና ኡሱ ዶታ ዴበ ቤን። **37** ካኮሄላሬን ጎራታ፡ “እባዶ ዱባ ኩ ዶታራ” አመን። **38** የሱሳ፡ “ሂታኮ ኪጉነ ዶሌ ካግሮ ካካለ ማማንጃል ሴና ኤሴና ላላብና፡ አን ካኮንኤማየራ ሂካኮንያ” አመ። **39** ሃንሱን አይሁድኮክ ምን ካኤብ ቶሰ ታበረ ላላባና ዱርሳ ቤሳ ጋሊላ ዱባ ማራሙራኖ ሀጋአበ። **40** ማሪ ባር ካአባናየ አባዶት ኮ የሱሳ ቶሰ ኤመተረ ሉክ ሄገሊ ግልቢሰረ፤ “ፈኢታ ጎሌተ እን ሙጭሰን ዳንዳታ” አመ ኤባተ። **41** የሱሳና አባዶትን ነኤኤይሳተረ ገነ ድሪርሳተ አበረ “ፈኢ ሰሰራ ሙጭምና” አመ። **42** አባዶት ባኔዋ ባርኮ ሙጭመ፡ ፋዬ። **43** የሱሳና አባዶትን አታይሰ ሰገረ ሃ አመ ጋልሰ። **44** “ሂካ አየሰ ማዮና ጎሳሰግኖንኮ እስ ኦራ፡ አየሱን ጎአመን ጎሳን አቶ ጎሳሌሮን ሴዴ እስኦታ ቱቃሞን ቱሳ፤ ሙጭ አማኖካውን ሙሴ ጎሳኢጃጃሮክ ማለ ጃርሶ ሰሰ” አመ። **45** አባዶት ጎአመን ማንኮሴተ ዱባ ካሌሮ አየሰ ሰሰጋ ሰሴተ፡ ኦዱና ዳረኤ። ህታ አላንቲ የሱሳ ማምሰት ካታማ አዳሳም ታብን ላኮዳንዴ፤ ሂካኮ ካከይ ካታማኮ ሳሬ አባዶ ታኮግኖን ባንኤ ግራኖ ሀጋአበ፤ አባዶ ጎአመን ባንኤ ባንኤኮ ኡሱ ማንኮግሮ ኤመታ ግረን።

2 የሱሳ አሪ ኡጫርኮ አባባተረ ታቅፍረናሆም ካታማ ቶስ ኤመተ፤ ኤስነዋ ኡሱ ምን ታባኖ ጎሳ ማለ፤ **2** ሃንሱን ምን ላናዋተረ አወንዳ ታኡኒዕር ጌግን እባዶ ካሞጋን ኩኩመ፤ ኡሱና ሃፋራ ካዋ እሶ አጋልሰሳ ግረ። **3** ሀሱ ጎራታ እባዶ እፋሮ ናፋለሳክ እባዶት ሰዴንጉሬን ኡሱ ቶስ ከነን **4** ጎሳ ሞጋንኮ ካከይ የሱሳ ቶስ ጋባሊን ምንኮ ዋተን ማራን ታምኔ ሄልንቾ የሱሳ ማንኮግሮን ቡቶ ቤሰንጉሬን ናፋለሳት ታኮሁዱረረ አልጋነ ዋታ ዳግሰን። **5** የሱሳና አማኖክሶ ዴጉረ ናፋለሳትን “እት ሂክ ኡኑ ጨቦ ካካ ሻጋ ሌራ!” አመ። **6** ኤሴና ሀማጾን ኦግረን ኮኮ ሴራ ካሙሴ ኦአጋልሰሳረን ዋዳናትሶይ ሃ አመን ሄደን። **7** “ሂክ እባዶት ምሲ ሃ አማራ? ሄዶ ጉት ሃፋራ ካሀባር ካሀባራራ! ዋ ኮ ኳሬ ጨቦ ሻጋ የልን ካዳንዳራ እየያ?” አመን ቆፔን። **8** የሱሳና ባኔዋ ዋዳናትሶይ ካሄዳራን አያናኬሳይ አዴሰረ፤ “ምሲ ሃ ቆፓታን? **9** ናፋለሳክ እባዶትን ‘ጨቦካካ ሻጋ ሌራ’ አማኖኮና፤ ክንጉዴ አልጋታ ሰዳዴ ጋል፤ አማኖኮ ኤክያ ኤነክ? **10** አየሱን ጎአመን ኤረ ካእባዶ ኡል ጉት ጨቦ ሻጋ የልን ኦዶናት ካአቦ ላኖ ጎሳአዴሳወን” አመረ ናፋለሳትን፤ **11** “ክንጉዴ አልጋታ ሰዳዴ ምንካ ጋል” አመ። **12** ናፋለሳትና ጎርሰዋ ኬጉረ አልጋ ሰዳተረ እባዶ ዱባ ዲያ ግራን ቤ። ሃንሱን እባዶ ሳደረ ሂካማለክ አየሰ “ኖ ዱዶ ዴነ ላካንሶ አማ ዋ ጋላተን።” **13** የሱሳ ካላም ላቡ ታጋሊላ ቶስ ሴተ፤ ጎሳ ካሞጋን ኡሱ ቶስ ኤመተ፤ ኡሱና እሶ አጋልሰሰ። **14** ኤስነ ሮራ ግራን ካኢልፎሳ ኤረ ዋዩትና ቃራጣ ታኮአታራን ባንኤ ሀማጾ ግራን ዴረ፤ “እን ዴበ ሰሴ” አመ። **15** ካዋዩት ምኒ ባቦ አምን ሀማጾ ግራን፤ አሞጋን ቃራጣ ኦኩኩይሳሬንና፤ ጨባለሳልን፤ ኡሱ ዴበ ሰሴታ ማንኮግሬን ማራን፤ የሱሳና ኡሱኮ ኦአጋልሳታረነ ዋታ ባቦ አማ ግረ። **16** ታፋራሳው ኡናኮ ኦሌረን ሴራ ካሙሴ ኦአጋልሰሳረን የሱሳ ጨባሌሳልንና ቃራጣ ኦኩኩይሳሬን ዋታ አማ ግራን ካኮደያረን ጎራታ፤ ኡሱኮ ኦአጋልሳታራን፤ “ቃራጣ ኦኩኩይሳሬንና ጨባለሳጆልን ዋታ ሙን አማራ?” አማ ሆሳተን። **17** የሱሳና እሶ ካአዬሰረን ማሌረ አከም ካኮንዶትሳራ “ካሀዉአማሮን ኳሬ ፋያሌሳን ላኮዮ፤ እን ጨባለሳጆል ኳሬ ቁሎለ ኡምን ላኮኤሜየሮ” አመ። **18** ያንሳኮ ኦአጋልሳታራና እባዶ ካፋራሳዊ አጋቡዋ ግረን። እባዶ ኮኮ ኤመተጉረ የሱሳን፤ “ያንሳኮ ኦአጋልሳታራና ፋራሳውልኮ ኦአጋልሳታራን ጎአጎቦይራን ኩኮ ኦአጋልሳታራን አጋቡዋና ካኮንዋታራን መዉንያ?” አመን። **19** የሱሳና፤ “ካማሻሽ

ዎታ ግራንቲ ሳትላል አጋቡይን ዳንዳታ? ካማሻሻ እሱን ዎታ ግራን አጋቡይን ላኮዳንዳራን አመ። **20** እየሱን ጎአመን ካማሻሻ እሱኮ ካኮአታምራ ጎራታ ኤመታራ፡ ኡሱ ጎራታ አጋቡይናዋ። **21** “ካዶአን ሳርስ ጉት ታኡሱብት ኤርበ ካካታራ ማዮና ላግሮ፡ ሂክ ጎሌ አድ፤ ታኡሱብት ኤርበ ታዶአን ታታርሻታ፡ ፊላማኖና አሎ ባላኣይናራ። **22** አድ ካኡሱብ ካዎይኒ ጣሞ ካዶአን ድንቢቶ ካክባታራ ላግሮ፡ ሂካማሌ ጎሌ ካዎይኒ ጣሞ ድንቢቶ በረሳራ፡ ጣሞ ካዎይኒና ኡባታራ ድንቢቶና ላኦኮ ሳሪ ብያራ። ሃንሱን ካኡሱብክ ጣሞ ካዎይንዉን ካኡሱብክ ድንቢቶ ዶትሳራ።” **23** ታፎልሲ አሪ የሱሳ አራ ኦሮማረ ሮራ ግረ፡ ኡሱኮ ኦአጋልሳታረን ሻዉዬ ኤብሳታኖ ሀጋአበን። **24** ፋራሳዊልና ታፎልሲ አርዉን ፈኢ ካሰሳሞን ግቶ እየሰ ኩኮ ኦአጋልሳታራን “ሙን ፈላራን?” አማ ሆሳተን። **25** የሱሳና አባበረ፡ “ዳዉተ ኡሱ ዴበ ኦሰሰታራን ዎታ ካኮኤኤረና ካኮራካተረ ጎራታ መ የለሮ ላኮናባብቴታንያ? **26** አብያታር ቱቃሞሉን ዎይቻ ሌ ካኮግረ ጌሲ ዳዉተ ምን ካዋ ታበረ ቱቃሞሉን ኳሬ ኦካለ ኣምን ፈኢ ካኮንሰሳሞን ግሮ፡ ካቁሎየ ባቦ ካዋ ኣመ፡ ኡሱ ዎታ ካግረ አባዶና ሰሰ።” **27** አደና የሱሳ፡ “ታፎልሲ አሪ ኤረ ካአባዶቱን መጣንተታ ኳሬ አባዶ አሪ ታፎልሲዉን ላኮመጣመሮ አመ። **28** ሃንሱን ኤረ ካአባዶ ታፎልሲ አርዉን ጎታያ።”

3 የሱሳ ካላም አባባተ አይሁድኮክ ምን ካኤብ ቶስ ታበ፡ ኤሴና ገነ ካናፋተረ አባዶት ኮ ግረ። **2** ኣላንቲና የሱሳ ሞትን ካዶታረ አባዶ ታፎልሲ አሪ ጎፋይሳሮ ዴና፡ አመረን ኦራ ግረን። **3** የሱሳና ገነ ካናፋተረ አባዶትን “ክንጉዴ እሶ ጠኤ አለና” አመ። **4** ኤሰኮ አባባተረ “አፎ ታፎልሲ አርዉን ፈኢ ካኮሰሳንተታ ታኢዳን ፈሊንያ ሙ ታምላን ፈሊንያ? ኔፎ ፋይሳኖ ሙ ባሳኖያ?” አመ እሶ ሆሳተ፡ እሶና አደን ጫልኢ አመን። **5** የሱሳ ዎዳናትሶ ዱዳኖን ጋዴጉረ ኡሱ ማራሙረን ኦአሌራን ኢኦነ ዴጉረ አባዶትን፡ “ገነታ ድሪረሳ!” አመ፡ አባዶትና ገነ ድሪረሳተ ገነተሳና ዱዶ ፋይተ። **6** ጎርሰዋ አባዶ ካፋራሳው ቤጉረ ሞስ የል የሱሳ ባሰናራን ኡና ታሄሮዶሳን ዎታ ማካረን። **7** የሱሳ ኡሱኮ ኦአጋልሳታራን ዎታ ታጋሊላ ላቡ ቶስ ዳገ፡ ጋሊላኮ ካኤመተራ ኣሎ ካሞጋን ጎሳ ዴበ ሰሴተ፡ **8** ኡሱ ካፈላሮ እየሰ ካማለራ አባዶ ጋሊላኮ፡ ይሁዳኮ፡ ኢየሩሳሌምኮ፡ ኤዶምያሰኮ፡ ዮርዳኖስኮ ጋማ ካግሮ ማማንኮ፡ ኡሱማለና ታጢሮሳኮና ታሰዶና ካታማልኮ

ኡሱ ቶስ ኤመተን። 9 ኩኩካአመረ ጎሳ ጎሳኢነዕኖንኮ ትጫርት ዋላቦ ኦይሬን ኡሱን ጎሳኤካስራኑን የሱሳ ኡሱኮ ኦአጋልሳታራኑን አጃጂ። 10 ካሞጋን አባዶ ፋይስ ማንኮ ግረ ማራን፤ ዲኩባ ካራካታረ ዱባ ገነትሶይ ኡሱ ድንን ዶታታ ግረን። 11 ባቲክ እያናጃልና የሱሳ ካኮድያረን ጎራታ ሆረ እያ “እት ኤረ ካዋታ።” አማ እያ ግረን። 12 የሱሳ ጎአመን አዮናትኬሳ እሶ በስ ጎሳእየሶንኮ አታይስ ሀድሰ። 13 የሱሳ ዋዳሞ ቶስ በፔረ ኡሱ ኦዶተራ ኡሱ ቶስ ጎሳኤሜራውን አመ፤ እሶና እሶን ዋታ ኦግረን ኢሴንጉሬን ኡሱ ቶስ ኤመተን። 14 ኡሱነ ዋታ ጎሳግራውና፤ ጎሳላብናውን ፋርን አመረ ቶሞንኮ ላማ ሹመ፤ ኦፋራመራን አመ እሶ ኡመ። 15 ዱርሳ ጎሳቤስናውና ኦዶናት ሰስ። 16 ኦሹማሜራን ቶሞንኮ ላማና ህናኣያን፤ እሶና ጴጢሮሳ አመ ካኡመሮ ሰሞና፤ 17 ቦእነረገስ ጎርቱን፤ ካድድዴና ይስ አመ መገ ካቤስሮ ካዛብዶሳ ይስ ያይቆባ አቢኬሳ ያንሳ፤ 18 እንድራሳን፤ ፍልጾሳን፤ በርተሎሜዎሳን፤ ማቶሳ፤ ቶማሳ፤ ካኢልፎሳ ኤረ፤ ያይቆባ፤ ታድዎሳ፤ ኡልኬሳ ካህኡሳታሮ ሰሞና፤ 19 ኡሱማለና የሱሳ ሮርስ ካስሰሮ ካእስቆሮቱ ኡልኮክ ይሁዳ። 20 ኤስኮና የሱሳ አባባተ ኡሱ ሞን ቶስ ታቦ፤ የሱሳና ኡሱኮ ኦአጋልሳታረን ባቦ እምን ታዋናኒ ጎሳ አደ ሞጋተ ኩኩመ። 21 “የሱሳ ዋዳና ቆላመራ” አማማኖ ካማለራ ፋልኬሳ ኡሱ አታይሴዬን ኡሱ ማንኮግሮ ኤመተ። 22 ኢየሩሳሌምኮ ኦኤሜተሬን ሴራ ካሙሴ ኦአጋልሰሳረን፤ “ኡሱ ዱርሳኮክ ዋይቻ አባ! ዱርሳ ካኮቤሳራና ካዱርሳ ዋይቻያ” አመን። 23 የሱሳ ጎሳ እስ ቶስ ኡመጉረ ማሱሳ ሃ አመ፤ ጸላየ ጸላየ ሞሲ ቤስን ዳንዳታ? 24 ዋኖ ኮ እስእስ ኦሮ ካለካለ ጎቤ ሀሱ ዋኖናት አታይን ላኮዳንዳሮ። 25 ኡሱማለና ሞንኮክ አባዶ እስእስኦሮ ካለካለ ጎቤ አራኣይ አልን ላኮዳንዳሮ። 26 ኡሱማሌ ጸላየ እስእስ ኦሮ እስካዲዳቶና ካለካለ ካበያቶ ጎሌተ ባታ ኳሬ አታይ አልን ላኮዳንዳቶ። 27 ሀሱኮ ካከይ እባዶት ኮ ጣይ ሁናሜሳክ እባዶት ሀንሺኖን ግራን ሁናሜሳ እባዶትኮክ ሞን ታብረ ኡራዎ ሳሚን ላኮዳንዳሮ፤ ሞንኬሳ ሳሚን ካኮዳንዳራ ሁናሜሳክ እባዶት ጎሺየ ካላልያ። 28 “እን ሩምና አማራ፤ አባዶ ካፈላራ ጨቦና ካሀባራራ ሀባር ዱባ ሻጋ ሌሮዋ፤ 29 እየሱን ጎአመን እያና ቁሉክ ካሀባራራ ዱባ ጅሩ ጅሮማት እንዛ አባ ኳሬ ኡሱን ሀሄሶ ላኮአማምናሮ።” (aiōn g165, aiōnios g166) 30 የሱሳ ሂካ ካኮን እዬሰራ “ባቲክ እያና አባ” ማንኮአሜን ማራንያ። 31 ኤስኮ አባባተረ ኣየ ታየሱሳና

አቢላልቲሳ ኡሱ ቶስ ኤመተን፡ ሳሬ አሌረነ አባዶ ኡሱ ቶስ ፋረን ኡምሰሰን።
32 ኡሱ ማረአበ ካህማጼሬ ካሞጋን አባዶና፡ “ህኒዕማ አየታና አብላልታና
 ሳሬ አሌነን ኩ ዶታራን አመን ኡሱን ሰገን።” **33** ኡሱና፡ “አየትና አቢላልት
 አየሰያን?” አመ አባበ። **34** ኡሱ ማረአበ ካህማጼረ አባዶ ቶስ ዲያ ሃ አመ
 “አየትና አቢላልት ህናኢያን! **35** ፈኢ ታዋ ካፈላራ ዱባ ኡሱ አቢኬ፡ አባቴና፡
 አየቲያን” አመ።

4 የሱሳ ካካለ ጎራታ አደ ላቡ ግርድ አጋልሰሳኖ ሀጋአበ። ኡሱ ካኮግረ
 ጎቦቢ አሎ ካሞጋን ጎሳ ማንኮኩኩአመሬ ማራን፡ በከ ኦሮ ታግቴ ዋለቦ ታበረ
 ሀማጼ፡ ጎሳ ዱባና ላቡ ግርድ ኩኩመ ግረ። **2** ኡሱና ካሞጋን አየሰ ማሱሳ
 አጋልሰሰ፡ አጋልሰሳና ሃ አመ፡ **3** “ማላ! ጎርታ፡ አባዶት ኮ ወጣ ወጣዬን
 ቤ። **4** ወጣ ካኮወጣታረ ጎራታ ኮኮ ራድ እዬ፡ ክምብር ኤመተረ አባባተ
 አመ። **5** ካካለ አደ ታኢዳን ኤሬ ማንኮግኖት ሻቁሞልት ባንኤ እዬ፡ ኤሬ
 ሻቁሞልት ማንኮሌተ ማራን ባኔዋ አላተ። **6** አርት ካኮብያተ ጎራታ አደ ቆረ፡
 ህዲድ ሄገልድ ዳጋና ማንኮዋተ ማራን አንጋገ። **7** ካካለ ወጣ አደ ኤኤን ጠኤ
 እዬ፡ ኤኤንና ዋታ ጂናተደ ካአላተረ ወጣ ሁርተ ማንኮአብተተ ማራን ኢል
 ላኮየላተ። **8** ካካለ ወጣ አደ ታኢዳንት ኤሬ ጉት ማንኮኢየ ማራን አላተ፡
 ጂናተ፡ ኢልና ሰሰ፡ ኮ ሶንዶም፡ ኮ ሎታም፡ ካካለና ኢል ቦል ዱባመ።” **9**
 አደና የሱሳ “ካማላራ ነበ ካአባ ሀማሎ!” አመ። **10** ካለ ካኮሄሳረ ጎራታ፡
 ዴበ ሰሴታ ካግረ አባዶና ቶሞንኮ ላማ ኦካለ ዋታ ኦግረን ማሱሳጆል ማራን
 ፋሬን ሆሳተን። **11** ኡሱና፡ “እስኩን ዋኖናት ካዋኮት ሆል ማላባኖ እስኩን፡
 ሰሳመራ፡ ሳሬ ኦግራውን ጎአመን አየሰ ዱባ ማሱሳ እሶን ሰጋምናራ። **12** ህክና
 ካኮንልናራ፡ “እሶና ዋ ቶስ አባባይኔ፤ ጨቦክሶ ሀሄሶ ጎጎአማሞንኮ፤ ድያኖ
 ድያግራን ዋዳና ጎጎኮካኖንኮ፤ ማላኖ ማላ ግራን ላኮሻዳራን፡ ሂካኮ ካከይ
 ጨቦክሶ ሀሄሶ ላኮአማማሮ አመ።” **13** ኤሰኮ የሱሳ ሃ አመ “እሰን ህታ
 ማሱሳ ላኮአዴሰታንያ? ሀያ ካጋርማን ማሱሳጆል ምሲ አዴሰን ዳንድናታን? **14**
 ካወጣራ ሃፋራ ካዋ ወጣራ። **15** አባዶ ኮኮ ራድ ጉት ካኢየሮ ወጣ ኣን ላራ፡
 ሃፋራ ካኮማላን ጎራታ ጸላየ ባኔዋ ኤመተ ጉደ እሶ ኦሮ ካወጣመሮ ሃፋራ
 አታታ። **16** አደና ካካለ ሻቁሞልት ባንኤ ካወጣመሮ ወጣ ኣን ላራን፡ ሃፋራ
 ካኮማላን ጎራታ ባኔዋ ገቤሎይ አታታራን። **17** አየሱን ጎአመን ህዲድ ሀዳግሶን

ማንከግረ ማራን ካዳላታራና ጎራታ ክጫር ካላልያ፡ ሃፋራኮክ አላንቲ ራኮ ጎርቱን ሆሮራማኖ ካኮኤሜተ ጎራታ ባኔዋ ሀንዱዱፋታራን። 18 ካካለ አደ ኤኤን ኦሮ ካወጣመሮ ወጣ እን ላራን፡ ሃፋራ ማላኖ ማላራን፡ 19 ሀሌዎ ኳሬ ሂካ አላም ኮክ ያዳ፡ ዱሩማኮት ጌላንጀና ካካለ አዳክ ሀልቻ ዋዳናትሶ ኦሮ ታበረ ሃፋራ ማንኮሁራሮ ማራንያ። (aiōn g165) 20 ካካለና ኤሬ ታኢዳኒ ጉት ካወጣመሮ ወጣ እን ላራን፡ እሶና ሃፋራ ማሌረን ኦኦራታራን ኮ ሶንዶም፤ ኮ ሎታም፤ ኮ እል ቦል፤ ኦዱባማራንያን።” 21 የሱሳ “እሰን ኢፋ ሀንቃይሳተደን ዳቾ ሄገሊ ጎርቱን አልጋኮ ሄገልሀይሳቲን ካታታን? ካኮካታን ቦላንሶ ጉት ላኮዮያ? 22 ሃንሱን ካሰያመ፡ ካንሙቶን፡ ካጎላተራ ኢፋ ቶስ ካንቤኖን ላግሮ። 23 ካማላራ ነበ ካአባ ሀማሎ!” አመ። 24 አደና የሱሳ ሃ አመ፤ “ካማላታን አየሰ ማራን ኢሰ ኦራዬን።” ካኮኤካሳታን ሁይ አባባይ ኤካሳምናራ ኡሱማሌ ኡሱኮና ካሮረ አሰኑን አዳምናራ። 25 ካአቦን አዳምናራ ካላይክኮ አድ ሀሱ ካግራ ክጫርክዋ አድ ኡሱኮ አታምናራ አመ። 26 ኤሰኮና የሱሳ፡ “ዋኖናት ካዋ ሂካ እን ላራ፡ እባዶት ኮ ኤሬ ወጣ ወጣታራ። 27 እባዶትና ሄመን ሁዱራራ፡ አሪና ናባዳራ አየሱን ጎአመን ኡሱ ሀአዴሶን ግራን ኡሱ ወጣ አላተ ጂናታራ፡ 28 ኤሬና እስኦትሴይ ሆራርጀ ቡል፡ ደቤና ጋቦ፡ ኤሰኮ ጋቦ ጉቲና ካጎሞራ ኢል የላታ። 29 ወጣና ካኮዱባማሮ ጎራታ ካም ካኮኩኩአማሮ ጎራታ ማንኮሌ ማራን እባዶት ታጋዬን ባጫ ሳመ ኤካሳታራ” አመ። 30 አደና የሱሳ፡ “ዋኖናት ካዋ መነ ዋታ ሄረግንሳ? ምስክ ማሱሳ አዴሰንሳ? 31 ሰናፍጭ ካአማማሮ ጋኮት ኢል እን ላታ፡ ኤሰ ኢል ወጣማ ግራንቲ ኡል ጉት ካግሮ ወጣኮ ትጫርትታ። 32 አላይደ ካኮጂናት ጎራታ ታአካክልተ ባንኤ ካሙታሮ አላት ዱባኮ ሮራታ፡ ክምብርጆልና ካጂንጂን ባላልኮት ሆሰ ሄገሊ ፎልሳታራ” አመ። 33 የሱሳ አባዶ አዴሰን ካዳንዴሮ ጅልባክ ማለ ሂካማሌኒዕ ኦሞጋን ማሱሳጆል እሶን ሰገ። 34 አየሰ ኮና ማሱሳ ካላይ ላኮአዬሳረ ኡሱና ኡሱኮ ኦአጋልሳታራን ኦላል ካኮለራን ጎራታ አደ አየሰ ዱባና ካለካለ ቤሰ እሶን አዴሰሰ ሰጋ ግረ። 35 ኤሰ አሪ ኡል ሄመን ሌ ግራን የሱሳ ኡሱኮ ኦአጋልሳታራን “በከኮ ጋማ ናቅና” አመ። 36 እሶና ጎሳ ኢሰረን ዋላቦ ኦሮ ጎጎግሬን ኤሰነዋ የሱሳ ኣተን ሴተን፡ ካካለ ዋላቦልና ዋታ ግረ። 37 ኡሱ ጎራታ ካአቲ ኢርጋዶ ኬ፡ ጋሽማሎና በከ ዋላቦይ ታ አማጋምራን ሻላጋ ግረ። 38 የሱሳ አደ ቦርካኖ ቦርካተረ ዋላቦ ኦሮ ሁዱረ ግረ። እሶና

ናባድሴረን፡ “ካአጋልሰሳቶ! ኖ ጎጉዳኖ ኩ ላኮጢባሮያ?” አመን። **39** ኡሱና ናባደ ኬጉረ ኢርጋዶ ሀድሰ፡ በከና፡ “ጫልኢ አመን!” አንባልና ጫልኢንተ፡ ዱዶ ጫልኤት ሌተ። **40** የሱሳና፡ ኡሱኮ ኦአጋልሳታራነ፡ “መዉን ሃ አብሳተን? ምሲ እማኖ ዋታን?” አመ። **41** እሶና ኣሎ አብሳተን ጉረን እስእስ ኦሮ፡ “አፎ፡ ኢርጋዶና ጋሽማሎ ጫል ካኮንእማራን ሂክ እዮያ?” አመን።

5 በከ ኦጋሊላኮ ጋማ ናቀረነ ገርገሰኖን ካእማማረ ማማን ጌን። **2** የሱሳ ዋላቦኮ ጎጎዳጌ፡ ባቲክ እያና ካኮግረ እባዶት ታህዌል ባንኤኮ ቤረ ኡሱ ቶስ ኤመተ ኤሰለ። **3** ሂክ እባዶት ታህዌል ባንኤ ግረ፡ ማዮና ኡሱ ሳንሳላታይ ሺ ካይን ላኮዳንዳረ። **4** ጎራታ ካሞጋን ታሉኬ ማርጮና ሳንሳላታ ካገኔይ ሻማ ግረ። እየሱን ጎእመን ካገኔ ሳንሳላታ ጎጎሳና ታሉኬ ማርጮ ኤኤብሳ ግረ። ማዮና ኡሱ አብ አዳላይሰን ካዳንዴራ ላኮግረ። **5** አርጌቶ አሪነ ሄመኔ ሀየልና ዋዳም ጉት ማራሙራራ እያ ማርኬሳ ኤኤም ጎጎሳታ ግረ። **6** ሂክ እባዶት የሱሳ ኤባ ካኮደያረ ጎራታ ኡሱ ቶስ ትያ ኤመተ ሆረ ግልቢሰረ ሳጋደ። **7** ያየ ጦቂሰረ እያ፡ “እት ዱባንኮ ካእቲ ኤረ ካዋ የሱሳ፡ ኢነ ዋታ መ አብታ? ጎጎአቦሰሶንኮ መገ ካዋይ እነ ኩ ኤባታራ!” አመ። **8** እባዶትና ሂካ ካኮንእመረ፡ “እት ባቲክ እያና ሂካ እባዶትኮ ቤና!” አመ እጃጃ ሰሰ ማንኮግረ ማራንያ። **9** ኤሰኮና የሱሳ፡ “መገካ እዮያ?” አመ ኡሱ ሆሳተ። “ኦሞጋን ማንኮሌረን ማራን መገክና ሌጎንያ” አመ። **10** ኡልኮ እሶ ጎጎሆሮሮንኮ አታይሰ ኤባተ። **11** ኤሰ ባንኤ ዋዳም ላዩይ ታሞጋን ቦዬ ቦባይተ ግቲ። **12** ባቲክ እያናጃል የሱሳነ፡ “ቦዬል ቶስ ጎጎታብኖ ኖን ፈኢ ሰሰ” አመን ኤባተን። **13** የሱሳና ፈኢ ሰሰ፡ ባቲክ እያናጃል ሀሱ እባዶትኮ ቤረን ቦዬል ታቤን፡ ኩማ ላማ ካሌራ ቦዬል ላጋ ህኢ መተጋማቶ ሄገልዴን ዳጌን በከ ኦሮ ልኝ አመን። **14** ቦዬል ኦፎፋሬና ባቃተን ሴተን፡ ማማንና ማማንኮ ቃማን ካግሮ ኡል ኦዱ አዬሴን፡ ጎሳና ካሌሮ እየሰ ድን ታኮግሮ ባንኤኮ ቤ። **15** ጎሳና የሱሳ ቶስ ኤመተጉረ ሀሱ ባቲክ እያና እባመረ ካግረ እባዶትኮ ሳሙ አባባተደ፡ ሳርሰ ሳርሳተ ካሀማጼሮ ካኮድያረን ጎራታ ኔን። **16** ሂካ ጣየ ካዴራ እባዶ ባቲክ እያና ካኮባሬሮ እባዶትና ቦዬል ጉት ካሌሮ እየሰ ዱባ ጎሳን ሰገን። **17** ሀሱ ጎራታ ጎሳ የሱሳ ኡልክሶኮ ጋፋር ጎጎቤሮ ኤባተን። **18** ኤሰኮና የሱሳ ዋላቦይ ካኮታባረ ጎራታ፡ ዱርሳ ካኮግረ እባዶት ዋታ ሴይን ኤባተ። **19** የሱሳ ኡሱን ፈኢ ላኮሰሰ፡ እየሱን ጎእመን “ምንካ ሴዴ

ጎታ ኤግታክ ካአት እየሰ ኩን ፈለሮና ሞሲ ሻጋ የለሮ ጎሳካውን ሰጋ” አመ። 20
 እባዶት ሴተረ፤ የሱሳ ካፈለሮ እየሰ ዱባ ማማን ቶሞን ካእማማሮ ኡል ሰጋኖ
 ሀጋአበ፤ ካማለ ዱባ ሳይ። 21 የሱሳ አደ ካላሞ በከኮ ጋማ ዋላበይ ካኮናቃረ
 ጎራታ ካሞጋን ጎሳ ኡሱ ቶሰ ኩኩሙ፤ ሀሱ ጎራታ ኡሱ ላቡ ግርዲ ግረ። 22
 አይሁድኮክ ምን ካኤብውን ዋይቻ ካለሮኮ ኮ እያኢሮስ ካእማማረ ኤስራ
 ኤመተረ የሱሳ ካኮደያረ ጎራታ ሉቃ ጉት እየረ፤ 23 “ትጫርት እኩት ጎይ ህኢ
 ግታ ፋይደ ኔፎን ጎሳግርቶ ኤማደ ገነታ ኤስ ጉት ካይ” አማ አታይሰ ኤባተ።
 24 የሱሳና ዋታ ሴት ካሞጋን ጎሳና ኡሱ ማራሙረ ኡንኤ ዴበ ሰሴተን። 25
 ጌስ ቶሞንኮ ላማ ኢግ ኡባታ ታኮግረ ሄለልትቲ ቶ ኤስ ግቴ። 26 ኦሞጋን
 ኦዶ ዶብጆሉን ዶሌ ራካታ ታግቴ ካአብቶ ዱባ ጎጉሳተና፤ ዱኩባ ሀጋአታተ
 ኳሬ ላኮኢሰረ። 27 ኤስና ጋራ ካየሱሳ ካኮማላተ ጎራታ ሃሬ እባዶ ኦሮማርተ
 ኤመተዴ ሳርሰኬሳ ድንተ፤ 28 ኣላንቲና “ማሞስ ልጉረ ሱረ ሳርሰኬሳ ካላል
 ጎድን ፋይናራ” ካእማሮ አማኖ አባናይተ። 29 ካኡባታረ ኢግ ባኔዋ አሌ፤ አቦሳኮ
 ሄሳኖ ማርክሰይ እዳሳመ። 30 የሱሳ ባኔዋ ሁና ኡሱኮ ብያኖ አዴሰረ፤ ጎሳ ቶሰ
 ካሞባል አመረ፤ “ሳርሰኬ ካድን እየያ?” አመ። 31 ኡሱኮ ኦኦጋልሳታረን፤ “ጎሳ
 እናኣመረ ካሻሻፋሮ ድያግራን፤ ‘እየያ እን ካድንራ?’ ሞሲእማታ?” አመን። 32
 የሱሳ አደ ሂካ ካፈለራ እየኖ ድን ሃር አባባተ ማራሙርስ ዋቹ። 33 ሄለልትቲና
 ኤስን መ ፈላመሮ ካኮእዴሳተ ጎራታ አብሳታና ሀርኣ ኤመተዴ ኡሱ ሆረ ኢተ ሩሞ
 ዱባና ሰጊተ። 34 የሱሳና፤ “ኡኑቴ አማኖካ ኩ ፋይሰራ ኖሳዳ ጋል፤ አቦሳካኮ
 ፎልሳ” አመ። 35 የሱሳ ሂካ አዬሳ ግራን፤ አይሁድኮክ ምን ካኤብውን ዋይቻ
 ካሌሮ ካኢያኢሮስ ምንኮ ካኤመተረ እባዶ እያኢሮስን “ኡኑታ ጎተታ፤ ጎራታ
 ካኦጋልሰሳሮ ሙን ሀርሳታ?” አመን። 36 የሱሳ አደ ሂካ ማለጉረ ዋይቻትን አማና
 ኳሬ “እሮአብሳተ!” አመ። 37 የሱሳ ዴጢሮሳን ያይቆባን አደ ካያይቆባ አቢ
 ያንሳን ኳሬ ማኖና ዴበ ጎሳሴሮ ፈኢ ላኮሰሰ። 38 ምን ካዋይቻት ካኮግያረን
 ጎራታ የሱሳ እባዶ ዋ ዋ አማ ዩሩሩ አመ ኦታ ግራን ዴ። 39 ምን ቶሰ ታበረ፤
 “ሂክ ዱባ ኢያና ኦታን መታ? ኡኑና ሁዱርተታ ኳሬ ላኮጎተቶ” አመ። 40 እባዶ
 አደ ቃጭፋታ ኡሱን ኦሶለ። የሱሳ አደ እባዶ ዱባ ምንኮ ቤሰረ ኡኑኮክ ኦዶና
 ኣና ኡሱማሌ ኡሱ ዋታ ኦኤማተሬን ኡሱኮ ኦኦጋልሳታረን ዋታ ኡኑ ማንኮግቶ
 ቶሰ ታበ። 41 ኤስኮና ታኡኑ ገነ አበረ “ጣልታ ክ አሊ!” አመ። “ፋረንና፤ ተኡኑ

ክ እማራ” አማኖኖ። 42 ኡኑትና ባኔዋ ኬተ አልተ ሀሴራ ሂታራ ሰሴተ። ጌሰክሰና ቶሞንኮ ላማየ። አባዶና ካሌሮ አዬሲ ኣሎ ሳይ። 43 የሱሳ አደ ሂካ እየሰ ማዮና ጎጎአዴሶንኮ አታይሰ ሰገጉረ፤ ኤሰ ካአንቶ ኮኮ ጎጎሰሰራውን ሰገ።

6 የሱሳ ኤሰኮ ቤረ ኡልኬሳ ቶሰ ኤመተ፤ ኡሱኮ ኦአጋልሳታረና ዴበ ሰሴተን። 2 ታፎልሲ አሪ አይሁድኮክ ምን ካኤብ አጋልሰሳኖ ሀጋአበ፤ ካማለ አባዶ ካሞጋን ሳይ። እሱና ሃ አመን፤ “ሂክ አባዶት ሂካ እየሰ ሀየኮ ሄለራ? ምስት ቃሩማታ ኡሱን ታሰሳንተታ? ሂክ ባሳጆል ገነቴሳ ካኮፈላማራ ምሲያ?” አማ ሳዳ ግረን። 3 ደቤና “ሂክ አናጠት ካማይራመ ኤረ ላኮዮያ? ካያይቆባ፤ ካዮሳ፤ ካይሁዳና ካሰሞና አቢ ላኮዮያ? አባላልቴሳና ህታኒ ኖኔ ዋታ ግራና?” ሂካኮ ካከይ ኡሱ ሀንዱዱፋተን። 4 የሱሳ አደ “ካሄገሮ ካኮካባጃሞን ኡልኬሳ፤ ፋልኬሳ ኦሮና ካምን አባዶኬሳ ዶሌ ኳሬ” ሀካባጃሞን ላኮሄሳሮ አመ። 5 ኤሴና ኦሀዉአማሬን ኡጫሪ ጉት ገነ ካየረ ፋይሳኖ ኳሬ ማምሰክ ባሳ ፈልን ላኮዳንዴ፤ 6 አማናታና ዋት ትሶይ ሳይ። ኤሰኮና የሱሳ ማማን ኦሮ ማራሙራ አጋልሰሳ ግረ። 7 ቶሞንኮ ላማ እስ ቶሰ ኡመረ፤ ላማ ላማ የለ ፋረ፤ ባቲክ አያናጆል ጉት ኦዶናትና ሰሰ። 8 “ራክሰኑን ዳማ ኳሬ፤ ባቦ ጎርቱን ቃራጢት ጎርቱን አድ ማራጋደ ኪሰይ አሮአባቴን፤ 9 ከፈሮ ታብሳዬን፤ አየሱን ጎአመን ቆሎ ላማ አሮአባቴን።” 10 “ምን ኮ ቶሰ ካኮታብቴን ጎራታ ኡሱ ማማንኮ ታበታን ኤሰ አዳላየን። 11 አባዶ እሰን ታኮቆጳኖይና ታኮማሎን ባንኤ ዱባ ሉቃኦትሰንክ ጎራ ሁርጉፋየንዴን ኤሰኮ ብያደን ሴዬን፤ ሂክ እሰን ሴርሳኖኮክ አቶ ልናራ” አመ ሂካ አጃጃ ሰሰ። 12 እሱና ኤሰኮ ቤረን፤ አባዶ ጨቦኮ ጉላ ጎጎጋሎን ላላበን። 13 ካሞጋን ዱርሳ ቤሰን፤ ኦሞጋን ኦሀዉአማራን ጉት ዛይት ሸግዳ ፋይሰን። 14 ካየሱሳ መገ አዳሳማ ኤመታኖ ዋኖ ሄሮዶሳ ማለ። አባዶ ኮኮና “ሂካ ኣንክክ ባሳ ኡሱ ካፈላራ ካጣማቃረ ያንሳ ጎይኮ ኬራ” አማ ግረ። 15 ካካለና “ኤላሳያ” አመን። ኩኒዕ አደን፤ “ካጣዋ ካሄገሮልኮ ኮ ካሄገሮ አንያ” አማ ግረን። 16 ሄሮዶሳ እየሰ ካኮማላረ ጎራታ አደ፤ “አን መተ ካኮጎሰሰራ ያንሳ ጎይኮ ኬራ” አመ። 17 ሂክ ሄሮዶሳ ኡሱንዋ አቢኬሳት ታፍልጾሳ ኦር ሄሮድያዳ አታታኖኮት አላንቲ አባሞ ጎጎሻሞሮን አጃጃረ ያንሳ ምን ካሻኖ ታብሰ። 18 ያንሳ ሄሮዶሳን፤ “አቢካት ኦር ጎጎአታኖንኮ ሴራ ካሙሴ ትራራ” አመ ግረ። 19 ሄሮድያዳና ኤሰ ቁጠ አባተጉደ ያንሳ ላጋድሰን ዶታ ግቲ፤ አየሱን ጎአመን ኤሰን ላኮኤካተ። 20 ሄሮዶሳ ሆራርጀ

ያንሳ ቁሉክና ዋውን ካለሳባመ እባዶት ላኖ ማንኮካሳናየ ማራን አብሳታና ኦራታ ግረ። ሄሮዶስ ያንሳ ካእዬሳሮ ታኮማለ ቶቶይ አብሳታ ግረ። ሀሌዎ ኳሬ ገጤሎይ ማለ ግረ። **21** ሄሮዶስ ታኮሙላመሮ አሪ ካባጃይን ምን ካዋኖይ ኦዶናት ኦአባን፣ ካጀረን ሹምጆልና፣ ኮኮ ጋሊላይ እዳሳመ ካግሮ እባዶን ኣሞ ካእቲ ኤካሰ። **22** ታሄሮድያዳ ኤረ ባንኤ ታኣሞ ታብተደ ካኮማዳራተ ጎራታ ሄሮዶስ ካኤማመሮ እባዶ ገጤላይሰ፣ ዋኖና ኡኑትነ፣ “እት ካዶታቶ ዱባ እን ሆሳ፤ እን ኩን ሰሰሮዋ” አመ። **23** አደና “ዋኖናትኬኮት ምና ጎሌተና፣ እት ካሆሳተ ዱባ ሰሰሮዋ!” አማ አማቶ ታብ። **24** ኤስና ኣየትሰ ቶሰ ሴተደ “መ ሆሳራ?” እንተ፣ ኣዋና “ካጣማቃሮ ካያንሳ መተ ሰሰ” አም ሆሳ እንተ። **25** ኡኑትና ጎርሰዋ ሳንተ ዋኖ ቶሰ አባባተደ፣ “ካጣማቃሮ ካያንሳ መተ ግዳ ያላኣይ ካይደ ጎጎሰሶ ዶታታራ” እንተ። **26** ዋኖና ሂካ እዬሲ ኣሎ ያደ፣ ሀሌዎ ኳሬ ታኤማንተቶ ማርት ሆረ ካታበሮ ካእማቶ ሃፋራ ኢሳግን ላኮዶተ። **27** ሃንሱን ዋታዳራ ኮ ሳመ ፋረረ፣ ካያንሳ መተ ጎሰ ጎጎኬኖ ፋረ፣ ኡሱና ሴተረ ምን ካሻኖ ኦሮ ታብ መተ ካያንሳ ጎሰ፣ **28** ካጎሳመሮ መተ ያላኣይ ካየረ ኡኑቲን ሰሰ፤ ኡኑትና ኣየትሴውን ሰሰ። **29** ያንሳኮ ኦአጋልሳታረን ሂካ ካኮማላረን ጎራታ ኤማተነን፣ ሬስ ኣተን ቃማሌን። **30** ኦፋራሜረና ማንኮሴተረንኮ የሱሳ ቶሰ ኩኩሜረን ካፈለራና ካአጋልሰሰራን ዱባ ኡሱን ሰገን። **31** ካሞጋን እባዶ ኤማታና ሰታ ማንኮግረ ማራን ባቦና ኣምን ጎራታ ላኮግረ፣ “አላ እሰን ካለት ባንኤ ቶ ቶሰ ሴይዳን አባራን ፎልሳዬን” አመ። **32** ሃንሱን ካለት ባንኤ ቶ ዋላቦይ ሴተን። **33** እሶና ሰታ ግራን አባዶ ካሞጋን ዴጉረ ማላብ፣ ማማንጆል ዱባኮ ትያ ኡሱኮ ሆረ ኼ። **34** የሱሳ ዋላቦኮ ካኮዳጋረ ጎራታ ጎሳ ካሞጋን ካኩኩመሮ ዴ፣ ካፎፍሮ ካላይክ እዳድ እን ማንኮግረ ማራን ያደ፣ ካሞጋን እየሰ አጋልሰሳኖ ሀጋእብ። **35** ኡሱ ጎራታ ኡል ሄመንላ ካኮሰታረ ጎራታ ኡሱኮ ኦአጋልሳታረን ኡሱ ቶሰ ጋባላሜረን፣ “ህት ባንኤ ቃሉላቶታ፣ ኡል ሄመን ሌራ። **36** እባዶ ካኮግሮ ማማን ቶሰ ሴይጉረ ካእምራን ኮኮ እምናይ ጎጎእምናራውን ጎሳ ጋፋርና” አመን። **37** የሱሳ እደ “ካእምራን እሰንዋ ሰሳ” አመ አባብ። እሶና፣ “ሴይን እሶ ካእምራን ላማ ቦሌ ጣጋራይ ባቦ እምንኤ እሶን ሰንሱ?” አመን። **38** ኡሱና፣ “ባቦ ምያ አብታን? አላ ሰዬንዳን ዲያ” አመ። ዴንጉሬን፣ ባቦ ከና ኩኑኡብ ላማና ግሮዋ አመን። **39** ኤስኮና ጎሳ ኤስ ጫሬ ጉት ኡና ኡና ጎጎሀማጽሮን አጃጁ። **40** ጎሳና ቦል

ቦል ኮንቶም ኮንቶም ኡና ኡና ሀማጼ። 41 የሱሳ ባቦ ከና ኩኑኡብ ላማና አበረ ዳሩሪ ቶስ ዲያ ሶማሳተ፤ ባቦና ኤካኤብስ ኡሱኮ ኦክጋልሳታራውን ሰለ፤ ኡሱማለና ኩኑኡብ ላማና ዱባውን ሄደደ። 42 ዱባና ባቦ አመን ባራረን። 43 ኡሱኮ ኦክጋልሳታረና ካአማመሮ ባቦኮና ኩኑኡብኮ ታሄሰቶ ሀንባ ዱጉድ ቶሞንኮ ላማ ምግ ኬሴን። 44 ባቦ ካአመረ ባባር ኩማ ከንየ። 45 ባኔዋ የሱሳ ጎሳ ጋፋራ ግራን ኡሱኮ ኦክጋልሳታረን ቤተሳይዳ ቶስ ሆረ ጣይ ዋላቦ ጎሳናቅራኑ አጃጃ። 46 ኤሰኮ አባባተረን እሶኮ ካለቤረ ኤባይን ዋዳም ቶስ ቤ። 47 ኡል ሄመን ካኮላረ ጎራታ ዋላቦ ባድ ጠኤ ግቴ፤ የሱሳ ካለ ባጋ ግረ። 48 አንባልና አታተ ፎፎል ክያ ማንኮግቴ ማራን፤ ኡሱኮ ኦክጋልሳታረን ዱዳታ ፈርፈራትሶን ዋታ ሞአባታ ግራን ዴ፤ ሄመንኮ ሳቲ ሳጋልኮ ታ ቶሞንኮ ላማ ሳቲ ጌሮ ካግሮ ጎራታ ኦሮ በከ ጉት ሰሴታ እሶ ቶስ ኤመተ እሶ ዶልማር እሰ ሮርን ዶተረ፤ 49 አየሱን ጎአመን በከ ጉት ሰሴታ ግራን ካኮደያረን ጎራታ ጋር ኣን ሌ ካኮሙታረ ጎራታ እዩን። 50 ዱባና ኡሱ ካኮድያረን ጎራታ ኔን። የሱሳ አደ ባኔዋ፤ “አላማንደ! አንዋያ አሮአብሳቴን!” አመ። 51 ኡሱና ዋላቦ ጉት ኮራተረ እሶን ዋታ ሀማጼ፤ አንባልና ኢሰ፤ ኡሱኮ ኦክጋልሳታረና ኣሎ ሳደን። 52 ባቦ ጉት ካፈላመሮ ባሳና ላኮሻደረን ዋዳናትሶ አታኒ ዱደ ግቴ። 53 በከኮ ጋማ ካኮናቃሬን ጎራታ ታገንሳረጢ ካታማ ቶስ ገን ዋላቦና ባጋ ቶስ ጋባሌን ሸዬን። 54 ባኔዋ ዋላቦኮ ጎሳዳገኒ ጎሳ የሱሳ ማላቦ። 55 እሶና ኡሱ ጎቦቢ ዱባ ትትዬንጉሬን ዲኩባሌሳል አልጋይ ሰዴን ኡሱ ማንኮግሮ ባንኤ ዱባ ቶስ ኬና ግረን። 56 ኡሱ ካኮጌ ማማን ጎርቱን ካታማ፤ ካታማኮ ቃማ ዱባ ካሀዉአማሮ ራራዲ ካና ሳርሰኮት ሻርፍ ድኒን ኤባታ ግረን፤ ኡሱ ካድን ዱባና ፋያ ግረ።

7 ፋራሳዊልና ኢየሩሳሌምኮ ካኤመተረ ኮኮ ሴራ ካሙሴ ካክጋልሰሳረ የሱሳ ቶስ ኤማተንጉረን ማራሙረን ኩኩመን። 2 ኡሱኮ ኦክጋልሳታረን ኮኮ ታኣሎን ግራን ገነ ጎርቱን ታባቶይቴ ገነ ባቦ አማ ግራን ዴን። 3 ፋራሳዊልና አይሁድ ዱባ ኦዶላልክሶክ ዋጋ ኦራይን አማ፤ ሴራ ማለ ገነኖ ኢድሳይ ሀኣሎን ላኮአማሬን። 4 ግያኮ ጎጋማራን ኣል እሰኦትሶ ጎሙጭሳተን ኳሬ ላኮአማሬን። ኡሱማሌ ቁልዱቦ፤ ኡላ፤ ፍልኤና፤ አልጋ አልሳኖ አን ካካለ ሴራ ኦራታ ግረን። 5 ፋራሳዊልና ሴራ ካሙሴ ኦክጋልሰሳራን የሱሳን፤ “ኩኮ ኦክጋልሳታራን ኦታ ሰራ ካኦዶላል ካግራን ኢሴንጉሬን ታኣሎን ግራን ገነ ሙን ባቦ አማራን?” አመን

ሆሳቱን። 6 የሱሳና፡ “ካሄገሮ እስያሳ እሰን ኢፍሳዶሌኮክ ጋራ ‘ልክ ሄገሮ እዬሰራ፤ ጋራክሶና ሃ እማመ ጸፋመራ፤ “ሂክ ጎሳ ሀኢ እን ካባጃራ ዋዳናትሶ አደ እንኮ ታፋክንተታ! 7 አዲ. ሳጋዳራን፡ አጋልሰሳኖክሶና እባዶ ካፈላሮ ሴራ ካላልኮያ።” 8 እጃጃ ካዋ ኢሰዴነ ዋጋ ካእባዶ አታይሳታን።” 9 አደ ሃ እመ “ዋጋካክሰን ኦራይን አንተዴነ እጃጃ ካዋ ካኮኢሳታን ማላ አብታን። 10 ሙሴ ‘እቦካና እየታ ካባጃና፡ እቦኬሳ ጎርቱን እየቱሳ ካሀባራራ ዱዶ ሀጎዋ’ እመ ግረ። 11 እሰን አዴን እባዶት ኮ እቦኬሳ ጎርቱን እየቱሳ ጋርጋራኖ እሰረ ሂክ ‘ቁርባን እማኖና እን ዋወን ካሰሰሮ አላቦያ’ ጎእመ። 12 እሰን ሂክ እባዶት እቦኬሳ ሌረ እየቱሳ ጎጎጋርጋርኖንኮ የላታን። 13 ሃንሱን አላታኑን ካርርሳታን ዋጋን ሃፋራ ካዋ ኢግልሳታን፡ ሂክ አንክክ ካዋጋን እየንሳ ፈላታን።” 14 አደና የሱሳ ጎሳ እስ ቶስ ኡመረ ሃ እመ፡ “ዱባና እን ማላ፡ ሻዳ፡ 15 ሳርኮ ኦርዴ ታበረ እባዶ ካባቶይሳራ እየሰ ኮና ላግሮ፡ ሂክኮ እባዶ ካባቶይሳራ እስኦቲሳኮ ሳርዴ ካብያሮ አዬሰያ። 16 ጎርታ ካማላራ ነበ ካእባ ሀማሎ!” እመ። 17 የሱሳ ጎሳ ኢሰረ ምን ካኮታባረ ጎራታ ኡሱኮ ኦእጋልሳታረን ማሱሳኮክ ጋራ ሆሳተን። 18 ኡሱና፡ “እሰኑን እየሰ ላኮታባርያ?” ሳርኮ እባዶ ቶስ ታበረ ባቶይሰን ካዳንዳራ እየሰ ኮና ላግሮ፡ 19 ዋዳና ቶስ ሀሌኖን ቦግ ቶስ ታባራ፡ ኤሰኮና ማርኮ ብያራ፡ የሱሳ ሂክ እመ አባባተረ ባቦ ዱባ ካእዳንክ ላኖ አዴሰሰ። 20 ደቤና ሃ እመ፡ “እባዶኮ ካብያራ ሀሱ እባዶ ባቶይሳራ። 21 ዋዳና ታእባዶ ኦርኮ ካብያራ ካሜላን ያዳ፡ ሄታኖ፡ እባዶ ላጋዳና፡ ሻርሙጣኖ፡ 22 ላይማኖ፡ ጋጺጋጳኖ ሜላነ፡ ሶባኖ፡ ራራጋታኖ፡ ቃናታኖ፡ መገ ባሳኖ፡ ኮራ፡ ላፋማያን። 23 ሂክ ካሜላን እየሰ ዱባ እባዶኮ ብያራ እባዶና ባቶይሳራ።” 24 የሱሳ ኤሰኮ ኬረ ታጢሮሳ ካታማ ዶሌ ካግሮ ማማን ሴተ፡ ምን ኮ ቶስ ታበረ ኡሱ ኤሰ ግራኖ ማኖና ጎጎእዴሶንኮ ዶተ፡ ጎሌና ኤሴና ሰያም ግርን ላኮዳንዴ። 25 ጎርሰዋ አደ ኡኑ ትጫርት ባቲክ እያና ታኮን አባንተተ ሄለልትቲ ቶ ጋራ ካየሱሳ ማልተ ኤመተዴ ሉክ ጉት ኢተ። 26 ሄለልትቲና ኡል ካግሪክትተ፡ አላታንትሰና ኡል ካሰርፍንቃኮትተ፡ ኤሰና የሱሳ ዱርሳ ኡኑኮ ጎጎቤሰሮን ኤባተ። 27 ኡሱ አደ፡ “ካይሰ ባቦ አትጉረን ከሮሩን ሰሰን ላኮዶትሳሮ፡ ሆራርጀ ይሳሰ ባራር ሀእሞ” እመ። 28 ኤሰና አባብቴዴ “እ ጎታኬ ከሮርና ዱጉድ ታይሰኮ ታኢያቶ ሀንባ እማራ አንተ።” 29 የሱሳና፡ “ሃንሱን ሂክ ማንኮአንተ ማራን ሴ!” ባቲክ እያና ኡኑታኮ ቤራ እመ። 30 ኤሰና ምንክሴ

ካኮአባባተ ጎራታ ኡኑና አልጋይ ጉት ታሁዲርተቶና፤ ባቲክ አያና ታጋፋረሮ ድያተ። **31** የሱሳ ታጢሮሳ ካታማኮ ኬጉረ፤ ምና ታስዶና ቶንሴ ካታማ ቶሞን ታአማማተ ምናን ሮረ ታጋሊላ ላቡ ቶስ ኤመተ። **32** ኤሴና አባዶ ነቤ ካማሎና ህኢ ካአዬሶን አባዶት ኮ ኡሱ ቶስ ከነን፤ ገነና ጉት ጎጎካይሮ ኤባተን። **33** የሱሳና አባዶት ጎሳኮ ካለ ቤሰጉረ፤ ፈረሮኦቴሳ ነበቦ ኦአባዶቲ ኦርዴሰ ታብሰ፤ ኤሰኮና ሀንጨፈ ፈሪ ቱፈጉረ አባዶትኮክ ኤሬብ ድን። **34** ዳሩሪ ቶስ ጦቂአመ ዲያ ኤርና ኔፍሳተጉረ፤ “ኤፍታህ” አመ፤ ህክና “ባናም” አማናያ። **35** ባኔዋ ነበቦ ባናማን፤ ኤሬብና ፋራመጉረ ቁሌሰ አዬሳኖ ሀጋአበ። **36** የሱሳና ሂካ አየሰ ማዮና እሶ ጎጎአዬሶንኮ አጂጂ፤ ሀሌዋ ኳሬ ኡሱ አባዶን ጎጎአዬሶንኮ አታይሰ አጂጂ ካኮሰሳረ ጎራታ እሶ አደን ባላኣይሴን አዬሴን። **37** ጎሳና አሎ ሳዳ “ኡሱ ካፈለራ ዱባ ካአዳንያ፤ ነበቦ ኦማሎና ጎጎማላውን፤ ህኢ ኦአዬሶና ጎጎአየሰራውን የላራ” አመ።

8 ሀሱ ጎራታ አባባተ ጎሳ ካሞጋን ኩኩመ፤ እሶ ካአምራን ባቦ ኮና ማንኮግኖን ማራን የሱሳ ኡሱኮ ኦአጋልሳታራን እሰ ቶስ ኤመጉረ፤ ሃ አመ። **2** “ሂክ አባዶ ኢነ ዋታ አሪ ሴድ ማንኮአዳላተራን ማራና እሶ ካአምራን ባቦ ማንኮዋታመሮ ማራን እን ነኔኤይሳራን፤ **3** ሂካማሌ እሶ ኡኤን ግራን ምንክሶ ጎጋፋረ ኮኮ አባዶ ኡል ካኤርኮ ካኤመተሮ ማንኮሌ ማራን ራድ ሀርጉሬን ኢራንዋ አመ።” **4** ኡሱኮ ኦአጋልሳታረን አባበን፤ “ሂካ ቃሉላቶክ ኡሊ ሂካ አባዶ ዱባ አምሰን ካሌሮ ባቦ ሀገኮ ሄላምናራ?” አመን። **5** የሱሳና፤ “ባቦ ምያ አብታን?” አመ እሶ ሆሳተ። እሶና “ባቦ ቶዶባ አብና” አመን። **6** ኡሱና ጎሳ ኡሊ ጎጎሀማጽሮን አጂጂ፤ ባቦ ቶዶባ አበረ ሶማሳተ አባባተረ ባቦኮ ኤካኤብሰረ አባዶን ጎጎሄዴድናውን ኡሱኮ ኦአጋልሳታራውን ሰሰ፤ እሶና ጎሳን ሄደደን። **7** ኡሱማለና ኡጫር ክዲጫር ኩኑኡብ አባናዬን፤ ኡሱና ሂካ ኩኑኡቤሉን ዋ ጋላቴረ ጎሳን ጎጎሄዴድናውን አጂጂ። **8** ጎሳና አመ ባራረ፤ ኤሰኮና ኡሱኮ ኦአጋልሳታረና ታሄሰቶ ሀንባ ዱጉድ ቶዶባ ምግ አማጌን ኬሴን። **9** ካአመረና ኩማ አፋር ካሌሮ አባዶያ፤ እሶና ጋልሰ፤ **10** ባኔዋ ኡሱኮ ኦአጋልሳታራን ዋታ ዋላቦይ ታበረ ዳልማኑታ ታአማማቶ ባንኤ ቶስ ሴተን። **11** ፋራሳዊል የሱሳ ቶስ ኤመተጉረ ኡሱነ ዋታ ዶጋማኖ ሀጋአበን፤ ኡሱ ጫፍን ዶተረን የሱሳ ዳሩርኮ ማላታ ጎጎቱሰሮን ሆሳተን። **12** የሱሳ አሎ ዋዳና ማራረረ፤ “ህት አላታን ማላታ ካኮንዶታታ መወንያ?”

እን ሩምና አማራ፡ ህታ አላታኑን ማምሰክ ማላታና ላኮሰሳምሮ!” አመ። **13**

ኤሰኮና እሶ ኢሰረ ዋላቦ ታበረ በከኮ ጋማ ናቀ። **14** ኡሱኮ እኡጋልሳታረን ባቦ

አባታኛ ማንኩኢሎቴረን ማራን፡ ዋላቦ ኦሮ ባቦ ኮ ኳሬ ኮና ላኮአባናየን። **15**

የሱሳና፡ “ታፋሳዊልኮና ታሄሮደሳ መላነኮ እሰኡራየን” አመ አጃጁ። **16** እሶና

እሰእሰ ኦሮ፡ “ኡሱ ሃ ካኮን አማራ ኖ ባቦ ማንኮዋኔኖ ማራንያ” አመን። **17**

የሱሳና ቆፋትሶ አደሰረ፡ “ባቦ ማንኮዋኔኖ ማራንያ አማ ሙን ቆፓታን? ግዳና

ላኮሻዳታንያ? ዋዳናትሰኒ ላኮአዳሳታንያ? ጎርቱን ዋዳናትሰን ዱደታ? **18** እልኦ

ግራንቲ ላኮድያታንያ? ነበ ግራንቲ ላኮማላታንያ? ላኮሻዳታንያ? **19** ባቦ ከን

እባዶ ኩማ ከኑን ኢብሰ ካኮሰሰረ ጎራታ ሀንባ ዱጉድ ምያ ምግ ኬሰን?”

እሶና፡ “ቶምንኮ ላማ ምግያ አመን።” **20** “ኡሱማለና ባቦ ቶደባ እባዶ ኩማ

አፋሩን ኢብሰ ካኮሰሰረ ጎራታ ዱጉድ ምያ ምግ ሀንባ ኬሰን?” አመ። እሶና

“ዱጉድ ቶደባ ምግ” አመን። **21** የሱሳና፡ “እሰን ግዳ ጊን ላኮሻደታን አማኖያ”

አመ። **22** ኤሰኮና ቤተሳይዳ ቶሰ ካኮገያረን ጎራታ እባዶ ኢልኦ ካድያኖን

እባዶት ኮ የሱሳ ቶሰ ከነን፡ ጎራንድኖን ኤባተን። **23** የሱሳና ኢልኦ ካባየሮ

እባዶትኮት ገነ አበረ ማማንኮ ሳር ቤሰ፡ ኢልኦ ኦቴሳ ጉት ሀንጨፈ ቱፈረ

ገነቴሳ ጉት ካየረ፡ “ኩን ካሙታራ መያ?” አመ ሆሳተ። **24** እባዶትና ጦቂ አመ

ዴረ፡ “እባዶ ጋ እን ሌ ካሰሴታሮ ድያራ” አመ። **25** የሱሳና አደና ገነኖኦቴሳ

ኢልኦ ኦአባዶት ጉት ካየ፡ ሀሱ ጎራታ ኢልኦ ትቸሰ ዴ፡ ፋዬጉረ ካአመን ዱባ

ማዳረ ድያኖ ሀጋአበ። **26** ኤሰኮና የሱሳ፡ “ማማን ቶሰ አሮታብተ!” “ሀሱ

ማማኒ ማዮና አሮሰግተ” አመረ ምንኬሳ ጋልሰ። **27** የሱሳ ኡሱኮ እኡጋልሳታረን

ዋታ ፍልጶሳ ቅሳርያ ካአማማሮ ማማን ቶሰ ሴታ፡ ራድ ግራን የሱሳ ኡሱኮ

እኡጋልሳታረን፡ “እባዶ እን እዮ አማራ?” አመ ሆሳተ። **28** እሶና፡ “ካጣማቃሮ

ያንሳ ኦአማራን ግራን፡ ኦካለና ኤሳሳያ አማራን፡ ኦካለና አደን ካሄገሮልኮ ኮያ

አማራን” አመን ሰገን። **29** ደቤና፡ “እሰን አዴን እን እዮ አማታን?” አመ ሆሳተ።

ጴጢሮሳና፡ “እት ክርሰቶሳታ” አመ አባበ። **30** የሱሳና፡ “እሰኦቴሳ ማዮና እሶ

ጎሳሰግኖኮ” አመ አታይሰ እሶ ሴርሰ። **31** ኤሰኮና “ኤረ ካእባዶ ራኮ ታሞጋን

አታታኖና፡ ጃርሶለይ፡ ካቱቃሞልኮክዎይቻልና ሴራ ካሙሴ ኦኡጋልሰሳራን ሆረ

ካቱፋምናሮ፤ ካጎይናሮ፤ ታሴድ አርኮ አባባይረ ካክናሮ ኦጋልሰሳኖ ሀጋአበ።”

32 ኡሱና ሂካ አዴሰሰ እሶን ሰገ፡ ሀሱ ጎራታ ጴጢሮሳ የሱሳ ካለ ቤሰረ

ሀድሳኛ ሀጋአበ። 33 የሱሳ አደ ካምባል አመረ ኡሱኮ ኦኦጋልሳታረን ቶሰ ዲያ ጴጢሮሳ፤ “አት ጸላየ፤ እንኮ ፋክም! አት ካእባዶ ኳሬ እየሰ ካዋ ላኮቆፓቶ” አመ ሀድሰ። 34 ኤሰኮ አባባተረ የሱሳ ጎሳ ኡሱኮ ኦኦጋልሳታረን ዋታ እሰ ቶሰ አመረ “እንደቤ ሰሴይን፤ ካጌላታራ ጎግረ እሰኦቴሳ ሀካካተ፤ ማሰቃሊታቴሳ ሰዳይረ እንደቤ ሀሰሴቶ። 35 ኔፎቴሳ ሃሳይን ካዶታታራ ዱባ ባሳታራ፤ እን ማራና ዋንጋላ ማራን ኔፎቴሳ ሮርሳተ ካሰሳታራ ዱባ አደ እሰኦቴሳ ፋይሳታራ። 36 እባዶን አላም ዱባ ካኬሳ ጎሌ ኔፎ ጎዋተ መይ ላኦ አባ? 37 ሃ ጎሌ እባዶ ኔፎቴሳን መ ዋዶ አባ? 38 ህታ ታላይማቶና ጨባለሳት አላታን ሆረ እዬና ሃፋራኬይ ካሙላራ ዱባ፤ ኤረ ካእባዶ አቦኬሳት ካባጃ፤ ቁሉክ ኤርግቻልን ዋታ ካኮኤማተ ጎራታ ኡሱ እን ሙልናራ” አመ።

9 አደና የሱሳ፤ “እን ሩምና አማራ ህታኒ ኦኦሌራን ኦሮኮ ዋኖናት ካዋ ሁና ኤመታ ግራን ታ ዴራኒ ኦጎኖን ግራን” አመ። 2 አሪ ታሌይኮ አባባተረ ጴጢሮሳ፤ ያይቆባና ያንሳ አበጉረ ታኤርት ዋዳም ቶ ቶሰ አተ ቤ፤ ካለና ግረን፤ እሶ ሆረና ምዲተሳ ኢግልሳንተ። 3 ሳርሰኬሳና ሂካ ኡል ጉት ማዮና ሳርሰ ካእልሳራ ሙጭሰን ካዳንዴኖን ግታክ ኣሎ ጉማራ ሌ። 4 ኤላሳና ሙሴና የሱሳ ዋታ እዬሳ ግራን ሙተን። 5 ጴጢሮሳና የሱሳ፤ “ካኦጋልሰሳቶ! ህታኒ ግርንዋ ኖዬን ካእዳንክየ፤ ቶ ኩዬን፤ ቶ ሙሴን፤ ቶ ኤላሳን ታሌቶ ዳሰ ሴድ ማዳርኖ” አመ። 6 ኣሎ ማንኮአብሳተራውን ጴጢሮሳ ካእዬሳሮና ላኮአዴሳረ። 7 ኤሰኮና ዱማንቻ ኤመተጉረ ሆጎግሰ፤ ዱማንቻ ኦሮኮ፤ “ሂክ እን ካጌላታሮ ኤረኬያ፤ ኡሱ ማላ!” ታእማታ ያየ ማልሳንተ። 8 ጎርሰዋ ካምባል አም ጎዴራን የሱሳ ኳሬ ካካለ ማዮና እሶን ዋታ ላኮግረ። 9 ዋዳም ጉኮ ካኮዳጋረ ጎራታ ኤረ ካእባዶ ጎይኮ ታኬሮ ጊን ካዴራን ማዮና ጎጎሰግኖንኮ አጀጃ። 10 እሶና ካእዬሳመሮ ሃፋራ ዋዳናትሶይ አባተን፤ እየሱን ጎአመን፤ “ጎይኮ ክያኖ” መ አማኖኖ እሰእሰኦሮ እዬሳ ግረን። 11 ኤሰኮና፤ “ሴራ ካሙሴ ኦኦጋልሰሳራን ጣይ ኤመይን ካዶትሳራ ኤላሳያ ሙን አማራን? አማ ሆሳተን።” 12 የሱሳና፤ “ኦግራን ኤላሳ ኤማይጉረ እየሰ ዱባ ኤካሰናራ፤ ሀያ ኤረ ካእባዶ ታሞጋን ራኮ አታዬና ቱፋምን ዶትሳራ አማመ ካኮንጸፋመራ መውንያ? 13 እየሱን ጎአመን፤ ኤላሳ ጣየ ኤመተ ግረ፤ እባዶ ጋራኬሳ ጎጎጸፋመሮ ማለ ካዶታቴራን ዱባ ፈለን” አማራ። 14 የሱሳና ሴዶ ኡሱኮ ኦኦጋልሳታረን ኦሄሴራን ኡሱኮ ኦኦጋልሳታረን ቶሰ አባባተን ካኮኤማታራን

ጎራታ ጎሳ ካዋጋን እሶ ማራሙረ ኩኩመ ግራን ዴ፡ ሴራ ካሙሴ ኦኦጋልሰሳራን
 እሶነ ዋታ ዶጋማ ግረን። 15 ጎሳ ዱባ የሱሳ ዴጉረ ጎርሰዋ ማመረ ኡሱ ቶሰ ቲየ
 ሴተጉረ ሮሳዳ አተ። 16 የሱሳና፡ “እሶነ ዋታ ካኩንዶጋማታን ኤት ሃጃይያ?” እማ
 ሆሳተ። 17 ጎሳ ኦሮኮ አባዶት ኮ ሃ እመ፡- “ካኦጋልሰሳቶ፤ ህኢ ካዱድሳሮ
 ባቲክ እያናይ ካአባመሮ ኡኩኬ ኩ ቶሰ ኬናየራ፤ 18 ካኮኬሮ ጎራታ ባንኤ ዱባ
 ሉጉዳራ፡ ሳንባና ጉድሳራ፡ ኢልኮና ፎጫራ፡ ማርና ዘርዶይሳራ፤ ባቲክ እያና
 ኡሱኮ ጎሳቤሰናውን ኩኮ ኦኦጋልሳታራውን ሰጋየ፤ እሶና ቤሰን ላኮዳንዴን።” 19
 የሱሳና አባበረ፤ “እሰን ታኦብዳኖን አላታን፤” “ሀጌ ታ ጌሮን እስኬ ዋታ ግርናራ?
 ሀጌ ታ ጌሮን ኦብሰናራ? ኡኩ እን ቶሰ ኬና!” 20 እባዶና ኡኩ የሱሳ ቶሰ ኬነ፤
 ባቲክ እያናና የሱሳ ካኮድያረ ጎራታ ኡኩ ጎርሰዋ ሀርኢሳኖ፡ ኡል ሉጉዳኖ፡ ኡለ
 ቦጫኖና ሳንባ ጉድሳኖ ሀጋአበ። 21 የሱሳና ካኡኩት ኦዶ ኡመረ፡ “ሂካ አሮአበኮ
 ጌሰ ምያየ?” እመ ሆሳተ። ኡሱና ሃ እመ አባበ፤ “ይሱማኮ ሀጋአበረያ።” 22
 “ላጋዲን ዶተጉረ አርጌቶ ኤለን ኦሮና በክ ኦሮዴሰ ሉጉዳራ፤ ካዳንዴቶ ጎሌተ
 ነኬይሳና፤ ጋርጋርና።” 23 የሱሳና፡ “ካዳንዴቶ ጎሌ” አንተ? “ካእማናሮ
 እባዶን እየሰ ዱባ ዳንዳማራ” እመ። 24 ጎርሰዋ ካኡኩት ኦዶ፡ “አብዳታራ፤
 እየሱን ጎአመን አብድ ታኮዋታሮ እን ጋርጋርና!” እማ ኦኬ። 25 የሱሳና፡ ጎሳ
 ኤሰራ ቲታ ካኤማታሮ ካኮድያረ ጎራታ፡ “እት ህኢ ካአዬሶንና ነቤ ካማሎን
 እያና ኡሱኮ ቤና! ካላም አባባይ ኡሱ ቶሰ ጎሳታቦንኮ እጃጃራ!” እመ ባቲክ
 እያና ሀድሰ። 26 ባቲክ እያናና ኦኬ፡ ኡኩ ኣሎ ኡለ ቦጩ አባባተረ ጋፋረ ቤ፤
 ኦሞጋና፡ “ጎየራ” ታእምራኒ ሬሰ እን ሌ። 27 የሱሳና አደ ታኡኩ ገነ አበ ኬሰ፤
 ኡኩትና ኬ አሌ። 28 የሱሳና ምን ኦሮዴ ካኮታባረ ጎራታ ኡሱኮ ኦኦጋልሳታረን ካለ
 ቤኔን፡ “ኖ ቤሰን ካኮዋኔና ሙንያ?” እመን ሆሳተን። 29 ኡሱና “ሂካ ኣንክክ
 ካኮቢን ዳንዳራ ኤብና አጋቡይ” ካላሊ ኳሬ ማመሰና ብን ላኮዳንዳሮ እመ።
 30 ኤሰኮ ኬጉረ ማማን ካጋሊላነ ሮረ፤ የሱሳና፡ ማዮና ኡሱ ታኮግሮ ባንኤ
 ጎሳእዳሰሮ ላኮዶተሮ፤ 31 ኡሱኮ ኦኦጋልሳታራውን፡ “ኤረ ካእባዶ ገነ ታእባዶይ
 ሮርሳም ሰሳምናራ፤ እሶና ላጋድናራን፡ አሪ ሰድኮ ዳንቤባን ጎይኮ ከናራ” እማ
 አጋልሰሳ ግረ። 32 እሶን አደ ኡሱ ካአማራ ላኮታበረ፡ ሆሳይና አብሳተን።
 33 ኤሰኮ አባባተረ የሱሳና ኡሱኮ ኦኦጋልሳታራን ታቅፍረናሆም ካታማ ቶሰ
 ኤመተን። ምን ኦሮዴ ታበጉረ “ራድ ግራን ካኩንዶጋማቲን ጋራ ካሜያ?” እመ

ሆሳተ። 34 እሱ አደን ራድ ግራን ካኮዶጋማሬን ዲባንኮ ካጂናታራ አዮያ?
 ካእማሮ ማንኮሌ ማራን ጫልኢ አመን። 35 የሱሳ ሀማጼጉረ እሱ ኦሮኮ ቶሞንኮ
 ላማ ኡመጉረ፡ “ዲባንኮ ካሆረ ሊን ካደታታራ፡ ዲባንኮ ሀርጫና ዲባዉን
 ካሀንዳሮ ሀሌዎ” አመ። 36 ክጫርክ ይትት ኬነጉረ እሱ ጠኤ አልሰ፤ ካባላተረ፡
 37 “ሂካ ይሳሰኩ ኮ መገኬይ ካቆጸታራ ዲባ እን ቆጸታራ፤ እና ካቆጸታራ እን
 ሃሌኖን እን ካፋረሮ ቆጸታራ” አመ። 38 “ያንሳና፡ ካእጋልሰሳቶ አባዶት ኮ
 መገካይ ዲርሳ ቤሳ ግራን ዴነ፡ ኖ ዎታ ማንኮሰሰኖዉን ማራን ትርነና” አመ።
 39 የሱሳ አደ ሃ አመ፤ “እሮትርቴን፤ ማዮና መገኬይ ባሳ ፈልጉረ ጎርሰዋ እን
 ጉት ታሜላን እዬሰን ላኮዳንዳሮ፤ 40 ኖ ካዲዶን ዲባ ኖኔ ዎታ ግራ፤ 41
 እን ሩምና አማራ ኦክርሰቶሳ ማንኮሌቴን ማራን መገኬይ ቁልዱቦ ቶ በከ
 እሰን ካጣምሳራ ዲባ ላኦ ላኮዋሮ” አመ። 42 ማዮና እን ኦአማናራን ሂናኦ
 ኦትዲጫርኮ ኮ ካሀንዲዲፍሳራ ዲባ ካእቲ ኤኤዎ ካሪመ ማርጊ ሽያምጉረ
 በከ ኦሮድ ሻፋመዋ ኢዳንክያ። 43 ሃንሱን ገነታ ኩ ጎሀንዲዲፍሰ ጎሰና፤
 ገነ ላማ ኩን ግርጉደ ጋሃናመ ታባኖን ኤለኒ ቶሰ ታባኖኮ፡ ገነ ሙዲናኔ ዎታ
 ጅሩ ጅሮማክ ግር ቶሰ ታባኖ ካእዳንክያ፤ (Geenna g1067) 44 ጋሃናመ ኤለን
 ታባኖን፤ ሀሰክትሶና ላኮጎቶ ኤሌና ላኮባቶ። 45 ሉቃኦታ ኩ ጎሀንዲዲፍሰን
 ጎሰና፤ ሉቃ. ላማ ኩን ግርጉረን ታባኖን ኤለን ኦሮድ ሻፋማናኮ፡ ካኤሳቶ
 ሊጉደ ጅሩ ጅሮማክ ግር ቶሰ ታባኖ ካእዳንክያ፤ (Geenna g1067) 46 ታባኖን
 ኤለኒ ሀሰክና ላኮጎቶ ኤሌና ላኮባቶ 47 እልታ ኩ ጎሀንዲዲፍሰ ታግ ቤሰ፤
 ኢልኦ ላማ ግርጉረን ጋሃናመ ኤለን ታባኖን ኦሮድ ታባኖኮ፡ ኢል ቶ ግርጉደ
 ዎኖናት ካዋ ቶሰ ታባኖ ካእዳንክያ፤ (Geenna g1067) 48 ታባኖን ኤለኒ ሀሰክና
 ላኮጎቶ፡ ኤሌና ላኮባቶ። 49 “ጃርሶ ኤሰቦ ጎሳሙጭአማሮ አባዶ ዲባና
 ኤለኒ ሙጭአማሮ ዶትሳራ። 50 “ኤሰቦ ታኢዳንትታ፤ አየሱን ጎአመን ኤሰቦ
 ኦኖሞንጀትሴ ጎዋተ መይ አባብ ኦኖሞንጀትሰ ጎሳግርቶን የልናታን? ኤሰቦ እሰን
 ኦሮ ሀግርተ፤ እሰ እሰኦሮና ኤካየን ኖሳዳ ግራ።”

10 የሱሳ ኤሰኮ ኬጉረ፡ ኡል ካይሁዳ ቶሰና ዮርዳኖስኮ ጋማነ ካግሮ ጎቦብ
 ቶሰ ሴተ፤ አሎ ካሞጋን ጎሳ አደ ኡሱ ቶሰ ኩኩአማ ግረ፤ ሂታኮ ሆረን ጎሳየላ
 ግሬይ እሱ አጋልሰሰ። 2 ካፋራሳው አባዶኮ ኮኮ የሱሳ ቶሰ ኤመተጉረ፤
 ኡሱ ጫፍን ዶተጉሬ፡ “አባዶ ኦርቴሳ ከልክ አም ጋፋርን ዶትሳራ?” አመን

ሆሳተን። 3 ኡሱና አባበረ፡ “ሙሴ መ አመ እስን አጃጃራ?” አመ። 4 እሱና፡ “ሙሴ ጎአመን ከልክ ካኮአማመሮ ዋራቃታ ጻፍረ ጎጎጋፋሮ አመ ፈኢ ሰሰራ” አመን። 5 የሱሳና አባበረ፤ “ሙሴ ሂካ አጃጃ ካኮንጸፈራ ዋዳናትስን ታዱደ ማንኮሌተ ማራንያ።” 6 “እየሱን ጎአመን ዋ ጣየ አባዶ መጣ ‘ባባርትትና ሄለልትቲ የለ መጠ።’ 7 ‘ሃንሱን አባዶ ኣቦኬሳና ኣየቴሳ ኢሳጋራ፤ ኦርቴሳነ ዋታ ቁራናማራ፤ 8 እሶ ላማና ማር ኮ ላራን፤’ ጎርታኑን ማር ኮ ላራን ኳሬ ላማ ላኮያን፤ 9 ሃንሱን ዋ ካቁራኔሮ ማዮና ፋርን ላኮዳንዴሮ” አመ። 10 አደና ምን ካኮታባሬን ጎራታ፡ ኡሱኮ ኦአጋልሳታረን ህታ ሃጃ ኬሴን ሆሳተን። 11 የሱሳና “ማዮና ኦርቴሳ ከልክ አመረ ታካለ ካአታታራ ኦርቴሳ ጉት ሻርሙጣራ፤ 12 ኤሰና ኤንተርክሴኮ ከልክ አማምደ ካካለቱን ጎኬሳንተ ሻርሙጢታ” አመ። 13 የሱሳ ጎጎድንድኖን፤ እባዶ ይሳሰ ኡሱ ቶሰ ኬናታ ግረ፤ የሱሳኮ ኦአጋልሳታረን አደን ሀድሴን። 14 የሱሳና ሂካ ዴጉረ አማራተረ፤ “ይሳሰ እን ቶሰ ሀኤመተ፡ አሮትርቴን፤ ዋናናት ካዋ ሂናኣ ኣኒዕኒዕያን አመ። 15 እን ሩምና አማራ፤ ዋናናት ካዋ ይሳሰ እን ካቆጳኖን ዱባ ሱረ ላኮታብሮ” አመ። 16 ይሳሰና ካባላተ አባተረ፤ ገነቴሳ እሶ ጉት ካየጉረ ሶማሳተ። 17 የሱሳ ኤሰኮ ቤጉረ ራድ ቤ ሰሴታ ግራን፡ እባዶት ኮ ኡሱ ቶሰ ትያ ኤመተ፤ ኡሱ ሆረ ግልቢሰጉረ “ካአዳንክ ካአጋልሰሳቶ፤ ጅሩ ጅሮማክ ግር ኤልን መ የልን ዶትሳራ?” አመ።

(aīōnios g166) 18 የሱሳና፤ “ሙን እን ካአዳንክ አማታ? ዋ ኮ ኳሬ ካአዳንክ ላኮግሮ፤ 19 አጃጃ ካሴራ ካሶዋ፤ አሮላጋደ፡ አሮሻርሙጢተ፡ አሮሄቴ፡ ጣራ አሮአቶቲተ፡ አሮሶብተ፡ ኣቦካና ኣየታ ካባጂና” አመ አባበ። 20 እባዶትና፡ “ካአጋልሰሳቶ፤ ሂናኣ ዱባ ይሱማኮ ሀጋአበረ ኦራዬራ” አመ። 21 የሱሳና ዴጉረ ጌላተ፤ “ጎርታኑ እየሰ ኮያ ኩን ካሀንቃተራ፤ ሴጉዴ ካአብቶ ዱባ ዳዳልጉደ፤ ሀየሳሉን ሰሰ፤ ዳሩርና ኦኩኩአመራን ኡራዋ ሄላይናታ፤ ኤሰኮ ዳንቤባን ኮይ እን ዴበ ሰሴ” አመ። 22 እባዶትና ሂካ ካኮማላረ ጎራታ ጎሜላን ያደ፤ ኡራዋ ኦሞጋን ኡሱን ማንኮግሬን ማራን ያዳ ሴተ። 23 የሱሳ ካምባል አመ ዴጉረ ኡሱኮ ኦአጋልሳታራን፡ “ዱሬሳጃል ዋናናት ካዳሩረ ታባኖ ምስክ ካእሰላሮ አዬሰያ!” አመ። 24 ኡሱኮ ኦአጋልሳታራን አዬሰከሳይ ማማን፤ የሱሳ አደ አባባተ ሃ አመ፤ “ይሰኬ፤ ዋናናት ካዋ ታባኖ ምስክ ካእሰላሮ አዬሰያ! 25 ዱሬሳን ዋናናት ካዋ ቶሰ ታባኖኮ ሱረ ጋላ ቡቶ ካማርፍን ኦሮማር ሮራኖ ኤነ ሌራ”

እመ። 26 ኡሱኮ ኦኢጋልሳታራና ኣሎ ማማኖይ፥ እስእስ ኦሮ “ሀያ እዮያ ፋይን ካዳንዳራ?” እመን። 27 የሱሳና እሶ ቶስ ዲያ፥ “ሂክ እባዶ ዶሌ ላኮዳንዳማሮ፤ ዋይ ዶሌ ጎእመን ዳንዳማራ፤ ዋይ ዶሌ ካመን ዱባና ዳንዳማራ” እመ። 28 ጴጢሮሳና፥ “ሂክማ ኖና ካመን ዱባ ኢንስ ኩ ዴበ ሰሴንና” እመ። 29 የሱሳና አባበ፤ “እን ሩምና አማራ፤ እን ማራንና ዋንጋላ ማራን አመረ ሞንኬሳ ጎርቱን አቢላልቴሳ ጎርቱን አባላልቴሳ ጎርቱን ኣየቴሳ ጎርቱን ኣቦኬሳ ጎርቱን ይስኬሳ ጎርቱን ኢራኬሳ ካኢስ ዱባ፥ 30 ግዳ ሂካ ጌሲ ባቃታኖን ዋታ ሞንጆል፥ አቢላል፥ አባላል፥ አጮላል፥ ይሳስ፥ ኢራና ቦልኮክ አምባ አታይናራ፥ ካኤማታሮ አላም ጅሩ ጅሮማክ ግር ካኤሎን ላኮግሮ። (aiōn g165, aiōnios g166) 31 እየሱን ጎእመን ኦሆሬ ኦሌራን ኦሞጋን ኦዳንቤ ልናራን፥ ኦዳንቤ ኦሌራና ኦሆሬ ለናራን” እመ። 32 ኢየሩሳሌም ቶስ ብያ ራድ ግራን፥ የሱሳ ሆረሃየረ ሰሴታ ግረ፤ ኡሱኮ ኦኢጋልሳታረን ማማን፥ ኦካላ ዴበ ኦስሴታሬን አደን አብሳተን ግኔን አደና ቶሞንኮ ላማ ጎሳኮ አሳበረ መ ኡሱ ግናሮ ሰገ፤ 33 “ጎርታ ኖ ኢየሩሳሌም ቶስ ብናና፥ ኤረ ካእባዶ ቱቃሞኮክ ዋይቻሉኒና ሴራ ካሙሴ ኦኢጋልሰሳራውን ሮርሳም ሰሳምናራ፤ እሶና ጎይኮክ ፍርዳ ፍርዲራን፤ አይዛብን ሮርስ ሰሰናራን፤ 34 አይዛብልና ቃጭፋይናራን፤ ሀንጨፎፈና ቱፍናራን፥ ቦጭናራን፥ ኤስኮና ላጋድናራን፤ ኡሱ አድ አሪ ሰድኮ ዳንቤባን ኪናራ።” 35 ኤስኮና ይስ ካዛብዶሳ ያይቆባና ያንሳ የሱሳ ቶስ ጋባላመንጉረን፥ “ካኢጋልሰሳቶ፤ ኖ ኩኮ ካኤባታኖ ዱባ ኖን ጎጎስሶ ዶታና” እመን። 36 የሱሳና፥ “መ እን እስኩን ጎጎየሎ ዶታታን?” እመ። 37 እሶና፥ “ካባጃታክ ጎራታይ ኖኮ ኮ መርገታይ ኮ በተታይ ጎጎሀማጺኖን ኖን ፈኢ ሰስ” እመን። 38 የሱሳና፥ “እስን ካኤባታታን ላኮካሳን፤ እን ታጣማሮ ታራኮ ጡጋ ጣምን፥ እን ካጣማቃማሮ ጥንቃታ ጣማቃምን ዳንዳታን?” እመ። 39 እሶና፤ “እ ዳንዳና” እመን። የሱሳና፤ “እን ታጣማሮ ጡጋ ጣንታንዋ፤ እን ካጣማቃማሮ ጥንቃታና ጣማቃንታንዋ፤ 40 እየሱን ጎእመን መርገቴይ ጎርቱን በተቴይ ሀማጸኖ ዋ ካኮንኤካሰሮን ኳሬ እን ካሰሰናሮ እየሰ ላኮኖ” እመ። 41 ኦሄስረን ቶሞኖ ሂካ ማለንጉረን ያይቆባና ያንሳ ኢንጋማኖ ሀጋአበን። 42 የሱሳና እሶ ራቶ ኩኩይስረ ሃ እመ፤ “ካአይዛብ ዋይቻል አማማን ኦሄዳማራን ኦዶናት ኦባሪሰናራን፥ ሹሞሌትሶና እሶ ጉት ኦዶናት ኦቱሳይናራን እስን ካሳንዋ፤ 43 እስኒ ዶሌ አደ ሂካማሌ ሊን ላኮዶትሳሮ፤ እስን ኦሮኮ ካንጅንክ ሊን ካዶታታራ ዱባ

እስኩን ካህንዳሮ ሀሌዎ፤ **44** ካሆሬ ሊን ካዶታታራ ዱባ ካዱባ ድይ ሀሌዎ፤ **45** ኤረ ካእባዶ ሀንዳይና ኔፎቴሳ ካሞጋኑን ዎዶ የል ሰሳይን ኤመተራ ኳሬ ጎሳህንዳይናውን ላኮኤሜተሮ።” **46** ኤሰኮ አባባቴረን ታኢያርኮ ካታማ ቶሰ ኤመተን። የሱሳና ኡሱኮ ኦኢጋልሳታረን ጎሳ ካሞጋን ዎታ እያርኮኮ ብያግራን ኢልኦ ካድያኖን ካጠመዎሳ ኤረ በርጠሎሜዎሳ ራ ግርዲ ሀማዬረ ኤባታ ግረ። **47** ኡሱና ኤሰን ካሮራራ ካናዘረት የሱሳ ላኖ ካኮማላረ ጎራታ፡ “ኤረ ካዳዉተ፡ የሱሳ፤ እን ማር!” አማ ኦካኖ ሀጋእበ። **48** ካሞጋን ኡሱ ጫልኢ ጎሳእምሮ ሀድሴን፤ ኡሱ ጎእመን፡ “ኤረ ካዳዉተ፤ እን ማር!” አማ ኣሎ ጂናሰ እዬ። **49** የሱሳና አሌጉረ፤ “ኡማ!” አመ። እሶና ኢልኦ ካባየሮን፤ “አላማንደ! ክ! የሱሳ ኡማራ!” አመን። **50** ኡሱና ሳርሰኬሳ ሻፈጉረ ፍጣ አመ ኬ አሌ የሱሳ ቶሰ ኤመተ። **51** የሱሳና “መ ጎሳየሎ ዶታታ?” አመ። ኢልኦ ካድያኖና “ካኢጋልሰሳቶ፤ ድን ዶታራ” አመ። **52** የሱሳና፤ “ሴ አማኖካ ኩ ፋይሰራ” አመ፤ ጎርሰዋ ኢልኦ ዴንዴን፤ ኡሱ ራነዋ የሱሳ ዴበ ሰሴተ።

11 የሱሳና ኡሱኮ ኦኢጋልሳታረን ኢየሩሳሌም ካኮጋባላመሬን ጎራታ ዛይት ካብያራ ጋ ታኮአላታሮ ዎዳሚ ቶንሴ ዶሌ ካግሮ ካቤተፋገና ካብታንያ ማማን ቶሰ ገገን፡ የሱሳ ኡሱኮ ኦኢጋልሳታረንኮ ላማ ሃ አማ ፋረ፤ **2** እሰን ሆረ ካግሮ “ማማን ቶሰ ሴዬን፤ እባዶ ሀማጽ ታኮካሶን ዳርሜ ታደሜር ኤሰ ታሻንተቶ ሄልናታን፤ ፋራዴን ኬና፤ **3** ማዮና፡ እሰኔ ‘ምሰ የላታን?’ ጎእመ፤ ‘ጎታዉን ዶትሳራ፤ ባኔዋ አባብ ፋርናራ አማዴን ሰጋ።” **4** እሶና ሴተን፤ ምን ኮይ ሳሬ ታሻንተቶ ዳርሜ ታደሜር ሄሌን፤ ፋሬን። **5** ኤሰ ኣሌ ካግረ አባዶኮ ኮኮ፡ “ዳርሜ ካኮንፋራታን መዉንያ?” አመ ሆሳተ። **6** እሶና፡ የሱሳ ካእመሮ እባዶን ካኮሰጋረን ጎራታ እሶና ፈኢ ሰሰን። **7** ዳርሜና የሱሳ ቶሰ ኬንንጉረን ሳርሰክሶ ካዳርመ ባጋድ ጉት ያዬን፤ ኡሱና ጉት ሀማዬ። **8** ካሞጋን እባዶና ሳርሰክሶ ራድ ያዬን፤ ኦካለና እደን ካባርዛፈ ጋኮ ባላል ታርሼ ኣተን ኡል ያ ግረን። **9** የሱሳኮ ሆረን ኦሰሴታረና ሃሬ ዴበ ኦሰሴታረን ካኦቲ ሃፋራይ ሃ አማ ግረን፤ “ሆሳኢና!” መገ ካጎታይ ካኤመታራ ካሶማሳመያ! **10** “ካኤመታራ ኣቦካን ካዳዉተክ ዎኖናት ካሶማሳመያ፤” “ሆሳኢና አርያም!” (ዱባንኮ ጦቅ ካእንተ ዳሩሪ ሶማ ዋዉን ሀሌን!) አማ ኢያረን። **11** የሱሳና ኢየሩሳሌም ጌጌ፤ ኤሰኮና ቁሉክ ምን ካዋ ቶሰ ታበ፤ ኡሱ ማራመረ ካግሮ ዱባ ዴ፤ ኡል ሄመን ካኮላረ

ጎራታ ቶሞንኮ ላማነ ዎታ ብታንያ ቶስ ሴተ። **12** ታላም አሪ የሱሳ ብታንያኮ ብያግራን ኡኤ። **13** ኡሱና ባላሎ ካእቦ ካባለስ ጋ ኤባ ዴ፤ ዎዳሳ ኢል ዱባም ግርቶ አማ ኡሱ ጋ ቶስ ሰተ፤ አየሱን ጎአመን ኡሱ ጋ ታኮዱባማረ ድግኒ ላኮተ ባላሎ ኳሬ ኮና ላኮሄላተ። **14** ኤስኮና የሱሳ ካባለስ ጋ፤ “ግዳኮ ሀጋአብረ ጅሩ ጅሮማን ማዮና ኩኮ ኢል አሮአሞ” አመ። ኡሱኮ ኦአጋልሳታረን ኡሱ ሂካ አዬሳ ግራን ማለን። (aiōn g165) **15** ኢየሩሳሌም ቶስና ሴተን፤ ኤስኮና የሱሳ ቁሉክ ምን ካዋ ኦሮዴ ታበጉረ፤ ኦአምናታራና ኦዳዳላታራን ኦሮኮ ቤሳኖ ሀጋአበ፤ ማሪጋደ ኦአጋልሳታራንኮን ጣራጴዛልና አራብ ኦዳዳላታራንኮክ አርጃታል ምናምናአባበ፤ **16** ማዮና ሁ ሰዳይረ ቁሉክ ምንኮት ኣል ኦሮ ማር ጎሳሮሮንኮ ትረ። **17** አጋልሰሳና ሃ አመ፤ “ምንክ ጎሳ ዱባን ምን ካኤብያ አማማራ አማመ ላኮጻፋመሮያ? እስን አዴን ካሸታ ላጋ የልቲን!” አመ። **18** ካቱቃሞል ዎይቻልና ሴራ ካሙሴ ኦአጋልሰሳራን ሂካ ማለንጉረን ኡሱ ታየል ላጋድናን ራ ዶታኖ ሀጋአበን፤ ሀሌዎ ኳሬ ጎሳ ዱባ አጋልሰሰኬሳ ማማ ማንኮግረ ማራን ኡሱ አብሳተናን። **19** ኡል ሄመን ካኮላረ ጎራታ የሱሳና ኡሱኮ ኦአጋልሳታራን ኤስ ካታማኮ ቤንጉሬን ሴተን። **20** ታላም አሪ ባር ራኔ ሮራ ግራን፤ ጋ ካባለስ ሀዲድኔ ካአንጋገሮ ዴን። **21** ጴጢሮሳ አየስ ቃል ካኮአማረ ጎራታ የሱሳን፤ “ካአጋልሰሳቶ፤ ሂክማ አት ካቃንግተታ ካባለስ ጋ አንጋገራ” አመ። **22** የሱሳና አባበረ፤ “ዎይ አማና።” **23** “አን ሩምና አማራ፤ ማዮና ህታ ዎዳምን፤ ‘ታጋምደ በከ ኦሮዴ እ’ ጎአመ ሂካና ዎዳናቴሳይ አሄዳኖኒ ጎኤባተ ሌሮዋ። **24** ሃንሱን ኤቢ ካኤባታታን ዱባ ካአታቲታን ኣን የል ጎአማናቴን ሌሮዋ። **25** አደና ኤባይን ካኮአልቲን ጎራታ፤ ካዳሩረ ኣቦክሰን ጨቦክሰን ሀሄሶ ጎሳአምሮ፤ እስና አባዶ ጉት ታአብታን ካጁ ዱባ ሀሄሶ አማ። **26** እስን ካካለኮክ ባስ ሀሄሶ ጎአምን አደ ካዳሩረ ኣቦክሰን ጨቦክሰን ሀሄሶ ላኮአምሮ።” **27** አደን ኢየሩሳሌም ቶስ ሴተን፤ የሱሳ ቁሉክ ምን ካዋ አዉዲ ኦሮ ሰሴታ ግራን ካቱቃሞል ዎይቻል፤ ሴራ ካሙሴ ኦአጋልሰሳራና ጃርሶላ ኡሱ ቶስ ጋባላመንጉረን፤ **28** “ሂካ አዬስጃል ካኮፈላታ ኦዶናት ካዮያ? ሂካ ጎሳፈልቶን ኩን ኦዶናት ካስሰራ አዮያ?” አመን። **29** የሱሳና አባበረ፤ “አላ እን ሆሲን ቶ እስን ሆሳሮ፤ አባባ፤ አንና ሂካ አዬስጃል ኤክ ኦዶናት እን ፈላሮ ጋቸሰጊራ። **30** ካያንሳ ጥንቃታ ዋኮያ ሙ አባዶኮያ? አባባ” አመ። **31** እሶና እስ እሲሮ ሃ አመን፤ “ዋኮያ ጎአምኔ፤ ‘ሀያ ሙን አማናና

ዋተታን? አምናራ፤ **32** ሀያ እባዶኮያ አምኖ?” ጎሳ ዱባ ያንሳ ድግራን ካሄገሮ ላኖ አብዳተን ማንኮግሬን ማራን አብሳተን። **33** ሃንሱን የሱሳን “ኖ ላኮካንሶ” አመን አባበን። የሱሳና፡ “ጎርታኑን አንና ሂካ አዬሰጃል ኤክ ኦዶናት አን ፈላሮ ላኮሰግናሮ” አመ።

12 ኤሰኮና የሱሳ ሃ አማ ማሱሳይ እሶን ሰጋኖ ሀጋአበ፤ “እባዶት ኮ ካዎይኒ አካክልተ አባራተ፤ ማራሙርስ ኦት ካተ፤ ዎይኒ ካኮሙላሮ ጉምቢና አሻተ፤ ታኦራሮ ታቀና ማዳራተ፤ ኤሰኮ ኦታተን ኦባራራውን ክራይ ሰሰጉረ ኡል ካካለ ሴተ። **2** ካም ታኮኩኩአማሮ ድግኒ ታዱባንተቶ ታዎይኒ ኢልኮ ጎንኬናውን ኡሱን ካህንዳረኬሳ ኦታተን ኦባራራን ቶሰ ፋረ። **3** እሶ ጎአመን አበን ቦጨን ገነ ታላልና ጋፋሬን። **4** አደና ካካለ ካህንዳሮ ፋረ፤ እሶና መተኬሳ በረኤሰን የራሴን አባበን። **5** ግዳና አደ ካካለ ፋረ፤ ሂካና ላጋዴን፤ ኦካለ ኦምጋን ኦሮኮ ኮኮ ቦጨራን፤ ኮኮና ላጋዴን። **6** “ግዳና ካፋራምናራ ካካለ ኡሱን ግረ፤ ኡሱና ኡሱ ካጌላታሮ ኤረኬሳየ፤ ኤረኬ ካባጂናዋ” አማ ዱባንኮ ዳንበኔ ፋረ። **7** “ኦታተን ኦባራራን ጎአመን አሰኦሮ፤ ሂክ ዋና ካኤላሮያ፤ ኮዬን ላጋንዶ፤ ኤሬቴሳ ታታን ለታ” አመን። **8** ኤሰኮና አበን ላጋዴን፤ ታዎይኒ ባንኤኮ ሳር ቤሰን ሻፌን። **9** “ጎርታኑ ጋ ካዎይኒኮክ ኦዶ መ ካየልናሮ አን ላራ? ኤመይናራ፤ ኦታተን ኦባራራን ላጋድናራ፤ ካዎይኒ አካክልተ ኦካለቱን ሰሰናራ። **10** ጎርቱን፤ “ግምቦ ኦግንባራን ካቱፋተን ኤኤሞ፤ ኡሱ ምና አፋሩን መተ ሌ፤ አማመ ካጸፋመሮ ሃፋራ ላኮናባብቴታንያ? **11** ሂካ ካፈለራ ጎታያ፤ ህክና ኢልኦ ኦታኒ ካሳድሰሮያ።” **12** አይሁድኮክ ዎይቻል የሱሳ ማሱሳይ ካኮአየሰራ ጋራክሶ ላኖ ካኮአዴሳረ ጎራታ ኡሱ አብን ዶተ፤ አየሱን ጎአመን ጎሳ ማንኮአብሳታረ ማራን ኢሰ ሴተ። **13** ኤሰኮና አየሰ ሃገልኮ ኦት አብን ካፋራሳው እባዶኮና ታሄሮዶሳ ኡናኮ እባዶ የሱሳ ቶሰ ፋረን። **14** እሶና ኤመተንጉረን፤ “ካአጋልሰሳቶ፤ ኦት ካሩም እባዶት ላኖካ ካንሶዋ፤ በቤድ ታእባዶ ዴተ ኮ ቶሰ ሀኡሉልሶን ካዋ ራ ካላል ሩም አጋልሰሳታ፤ ጎሌና ቄሳርን ገራ ሙርን ዶተሳራ ሙ ላኮዶትሳሮያ? ኖ ሙርኖ ሙ ላኮሙርኖያ? **15** የሱሳ ጎአመን ኢፍሳዳ ላኖክሶ ማላበረ፤ ሙን እንኮ አየሰ ሃገልኮ ኦትን ዶታታን?” አላ ድናር ኮ ኬና አን ዴሮ አመ። **16** እሶና ከኔን፤ “ሀት ምዲ ታዮታ? ጻፋኖ ካዮያ?” አመ እሶ ሆሳተ፤ “እሶና ታቄሳርታ” አመን። **17** የሱሳና፤ “ካቄሳር ካሌሮ ቄሳርውን ሰሳ ካዋ ካሌሮ

ዋውን ሰሳ” አመ። እሱና ኡሱይ ማማን። 18 ሂታኮ ሆረንባን ጎይኮ ክያኖ ላኮግሮ ኦአማራን ካሶደቃውል አባዶ የሱሳ ቶሰ ኤመተጉረ ሃ አማ ሆሳተ፤

19 “ካአጋልሰሳቶ፤” እባዶት ኮኮክ አቢ ኦር አታይጉረ ይሰ ሀኡሙሎን ጎሳየ፡ “ሂክ እባዶት ሀታ ሄለልትቲ አታይጉረ አቢኬሳት ሳኒ ጎሳካይሮ አመ ሙሴ ጸፈራ። 20 ሀያ አቢላል ቶዶባ ግቴ፤ ካሆሬ አታተረ ሳኒ ሀካኖን ጎሳየ፤ 21 ካላምክና ሀታ ሄለልትቲ አታተ፤ ኡሱና ሳኒ ሀካኖን ጎሳየ፤ ካሴድና ሂካማሌ፤ 22 ቶዶባ ዱባና አታተን ሳኒ ጎአመን ላኮካተን፤ ዳንበኔ አደ ሄለልትቲ ጎተ። 23 ጎርታኑ ቶዶባ ዱባና አታተራን ጎይኮ ታክያኖ አሪ ሀናኣኮ ኤሰ አዮን ኦር ልናታ?” አመን። 24 የሱሳና እሱን ሃ አመ አባበራ፤ “ካኮሽርአማታን ቁሎለ ማጻፋልና ሁና ካዋ ማንኮካሳናዋተን ማራንያ። 25 ኦጎየራን ጎይኮ ካኮኬራን ጎራታ ካዳሩረ ኤርግቻል እን ልናራን ኳሬ ላኮአታታራን ላኮናኬሳማራን። 26 ጎይኮ ከያኖኮክ ጋራ ጎአመን ካሙሴ ማጻፋይ ሀክና ጋራ ካሁርሰ ታእዬሰሮ ክፍል ዋ ‘እን ካአብራመ ሄዶ፡ ካይሳቃ ሄዶ፡ ካያይቆባ ሄዶያ ካአመሮ ላኮናባብቴታንያ?’ 27 ዋ አርዶኒዕኮክ ሄዶያ ኳሬ ካጎይ ሄዶ ላኮዮ፤ ሃንሱን ኣሎ ሽርንተታን።”

28 ሴራ ካሙሴ ኦአጋልሰሳራንኮ ኮ ኤመተጉረ ዶጋማግራን ማለ፤ የሱሳና ኡሱ ቶሰ ታኤማተተ ሆሲኑን አባብ ካአዳን እሱን አባባኖ ሻደረ፡ “አሚና፤ ኣጃጃ ዱባኮ ካሮራራ ኤክያ?” አመ ሆሳተ። 29 የሱሳና ሃ አመ ኡሱን አባበ፤ “ዱባንኮ ካጃናታራ ኣጃጃ ሂካያ ‘እሰራኤል ማል፤ ጎታ ሄዶካን ጎታ ኮያ፤ 30 እትና ጎታ ሄዶካ ዱዶት ዋዳናታይ፡ ዱዶት ኔፎታይ፡ ዱዶክ ያዳካይና ዱዶክ ሁናካይ ጌላ።” 31 ካላምክ ኣጃጃና ሂካ እን ካላርያ፤ ‘ኦላታ እስኦታ እን ጌላ’ ካአማርያ። ሂናኣ ኣጃጃ ላማኮ ካሮራራ ካካለ ኣጃጃ ላግሮ።” 32 ሴራ ካሙሴ ካአጋልሰሳራና የሱሳን ሃ አመ፤ “ካአጋልሰሳቶ!” “ታኢዳን እንተታ፤ ዋ ኮያ፤ ኡሱኮና ካካለ ግራናዋት እዬሳኖካ ሩምያ፤ 33 ሃንሱን እባዶ ዱዶት ዋዳናታይ፡ ዱዶት ሳሙታይ፡ ዱዶት ኔፎታይ፡ ዱዶክ ሁናካይ ጌላታኖ፤ ኡሱማለና ኦላታ እስኦታ እን ጌላታኖ፤ ካጉባማሮ ጃርሶ ዱባኮና ካካለ ጃርሶጃልኮ ሮራራ።” 34 የሱሳ ሴራ ካአጋልሰሳረክ ቃሩማና ሻድኮ አባባኖ ዳጉረ፡ “እት ዋኖናት ዋኮ ፋክ ካእንተ ላኮቶ” አመ። ሀሴኮ አባባተረ ሆሳይን ካጃባተ ኮና ላኮግሮ። 35 የሱሳ ቁሎክ ምን ካዋኮክ እዉዲ ካኮአጋልሰሳረ ጎራታ ሃ አማ ሆሲን ሆሳተን፤ “ሴራ ካሙሴ ኦአጋልሰሳራን ክርሰቶሳ ኤረ ካዳዉተያ ምሲ አማራን? 36 ዳዉተና

መተከላውን ቁሉክ አያናይ ከኬጉረ፡ “ጎታ ጎታክ፡ ዲናካ ሉቃስታ ሄገሊ እን ኩን “ታ የሎ ጌግን መርገቱይ ሀማጺ እመ አማራ፡፡” 37 ሀያ ዳውተ መተከላን “ጎታ” ጎአምሮ፤ ምሲ አባባተ ኤረ ላራ?” ጎሳ ካሞጋንና ገጌሎይ ማላ ግረ፡፡ 38 የሱሳ ካኮአጋልሰሳረ ጎራታ ሃ እመ፤ “ሴራ ኦአጋልሰሳራንኮ እስኦትሰን ኦራዬን፤ ካኤር ቆሎ ሳርሳቴንጉረን ማራሙር ሰሴይን ጌላታራን፤ ግያ ኦሮና ታካባጃንተ ሮጎዳ አታይን ዶታራን፡፡ 39 አይሁድኮክ ምን ካኤብና ካካባጃመ ባርጨማ፡ ባንኤ ታአምደና ታካባጃንተ ባንኤ ዶታታራን፤ 40 ኤራስ ኤባታኖክሶ አላንቲ የላ ጋልታንተጃልኮክ ምን ሀወአይ የላራን፤ ሂኒዕ ካአቲ ፊርዳ አታይናራን፡፡” 41 የሱሳ ሙጽዋታ ካኮአባባራን ሳጢነ ዶሌ ሀማጺጉረ ካሞጋን እባዶ እላባጃልኬሳ ቁሉክ ምን ማራጋይ ካኮካማሮ ሳጢነ ኦሮ ሉጉዳ ግራን ዲያ ግረ፡፡ ካሞጋን ዱሬሳልና ካሞጋን ማራጋይ ሉጉደን፤ 42 ህየት ጋልታንተት ቶ አደ ማላቃ ላማ ታናሰ ማራጋይ ሉጉደ፡፡ 43 የሱሳ ኡሱኮ ኦአጋልሳታራን “ኡመጉረ፡ ሃ እመራ፤ እን ሩምና አማራ፤ ህት ህየት ጋልታንተት ሳጢነ ኦሮዴሴን ኦሉጉዴራን ኦካለኮ ካጂናሮ ሉጉደታ፡፡ 44 ሂኒዕ ዱባ ካሄላቴራን ዋረኤኮ ሰሴራን፤ ኤሰ ጎአመን ህዩማትሴኮክ ሁናኮ ዱባ ባሪሳኖውን ኤሰን ካሌሮ ሀሃሳኖን ጎጎግሮ ሰሰታ” እመ፡፡

13 የሱሳ ቁሉክ ምን ካሞኮ ብያ ግራን ኡሱኮ ኦአጋልሳታራንኮ ኮ፡ “ካአጋልሰሳቶ፤ ኤኤሞጃል ምሲ ግሮ፤ ካግንበ ምን ምሲ ካኢዳሮኖ ዴና” እመ፡፡ 2 የሱሳና አባበረ፡ “ሂክ ካጂንጂን ግምቤጃል ድያታ? ኤኤሞ ኮ ካካለይ ጉት ጎጎግሮ ላኮሄሰናሮ፤ ዱባና ካዲጋምሮያ” እመ፡፡ 3 የሱሳ ቁሉክ ምን ካሞ ሆረ ዛይት ካብያራ ጋ ታኮአላታሮ ዋዳም ጉት ሀማጺ ግራን ጴጢሮሳ፡ ያይቆባ፤ ያንሳነ እንድራሳነ ካለ ኡሱ ቶሰ ጋባላመን ሃ አማ ሆሳተን፤ 4 “ሂክ ጎረ ልናሮ ኖን ሰጊ፤ ሂክ ዱባ ጉዳይን ካኮ ጋባላመ ጎራታ ካቱሰናራ ማላታ መያ?” 5 የሱሳና ሃ አማኖ ሀጋአበ፤ “ማኖና እሰን ጎጎሶቦንኮ እስኦትሰን ኦራዬን፤ 6 ኦሞጋንና ጎን ክርሰቶሳያ’ አማ መገኬይ ኤሜይናራን፤ ካሞጋን እባዶና ሶብናራን፡፡ 7 እሰን ዶሌ ጀሬን ክያኖና ኤባ ጀሬንኮት ኦዱ ካኮማልቲን ጎራታ አርነይቲን፤ ሂክ ሊን ዶትሳራ ጋቾ አደ ጋናታ፡፡ 8 ጎሳ ጎሳይ ጉት፡ ዋኖ ዋኖይ ጉት፡ ኪናራ፤ ባንኤ ታሞጋን ኡልኮክ አአኖና ኡኢ ልናራ፤ ሂክ ዱባ ካኡሙላ ሙዳማ ካሆራርጃያ፡፡ 9 “እሰን ጎአመን እስኦትሰን ኦራዬን፤ እሰን ሾንጎውን

ሮርስ ሰሰናራን፤ ካአይሁድኮክ ምን ካኤብና ቦጭናራን፤ እቶ ጎሳሌታኑን
 አላንቲቲይ ሞትጆልና ዋኖላል ሆረ አልናታን። 10 ዱባንኮ ጣይ አደ ዋንጋላ
 ጎሳ ዱባን ላላባማኖ ዶትሳራ። 11 አባምዴን ፍርዳን ካኮሰሳንታን ጎራታ፡ ኤስ
 ሳቲ እስኑን ካሰሳማሮ ካላል አዬሳ ኳሬ መ አዬንሳ አማ ጣይ አሮጫናቃንቲን፤
 ካአዬሳራ አያና ቁሉክ ኳሬ ላኮእስንታን። 12 አቢ አቢኬሳ፡ ኦዶና ኤረኬሳ ጎይን
 ሮርስ ሰሰናራ፤ ይሳሰ ኦኡሙለራን ጉት ዲና ልናራ፤ ላጋድናራ። 13 አላንቲቲይ
 አባዶ ዱባ ዶሌ ኦዲዳንቲን ልናታን፤ እየሱን ጎአመን ታ ጋቾ ጌሮ ካአታተ ሀሱ
 ፋያራ።” 14 “ባስኮክ ባትናት ሙትን ታኮዶትሶን ባንኤ አሌ ግራን ካኮዴተን
 ጎራታ ካናባበራ ሀሻዶ፤ ኡል ካይሁዳይ ኦግራና ዋዳም ቶስ ሀባቃተን፤ 15
 ምንኬሳት ሄልንቾ ጉት ካግራ አሮዳጎ፤ ሁኬሳና ቤሳይን ምን ኦሮድ አሮታቦ፤
 16 አራ ካግራና ሳርስኬሳ አታይን ሃሮ አሮአባባኖ። 17 ኤስ አሪ ሄለል ካፋቶወና
 ካአልሳሮወን ራኮ ታአቲ ለታ! 18 ህክና ባጠሳይ ጎሳሌኖንኮ ኤባየን፤ 19
 አላንቲና ሆራርጀ ዋ መጣ ታኮመጠሮ አርኮ ኬሰጉረ ታ ህታር ጌሮን፡ ታልካሶን
 ራኮ አባዶን ኤመይናታ፡ ሆረንባወን ታሌኖን ራኮ ታአቲ አባዶ ጉት ኤመይናታ።
 20 ጎታ ሀኑኤ አርጆል ጋባቢሰ ዋተዋ ማዮና ላኮፋይናረ፤ ዋ ኦአሳባሜራን ማራን
 አመጉረ አደ አርጆል ጋባቢሰራ። 21 ሀሱ ጎራታ ማዮና፤ ‘ሂክማ፤ ክርስቶሳ ሀሴ
 ግራ፡’ ሃ ጎአመና ጎርቱን፡ ‘ሂክማ፤ ህታኒ ግራ’ ጎአመን አሮአብዳቲን። 22
 ኦጣራ ክርስቶሳጆልና ኦጣራ ኦሄገሮል ኪናራን፤ ባሳና ካሳዳምሮ ፈላ እሶን
 ጎዳንዳመ ኦአሳባሜራን ዱዶ ሸርሳራን። 23 እየሱን ጎአመን ጎራታ ሀንጌኖን
 እን እስኑን ሰገራ፡ ሃንሱን እስን እስኑራዬን። 24 “ሀሱ ጎራታ፡ ራኮኮ ዳንበኔ
 “አርት ሙጉድ ልናታ፡ ድግንና ኢፋክሴ ላኮሰሰናቶ፤ 25 ባራጃና ዳሩርኮ
 ኡባይናራ፤ ዳሩር ካግራ ሁናና ሻላጋምናራ።” 26 “ሀሱ ጎራታ ኤረ ካአባዶ ካአቲ
 ሁናይና ካባጃ ዱማንቻይ ኤመታ ግራን ኡሱ ድናራን። 27 ኡሱና ኤርግቻ
 ፋርጉረ ምና አፋርኮ፤ ኡልኮት ጋቾኮ ታ ዳሩርኮት ጋቾ ጌሮ ዋይ ኦአሳባሜራን
 ኩኩይሰናራ። 28 “ጋ ካባላሰኮክ ማሱሳ አጋልሳዬን፤ ባላል ጎሁርሰሮ ባላሎና
 ጎጫሪድናን ባጤሳ ጋባላማኖ አዳሳታን፤ 29 ኡሱማለና አደ ሂካ አዬሰጆልኮክ
 ጉዳታኖ ጎዴተን ኤረ ካአባዶኮት ኤመቶ ጎጫይ ጋባላማኖ አዳሳ። 30 እን
 ሩምና አማራ፡ ሂክ አዬሰጆል ታጉዳሮ ጌግን ህት አላታን ዱዶ ላኮሮርቶ፤ 31
 ዳሩርና ኡልና ሮራንዋ ሃፋራክ ጎአመን ላኮሮሮ። 32 “እየሱን ጎአመን ኤስ

እርና ኤስ ሳቲ ኦዶ ኳሬ፥ ካካለ ጎሄስና ካዳሩረ ኤርግቻልና ሌረን፥ ኤረኬሳ ጎሌና፥ ማዮና ላኮካሶ። **33** ሃንሱን ጎራታ ማጎሬ ልናሮ ላኮካሳን እስኦራዬን፤ አታዬን። **34** ህክና ምንኬሳ ኦኦራናውን ሰሰጉረ፥ ኦህንዳራውን መተመተይ ፈሎ ሄደደ ሰሰጉረ፥ ካኦራራ አታይ ጎጎኦሮን እጃጃረ ካሴተሮ እባዶት እን ላራ። **35** “ጎርታኑን ኦዶ ምኔ እብቶ ጎርቱን ሄመን ጠኤ፥ ሉካለ ኦዋ ጎርቱን ኡል ቡላ ኦዋ ኤሜይናሮ ጎራታ ላኮካሳን፤ ሃንሱን አታዬን ኦራዬን። **36** ኦዶምኔ እስን ደራኣ ግራን ጎሌመተ ሁዱርቱን ኦግታን አርዴና! **37** እን እስኑን ካሰገሮ እባዶ ዱባን ሰግናራ፤ አታዬን፥ አመ።”

14 ካፋሰካና ካባቦ ባላ ካባጃምን አሪ ላማ ሄሰ ግራን ካቱቃሞል ዋይቻልና ሴራ ካሙሴ ኦኦጋልሰሳራን የሱሳ ሚጌይ ካኮአብራና ካኮላጋድራን ራ ዶታ ግረን። **2** እየሱን ጎአመን፤ “ጎሳ ኦኮ ጎጎኬሶንኮ ካባላ አልማይ ላኖ ላኮዶትሳሮ” አማ ግረን። **3** የሱሳ ካብታንያ ማማኒ ማሪ ባር ካእቦኮክ ካሰሞና ምኒ ባቦ አምን ሀማጼ ግራን፥ ሄለልትቲ ቶ ዶክ ኣሎ አዉአሎ ታሌተቶ ሙጭ ታእንተ ናርዶሳ ካአማማሮ ጋኮ ታፈላንተቶ ሸቶይ ካአማጋመሮ ካአልባሰጢሮስ ብልቃደ አብቲ ኤመቲ፥ ብልቃደና ኤብሰጉዴ ሸቶ የሱሳ ጉት ክክብቲ። **4** ኤስ ኦግሬንኮ ኮኮ ፈሎኦትሴይ አማራተንጉሬን እስኦሮ ሃ አማ ግረን፤ “ህት ሸቶ ሙን አዱ ዳርአማታ? **5** ህት ሸቶ ሴድ ቦሌ ድናርኮ ጉንተ ዳዳላምጉደ፥ ሂካ ማራጋደ ህየሳን ሰሰንዋ ካእዳንክየ” ሄለልትቲና ቱፋተን። **6** የሱሳ ጎአመን ሃ አመ፤ “ኢሳ፥ ኤስ ሙን ራክሳታን? ኤስ ፈሎ ኦኢዳን ኢን ፈልተታ። **7** ህየሳል ማጎራና እስን ዋታ ግራን፥ ካኮዶተን ጎራታ እሱን ታኢዳን ፈልን ዳንዳታን፤ እን ጎአመን አርጌቶ እስኔ ዋታ ላኮግርናሮ፤ **8** ኤስ ፈልን ካዳንዴተቶ ግታክ ፈልተታ፤ ቃማላማኖኬውን ጎጎሌሮን ጣይተ ማርኬይ ሸግደ። **9** እን ሩምና አማራ፤ ሂክ ዋንጋላ ማንኮሰጋማሮ አላም ዱባ ማምሰት ባንኤይና ሂክ ኤስ ካፈልተታ ሻዳኖ ሊ ሰጋምራ” አመ። **10** ሂታኮ እባባተረ ቶሞንኮ ላማኮ ኮ ካሌራ ካአሰቆሮቹ ይሁዳ የሱሳ ሮርስ ሰሰን ካቱቃሞል ዋይቻል ቶስ ኤመተ። **11** እሶና ሂካ ካኮማላረን ጎራታ ገጌላተን፤ ማራጋደ ሰሰን ኤካተን፤ ሃንሱን የሱሳ ሮርስ ሰሰን ካኤካሮ ጎራታ ዋቻታ ግረ። **12** ካፋሰካ ኢዳዶ ካኮኤናአማሮ ካባቦ ባላውን ታሆሬ አሪ፥ የሱሳኮ ኦኦጋልሳታረን ኡሱ ቶስ ጋባላመንጉረን፥ “ካፋሰካ ክታ ካሄመን ሀጌ ኖ ኩን ጎጎኤካንሶ ዶታታ?” አመን። **13** የሱሳ

ኡሱኮ ኦኦጋልሳታራንኮ ላማ ሃ አመ ፋረ፤ “ካታማ ቶሰ ሴዬን፤ ኡላ ታበከ ካሰዳተራ አባዶ ራድ ኤስሎዋ፤ 14 ኡሱ ካኮታባሮ ምን ዴበ ሰዬን፤ ኦዶ ምንኔ፤ ካኦጋልሰሳራ፤ እንኮ ኦኦጋልሳታራን ዋታ ካፋሰካ ክታ ካሄመን ካኮአምራ ካማርት ምን ኤክያ?” አመራ አማ። 15 ኡሱና አሰግቶ ካግሮ ምንኮ ካጉተ ምን ያመና ኤካተ ካግሮ ምን ካባላኣን ቱሰናራ፤ ኤሴና ኤካሳ።” 16 ኡሱኮ ኦኦጋልሳታረና ኤሰ ካታማ ቶሰ ቤን፤ ካመን ዱባ የሱሳ ጎጎአመሮ ካሌሮ ዴን፤ ፋሰካ ክታ ካሄመና ኤካሰን። 17 ኡል ሄመን ካኮላረ ጎራታ የሱሳ ቶሞንኮ ላማን ዋታ ኤመተ። 18 ኣሞ ጉት ግራን፤ “እን ሩምና አማራ፤ እሰን ኦሮኮ ኮ፤ ኢነ ዋታ ካአማራ ኡሱ እን ሮርሰ ሰሰናራ” አመ። 19 እሶና ያደነን፤ እሶና መተመተይ፤ “እን ሌወና?” አማኖ ሀጋአበን። 20 የሱሳና፤ እሰን ቶሞንኮ ላማ ኦሮኮ ኮ፤ ኢነ ዋታ ገነ ያላኣይ ካዳግሮያ። 21 ኤረ ካአባዶ ጋራኬሳ ጎጎጻፋመሮይ ጎይናራ፤ ኤረ ካአባዶ ሮርሰ ካሰሳሮን ሀሱ አባዶትን ጎአመን ኣኔ! ሀሱ አባዶት ሀኡሙላሞን ሄሰ ግረዋ ኢዳረ። 22 አማ ግራን የሱሳ ባቦ ኬሰጉረ ሶማሳተ፤ ኤካኤብሰጉረ ኡሱኮ ኦኦጋልሳታራውን ሰሳ፤ “አህአይ፤ ሂኒዕ ሶኦቴያን” አመራ። 23 ጡጋና ኬሰጉረ ሶማሳተ እሶን ሰሰ፤ ዱባና ኤሰኮ ጣማን። 24 አደና ሃ አመ፤ “ሂክ አሞጋን ማራን ካኡባታሮ ካአማቶ ኢግኬያ፤ 25 እን ሩምና አማራ፤ ዋኖናት ካዋይ ካኡሱብ ካዋይ፤ ጣሞ ታኮጣምሮ ኤሰ አሪ ታጌጊሮን ዱዶ ላኮጣምናሮ።” 26 ማዛሙር ዛማሬን አባባቴንጉረን ደብረዘይት ዋዳም ቶሰ ቤን። 27 የሱሳ ኡሱኮ ኦኦጋልሳታራን፤ “ካፎፌ ባሰናራ፤ እዳድና ዳርአምናራ አማመ ጎጎጻፋመሮ እሰን ዱባ እን ካካይናታን። 28 እየሱን ጎአመን እን ካኮኬ ጎራታ አድ፤ እሰንኮ ጣይ ጋሊላ ቶሰ ሴይናራ።” 29 ጴጢሮሳና፤ “ዱባ ጎሀንዱዱፋተና እን ሱረ ኩ ላኮሀንዱዱፋይናሮ” አመ። 30 የሱሳና፤ “እን ሩምና አማራ፤ ህታ ሄመን ሉካለ ላማ ጋል ሀኦይኖን ግራን፤ አት እን ሴድ ጋል ካካይናታ” አመ። 31 ጴጢሮሳና አደ፤ “ኩኔ ዋታ ካጎይሮ ጎሌና ሱረ ላኮካካይናሮ” አማ ኣሎ አታይሰ አይሰ። ዱባና ኡሱማሌዋ አመን። 32 ኤሰኮ አባባተረን ጌተሰማን ታአማማቶ ባንኤ ቶሰ ሴተን፤ የሱሳና ኡሱኮ ኦኦጋልሳታራን፤ “እን ኣንቴ ሴይ ኤባሮ እሰን ህታኒ ሀማጸ” አመ። 33 ጴጢሮሳና፤ ያይቆባና፤ ያንሳነ ዋታ ኣተ ሴተ፤ ኣሎ ያዳኖና ጫናቃማኖ ሀጋአበ። 34 አዴ፤ “ኤፎትና ታ ጎይን ጌቶ ኣሎ ያደ። ህታኒ ሄሳዴን አታዬን ኦራዬን” አመ። 35 እሶኮ አባራን ሸጺ አመረ ሆረሆረ በቤዱ

ኡል ኦየረ ካዳንዳመ ጎሌ ሀሴ ሳቲ ጎጎሮርቶ ኤባታ፡ 36 “ኣቦኬ! ካመን ዱባ ኩዬን ዳንዳማራ፤ ህታ ታራኮ ጡጋ እንኮ ኬስ፤ እየሱን ጎእመን ፈኢቲ ሀሌኖን ግራን ፈኢታክ ማለ ሀሌዎ” አመ። 37 አባባይ ኡሱ ጎኤማሮ ኡሱኮ እኣጋልሳታረን ሁዱረን ኦግራን ሄለ፤ ጴጢሮሳነ ሃ አመ፡ “ሰሞና፡ ሁዱርተታ? ሳቲ ቶና ሱረ አታይ ናባድ ኦራይን ዋተ? 38 ጫፍቲ ኦርድ ጎጎታቦንኮ አታዬን ኤባየን፤ እያና ኤካተ ግራ፡ ሶ ጎእመን ኦሀራራንያን።” 39 እደና ሴጉጉረ ሆራርጀ ካኤባተሮዋ አደ ኤባተ። 40 ካላም ጎእባባሮ ኢልኦ ኦትሶይ ሁዱሮ እሰላተደ ኦሁዱሬራን ዴ፤ ኡሱን ታአም አባብራና ላኮካሳናየን። 41 ካሴድ ጎራታና ኤመተረ ሃ አመ፤ “ግዳ ሁዱርቲን ፎልሳዬን ግታን? ጎርታ ሌራ! ሳትና ጌተታ፤ ሂክማ፤ ኤረ ካእባዶ ጨባለሳልኮት ገነ ሮርሳም ሰሳምናራ። 42 ክያ፤ ሴኖ፤ እን ሮርሰ ካሰሰናራ ጋባላመራ!” 43 ጎርሰዋ ኡሱ አዬሳ ግራን ቶሞንኮ ላማኮ ኮ ይሁዳ ኤመተ፤ ኡሱን ዋታ ሺፋና ዱላ ኦአባተረን፤ ካቱቃሞል ዋይቻልኮ፡ ሴራ ካሙሴ ኦኣጋልሰሳራንኮና ጃርሶለኮ ካፋራመረ እባዶ ግራ። 44 ሮርሰ ካሰሰናራ ይሁዳ፡ “እን ካእንጋታራ ኡሱያ አባ፤ ኦራ ጌሳ” አማ ጣየ ማላታ እሶን ሰሰ ግራ። 45 ጎጎጌይ ጎርሰዋ የሱሳ ቶሰ ጋባላመጉረ፡ “ካኣጋልሰሳቶ!” አመ እንጋታ፤ 46 እባዶና የሱሳ አበን ሸዬን። 47 ዶሌ አሌን ኦግሬንኮ ኮ ካቱቃሞል ዋይቻቲን ካህንዳረኮት ነበ ጎሰ። 48 የሱሳና ሃ አመ፡ “ሸታ እን እን አብን ሸፋና ዱላ አብቲን ኤማቴን? 49 እርጌቶ ቁሉክ ምን ኦሮ እሰን ኣጋልሰሳ አስኔ ዋታ ታኮግሬይ ላኮአብተቲን፡ እየሱን ጎእመን፤ ማጻፋ ጉዳይን ሂክ ሌ።” 50 ሀሱ ጎራታ ዱባና ኢሰን ባቃተን። 51 ሀወአይቲሳ ጋሼይ ካጎልሰረ ዋዳላት ኮ የሱሳ ዴበ ሰሴታ ግራ። እባዶና ሂካ ዋዳላት ካኮአባረ ጎራታ፡ 52 ኡሱ አደ ጋሸቲሳ ሻፈጉረ ሀወአይ ባቃተ። 53 የሱሳና ቱቃሞን ኦዶናት ካእቦኮክ አዉድ ቶሰ ጌሰን፤ ኤሴና ካቱቃሞል ዋይቻል፡ ጃርሶለና ሴራ ካሙሴ ኦኣጋልሰሳራን ዱባ ኩኩአመን። 54 ጴጢሮሳና ፋክመረ ዴበ ሰሴታ ቱቃሞሉን ኦዶናት ካእቦኮክ አዉድ ታ ጌሮ ሴተ፡ ኤሴና ኦሀንዳሬነ ዋታ ኤለን ጣንጣማ ግራ። 55 ካቱቃሞል ዋይቻልና ታሾንጎ ኡና ዱባ የሱሳ ላጋዲን ካአቶቲሮ ዶተን፤ እየሱን ጎእመን ሄልን ላኮዳንዴን። 56 ኦሞጋና ጣራ ጎአቶተና፡ እዬሰክሶ ኮ ሊን ላኮዳንዴ። 57 ኮኮና ኬጉረን ሃ አማ ጣራ አቶተን፡ 58 “ሂክ፡ ገነ ታአባዶ ካማዳርተቶ ቁሉክ ምን ባሰጉረ ታሴድ አሪ ካካለ ገነ ታአባዶ ካንማዳሮን ግቶ እን ማዳርናራ፡ አማ

ኖ ማልነና።” 59 ሀክና ሌ ግራን አቶናትክሶ ሱረ ኮ ላኮሌ። 60 ካቱቃሞል ወይቻትና እሶ ሆረ ኬ አሌጉረ፤ “ሂኒዕ ኩዬ ጉት ካአቶታራን መያ? ሙን አባባናዋታ?” አማ የሱሳ ሆሳተ። 61 የሱሳ ጎአመን ጫልኢ አመ፤ ኮና ኡሱ ላኮአባበ፤ ቱቃሞሉን አድናት ካአባ ግዳ አደ፤ ካሶማሳሳንቴ ኤረ ካዋ አትታ? አማ ሆሳተ። 62 የሱሳና፤ “እ አንያ፤ ኤረ ካአባዶ መርጌ ታዋይ ሀማጼ ግራን፤ ካዳሩረ ዱማንቻል ኤመታ ድናታን” አመ። 63 ካቱቃሞል ወይቻትና ሳርስኬሳ ፊላ፤ ሃ አመ፤ “ካካለ ኤክ አቶ ዶትሳራ?” 64 “ሀባርኬሳ ማልቴታን፤ ሀያ መ አን ላራ?” እሶና ጎይን ዶትሳራ አማ ዱባና ሀኢ ቶ ሌን ፍርዴን። 65 ሀሱ ጎራታ ኮኮ ሀንጨፈ ቱፋኖ ሀጋአበን፤ በቤዲ ሆጎግሰንጉረን ቶንቶሞይ ባሳ፤ “አላ ሄገሮ አየሰ፤” አማ ግረን። ኦካለና ባላባንጆ ባሳ ጌሰን። 66 ጴጢሮሳ ቱቃሞሉን አድናት ካአባኮክ አዉዲ ኦሮ ምና ታሄገሌን ግራን እሶን አሀንዳሬንኮ ቶ ኤመተዳ፤ 67 ጴጢሮሳ ኤለን ጣንጣማ ካሀማጼሮ ትቸሰ ዴተጉዳ፤ “አት ካናዘረት የሱሳን ዋታ ግቴ” አንተ። 68 ጴጢሮሳ አደ፤ “አት ካአማቶ አን ላኮካሶ፤ ጎርቱን ላኮሻዳሮ” አማ ካካተ። ኤሰኮ ካኮታባራን ጎጫ ቶሰ ሳርዴ ቤ፤ ሀሱ ጎራታ ሉካለ ኦየ። 69 ድይትና ጴጢሮሳ ካኮድያተ ጎራታ ኤሰ ኦአሌረኩን፤ “ሂክ አባዶት ኡናትሶኮ ኮያ” አንቴ አዴ አዬሰ። 70 ኡሱ ጎአመን አደ ግዳና ካካተ። አባራን ጋጭመ ግራን ኤሰ ካአሌራ አባዶ ጴጢሮሳን፤ “አት ካጋሊላ አባዶ ላኖካ አዴሰሳራ፤ ኦግራን አት እሶኮ ኮታ” አመን። 71 ኡሱ ጎአመን፤ “አሰን ካአማታን አባዶት አን ላኮካሶ” አማ ቃንጋኖና አማታኖ ሀጋአበ። 72 ጎርሰዋ ሉካለ ካላም ኦየ። ጴጢሮሳና፤ “ሉካለ ላማ ጋል ኦዋናኮ ሆረን ሴድ ጋል አን ካካይናታ” ካአመረ ካየሱሳ ሃፋራ ቃል አመ። ኤሰኮና ዩሩሩ አመ ኦተ።

15 ባር ባሪኖ ካቱቃሞል ወይቻል ጃርሶለ፤ ሴራ ካሙሴ ኦአጋልሰሳራና ታሾንጎ ኡናን ዋታ ጎርሰዋ ጦዬን አባባቴንጉረን የሱሳ ሽሼንጉሬን ጲላጦሳን ሮርሰን ሰሰን። 2 ጲላጦሳና፤ “አት ካአይሁድ ዋኖታ?” አማ ሆሳተ፤ የሱሳና “አት ጎጎአንተቶያ።” 3 ካቱቃሞል ወይቻልና የሱሳ ካሞጋን አየሰ ሞቴን። 4 ጲላጦሳና፤ “ሙን አባብ ሰሳናዋታ? ሂክማ ካሞጋን አየሰ ኩ ሞተራን” አማ አደ ግዳና ሆሳተ። 5 የሱሳ አደ ኮና ላኮአባበ፤ ጲላጦሳና ማመ። 6 ታባላ አሪ ካሽያመሮ አባዶ ኦሮኮ ኮ ጎሳ ካሆሳተራ አባዶ ጎጎፋራምሮን ካኮሆሳታረ ሴራ ግረ። 7 ሀሱ ጎራታ ሜላን ከኬሳኖና ኔፎ ላጋዳኖይ ኦሽያሜራንኮ ኮ

ካሌራ ባርባክ ካእማማራ እባዶት ኮ ግረ። **8** ጎሳና ጸላጦሳ ቶስ ኤመተጉረ ሴራክሶክ ማለ ሻጋ ጎጎየሎን ኤባተን። **9** ጸላጦሳና፡ “አይሁድኮክ ዋኖ ጎጎፋራምሮን ዶታታን?” አመ ሆሳተ። **10** አላንቲና ካቱቃሞል ዋይቻል የሱሳ ሚጌይ ሮርስ ሰሳኖ አዳሳ ግረ። **11** ካቱቃሞል ዋይቻል ጎአመን ባንኤ ታየሱሳይ ባርባክ ጎጎፋራምሮ ጎሳ ጎጎሆሳሮይ ጎሳ ከኬሴን። **12** ጸላጦሳና አደ ግዳና፡ “ሳርታ ሂካ ካአይሁድ ዋኖ ካእማታን ሞስ ጎጎየሎን ዶታታን?” **13** እሶና ግዳና አደን “ሱይና” አማ ኦኬን። **14** ጸላጦሳና፡ “ሙን? መያ ባስ ኡሱ ካፈለራ?” አመ። እሶ አደን፡ “ሱይና!” አማ ካሆሬኮ አታይሰን ኦኬን። **15** ጸላጦሳና ጎሳ ገኤላይሰን ዶተረ ባርባክ ፋረ፤ የሱሳ አደ ቦጨሰጉረ ጎጎሱዋምሮን ሮርስ ሰሰ። **16** ዋታዳራልና ፕራይቶርዮን ካእማመሮ ዋኖኮክ ምን ቶስ የሱሳ ጌሰን፤ ካሄሰሮ ዋታዳራል ዱባ ራቶ ኩኩይሴን። **17** ሄላክ ሳርስና ሳርስሴን፡ ካላቻ ካኤኤኔ ማማረንጉረን መተኬሳ ጉት ካዬን። **18** ኤሰኮና “ካአይሁድ ዋኖ፤ ሬድና!” አማ ቃጭፋታ ሳጋደን፤ **19** መተኬሳና ዳማይ ባሰን፤ ሀንጨፈና ኡሱ ጉት ቱሬን፤ ግልቢሴን ሳጋደን። **20** ቃጭፋተን አባባተንጉረን ሄላክ ሳርስ ቃረንጉሬን ካኬሳ ሳርስ ሳርስሴን፤ ሱይና ጌሰን። **21** ካአለክሳንድሮስና ካሩፎስ አቦ ሰሞና ካቀሬና እባዶት ኮ ካታማኮ ቃማን ካግሮ ማማንኮ ኤመታ ግራን ኡሱ ማስቃሊ ሰድሰን ሁኖመን። **22** ኤሰኮና የሱሳ፡ ጎልጎታ ታእማማቶ ባንኤ ጌሰን፤ ፋረንና፡ “ቡቀ ታመተ” አማኖያ። **23** ፋልፋልሶን ዋታ ካለዳመሮ ካዋይኒ ጣሞ ሰሰን፤ የሱሳ አደ ዲደ። **24** ኤሰኮና ሱዬን፤ ሳርስኬሳና እሶ መተመተይ መ ግናሮ ማላባይን ኢጣ ሉጉዳተን ሳርስ ሄዴዳመን። **25** የሱሳ ካኮሱዋረን ጎራታ ባርኮ ሳቲ ሴድ ሌተ ግቱ። **26** ታሞቶ ጸፍና፡ “ካአይሁድ ዋኖ” ታእማቶተ። **27** የሱሳኔ ዋታ ሽታ ላማ ኬንጉረን ኮ መርገነ፡ ኮ በተነ ሱዬን። **28** “ኦሜላን ዋታ ቶታመ” አማመ ማጻፋ ቁሉክ ካጻፋመራ ሃፋራ ጉዳተ። **29** ኡሱ ራኔ ካሮራራ ዱባና መተ እኢሳ ጭሎሻክ ሀባር ሀባራ ሃ አማ ግረ፤ “ቱ፤ ዴተነ! ቁሉክ ምን ባሰዴ ታሴድ አሪ ማዳርናራ ካእማተ፤ **30** አላ ማስቃሊኮ ዳግጉደ እስኦታ ሃሳ!” አመን። **31** ኡሱማለና ካቱቃሞል ዋይቻልና ሴራ ካሙሴ ኦአጋልሰሳረን ቃጭፋታ እስእስኦሮ ሃ አመን፤ “ኦካለ ፋይሰ፡ እስኦቴሳ ፋይሳይን ላኮዳንዴ፤ **32** ዲጉነ ጎጎአማኖን ኡሱ ክርስቶሳ ካእስራኤል ዋኖ ጎሌ አላ ማስቃሊኮ ሀንዳገ።” ኡሱነ ዋታ ኦሱዋሜሬና ሂካማሌዋ ጭሎሻክ ሀባር ሀባራሬን። **33** ሳቲ ሌኮ ሀጋእበረ ታ

ሳቲ ሳጋሊ ጌቶ ኡል ዱባ ጉት ሙጉድ ሌ። 34 ሳቲ ሳጋሊ የሱሳ፡ “ኤሎሄ፡ ኤሎሄ ላማ ሰበቅታን?” አመ አዬ፤ ፋረንና “ሄዶኬ፡ ሄዶኬ እን ሙን ኢሴ?” አማኖያ። 35 ኤስ ኦግሬንኮ ኮኮ ሂካ ማለንጉረን፡ “ኤላሳ ኡማራ” አመን። 36 ኤስኮ አባዶት ኮ ቲየ ሴተረ ካኦኮኮታሮ ካዎይኒ ጣሞ አሰፎንጂ ጨጸጉረ፤ ፊቀ ካየጉረ ጎጎጣምሮ የሱሳን ሰሰረ፡ ኦራዬን፤ “አላ ኤላሳ ኤማይጉረ ኡሱ ጎዳግሰሮና አላ ዴኖ” አመ። 37 ኤስኮና የሱሳና አዬረ፤ ኔፎ ቤተ። 38 ቁሉክ ምንኮኮክ ጎጎሎ ኤለኮ ታ ሄገል ጌሮን ፊላመ ባንኤ ላማ ቤ። 39 የሱሳ ሆረ አሌ ካግረ ካቦሎ ዎይቻት ኡሱ ሂካማሌ እዬረ ኔፎቲሳ ብያኖ ካኮድያረ ጎራታ፤ “ሂክ እባዶት ሩምና ኤረ ካዋየ” አመ። 40 ሀሱ ጎራታ ኤባ አሌጉረ ዲያ ካግረ ኮኮ ሄለል፤ እሶ ኦሮኮ ታመግደላ ኡልኮት ማይራመ፡ ክጫርክ ታያይቆባና ታዮሳ አዬ ማይራመ፡ ኡሱማለና ሰሎመን ግረን፤ 41 ሂክ ሄለል የሱሳ ጋለላይ ታኮግረ ኡሱ ዴበ ሰሴታና ሀንዳ ካግረያ፤ አደና እሱን ዎታ ኢየሩሳለም ቶስ ካኤመተረ ካዋጋን ሄለል ካካለና ግረ። 42 ጎራታና ሄመን ላ ካኮሴታረ ጎራታ አይሁድን ታፎልሲ አሪን ታኮባራናን ሄመን ሀክና ታኮኤካሳታራን አሪ ሌተ፤ 43 ካካባጃመ ታሾንጎ ኡና ካሌረና ዎኖናት ካዋ ኦራታ ካግረ ካኦርማትያስ ዮሴፋ ጃቡይ ጲላጦሳ ቶስ ሴተጉረ ካየሱሳ ሬስ ኤባተ። 44 ጲላጦሳና ሂካማሌ ኡሱ ሳማ. ጎዋኖኬሳ ማለጉረ ማመ፤ ካቦሎ ዎይቻና ኡመጉረ፡ ጎጎየኮ አዳላተራ? አመ ሆሳተ፤ 45 ጎዋኖኬሳና ካቦሎ ዎይቻኮ ቁሌሴጉረ ሬስ ዮሴፋን ሰሰ። 46 ዮሴፋና ጋሽ እምነጉረ ሬስ ዳግሰረ ጋሼይ ኤካሰ አባባተረ ኤኤሞኮ ካኦሻመሮ ጉምቢ ኦሮ ቃማለ፡ ታጉምቢ ህኢና ኤኤሞ ካየ ዱድሰ። 47 ካመግደላ ኡልኮት ማይራመና ታዮሳ አዬ ማይራመን የሱሳ ኤቲ ቃማልናራን ዲያ ግረን።

16 አይሁድኮት ታፎልሲ አሪ ሮርተ ግራን ታመግደላ ማይራመን፡ ታያይቆባ አዬ ማይራመን፡ ሰሎመን ሰተንጉረን ሬስ ካየሱሳ ሸቶ ክቢን እምናተን። 2 አልማኮ ታሆራርጄ ታዎጋ አሪ ባር ባሪኖ ጋና አርት ካኮአላቶ ጎራታ ቃማል ቶስ ሴታ ግረን፡ 3 “ቃማል ጉኮ ኤኤሞ ኖን አዮያ ካኦቶቶልሰራ?” አማ እስኦሮ አዬሳ ግረን። 4 ጦቂ አም ጎዴራን ቃማል ጉት ካግረ ካንጂንክ ኤኤሞ ቃማል ጉኮ ኦቶቶሌ ካግሮ ዴን። 5 ቃማል ቶስ ጎጎጌኒ ካህንቃሮ ሳርስ ካሳርሳተሮ ዎዳላት ምና ታመርገነ ካህማጼሮ ዴንጉረን ኣሎ አብሳተን። 6 ኡሱ አደ፤ “አላማንደ ኦሮአብሳቲን፤ እሰን ካዶታታን ካሱዋመሮ ካናዝረት የሱሳያ፤ ህታኒ

ላግሮ፤ ኡሱ ታኮቃማላመረ ባንኤ ህትማ። 7 አየሱን ጎአመን ሴየንጉዴን ኡሱኮ ኦአጋልሳታውና ጴጢሮሳን፤ ‘እስንኮ ጣይ ጋሊላ ቶስ ሴይናራ፤ እስኩ ጎሳሽጌሮይ ኤስ ሄልናታን አማዴን እሱን ሰጋ።” 8 ሄለልና ሀርእና ገጌላታ ቃማልኮ ቤን ባቃተን። አብሳተን ማንኮግሬን ማራን ማዮና ኮና ላኮአዬሴረን።

9 (note: The most reliable and earliest manuscripts do not include

Mark 16:9-20.) አልማኮ ታሆራርጄ አሪ ታዋጋ ባር ጎይኮ ኬ አባባተረ ዱርሳ ቶዶባ ታኮቤሰረ ካመግደላ ኡልኮት ማይራመን ሆራርጀ ሙተ። 10 ኤስና ሴቴጉዴ፣ ኡሱን ዋታ ኦግረን ኦታና ጋዳይ ኦግረን ዴተጉዴ ኡሱ ኔፎ ግራኖና ኤስን ሙታኖ እሱን ሰገተ። 11 ኤስ የሱሳ ጎይኮ ኬራ ኔፎን ግራ ጎአንተና እሱ አደን ላኮአብዳተን። 12 ሂካኮ አባባተረ ኡሱኮ ኦአጋልሳታረን ላማ ጋጣረ ቶስ ብያ ግራን ምዲ ታካለቲ እሱን ሙተ። 13 እሱና አባባተንጉረን ሂካዋ ኦሄሴራውን ሰገን፤ ሀሌዎ ኳሬ እሱና ላኮአብዳተን። 14 ኤስኮና ቶሞንኮ ኮ ባቦ አማ ሀማጸን ግራን የሱሳ እሱን ሙተ፤ ጎይኮ ኬ አባባተ ግራን ካዴራ እባዶ ካሰገሮ አማና ማንኮዋተራን ማራን አብድዋትትሶይና ዋዳናትሶክ ዱዳኖ ቱፋተ። 15 አደና፣ “እላም ዱባ ቶስ ሴይን፤ ዋንጋላና መጣ ዱባን ላላባ፣ አመ። 16 ካአማነራና ካጣማቃመራ ፋይናራ፤ ካአማኖን አደ ፍርዳምናራ። 17 ኦአማናራና ሂካ ማላታል ፈልናራን፤ መገኬይ ዱርሳ ቤስናራን፣ ታኡሱብ ሄኢና አዬስናራን። 18 ሀበሳል ገነትሶይ አብናራን፣ ታላጋዶ ማርዚ ጎጣማና ዱዶ እሱ ላኮሚሮ፣ ገነትሶና ዱኩባሌሳል ጉት ካይናራን እሱና ፋይናራን።” 19 ጎታ የሱሳ ሂካ ዱባ አዬስ አባባተረ ዳሩር ቶስ ቤ፣ መርጌ ታዋይ ሀማጸ። 20 ኤስኮ ኡሱኮ ኦአጋልሳታረን ኤመተንጉረን፣ ማማን ዱባ ሃፋራኬሳ ላላበን፣ ጎታና እሱን ዋታ ፈላ ግረ፤ አጋልሰሰክሶና ባሳክ ማላታይ ሃፋራኬሳ አታይሳ ግረ።

ሉቃስ

1 ካካባጃንተ ተዋፍሎሳ! ኖ ኦሮ ኦፈላመራን ፈሎ ታቱሳቶ ጅርት ኦሞጋን እሶን ካዳንዳመሮ ግታክ ኖን ጻፈን ካዬራን። **2** ህታ ጅርት ኖን ኦሮርሰራን ሆርኮሰኮ ካዬረን እሊ ካዴራን እእቶታረና ሃፋራኬሳ ኦሀንዳሬንያን። **3** ኡሱማሌ እንና አደ ታቲኮ ሆራርጀኮ ኬሰረ ካእመን ዱባ ላላን ካኮቆቆሮ ጎራታ፡ ጅርትና እስደቤ እን ኩን ጎጎጻፍሮን ታኢዳንት ሌተ እን ሙተ። **4** ሂካና እን ካኮንየላራ አት ካእጋልሳተታ እየሰ ካሩም ላኖ ጎእዴሶንያ። **5** ሄሮዶሳ ኡል ካይሁዳይ ዋኖ ካኮሌረ ጌሲ፡ ታኡብያ ኡና ካሌረ ዛክራሳ ካእማማራ ቱቃሞት ኮ ግረ። ኦርቴሳ ኤልሳቤጢና ጎሳ ካእሮንኮትተ። **6** ላማ ዱባና አጃጃ ካጎታና ሴራ ዱባ ኦራተሬን ቱፍ ካላይ ዋይ ሆረ ኦግረን ቁሉኒዕዬን። **7** ሀሌዎ ኳሬ ኤልሳቤጥ ማሰንተደ የሎ ላእባናየን፤ ላማ ዱባና አጃሮመረንየን። **8** አሪ ቶ ዛክራሳ ጅግኬሳይ፡ ዋይ ሆረ ቱቃሞ ሌ ታኮፈላሬ፡ **9** ዋጋ ካቱቃሞልኮክ ማለ፡ ካጎታ ቁሉክ ምን ካዋ ታብረ ኢጣና ኢዮሲን ህጣይ አሳባመ። **10** እጣና ካኮኢዮሮ ጎራታ ጎሳ ዱባ ሳሬ ኤባታረ። **11** ካጎታ ኤርግቻ ታኢጣና ባንኤ ምና ታመርጌን እሌ ኡሱን ሙተ። **12** ዛክራሳና ኮኮድያረ ጎራታ ኔ፤ አሎና አብሳተ፤ **13** ኤርግቻና ጎእመን ኡሱን፡ “ዛክራሳ! አሮአብሳተ! ኤብካ ማልሳመራ፡ ኦርታ ኤልሳቤጥ ባባርትት ኡሙልናታ፡ መገኬሳና አት ያንሳ አምናታ። **14** አት ኡሱ ኤካታኖና ገጌላንጄ ሄላይናታ፡ ካሞጋና ኡሙላማኖኬሳይ ገጌላይናራን። **15** ጎታ ሆረና ኡሱ ካንጅንክ ልናራ። ጣሞ ካዋይኒና ሌረ ካካለ ካሴቲሰሮ ጣሞ ላኮጣምናሮ፤ አየቲሳት ገዴም ኦሮ ግራንቲ እያና ቁሉክ አማጋምናራ። **16** ካእሰራኤል ይሰኮ ካሞጋን ጎታ ሄዶክሶ ቶሰ አባብናራ። **17** ዋዳና ታኡዶላልና ታይሰ ቶሰ፡ ካእጃጃሞን እባዶኮት ዋዳና ቁሉት ቃሩማ ቶሰ አባብናራ። ካኤሜታሮ ጎታውን ጎሳ ጎጎኤካሰሮ ኤላሳ ጉት ካፈለሮ እያና ቁሉኪና ሁናይ ጎታ ሆረ ሰሴይናራ” አመ። **18** ዛክራሳና ኤርግቻን፡ “እን ሂካ ሜይ ማላብናራ? እን ጃርሳያ፡ ኦርትና ጃርትታ” አመ። **19** ኤርግቻትና አባበረ፡ “እን ዋይ ሆረ ካእላሮ ጋብሬለያ፡ ሂካ ካገጌላይሳሮ ሃፋራ ኩን ሰግን እን ዋኮ ፋራመራ። **20** ሂክማ ጎራታኬሳ ኦራተረ ካፈላምናሮ ሃፋራኬ አት አማናታና ማንኮዋተ ማራን፡ ሂክ እን ካሰጌራ ዱባ ታጉዳሮ አት ህኢ ዱድናታ፡ እዬስና ላኮዳንድናቶ” አመ። **21** ሀሱ ጎራታ ጎሳ ዛክራሳ ቁሉክ ምን ካዋኮ እንቤኖን መውን አዳላተሮ ማማን ኦራታ ግረን። **22**

ካኮበያረ ጎራታና ኡሱ እሶነ ዎታ አዬሰን ላኮዳንዴረ። ማላታ ቱሳኖ ኳሬ አዬሰን
 ዳንዳናዋትኮ ካከይ ቁሉክ ምን ካዋ ኦሮ ራጋ ኡሱ ድያኖ አዳሰን። 23 ዛክራሳና
 ካኮሀንዳረ አልማ ካኮጉዳታረ ጎራታ ምንኬሳ አባባተ ሴተ። 24 ኤስኮ አባባተረ
 ኦርቴሳ ኤልሳቤጥ ፋቶ ቶታተ፤ ድግኒ ከኑን ምንክሴይ እስኦትሴ ሰያምሳተ።
 25 “ኤሰና፤ ጎታ ሻጋኬሳይ ቱፋማኖካኬ አባዶ ኦሮኮ ትርን አመረ ሂካ ባር
 ሂካ እየሰ ኢን ፈለራ” አነተ። 26 ኤልሳቤጥ ፋቶ ቶታተደ ድግኒ ታለይ፤ ዋ
 ኤርግቻት ጋብሬላ ጋለላ ታግቴ ናዝረት ካታማ ቶሰ ፋረ። 27 ካኮንፋራመረና
 ሳኒ ታዳወተኮክ ዮሴፋ ካአማራን አባዶትን ታኤራንተተ ሙመት ዳለልትት
 ቶሰየ፤ ሙመት ዳለልትትኮክ መገና ማይራመየ። 28 ኤርግቻትና ኤስ ታግቶ
 ባንኤ ቶሰ ታበረ፤ “እት ሰኖ ታኮአማጋንተታ፤ ኖጎዳ ኩን ሀሌቶ! ጎታ ኩኔ ዎታ
 ግራ፤ አትና ኣሎ ታሶማሳንተታ” አመ። 29 ማይራመና አዬስኬሳ ኣሎ ነይተደ፤
 ህት ምስት ኖጎዳታ? አማ ቆፓኖ ሀጋአብተ። 30 ኤርግቻትና ኤስነ ሃ አመ፤
 “ማይራመ! አት ዋይ ዶሌ ጋሻና ሄላተታ አሮአብሳተ። 31 ሂክማ፤ ቶታይናታ፤
 ኤረ ባባርትትና ኡሙልናታ፤ መገና የሱሳ አምናታ። 32 ኡሱና ካንጂንክ ልናራ፤
 ዱባንኮ ጦክቅ ካአመ ኤረ ካዋና አማምናራ፤ ጎታ ሄዶና ኣቦኬሳክ ካዳወተ
 ኮርፍንጀ ኡሱን ሰሰናራ። 33 ሳኒ ታያይቆባ ጉት ጅሩ ጅሮማን ሬድናራ፤
 ዋኖናትኬሳ ጋቾ ላኮአቦ።” (aiōn g165) 34 ማይራመና ኤርግቻትነ፤ “እን
 ሙመት ዳለልትትያ ሂክ ምሲ ሊን ዳንዳራ?” አነተ። 35 ኤርግቻትና አባባ ኤስነ
 ሃ አመ፤ “አያና ቁሉክ ኩ ጉት ዳግናራ፤ ዱባንኮ ጦክቅ ካአመ ሁና ካዋና ኩ ጉት
 ግርናራ፤ ሃንሱን ካኡሙላምናራ ይትት ቁሉክ ኤረ ካዋ አማምናራ። 36 ሂክማ፤
 ፋልታታ ኤልሳቤጢና ዶኡማኦሮይ ኤረ ባባርትት ቶታተታ። ማሴና ታአማንተቴና
 ድግኒ ታለይ አብተታ፤ 37 ዋዉን ካሌኖን ላግሮ።” 38 ማይራመና፤ “እን
 ታጎታ ድይያ፤” “ሃፋራካክ ማለ ሀሌዎ” አነተ። ኤስኮና ኤርግቻትና ኤስኮ
 ካለቤ ሴተ። 39 ማይራመና ሀሱ ጎራታ ሳንተ ኬተደ ዋዳሚልክ ኡል ታይሁዳ
 ካታማ ቶ ቶሰ ሴተ። 40 ምን ካዛክራሳ ቶሰ ታብተደ ኤልሳቤጢና ኖጎዳ
 አተ። 41 ኤልሳቤጢና ታማይራመ ኖጎዳ ካኮማላተ ጎራታ፤ ይትትና ገዴም
 ኦሮ ኣኤ፤ ኤልሳቤጢና አያና ቁሉክ አማጋንተ። 42 ያየትሴና ጦቂሰጉደ ሃ
 አነተ፤ “እት ሄለል ኦሮኮ ታሶማሳንተታ፤ ገዴምታኮ ካኡሙላምናራ ይትትና
 ካሶማሳመያ። 43 አፎ ጎታኬት አዬ እን ቶሰ ኤሜይና እን አዮያ? 44 ሂክማ፤

ኖሳዳታት ያየ ነበቱይ ጎሳታብቲ ገዳምቲይ ኦሮ ካግረ ይትት ገጌሎይ ኣኤ። 45
 ጎታ ዶለኮ ካፋራመራ ሃፋራ ጉዳይናራ እንተ ታእማናተ ኤስ ታሶማሳንተታ!” 46
 ማይራመና ሃ እንተ፤ “ኔፎት ጎታና ጦቂ ጦቂኢሳታ። 47 እያናክና ካፋይሳሮ
 ዋኬይ ገጌላታራ። 48 ኡሱ ድይ ቱሳክ የራን ዳራ፤ ህታ እርኮ ሀጋእበረ አላታን
 ዱባ እን ታሶማሳንተ አምናታ። 49 ካእቲ ካሌራ ኡሱ ካንጅንክ እየሰ ኢን ፈለራ
 መገኬሳና ቁሉክያ። 50 ነኔኤይሳታኖኬሳ ኡሱ ኦኦብሳታራኑን፤ አላታንኮ ታ
 አላታን ጌሮ ግርናራ። 51 ሁናካከሳይ ፈሎ ኦኦቲ ፈለራ፤ ዋዳናታትሶኮት ቆፋ
 ኦኮራራና ዳረኤራ፤ 52 ሞትጆል ኮርፍንጃልኮ ዳግሰራ፤ እሰ ኦየራሳታራና
 አደ ጦቂኢሰራ፤ 53 ኦኡኤራና ካኢዳን እየሰ ባራርሰራ፤ ዱሬሳል ጎእመን
 ሀላል ጋፋረራ፤ 54 ነኔኤይሳታኖካከሳ ሻዳ፤ ድይልኬሳ እስራኤል ጋርጋረራ፤
 ህክና ኦዶላልካን ጎሳኤሰሮ አብራመና ሳኒታተሳን ካእመሮ ጅሩ ጅሮማን
 ኦርንያ።” (aiōn g165) 56 ማይራመና ድግኒ ሴድ ታሌቶ ኤልሳቤጥ ዶሌ
 አዳላተጉደ ምንካክሴ አባባተ። 57 ኤልሳቤጢና ታኡሙላ አሪ ጌተ፤ ኤሪ
 ባባርትት ኡሙልተ። 58 ኦላትሰና ፋልክሰ ጎታ ኤሰን ካእቲ ነኔኤይሳታኖ ካየለሮ
 ማለንጉሬን፤ ገገሎኦትሰና ኤሰ ዋታ ገጌላተን። 59 ይትት ታኮኡሙላመረ አሪ
 ታሰዴድ ይትት ሀማጽሲን ኤመተን፤ እቦኬሳክ መገ ዛክራሳ እምን ዶተን፤ 60
 አዋተሳ አደ “ላኮሃዮ ያንሳ እማሚን ዶትሳራ” እንተ። 61 እሶና “ፋልካካኮ ሂካ
 መገ ካኡማማራ ማዮና ላኮግሮ” እመን። 62 እቦኬሳ መገ እዮ እም ቤሰን
 ዶታሮ ማላታይ ሆሳተን። 63 ኡሱና ካኮጻፍራን ሳሌዳ ጎሳሰሰናውን ኤባተረ፤
 “መገኬሳ ያንሳያ” እመ ጸፈ፤ ዱባና ሂካ እዬንሳ ሳደ። 64 ጎርሰዋ ህኢቲሳ
 ባናንተ፤ ኤፊብኬሳና ፋራመ፤ ዋና ጋላታ እዬሳኖ ሀጋእበ። 65 ኦላትሰ ዱባና
 አብሲ እማጋንተ፤ ሂክ እየሰ ዱባ ዋዳሚልክ ኡል ካይሁዳ ዱባ እዬሳመ።
 66 ሂካ ካማለ ዱባና፤ “ሂክ ይትት ሞሰ ሊን ሌራ?” እማ እየሰ ዋዳናታትሶይ
 አባተን። ገነ ታጎታ ኦግራን ኡሱ ዋታ ግቲ። 67 ካያንሳ ኦዶ ዛክራሳ እያና ቁሉክ
 እማጋመረ ሃ እማ ሄገሮ እዬሰ፤ 68 “ካእስራኤል ሄዶ፤ ጎታ ሀሶማሳመ፤ ኡሱ
 ካኮንኤመተራ ጎሳ ጋርጋርና ፋይሲንያ። 69 ድይኬሳክ ታዳወተ ሳኒኮ፤ ካፋይሳሮ
 ካእቲ ኬሰራ፤ 70 ህክና ሆርኮ ቁሉኒዕ ኦሄገሮልኮት ህኢ ኡሱ ጎሳኤሰሮ፤
 (aiōn g165) 71 ፋይናና ዱናጆልካንኮና፤ ኖ ካድዳሮኮት ገነኮ ጎሳኤሰንያ፤ 72
 ኡሱ ሂካና ካኮንየለራ ኦዶላልካኑን አብዱ ካታበሮ ሻጋ ቱሲና፤ ቁሉኒዕ እማቶ

ሻድሲን፡ 73 አቦካን አብራመና ኦታበሮ አማቶ ሻዲን፡ 74 ዲናጆልካንኮት ገነኮ ቤሰረ አብሰ ካላይ ኡሱን ጎሳህንዳይኖን፡ 75 ጌሰካካን ዱባ ቁሉማና ሩሚ ኡሱ ሆረ አሊሰንያ፡ 76 አደ አት ይትት፡ ዱባንኮ ጦቂ ካእመ ሄገሮት ካዋ አማምናታ፤ ካጎታ ራ ኤካሰን ኡሱ ሆረ ሴይናታ፤ 77 ጨቦክሶኮ ሀሄሶ አማማኖ ሄላታናኮ ካከይ፡ ጎሳን ካፋይና ማላባኖ ጎሳሰሳምሮ፡ 78 ሄዶካንክ ካኢዳን ነኔኤይሳታናኮ ካከይ፡ ታባባርሴ ታፋይና አሪ ዳሩርኮ ኖየን ቤተ፤ 79 ሀክና ሙጉዲ ኦሮ ኦግራውና ሆሰ ታጎይ ኦሮ ኦግራውን ጎሳህንቃይሰሮና፡ ሉቃኦታንና ራ ካኖጎዳ ቶሰ ጎሳቃጆልሰሮንያ፡” 80 ይትትና ጂናተ፤ እያና ቁሉክና እታተ፤ ጎሳ ካእሰራኤሊን ዲዳ ቤ ታሙተረ አርኮ አባባተረ ጋድ ግረ፡

2 ሀሱ ጌሲ፡ ቃላዳኬሳክ ጎሳ ዱባ ጎሳቶታምሮና መገክሶ ጎሳማዛጋባምሮ ካሮም ዋኖ አወግሰጦሰኮ አጃጃ ቤ፡ 2 ሀክና ቀረነዮሰ ካሶርያ ኡልኮክ ሞት ሌ ታኮግረ ካሆራርጄ ጎሳኮክ ቶታማኖ ግረ፡ 3 ሃንሱን አባዶ ዱባ ማዝጋባሚን ካታማ ታቴሳታቴሳ ሴተ፡ 4 ዮሴፋ ዳወተን ኤነክ ፋል ማንኮሌረ ማራን፡ ጋለላ አወራጃይ ታግቶ ናዝረት ካታማኮ ኬጉረ ዳወተ ታኮሙላመረ ካታማ ቤተለም ታአማራን ታይሁዳ ካታማ ቶሰ ቤ፡ 5 ማዝጋባሚን ኤሰራ ሴተን፤ ፋቶ ቶታተ ታግቱ ማይራመና ኤሰ ካኤራተረን ዋታ ሴተ፡ 6 ኤሰ ታቤተለም ካታማይ ግራንቲና ታኡሙላ አሪ ጌተ፤ 7 ኤረ ባርክ ካሌሮ ባባርትትና ኡሙልተ፤ ሆጮይና ማማርተደ፡ ማርት ታኮፎልሳቶ ባንኤ ሄላይን ማንኮዋተን ማራንቱን አወድ ካሳየት ኦሮ ሁዱርሰ፡ 8 ኡሱ ኡሊ ሄመን ግድ ኦራታ ዲዳ ካባራረ ካፎፈል ግረ፡ 9 ካጎታ ኤርግቻና ደራኣ ኤመተረ እሶ ዶሌ አሌ፤ ታጎታ ካባጃ እሶን ማራሙረ ሀንቃይሰ፤ አብሰ ታኦቲ እሶ አብተ፡ 10 ኤርግቻ አደ እሶን ሃ አመ፤ “አሮአብሳቴን! ጎሳ ዱባን ገጌሎ ኦኦቲ ታሌቶ ኦዱ ታኢዳን አን አተ ኤመየራ፡ 11 ህታር ታዳወተ ካታማይ ካፋይሰራ እሰኑን ኡሙላመራ፤ ኡሱና ጎታ ክርሰቶሳያ፡ 12 ሂክ እሰኑን ማላታ ሀሌዎ፤ ክጫርክ ይትት ሆጮይ ማማራመረ አወድ ካሳዬ ኦሮ ሁዱረ ካግሮ ሄልናታ፡” 13 ደራኣ ኤርግቻትነታ ካሞጋን ካዳሩረ ኤርግቻልና ዋታ ሙተ፤ ዋና ጋላታ ሃ አመን፤ 14 “ካባጃ ኤለ ዳሩሪ ካግሮ ዋወን ኖጎዳና ኡሱ ካጌላታሮ እባዶን ኡሊ ሀሌቶ!” 15 ኤርግቻት እሶኮ አሳባመ ዳሩር ቶሰ ካኮበያረ ጎራታ ኦፎፌ፡ “ጎታ ኖን ካቱሰሮ ሂካ ሃ ካሌሮ እየሰ ድን ቤተለም ቶሰ ሴና” እሰእሰኦሮ ሃ አመን፡ 16 እሶና ሳመን

ሴተን፤ ማይራመና ዮሴፋ፥ ይትትና አዉድ ካሳየት ሁዱረ ካግሮ ሄሌን። 17
 ካኮደያሬን ጎራታና፥ ኤርግቻ ጋራ ካይትትኮክ እሶን ካሰገሮ እዳሰሰን ሰገን። 18
 ሂካና ካፎፌ ካሰገሮ እየሰ ካማለ ዱባ ሳደ። 19 ማይራመ ጎአመን ሂካ ዱባ
 ዎዳናትሴይ አባተደ ቆፋ ገበሳታና ኦራታ ግቲ። 20 ኦፎፌ እየሰ ዱባና ኤርግቻት
 ጎሰገሮክ ማለ ሌ ሄላኖይና፥ ካማለራና ካዳራን ዱባ ማራንቱን ዋ ካባጃና
 ጋላታ አባባተን። 21 እሪ ሰዴድ ሌተደ ካኮሀማጽሳምራ ጎራታ ጎሰገሮ ፋቶ
 ቶታማናኮ ሆረን ኤርግቻ ካቤሰሮ መገ “የሱሳ” አማመ ኡማመ። 22 ሴራ
 ካሙሴ ማለ ካኮሙጭአማራን አልማ ካኮጉዳታረ ጎራታ፥ ዮሴፋና ማይራመ
 ይትት ጎታዉን ሰሰን ኢየሩሳሌም ቶሰ ኣተን ቤን፤ 23 ሀክና ሴራ ካጎታይ፥ “ባባር
 ካሌራ ባርክ ኤረ ዱባ ጎታዉን ካቁሎየ ልናራ” አማመ ጎሰጸፋመሮ ፈሎሀይሲና፥
 24 እደና ሴራ ካጎታይ፥ “ዋኖሰ ላማ ጎርቱን ላማ ካአራቤ ጨጨተል ጃርሶ የል
 ሰሲንዮ።” 25 ሀሱ ጎራታ ዋ ካአብሳታረና ዋይ ሆረ ሩሚ ካግረ ሰሞና ካአማማረ
 እባዶት ኮ ኢየሩሳሌም ግረ፤ ኡሱና ካእስራኤል ፋይና ካኦራታረና እያና ቁሉክ
 ኡሱ ጉት ካኮባሬረ እባዶትዮ። 26 እደና ካፋይሳሮ ክርስቶሳ ጎታይ ካሸግዳመሮ
 እንዴን ካጎኖን ላና እያና ቁሉክ ኡሱን ሙተ ግረ። 27 ኡሱና ሀሱ ጎራታ እያና
 ቁሉክኮክ ገበሳናይ ቁሉክ ምን ካኤብ ቶሰ ታብ፤ ዮሴፋና ማይራመና ሴራክ
 ማለ ጎሰካሳናየኒ ኡሱን ካዶትሳሮ ፈልን ይትት የሱሳ አበን ካኮታቤረን ጎራታ፥
 28 ሰሞና ይትት ቆጶተረ ጌግዮተሳ አባተ፤ ዋና ጋላታ ሃ አመ፤ 29 “ጎታኬ፤ አማቶ
 ጎሰጉድሰቶክ ማለ ግዳ ድይካ ኖሳዳ ጋልሰ፤ 30 ፋይናካ እልኦ ኦተይ ዴራ፤ 31
 ኡሱና እባዶ ዱባ ሆረ እት ካኤካሰቶያ፤ 32 አይሁድ ካሌኖቱን ሩም ካቱሳርያ፤
 ጎሳ ካእስራኤልና ካባጃያ።” 33 ኣቦኬሳና ኣየቴሳና ኡሱ ማራን ካሰጋመሮ
 እየሰ ማማን። 34 ሰሞናና እሶ ሶማሳተ፤ ኣየቴሳ ማይራምኔ ሃ አመ፤ “ሂክ
 ይትት እስራኤሊ ካሞጋኑን ባኖዉና ፋያኖዉን ኣላንቲ ጎሰሌሮ፥ ኡሱ ኦድዳራዉን
 ማላታ ጎሰሌሮ ሹማመራ፤ 35 ካሞጋንኮት ቆፋ ታዎዳና ጎሰቱሰሮንያ፤ ጋዳ ሺፋ
 ኣን ኔፎታ ኤግናራ።” 36 ኡሱማለና ኡና ታእሴርኮ ታሌተቴ ታፋኑኤል ኤረ፥ ሃና
 ታአማማተ ሄገሮት ኤሰ ግቲ፤ ኤሰና ኣሎ ጃሮንተ ግቲ፤ ዴለሉማን ካኬሳንተተ
 ኤንተር ዎታ ጌሰ ቶዶባ ታሀማጽተተታ። 37 ጌሰክሰና ሰዶታምኮ እፋር ታ
 ሌሮን ጋልታንቴ ሌተ እሪን ሄመኔ ቁሉክ ምን ካኤብኮ ሀሄሶን አጋቡይና ኤቢ
 ዋዉን ሀንዳ ጋልታንቴ ሌተ አዳላተ። 38 ሀሱ ጎራታና ጋባላንተደ ዋ ጋላቲተ፤

እየሩሳሌምኮክ ዋዶ ኦሪታሬን ዱባን ዪትትኮክ እዬስ። **39** የሴፋና ማይራመና ካጎታ ሴራይ እጃጃ ካስሳመሮ ዱባ ካኮጉድሳሬን ጎራታ፥ ጋሊላ እዉራጃይ ታግቶ ናዝረት ካታማ ቶስ አባባተን። **40** ይትትና ጂናታና አታታ ሴተ፤ ቃሩማ አማጋመ፤ ሰኖ ታዋ ኡሱ ጉት ግቴ። **41** የሱሳ ኦኡሙለራና ጌስ ጌስ ፋስካ ባላዉን እየሩሳሌም ቶስ ብያንን። **42** ኡኑና ጌስ ቶሞንኮ ላማ ካኮላረ ጎራታ፥ ጎጎካሳኒ ባላ ካባጅን ቤን። **43** ባላ ጉድሴን አባባተረን፥ ምንክሶ አባባታ ግራን፥ ይትት የሱሳ እየሩሳሌም ሄሰ፤ ኦኡሙለራና ሄሳኖኬሳ አደን ላኮአዳሰረን። **44** እሶነ ዎታ ካግሮ ኣን ሌረ፥ አሪ ቶክ ራ ሰሴተን አባባተረን አደን ፋልክሶኮና እሶ ኦጌላታሬን ዶለኮና ዶታኖ ሀጋአበን፤ **45** ዶተን ካኮዋታሬን ጎራታ ዶታና እየሩሳሌም ቶስ አባባተን ሴተን። **46** አሪ ሴድኮና አባባተረን ኦአጋልሰሳረን ጠኤ ሀማጼረ እሶ ማላና ሆሰን ሆሳታ ግራን ቁሉክ ምን ካኤብ ኦሮ ኡሱ ሄሌን፤ **47** ኦማሌራን ዱባ ሻዳኖኬሳይና አባብኬሳይ ሳዳ ግረን። **48** ኦኡሙለራና ካኮደያረን ጎራታ ማማን፤ አየቴሳና፥ “ኡኑኬ፤ መዉን ኖ ሃ የልተ? ኣቦካና እንና ያንዴ ኖ ኩ ዶታ ግኔ” ሃ እንተ። **49** “ኡሱና እን ሙን ዶታቴን?” “ኣቦኬክ ምኒ ግርን ካዶትሳሮ ላኖ ላኮካሳንያ?” አመ። **50** እሶና ኡሱ ካአዬሰረ አየሰ ላኮሻደረን። **51** ኤሰኮና ራቶ ናዝረት ቶስ ዳጌን፤ እሶና እጃጃማ ግረ። አየቴሳና ሂካ አየሰ ዱባ ዋዳናትሴይ አባተ ግቴ። **52** የሱሳና ቃሩማና ጅፋ ጂናታ ግረ፤ ዋይና አባዶ ሆረ ኡሱ ጋሻና አባናየ።

3 ካሮም ዋኖ ጥባርዮሳ ካኮሬደረ ጌስ ካቶሞንኮ ከን፥ ካጸንጢዮሳ ጰላጦሳ ካይሁዳ ሞት ሄሮዶሳ ካጌልላ ሞት ሌ ታኮግረ፥ ኡሱማሌ አቢኬሳ ፍልጶሳ ካኢጡርያሰና ካጢራኮንዶስ ሞቲ፥ ልሳንዮሰና ካአብላንሳ ሞቲ ሌ ግራን፥ **2** ሃናና ቀያፋ ቱቃሞኮክ ዋይቻ ሌን ግራንቲ፥ ኤረ ካዛክራሳ ያንሳን ዋ ቃሉላቶክ ኡሊ እዬስ። **3** ኡሱና ጨቦክሰን ሀሄሶ ጎጎአማምሮን ጨቦኮ ካኮጉላ ጋላን ጥንቃታ ጣማቃ ዮርዳኖሲ ላጋ ማማኒ ካግሮ ጎሳ ዱባን ኤመተ። **4** ህክና ካሄገሮ እስያሳኮክ ማጻፋይ ሃ አመ ካጻፋመሮ ማሌየ፤ “ጋድ ሃ አማ ካኢያሮ እባዶትኮት ያየ፤ ‘ካጎታ ራ ኤካሳ ሰሴታንና ቱኩል የላ፤ **5** ላጋ ዱባ አማጋምናራ፤ ዋዳምና ጋጋጆል ዱባ ሁስ አምናራ፤ ካዎጫጫመራ ራ ቱኩል ኡምናራ፥ ካርሻሽ ካአመራ ሙጭ አምናራ፤ **6** ሳኒ ታአባዶ ዱባ ፋይና ካዋ ድናታ።” **7** ያንሳና ገነቲሳይ ጣማቃምን ካቤሮ እባዶን ሃ አማ ግረ፤ “እስን ይሰ ካሀበሳ

ታሌማቶ ኤንገ ታዋኮ ጎጎባቃታኑን አዮያ እስኩን ራ ካቱሰ? **8** ጎርታ ጨቦኮ ጉላ
 ጋላ፥ ጨቦኮ ጉላ ጋላኖክሰን ኦቱሳራን ፈሎ ፈላ፤ አደና ዋዳናትሰኒ ሕብራመ
 አቦካን ግሮዋ አማኖና አሮሀጋአብተን፤ ዋ ሂካ ኤሌሞልኮ አብራመን ሳኒ ኬሰን
 ካዳንደሮ ላኖ እን እስኩን ሰጋራ። **9** ግዳ ማሳር ጋ ሄገልኮ ጎሰ ሉጉድን ኤካተታ፤
 ታሊዳንት ኤል ካዱባሞን ጋ ዱባ ጎሳሞረ ኤለኒ ሻፋሞናራ።” **10** ጎሳና፡ “ሀያ
 ኖ መ የልና?” እመን ያንሳ ሆሳተን። **11** ያንሳና “ሳርሰ ላማ ካለባ ኮና ካልክን
 ሀሰሶ፤ ባቦ ካአባና ኡሱማሌ ሀየለ” እመ እሶን አባባ። **12** ቃራጣ ኦኩኩይሳሬና
 ጣማቃምን ኡሱ ቶሰ ኤማተረን፡ “ካእጋልሰሳቶ! ኖ እድ መ የልና?” እመን። **13**
 “ኡሱና ካአጃጃንቴታንኮ ሮርሰ ቃራጣ አሮኩኩይሶን” እመ። **14** ዋታዳራልና “ኖ
 እድ መ የልና?” እመን ሆሳተን፤ ኡሱና፡ “ማካዮክ ማራጋደና ሁና አሮሳንቴን፤
 አባደና ጣራይ አሮሞትቴን፤ ዳሞዛክሰን እስኩን ሀሌዎ አመ።” **15** ሀሱ ጎራታ
 ጎሳ ክርሰቶሳ አብዱ ኦራታ ግረ፤ ሃንሱን ያንሳ “ሂክ አባዶት ክርሰቶሳ ሌወና?”
 አማ ዱባ ዋዳናትሶይ ቆፓ ግረን። **16** ያንሳ ዱባዉን ሃ አመ አባባ፤ “እን እስን
 በከይ ጣማቃራ፤ እየሱን ጎእመን እንኮ ካአቲ ኤመይናራ፤ እንና ከፈሮኦቴሳኮክ
 ሻኖ ፋርን ካዳንደሮ ላኮዮ፤ ኡሱ እያና ቁሉክና ኤለኒ እስን ጣማቅናራ፤ **17**
 አዱማል ባሰን ዳርጋማ ጎታራይ ኦሮ ክበኒ ታኮሀርቂሳራን ዱጉድ ገነቴሳ ግታ፤
 ጋላባ አደ ታባኖን ኤለኒ ጉብናራ።” **18** ኡሱማለና ያንሳ ራ ካሞጋነ ጎሳ ጎርሳ
 ኦዱ ታሊዳን ሰገ። **19** እየሱን ጎእመን ያንሳ፡ ካይሁዳ ሞት ካሌረ ሄሮዶሳ አደ
 አቢኬሳት ታፍልጶሳ ኦር ሄሮድያዳ አታታኖና ካካለ ካሜላን ካሞጋን እየሰ
 ፈላኖይ ኡሱ ሀድሰ። **20** ሄሮዶሳ ሂካ ዱባ ጉት እደረ፡ ያንሳ ምን ካሻኖ ታብሰ።
21 ጎሳ ዱባ ካኮጣማቃማረ ጎራታ የሱሳና ጣማቃመ፤ ኤባታ ግራንቲና ዳሩር
 ባናንተደ፡ **22** እያና ቁሉክና አራብ ኣን ኡሱ ጉት ዳገ፤ ዳሩርኮና፡ “እን ካጌላታራ
 ኤረክ አትታ፤ ኩዬ ገጌላታራ” ታእማታ ያየ ኤመተ። **23** የሱሳ ሀንዳኖ ጎሀጋአባረ
 ጌሰ ሶንደሞየ፤ ጎሳን የሱሳ ኤረ ካዮሴፋ ኣን ሌረ፤ ኡሱ ዮሴፋና ካኤል ኤረ፤
24 ካማት ኤረ፡ ካለው ኤረ፡ ካምልክ ኤረ፡ ካዮና ኤረ፡ ካዮሰፍ ኤረ፤ **25**
 ካማታትዩ ኤረ፡ ካአሞጽ ኤረ፡ ካናሆም ኤረ፡ ካኤሰልም ኤረ፡ ካናገ ኤረ፤ **26**
 ካማእት ኤረ፡ ካማታትዩ ኤረ፡ ካሰመይ ኤረ፡ ካዮሴፋ ኤረ፡ ካዮዳ ኤረ፤ **27**
 ካዮናን ኤረ፡ ካሬሰ ኤረ፡ ካዘሩባበል ኤረ፡ ካሴላትያል ኤረ፡ ካነር ኤረ፤ **28**
 ካምልክ ኤረ፡ ካሃድ ኤረ፡ ካዮሳሰ ኤረ፡ ካቆሳም ኤረ፡ ካኤልሞዳም ኤረ፤

ካሌር ኤረ፡ 29 ካዮስኢ ኤረ፡ ካኤልእዘር ኤረ፡ ካዮራም ኤረ፡ ካማጣት ኤረ፡ ካለው ኤረ፡ 30 ካሰሞን ኤረ፡ ካይሁዳ ኤረ፡ ካዮስፍ ኤረ፡ ካዮናም ኤረ፡ ካኤልያቀም ኤረ፡ 31 ካሜልያ ኤረ፡ ካማይናን ኤረ፡ ካማጣት ኤረ፡ ካናታን ኤረ፡ ካዳውተ ኤረ፡ 32 ካኢሰይ ኤረ፡ ካኢዮበድ ኤረ፡ ካቦኤዘ ኤረ፡ ካሰልሞን ኤረ፡ ካነኢሶን ኤረ፡ 33 ካእምናዳብ ኤረ ካአራም ኤረ፡ ካአሮን ኤረ፡ ካኤሰሮም ኤረ፡ ካፋሬስ ኤረ፡ ካይሁዳ ኤረ፡ 34 ካያይቆባ ኤረ፡ ካይሳቃ ኤረ፡ ካኡብራህመ ኤረ፡ ካታራ ኤረ፡ ካናኮር ኤረ፡ 35 ካሰሮግ ኤረ፡ ካራጋዉ ኤረ፡ ካፋልቅ ኤረ፡ ካእበር ኤረ፡ ካሳላ ኤረ፡ 36 ካቃይንም ኤረ፡ ካእርፋክሰድ ኤረ፡ ካሰም ኤረ፡ ካኖሄ ኤረ፡ ካላመህ ኤረ፡ 37 ካማቶሳላ ኤረ፡ ካሄኖክ ኤረ፡ ካያረድ ኤረ፡ ካመላልኤል ኤረ፡ ካቃይናን ኤረ፡ 38 ካሄኖክ ኤረ፡ ካሰት ኤረ፡ ካአዳመ ኤረ፡ ካዋ ኤረ፡፡

4 የሱሳ እያና ቁሉክ እማጋመረ ካዮርዳኖስ ላጋኮ ጎጎአባባቱ እያና ቁሉክ ጋ ቶስ ኡሱ ቃጃልሰ፤ 2 ኤሰኮና አሪ አፋርታም ዱርሳ ጫፋመ፤ ሂና አርጃል ኦሮ ኮና ሀኦምን አዳላተረ ታጋቾ አሪ ኡኤ፡፡ 3 ዱርሳና አላ “ኤረ ካዋ ጎሌተ ሂካ ኤኤም ባቦ ጎጎሌሮ አጃጂ” አመ፡፡ 4 የሱሳና፡ “እባዶ ባቦ ካላሊ ላኮግራሮ፤ እማመ ጻፋመራ” አመ ኡሱን አባበ፡፡ 5 ኤሰኮና ዱርሳ ቶ ጦቂ ታኦነተ ዋዳሚ የሱሳ ኮርሰጉረ ካአላም ዋኖላል ዱባና ኮይክ ቱስ፤ 6 ኤሰኮ አባባተረ “ሂካ ዋኖላልኮክ ኦዶትና ካባጃ ዱባ እዬን ሰሳንተታ፤ እንና ካጌላታሮን ማንኮሰሰናሮ ማራን ኩዬን ሰሰናራ፤ 7 ሃንሱን አት እዬን ጎሳጋደ ሂክ ዱባ ካካ ሌሮዋ” አመ፡፡ 8 የሱሳና አባበረ፡ “ጎታ ሄዶ ካዉን ሳጋድ! ኡሱ ካላል ሄዶይሳ” እማመ ማጻፋ ቁሉክ ጻፋመራ አመ፡፡ 9 ኤሰኮና ዱርሳ የሱሳ ኢዮሩሳለም ቶስ ገሰረ ቁሉክ ምን ካዋ ጉት ብርጠ ኦልሰረ፡ አላ ኤረ ካዋ ጎሌተ እሲ ሄገልዳ ፍር እም እ አመ፡፡ 10 አላንቲና ሃ እማመ ማጻፋ ቁሉክ ጻፋመራ፤ ኩ ጎጎኡራዉን አደ፡ “ዋ ኤርግቻል ኩ ማራንቱን አጃጃራ፤ 11 ሉቃኦታና ኤኤምይ ጎጎሀንዱዱፋኖንኮ ገነትሶይ ኩ አብ ኬሰራንዋ” አመ፡፡ 12 የሱሳና አባበረ፡ “ጎታ ሄዶካ አሮጫፍተ እማመ ማጻፋ ቁሉክ ጻፋመራ” አመ፡፡ 13 ዱርሳ የሱሳ ጫፌ ጉድስ አባባተረ ካካለ ካኤካሮ ጎራታ ታሄላሮ ኡሱኮ ካለቤ፡፡ 14 የሱሳና እያና ቁሉክኮክ ሁናይ ጋሊላ ቶስ አባባተ፤ አታንኬሳና ጎቦቢ ካግሮ ኡል ዱባ ማልሳመ፡፡ 15 ኡሱና አይሁድኮክ ምን ካኤብ አጋልሰሳ ግረ፤ እባዶ ዱባና ኡሱ ጋላታ ግረ፡፡ 16

ኤስኮና ታኮጅናተሮ ካታማ ናዝረት ቶስ ኤመተ፤ ዋጋክሶክ ማለ አይሁድን ታፎልሲ አሪ ምን ካኤብካክሶ ቶስ ታበ፤ ቁሉክ ማጻፋ ናባብን ኬ አሌ።

17 ካሄገሮ እስያሳኮክ ካዲባመሮ ማጻፋ ኡሱን ሰሰን፤ ካዲባመሮ ማጻፋና ካኮፋፋሮ ጎራታ ሃ አማምተ ታጻፋንተቶ ባንኤ ሄለ፤ **18** “ካጎታ አያና እዬ ጉት ግራ ሀየሳሉን ዋንጋላ ጎሳላብሮን፤ ኡሱ እን ሸግደራ ኦሻማራውን ፋራማኖ፤ አልኦ ኦደያኖቱን ደያኖ ጎሳአዋጅሮን፤ አያዳራኑን ባልቼማ ጎሳቤሰሮን፤ **19** ኡሱማለና ጎታ ጎሳ ካኮሃሰሮ ካሰኖ ጌስ ጎሳአዳሰሰሮ እን ፋረራ።” **20** ኤስኮና ማጻፋ ዱበረ ካአይሁድ ምን ካኤብኮክ ዋይቻትን አባበ ሰሰጉረ ሀማጼ፤ አይሁድኮክ ምን ካኤብ ካግረ አባዶ ዱባና ትቸሰ ዲያ ግረ። **21** ኡሱና፡ “ሂክ ነበታትሰኒ ካማላታን ካማጻፋ ሃፋራ ህታር ጉዳተ” አማኖ ሀጋአበ። **22** ዱባና ጋራኬሳ ታኢዳነት አዬሳ ግረን፤ አደና ህኢተሳኮ ካብያሮ ካአዳን አዬሲ ማማ፡ “ሂክ ላ ኤረ ካዮሴፋዮላ?” አማ ግረን። **23** የሱሳና፡ “ኦዶ ዶበ፤ አላ እት እስኦታ ፋይሳ፤ ኡል ካቅፍረናሆም ካፈላተ ኖ ካማልነኖ አየሰ ህታ ካታማታይና አድ ፈል ታአማቶ ማሱሳ እሰን ኢን ፈር ካማላታታን ሄዳታኖ ላኮአበ” አመ። **24** አደና ኡሱ ሃ አመ፤ “እን ሩምና እሰኑን ሃ አማራ፤” ካሄገሮ ኡልኬሳይ ላኮካባጃማሮ።

25 “አየሱን ጎአመን እን ሩምና እሰኑን ሃ አማራ፤” ዳሩር ጌስ ሴንዳ ምናና ኢዳሞ ዋታመረ ካእሰራኤል ኡል ዱባ ጉት ካአቲ ኡኢ ካኮግረ ካኤላሳ ጌሲ፡ ካሞጋን ጋልታንተጃል ኡል ካእሰራኤሊ ግረ። **26** ኤላሳ ሂናኦ ጋልታንተጃ ኦሮኮ ቶ ቶንሳ ላኮፋራመረ፤ አየሱን ጎአመን ካሰዶና ኡሊ ሰራጺታ ካአማማሮ ማማኒ ታግቲ ጋልታንቲ ቶስ ፋራመ። **27** ኡሱማሌ ካሄገሮ ካኤልሳይ ጌሲና እሰራኤሊ ካሞጋን ማሪ ባር ካአባናየ አባዶ ግረ፤ አየሱን ጎአመን ካሶርያ ንኢማን ኳሬ ሂናኦ ኦሮኮ ኮና ላኮፋዬረ። **28** አይሁድኮክ ምን ካኤብ ካግረ አባዶ ዱባ ሂካ ካኮማላረን ጎራታ አማራተ። **29** ታኮሀማጼረንኮና ኬንጉረን የሱሳ ካታማኮ ሳሪ ቤሰን፤ ካታማትሶይ ሄገልዴድሰ ጉምቢ ሉጉድን ታፈላንተቶ ዋዳም ቃርቃራ ጌሰን፤ **30** ኡሱ ጎአመን እሶ ኦሮ ማረ ሴተ። **31** ኤስኮና የሱሳ ታጋሊላ አዉራጃይ ታግቶ ካታማ ቶስ ቅፍረናሆም ዳገ፤ ኤሴና አይሁድን ታፎልሲ አሪ ጎሳ አጋልሰሳኖ ሀጋአበ። **32** ኦዶናት ሃፋራ አዬሳ ማንኮግረ ማራን ዱባና አጋልሰሳኖኬሳ ሳደ። **33** አይሁድኮክ ምን ካኤብና ባቲክ አያና ካአባመረ አባዶት ኮ ካግረ፤ ኡሱና ጦቂ ታአንተ ያዬ እዬረ። **34** “ዋ! ካናዝረት የሱሳ፤ መ

ታሌላላቶች ሃጃ ሮኔ አብታ? ካኮንኤመተታ ኖ ባሰንያ? አት አዮቶ አን ካሶዋ፤ አት ካዋ ቁሉክታ!” አመ። **35** የሱሳና፡ “ጫልኢ አምደ ሂካ አባዶትኮ ቤ!” አመ ሀድሰ፤ ባቲክ አያናና አባዶት ጎሳ ዱባ ሆረ ሉጉደጉረ ኮና ሚራኣ አንጌግሶን ጋፋረ ቤ። **36** አባዶ ዱባና ማመ፤ እስ እስኦሮና፡ “ሂክ ምስክ እጃጃያ? ኦዶናትና ሁናይ ባቲክ አያናልና ጎአጃጅሮ እሶና ብያራን” አመን። **37** የሱሳኮክ አታን ኡሱ ኡልኮክ ጎቦቢ ዱባ ማልሳመ። **38** ኤሰኮ አባባተረ የሱሳ አይሁድኮክ ምን ካኤብኮ ቤጉረ ምን ካሰሞና ቶስ ታቦ። ታሰሞና ሶዶ ማር ጉብ ጎሜላን ሀወኣማ ግቴ፤ ኤስ ጎጎፋይሰሮ የሱሳ ኤባተን። **39** የሱሳና ኤስ ቶስ ሁስ አመረ ማር ካጉባረ ሀድሰ፤ ማር ካጉባረና ጋፋረ ጎርሰዋ ኬተደ ማርቲስ። **40** አርት እያ ግራን፡ ካለካለክ ሀወኣም ካአባናየ አባዶ ዱባ የሱሳ ቶስ ከነን። ኡሱና እሶ መተ መተ ገነቴሳ ጉት ካየረ ፋይሰ። **41** ዱርሳና አደ፡ “አት ኤረ ካዋታ!” አማና እያ ካዋጋን አባዶኮ ቤ። ኡሱ ጎአመን እሶ ሀድሰ፤ ኡሱ ክርሰቶሳ ላኖ አዴሰን ማንኮግሬን ማራን ጋራኬሳ ኮና እሶ ጎጎአዬሶንኮ ትረ። **42** ኡል ካኮባራረ ጎራታ የሱሳ ቶ ካለት ባንኤ ሴተ። ጎሳና ኡሱ ዶታ ግረ፤ ኡሱ ታኮግሮ ባንኤ ኤመተን፤ እሶኮና ካለቢረ ጎጎሴኖንኮ ትርን ሄደን። **43** ኡሱ ጎአመን፡ “ካካለ ካታማል አን ሴይጉረ ዋኖናት ካዋኮክ ዋንጋላ ላላብን ዶትሳራ፤ አን ካኮንፋራመራና ሂካ ሀልቻንያ” አመ። **44** ካይሁዳ ማማኒ ካግሮ ምን ካኤብ ዱባ ላላባኖ ሆረዴ።

5 ጎሳ የሱሳ ማረአበረ እስእስ ሻሻፋታ ኡሱ ካአጋልሰሳረ ሃፋራ ካዋ ማላ፡ ታገንሳረጢ ላቡ ግሪ አሌ ግረ። **2** ኡሱ ጎራታ ዋላቦ ላማ ባጋ ግሪ ታአልተቶ ዴ፤ ኩኑኡብ ኦአባታሬን አደን ዋላቦልኮና ዳጌረን ማራብል አልሳታ ግረን። **3** ዋላቦል ኦሮኮ ታሰሞና ታሌተቶ ቶስ ታቦረ፡ ባጋኮ ባድ ቶስ አባራንቲ ጎጎፋክሰሮ ሆሳተ፤ ኤሰኮና ኡሱ ዋላቦ ጉት ሀማጼረ ጎሳና አጋልሰሳኖ ሀጋአቦ። **4** አየሰ ጉድሰ አባባተረ ሰሞና፡ “ባድ ቶስ ፋክ አምደ ኩኑኡብ አባይን ማራብጃልክሰን ሉጉዳዬን” አመ። **5** ሰሞናና የሱሳን አባበረ፡ “ካአጋልሰሳቶ! ሄመን ዱዶ ዳፋራ ባርነኔ ኮና ላኮአባነኖ፤ አት ጎአንተ ሃፋራካይ አድ ማራብጃልና ሉጉዳሮዋ” አመ። **6** ካኮለጉዳታሬን ጎራታ ኣሎ ካጂንጂ ካዋጋን ኩኑኡብ አበን፡ ማራብጃልና ፊላሚን ሌተ። **7** ዋላቦ ታካለቲ ታግቴ ኡና ታትሶ ኤሜይደ እሶ ጎጎጋርጋርቶ ማላታይ ኡሜን፤ እሶና ኤሜተረን ዋላቦ ላማ ኩኑኡብ አማጌን፤ ዋላቦና ልቕሚን ሌተ። **8** ሰሞና ጴጢሮሳና ሂካ ካኮድያረ ጎራታ የሱሳ ሆረ ግልቢሰረ፡ “ጎታ፤ አን

ጨባለሳክ እባዶትያ እንኮ ካለቤ” አመ። 9 ሂካና ካኮንአመራ ኡሱና ኡሱነ
 ዎታ ኦግረን ዱባ ካአቤራን ኩኑኡብኮክ ሞጋኒ ማንኮሳደረን ማራንዮ። 10
 ኡሱማለና ሳትላል ታሰሞና ካሌረ ይሰ ካዛብዶሳ፡ ያይቆባና ያንሳና ሳደን።
 የሱሳና ሰሞና፡ “እርሳብሳተ! ጎርታ እባዶ እን ቶሰ ካኬንቶ ለታ” አመ። 11 እሶና
 ዎላቦልክሶ ባጋ ቤሰረን ካእመን ዱባና ኢሰረነ ኡሱ ዴበ ሰሴተን። 12 የሱሳ
 ካታማልኮ ቶይ ካኮግሬ፡ ኮ ማሪ ባር ካኮንአማጋንትተቴ እባዶት ኤሰ ካታማይ
 ግረ፤ ሂክ እባዶት የሱሳ ካኮደያረ ጎራታ በቤድቴሳ ኡል ኦዬጉረ፡ “ጎታ፡ ፈኢታ
 ጎሌተ እን ሙጭሰን ዳንዳታ” አመ ኤባተ። 13 የሱሳና ገነ ድሪረሳተጉረ ማር
 ካእባዶት አአበጉረ “እን ፈኢ ሰሰራ” “ሙጭአም!” አመ። ጎርሰዋ ባር እባዶትኮ
 ሙጭአንተ። 14 የሱሳ እደ፡ “ሂካ ማዮና እርሰግተ፤ እየሱን ጎእመን ሴዴ እሰኦታ
 ቱቃሞን ቱሳ፤ ጎሳን አቶ ጎሳሌርና ሙጭማኖካ ማራን ሙሴ ጎሳእጃጃርክ ማለ
 ጃርሶ ሰሰ” አመ አጃጃ። 15 ሀሌዎ ኳሬ ጋራኬሳ ታእዬሳማተ ኦዱ ኣሎ ባልአታ
 ሴተ፤ ኣሎ ካሞጋን እባዶና ኡሱ ካእዬሳሮ ማልና ካአባን ማርሮክ ሀወአምኮ
 ፋይን ኩኩአማ ግረ። 16 የሱሳ ጎእመን ካሞጋን ጎራታ ካለት ባንኤ ኤባታ
 ግረ። 17 ኣሪ ቶይ የሱሳ ጎሳ አጋልሰሳ ግረ፤ ኤሰና ጋሊላኮና ካይሁዳ ማማን
 ዱባኮ ኡሱማለና ኢየሩሳለምኮ ካኤመተራ እባዶ ካፋራሳውና ሴራ ካሙሴ
 ካአጋልሰሳራ ሀማጼ ግረ፤ ፋይሰና አደ ሁና ካጎታ ኡሱ ዎታ ግረ። 18 ሀሱ
 ጎራታና እባዶ ናፋለሳት ኮ አልጋይ ሰዴን ኣተን ኤመተን። የሱሳ ሆረ ካይን ምን
 ኦሮ ታብሰን ሄደን። 19 ጎሳ ሞጋንኮና ካከይ ምን ኦሮ ታብሰን ማንኮዋተን
 ማራን ሄልንቸ ጉት ኮራቴኔ ሄልንቸ ቡቶ ቤሰረን ካሀወአማሮ አልጋን ዎታ ጎሳ
 ጠኤ ቱኩሊ የሱሳ ሆረ ዳግሰን። 20 የሱሳ አማኖክሶ ዴጉረ፡ “እት እባዶት
 ጨቦካ ሀሄሶ አማመራ” አመ። 21 ሴራ ኦአጋልሰሳራና ካፋራሳው እባዶ፡ ሂክ
 “ዋ ካኢንጋማራ እዮያ? ዋ ኮ ኳሬ ጨቦ ሀሄሶ አምን ካዳንዳራ እዮያ?” አመን
 ቆፋ ገቤሳታኖ ሀጋእበን። 22 የሱሳና ቆፋትሶ ማንኮእዴሰረ ማራን ሃ አመ፤ “ሙን
 ዎዳናትሰኒ ሃ ቆፓታን? 23 ‘ጨቦካ ሀሄሶ አማመራ’ አማኖኮና ‘ክጉዴ ጋል’
 አማኖኮ ኤክያ ኤነክ? 24 እየሱን ጎእመን ሂካ ኡሱ ካኮንአመራ ኤረ ካእባዶ ኡል
 ጉት ጨቦና ሀሄሶ አምን ኦዶናት ካአቦ ላኖ ጎሳማላብታኑያ።” ናፋለሳ ሌ ካግረ
 እባዶትነ፡ ክጉዴ አልጋታ ሰዳዴ ምንካካ ጋል አመ። 25 ኡሱና ጎርሰዋ ኬጉረ
 እሶ ሆረ አሌ፤ ሁዱረ ታኮግረ አልጋ ሰዳተጉረ ዋ ጋላታ ምንኬሳ ጋለ። 26 ኤሰ

ካግረ እባዶ ዱባና ማማኖ ሀጋአበ፤ ዋና ጋላታ፡ “ህታር ካሳድሰሮ እየሰ ዴነ” እማ አብሲ እማጋመ። 27 ኤሰኮ አባባተረ የሱሳ ኤሰኮ ቤ ሴተ፤ ዋዩ ካእማመረ ኮ ቃራጣ ካኩኩይሳረ ቃራጣ ታኮአታና ባንኤ ካሀማጼሮ ዴጉረ፡ “እንደቤ ሰሴ” እመ። 28 ኡሱና ካመን ዱባና ኢሰ ኬጉረ ኡሱ ዴበ ሰሴተ። 29 ዋዩትና የሱሳን ምንኬሳይ ኣሞ ካእቲ ኤካሳተ፤ ካሞጋን ቃራጣ ካኩኩሳረና ካካለ እባዶ እሶ ዋታ እሞን ሀማጼ ግረ። 30 ካፋራሳው እባዶና ሴራ ካእጋልሰሳረ እባዶ የሱሳነ፡ “ቃራጣ ኦኩኩይሳራና ጨባልዬልነ ዋታ ካኮንእማታና ካኮንጣማታን መወንያ?” እማ የሱሳኮ ኦእጋልሳታራን ጉት ጉምጉመን። 31 የሱሳና አባበረ እሶነ፡ “ኦሀዉአማራኩን ኳሬ ፋያለሳሉን አኪም ላኮዶትሳሮ፤ 32 እንና ጨባልዬል ጨቦኮ ጉላ ጋልሰን ኳሬ ቁሎለ ኡምን ላኮኤማየሮ” እመ። 33 እሶና፡ “ያንሳኮ ኦእጋልሳታረን ካሞጋን ጎራታ አጋቡዬን፡ ኤባታራን፤ እባዶ ካፋራሳውኮ ኦእጋልሳታረና ኡሱማሌ የላታራን፤ ኦታ ጎአመን አርጌቶ እማናን ጣማናን” እመን። 34 የሱሳና፡ አባበረ እሶነ፤ “ካማሻሽ እሶነ ዋታ ግራን ኦኡማማራን ጎጎአጋቡይራዉን የልን ላኮዳንዳማሮ። 35 እየሱን ጎአመን ካማሻሽ እሶኮ ታኮአታምራ አሪ ኤመይናታ፤ ሀሱ ጎራታ አጋቡይራዋ” እመ። 36 አደና ሃ እመ ማሱሴ ሰገ፤ “ካኡሱብክ ሳርሰኮ ኤርበ ፊለረ ካዶእን ሳርሲ ጉት ኤርበ ካካታራ ማዮና ላኮግሮ ሃ ጎየለ ካኡሱብክ ሳርሰ ፊላራ፤ ታኡሱብት ኤርበ ካዶእንክ ሳርሰነ ዋታ እሰ ላኮአታቶ። 37 ካኡሱብክ ካዎይኒ ጣሞና ካዶእንክ ድንቢቶ ሙላተ ካካታራ ማዮና ላኮግሮ፤ ጎሙላተ አድ ካኡሱብክ ካዎይኒ ጣሞኮክ ድንቢቶ ኤባራ፤ ካዎይኒ ጣሞና ኡባታራ፤ ድንቢቶና ላኦ ላኮአቡ። 38 ሃንሱን ካኡሱብክ ካዎይኒ ጣሞ ካኡሱብክ ድንቢቶ ክባማኖ ዶትሳራ፤ 39 ጎርታ፡ ካአዳላተ ካዎይኒ ጣሞ ካኮጣመ ጎራታ፡ ካኡሱብክ ካዶታታራ ማዮና ላግሮ፤ ኣላንቲና፡ “ካአዳላተ ካሮራንያ ማንኮእማናን ማራንያ።”

6 አይሁድን ታፎልሲ አሪ የሱሳ አራ ኦሮማረ ሮራ ግረ፤ ኡሱኮ ኦእጋልሳታረና ሻዉዬ ኤብሰን ኣተነ ገነ ሆንቆፊን እማ ግረን። 2 ካፋራሳው እባዶ ኦሮኮ ኮኮ ጎአመን፡ “አይሁድን ታፎልሲ አሪ ፈላሚን ኦዶትሶን ፈሎ ሙን ፈላታን?” እመን። 3 የሱሳና ሃ እመ እሶን አባበ፡ “ዳዉተ ካኮኤኤረ ጎራታ ዋታ ኦግሬነ ዋታ ካየለሮ ዱባ ላኮናባብተቴንያ? 4 ኡሱ ምን ካዋ ታበረ ዋዉን ካለክ ካሌሮ ቱቃሞል ካላሉን ፈኢ ካኮሰሳንተቶ ባቦ አታተ እመ፤ ኡሱነ ዋታ ኦግሬኮና ሰሰ።”

5 አደና፡ “ኤረ ካእባዶ ታፎልሲ አሪን ጎታያ” አመ። **6** ታካለ አይሁድኮት ታፎልሲ አሪና የሱሳ ካእይሁድ ምን ካኤብ ታበረ አጋልሰሳ ግረ፤ ኤሰና ገነ ታመርገ ካኮናፋተተ እባዶት ኮ ግረ። **7** ሴራ ኦአጋልሰሳሬና ካፋራሳው እባዶ የሱሳ ሞትን አላንቲ ዶታ፡ ታፎልሲ እርትሶይ ኡሱ ጎፋይሰናሮና ድን ኦራ ግረን። **8** የሱሳና ቆፋትሶ አዳሰጉረ ገነ ካኮናፋተተ እባዶትነ፡ “ክጉዴ ጠኤ አሊ” አመ፤ እባዶትና ኬ አሌ። **9** ኤሰኮ የሱሳ፡ “አላ አየሰ ኮ አን እሰን ሆሳሮ፤ ታፎልሲ አሪን ፈኢ ካኮንሰሳንተታ ኢዳነ ፈሊንያ ሙ ማላነ ፈሊንያ? ኔፎ ሃሳኖያ ሙ ባሳኖያ?” አመ። **10** የሱሳ አደ ኡሱ ማራሙረ ካግሮ እባዶ ዱባና ዴጉረ እባዶትነ፡ ገነታ ድሪርሳ አመ፤ እባዶትና ጎጎአማመሮ የለ፤ ገነና ሱረ ፋይተ። **11** እባዶ ጎአመን አሎ አማራተ፤ የሱሳ ጉት መ የልን ዶትሳሮ እሰ እሰኦሮ ራቶ አዬሌን። **12** ሀሱ አሪልኮ ቶይ የሱሳ ኤባይን ዋዳሞ ቶሰ ቤ፤ ሄመን ዱዶ ዋ ቶሰ ኤባታ ባሬ። **13** ባባርሰ ኡሱኮ ኦአጋልሳታራን ኡመጉረ እሶኮ ቶሞንኮ ላማ አሳበ፤ እሶና ኦፋራመራን አመ መገ ቤሰ፤ **14** እሶና ዴጢሮሳ አመ ካኡመራ ሰሞና አቢኬሳ እንድራሳ፡ ያይቆባ፡ ያንሳ፡ ፍልጾሳ፡ በርተሎሜዎሳ፡ **15** ማቶሳ፡ ቶማሳ፡ ካኢልፎሳ ኤረ ያይቆባ፡ “ካሀኡሳታረ” ካአማመረ ሰሞና፡ **16** ካያይቆባ ኤረ ይሁዳና የሱሳ ሮርሰ ካሰሰረ ኡል ካአሰቆርቱክ ይሁዳ ሌን ግረን። **17** የሱሳ እሶን ዎታ ራቶ ዋዳሞኮ ዳገጉረ ዲዳት ባንኤ አሌ፤ ኡሱኮ ኦፋራመራና አሎ ካሞጋን እባዶ ኤሰ ግረ፤ ይሁዳ ማማን ዱባኮና ኢየሩሳሌምኮ ኡሱማሌ ጢሮሰኮና ካሰዶና ላቡግርኮ ካኤመተራ ካሞጋን ጎሳና ኤሰ ግረ። **18** ህኒዕና ካኮንኤመቲረን ኡሱኮ ማልና ካአባናዬን ማረ ኦሮክ ሀዉአምኮ ፋይንየ። ባቲክ እያናይ አቦሳማ ኦግሬና ፋዬን። **19** ሁና ኡሱኮ ብያ ዱባና ፋይሳ ማንኮግረ ማራን፡ እባዶ ዱባ ኡሱ ድኒን ዶታታ ግረ። **20** የሱሳ ኡሱኮ ኦአጋልሳታራን ቶሰ ዲያ ሃ አመ፤ እሰን ህየሳ ኦሶማሳንቴታን ዎኖናት ካዋ ካክሰንያ፤ **21** እሰን ግዳ ኦኡኣታን ኦሶማሳንቴታን፤ ሃሬ ባራርናታን፤ እሰን ግዳ ኦኣታታን ኦሶማሳንተታን፤ ሃሬ ኦሶልናታን! **22** እባዶ ኤረ ካእባዶ ማራን ጎዲደ፡ እሰን ኦሮኮ ጎአሳቤና ጎቱፋተን፡ ካሜላን መገ ጎሰሰና ኦሶማሳንቴታን። **23** ህትማ ሙራትሰን ዳሩሪ ታአቲታ፤ ሀሴ አሪ እሰኩን ገጌሎ ሀሌን፤ ቡራቃ፤ ካሆርኮ ኦዶጃላልክሶ ካሄገሮ ጉት ካየለራን ሂካዋየ። **24** እየሱን ጎአመን እሰን ዱሬሳጆል ኣኔ እሰኩን! ጎጎአና ግዳዋ አታቴታን። **25** እሰን ግዳ ኦባራርተታን ኣኔ እሰኩን! ሃሬ ኡኢናታን። እሰን ግዳ ኦኦሶላታን ኣኔ እሰኩን!

ሃሬ ጋድናታን፤ ኦይናታን። 26 እባዶ ዱባ ኢዳነታትሰን ጎክዬሰ አኔ እስኩን!
 ካሆሬ ኦዶጃላልክሶ ኦጣራ ሃገሮጃሉን ካየሌረን ሂካዋዮ። 27 “እየሱን ጎአመን
 እስን ኦማላታኑን እን ሃ አማራ፤ ዲናጃልክሰን ጌላየን፤ እስን ኦዲዳራውና
 ኢዳነ ፈላ፤ 28 እስን ካቃንጋሮና ሶማሳዬን፤ እስን ካምራሮና ኤባየን። 29 ኡይ
 ኮ ካባሳሮን ካካለ ኡይ አድ ቱሰ፤ ጋሽ ኩኮ ካአታሮን ቆሎ አሮትርተ። 30
 ካኤባታሮን ዱባን ሰሰ፤ ኡራዎኦታ ካአታሮን ጎጎአባብሮን አሮሆሳተ። 31 እባዶ
 ጎጎፈሎ ካዶታታን እስና ኡሱማሌ ፈላ። 32 “እስን ካጌላታሮ ጎጌላተን መ ካለት
 ላኦ ሃላይናታን? ‘ጨባለሳጃልና’ ጎአመን እሶ ኦጌላታራን ጌላታራን። 33 እዳነ
 እስኩን ኦፈላራውን ኢዳነ ጎፈልቴን መ ካለት ላኦ ሃላይናታን? ጨባለሳጃልና
 ጎአመን ሂካማሌ ፈላታራን። 34 አማኦ አባብሮዋ አንቴን ካኮሄዳታን አባዶን
 ጎአምአይሴን መ ካለት ላኦ ሃላይናታን? ጨባለሳጃልና ጎአመን ካአምአይሴራን
 ግታክ አባባይ አታይን ጨባለሳጃልና አምአይሳራን። 35 እየሱን ጎአመን
 ዲናጃልክሰን ጌላየን፤ ኢዳነና ፈላ፤ አባባይ አታይን አብድ ሀየላኖን አምአይሳ፤
 ሂካኒና ሙራታትሰን ታንጂን ለታ፤ ዱባንኮ ጦቂ ካአመ ይሰ ካዋ ልናታን፤ ኡሱ
 ጋላታ ካልክወና ካማላን እባዶ ዱባን ካእዳንክያ። 36 ካዳሩረ ኣቦክሰን እስኩን
 ጎጎነኤይሳታሮክ ማለ እስና ኡሱማሌ ኦነኤይሳታን ላ። 37 “አሮፍርድቴን
 እስኩን ላኮፍርዳምሮ፤ አሮቦህቴን፤ ላኮቦህንታን፤ ሀሄሶ አማ፤ ዋ እስኩን ሀሄሶ
 አምሮዋ፤ 38 ሰሳ ዋ እስኩን ሰሰሮዋ፤ ካኮኤካሳታን ሁይ አባባይ እስኩን
 ማንኮኤካሳምናሮ ማራን፤ ሁጭም አኢ ምግሊ ታኡባሮ ካእዳንክ ሁይ ኤካሳም
 እስኩን ሰሳምናራ።” 39 አደና የሱሳ ሂካ ማሱሳ ሃ አመ እሶን ሰገ፤ “አልኦ
 ካደያኖን ኢልኦ ካንደያኖን አብ ገጌይሰን ዳንዳራ? ላማ እስአባቴረን ጉምቢ
 ኦሮዴን ላኮኢያራንያ? 40 ካአጋልሳታራ ካአጋልሰሳሮኮ ላኮሮራሮ፤ እየሱን
 ጎአመን ማዳር ካአጋልሳተ እባዶ ዱባ ካአጋልሰሳሮ ኣን ልናራ። 41 “አቢካካት
 እሊ ኦሮ ካግሮ ሁራ መወን ድያታ? አልታይ ኦሮ ካጌዳባመሮ ጋ ላኮድያቶያ? 42
 አልታይ ኦሮ ካግሮ ጋ ሀንደያኖን አብካነ ኣቢኬ፤ ኢልታይ ኦሮ ካግሮ ሁራ ኩን
 ቤሱ’ ምሲ አምን ዳንዳታ? አት ኢፍሳዳ፤ ሆራርጀ ኢልታይ ኦሮ ካጌዳባመሮ ጋ
 ቤሳ፤ ኤሰኮ አባባይ አብካት እሊ ኦሮ ካግሮ ሁራ ቤሰን ኢድሰ ድን ዳንዳታ።
 43 “ካእዳንክ ጋ ሌ ግራንቲ ታሜላንት ኢል ካዱባማራ ጋ ላኮግሮ ኡሱማለና
 ካማላንክ ጋ ሌ ግራን ታኢዳንት ኢል ካዱባማራ ጋ ላግሮ። 44 ጋ ዱባ

ታካታሮ እሊ አዳሳማራ፤ ጋ ካኤኤንኮና በለሰ ታአማማታ ኢል ላኮአባባማቶ፤
 ኡሱማለና ሞላልኮ ወይኒ ታአማማታ ኢል ላኮአባባማቶ። 45 ካእዳንክ እባዶ
 ወዳናቴሳ ካአማጋመሮ ካእዳን እየሰኮ ኢዳነ ቤሳታራ፤ ካሜላን እባዶ ወዳናቴሳ
 ካአማጋመሮ ካሜላን እየሰኮ ሜላነ ቤሳራ፤ እባዶ ወዳናቴሳ አማጋመ ካሮረሮ
 ህኢቴሳይ አዬሳራ። 46 “እን ካአማሮ ላኮፈላታን ሀያ ሙን፡ “ጎታ፡ ጎታ” አማታን?
 47 እን ቶሰ ካኤመታራ ሃፋራኬ ማለረ ፈሎይ ካሀይሳራ ዱባ እዮ እን ላሮ እን
 እስኩን ቱሰሮ፤ 48 ምን ማዳራዪን ኣሎ ጉምቢ የለ ካኦሽሮና ኤኤሞ ጉት
 ኡኩም ካኡኩማተሮ እባዶት እን ላራ፤ ዳድ አማጋመ ኤመተጉረ ኡሱ ምን
 ሻፈ፤ አታተ ማንኮማዳራመረ ማራን አእሰና ላኮዳንዴ። 49 ሃፋራ ካኬ ማለረ
 ፈሎይ ካሀይሶን ጎአመን ምንካኬሳ ኡኩም ካሊ ኤሬ ጉት ካማዳራተሮ እባዶት
 እን ላራ፤ ዳድ አማጋማኖኮ ካከይ ምን ካኮሻፋረ ጎራታ ጎርሰዋ እዬ፤ ኢያኖና
 ጎሜላን ሌ።”

7 የሱሳ ሂካ ዱባ ጎሳ ሆረ አዬሰ ጉድሰረ ቅፍረናሆም ቶሰ ታበ። 2 ኤሰና
 ካሮም ዋታዳራ ቦሉን ወይቻ ካሌረ ግረ፤ ኡሱ ኣሎ ካጌላታረ ኡሱን ካሀንዳረክ
 ሀወአመረ ጎይን ጋባላመ ግረ። 3 ኡሱና የሱሳኮክ ጋራ ካኮማላረ ጎራታ ኡሱን
 ካሀንዳረክ ጎጎፋይሰሮ ጎጎኤባናውን ኡል ካአይሁዳት ጃርሶለኮ ፋረ። 4
 ሀንዳ ኦፋራሜረና የሱሳ ቶሰ ኤመተንጉረን ሃ አመን አታይሰን ኤባተን፤ “ሂካ
 እባዶትን አት ሂካ ፈልን ዶትሳራ፤ 5 ኣላንቲና ሂክ እባዶት ጎሳካን ጌላታራ፤ ምን
 ካኤብካን ኖን ካማዳርሰሰራና ኡሱያ።” 6 የሱሳ እሶን ዋታ ሴተ። ኡሱና ምን
 ቶሰ ካኮጋባላማረ ጎራታ፡ ዋታዳራ ቦልኮክ ወይቻት ኦጌላታረ ፋረረ የሱሳነ ሃ
 አመ፤ “ጎታ፤ አት ምንኬ ኦርድ ታብን እን ካዶትሳሮ እባዶት ላኮዮ አሮሀርተ፤ 7
 ሂካኮ ካከይ ኩ ሆረ ጋባላሚን ዱዶ ካዶትሳሮ እን እስኦተ ላኮቶታታሮ፤ ሃፋራ ኮ
 ካላል እየሰ፤ ኢን ካሀንዳረክ ፋይሮዋ። 8 እን መተኬውን ካጉተ ወይቻ አባ እንኮ
 ሄገሌ አደ ኢን ካሃንዳራ ዋታዳራ ግራ፤ ኮኔ አት ‘ሴ’ ጎአምሮ ሴታራ፤ ካካለነና፡
 ‘ኩያ’ ጎአምሮ ኤመታራ፤ ኢን ካሃንዳራና፡ ‘ሂካ ፈል’ ጎአምሮ ኢን አጃጃማራ።”
 9 የሱሳና ሂካ ካኮማላረ ጎራታ ኡሱ ሳደ፤ ካምባል አመረና ደቤሴታ ካግረ
 ጎሳነ፡ “እን እስኔ ሃ አማራ፤ ህታ ኣንትት ታንጂንት አማኖ እሰራኤሊ ዱዶ እን
 ላኮሄለሮ” አመ። 10 ሀንዳ ካሴተረ እባዶ ምን ካኮአባባታረ ጎራታ፡ ኡሱ
 ካሀንዳረክና ካፋዬሮ ዴን። 11 ኤሰኮ አባባተረ የሱሳ ታንጂን ሀአዳላኖን፡

ናይን ታእማማቶ ካታማ ቶስ ሴተ፤ ኡሱኮ ኦኦጋልሳታራና ካሞጋን ጎሳ ኡሱነ
 ዎታ ሴተ። **12** ካታማ ቶስ ካኮታባራን ካራ የሱሳ ካኮገያረ ጎራታ፡ እባዶት
 ኮኮክ ሬስ ሰዴንጉሬን ካታማኮ ቤን፤ ካጎየረና ኣየተሳወን ኮ ካላልየ፤ ኣና
 ጋልታንተተ፤ ካሞጋን ካካታማ ጎሳና ኤስነ ዎታ ግረ። **13** ጎታና ኤስ ካኮደያረ
 ጎራታ ነኤኤይሳተጉረ፡ “ኣላማንደ፡ ኣሮኦተ!” አመ። **14** ጋባላመረ ታኮሰዴራን
 ራሬ ድን፤ ካስደረ እባዶና ታክ አመ አሌ፤ የሱሳና፡ “እት ዎዳላት፡ እን ኩኔ ክ
 አማራ” አመ። **15** ካጎየረ እባዶትና ኔፎ አባባተደ ፋዬረ ጦቂ አመ ሀማጼ፤
 እዬሳኖ ሀጋእበ። የሱሳና ኣተረ አዉን ሰሰ። **16** ዱባና አብሳተሬን ዋ ጋላታ፡
 “ካኣቲ ካሄገሮ ኖ ኦሮኮ ኬራ”፡ “ዋ ጎሳኬሳ ፋይሰን ኤመተራ” አመን። **17**
 ሂክ የሱሳኮክ እታን ካይሁዳ ኡል ዱባይና ኡሱ ማማኒ ካግሮ ኡል ዱባ
 አዴሳመ። **18** ያንሳኮ ኦኦጋልሳታረን ሂካ ዱባ ያንሳን ሰገን። ኡሱና እሶ ኦሮኮ
 ላማ ኡመረ፡ **19** “ኤመታራ ካእማንተተ አትተ? ሙ ካካለ ኦራና? አማ”
 አም ጎሳሆሳናዉን ጎታ ቶስ ፋረ። **20** እባዶጃና የሱሳ ቶስ ሴቴረን፡ ኤመታራ
 ካእማንተተ አትተ? ሙ ካካለ ኦራና? አም ኖ ኩ ጎሳሆሳኖን “ካጣማቃራ ያንሳ
 ኖ ኩ ቶስ ፋረራ” አመን። **21** ጎርሰዋ የሱሳ ካሞጋን እባዶ ሀዉኣምኮ፡ ማር
 ኦሮክ ሀዉኣምኮና ባቲክ እያናልኮ ፋይሰ፤ ካሞጋን ኢልኦ ካንደያኖን ኢልኦ
 ደንዴይሰ። **22** ያንሳን ሀንዳ ኦሴተረን የሱሳ ሃ አመ፤ “ሴንጉዴን ካዴተታና
 ካማልቲታን ያንሳን ሰጋ፤ ኢልኦ ካንድያኖን ድናራ፤ ኦኤሳራን ቱኩል ሰሴይናራን፤
 ማሪ ባር ኦኣባና ሙጭምናራን፤ ነቤ ኦማሎና ማልናራን፤ ኦጎየራና ጎይኮ ክናራን፤
 ሂየሳሉና ዎንጋላ ላላባምናራ። **23** እዬ አብዳታና ዋት ካሀንዱዱፋኖን እባዶ
 ዱባ ካሶማሳመያ።” **24** ያንሳን ሀንዳ ኦኤማተሬን ሴተን ካኮቦዋሬን ጎራታ፡
 የሱሳ ጋራ ያንሳኮክ እዬሳኖ ሀጋእበ፤ ሃና አመ፤ ያንሳ ቶስ ጋ ካኮንቤቴተን መ
 ዲንየ? አምባል ካዎልዎልሳቶ ፊቀያ? **25** ሀያ መ ድን ቤተን? ካእዳን ሳርሰ
 ካሳርሳተሮ እባዶያ? ካኢዳሮ ሳርሰ ኦኢሳዳራና ግር ካኤካተ ኦግራን ምን
 ካዎኖይ ግራንዋ። **26** ሀያ! እሰን መ ድን ቤተን? ካሄገሮ ድን ሌዉና? እ እን
 እሰኔ ሃ አማራ፤ እሰን ድን ካቤተቴን ካሄገሮኮና ካሮራሮያ። **27** ሃ አማመ
 ካኮንጸፋመረና ኡሱያ፤ “ራካና ኩ ሆረ ካኤካሰሮ፡ ኤርግቻኬና ኩኮ ጣይሰ እን
 ፋርናራ።” **28** እን እሰኔ ሃ አማራ፤ ሄለልኮ ካኡሙላመሮ ኦሮኮ ያንሳኮ ካሮራራ
 ላግሮ፤ ዎኖናት ካዋይ ጎአመን ዱባንኮና ካየራታራ ኡሱ ሮራራ።” **29** ቃራጣ

ኦኩኩይሳራና ሀሄሶን፡ ሂካ ኦማሌን ዱባ ካያንሳ ጥንቃታ ጣማቃማ ዋ ቁሉክያ
 እመን አቶቴን። 30 እባዶ ካፋራሳውልና ሴራ ካሙሴ ኦካሳን ጎእመን ታያንሳ
 ገነ ጣማቃማና ዋት፡ ዋ እሶን ካእቦ ሀልቻ ኔባቴን። 31 የሱሳ አደ፡ “ጎርታ
 ህታ አላታንኮክ እባዶ እን ሜይ ማሱሰራ? መ ኣን ላራን? 32 ባንኤ ታግያይ
 ሀማጼሬን እስ እስሮ እስ ኡኡማታ ሃ ካእማሮ ይሳስ ኣን ላናን፡ ‘ኖ ሱሱሌ
 እስኩን ኡፋፍን፡ ላኮዱዱርቴን፤ ቦቾ እስኩን ቤንስ፡ ላኮኡቴን።’ 33 ኣላንቲና
 ካጣማቃራ ያንሳ አጋቡይ ካም ሀኣሞና ካዎይኒ ጣሞ ሀንጣሞን ጎእመተ፡
 ‘ባቲክ እያና አባ’ እንቴን። 34 ኤረ ካእባዶ አድ እማና ጣማ ጎእመተ ‘አሞና
 ጣሞን ካጋጺጋጺሮ፡ ቃራጣ ኦኩኩይሳራና ጨባለሳል ካጌላታሮ’ እንቴን።
 35 ጎርታ ቃሩማኮክ ልክ ላኖ ካእታተሮ እባዶ ዱባ ዶሌ አዳሳንተ እመ።”
 36 ኤሴና እባዶ ካፋራሳውኮ ኮኔ ዋታ ባቦ ጎጎእምሮን የሱሳ ኡማተ፡ ኡሱና
 ፋራሳውትኮክ ምን ቶስ ታበጉረ ባቦ ኣምን ሀማጼ። 37 ኤስ ካታማይ ታግቲ ቶ
 ጨባለቲ ሄለልትቴ፡ የሱሳ ፋራሳውትኮክ ምኒ ባቦ ኣምን ሀማጻኖ ካኮማላተ
 ጎራታ ኮ አልባስጢሮስ ካእማማሮ ኤኤሞኮ ቆራመ ካፈላመሮ ብልቃደ ምግ
 ታሌተቶ ሽቶ ኣተ ኤመተ፤ 38 ምና ታሃሬነ ሉቃ ዶሌ አልተደ ኦታ ኢልሞ ሉቃ
 ጉት ኡባ መተክስይና ሻካራኖ ሀጋአብተ፡ ሉቃኦቴሳና እንጋታ ሽቶ ሽግደ። 39
 ካኡማተረ ፋራሳውትና ሂካ ካኮደያረ ጎራታ፡ ሂክ እባዶት ካሄገሮ ሊ ግረዋ ኡሱ
 ታድንተታ ሄለልትቴ ማዮቶ፡ አደ ማምስት እባዶትቶ አዳስ ግራረ፤ ጨባለቲታ
 እመ ዋዳናቴሳ ሄደ። 40 የሱሳና፡ “ሰሞና፡ እን ኩን ካሰግናሮ አየስ አባ” እመ።
 “ኡሱና ካእጋልሰሳቶ! ኢን ሰጊ” እመ። 41 የሱሳና ሃ እመ፡ ኮ ካእምአይሳሮኮ
 ማራጋደ ኦኣማኣቴረን እባዶጃ ላማ ግረን፡ ኮ ከን ቦሌ ጣጋራ፡ ካላምና አደ
 ጣጋራ ኮንቶም እማኣተረን። 42 አባብ ካሰስና ካኮዋታሬን ጎራታ እንዛትሶ ላማ
 ዱባና ኡሱ ኢሳገ። ጎርታ እሶ ላማ ዱባኮ ካእምአይሰሮ ሮርሳተ ካጌላታራ
 ኤክያ? 43 ሰሞናና፡ “ታሞጋን እንዛ ካኮንሄሰቶ ኣን ላራ” እመ አባብ። የሱሳና፡
 “ልክ አባብቴታ” እመ። 44 ሄለልትቴ ቶስ ካምባል አመረ ሰሞናን ሃ እመ፡ “አት
 ህታ ሄለልትቴ ድያታ? እን ምንካ ጎታብ፡ አት ሉቃኦተውን በከና ላኮሰሰተ፡ ኤስ
 ጎእመን ሉቃኦቴ ኢልምትሴይ ኣልሰደ መተካክስይ ሻካርተ። 45 አት ዱዶ እን
 እንጋተ ኖጎዳ ላኮኣተቶ፡ ኤስ ጎእመን እን ጎታብኮ ሀጋአብተዳ ሉቃኦቴ እንጋታና
 ላኮኣልሰቶ። 46 አት መተካኬይ ዛይቲና ላኮሽግደቶ፤ ኤስ ጎእመን ሉቃኦተይ

ሸቶ ሸግደ። 47 ሃንሱን እን ሃ አማራ፤ ኤስ አሎ እን ጌላተታ ካንጂን ጨቦ ኤስን ሻጋ ሌራ፤ ጨቦ ክጫርክ ሻጋ ካኮንሌራ ጎአመን አባራንቲ ጌላታራ።” 48 ኤስኮ የሱሳ ሄለልትቲን፡ “ጨቦካ ሀሄሶ አማመራ” አመ። 49 ኡሱ ዋታ ባቦ አምን ሀማጽተ ታግቲ ማርትና፡ “ሂክ ጨቦ ዱዶ ሀሄሶ ካአማራ ኡሱ እዮያ?” አመን እስ እስኦሮ አዬሴን። 50 የሱሳ ሄለልትቲን “አማኖካ ኩ ፋይሰራ ኖጎዳ ጋል!” አመ።

8 ኤስኮ አባባተረ የሱሳ ዋኖናት ካዋ ካገጌላይሰሮ ሃፋራ ላላባ ካታማልነና ማማንጃላልነ ሮረ፤ ቶሞንኮ ላማና ኡሱ ዋታ ግረን። 2 ኡሱማሌ ባቲክ እያና ካኮንቤራና ማር ኦሮክ ሀወአምኮና ካፋዬራ ኮኮ ሄለልጆልና ዋታ ግረ፤ እሶና ዱርሳ ቶዶባ ታኮበሬ ኡል ካመግደላኮት ማይራመ። 3 ካሄርዶሳ ምኒ ኦዶናት ካአባናየ ታኩዛ ኦር ዮሃና፡ ሶስና፡ አደና ካሞጋን ካካለ ግረ፤ ህኒዕና ኡራዋኦትሶይ የሱሳና ኡሱኮ ኦአጋልሳታረወና ኦሀንዳሬንየን። 4 ካሞጋን ጎሳ ኮሌ ኩኩ አመ ግራንቲ፤ አደና እባዶ ካለካለት ካታማልኮ የሱሳ ቶስ ካኮኩኩአማረ ጎራታ፤ ሂካ ማሱሳ ሃ አማ እሶን ሰገ፤ 5 “ኮ ኦታተ ካባራረ ወጣ ወጣዬን ቤ፤ ወጣታ ግራንቲ ኮኮ ወጣ ራድ እዬ፤ ሉኪና ዳዳራመ፤ ክምብርጆልና አመ። 6 ኮኮ ወጣ ታኤኤሞልት ኤሬ እዬ፤ ጎጎአላቴ ኡንጂን ግራናማንኮዋተ ማራን እንጋገ። 7 ካካለ ወጣና እደ ኤኤን ኦሮ እዬ፤ ኤኤን ዋታ ጂናተ ማርግስ ሃሰ። 8 ካካለ ወጣና ኤሬ ታኢዳንት ጉት እዬ፤ ካኮአላታረ ጎራታ ካወጣመሮኮ ቦል አምባና ዱባመ።” ሂካ አመረ ጉድሳ ያየ ጦቂኢሰረ፡ “ታማላቶ ነበ ካካባ ሀማሎ” አመ። 9 የሱሳኮ ኦአጋልሳታረን ህታ ማሱሳኮት ፋሬን ኡሱ ሆሳተን። 10 ኡሱና ሃ አመ፤ “ዋኖናት ካዋኮት ሆል ማላባኖ እስኩን ሰሳመራ ኦካለቱን ጎአመን ማሱሳይ እን አዬሰናራ፤ ህክና፡ ዲያ ግራን ዋዳና ጎጎኮካኖንኮ፡ ማላ ግራን ጎጎሻዶንኮያ።” 11 “ጎርታ ታማሱሳ ፋረንና ህታታ። ወጣ ካአማመረ ሃፋራ ካዋያ። 12 ራድ ካኢየረና ሃፋራ አማላራን፤ አየሱን ጎአመን አማንሬን ጎጎፋይኖንኮ ዱርሳ ኤመተረ ሃፋራ ዋዳናታቴሳኮ ካኮአታሮያን። 13 ኤኤሞልት ኤሬ ካኢየረ ሃፋራ ጎማላን ገጌሎይ ኦአታታራንያን። ሂኒዕ ጎራታ ክጫሩን አማናራን ኳሬ ሀዲድ ማንኮዋተ ማራን ካጫፍቲ ጎራታ ባኔ ኦካካታራንያን። 14 ኤኤን ጠኤ ካኢየረና ሃፋራኬሳ አማላናንያን፤ ሀዬን ባሬን ግር ካኡሌኮክ ቆፋ፤ ዱሩማይና ባርሳኖ ኦኢዳንት ገጌሎይ ማርግሳመን ዱባምን ጎጎዶትሳሮ ኢል

ላኩዱባማራን። **15** ኤሬ ታኢዳኒ ጉት ካኢየራ ሃፋራኬሳ ታኢዳንትና ቱኩልት
 ዋዳና ማለሬን እኩራታራን፤ ኦብሳና እታታ ኢል ኦዱባማራንያን። **16** “ኮሮንታ
 ሀንቃይሳተረ ቶሳ ኦሮ ጎርቱን አልጋ ሄገሊ ካካታራ ማዮና ላኮግሮ፣ ሃ ካየላሮኮ
 ምን ኦርዴ ካታባራ እባዶ ኢፋ ጎጎድያሮ ቦላንሶ ጉት ሶዋታራ። **17** ካሙቶን
 ካስያመራ፣ ካአዳሳሞን ኢፋ ቶስ ካንቤኖን፣ ካሳላተራ እየሰ ላኮግሮ። **18** ጎርታ
 እስን ማምሲ ማልናታን እስኩራዬን፤ ካኮግሮን አዳማራ፤ ካልክ ዱባኮ አደ
 አንክ ካግሮ አን ካላራ ዱዶ አታምናራ።” **19** ኤሰኮ አባባተረ እዬ ታየሱሳና
 አቢላልቲሳ የሱሳ ማንኮግሮ ኤመተን፤ እሱና ጎሳ ሞጋንኮ ካከይ ኡሱ ቶንሳ
 ጋባላሚን ላኮዳንዴረን። **20** ሀሱ ጎራታ፣ “አየታና አብላልታ ኩ ድን ዶተረን ሳሬ
 አሌራን” አመን ኡሱን ሰገን። **21** ኡሱና እሱን አባበረ፣ “አየትና አቢላልትና
 ሃፋራ ካዋ ማለሬን ፈሎይ ኮሀይሳታራያን” አመ። **22** አሪልኮ አሪ ቶይ የሱሳ
 ኡሱኮ ኦአጋልሳታራን ዋታ ዋላቦይ ኮራተረ፣ “በከኮ ጋማ ናቅና” አመ፤ ኤሰኮና
 ዱዳታኖ ሆረዴን። **23** በከ ኦሮ ዱዳታ ግራንትን የሱሳ ዋላቦ ኦሮ ሁዱረ፤ ኡሱ
 ጎራታ በከ ጉት ጋሽማሎ ካእቲ ኬ፣ በከና ዋላቦ ቃማኮ ሮሬን ማንኮታቤን ማራን
 ባይኮት ሀኢ ገገን። **24** የሱሳኮ ኦአጋልሳታረን ኡሱ ቶስ ጋባላሚረን፣ “ጎታ፣
 ጎታ! ኖ ላጉዳነላ!” አማ ሁዱሮኮ ኡሱ ናባድሴን፣ ኡሱና ናባደረ አምባልና፣
 በከኮክ ሻላጋማኖ ሀድሰ፤ ኡሱ ጎራታ አምባልና ሻላጋማኖ ኢሰ ጫልኤት ሌተ።
25 ኡሱና ኡሱኮ ኦአጋልሳታና፣ “አማኖክሰን ኤኮ ሀያ? አመ። እሱና አብሲና
 ሳዳናይ፣ ሂክ አምባልና በከና ካኮን አጃጃማራን አፎ አዮያ?” አመን እሰ እስኦሮ
 እዬሴን። **26** ኤሰኮ አባባተረ ጋሊላኮ ጋማ ካግሮ ካገርገሰኖን ኡል ቶስ ዋላቦይ
 ናቄን። **27** የሱሳ ዋላቦኮ ዳገረ ባጋ ካኮበያረ ጎራታ፣ ዱርሳ ጉት ካኮግረ ኮ
 ኤሰ ካታማኮክ አባዶት ኤሰለ፤ ሂክ አባዶት ካሞጋን ጎራታ ሳርስ እንሳርሳኖ፤
 ምና ሀንታቦን ባንኤ ታህዌል ምን ካየላተረያ። **28** የሱሳ ካኮደያረ ጎራታ ኦካ
 ኡሱ ሆረ እዬ፤ ታእቲ ያዬ፣ “ዱባንኮ ካንጂንክ ኤረ ካዋ የሱሳ፤ እት ኢን ዋታ
 ታማ ኤሴላ አብታ? እን ጎጎአቦሰሶንኮ ኤባታራ” አመ። **29** ሂካ ካኮንአመረ
 ባቲክ እያናጃል አባዶትኮ ጎጎቤሮ የሱሳ አጃጃ ሰሰ ማንኮግረ ማራንያ። ባቲክ
 እያናጃል አርጌቶ ማንኮከያሮ ማራንቱ አባዶት ሳንሳላታና ማርፎ ታሉኬት ሻም
 ጎኦራምሮና ካኮሻመሮ ሳንሳላታ ጎጎሳ ካአበረ ባቲክ እያናጃል ጋ ቶስ አተ ብያ
 ግረ። **30** የሱሳና፣ “መገካ አዮያ?” አመ ኡሱ ሆሳተ። ኡሱና ካሞጋን ዱርሳ ታበ

ማንከግረ ማራን፡ “መገክና ለገክንያ” አመ። 31 ዱርሳና ቦዋ ኦሮ ታባ አም ጎጎአጃጂኖንኮ እታይሰን ኡሱ ኤባተን። (Abyssos g12) 32 ኡሱ ማማኒ ዋዳም ላዩይ ጅግ ታሌታ ታሞጋን ቦዬ ኤስ ፎፋማ ግቴ። ዱርሳነ ታሞጋን ቦዬ ቶስ ታባ አም ፈኢ ጎጎሰሰሮ ኤባተን፤ ኡሱና ፈኢ እሶን ሰሰ። 33 ዱርሳና አባዶትቦ ቤጉረ ቦዬ ቶስ ታቤን፤ ቦዳልና ቦዋ ህኢ ሄገልዴ ኦቶቶላ በከ ኦሮዴ ታበ ልኙ አመ። 34 ኦፎፌና ካሌሮ አየሰ ካኮደያረን ጎራታ፡ ትትዬን ቤተሬን ካታማይና ጋጣሬ አዬሴን። 35 ጎሳ ካሌሮ አየሰ ድን ማንከግሮኮ ቤጉረ የሱሳ ቶስ ኤመተ። ዱርሳል ካኮቤረ አባዶት ሳርሰ ሳርሳተረ፡ ዋዳናቴሳ አባባተደ፡ የሱሳ ሉኪ ሄገሊ ካህማዬሮ ካኮደያረን ጎራታ አብሳተን። 36 ዱርሳ ካአባመረ አባዶት ፋያ ግራንቲ ኦዴራና፡ ምሲ ፋዬሮ ጎሳን ሰገን። 37 ማማን ካገርገሰኖን ኡልኮክ አባዶ ዱባ ታንጂን አብሳተጉረ፡ ኤሰኮ ጎጎሴሮ የሱሳ ኤባተን፤ ኡሱና ዋላቦ ታበረ አባባተ ሴተ። 38 ዱርሳል ካኮቤረ አባዶት የሱሳ ዋታ ሴይን ኤባተ፤ ኡሱ ጎአመን ሃ አመ፤ 39 “ምንካ አባባደ፡ ዋ ኩን ካፈለሮ ካንጂንክ አየሰ አየሰ።” አባዶትና የሱሳ ኡሱን ካፈለሮ ካአቲ አየሰ ካታማ ዱባ ሙተ አዬሳ ሴተ። 40 ጎሳ ዱባ ኤመቶቴሳ ኦራታ ማንከግረ ማራን፡ የሱሳ ካኮአባባታረ ጎራታ ገጌሎይ ኡሱ አታቴን። 41 ኡሱ ጎራታ አያኢሮሰ ካአማመረ ካአይሁድ ምን ኤብኮክ ዋይቻ ኤመተረ፡ ሉክ ታየሱሳ ጉት ኢየጉረ ምንኬሳ ጎጎሴሮ ኤባተ፤ 42 ሂካ ኤብ ካኮንኤባተረ ጌሰ ቶሞንኮ ላማ ታኮሌረ ቶ ኡኑት ታላል ማንከግቴ ማራንየ፤ ኤሰና ሀዉኣንተደ ጎይ ህኢ ጉት ግቴ። የሱሳ ኤሰራ ሴታ ግራን ጎሳ እሰእሰ ሻሻፋታ ኣሎ ሀርሳ ግረ። 43 ጌሰ ቶሞንኮ ላማ ኢግ ኡባታ ታኮግረ ሄለልትቲ ቶ ግቴ፤ ካአብቶ ዱባ ኦዶ ዶብጆሉን ጉሳተደ ፋይሰና ካዳንዴረ ማዮና ላኮግረ። 44 ኤሰና ምና ታሃሬን ጋባላንተደ ሳርሰኮት ብርጠ ድንተ፤ ኡባታ ካግረ ኢግና ጎርሰዋ አሌ። 45 የሱሳና፡ “እን ካድነራ አዮያ?” አመ። ዱባና ድናናዋትክሶ ካኮካካታሬን ጎራታ ጴጢሮሳ ጎታ፡ ጎሳ ዱባ ማራሙረ ኩ ሀርሳራ አመ። 46 የሱሳ አደ አባዶት፡ “ኮ እን ድነራ፤ ሁናና እንኮ ብያኖ ካሳ” አመ። 47 ሄለልትቲና እሰ ሰያምሳይ ጋልን ዳንዳናዋት ካኮአዳሳተ ጎራታ፡ ሀርኣ ኤመተዴ ኡሱ ሆረ አተ፤ መዉን ድንተቶና ምሲ ጎርሰዋ ፋይተቶ ጎሳ ዱባ ሆረ ሰጋተ። 48 ኡሱና፡ “ኡኑቴ፤ አማኖካ ኩ ፋይሰራ፤ ኖጎዳ ጋል” አመ። 49 የሱሳ ጋና አዬሳ ግራንቲ፡ አባዶት ኮ አይሁድኮክ ምን ካኤብ ዋይቻ ካሌረ ካኢያኢሮሰ ምንኮ ኤመተረ፡

“ኡኑታታ ጎተታ፤ ሂታኮ ዳንቤባን ካኦጋልሰሳር አሮሀርሰ” አመ። 50 የሱሳና ሂካ ማለረ ኢያኢሮሰነ አላማንደ፤ “አሮ አብሳተ፤ አማና ኳሬ ኡኑታታ ፋይናታ” አመ። 51 ምን ካኢያኢሮሰ ቶሰ ጎታብሮ ጴጢሮሳ፤ ያንሳና ያይቆባኮ ኡሱማሌ ኡኑትኮት ኣና ኦዶና ኳሬ ማዮና ኡሱ ዋታ ጎታብሮ ላኮዶተሮ። 52 ሀሱ ጎራታ አባዶ ዱባ ዋ ዋ አማ ኤሰን ኦታ ግረ። የሱሳ አደ፤ “አሮ ኦቴን፤ ሁዱርተታ ኳሬ ላኮጎተቶ” አመ። 53 አባዶና ጎዋኖክሴ ማንኮካሶ ማራን ኡሱን ኦሶላ። 54 ኡሱ ጎአመን ገነትሴ አበረ፤ “ተአት ኡኑ፤ ክ” አመ። 55 ኔፎ ታኡትና አባባተ፤ ጎርሰዋ ኬተ አልተ፤ የሱሳና ኤሰ ካአንቶ ኮኮ ጎጎሰሰራውን ሰገ። 56 ኦኡሙለራና ሳደን፤ ኡሱ ጎአመን ካሌሮ አየሰ ማዮና ጎጎአዬሶንኮ ሰገ።

9 የሱሳ ቶሞንኮ ላማ ኦፋራመራን ራቶ ኡመረ ዱርሳ ዱባ ጎጎቤሰናውን ማር ኦሮክ ሀወአምኮና ጎጎፋይሰናውን ሁናና ኦዶናት እሱን ሰሰ። 2 አደና ዋናናት ካዋ ጎጎላላብራውና ካሀወአማሮ ጎጎፋይሰናውን እሶ ፋረ፤ 3 ሃና አመ፤ “ራክሰኑን ዳማ ጎሌተ፤ ሸለ ጎሌና፤ ባቦና ጎሌ፤ ማራጋደ ጎሌ፤ ካካለ ካኢግልሳታን ሳርሰ አባታኖ ላኮዶትሳሮ። 4 ሀሱ ማማንኮ ታበታን ጌግን ሆራርጀ ካኮታብቲታን ካማካዮ ምኒና አዳላየን። 5 ሀሴ ካታማኮክ አባዶና እሰን ሀቆጳኖን ሄሰረ ካታማትሶ ኢሰን ታኮበያታን፤ ሴርሳና እሰኑን ጎጎሌሮን ካሉኬ ጎራ ሁርጉፋየንዴን ብያ።” 6 እሶና ኡሱ ማላበንጉሬን ዋንጋላ ላላባ ባንኤ ዱባ ዱኩባሌሳጃል ፋይሳ ማማን ማማኒ ሮራ ግረን። 7 ካጋሊላ ኡልኮክ ሞት ሄሮዶሳና፤ ኡሱ ጎራታ ካሌሮ አየሰ ዱባ ማለረ ካሌሮ አዬሲ ግርድአመ፤ አላንቲና አባዶ ኮኮ ካጣማቃራ ያንሳ ጎይኮ ኬራ አማ አዬሳ ግረ። 8 ኦካለና ኤላሳ ጎጎሙተሮ፤ ኦካለ አደነ ኦጣዋ ሄገሮልኮ ኮ ጎይኮ ኬራ አማ አዬሳ ግረን። 9 ሄሮዶሳና፤ “ካጣማቃሮ ያንሳ አን ማርግ ጎሰሰረ ጎየራ፤ ሀያ፤ ኡሱ ጋራኬሳ ሃ አዬሳማ ካማላራ ሂክ አባዶት አዮያ?” አመ፤ የሱሳ እሊ ድን ዶታ ግረ። 10 ኦፋራሜረና አባባተን ካኮኤመቲረን ጎራታ ካሌሮ ዱባ ሰገን፤ ኡሱና እሶ አተረ ቤተሳይዳ ታአማማቶ ካታማይ ካለት ባንኤ ሴተ። 11 ጎሳና ሂካ አዴሰጉረ ደቤሰሴተን፤ ኡሱና ቆጳተረ ዋናናት ካዋኮክ ጋራ እሶን ሰጋ ግረ፤ ፋይና ካኮንዶትሳሮና ፋይሰ። 12 ኡል ሄመን ሊን ላ ግራን፤ ቶሞንኮ ላማ ኡሱ ቶሰ ጋባላሜረን፤ “ካኮግና ኡል ቃሉላቶክ ማንኮሌ ማራን፤ ጎሳ ኡሱ ጎባቢ ቃማን ካግሮ ማማን ቶሰ ሴይሬን ባቦ ማንኮአምናራና ታባሪሳኖ ባንኤ

ጎሳደታራውን ጋፋር” አመን። **13** የሱሳ አደ፡ “ካለምራን እስንዋ እሱን ሰሳ አመ። እሱና፡ ሂካ ጎሳ ዱባን ካሌራ ባቦ ሴይን ጎእምን ኳሬ፡ ኖን ካግራ ባቦ ከንኮና ኩኩብ ላማኮ ላኮሮራ” አመን። **14** ኩማ ከን ካሌራ ባባር ኤሰ ግረ። የሱሳና ኡሱኮ ኦኦጋልሳታራ፡ “ጎሳ ኮንቶም ኮንቶሚ ቤሳ ሀማጺሳ” አመ። **15** ኡሱኮ ኦኦጋልሳታረና ጎሳሰጋመሮ ማለ እባዶ ጎሳሀማጽሮን የሌን። **16** የሱሳና ባቦ ከና ኩኩብ ላማና አበረ ዳሩር ቶስ ኤለዴ ዲያ ዋ ጋላቴረ፡ ኤብሰ አተረ ጎሳውን ሆረ ጎሳሮርሰራውን ኡሱኮ ኦኦጋልሳታራውን ሰሰ። **17** ዱባና አመን ባራረን፤ ኡሱኮ ኦኦጋልሳታራና እሱኮ ታሄሰቶ ሀንባ ዱጉድ ቶሞንኮ ላማ ምግ ኬሴን። **18** ኤሰኮ አባባተረ የሱሳ ካለ ኤባታ ግረ፤ ኡሱኮ ኦኦጋልሳታረና ኡሱ ቶስ ኤመተን፤ ኡሱና፡ “ጎሳ እን እዮያ አማራ?” አመ ሆሳተ። **19** እሱና፡ “ኮኮ ካጣማቃሮ ያንሳ፡ ካካለ ኤላሳ፡ ኩክ አደ ካሆሬ ካሃገሮልኮ ኮ ጎይኮ ኬራ አማራን” አመን። **20** የሱሳና፡ “እስን አዴን እን እዮያ አማታን?” አመ። ጴጢሮሳና፡ “እት ክርሰቶሳ ካፋይሳቶ ዋይ ካአሳባንተቶታ” አመ አባበ። **21** የሱሳ ሂካ ማዮና ጎሳእዬሶንኮ አታይሰ ሰገ። **22** አደና፡ “ኤረ ካእባዶ ራኮ ታሞጋን አታይን ዶትሳራ፤ ኡሱማሌ ጃርሶለይ፡ ቱቃሞኮክ ዋይቻልና ሴራ ኦኦጋልሰሳራን ዶሌ ዲዳምናራ ጎይናራ፡ ታሴድ አርና ጎይኮ ክናራ” አመ። **23** ኤሰኮና ዱባውን፤ “እን ዴበ ሰሰዬን ካዶታታራ ማዮና ጎግረ እስኦቴሳ ሀካካተ፤ ማሰቃሊቴሳ አርጌቶ ሰዳይጉረ እን ዴበ ሀሰሴቶ። **24** ሙን ጎእንቴን ኔፎቴሳ ፋይሳይን ካዶታታራ ዱባ ባሳታራ፤ ኔፎቴሳ እን አመረ ካባሳታራ አደ ፋይሳታራ። **25** እባዶ እላም ዱባ ዋረኤ ጎሄላተ ኔፎ አድ ጎባሳተ ጎርቱን ጎሀንቂሳተ ላኦ መታ? **26** ማዮና እዬና ሃፋራኬይ ጎሙሌ፡ ኤረ ካእባዶ ካባጃቴሳና አቦኬሳት ካባጃ ኡሱማለና ቁሉክ ኤርግቻኮት ካባጃ ካኮኤማተ ጎራታ ሙልናራ። **27** እን ሩምና አማራ፤ ህታኒ ኦኦሌራን ኦሮኮ ዋናናት ካዋ ሀንዴኖን ካጎኖን እባዶ ግራ” አመ። **28** የሱሳ ሂካ ታኮእየሰረ አሪ ሰዴድኮ አባባተረ ጴጢሮሳ፡ ያንሳና ያይቆባ አተረ ኤባይን ዋዳም ቶስ ቤ። **29** ኤቢ ጉት ግራን ሆረቴሳ ኢግልሳንተ፤ ሳርሰና ሀንቃ እን ሀንቃየ ጉማራ ሌ። **30** ጎርሰዋ እባዶጃ ላማ፡ እሱና ሙሴና ኤላሳ ኡሱኮ ዋታ እዬሳ ግረን፤ **31** ካባጃ ሙቴረን፡ ኢየሩሳሌም ሊን ካግሮ ሂካ እላምኮ ጎይኬሳክ ጋራ እዬሳ ግረን። **32** ጴጢሮሳና ዋታ ኦግሬውን አደ ሁዱሮ ኢልኦ እስላተደ ሁዱረን ግረን፤ ካኮናባዳሬን ጎራታ ካባጃቴሳ ኡሱኮ ዋታ ኦኦሌራን

እባዶጃ ላማ ዴን። 33 እባዶጃና የሱሳኮ አሳባማን ሴታ ግራን፣ ጴጢሮሳና፡ “ጎታኬ፣ ሀታኒ ግርነዋ ሮን ካእዳንክየ፣ ሃንሱን ዳስ ሴድ ማዳርና፤ ቶ ኩዬን፣ ቶ ሙሴን፣ ቶና ኤላሳን ልናታ” አመ፤ ኡሱ ኡሱን ካእዬሳረና ላኮእዴሳረ። 34 ሂካና እዬሳ ግራን ዱማንቻ ኤመተረ እሶ ሆጎግስ፤ ዱማንቻ ቶስ ካኮታባሬን ጎራታ አብሳተን። 35 ዱማንቻ ኦሮና፡ “እን ካእሳባየራ ኤረክ ሂካያ። ኡሱና ማላ” ታእማታ ያየ ማልሳንተ። 36 ያየና ካኮማልሳንተተ ጎራታ የሱሳ ካለ ቤረ ሙተ፤ ኡሱኮ ኦእጋልሳታረና እየሰ ዋዳናታትሶይ አባተን ኳሬ ካዴራን እየሰ ኡሱ አልማይ ማዮና ላኮእዬሴራን። 37 ታላም አሪ እሶ ዋዳምኮ ካኮዳጋሬን ጎራታ፣ ካሞጋን ጎሳ ኤመተረ የሱሳን ዋታ ኤሰለ። 38 ሀሱ ጎራታ ጎሳ ኦሮኮ እባዶት ኮ ያየ ጦቂሰረ፡ “ካእጋልሰሳቶ፤ እዬን ካግራ ኤረ ኡሱ ካላል ማንኮሌ ማራን ኤረኬ አት ጎጎዴቶ ኤባታራ። 39 ባቲክ እያና ጎኬሮ ደራኣ ኦካራ፤ ሳንባ ጉድሳ ኡለ ቦጫራ፤ ሚራኣ ካኮግሰሮ ጎራታ ራኮ ታንጅን ኢሳጋራ፤ 40 ኩኮ ኦእጋልሳታራን ባቲክ እያና ኡሱኮ ጎጎቤሰራውን ኤባየ፤ እየሱን ጎእመን ላኮእሶ ዳንዴራን” አመ። 41 የሱሳና፡ “እማዋ ካልት ታዋጫጫንተ አላታን፣ ሀጌ ታ ጌሮን እስኔ ዋታ እን ግርናራ? ሀጌ ታ ጌሮን ኡብሰናራ?” ኤሰኮ እባዶትን “አላ ኤረካ ሂታራ ኬን” አመ። 42 ኡኑ ኤመቶ ጉት ግራንቲ ባቲክ እያናና ኡል ሉጉደረ ኡለ ቦጫ፤ የሱሳ ጎእመን ባቲክ እያናና ሀድሰረ ኡኑ ፋይሰ፤ ኣቦኬሳን አባባ ሰሰ። 43 እባዶ ዱባና ሁና ካዋይ ማመ። ኡሱ ካፈለሮ ዱባናና እባዶ ዱባ ማማ ግራንቲ፣ የሱሳ ኡሱኮ ኦእጋልሳታራን። 44 “ሂካ እን ካሰጋሮ እየሰ ዱዶ ጎጎኢሎኖንኩ፤ ኤረ ካእባዶ ሮር ገን ታእባዶይ ሰሳምናራ” አመ። 45 እሶ ጎእመን ሂካ እየሰ ላኮእዴሰረን፤ ጎጎሻዶንኮ እየሰ ጎላተ ግረ፤ ኡሱ አባብ ሆሳይና አብሳተን። 46 እሶ ኦሮኮ አዮ ሮራሮ ኡሱኮ ኦእጋልሳታራን ኦሮ ዶጋማ ኬተ። 47 የሱሳ ዋዳናታትሶክ ያዳ አዴሰረ፤ ይትት አበጉረ እስኦቴሳ ዶሌ ኣልሰ፤ 48 ሃና አመ፡ “ሂካ ይትት መገኬይ ካቆባታራ ማዮና ጎግረ እን ቆጶታራ። እን ካቆጶታራ አደ እን ካፋረሮና ቆጶታራ። እስን ኦሮኮ ካየራታራ ኡሱ ዱባንኮ ሮራራ።” 49 ያንሳና፡ “ጎታኬ፣ እባዶት ኮ መገካይ ዱርሳ ቤሳ ግራንቲ ዴን፤ ሮኔ ዋታ ሌ ዴበ ማንኮሰሰኖን ማራን ትርን ሄንደ” አመ። 50 የሱሳና ኦሮትርቲን፤ እስን ዱባ ካዲዶን ኡሱ እስኔ ዋታ ግራ አመ። 51 የሱሳ ዳሩር ቶስ ካኮብናረ ጎራታ ካኮጋባላማረ ጎራታ ኢየሩሳሌም ቶስ ሴይን ጎሳተ ኬ። 52 ኡሱኮ ጣይሰ ኦሀንዳረን ኤሰራ ፋረ። እሶና ኤካይን

ካዶትሳሮ ጣይ ኡሱን ኤካሰን ኮ ካሳማርያ ማማን ቶስ ታቤን። 53 ጎሳ አደ የሱሳ ኢየሩሳሌም ቶስ ሴታኖ ማንኮአዴሰረ ማራን ኡሱ ላኮቆጸተ። 54 የሱሳኮ ኦኦጋልሳታረና ያይቆባና ያንሳና ሂካ ካኮደያረን ጎራታ፡ “ጎታ፡ [ኤላሳ ጎሳአዬሰር] ኤለን ዳሩርኮ ዳግደ ጎሳባሶን ኖ ጎሳአጃጂኖን ፈኢ ሰሰናታ?” አመን። 55 የሱሳ አደ ካምባል አመረ ሀድሰረ “እሰን [ምስክ አያናኮታን ላኮካሳን]፡ ኤረ ካአባዶ ካኮንኤመተራ ኔፎ ታአባዶ ፋይሲንያ ኳሬ ባሰን ላኮኖ” አመ። 56 ኤሰኮ ኬንጉረን ማማን ካካለና ሴተን። 57 ራድ ሴታ ግራን አባዶት ኮ ጋባላመረ፡ “አት ማንኮሰያቶ ዱባ እን ኩ ዴበ ሰሴይናራ” አመ። 58 የሱሳና፡ “ጌዳላል ጉምቢ አባ፡ ክምብርጃልና ምን አባ፡ ኤረ ካአባዶ ጎአመን መተ ካኮታብሳሮ ዱዶ ላኮአቦ” አመ። 59 ካካለ አባዶትን አደ፡ “እን ዴበ ሰሴ” አመ። አባዶትና፡ “ጎታ፡ ጣይ ሴይረ አቦኬ ቃማላሮ” አመ። 60 የሱሳና፡ “ካጎይናራ ካጎየሮ ጎሳቃማላሮ ኢሳጋ፤ አት ጎአመን ሴጉዴ ዎኖናት ካዋ ላላቢ” አመ። 61 ካካለ አባዶት አደ፡ “ጎታ፡ ዴበ ሰሴታን ሰሴይናራ፤ እየሱን ጎአመን አባባይረና ሆራርጀ ምንኬክ አባዶ ኖሳዳ ግራ ጎሳአምሮ ኢን ፈኢ ሰሰ” አመ። 62 የሱሳ አደ፡ “እራ ኦቲን ማጣ አበረ ሃርዴ ካዎቻራ አባዶ ዎኖናት ካዋውን ካዶትሳሮ ላኮኖ” አመ።

10 ኤሰኮ አባባተረ ጎታ ካካለ ቶደባታምኮ ላማ አባዶ አሳበጉረ ሹመ። ማንኮሴታሮ ካታማና ባንኤ ዱባ ኡሱኮ ጎሳሆረሀይናውን፡ ላማ ላማ የለረ ፋረ፤ 2 ሃና አመ፡ “ካፈላምራ ካም ካምጋንያ፡ ኦፈላራን አደን ኡጫርያን። ሃንሱን ካምኮክ ጎታ ኦፈላራን ታካም ባንኤ ጎሳፋሮን ኡሱ ኤባየን። 3 ጎርታ ሴዬን፡ እዳድ እን ሀዬይ ኦሮ እሰን ፋርናራ። 4 ኮሮጆ ሸለ፡ ጎርቱን ከፈሮ አሮአባቴን፤ ማኖኑና ራድ ኖሳዳ አታ አሮአዳላቴን። 5 ምን ካማካዮና ጎታብተን ጣዴን፡ ኖሳዳ ሂካ ምኑን ሀሌቶ አማ። 6 ኖሳዳ ካጌላታራ አባዶ ሀሴ ጎሳረ፡ ኖሳዳታትሰን ታብቶዋ። ጎርቱን ኖሳዳታትሰን እስኑንዋ አባባይናታ። 7 እስኑን ሆረ ካሮርሰን ዱባ አማና ጣማና ኡሱ ምኒ ሀማጸ፤ ካፈላታራ ዳሞዛ ሄላይን ዶትሳራ። ምን ኮኮ ካካለ ቶስ አሮማራሙርቴን። 8 ማኤት ካታማ ቶስ ጎታብቴና አባዶ እሰን ጎቆባተ፡ ካሆረ ሮርሰን አማ። 9 ኤሰ ሀወአማ ኦግራን ፋይሳ፡ ‘ዎኖናት ካዋ እሰን ቶስ ጋባላመራ’ አማ። 10 እየሱን ጎአመን ካታማ ቶ ቶስ ታባዴን እሰን ጎቆባታናዋተን፡ ራድ ብያዴን ሃ አማ፤ 11 ‘ሉቃኦታን ጉት ካግሮ ካታማትሰንክ ጎራ ራድ ብኒ እሰን ሴርን ሁርጉፋይናና፤ እየሱን ጎአመን ዎኖናት

ካዋ ጋባላማኖ ሂካኒ አዳሳ።’ 12 ታሙርት አሪ ኤስ ካታማኮ ሶዶምዉን ሙሮ ፋፋዳቶዋ እማራ።” 13 “አኔ ኩን ኮራዝ! አኔ ኩን ቤተሳይዳ! እስኒ ካፈላመረ ባሳ ጢሮስና ሰዶና ካፈላመሮ ሊ ግረዋ፡ ህጋኖ ካጋንባል ሳርስ ሳርሳይሬን፡ ቡሉሎ ካካባይሬን ጨቦኮ ጉላ ጋል ግራንዋ። 14 እየሱስ ጎእመን ዋ ታኮፍርድሮ አሪ እስንኮ ሮር ጢሮስና ሰዶናን ሙሮ እሱን ፋፋዳቶዋ። 15 ተአት ቅፍረናሆም፡ ዳሩር ቶስ ጦቂ ጦቂ አንተ? ቦዋ ኦርድ አናታ። (Hadēs g86) 16 “የሱሳና ኡሱኮ ኦኦጋልሳታራን እስን ካማላራ እን ማላራ። እስን ካቆጶኖን እን ላኮቆጶታሮ፡ እና ካቆባኖን እን ካፋረሮና ላኮቆባታሮ።” 17 ቶዶባታምኮ ላማና ገጌላታ አባባተረን፡ “ጎታ፡ መገካይ ዱርሳ ዱዶ ኖን አጃጃመ” አመን። 18 የሱሳ፡ “ጸላየ ሀንቃ እን ዳሩርኮ እያ ግራን እን ዴ። 19 ጎርታ ሀበሳና ጫጫቦ ጎጎዳዳርታውን፡ ዱናኮክ ሁና ዱባ ጉት ኦዶናት እን እስኩን ሰሰራ፤ እስን ካምርራ እየሰ ኮና ላኮግሮ። 20 ሀሌዎ ኳሬ ካሜላን እያና ማንኮአጃጃመሮ ማራን አሮገገላተን፤ መገክሰን ዳሩሪ ማንኮጻፋመሮ ማራን ኡሱ ገጌላየን” አመ። 21 ሀሱ ጎራታ የሱሳ እያና ቁሉክ ገገላተረ፡ ካዳሩረና ካኡሌ ጎታ፤ አቦኬ፤ ሂካ ዱባ ቃሮሌኮና ኦካሳንኮ ሰያምሰደ ይሱን ማንኮቱሰ ማራን እን ኩ ጋላታራ፡ እ አቦክ፡ ሂካ ፈልን ታኢዳን ፈኢታ ሌተታ። 22 “ካመን ዱባ ጉት ኦዶናት አቦኬ ዶለኮ ኢን ሰሳመራ። አደና ኤሪ አዮዮ ኦዶ ኳሬ ካማላበራ ካካለ ላግሮ። ኦዶ አዮዮና ኤሪ ኳሬ፡ ኤሪና ኦዶ ቱሰን ፈኢ ካኮንሰሳሮ ኳሬ ኦዶ ካማላብራ ላግሮ።” 23 ኡሱኮ ኦኦጋልሳታራን ቶስ ካምባል አመረ እሱን ካለ ሃ አመ፡ “እስን ካደያታን ኦደያራን ኢልኦ ኦሶማሳመንያን። 24 ካምጋን ካሄገሮልና ዎኖላል እስን ካደያታን ድን ዶተረን ላኮዴናን። እስን ካማልቴታን ማልን ዶተረን ላኮማለራን” አመ። 25 ሂክማ አሪ ቶ፡ ሴራ ካሙሴ ካካሳናየ ኮ የሱሳ ጫፍን ዶተረ፡ “ካኦጋልሰሳቶ፡” ጅሩ ጅሮማክ ግር ኤልን “መ ፈላ?” አመ። (aiōnios g166) 26 የሱሳና፡ “ሴራይ ካጻፋመራ መያ? ምሲ ናባባታ?” አመ አባቢ። 27 እባዶትና አባቢረ፡ “ጎታ ሄዶካ ታአማጋንተ ዎዳናኮ፡ ታአማጋንተ ኔፎ፡ ካአማጋመ ሁናኮና ታአማጋንተ ቆፋኮ ጌላ፡ ኦላታ አስኦታ ማለ ጌላና” አማራ አመ። 28 የሱሳና፡ “ልክ አባብቴታ፡ አትና ኡሱማሌ ፈል፡ ጅሩ ጅሮማክ ግር ግርናታ” አመ። 29 እባዶትና እስኦቴሳ ቁሉክ የላዪን ዶታተረ፡ “አሚና ኦላት አዮታ” አመ። 30 የሱሳና ኡሱን አባቢ፡ “እባዶት ኮ ኢየሩሳሌምኮ ኢያርኮ ቶስ ዳጋ ግራን ገነ ታሽታይ እዬ። ሳርስና

ቃሬን ቦጨን፣ ጎይ ህኢ ጉት ሉጉደን ሴተን። **31** ቱቃሞ ኮ ደራኣ ሀሱ ራንደ መተጋማቶ ሄገልዴ ዳጋ ዴጉረ ፋክ አመ ሮረ። **32** አደና ዋዩት ኮ ኤስ ባንኤ ጎንጌይ ዴጉረ ኡሱና ፋክ አመ ሮረ። **33** ኮ ሳማራውት ጎአመን ሉክታሮሮ ሴታ ግራን አባዶት ታኮግሮ ባንኤ ጌ። ካኮደያረ ጎራታ ነኤይሳተ። **34** ጋባላመረ ሜጋል ጉት ዛይቲና ካዋይኒ ጣሞ ክበረ ሸየ፤ ታቲሳ ደሜር ጉት ካየጉረ ማርት ካኮባራቶ ምን ጌሰ። ኤሴና ካርካሬ። **35** ታላሞ አሪ ጣጋራ ላማ ቤስረ ማርት ካኮባራቶ ምንኮክ ኦዶምኔቱን ሰሰጉረ፤ ‘ሂካ እባዶት ሀዳራ ዴና። ሂካኮ ካንጂን እት ካቤሳቶ ማራጋደ እን አባባታ ኩን ሙሮሞ’ አመ። **36** “ጎርታ፡ ሂናኣ ሰድኮ ሸቶሌ ገነ ካኢየሮ እባዶትን ኦላ ካሌረ ኤክ እን ላራ?” አመ። **37** ሴራ ካካሳናየና “ካነኤይሳተሮዮላ” አመ። የሱሳና፡ “እትና ሴዴ ኡሱማሌ ፈል” አመ። **38** የሱሳና ኡሱኮ ኦአጋልሳታራን ዋታ ራ ሰሴታ ግራን፡ ማማን ኮ ታበ። ማርታ ታአማንተቱ ቶ ሄለልትቲና ምን ካክሴይ ኡሱ ቆጶተ፤ **39** ኤሰን ማይራመ ታአማንተት አባ ግቲ። ማይራመና ሃፋራ ማላ ታጎታይ ሉኪ ሄገሊ ሀማጽተ ግቲ። **40** ማርታ ጎአመን ፈሎ ጂናኒ ጎራታ ባሳታ ግቲ፤ ኡሱ ቶስ ጋባላንተደ፡ “ጎታ፡ አባት ፈሎ እን ካላሉን ሉጉድደ ጎሀማጽቶ ጫልክነተ ድያታ? እን ጎጎጋርጋርቶ ሰግቶላ” አነተ። **41** ጎታ ጎአመን አባበረ፤ “ማርታ፡ ማርታ፡ እት ካሞጋን አየሱን ጫናቃማታ፡ ጂራንጂራታ። **42** ካዶትሳራ ጎአመን አየሰ ኮ ካላልያ፡ ማይራመ ታኢዳን ምና አሳባተታ፤ ህክና ኤሰኮ ላኮአታሞሮ” አመ።

11 አሪ ቶ የሱሳ ባንኤ ቶይ ኤባታግረ። ኤብና ጎጎጉድሴ፡ ኡሱኮ ኦአጋልሳታረንኮ ኮ፡ “ጎታ፡ ያንሳ፡ ኡሱኮ ኦአጋልሳታረን ኤብ ጎጎአጋልሰሰሮን እትና ኤብ ኖ አጋልሰሰ” አመ። **2** የሱሳና ሃ አመ፡ “እሰን ጎአመን ሃ አማ ኤባየን፡ “አቦካን፡ ቁሉክ መገካካ ሀካባጃመ፡ ዋኖናትካ ሀኤመቶ። **3** ካህታርቲ ባቦካን ህታር ኖን ሰሰ። **4** ባሰካካን ሀሄሶ አም ኖና ኖ ካሚረኤሮ ሀሄሶ ጎጎአማኖ፡ እት ባሰካን ሀሄሶ አም፡ ጫፍት ኦሮ ኖ አሮታብሰ፡ ካሜላንኮ ኖ ሃስ ኳሬ።” **5** አደና ሃ አመ፡ “እሰንኮ ኮ ካጌላታራ ጎግረ፡ ሄመን ጠኤ ኡሱ ቶስ ሴይረ ካገላታቶኬ! ባቦ ብጠ ሴድ ኢን አምአይሰ፤ **6** ሳት ኮ ራኮ ኤመተረ ኡሱ ሆረ ካካይራ ባቦ ኮና ኢን ላኮግሮ” አመ ኤባተ ጎአምኔ፡ **7** “ምኒ ኦሮ ካግሮና፡ ‘አሮራክሰ! ኡፋና ጨፋመራ፡ ይሰክና ኢን ዋታ ሁዱረራ፡ ጎርታ ኪጉረ ኩን ሰሰን ላኮዳንዳሮ’ አመ አባባራ? **8** ኡሱ ካጌላታሮ ላኖይ ኪጉረ ጎሰሳናዋተና ሱረ፡ ኤባተ ማንኩጢበሮ

ማራን ካደትሳሮ ዱባ ሰሳራ። 9 “ሃንሱን እን እስኔ ሃ አማራ፡ ኤባየን ሰሳምሮዋ፡ ዶታዬን ሄላታንዋ፡ ኡፋና ባባሳየን ባናምሮዋ። 10 ኣላንቲና ካኤባታራ ዱባ አታታራ፡ ካዶታታራና ሄላታራ፡ ኡፋ ካባባሳታሮና ባናማራ። 11 እሰን ኦሮ ኦዶ ሌ ግራን ኤረ ኩኩቱብ ጎኤባተ ሀበሳ ካሰሳራ ግሮ? 12 ጎርቱን ቡጳ ጎኤባተ ጫጫቦ ሰሳራ? 13 እሰን ኦማላን ሌተን ግራን ይሰክሰኑን ካእዳንክ እላቦ ሰሳኖ ጎማላብቱን፡ ካዳሩረ ኣቦክሰን ሀያ ኦኤባታራውን እያና ቁሉክኮ ምሲ ሮርሰ እስኑን ሰሳናዋታራ!” አመ። 14 አሪ ቶ የሱሳ እባዶትኮ ህኢ ዱድሰ ካአበረ ባቲክ እያና ቤሳ ግረ። ባቲክ እያና ካኮቤ ብያረ ጎራታ ህኢ ካዱደረ እባዶት አዬሰ፡ ጎሳና ማመ። 15 ኮኮ አደ፡ “ዱርሳኮክ ዋይቻ፡ ካሌሮ ብኤልዘቡልኮክ ሁና ዱርሳ ቤሳራ” አመን። 16 ኮኮ አደ ጫፍን ዶተረ ዳሩርኮ ኡሱ ማላታ ጎጎቱሰሮ ኡሱኮ ዶታ ግረ። 17 የሱሳ ጎአመን ቆፋትሶ አዴሰረ ሃ አመ፡ “እሰ እሰኦሮ ካለካለ ካበያራ ዋኖናት ዱባ ባይናራ፡ እሰ እሰኦሮ ካለካለ ካበያራ ምንኮክ እባዶ ዳርአምናራ። 18 ጸላዬና እሰ እሰኦሮ ካለካለ ጎበተ ዋኖናትክሴ ምሲ አታራ? ዱርሳ ዱርሳኮክ ዋይቻ ቤሳራ እንቱን እዬሳታን። 19 ጎርታ እን ዱርሳ ካኮቤሳራ ዱርሳኮክ ዋይቻይ ጎሌ፡ ይሰክሰን አድ አዮ ቤሰናራ? ሃኑን እሰ እሰን ጉት ኦፍርዳራን ልናራን። 20 እን ጎአመን ዱርሳ ካኮቤሳራ ሁና ካዋይ ጎሌ፡ ዋኖናት ካዋ እሰን ቶሰ ኤመታኖ አዴሳ። 21 “ካአቲ እባዶት ሁ ካጀረን ጎጎዶትሳሮ ሞዋተረ ምንኬሳ ጎኡተ፡ ኡራዋ ኦቴሳ ኖጎዳ ኦራማራን። 22 እየሱን ጎአመን ካአቲ ኡሱኮ ካሮራራ እባዶት ኤመይረ ባሰረ ጎአዋደ አብዳተ ካግረ ሁ ካጀሬንኮክ ሞዋኖ ፋርሰሳራ። ኦቦጃመረን ኡራዋ አተረ ካካለቱን ሄዴዳራ። 23 “እነታ ካሌኖን እን ዱዳራ፤ እነታ ካኩኩይሳኖና ዳርአታራ። 24 “ባቲክ እያና እባዶኮ ካኮቤሮ ጎራታ ፎልሲ ዶታታ በከ ካልት ባንኤ ካፋፋራ፤ ሀሄላኖን ጎሄሰሮ፡ ካኮቤሮ ምን ቶሰ አባባይናራ አማራ። 25 ጎአባባሮና ምን ሻሻካራመ ካኤካተሮ ሄላታራ። 26 ኤሰኮ አባባተ ሴተረ ካካለ ኡሱኮ ኣሎ ካማላን ዱርሳ ቶዶባ አተ ኤመታራ፤ ታበረ ኤሴና ግራራ፤ ሀሱ እባዶትን ታሆራርጃኮ ሮር ካሃረ እየሰ ካማላን ልናራ።” 27 የሱሳ ሂካ እዬሳ ግራንቲ፡ ጎሳ ኦሮኮ ሄለልትቲ ቶ ያየ ጦቂሰደ፡ “ኩ ታሰደታ ገዴምና አት ኦኢላተታ ናሳሶ ኦሶማሳመንያን” አንተ። 28 ኡሱ አደ፡ “ኦሶማሳማን ሃፋራ ካዋ ማለሬን ፈሎ ኦሀይሳራንያን” አመ። 29 ካሞጋን ጎሳ ኩኩማ ካኮቤታረ ጎራታ የሱሳ ሃ አማኖ ሀጋእበ። “ህት አላታን

ታማላንታ፡ ባሳክ ማላታ ደታታ፡ እየሱን ጎአመን ካዮናሳ ማላታ ኳሬ ካካለ
 ማላታ ላኮሰሳምና። 30 አላንቲና ዮናሳ ካነኔዌ እባዶን ማላታ ጎሳሌሮን ኤረ
 ካእባዶ ህታ አላታኑን ማላታ ልናራ። 31 ኡል ካሄገለት ኦርዋኖ ታዋ ታፍርዳ አሪ
 ህታ አላታን ዋታ ኪደ ፍርድናታ። ኤስ ታሶሎሞን ቃሩማ ማልን ኡልኮት ጋቾኮ
 ኤሜተታ። ሂክማ ሶሎሞንኮ ካሮራራ ህታኒ ግራ። 32 ካነኔዌ እባዶ ፍርዱ
 ታዋት አሪ ህታ አላታን ዋታ ኪጉረ እሶ ጉት ፍርድናራን። እሶና ካዮናሳ ላላባኖ
 ማሌረን ጨቦኮ ጉላ ጋሌራን፡ ሂክማ፡ ዮናሳኮ ካሮራራ ህታኒ ግራ። 33 “ዳብ
 ሀንቃይሳተጉረ ጎላታት ባንኤ ጎርቱን ዳቾ ግርቢሳተ ሄገለ ካካታራ ማዮና
 ላኮግሮ። ምን ካታባራ እባዶ ኢፋ ጎሳዴሮ ቦላንሶ ጉት ካታራ። 34 ማርካክ ኢፋ
 እልታታ፡ እልታታ ፋያሌሳ ጎሌተ ማር ዱባ ኢፋ ላራ፡ እልታታ ታሀዉአማቶ ጎሌተ
 አደ ማርካ ሙጉድ ላራ። 35 ሃንሱን ኩ ኦሮ ካግራ ኢፋ ሙጉድ ጎሳሌኖንኮ ኢስ
 ኦራ። 36 ጎርታ ማርካ ዱባ ኢፋ ጎሌና ሙጉድ ታሌተታ ታማረ ባንኤ ጎዋታንተ፡
 ማር ዱባ ዳብ ዋኣመ ካሀንቃይሳሮ ግታክ ሀንቃራ።” 37 የሱሳ እየሰ ጎሳጉድሴ፡
 ካፋራሳው እባዶት ኮ ኡሱ ዋታ ባቦ ጎሳአምሮ የሱሳ ኡማተ፡ ኡሱና ዋታ ታበረ
 ባቦ ኣምን ሀማጼ። 38 ካፋራሳው እባዶትና የሱሳ ባቦ ኣማኖኮ ሆረን ሴራክሶክ
 ማለ ገነ አላና ዋት ካኮደያረ ጎራታ ሳደ። 39 ጎታና ሃ አመ፡ ግዳ እስን እባዶ
 ካፋራሳው ካቡርጨቆና ካሳን ጉት ሙጭሴን እልሳታን፡ ኦሮኦትሰን ጎአመን
 ሳማኖና ሜላነይ ኦአማጋሜንያን። 40 እስን ጎዋሌ ካሳረ ካመጠራ ካኦሮና
 ላኮመጠሮያ? 41 እየሱን ጎአመን ቡርጨቆ ኦሮና ያላኣይ ኦሮ ካግሮ ቤሳዴን
 ህየሳን ሰሳ፡ ኡሱ ጎራታ ዱባና ሙጭ ካአመ ሌራ። 42 “እስን እባዶ ካፋራሳው
 አድ ኣኔ እስኑን፤ አኑጋኮና ጣሎተኮና ኡሱማሌ አካክልተ ዱባኮና ባርክንተ
 ቤሳታን። ጎሌና ካሩም ፍርዳና ዋ ጌላታኖ ዲዳታን። እየሱን ጎአመን ኣንክ
 ሀኢሶን ሂካ ፈልን ደትሳረ። 43 “እስን ፋራሳዊል ኣኔ እስኑን አይሁድኮክ ምን
 ካኤብ ካካባጃ ባርጨማ፡ ግያ ኦሮ ኖጎዳ ኣትን ደታታን። 44 “እባዶ ሀማላቦን
 ጉት ካኮሰሴታሮ ካጎላተ ቃማል ኣን ማንኮላታን ማራን፡ ኣኔ እስኑን።” 45
 ካሙሴ ሴራ ኦካሳንኮ ኮ የሱሳን፡ “ካኢጋልሰሳቶ፡ ሃ ጎአየሶ ኖ ኢንጋማኖያ” አመ
 አባቦ። 46 የሱሳና ሃ አመ፤ “እስን ሴራ ኦኢጋልሰሳታና ኣኔ እስኑን፤ እባዶ ሰድን
 ታዳንዴኖን ታኦቲ ሰዳን ሰድሳታን፤ እስን መተክሰኑን ፈሪና ዱዶ ላኮድናታን።
 47 “ኣቦጃላልክስን ካላጋዴራን ካሄገሮኮክ ቃማል ማንኮኤካሳታን ማራን፡ ኣኔ

እስኩን። 48 ጎርታ አብጃላልክሰኒዕ ፈሎ ኦኦታይሳታን አቶጆልታን። እሶ ካሄገሮ ላጋዴን፤ እስና ቃማልክሶ ኤካሳታን። 49 ሃሱና ቃሩማ ታዋ ሃ እንተ፤ ‘ካሄገሮና ኦፋራመራን እስኩን ፋርናራ፤ እሶና ኮኮ ላጋድናና፤ ካካለና ሆሮረናና፤’ 50 ሃንሱን ህታ አላታን አላም ታኮመጣመሮኮ ሀጋአበረ ካኡባተሮ፤ ካሄገሮኮክ ኢግ ዱባን ታሆሳምናቶታ። 51 ካኣቤላ ኢግኮ ሀጋአበረ፤ ካጃሮሶና ምን ካኤብ ኦሮ ካኡባተሮ ካዛክራሳ ኢግ ታጌሮ ዶታማራ፤ እ አማራ፤ ህት አላታን ሂካኩን ታሆሳማቶታ። 52 “እስን ካሙሴ ሴራ ኦካሳን ኣኔ እስኩን፤ ካማላባሮ ኡፋ ካኮባናራን ቁልፍ ባስን ኣተታን፤ እስን መተክሰኩን ላኮታብቴታን፤ ኦታብናራና ትርቴታን።” 53 የሱሳ ኤስኮ ካኮበያረ ጎራታ፤ ሴራ ካሙሴ ኦኦጋልሰሳሬንና ፋራሳው ጎማላን ዱዳና ሆሰኒ ሆሳታ ጃጅሳሮ ሀጋአበን። 54 ህኢቴሳኮ ካብያሮ ሃፋራ ኡሱ አብን ጋዳ ግረን።

12 ሀሱ ጎራታ ኩማ ካሞጋኒ ካቶታምራ ጎሳ እስ እስ ታዳዳራሮ ጌግን ኩኩ አመ ግራን፤ የሱሳ ኡሱኮ ኦኦጋልሳታራውን ሃ አማሮ ሀጋአበ፤ “ፋራሳውልኮት ሜላንኮ እስኦትስን ኦራዬን፤ ህክና ኢፍሳዳናትያ። 2 ካሙቶን ካጎላተራ፤ ካአዴሳምን ካስያመራ ኮና ላግሮ። 3 ሃንሱን እስን ሙጉድ ካአዴሳታን ዱባ ኢፋ ማልሳምናራ። እልፍኒ ኦሮ ነቤ ማርካ ካአዴሳታን ዱዳብ ሰጋምናራ። 4 “ኦጌላታሮኦተ፤ እን ሃ አማራ፤ ሶ ካላጋዳሮ ኤስኮ አባባይ አድ ኮና የልን ካዳንዴናንኮ አሮአብሳቴን። 5 እየሱን ጎአመን እስን አብሳይን ካዶትሳሮ እን ቱሰናራ፤ ካኮላጋደ ጎራታ ታባኖን ኤለኒ ሉጉድን ኦዶናት ካአቦ ዋ አብሳዬን። እ፤ ኡሱ አብሳዬን አማራ። (Geenna g1067) 6 ክምብርጃል ከኖ ሳንትሚ ቶይ ላዳዳላማሮላ? ሀሌዎ ኳሬ ኤስኮ ቶ ዱዶ ዋይ ዶሌ ላኮኢሎታማቶ። 7 መተ ካክሰንኮክ ፊጣ ዱባ ካቶታመያ፤ ጎርታ አሮአብሳቴን። ካሞጋን ክምብርጃልኮ እስን ታሮራቶ ላኦ አብታን። 8 “የሱሳና እን እስኔ ሃ አማራ፤ እባዶ ሆረ እን ካአቶታሮ ዱባን ኤረ ካአባዶ አደ ኤርግቻ ካዋ ሆረ ኡሱን አቶትናራ። 9 እባዶ ሆረ እን ካካካታራና ኤርግቻ ካዋ ሆረ ካካምናራ። 10 ኤረ ካአባዶ ጉት ካየራሰሮ ሃፋራ ካአዴሳራ ዱባ ሀሄሶ አማማራ፤ አያና ቁሉክ ካሀባራራ አደ ሀሄሶ ላኮአማማሮ። 11 “እባዶ እስን አብረ አይሁድኮክ ምን ካኤብ ሞት ቶንሳ ኦዶናት ካአቦ ቶስ እስን ካኮጌስ ጎራታ፤ ምሲ ጎርቱን መ አም አባብናታን አሮያዴን። 12 ሀሱ ጎራታ አያና ቁሉክ እስን አዬስን ካዶትሳሮ አጋልሰሰናራ።”

13 ጎሳ ኦሮሞ እባዶት ኮ፡ “ካእጋልሰሳቶ፡ አቢክ እዩን ኤላ ጎሳሄዳድሮ ሰገ”
 እመ። **14** የሱሳና፡ “እት እባዶት፡ እን እሰን ጉት ካፍርዳሮና ኤላ ካሄዳዳሮ
 ካየለራ እየያ?” እመ። **15** አደና፡ “ግር ካእባዶ ዱሩማ ጂናን ካኡኩማመሮ
 ማንኮሌኖ ማራን፡ እሰኦራዬን፤ ጋዲጋዳኖ ዱባኮ እሰኦራዬን” እመ። **16** ደቤና
 የሱሳ ሃ እመ ማሱሳይ ሰገ፡ “እራ ካም ኣሎ ካኮንዱባመረ ዱሬሳት ኮ ግረ።
17 ሂክ እባዶትና፡ ካም ታኮኩኩይሳራ ባንኤ ማንኮግኖን ማራን ሃን ምስ
 የላ? እመ ዋዳናቴሳ ሄደ።” **18** “ሃና እመ፡ ሂካማሌ የልናራ ካግሮ ጎታራል
 ባሰጉረ ካካለ ካባላእን ጎታራል ማዳርናራ። ኡሱ ጎታራሊ ካምና ኡራዎኦተ
 ዱባ ኩኩይሳይናራ። **19** ኔፎቴን፡ ኔፎቴ፡ ጌሰ ካሞጋኑን ታሌቶ ዱሩማ ኩን
 ኩኩይሰራ፡ ጎርታ ፎልሳ፡ እም፡ ጣም፡ ገቤላ” እምናራ። **20** “ዋ አደ፡ ሃት ጎዋ!
 ኔፎታ ህታሜን እን ኩኮ አትን ዶታራ። ጎርታ ኡሱን ካኩኩይሳተታ እየን ሌራ?”
 እመ። **21** ሃንሱን የሱሳ፡ “ኡሱን ዱሩማ ካኩኩይሳታራ እየሱን ጎእመን ዋይ
 ዶሌ ዱረሳ ካሌኖን እባዶትኮት ጋቾ ሂካማሌታ” እመ። **22** ኤሰኮና የሱሳ ኡሱኮ
 እእጋልሳታራን ሃ እመ፡ ሃንሱን እን እሰኔ ሃ አማራ፡ እሰን ግርክሰኑን መ እምናና፡
 ጎርቱን ማርክሰኑን መ ሳርሳይናና እም አሮያዴን። **23** ግር ባቦኮ ማርና ሳርሰኮ
 ሮራራ። **24** ቁራጃል ዲያ ላኮዉጣታናን፡ ላኮታጋታራን፡ ታኮኩኩይሳታራን
 ጎርቱን ጎታራ ላኮአባን፡ ዋ ጎእመን እሶ እምሳራ። እሰና አደን ክምብርጃልኮ ኣሎ
 ላኮሮራታንያ? **25** ጎሌና እሰንኮ ያደጉረ ጌሰካከሳ ጉት እሪ ቶ አዳይን ካዳንዳራ
 እየያ? **26** ጎርታ ሂካ ክጫርክ እየሰ ዱዶ ፈልን ካዳንዳኖን ጎሌተን እየሰ
 ካካለቱን ሙን ያዳታን? **27** “እላ ዳራራል ምሲ ጂናታራን ዲያ፡ ላኮዳፋራናን፡
 ላኮሱቃታራን፡ እየሱን ጎእመን እን እሰኔ ሃ አማራ፡ ዋኖ ሶሎሞን ዱዶ ሀሱ
 ካባጃል ዱባኮ ኮ እን ላኮሳርሳተሮ። **28** ጎርታ ዋ ህታር ሙተረ ጌባር ኤለኒ ቶሰ
 ካቫፋሮ ካዲዳ ኤሰ ሃ ካሳርሰሳሮ ጎሌ፡ እሰን አማኖ ኦኮንህንቃተራ፡ እሰን
 ጎእመን ምሲ ሮርሰ ሳርሰሳና ዋታራ? **29** ሃንሱን መ እምናና መ ጣምናና አማ
 ዶታታ ዋዳናትሰን አሮያዶ። **30** ሂካ ጎእመን ካእይዛብ ጎሳ ዱባ ዶታታራ።
 ካዳሩረ አቦክሰን ሂክ ዱባ እሰኑን ካዶትሳሮ ላኖ ካሶዋ። **31** እየሱን ጎእመን
 ዋኖናት ካዋ ዶታዬን፡ ሂክ ዱባና እሰኑን አዳም ሰሳምናራ። **32** “እሰን ጎሳ
 ኡጫር ኦሌተታን ዋኖናት እሰኑን ሰሰን አቦክሰንት ታኢዳን ፈኢታ አሮአብሳቴን።
33 እሰኑን ካግሮ ዳዳላዴን ህየሳሉን ሰሳ፡ ሄቶ ታኮሄቶን፡ ፊኖ ታኮእምን

ካደአኖን ሸለ ኦጉዳኖን ኡራዎ ዳሩሪ ኩኩይሳዬን። 34 ዋዳናትሰን፣ ኡራዎ
 ኦትሰን ታኮግራን ባንኤ ግራታ። 35 “ጎርታ ሞዋዬዴን ኤካሳየን፤ ዳብክሰን
 ካህንቃየ ሀሌዎ። 36 ጎታክሶ ምን ካሃሰኖኮ ታ አባባሮን ኦኦራታራና ኤመይረ
 ኡፋ ጎባባሰ ጎርሰዋ ባንን ካኤካሳተሮ እባዶ ኣን ላ። 37 ጎታክሶ ካኮኤሜታሮ
 ጎራታ ናባደን ግራን ኡሱ ኦሄላራ ኦሀንዳራን እሶ ኦሶማሳመንያን። እን ሩምና
 እማራ፣ ጎታክሶ ኤካሳተ ሞዋተረ፣ እምና ሀማጽሳራ፣ ጋባላመና እምሳራ። 38
 ሄመን ጠኤና ሌረ ሉካላ ካሆሬ ኦዋ ግራን ኤመይረ ኡሱማሌ ናባደን ኦግራን
 ኡሱ ኦሄላራ፣ ሀኩኦ ኦሀንዳራን እሶ ኦሶማሳመንያን። 39 ሂካ እዲ እዴሳ፤ ሄቶ
 ኤክ ጎራታ ኤሜይናቶ ዶዎን ኤዴሰ ግረዋ፣ ምንኬሳ አሻማ ግራን ጫልኢ እም
 ላኮድያረ። 40 እሰና ኤካሳየንደን ኦራዬን፤ ኤረ ካእባዶ እሰን ካኮሻዶንግታን
 ጎራታ ኤመይናራ።” 41 ጴጢሮሳና፣ “ጎታ! ሂካ ማሱሳ ካኮንእዬሳታ ኖ ኦላሉንያ
 ሙ ዲባወና እዴዴያ?” እመ። 42 ጎታኬሳና ሃ እመ ኡሱን አባበ፣ “ጎርታ ባቦክሶ
 እሶን ካኮዶትሳሮ ጎራታ ጎሳሰሰሮ ጎታ ካምን እባዶ ጉት ካሹመራ ካእብዳመና
 ቃሮክ ሀዳራ ካእባ እዮያ? 43 ጎታ ማንኮሴተሮኮ አባባይ ካኮኤሜሮ ጎራታ
 ጎሳእጃጃመሮክ ማለ ፈላ ካሙተ ኡሱ ምስክ ካሶማሳመያ! 44 እን ሩምና
 እማራ፣ ጎታኬሳ ሀሱ ካሀንዳሮ ኦግራን ኡራዎ ዳዱ ጉት ኡሱ ሹምናራ። 45
 እየሱን ጎእመን ኣንክ ካዳንዳራ፣ ‘ጎታክ ሳሜ. ላኮኤሜይናሮ፣ አዳላይናራ’
 እም ጎሄደና ባባርና ሄለልና ኦሀንዳራን ጎቦጩ እደና ጎጎጌላቴ አማኖ ጣማኖና
 ሰታኖ ጎሀጋእበ፣ 46 ሀሱ ካሀንዳሮኮክ ጎታ ታኮሻዳሞን አርና ታኮሄዳኖን
 ጎራታ ደራኣ ኤመይናራ። አሎ ኡሱ ሙርሰናራ፣ ህጣቴሳና ዋ ካእማኖን አባዶን
 ዎታ የልናራ። 47 “ታጎታ ፈኢ እዴሳ ግራን ካኤካሳኖና ፈኢቴሳና ካፈሎን
 ሀሱ ካሃንዳራ ኡሱ ጎሜላን ሙርሳምናራ፣ 48 እየሱን ጎእመን ሂካ ካእዴሶና
 ካሙርሰሳሮ ግታክ ካላል ጎየለ ካሃንዳራ ኡሱ አባራንቲ ሙርሳምናራ። ካሞጋን
 ካሰሳመሮኮ ካሞጋን ዶታማራ፣ ታንጂን ሀዳራ ካእታተሮኮ ታንጂን ኦራማታ።
 49 “እን ካኮንኤሜየራ ኡሊ ጉት ኤለን አብሰሰሰንያ፣ ግዳዋ ጎቤበተ ምስ ምሲ
 ላኮጌላይናረ! 50 እየሱን ጎእመን እን ካጣማቃምናሮ ካካለ ጥንቃታ ካራኮ
 አባ፣ ታጉዳሮ ጌግን ምሲ ላኮያደረ? 51 ኡሊ ጉት ኖጎዳ ኬኒን ካኤመየሮ ኣን
 ላራ? ላኮዮ። እን ካኮንኤሜየራ ካላካለ ቤሰንያ። 52 ግዳኮ ሀጋእበረ ምን ኮ
 ኦሮ እሰ እሰኦሮ ካላካለክ እባዶ ግርናራ፣ ላማ ሴድ ጉት ሴንዳ ላማ ጉት

ከጉሬን ካለካለ ብናና። 53 ኦዶና ኤረ ባባርትት ጉት ኤረ ባባርትትና ኦዶኬሳ ጉት ኣና ኤረ ዴለልትቲ ጉት፡ ኤረ ዴለልትትና ኣየትሰ ጉት፡ ሶዶ ኦርኤረትሴ ጉት ኦርኤረና ሶዶትሴ ጉት ከጉሬን ካለካለ ብናና።” 54 እደና ጎሳነ የሱሳ ሃ አመ፡ “ዱማንቻ ምና ታኢያንኮ ብያ ጎዴታን ጎርሰዋ፡ ‘እዳሞ ኡባይናራ አማታን፡’ ኡሱማለና ላራ። 55 ሎጎዶ ጎኬሮ፡ ‘ኡል ፋርሳራ አማታን፡’ ኡሱማለና ላራ። 56 እሰን ኢፍሳዶለ፡ ታዳሩረና ታኡሌ ምዲ አዴሳኖ ካሳንዋ፡ ሀያ ሂካ ካግዳኔ ጌሰ አዴሳኖ ምሲ ዋተን? 57 እሰን መተክሰኒ ልክ ካሌሮ ሙን ፍርዳናዋታን? 58 ባራጋራካነታ ዳና ሆረ እልን ጎሴተ ጋና ራድ ግራን ዋጋርን እጻም፡ ጎርቱን ኡሱናቴረ ዳና ቶሰ ጌሰናራ፡ ዳናና ፖልሲን ኩ ሰሳራ፡ ፖልሰና ምን ካሻኖ ታብሰናራ። 59 ሙራ ሙር ታጉድሶ ኤሰኮ ላኮብናቶ አመ።”

13 ኡሱ ጎራታ እባዶ የሱሳ ቶሰ ኤመተጉረ፡ ጸላጦሳ ኢግክሶ ጃርሶክሶን ዋታ ማንኮለደራን ማራን ካጋሊላ እባዶኮክ ጋራ ካእዬሰረ እባዶ ኤሰ ግረ። 2 የሱሳና ሃ አመ እሶን አባበ፡ “ሀያ ሂኒዕ ኦጋሊላ እባዶጃ ሂክ እባሳ እሶ ካኮንገገራ ካካለ ካጋሊላ እባዶኮ ሮሬን ጨባለሳ ማንኮሌን ማራን ኣን ላራ? 3 ላኮዮ እን እሰኑን ሃ አማራ፡ ጨቦኮ ጉላ ጋላናጎዋተን ዱባና ሂካማሌ ባይናታን። 4 ጎርቱን አደ ኡል ካሰልሆሚ ግምበ ዲጋመረ ካጎየረ እባዶ ቶሞንኮ ሰዴድ ኢየሩሳሌም ካግሮ እባዶ ዱባንኮ ጨባለሳ ማንኮሌን ማራን ኣን ላራ? 5 ላኮዮ፡ እን እሰኑን ሃ አማራ፡ ጨቦኮ ጉላ ጋላናጎዋተን ዱባና ሂካማሌ ባይናታን።” 6 እደና የሱሳ ሃ አማ ሂካ ማሱሳ እዬሰ፡ “እባዶት ኮዉን እራ ካዎይንኮት ባንኤ ካእባራመረ ኮ ካባላሰ ጋትት ግረ። ኡሱና ኢል ኡሱኮ ዶታዬን ኤመተረ ኮና ላኮሄላተረ። 7 ካዎይኒ እካክልተ ካፈላራና፡ ‘ሂክማ፡ ኢል ዶታይ ሄላይን ጌሰ ሴድ ሂካ ጋ ካባላሰ ቶሰ እን ኤማየረ ኢል ላኮሄላየሮ፡ ሃንሱን ጎሰ፡ መዉን ኤሬኮ ኡንጃን አዲ ጠቀታ?’ አመ። 8 ‘ካፈላረና አደ፤ ጎታ! ማራሙርሰ ታ ቆሽሮና ኮሲ ታክብሮ ሂካ ጌሰ ካላሉን ኢሳግ። 9 ጌሰ ካኤማታሮ ታጌቶ ጎዱባንተ ካእዳንክያ፤ ጎርቱን ጎሰናታ” አመ አባበ። 10 የሱሳ አይሁድን ታፎልሲ አሪ ኮ አይሁድኮክ ምን ካኤብ አጋልሰሳ ግረ። 11 ኤሴና ባቲክ እያናይ ጌሰ ቶሞንኮ ሰዴድ ዱባ ዙኡሮ ታቤሰተ ሄለልትቲ ቶ ግቴ። ኤሴና ዙኡሮ ቤሳኖኮ ካከይ ዱዶ ጦቂ አምን ላኮዳንዴተቴ። 12 የሱሳና ኤሰ ካኮደያረ ጎራታ ኡመጉረ፡ “እባቴ፡ ሀዉእምካኮ ፋይተታ” አመ። 13 ገነቴሳ ኤሰ ጉት ካየ፡ ኤሰና ጎርሰዋ ቱኩል አልተ፡ ዋና

ጋላቲተ። 14 ካአይሁድ ምን ካኤብኮክ ወይቻ ጎአመን፤ የሱሳ አይሁድን ታፎስ አሪ ኤስ ማንኮፋይስ ማራን አማራተረ ጎሳ፤ “ፈሎ ፈላይን ታኮዶትሳራ አሪ ሌዎ ግቶዎ። ሃንሱን እሶ አርጃሊ ኤሜየንደን ፋያ ኳሬ ታፎልሲ አሪ ላኮዮ” አመ።

15 ጎታና አባበረ፤ “እስን ኢፍሳዶለ፤ እስን ኦሮኮ አባዶት ኮ ኣር ጎርቱን ደሜር ታፎልሲ አሪ አዉድኮ ፋራተረ በከ ጣምሳይን ላኮዳግሳታሮያ? 16 ሀያ፤ ህት ሄለልትቲ ታአብራመ ኤረ ሌተ ግራን ጌስ ቶሞንኮ ሰዴድ ዱባ ጸላዬ ሸሻንተ ካኮግቴኮ ሂካ ሻኖኮ ታፎልሲ አሪ ፋራሚን ላኮዶትሳቶያ?” አመ።

17 ሂካ ካኮአዬሳረ ጎራታ ኡሱ ኦዲዳሬን ዱባ ሙሌን፤ ጎሳ ዱባና አደ ኡሱ ኦፈለሮ አሳዳምራን ፈሎ ዱባና ገጌላተ። 18 ኤስኮና የሱሳ፤ “ዋኖናት ካዋ መ ኣን ላራ? መነ ዋታ ማሱስራ? 19 አባዶት ኮ ገሰረ አራ ኦሮ ታዉጠሮ ኢል ታሰናፍጭ ኣን ላታ፤ ጂናተ ጋ ሌተ፤ ጉንተ ካቡባራ ክምብርጃልና ባላልክስ ጉት ሀማጾ” አመ።

20 አደና የሱሳ፤ “ዋኖናት ካዋ መነ ዋታ ማሱስራ? 21 ሄለልትቲ ቶ ኣተዴ ካም ራቶ ታ ሙላምሮ ጣመ ታንጂኒ ዋታ ታለሌደቶ ኢርሾ ኣን ላታ አመ።”

22 ኤስኮ አባባተረ የሱሳ ኢየሩሳሌም ሴታ ግራን፤ ኦሮማረ ታኮሮራረ ካታማሊና ማማንጆል አጋልስስ ሮራ ግረ። 23 አባዶት ኮ ጋባላመረ፤ “ጎታ፤ ኦፋያራን አባዶጃ ኡጫር ኦላልያን?” አመ። ኡሱና አባበረ ሃ አመ፤

24 “ጎጫ ካኡባነ ታብን እጸማ፤ እን ሃ አማራ፤ ካምጋን ታብን ዶታታራ፤ እየሱን ጎአመን እሶን ላኮሌሮ፤ 25 ኦዶምነ ክጉረ ጎጫ ካኮጨፋተ ጎራታ ሳሬ አልዴን፤ ‘ጎታ፤ ኡፋ ኖን ባንና’ አም ባባሳታኖ ሀጋአብናታን። ኡሱ ጎአመን፤ ‘እስን አዮስታን ሀገኮ ኤመቲታን’ እን እስን ላኮካሶ! አም እስኩን አባብናራ። 26 እሰና፤ ‘ኖ ኩ ዋታ ራቶ አምነና፤ ጣምነና፤ ሶንጎንና ኖ አጋልስስታ አምናታን።’ 27 “ኡሱና፤ እስን አዮስታን ሀገኮ ኤመቲታን ‘እን እስን ላኮካሶ፤ እስን ኦሜላን ዱባ እንኮ ፋክማ’ አምናራ። 28 አብራመነ፤ ይሳቃነ ያይቆባነ፤ ካሄገሮልነ ዱባ ዋኖናት ካዋ ኦሮ ጎዴተን፤ እስን አድ ሳርድ ሻፋምዴን ጎሄሴን ሀሱ ጎራታ ኦታና ኢልኮ ፎጫኖ እስኩን ሌራ። 29 እባዶ ምና ታብያንኮ፤ ምና ታኢያንኮ፤ ኤለኮና ሄገልኮ ኤሜይጉረ ዋኖናት ካዋይ አምን ሀማጺናራ። 30 ሃንሱን፤ ካሃረ ሆረ ሀይናራ፤ ካሆራና፤ ሃር ሀይናራ።” 31 ሀሱ ጎራታ እባዶ ካፋራሳውኮ ኮኮ ኤመተረ፤ “ሄሮዶሳ ኩ ላጋዲን ማንኮዶታሮ ማራን ክጉዴ ሂታኮ ሴ” አመ።

32 የሱሳ አደ እሶን፤ “ሴየንጉዴነ ሀሱ ቃሩማ ታዳኤር ካአቦ ጌዳላትዉን፤ ሂክማ፤ ‘እን ህታርና

ጌባርና ዱርሳ ቤስናራ፡ ዲኩባሌሳልና ፋይስናራ፡ አሪ ታሴድና ሀልቻኬ ቶስ ጌግናራ' አማራ አማ ሰጋ አመ። **33** ሀሌዎ ኳሬ ካሄገሮ ኢየሩሳሌም ኦሮ ኳሬ ማጌና ጎይን ላኮዶትሳሮ ህታር፡ ጌባርና ጋባሩ ኤስራ ቶስ ሰሴታን ሆረድናራ።

34 “ኢየሩሳሌም፡ ኢየሩሳሌም፡ ካሄገሮ ታላጋዳታ፡ ኩ ቶስ ኦፋራመራና ኤኤዎ ታኤጋታ! ሉካላ ጨጨተካክሴ ባላሎኦትሴይ ሄገሊ ጎጎኩኩይሳቶ ማለ እን ይሰካካ ኩኩይሰን ምያ ጋለ ዶተ፡ እሰን አዳነ ላ አንቴን። **35** ሃንሱን፡ ምንክሰን ኦና ሌ ሄሰራ። አን ሃ አማራ፡ ‘መገ ካጎታይ ካኤሜይናራ ኡሱ ካሶማሳመያ ሃ ታእንታን አሪ ታጌቶ ሂታኮ ሆረንባን ጎርታ እን ላኮድናታን’” አመ።

14 አይሁድን ታፎልሲ አሪ ቶይ፡ የሱሳ ባቦ ኣምን ካፋራሳው ዎይቻልኮ ኮ ካሌረ አባዶትኮክ ምን ቶስ ካኮታባረ ጎራታ፡ እባዶ ኡሱ ጉት ማራመርሳ ግረ።

2 ኤሴና ማርኮክ ዱዱቤል ካእቦሳማረ እባዶት ኮ ኡሱ ሆረ ግረ። **3** የሱሳና፡ ሴራ ኦኦጋልሰሳራኔና ፋራሳውልነ፡ “አይሁድን ታፎልሲ አሪ ዲኩባሌሳል ፋይሳኖ ዶትሳራ ሙ ላኮዶትሳሮያ?” አመ እሶ ሆሳተ። **4** እሶና አደን ጫልኢ አመን። ኡሱና እባዶት አበ ፋይሰረ ጋልሰ። **5** አደና፡ “እሰንኮ ኮ ኤረኬሳ ጎርቱን አርኬሳ ታፎልሲ አሪ ጉምቢ ኦሮድ ጎኢየ ሳም ካቤሳኖን አዮያ?” አመ። **6** እሶና ሂካኑን ቶና ታአም አባብራን ዋተን። **7** የሱሳ አምን ኦኤማመራን ታካባጃ ባንኤ ኦኦሳባታራን ዴጉረ፡ ሃ አማ ሂካ ማሱሳ እሶን ሰገ። **8** “እባዶት ኮ ምን ካሃሰኖ አምን ኩ ጎኤመ፡ ታካባጃ ባንኤ አሮሀማጽተ፡ ካባጃይ ኩኮ ካንጂንክ እባዶት ካኤማመሮ ጎሌ። **9** እሰን ላማ ዱባና ካኤማተረ ኤመይረ፡ ባንኤ ‘ሂካ እባዶትን ጋፋርና’ አምናራ፤ እትና ሙልደ ሁሰ ታእንተ ባንኤ ዳግ ሀማጽናታ። **10** እየሱን ጎአመን እት ካኮኤማንተ ጎራታ ሁሰ ታእንተ ባንኤ ድያደ ሀማጺ፡ ኩ ካኤማተራ ኤመይረ፡ ‘እን ካጌላታሮኬ፡ ኮይ ህታኒ ጦቂ አም ሀማጽ አምናራ፡’ እትና ሁሱ ጎራታ ራቶ አምን ካሀማጺሮ እባዶ ዱባ ሆረ ካባጃምናታ። **11** ኣላንቲና እሰኦቴሳ ካጦቂ ጦቂኢሳታራ ዱባ ሁሰ አምናራ። እሰኦቴሳ ሁሰ ሁሰሳታራ ዱባ ጦቂ አማራ።” **12** የሱሳና ካኤማተሮ እባዶትነ አደ፡ “ክታ ካአር ጎርቱን ክታ ካሄመነ ኣም ካኮኤካሳቶ ጎራታ ኦፈልተቶ ጎጎማርትሶንኮና አምኦታ ኩን ጎጎአባቦንኮ፡ ኩ ካጌላታሮኮ ጎርቱን አብላልታ ፋልካ ጎርቱን ዱረሳ ኦላታ አሮኤማተ። **13** እየሱን ጎአመን ማርትና ካኮኤካሳተ ጎራታ ህየሳል ኦኤሳራን፡ ናፋለሳና ኢልኦ ኦደያኖን ኡም። **14** እት ሶማሳንቶዋ፡ ሂኒዕ አማኣ አባብን ኦዳንዴኖን ማንኮሌን ማራን፡

ቁሎለኮክ ከያኖይ አምኦታ አባባቶዋ” አመ። 15 የሱሳን ዋታ አሞን ኦሀማጼራን ኦሮኮ ኮ ሂካ ማለረ “ዋኖናት ካዋይ ጋባላመረ ባቦኮ ካአማራ ካሶማሳመያ” አመ። 16 የሱሳ አደ፡ “አባዶት ኮ ኦኦቲ ማርትና ኤካሳተረ ካሞጋን እባዶ አመ። 17 ካአሞ ጎራታና ካኮገያረ ጎራታ ታኡማንተቶ ማርትጀልን፡ ‘ሂክማ፡ ካአመን ዱባና ኤካተራ ኮዬን’ አም ጎሳኡምሮን ካሀንዳሮኬሳ ፋረ። 18 “እየሱን ጎአመን ዱባና ታትሶ ታትሶ ኦላንቲ መጣኖ ሀጋአበን፡ ካሆሬ ጋና ግዳ ‘ኤረ ማንኮአምናየሮ ማራን ሴይረ ድያታኖ ዶትሳራ፡ ማጋኔ፡ ኢን ሻጋ የልና’ አመ። 19 “ካካለና፡ ‘እን አራር ካዶ ከን ኢምናየራ፤ እሶ አብ ድናራ ማጋኔ ሻጋ ኢን የልና’ አመ። 20 “ካካለና አደ፡ ‘እን ጋና ካማሻሽ ማንኮሌ ማራን ኤመይን ላኮዳንዳሮ አመ።’ 21 “ካሀንዳረና አባባተ ኤመተረ ዋይቻኬሳውን ሰገ። ሀሱ ጎራታ ካምን ጎታ አማራተረ ካሀንዳረን፡ ‘ሳምደ ራ ካባላኣኒ ካግሮና ካኡባን ካግሮ ዱባ ቤ፡ ሀየሳልና ናፋለሳጀል፡ ኢልኦ ካደያኖና ካኤሳሮ ሂታራ ታብሰ’ አመ። 22 “ካሀንዳረና፡ ‘ጎታኬ፤ አት ካኦጃጂተተ ዱባ ጉድሰራ፡ ግዳና እደ ባንኤ ግቶዋ’ አመ። 23 “ጎታና ካሀንዳረን፡ ራ ካጎሳ ቶንሳ ራ ካቃማ ቶሰ ቤና፡ ‘ምንክና ጎሳአማጋምሮን ካሄልተ ዱባ ሁና ኬን ጉደ ታብሰና። 24 ኣንክ ኡማመ ግራን ካዲደሮ እባዶኮ አሞኬ ሀኢ ካአብናራ ኮና ላኮግሮ!’ አመ።” 25 ካሞጋን ጎሳ ራቶ ሰሴታ ግራን፡ የሱሳ ካምባል አመረ ሃ አመ። 26 “እን ቶሰ ካኤመታራ ዱባ አቦኬሳና ኣየቴሳ ኦርቴሳና ይሰኬሳ፡ አቢላልቴሳና አባላልቴሳ፡ ግርኬሳ ዱዶ ሀሄሶን እንኮ ሮርሳተ ካጌላታራ፡ ኢንደቤ ካሰሰታሮ ሊን ላኮዳንዳሮ። 27 ማሰቃለቴሳ ሰዳይረ እን ዴቦ ካሰሰኖን እንኮ ካአጋልሳታሮ ሊን ላኮዳንዳሮ። 28 “እሰን ኦሮኮ እባዶት ኮ ምን ካግንቦ ማዳራይን ጎዶታተ፡ ጉድሲን ዳንዳኖና ዳንድዋት ጣየ ኤግታክ ማራጋደ ዶትሳሮ ሀማጺረ ዶክ ካሄዳኖን እየያ? 29 ኡኩም ሉጉዳይጉረ ጉሳዪን ጎዋተ፡ ካዴ ዱባ ኡሱ ቃጭፋታራ። 30 ሃና አማራን፡ ‘ሂክ እባዶት ምን ማዳራዪን አባተጉረ፡ ጉሳዪን እደ ዋተ’ አማራን። 31 “ጎርቱን ዋኖ ኮ ዋኖ ካካለ ዋታ ጀሬን ሻፋይን ካኮኬሮ ጎራታ፡ ኩማ ቶሞን ዋታዳራል ታብሰሰረ ካኤማታሮ ዋኖ ካካለ ኩማ ላማታን ዋታዳራ ዋታ ጀሬን ሻፋይን ዳንዳኖኮክ ሀማጽረ ካማካሮን እየያ? 32 ሻፋይን ካዳንዳኖን ጎሌ፡ ካካለ ዋኖ ጋና ኤባ ግራን፡ ሀንዳ ኦጌሲሳራን ፋረጉረ ዋጋርሰ ሆሳታራ። 33 ኡሱማለና፡ እሰን ኦሮኮ ማኖና ካኬሳ ካአቦ ዱባ ካኢሶን፡ እንኮ ካአጋልሳታሮ

ሊን ላኩዳንዳሮ።” **34** “ኤስቦ ታኢዳንትታ፡ ኤስቦ ኦኖሞንጀ ጎዋታንተ አድ ምሲ አባባይ ታኤስቦ ኦኖሞንጀ ግርን ዳንዳታ? **35** ኡሉን ሌረ ማዳባራውን ላኦ ታስቦን ላኖይ ሳርድ ሻፋምናታ። “ካማላራ ነበ ካአባ ሀማሎ።”

15 አሪ ቶ ኦሞጋን ቃራጣ ኦኩኩይሳሬና ጨባልዬል ዱባ የሱሳኮ አጋልሰሰኬሳ ማልን ኡሱ ቶስ ኩኩሚን። **2** አባዶ ካፋራሳውና ሴራ ካሙሴ ኦአጋልሰሳራን፡ “ሂክ አባዶት ጨባልዬል ቆጶታራ፡ አሶነታና አማራ” አማ ጉሞጉመን። **3** የሱሳና ሃ አማ ሂካ ማሱሳ አሶን ሰገ። **4** “አሰን ኦሮኮ ኮውን እዳድ ቦል ጎግረ ኡሱኮና ኮ ጎባየ፡ ሳጋልታምኮ ሳጋሊ ዱዳ ሉጉድጉረ ካባየሮ ታሄላሮ ዶታዬን ካንቤኖን እየያ? **5** ካኮሄላተ ጎራታና ገጌላታ ሃንኬሳይ ሰዳተረ፡ **6** ምንኬሳ ቶስ አባባታራ። ኡሱ ኦጌላታሮና ኦላቴሳ ራቶ ኡመጉረ፡ ‘ካባየሮ ኢዳዶኬ ሄላየራ ኢነ ዋታ ገጌላየን’ አማራ። **7** አን እስኔ ሃ አማራ፡ ሂካማሌ ኖ ጨቦ ላኮአብኖ ቁሎለና ኦአማራን ሳጋልታምኮ ሳጋልኮ ጨቦኮ ካጉላ ጋላሮ ጨባለሳ ኮይ ዳሩሪ ገጌሎ ኦአቲ ልናራን።” **8** “ደቤና ጣጋራ ቶሞን ታአባናይተ ሄለልትቲ ጣጋራ ቶሞንኮ ቶ ካኮባተ ጎራታ፡ ታ ሄላቶ ዳብ ሀንቃይሳተደ፡ ምን ሻካራተደ፡ አሎ ታዶቶን ሄለልትቲ እየታ? **9** ካኮሄላተ ጎራታ ኤስ ኦጌላታራና ኦላትስኔ ራቶ ኡማተደ፡ ‘ታባተቲ ጣጋራ አን ሄላየራ ኢነ ዋታ ገጌላየን’ አማታ። **10** አን ሃ አማራ፡ ኡሱማሌ ጨቦኮ ካጉላ ጋላሮ ጨባለሳት ኮይ ኤርግቻ ካዋይ ሆረ ገጌሎ ልናራን” አመ። **11** አደና የሱሳ ሃ አመ፡ “አባዶት ኮውን ይስ ላማ ግረ። **12** እሶኮና ኤረ ክጫር አቦኬሳነ፡ ‘አቦኬ፡ ዱሩማታኮ ቆባ ኢን ሰስ’ አመ። አቦኬሳና ዱሩማታኮ ይስኬሳውን ሄደደ። **13** “አሪ ታንጂን ሀአዳላኖን፡ ኤረ ክጫር ቆባኬሳ ዱባ ኩኩይሳተረ ኡል ካኤር ሴተ፡ ኤሴና ጎጌላቴ ኡራዎኦቴሳ አዱ ዳርአተ። **14** ኡሱና ካአቦ ዱባ ካኮጉሳታረ ጎራታ፡ ኡሱ ኡል ዱባ ካአቲ ኡኢ ሌ፡ ራካታኖ ሀጋአበ። **15** ሃንሱን ሀሱ ኡልኮክ እባዶት ኮ ቶስ ጋባላመ፡ አባዶትና ቦዬ ኡሱ ጎጌፍፍሮ እራ ፋረ። **16** ቦዬል ካአማሮ ድንቀና አምን ሀልቻ ግረ፡ እየሱን ጎአመን ሂካ ኡሱን ካሰሰራ እባዶ ኮና ላኮግረ። **17** “ዋዳና ኡሱን ካኮአባባተ ጎራታ አደ ሃ አመ፡ ‘አቦኬውን ካፈላሮ እባዶ ምያኮ ባቦ ሄስ ካማዳራማራ? አን አደ ህታኒ ኡኢ ጎይን ጋባላመራ! **18** ኪጉረ አቦኬ፡ ቶስ ሴይረ፡ ሃ አምናራ፡ አቦኬ፡ ዋይና ኩ ሆረ አን ባሰራ። **19** ጎርታ ኤረካ አማም ኡማምን ላኮዶትሳሮ። ምኒ ሀማዬረን ኦፈላራንኮ ኮ አን እን ቶቲና አምናራ።”

20 ሃንሱና ኬጉረ አቦኬሳ ቶስ ሴተ። “እየሱን ጎአመን ኡሱ ጋና ኤባ ግራን፤ አቦኬሳ ኡሱ ዴጉረ ነኔኤይሳተ፤ ኡሱ ቶንሳ ትያ ሴተጉረ ካባላተ አባተ እንጋተ።”

21 “ኡኑና፤ ‘አቦኬ፤ ዋይና ኩ ሆረ እን ባሰራ፤ ጎርታ ኤረካ አማም ኡማምን ላኮዶትሳሮ አመ።” 22 “አቦኬሳና ጎአመን ኡሱን አሀንዳሬን ሃ አመ፤ ‘ሳማ ዱባንኮና ካእዳን ካሌሮ ሳርስ ኬናዴን ኡሱ ሳርስሳ፤ ፈሩን ፍራንታ፤ ሉኩን ከፈሮ ታብሳ።” 23 ካቃባን ኩርኩራ ኮር ኬናዴን ኤናኣ፤ አምና፤ ገጌላና። 24 ሂክ ኡኑክ ጎየራ አመ እን ግረ፤ ግዳ ጎአመን ኔፎ ሄላተራ፤ ባየ ግረ፤ ሄላመራ።”

ኤሰኮ ገገላታኖ ሀጋአበን። 25 “ኡሱ ጎራታ ኤረ ካንጂን እራ ግረ፤ ሀሴኮና አባባተ ምን ቶስ ካኮጋባላማረ ጎራታ፤ ታዲዲሮና ታማዳር ያየ ማለ። 26 ኡሱና አሀንዳሬንኮ ኮ ኡመረ መያ ካምሰሌራ? አመ ሆሳተ። 27 ካሀንዳረና፤ ‘አቢካ ጋማተራ፤’ ኖጎዳና 4 ያሌሳ ሌ ማንኮጋማተሮ ማራን ‘አቦካ ኩርኩራክ ኮር ካቃባን ኡሱን ኤነኤራ’ አመ። 28 “ካንጂን አቢኬሳ አማራተረ፤ ምንና ታብን ላኮዶተሮ፤ አቦኬሳና ሳር ቤጉረ ኡሱ ምን ጎጎታብሮ ኤባተ። 29 ኡሱ ጎአመን አባባ አቦኬሳን ሃ አመ፤ ‘ሂካ፤ ግታክ ጌስ ድይ እን እን ኩን ሀንዳየራ፤ እጃጃካኮ ኮና አደ ላኮሀንቅሰሮ፤ አት ጎአመን እን ካጌላታሮ ዋታ ጎጎገላሮ ጭባረ ቶ ሱረ ላኮሰሰቶ። 30 እየሱን ጎአመን ሂክ ኡኑ ኡራዎኦታ ሻርሙጣልን ዋታ ዳርኣተ ባሳተጉረ ጎኤመተ፤ ካቃባን ኩርኩራ ኮር ኡሱን ኤነዕተ።” 31 “አቦኬሳና ኡሱን ሃ አመ፤ ‘ኡኑኬ፤’ አት እርጌቶ ኢን ዋታ ግታ፤ ካኬ ካሌራ ዱባ ካካያ። 32 ሂክ አቢካካ አደ ጎየራ አመ ግረ፤ ኔፎ ሄላተራ፤ ባየ ግረ ሄላመራ፤ ሃንሱን አሎ ገገላይና ዶትሳራ።”

16 የሱሳ ኡሱኮ ኦአጋልሳታራን ሃ አመ፤ “ዱረሳክ እባዶት ኮ ሀዳራ ካአቦ እባዶት ኮ እባናየ፤ ሂክ ኦዶ ሀዳራ ዱሬሳትኮኒዕ ኡራዎ ዳርአኖኮክ ኦዱ ሂካ ዱሬሳት ጌተ። 2 ሃንሱን ዱሬሳት ኦዶ ሀዳራ ኡምሰሰጉረ፤ ‘ሂክ እን ካማላራ መያ? ጎርታ አት ኢን ኦዶ ሀዳራ ሊን ማንኮዳንዴኖን ማራን፤ አት ኦባሪሳተ ኡራዎኦት ካኮቶታምናራን ማዘጋባ ኢን ሀጋሰሰ’ አመ። 3 “ሀዳራ ካእባናየክና ዋዳናቴሳ ሃ አመ፤ ‘ጎታካክ እን ሀዳራ ማንኮአቦኮ ኢንዳግሰናራ አማራ፤ ኦታይን ሁና ላኮአቦ፤ ኤባታኖ አደ እን ሙሊሳራ፤ ሃንሱን ምስ የላ? 4 እን ሀዳራ ማንኮአቦኮ ካኢገልሳመ ጎሌ እባዶ ምንካክሶይ እን ጎጎቆጳሮ እን ካየልናሮ ካሶዋ።” 5 “ሃንሱን ታጎታ እንዛ ካአቦ እባዶ መተ መተ ኡመጉረ፤ ካሆራርጄ

እባዶትና ‘ጎታኬት እንዛ ኤግታት አብታ?’ አመ። **6** “ኡሱና፡ ዛይቲ ቶሳ ቦል አባ አመ።’ ሀዳራ ካእባናየክና ካዉሊ ዋራቃታካ ሂክማ አታ፡ ሳም ሀማጺደ ቶሳ ኮንቶም እም ጻፍ አመ።’ **7** “ኤስኮና ካካለኔ፡ ‘አትደ ምያ አብታ?’ አመ። ኡሱና፡ ‘ጉል ኮንቶም ዳርጋማ አባ አመ።’ ሀዳራ ካእባናየክና፡ ‘ታአማእየ ዳብዳበታ አህአይ ጉል አፋርታም’ እም ጻፍ አመ። **8** “ጎታኬሳና አማኖ ካኮንሀንቃተሮ ሀዳራ ካእቦ ቃራማቴሳዉን ሳድሰ፡ ህክና እባዶ ካዋኮ ሮረን ሂካ አላምኮክ እባዶ ባርሳኖ ኦአላሚ ቃሮሌ ላኖ ቱሳራ። (aiōn g165) **9** ሃንሱን እን እስኩን ሃ አማራ፡ ሂካ አላምኮክ ማራጋደ ካኮጉዳተ ጎራታ ጅሩ ጅሮማክ ምን አታማኖ ጎንግሮን፡ ሂካ ማራጋደ እስን ኦኤላታራን እስኦትሰኩን ኤካሳየን። (aiōnios g166) **10** “እየሰ ክጫርኪን ካአብዳመ ካሌ ካንጂንክና አብዳማራ፡ እየሰ ክጫርክ ካአብዳሞን ካንጂንክና ላኮአብዳማሮ። **11** ጎርታ፡ ሂካ አላምኮት ዱሩማ እስን ጎአማናሞን፡ ታሩም ዱሩማ እየያ ሀዳራ እም እስኩን ካሰሰናራ? **12** ካካለ እባዶኮት ዱሩማ እስን ኦአማናሞን ጎሌተን፡ ታትሰን ታሌተቶ ዱሩማ እየያ እስኩን ካሰሰናራ? **13** “ኮይክ ጎታ ላማ ሀንዳይን ካዳንዴራ ማዮና ድይ ላኮግሮ፡ ኮ ዲደጉረ ካካለ ጌላታራ፡ ጎርቱን ኮይ ጋባላማራ፡ ካካለና አደ ቱፋታራ። ካዋና ካማራጋደ ድይ ሊን ላኮዶትሳሮ።” **14** ማራጋደ ካጌላታረ እባዶ ካፋራሳው ሂካ ዱባ ማለረ የሱሳን ቃጭፋተ። **15** ኡሱና እሱን ሃ አመ፡ “እስን እባዶ ሆረ እስኦትሰን ቁሎለ ኦየላታንታን፡ ዋ ጎአመን ዋዳናታትሰን ካሳ። እባዶ ዶሌ ካካባጃመ፡ ዋይ ሆረ ካቱፋመያ። **16** “ሴራ ካሙሴና ካሄገሮልኮክ ማጻፋና ታ ያንሳ ጌሮ ሰጋማ ግረ። ኤስኮ አባባተረ አደ ዋኖናት ካዋ ካገጌሎ ላላባምናራ፡ እባዶ ዱባ ኤሰራ ታብን ለላምናራ። **17** እየሱን ጎአመን ሴራኮ ኤጋኖ ኮ ኢያኖኮ ዳሩርና ኡልና ጎሮሬን ኤን ሌራ። **18** “ኦርቴሳ ከልክ አመ ቤሰጉረ ታካለ ካአታታራ ዱባ ሻርሙጣራ፡ ኤንተርኮና ታቤተቶ ካአታታራ ሻርሙጣራ።” **19** አደና የሱሳ ሃ አመ፡ “ሄላ ቡራቡረ አዉአሎክ ሳርሰ ካሳርሳተረ እርጌቶ ባርሳኖ ኦኢዳኒዕና ገጌሎይ ካግረ ዱረሳክ እባዶት ኮ ግረ። **20** ኤሴና፡ ሜጋ ማር ዱባ ካኮኤልተተ አላዛር ካአማማረ ሀየሳት ኮ ኡሱ ዱረሳክ እባዶትኮክ ጎጫ ሆረ ከነን ካረን። **21** ዱረሳክ እባዶትኮት ዱጉድኮ ታኢያቶ ኦሮንት ኣምን ሀልቻ ግረ፡ ከሮርና ኤመተጉረ ሜጋታቴሳ ሄለፋታ ግረ። **22** “ሂክ ሀየሳት ጎየ፡ ኤርግቻልና አብራመ ቶሰ ጌሰን። ዱረሳክ እባዶትና አደ ጎየ ቃማላመ። **23** ቦዋ ኦሮና አቦሳማ ግራን

ጠቂ አመረ ኤባ አብራሙ ዴ፡ አላዛርና ዶሌ ካእባተሮ ዴ። (Hadēs g86) 24

ኡሱና፡ ‘አቦክ አብራሙ፡ ነኔኤይሳና፡ እን ሂካ ላጫ ማንኮአባማሮ ማራን፡
አላዛር ፈርቲሳት ብርጠ በከ ድንረ ኤፊብኬ አምባል ጎሳዮሎ ማጋኔ ፋር አማ
እዬ።’ 25 “አብራሙና አደ ኡሱነ ሃ አመ፡ ‘ኡኑኬ፡ እት ግርካ ካኡሌቲ ካእዳን
ኮኮ ጎሳአታተቶ፡ አላዛርና አደ ካሜላን ኮኮ ካአታተሮ ሻድ፡ ግዳ አደ ኡሱ
ህታኒ ጎጌላሮ እት አደ አቦሳ ጉት ግታ። 26 ሂካ ዱባኮ ሂታኮ እሰን ቶሰ ሮርን
ኦዶታታራን ኦዳንዴኖን ላኖ፡ እንትነ ኦግራና አደን ኖ ቶሰ ጎሳናቆንኮ፡ ኖየና እሰን
ጠኤ ላጋ ካእቲ ግራ።’ 27 “ኡሱና ሃ አመ፡ ‘አቦኬ አብራሙ፡ ጎርታ አላዛር
አቦኬክ ምን ጎሳፋርቶን እን ኩ ኤባታራ። 28 እቢላል ከኖ እን ማንኮግቶ ማራን፡
እሶና ህታ ታአቦሳ ባንኤ ቶሰ ጎሳኤመኖንኮ ሴይረ እሶ ሀእዳሰሶ።’ 29 “አብራሙ
አደ፡ ‘እሶን ካሙሴና ካሄገሮልኮክ ማጻፋጆል ኤሰ ግራን እሶና ሀማሌን’ አመ።
30 “ኡሱና፡ አቦክ አብራሙ ላኮሃዮ፤’ ኦዶ ኮ ጎይኮ ኪጉረ ሴተዋ ጨቦኮ ጉላ
ጋላሬንዋ አመ። 31 “አብራሙና ‘ካሙሴና ካሄገሮኮክ ማጻፋጆል ኦማሎን
ጎሌን፡ ኦዶ ኮ ጎይኮ ኪጉረ ጎሴተና ላኮአማናን አመ።”

17 የሱሳ ኡሱኮ ኦአጋልሳታራነ ሃ አመ፡ “አባዶ ካህንዱፍሰራ ሀኤመኖኒ
ላኮሄሰናሮ። እየሱን ጎአመን ሀንዱዱፎ ካላሮን ሀሱ እባዶትን ኣኔ። 2 ሂክ
እባዶት ሂናኣ ኦትዲጫርኮ ኮ ካህንዱዱፍሳሮኮ፡ ሪም ካባዳላ ማርግቲሳ
ሻምጉረ በከ ኦሮ ባዲ ጎሻፋመ ሆረ ላረ። 3 ሃንሱን እሰአትሰን ኦራዬን። “እቢካ
ኩ ጎሚረኤ ሀድሰ፡ እን ባሰራ አም ጎጉላ ጋለ ሀሄሶ አምና። 4 አሪ ቶይ ቶዶባ
ጋል ኩ ሚርኢጉረ ቶዶባ ጋል ‘እን ኩ ሚረኤራ’ አማ ኩ ቶሰ ጎኤመተ ኡሱን
ሀሄሶ አም።” 5 ኦፋራመራና ጎታነ፡ “አማኖካን ኖን አድና” አመን። 6 ጎታና፡
“እል ታሰናፍጭ ግታክ አማኖ እሰኑን ግረዋ፡ ህታ ኦዳ፡ ‘ታጋምጉደ በከ ኦሮ
አባራምና’ ጎአንቴን እሰኑን አጃጃንቶዋ” አመ። 7 አደና የሱሳ ሃ አመ፡ “እሰን
ኦሮኮ እባዶት ኮ እራ ካአታሮ ጎርቱን እዳድ ካፎፋሮ ሌ ካህንዳሮ ካእቦ ጎሌ፡
ኡሱ ኢራኮ ካጋማተሮ ካህንዳሮክነ፡ ‘ሳም ባቦ ቶሰ ጋባላም አማታን’? 8
ሂካኮ ሱረ፡ ‘ካሄመነ ክታ ካኬ እን ጎሳአምሮ ኤካሰና፡ እን ታ አምሮና ታ ጣምሮ
ሞዋጉደ ኢን ሀንዳይ፡ ኤሰኮ አባባይደ እት አምናታ፡ ጣምናታ ላኮአማሮያ’? 9
ጎርታ ሂክ እባዶት፡ ካህንዳረክ ኡሱን ካአጃጃመሮ ማንኮፈለ አባበ ማራን ኡሱ
ጋላታራ? 10 ሃንሱን እሰና ሂካማሌ ካአጃጃንተታን ዱባ ካኮፈለቴን ጎራታ፡ ‘ኖ

ላኦ ካላይኒዕ ኦሀንዳኖና፥ ፈላሚን ካዶትሳሮና ፈልነ ጉድንሰና አማ።” **11**
 ኤሰኮ አባባተረ የሱሳ ኢየሩሳሌም ቶስ ሴታ ግራን ምና ታሰማርያና ታጋሊላ
 ማማንኮክ ማሳነ ሮረ። **12** ማማን ኮ ቶስ ጎሳታቤ ማሪ ባር ኦአባናየን አባዶጃ
 ቶሞኖ የሱሳን ዋታ ኤሰለ፥ አሶና ኤባ አሌረን፤ **13** ታኦቲ ያየ፥ “ጎታ የሱሳ፥
 ኖን ነኔኤይሳ!” አመን። **14** ኡሱና እሶ ካኮደያረ ጎራታ፥ “ሰዬንዴን እስኦትሰን
 ቱቃሞሉን ቱሳዬን” አመ። አሶና ኤሰራ ሴቶ ጉት ግራን ሙጭሜን። **15** እሶና
 ኮ ፋያኖኬሳ ካኮደያታረ ጎራታ ያየ ጦቂ ታኦንቴ ዋ ካባጃ አባባተ። **16** ሉክ
 ታየሱሳ ጉት ሆረ ሆረ ኢየጉረ ጋላቴ፥ ሂክ አባዶትና ሳማራውትየ። **17** የሱሳና ሃ
 አመ ኡሱ ሆሳተ፤ “ካሙጭመረ እባዶ ላቶሞንየላ? ሀያ፥ ሳጋሎ ሀጌ ሴተ? **18**
 ሂካ ካሳማራው አላጋት ኳሬ አባባተረን ዋ ካጋላታራ ካካለ ላኮግሮ አማኖያ?”
19 አባዶትነና፥ “ኪጉደ ጋል፥ አማኖካ ኩ ፋይሰራ” አመ። **20** ፋራሳውልኮክ
 አባዶ ዋኖናት ካዋ ጎረ ኤሜይናሮ የሱሳ ካኮሆሳታሬን ጎራታ ሃ አመ እሶን
 አባባ፥ “ዋኖናት ካዋ ካሙታሮ ራድ ላኮኤሜታሮ። **21** አባዶና፥ ‘ህታኒያ’ ጎርቱን
 ‘ኣንቲያ’ አምን ላኮዳንዴሮ፥ ሂክማ፥ ዋኖናት ካዋ እሰኒ ኦሮ ግራ።” **22** የሱሳ
 ኡሱኮ ኦአጋልሳታራነ ሃ አመ፥ “ኤረ ካእባዶ ካኮኤመይናሮ አርጃልኮ ቶ ድን
 ካኮሀልቻናታን ጎራታ ኤመይናራ። አድና ላኮድናታን። **23** አባዶ፥ ‘ኣንቲያ’ ጎርቱን
 ‘ህታኒያ’ አምናራ፥ ደቤና አሮሴቴን። **24** ኣላንቲና ሀንቃ ሀንቃየጉረ ዳሩር ቃማኮ
 ታ ጣሞ ጌሮ ጎሳህንቃይሳሮ ማለ፥ ኤረ ካእባዶና ታኮኤመታሮ አሪ ኡሱማሌ
 ልናታ። **25** አየሱን ጎአመን ሂክ ላናኮ ሆረነ ኤረ ካእባዶ ካንጂን አቦሳማኖና
 ህታ አላታኒ ቱፋማኖ ግናራ። **26** “ካኖሄ ጌሲ ጎሳሌሮክ ማለ፥ ኤረ ካእባዶ
 ታኮኤመይናሮ አሪ ኡሱማሌ ልናራ። **27** ኖሄ ማርካፋ ታኮታበሮ አሪ ታጌሮ
 አባዶ አማና ጣማ፥ ኦር አታታና ኬሳታ ግረ። ኦባሳራን በከ ኤመተንጉረን ዱባና
 ባሰን። **28** “ካሎጠ ጌሰና ኡሱማሌየ፥ እባዶ አማና ጣማ፥ እምናታና ዳዳላታ፥
 አካክልተ አባራታና ምን ማዳራታ ግረ። **29** ሎጠ ሶዶምኮ ታኮቤረ አሪ ጎአመን
 ኤሌና ካጉባራ ቦላልና ዳሩርኮ ኡባተረ እሶ ዱባ ጉብተ ባሰ። **30** “ኤረ ካእባዶ
 ታኮኤመይናሮ አሪና ኡሱማሌ ልናራ። **31** ሀሴ አሪ ምንኬሳት ሄልንቾ ጉት ካግራ
 አባዶ ማኖና ምንኬሳ ኦሮ ኦግራን ኡራዋ አታይን አሮዳጎ፥ ኡሱማሌና እራ ካግራ
 አባዶና ሃርዲ አሮአባባኖ። **32** ታሎጠ ኦር ሻዳ። **33** ኔፎቴሳ ሃሳይን ካዶታታራ
 ዱባ ዋታራ፤ ኔፎቴሳ ሮርሳተ ካሰሳታራ ጎአመን ሃሳታራ። **34** ሀሴ ሄመኒ እባዶ

ላማ አልጋ ቶይ ሁዱርናራን፤ ኮ አታምናራ፤ ኮ ሄሰናራ። 35 ሄለል ላማ ራቶ ርታይናራን፤ ቶ አታምናታ ቶና ሄሰናታ።” 36 [እባዶ ላማ እራ ግርናራን፤ ኮ አታምናራ ኮ ሄሰናራ።] 37 እሶና አባበሬን፤ “ጎታ፤ አታማራን ሀገራያ?” አመን። ኡሱና፤ “ራቃ ማንኮግሮ አላትል ኩኩአማራ አመ።”

18 የሱሳኮ ኦኦጋልሳታረን እንሸሻዶን አርጌቶ ኤባታኖ ካዶትሳሮ ላኖ ቱሰን የሱሳ ሂካ ማሱሳ እሶን ሰገ። 2 ሃና አመ፤ “ካታማ ቶይ ካግረ ዋ ካአብሳኖና እባዶ ካካባጅኖን ዳና ኮ ግረ። 3 ኤሰ ካታማይ ጋልታንተት ቶ ግቴ። ኤሰ፤ ‘ባራጋራኬነ ዋታ ታአቦ ሃጃ ኢን ጋፋና’ አማ ኡሱ ቶሰ ሰሴታ ግቴ። 4 “ዳናና መተካሆሬ ኤሰ ላኮቆጸተረ፤ ዳንበኔ አደ ዋዳናቴሳ ሃ አመ፤ ‘ኮና ዋ አብሳታኖ ጎዋየና፤ እባዶና ጎካባጃናዋየ፤ 5 ህት ጋልታንተት እን ሀማጽ ማንኮትራቶ ማራን ኤሰን ፍርድናራ። ጎርቱን አድ አርጌቶ ሰሴታ እን ህፋችሰናታ።” 6 ጎታና፤ “ካሜላን ዳና ታአመሮ ማላ። 7 ዋ አደ ሄመና አሪና ኡሱ ቶሰ ኦኢያራውና ኦአሳባሜራውን ላኮፍርዳሮያ? አላኮ ሮረ ጫልኢ አማራ? 8 እን እሰኑን ሃ አማራን፤ ሳመ እሶን ፍርዳራ። እየሱን ጎአመን ኤረ ካእባዶ ካኮኤሜታሮ ጎራታ ኡሊ ጉት አማኖ ካሄሎ ሌወና?” አመ። 9 ደበና የሱሳ ኖ ቁሉኒዕና አማ እሰኦትሶይ ኦዲዳታራና ካካለ እባዶና ኦቱፋታራውን፤ ሂካ ማሱሳ ሰገ። 10 “እባዶጃ ላማ ዋ ኤባይን ቁሉክ ምን ካዋ ሴተን፤ ኮ ፋራሳውት ካካለ ቃራጣ ካኩኩይሳሮዬን። 11 ፋራሳውት ካለ አሌረ እሰኦቲሳውን ሃ አማ ኤባታ ግረ። ካዋየ፤ እን እባዶ ካካለ ዱባ እን ካሳማሮ፤ ካሜላንክ፤ ካሻርሙጣሮ፤ ሀሱኮና ሂካ ቃራጣ ካኩኩይሳሮ እን ላና ማንኮዋየ ማራን እን ኩ ጋላታራ፤ 12 ቶዶባ ቶይ ላማ ጋለ አጋቡዋራ፤ ካሄላታሮ ዱባኮ ገነ ቶሞንኮ ባርክንተ ቤሳራ።” 13 “ቃራጣ ካኩኩይሳረ ጎአመን ኤባ አሌጉረ፤ ዳሩር ቶሰ ጦቂ አም ድን ዱዶ ላኮዶተሮ፤ እየሱን ጎአመን ጌግዮ ቦቦጫታ፤ ‘ካዋየ፤ እን ጨባለሳ ማሮ’ አማረ። 14 “እን እሰኔ ሃ አማራ፤ ፋራሳውትኮ ሮረ ህክና ዋይ ዶሌ ቁሉክ እን ሌ ቶታመ ምንኬሳ አባባተ። እሰኦቲሳ ካጦቂ ጦቂኢሳታራ ዱባ ሁሰ አምናራ፤ እሰኦቲሳ ካሁሰ ሁሰኢሳታራ ጎአመን ጦቂ አምናራ።” 15 የሱሳ ገነ ጉት ካይ ጎሳሶማሳሮ እባዶ ይሰ ኡሱ ቶሰ ኬናታረ። ኡሱኮ ኦኦጋልሳታረን ሂካ ካኮደያረን ጎራታ ሀድሴን። 16 የሱሳ አደ ይሰ እሰቶሰ ኡመጉረ ሃ አመ፤ “ይሰ እን ቶሰ ጎሳኤሜሮ ፈኢ ሰሳ፤ አሮትርቴን፤ ዋናናት ካዋ ሂናኦ አኒዕውንያ። 17 እን ሩምና አማራ፤

ዎኖናት ካዋ ይስ እን ካእታኖን ዱባ ዱዶ ላኮታብናሮ።” **18** አይሁድኮክ ዋይቻልኮ ኮ፥ “ካእዳንክ ካእጋልሰሳቶ፥” ጅሩ ጅሮማክ ግር ኤልን እን መፈላ? አመ ኡሱ ሆሳተ። (aiōnios g166) **19** የሱሳ አባበረ፥ “መ ማራን አት እን ካእዳንክ አማታ? ዋ ኮ ኳሬ ካእዳንክ ማዮና ላኮግሮ።” **20** “እሮሻርሙጢተ፥ አሮላጋደ፥ አሮሄቴ፥ ጣራይ አሮአቶቲተ፥ አቦካና አየታ ካባጂ ካአማሮ አጃጃ አት ካሶዋ አመ።” **21** አባዶትና፥ “ሂካ አጃጃል እን ይሱማኮ ሀጋአበረ ኦራዬራ” አመ። **22** የሱሳ ሂካ ካኮማላረ ጎራታ፥ “ጎርታ ኩን አየሰ ኮ ካሄሰራ፥ ካአብቶ ዱባ ዳዳልጉደ ሀየሳሉን ሰሰ፥ ካዳሩረ ማዝጋባ አት ግርቶዋ። ኤሰኮ ኤሜደ እን ዴበ ሰሴ” አመ። **23** አባዶትና ሂካ ካኮማላረ ጎራታ፥ ታንጂን ዱሩማ ኡሱን ማንኮግቴ ማራን አሎ ሀወኢሳተ። **24** የሱሳና አባዶት ዴጉረ ሃ አመ። “ታዋጋን ዱሩማ ካአበዉን ዎኖናት ካዋ ቶስ ታባኖ ሞስክ ዳፋርያ? **25** ዱረሳ ዎኖናት ካዋ ቶስ ታባኖኮ ጋላ ቡቶ ካማርፍ ኦሮማር ጎሮረ ኤነ ሌራ።” **26** ሂካ ካማለ እባዶና፥ “ሀያ፥ አዮያ ፋይን ካዳንዳራ?” አመ። **27** የሱሳና፥ “እባዶ ዶሌ ካዳንዳሞን ዋይ ዶሌ ዳንዳማራ” አመ። **28** ጴጢሮሳና፥ “ሂክማ፥ ኖ ካአብኖ ዱባ ኢንሰነ ኩ ዴበ ሰሴነና አመ።” **29** የሱሳና እሶነ፥ “እን ሩሞና አማራ፥” ዎኖናት ካዋዉን አመረ “ሞንኬሳ ጎርቱን ኦርቱሳ ጎርቱን አቢላልቲሳ ጎርቱን ኦኡሙለራና ጎርቱን ይሰኬሳ ካኢሰ፥ **30** ሂካ ጌሲ ካዋጋን አምባ፥ ካኤሜታሮ ጌሲ ጅሩ ጅሮማኮክ ግር ካእታኖን ማዮና ላኮግሮ።” (aiōn g165, aiōnios g166) **31** የሱሳና ቶሞንኮ ላማ ኡሱኮ ኦእጋልሳታራን ካለ አተ ቤጉረ ሃ አመ። “ጎርታ ኖ ኢየሩሳሌም ቶስ ብናና፥ ኤረ ካእባዶ ማራን ኦሄገሮል ካጸፋመራ ዱባ ጉዳይናራ።” **32** አይዛብን ኡሱ ሮርሰ ሰሰናራን፥ እሶና ቃጭፋይናራን፥ አብ ማዳርናራን፥ ሀንጨፈ ቱፍናራን። **33** ቦጭናራን፥ ኤሰኮና ላጋድናራን፥ ኡሱና ታሴድ አሪ ጎይኮና ክናራ።” **34** ኡሱኮ ኦእጋልሳታራን ጎአመን ሂካ ዱባኮ ኮና እሶ ካእዴሰሬን አየሰ ላኮግረ፥ አዬንሳ እሶኮ ሰያመ ግረ፥ መ አማኖኖና ላኮአዴሰረን። **35** የሱሳ ታኢያርኮ ካታማ ቶስ ካኮጋባላማረ ጎራታ፥ ኮ ኢልኦ ካባየረ ራግሪድ ሀማጼረ ኤባታ ግረ። **36** ኢልኦ ካባየረና ጎሳ ኤሰነ ሮራ ግራን ማለጉረ፥ ሂክ መያ? አመ እሶ ሆሳተ። **37** እሶና፥ “ካናዝረት የሱሳያ ህታነ ካሮራራ” አመን ኡሱን ሰገን። **38** ኡሱና፥ “ኤረ ካዳዉተ፥ የሱሳ፥ አን ማር!” አማ እዬ። **39** ሆረሃየ ካሰሰታረ እባዶና፥ ጫልኢ ኡሱ ጎጎአምሮ ሀድሴን፥ ኡሱ ጎአመን፥ “ኤረ

ካዳወቱ፤ እን ማር!” አማ ጂናስ እዬ። **40** የሱሳና አሌረ እባዶት ኡሱ ቶስ ጎሳኬናውን አጃጁ። ኡሱ ቶንሳ ካኮጋባላማረ ጎራታ። **41** የሱሳና “እን ኩን መ ጎሳየሎ ዶታታ?” አመ ኡሱ ሆሳተ። ኢልኦ ካባየረክና፡ “ጎታ፡ ድን ዶታታራ” አመ። **42** የሱሳና፡ “ዴና፡ አማኖካ ኩ ፋይሰራ” አመ። **43** እባዶትና ጎርሰዋ ድን ዳንዴ። ዋና ካባጃ የሱሳ ዴበ ሰሴተ። ጎሳ ዱባ ሂካ ዴጉረ ዋ ጋላቱ።

19 የሱሳ ታኢያርኮ ካታማ ቶስ ታበረ ኤስነ ሮረ ሴታ ግረ። **2** መገ ዛኮሳ ካአማመረ እባዶ ኮ ኤስ ግረ፤ ቃራጣ ኦኩኩይሳፊውን ዎይቻና ዱሬሳናየ። **3** ኡሱና የሱሳ ካአማማረ ኤክዮ ድን ዶታ ግረ፤ አየሱን ጎአመን ጅፋ ታጋባባንት ማንኮሌተ ማራን፤ ጎሳ ዋጋንኮ ካከይ ኡሱ ድን ላኮዳንዴረ። **4** የሱሳ ሀሱ ራኔ ሮራ ማንኮግረ ማራን፤ ኡሱ ድን ሆረ ሀየ ቲየጉረ ኦዳ ቶይ ጉት ኮራተ። **5** የሱሳና ኤስ ባንኤ ጌጉረ፤ ጦቂ አመረ “ዛኮሳ፤ ህታር እን ምንካይ ሀይን ዶትሳራ ሳም ዳግ” አመ። **6** ኡሱና ሳመ ዳገጉረ የሱሳ ገጌሎይ ቆጶተ ምን ጌሳተ። **7** ኤስ ካግረ እባዶና ሂካ ዴጉረ፤ “ሂክ እባዶት ምን ካጨባለሳ ቶስ ማርትና ኦምን ታበ!” አማ ዱባና ጉምጉማኖ ሀጋአበ። **8** ዛኮሳ አደ ኬ አሌጉረ ጎታን “ጎታ፡ እን ታአበ ዱሩማ ዱባኮ ምና ሀየሳውን ሰሰናራ። ማዮኮና ጣራይ ካሳመሮ ጎሌ፤ አምባ አፋር የል ኡሱን አባብናራ” አመ። **9** የሱሳና አባበረ፤ “ሂክ እባዶት አደ ታአብራመ ሳኒ ማንኮሌ ማራን፤ ህታር ፋይና ኡሱና ሂካ ምኑን ሌራ። **10** ኦላንቲና ኤረ ካእባዶ ካኮንኤመተራ ካባየሮ ዶትና ፋይሰንያ” አመ። **11** ጎሳና ሂካ ማላ ግራን፤ የሱሳ ማሱሳ አዬሳኖ ሆረዴ፤ ኦላንቲና ኢየሩሳሌም ቶስ ጋባላማኖና እባዶን ዎኖናት ካዋ ካጋባላመሮ እን ሌ ማንኮሙተ ማራንያ። **12** የሱሳና ሃ አመ፤ “ሹም ኮ መገ ካዎኖናት አታይረ እባባይን ኡል ካኤር ሴተ። **13** ኦሀንዳረን ኦርኮ ቶሞን ኡመረ ጣጋራ ቶሞን እሶን ሰሰጉረ፤ ‘እባባይ እን ታኤማሮ ሂካ ማራጋይ ዳዳላየን’” አመ። **14** “ኡልኬሳክ እባዶ ጎአመን ኡሱ ማንኮዲደ ማራን፤ ‘ሂክ እባዶት ኖ ጉት ጎሳሬድሮ ላኮዶታታኖ” አመረን ኡሱ ዴበ ኦሀንዳረን ፋረን። **15** “ሀሌዎ ኳሬ ሂክ ሹምት ሬደ ኡልኬሳ አባባተ፤ ኦኒዕ ኦሀንዳሬኒዕ ኡሱ ካሰሰሮ ማራጋይ ዳዳሌረን ኤግታክ ዋረኤ ሄላቴራን ማላቢን እሶ ኡምሰስ። **16** “ኦሀንዳሬንኮ ካሆሬ ጋባላመረ ‘ጎታኬ፤ አት ኢን ታሰሰተ ጣጋራኮ ጣጋራ ቶሞን ዋረኤ ሄላምሰሰራ” አመ። **17** “ጎታና፤ ኦት ካአብዳንተ ካሀንዳታክ’ ጎኢዳን ፈልተታ፤ ‘ኮኮ ክጫርኪ ካአብዳንተ ሌተ

ማንከሙተ ማራን፡ ካታማል ቶሞኒ ጉት ኦዶናት ኩን ሰሳመራ” አመ። 18 “ካለምክና ጋባላመጉረ፡ ‘ጎታኬ፡ እት ኢን ታሰሰተ ጣጋራኮ ጣጋራ ከን ወረኤ ሄለምሰታ’ አመ። 19 “ጎታኬሳና ‘ኩን አደ ካታማል ከን ጉት ኦዶናት ሰሳመራ” አመ። 20 “ካካለ ካህንዳረና ጋባላመረ ሃ አመ፡ ‘ጎታኬ፡ ሆጮይ ማማረ ካየ እን ካአዳላይሰራ ማራጋደካ ሂክማ። 21 እት ካካኖን ግቶ ካአታቶ፡ ካዉጣኖን ግቶ ካማጣራቶ፡ ካእነተ ካኢሶን አባዶት ማንኮሌተ ማራን እን ኩ አብሳየራ።’ 22 “ጎታና ሃ አመ፡ ‘እት ካሜላን ካህንዳታ ሃፋራ ካይዋ እን ኩ ፍርድናራ። ካካኖን ግሮ ካአታታሮ ካዉጣኖን ግሮ ካማጣራታሮ ካአመ ካኢሶን አባዶት ላኖኬ ጎአዴሰተ፡ 23 ኤመይረ ማራጋደኬ ወረኤነ ዎታ ጎሳአታሮን ካፈላታሮ አባዶን ሙን ሰሰዋተ?’ 24 “ጎታኬሳና፡ ኤሰ ኦአሌራኔ ‘ጣጋራ ኡሱኮ አታደነ ጣጋራ ቶሞን ካአቦን ሰሳ አመ።’ 25 “እሶና ‘ጎታ፡ ኡሱ ጣጋራ ቶሞን አባ’ አመን። 26 “የሱሳ ሃ አመ፡ ‘እን እሰኩን ሃ አማራ፡ ካአቦን ዱባ አዳማራ። ካልክኮ ጎአመን ኣንክ ካግራዋ አታምናራ። 27 አየሱን ጎአመ እን እሶ ጉት ጎሳዶንኮ ኦዶታቴራን ሀሱ ዲናጃልኬ ሂታራ ኬናዴን እን ሆረ ኤናአ አመ።’” 28 የሱሳ ሂካ አዬሰ አባባተረ ኢየሩሳሌም ቶሰ ብን ሆረሃየ ሰሴታ ግረ። 29 ዛይቲ ካበያራ ጋ ታኮአላታሮ ዎዳሚ ኦግራን፡ ቤተፋገ ቶንሳ ካብታንያ ማማን ቶሰ ካኮጋባላማረ ጎራታ፡ ኡሱኮ ኦአጋልሳታረንኮ ላማነ ሃ አመ ፋረ። 30 “እሰን ሆረ ካግሮ ማማን ሴዬን፡ ኤሰራና ታባ ግራን ማዮና ሱረ ታኮሀማጺኖን ግሮ ታደሜሬ ዳርሜ ሻንተ ታግቶ ሄልናታን፡ ፋራዴን ሂታራ ኬና። 31 ማዮና ‘ሙን ፋራታን?’ አም እሰን ጎሆሳተ “ጎታዉን ዶትሳታ አማ።” 32 ኦፋራሜረና ሴቴረነ ኡሱ ጎሳሰጌረክ ማለ ሌ ሄሌን። 33 ካምን አባዶና ዳርሜ ታደሜር እሰን ፋራ ግራንቲ ዴንጉሬን፡ እሰን “ዳርሜ ሙን ፋራታን?” አመን። 34 እሶና “ጎታዉን ዶትሳታ” አመን። 35 ኤሰኮና ዳርሜ ታደሜር የሱሳ ቶሰ ከነን፡ ሳርሰ ካክሶ ጉት ያዬንጉረነ የሱሳና ዳርሜይ ጉት ሀማጺሴን። 36 አባዶና ኡሱ ካኮሴታሮ ራድ ሳርሰክሶ ያ ግረ። 37 ዛይቲ ካበያራ ጋ ታኮአላታሮ ዎዳምኮ መተጋማቶ ካጌሳሮ ራ ቶሰ ካኮጋባላማሬን ጎራታ ቶቶ አሎ ኦንጂን ኦሌረን ኡሱኮ ኦአጋልሳታረን ካዴራን ባሳ ዱባ ገጌላታ ያየትሶ ጦቂሴን ሃ አማ ዋ ጋላታኖ ሀጋአበን። 38 “መገ ካጎታይ ካኤመታራ ዎኖ ካሶማሳመያ!” “ኖሳዳ ዳሩሪ፡ ካባጃ ጉንተ ዋዉን ሀሌቶ!” 39 ጎሳ ኦሮ ካግረ ኮኮ አባዶ ካፋራሳው የሱሳን፡ “ካአጋልሰሳቶ፡ ኩኮ

ኦክጋልሳታራን ጫልኢ ጎንደራዊን ላኮሀድሳቶያ?” አመን። **40** የሱሳና፡ “እን እስኔ ሃ አማራ” “እሱ ጫልኢ ጎንደራዊን ኤሌሞልና ኢይሮዋ” አመ። **41** የሱሳና ኢየሩሳሌም ቶስ ካኮጋባላማረ ጎራታ ካታማ ዴጉረ ኦተ። **42** ሃ አመ፡ “ኩን ኖጎዳ ካሌሮ መያ እት ህታር አዴስ ግቴዋ! ግዳ ጎንደራዊን ኢልታኮ ጎላተራ። **43** ዲናጃልካ ኩ ማራሙረ ምና ምና ማራሙርስ እት ካይጉረ ታባኖካና ብያኖካ ትር ካኮያድሰራ ጎራታ ኤመይናራ። **44** ተ ኩና እትታይ ኦሮ ካግሮ ይስካ ኤሬገ ዋታ ለሌድናራን፡ ኤሌሞኮ ካፈላመራ ግምብ ዱባ ዲጋምናራ፡ ዋ ኩ ፋይስን ካኮኤመተሮ ጎራታ እት ላኮአዴሰቶ።” **45** ኤስኮ አባባተረ የሱሳ ቁሉክ ምን ካኤብ ታበረ ኦዳዳላታሬን ኤስኮ ቤስ። **46** አደና “ምን ካክ ቁሉክ ምን ካኤብ ልናራ” አማመ ማጻፋ ቁሉክ ጻፋመራ እስን ጎንደራዊን ‘ላጋ ካሽታ’ የላቴን” አመ። **47** የሱሳ አርጌቶ ቁሉክ ምን ካኤብ አጋልሰሳ ግረ። ቱቃሞኮክ ዋይቻና ካሙሴ ሴራ ኦክጋልሰሳረን፡ ካካለና አይሁድን ሆረሃዬን ኦፈላሬን የሱሳ ላጋዲን ዶታ ግረን። **48** አየሱን ጎንደራዊን ጎሳ ዱባ አጋልሰሳኤሳይ ቦጃመ ማንኮግረ ማራን ፈልን አማ ካኤማተረን እሱን ኤካታና ዋተ።

20 አሪ ቶይ የሱሳ ጎሳ ቁሉክ ምን ካዋይ አጋልሰሳና ኦዱ ታኢዳን ላላባ ግራን ቱቃሞልኮክ ዋይቻልና ሴራ ካሙሴ ኦክጋልሰሳራና ጃርሶለ ኩኩአመን ኡሱ ቶስ ኤመተን። **2** አሶና፡ “ሂካ አየሰ ካኮፈላታ ኤክ ኦዶናትዮ ኖን ሰጊ። ኩን ኦዶናት ካሰሰራ ኡሱ አዮያ?” አመን ሆሳተን። **3** የሱሳና፡ “እንና ሆሲን ቶ እስን ሆሳሮ፡ አላ እን አባባ። **4** ጥንቃታ ካያንሳ ዋኮያ ሙ አባዶኮያ?” አመ። **5** አሶና ሃ አመረን እስ እስኦሮ ማካረን፤ “ዋኮያ ጎንደራዊን፡ ህያ ያንሳ ካአመሮ ሙን እስን አማናና ዋተን?” አምናራ። **6** ‘አባዶኮያ’ ጎንደራዊን ጎሳ ዱባ ያንሳ ካሄገሮ ላኖኬሳ ማንኮአማናታራን ማራን ኤሌሞ ኖ ኤግራንዋ።” **7** ሃንሱን “ኤትኮዮ ኖ ላካንሶ” አመን አባባገን። **8** የሱሳና፡ “ጎርታ አንና ሂካ አየሰ ኤክ ኦዶናት እን ፈላሮ እን እስኩን ላኮሰግናሮ” አመ። **9** ኤስኮ አባባተረ የሱሳ ሃ አመ ሂካ ማሱሳ ጎሳውን ሰጋኖ ሀጋአበ። “አባዶት ኮ አካክልተ ካዋይኒ አባራተ፡ ኦታተን ኦባራረውን ክራይ ሰሰጉረ ኡል ካካለ ሴተጉረ ታንጂን አዳላተ። **10** ካም ታኮኩኩአማሮ ድግኒ፡ ታዋይኒ ኢልኮ ኡሱ ታገያቶ ምና ጎሳፋራውን ካህንዳረ ኦታተን ኦባራራን ቶስ ፋረ፡ ኦታተን ኦባራረን አደን ካህንዳሮ ቦጨረን ገነ ታላል ጋፋሬን። **11** ደቤና ካካለ ካህንዳሮ ፋረ፡ ኦታተን ኦባራራን ኡሱና አደን ቦጨን፡ የራሰነን ገነ ታላል

ጋፋሬን። 12 ግዳና አደ ካሴድ ካህንዳረና ፋረ፡ ኦታተን ኦባራሬን ኡሱና አደን ማጋይሰን ሳርዴድሴን ሻፌን። 13 “ካዎይኒ አካክልተኮክ ኦዶና፡ ‘ጎርታ ምስ የላ? አላ አድ ካጌላታሮ ኤረኬ ፋርናራ፡ ዋዳሳ ኡሱ ኦካባጂራን ሌራን’ አመ። 14 “ኦታተን ኦባራረን ጎአመን ኤረኬሳ ካኮደያን ጎራታ ‘ሂክ ካኤልናሮያ’ ኮዬን ኡሱ ላጋንዳ ህት ርቲና ታታን ሌቶዋ’ አመን ማላቲን። 15 ካዎይኒ አካክልተ ባንኤኮ ሳር ቤሰረን ላጋዴን። የሱሳና። “ጎርታ አካክልተኮክ ኦዶ ምስ የልናራ? 16 ኤመይረ ሀኡኡ ኦታተን ኦባራሬን ላጋድናራ። ካዎይኒ አካክልተኮት ባንኤ ካካለ ኦታተን ካባራሮን ሰሰናራ።” ጎሳና ሂካ ካኮማላረ ጎራታ፡ “ሂካ ኣንክክ አርኬኖ” አመን። 17 የሱሳና እሶ ቶስ ዲያ ሃ አመ፡ “ሀያ ግምብ ኦማዳራታራን ካቱፋተራን ኤኤዋ ፈሎ ኦምኔቱን መተ ሌ አማመ ካጸፋመሮኮት ፋረንና መታ”። 18 ሂካ ኤኤዋ ጉት ካኢያራ ዱባ ኤኤብናራ፡ ኤኤዋና ኡሱ ጉት ካኮኢያራ ዱባ ሺአምናራ” አመ። 19 ሴራ ካሙሴ ኦአጋሰሳሬና ቱቃሞልኮክ ዎይቻልና ሂካ ማሱሳ ካኮንአዬሰረ እሶን ላኖ ማንኮአዴሴን ማራን፡ ኡሱ ጎራታዋ አብን ዶታ ግረን። እየሱን ጎአመን ጎሳ አብሳተን። 20 የሱሳና ካሮም ሞትዉን ሮርሰ ሰሰን ህኢኮ ካብያሮ ሃፋራ ኡሱ አብን ዶታ ግረን። ሃንሱን ካሩም ኣን ሊ ኦጋባላምራን ክምብር ካዬን። 21 ክምብር ሌን ኦሴተረና ሃ አመን ኡሱ ሆሳተን። “ካኦጋልሰሳቶ፡ አት ልክኪ እየሰ ጎሳአዬሳቶና ጎሳኦጋልሰሳቶ ኡሱማሌ ራ ካዋ ካሩም ጎሳኦጋልሰሳቶና ማዮና ካኡሉልሶን ላኖ ኖ ካንሶዋ። 22 አሚና ቄሳርዉን ገራ ሙራኖ ሴራካን ፈኢ ሰሳራ ሙ ላኮሰሳሮያ?” 23 የሱሳ ጎአመን ማላነትሶ አዴሰረ ሃ አመ። 24 “አላ ዶልቺ ቶ እዬን ቱሳ፡ ጉት ታግታ ታዮ ምዲና መገ ካዮያ?” እሶና ታቄሳርታ አመን አባበን። 25 የሱሳና፡ “ጎርታ ካቄሳር ቄሳርዉን፡ ካዋና ዋዉን ሰሳ” አመ። 26 ሃንሱን ኡሱ ካአዬሰሮ ሃፋራ ጎሳ ሆረ ኡሱ አብን ላኮዳንዴን፡ አባብኬሳ ማማንጉሬን ጫልኢ አመን። 27 ጎይኮ ክያኖ ላግሮ ኦአማራን ሶዶቃውልኮ ኮኮ የሱሳ ቶስ ኤማተንጉረን ሆሰን ሆሳተን። 28 ሃና አመን፡ “ካኦጋልሰሳቶ፡” እባዶት ኮ ኦር አታይጉረ ይሰ ሀኡሙሎን ጎሳዩ፡ አቢ ኤስ ጋልታተት አታይረ ይሰ ኡሙል አቢኬሳዉን ሳኒ ባንኤ ጎሳካይሮ “ሙሴ ኖን ጸፈራ። 29 ሀያ፡ አቢላል ቶዶባ ግቲ። ካሆሬ ኦር አታተጉረ ይሰ ሀኡሙሎን ጎሳ። 30 ካላምን ኡሱማሌ። 31 ካሴድና አደ ኦታተ፡ ቶዶባ ዱባ ኡሱማሌ ኦታተንጉሬን ይሰ ሀኡሙሎን ጎዬን። 32 ሃሬና ሄለልትቲ ጎተ። 33 ጎርታ ቶዶባ

ኤስ ማንኮአታተረ ማራን፡ ታገይኮ ከያኖ አሪ ኤስ ኦር ታዮ ልናታ?” **34** የሱሳና አባበረ፡ “ሂካ አላምኮክ እባዶ አታታራን፡ ኬሳራን። (aiōn g165) **35** ካኤሜታሮ አላምና ገይኮ ክያኖ ኦኮንዶትሳራ ጎአመን ላኮአታታራን፡ ላኮናኬሳማራን። (aiōn g165) **36** ኤርግቻ ኣን ማንኮልናራን ማራን ኤስኮ ዳንቤባን ላኮገይናራን፡ ገይኮ ማንኮኬን ማራን ይስ ካዋያን። **37** ሙሴ ጋራ ካሁርሰኮት ታጻፋንተቶ ጅርት ኦሮ ጎታን፡ ካአብራመ ሄዶ፡ ካይሳቃ ሄዶ፡ ካያይቆባ ሄዶ አማኖ ኦጎየራን ካክናራን ላኖ ቱሳራ። **38** ዱባና ኡሱን አርዶኒዕ ማንኮሌን ማራን፡ ኡሱ አርዶኒዕኮክ ሄዶ ኳራ ገይኮክ ሄዶ ላኮዮ።” **39** ኮኮ ሴራ ካሙሴ ኦአጋልሰሳሬና “ካአጋልሰሳቶ፡ ታኢዳን አዬስ፡ አመን።” **40** ኤስኮ አባባተረን ኦዶ ኮና ዱዶ ኡሱ ሆሳይን ላኮዳንዴ። **41** ኤስኮ አባባተረ የሱሳ ሃ አመ፡ “እባዶ ክርሰቶሳ ምሲ ኤረ ካዳወተያ አማራ? **42** አላንቲና ዳወተ መተኬሳን ማዛሙርኮክ ማጻፋይ ሃ አመራ፡ “ዋ ጎታኬወን፡ ዲናካ ሉክታይ እን ታዳዳርሰሮ “መርገቲይ ሀማጺ” አመ። **44** ጎርታ ዳወተ፡ ‘ጎታ’ አም ኡሱ ጎኡምሮ ምሲ ኤረኬሳ ላራ?” **45** የሱሳ ጎሳ ዱባ ማላ ግራን ኡሱኮ ኦአጋልሳታራን ሃ አመ። **46** “ካኤርክ ሳርሰ ሳርሳቲረን ማራሙራኖ ኦጌላታራን፡ ታግያ ባንኤ ኖጎዳ ኣትን ኦዶታታራና፡ አይሁድኮክ ምን ካኤብ ካካባጃ ባርጨማ፡ ባንኤ ታአሞይና ታካባጃ ባንኤ፡ ኦዶታታራንኮ እስኦትሰን ኦራዬን። **47** እሶና ካጋልታንቴል ምን ኦህዩምሳራንያን። ሙትን አመረን ኤብካክሶ ኤራሳታራን፡ ካሜላን ፍርዳ እሶ ኦራታራ።”

21 የሱሳ ጦቂ አም ጎዳሮ ዱሬሳጆል ቁሉክ ምን ካዋይ ሙጽዋታ ካኮኩኩይሳራን ሁይ ኦርዴሰን ሙጽዋታክሶ ሉጉዳ ግራን ዴ። **2** አደና ህየት ጋልታንተት ቶ ዶልቺ ላማ ሉጉዳ ዴ። **3** ሃና አመ፡ “እን ሩምና አማራ፡ ዱባንኮና ሮርስ ህት ህየት ጋልታንተት ሰሰታ። **4** ሂኒዕ እባዶጃ ካኮሰሴራን ዋረኤክሶኮ ጎሌሮ፡ ኤስ ጎአመን ካሰሰታ ህዩማትሴኮክ ጅልባ ኦአብቶ ባርሳኖ ዱባ ሰሰታ።” **5** ኡሱኮ ኦአጋልሳታራንኮ ኮኮ ቁሉክ ምን ካዋ ኤኤሞ ካኢዳንክና ዋወን ካሰሳመሮ አላቦ ኢዳኖኮክ እዬሳ ግራን፡ **6** የሱሳና ሃ አመ፡ “ሂክ እስን ካደያታን ዱባ ሀዳርአሞን ኤኤሞ ኤኤሞ ጉት ጎጎካካመሮ ታኮሄሶን አሪ ኤመይናታ።” **7** እሶና፡ “ካአጋልሰሳቶ፡” ጎርታ “ሂክ ዱባ ካኮልናራ ጎሬያ? አደና ሂክ ሃ ካኮልናራ ማላታ መያ?” አመን ሆሳተን። **8** የሱሳና ሃ አመ አባበ፡ “ጎጎሶሶይኖንኮ እስ ኦትሰን ኦራዬን፡ ካዋጋን፡ ‘እን ክርሰቶሳያ’ አማ፡ አደና፡ ‘ጎራታ ጋባላመራ’ አማ

መገኬይ ኤሜይናራን። እሰን ጎእመን እሶ ደቤና አሮሴቲን። **9** ጀሬን ከያኖኮክና ጎሳኮት ኤንገ ጎማልቲን አሮነይቲን። ሂክ ጣይ ሊን ካዶትሳሮያ፣ ጌሰኮት ጋቾ አደ ጎርሰዋ ላኮልናቶ።” **10** አደና ሃ አመ፡ ጎሳ ጎሳ ጉት፡ ዋኖ ዋኖ ጉት ክናራ። **11** ካኦቲ ኡልኮክ አላኖ ልናራ፡ ኡኢና ህንጭነ ኡል ዱባ ልናታ። ካእብሰሰራ ኮኮ ኡሱማለና ዳሩርኮ ካኦቲ ማላታ ልናራ። **12** ሂክ ዱባ ላኖኮ ሆረነ እባዶ ጎእመን እሰን አብናራን። ሆሮርናራ፡ ፍርዲዉን አይሁድኮክ ምን ካኤብ ቶንሳ ጌሰናራን ምን ካሻኖ ታብሰናራን። ዋኖላልና ሞትጆል ሆረ ጌሰናራን፡ ሂክ ዱባና መገኬኮት አላንቲ እሰን ግናራ። **13** ህክና መገኬ አቶቲን ታኢዳንት ኢጣ እሰኑን ልናታ። **14** ሃንሱን ካሞታምናታን ሞቶን መ አባብት ሰንሳ አማ ታሪ ጎጎያዶንኮ ዋዳናይ አባዬን። **15** ዲናክሰን እሰን አዋዲና እሰን ዲድን ካኮዳንደኖን ሃፋራና ቃሩማ እን እሰኑን ሰሰናራ። **16** እሰን ኦኡሙለራን፡ አቢላልትሰን፡ ፋልክሰና ሳትጆልክሰን ዱዶ ሀሄሶን እሰን ሮርሰ ሰሰናራን። እሰንኮና ኮኮ ላጋድናራን፡ **17** እዬን ማንኮአማናታን ማራን እባዶ ዱባ ዶሌ ካድዳንቲን ሌታን። **18** እየሱን ጎእመን መተክሰንክ ፊጣ ኮና ላኮባሮ፤ **19** አታይ አላኖይ ኔፎታትሰን ሃሳይናታን። **20** አደና የሱሳ ሃ አመ፡ “ኢየሩሳሌም ካጀረነ ዋታዳራል ማራንተ ታአባንተቶ ካኮዴተን ጎራታ፡ ባይካክሰ ጋባላማኖ አዳሳ። **21** ሀሱ ጎራታ ኡል ካይሁዳይ ኦግራን ዱባ ዋዳሚል ቶሰ ሀባቃቲን። ካታማይ ኦግራና ኤሰኮ ሀበን። ቃማን ኦግራና ካታማ አርድ አሮታቦ። **22** ካጻፋመራ ዱባ ጎጎጉዳሮ ሂክ ካሙሮ ጎራታያ። **23** ኡል ጉት ታኦቲ ራኮ ልናታ ሂካ ጎሳ ጉት ኤንገ ኤመይናታ። ሃንሱን ሀሱ አልማ ሄለል ካፋቶዉና ካኢልሳሮን ኣኔ እሶን! **24** ሺፋይና ጎይናራን፡ አይዛብ ዱባ ቶሰ ቦጃም አታምናራን፡ ኢየሩሳሌምና አይዛብ ኦዶናቲ ካኮባርሳራ ጌሰ ታ ጉዳሮን አይዛቢ ኦዳዳራሜን ልናራን። **25** “አራ፡ ድግንና ባራጃ ጉት ማላታ ልናራ፡ ታበከና ታጋሽማሎ ያየኮ ካከይ፡ ኡሊ ጉት ካግራ ጎሳ ያድናራ፡ ሻላጋምናራ። **26** ሁና ካዳሩረና ማንኮአእናሮ ማራን፡ አባዶ አብሲና አላም ጉት መ ካኤሜይናራ አማ ኦራታ ሀሹሩክ አምናራ። **27** ሀሱ ጎራታ ኤረ ካእባዶ ሁናይና ታኦቲ ካባጃ ዱማንቻይ ኤመታ ግራን ድናራን። **28** እሰና ሂክ እየሰ ጉዳታኖ ካኮሀጋአብሮ ጎራታ፡ ፋይናክሰን ማንኮጋባላመሮ ማራን፡ ቱኩል ኡማ አላ፡ ጦቂ አማ ኤልዳ ዋቻ” አመ። **29** አደ የሱሳ ሃ አማ ህታ ማሱሳ ሰገ፡ “ጋ ካባላሰና ካካለ ጋጆል ዱባ ዲያ። **30** ባላሎኦትሶ ሁርሳ ግራን ጎዴታን፡

ሀሱ ጎራታ ባጠፋ ጋባላማኖ እሰን ካሳንዋ። **31** ኡሱማለና አደ ሂክ እየሰ ጉዳታኖ ጎዴተን፤ ዋኖናት ካዋ ጋባላማኖ ማላባ። **32** “እን ሩምና አማራ፤ ሂክ ዱባ ሊ ታሮሮ ህት አላታን ላኮሮሮቶ። **33** ዳሩርና ኡልና ሮርናራን፤ ሃፋራካክ ጎአመን ላኮሮሮ። **34** “ጎርታ ሜሳ ካልክ ግር፤ ጣሞኮክ ጂናኒ ባርሳኖኮኒዕ ያዳ ዋዳናትሰን ጎጎድላፋኖንኮና ሀሴ አሪ ዋጣማደ እን ደራኣ ጎጎጌኖንኮ እስኦትሰን ኦራዬን፤ **35** ሂክ ኡሊ ካግሮ አባዶ ዱባ ጉት ደራኣ ግናራ። **36** ሃንሱን ካኤሜታሮ ዱባኮና እሰን ምልቅ ጎጎሄሳኑና ኤሪ ካእባዶ ሆሪ አልን ጎጎዳንዴታኑን እርጌቶ አታዬን ኤባየን።” **37** የሱሳና አሪ አሪ ቁሉክ ምን ካዋይ አጋልሰሳ፤ ሄመን አደ ዛይቲ ካበያራ ጋ ታኮአላታሮ ዋዳሚ ቤ ባራረ። **38** ጎሳ ዱባና የሱሳ ማልን ቡላን ቁሉክ ምን ካዋ ቶስ ኤመታ ግረ።

22 ሀሱ ጎራታ ፋሰካ ካአማማረ ካባቦ ባላ ታኮካባጃምራ አሪ ጋባላንተ ግቴ።
2 ካቱቃሞል ዋይቻልና ሴራ ካሙሴ ኦአጋልሰሳራን ጎሳ አብሳታ ማንኮግሬን ማራን፤ የሱሳ ታየል ላጋድራን ራ ዶታ ግረን። **3** ቶሞንኮ ላማ ኦፋራመራን ዋታ ካቶታመረ ካእስቆሮቱ ኡልኮክ ይሁዳ ጸላየ ታብተ። **4** ሃንሱን ይሁዳ፤ ካቱቃሞል ዋይቻል ቶንሳ ቁሉክ ምን ካዋ ኦኦራራን ካእጃጃሮክ ቶስ ሴተጉረ የሱሳ ምሲ ሮርሰ ሰሳናሮ አዬሰ። **5** አሶና ሂክ አዬሲ ገገላተረን ማራጋደ ሰሰን ኤካተን። **6** ኡሱና ኡሱ እየሰ ኤካተ፤ የሱሳ ሮርሰ እሶን ሰሰን ጎሳ ታኮግኖቲ ካኤካሮ ጎራታ ኦራታ ግረ። **7** ኤሰኮ አባባተረ ካፋሰካ ኢዳዶ ካኮኤናአማራ ካባቦ ባላ ጌ። **8** የሱሳና፤ “ካፋሰካ ክታ ካሄመን ኖ ጎጎአምኖ ሰዬንዴን ኤካሳ” አመ ጣየ ጴጢሮሳና ያንሳና ፋረ። **9** አሶና፤ “ሀጌ ኖ ጎጎኤካንሶን ዶታታ?” አመን ሆሳተን። **10** ኡሱና፤ ሂክማ፤ “እሰን ካታማ ቶስ ታባ ግራን ኡላ ታበከ ካሰዳተሮ አባዶት ሄልናታን፤ ኡሱ ካኮታባሮ ምን ታጌታኒ ዴበ ሰዬን። **11** አዶምንኔ፤ ‘ካእጋልሰሳራ፤ እንኮ ኦአጋልሳታራን ዋታ ካፋሰካ ክታ ካሄመን እን ታኮአምራ ታማርት ባንኤ ኤትታ? ሃ አማራ’ አማ። **12** ኡሱና ፎቂ ጉት ያንተደ ታኤካተቶ ታባላኣንት ክፍሊ ኡሱ እሰኑን ቱሰናራ ኤሴና ኢን ኤካሳ” አመ። **13** አሶና ሴቲረን ኡሱማሌ የሱሳ እሶን ጎጎሰጌሮክ ማለ ሌ ሄለሬን፤ ፋሰካና ኤሰ ኤካሰን። **14** ሳትና ካኮጌተተ ጎራታ የሱሳ ኦፋራሜራን ዋታ ቁሉክ ባቦ አምን ሀማጼ። **15** ሃና አመ፤ “እን ራኮ አታታናኮ ሆረን ሂክ ካፋሰካ ቁሉክ ባቦ እሰን ዋታ አምን አሎ ሀልቻ ግረ። **16** እን እሰኑን ሃ አማራ፤ ዋኖናት ካዋይ

ሂካኮት ፋሬን ታጉዳቶ፡ ሂካ ካፋሰካ ቁሉክ ባቦ ካላም እን ላኮአምናሮ።” 17
 ጡጋ አተ ሶማሳተ አባባተረ ሃ አመ፡ “አህአይ፡ ዱባ ሂካኮ ሄዴዳማ፡ 18 እን
 እስኩን ሃ አማራ፡ ግዳኮ ሀጋአበረ ዋኖናት ካዋ ታ ኤማሮን፡ ህታ ታዎይኒ ኢልኮ
 ካፈላመሮ ጣሞ ላኮጣምናሮ።” 19 ባቦና ኬሰረ ዋ ሶማሳተ፡ ኤካኤብሰ
 ሰሰጉረ፡ “ሂኒዕ እሰን ማራን ኦሰሳማራን ሶኦቴያን። ሂካ እን ሻዲን የላየን”
 አመ። 20 ኡሱማለና ክታ ካሄመን አመን አባባተረን ጡጋ ኬሰጉረ ሃ አመ፡
 “ህት ጡጋ እሰን ማራን ካኡባይናሮ ኢግኬይ ካልናሮ አማቶ ኦኡሱብያን። 21
 እየሱን ጎአመን እን ሮርሰ ካሰሰናሮኮት ገነቴን ዋታ ያላኦ ኦሮ ግታ። 22 ኤረ
 ካእባዶ ጣየ ዋ ጎሳሙርተሳመሮክ ማለ ጎይናራ እየሱን ጎአመን ኡሱ ሮርሰ
 ካሰሰናሮ ሀሱ አባዶትን ኣኔ።” 23 እሶና፡ እሶኦሮኮ ሂካ ሃ ካየልናራ እዮዮ
 እስኦሮ ሆሳታኖ ሀጋአበን። 24 አደና እሶ፡ ኖ ኦሮኮ ካንጂንክ እዮያ አማ ኡሱኮ
 ኦአጋልሳታረን አሲኦሮ ዶጋማ ኬሴን። 25 የሱሳና ሃ አመ፡ “ካአይዛብ ዋኖላል
 ጎሳክሶ ሁና ባሪሰናራን፡ እሶ ጉት ኦዶናት ኦአባን ‘ታኢዳን ኦፈላራን አማም
 ኡማምናራን።’ 26 እሰን ዶሌ እድ ሃ አሮሌኖ። ጎሄሶን እሰንኮ ካንጅንክ ካሌራ
 ክጫር ኣን፡ ሞት ካሌራና ካህንዳሮ ኣን ሀሌዎ። 27 እየሱን ጎአመን ኢነ ዋታ፡
 አሞን ካህማጼሮኮና አሌ ካአምሳሮኮ ኤክያ ካጂናታራ? አሞን ካህማጼሮዮላ?
 እን ጎአመን እሰን ኦሮ ካግሮ ካህንዳሮኮ ኮ ኣንያ። 28 እሰና ራኮቴክ ጎራታ
 እንኮ ካለ እንቤኖን እዬ ዶሌ ኦአልተቴንታን። 29 ኣቦክ እን ጎሳሹመሮ እንና
 አደ ዋኖናትኬይ እሰን ሹምናራ። 30 ህክና ዋኖናትኬይ አሞኬኮ ጎሳእንታኑና
 ጎሳጣንታኑን አደና ኮርፍንጄ ጉት ሀማጺዴን ቶሞንኮ ላማ ካለሰራኤል ጎሳ ጉት
 ጎሳፍርድታኑንያ።” 31 አደና የሱሳ ሃ አመ፡ “ሰሞና! ሰሞና! ግዳ፡ ጸላየ እሰን
 ዳርጋማ ኣን ባሞጺኢን ዋ ሆሳተ። 32 እን አደ አማኖካ ጎሳባኖንኮ ኩ ማራን እን
 ዋ ኤባየ፡ አትና ካኮአባባተ ጎራታ አብላልታ አታይሳ።” 33 ሰሞና፡ “ጎታኬ፡ እን
 ኩኔ ዋታ ሻሞና፡ ጎይን ኤካሳየራ” አመ። 34 የሱሳና፡ “ጴጢሮሳ፡ ህታር ሉካለ
 ሀኦይኖን ግራን፡ እን ኡሱ ላኮካሶ አምደ ሴድ ጋል እን ካካይናታ አማራ” አመ።
 35 ኤሰኮና የሱሳ፡ ኡሱኮ ኦአጋልሳታራን “ኮሮጆ ካሊ፡ ሸለ ካሊ፡ ከፈሮ ካሊ፡
 እሰን ካኮፋረረ ጎራታ እሰኩን ካህንቃተረ እየሰ ግረ?” አመ ሆሳተ። እሶና “ኮና
 ኖን ላኮሀንቃተሮ” አመን። 36 የሱሳና ሃ አመ፡ “ግዳ ጎአመን ኮሮጆና፡ ሸለና
 ካኮንግራ እባዶ ሀአባቶ፡ ሺፋ ካልክና ሳርሰኬሳ ዳዳላይረ ሀኢምናቶ። 37

እን እስኩን ሃ አማራ፡ ‘አማላነ ዋታ ቶታመ’ አማመ ካጻፋመረ እዬ ጉዳይን ዶትሳራ፡ እን ማራን ካጻፋመራ ካኮጉዳይናራ ጎራታ እዳሳመ ጌራ።” 38 የሱሳኮ ኦኦጋልሳታረን፡ “ጎታ! ሂክማ ሺፋ ላማ ህታኒ ግሮዋ” አመን። ኡሱና “ሌራን” አመ። 39 የሱሳ ጎጎካሳናየ ዛይቲ ካበያራ ጋ ታኮአላታሮ ዋዳም ቶስ ሴተ፡ ኡሱኮ ኦኦጋልሳታረና ኡሱ ዴበ ሴተን። 40 ኤሰራና ካኮገያን ጎራታ፡ የሱሳና፡ “እስን ጫፍት ኦሮድ ጎጎታቦንኮ ኤባየን” አመ። 41 እሶኮና ኤኤዋ ሻፋመረ ሴተ ካኮኤያሮ ግታክ ፋክ አመረ ግልቢሰ ኤባተ፡ 42 ሃና አመ፡ “ኣቦኬ፡ ፈኢታ ጎሌተ፡ ህታ ታራኮ ጡጋ እንኮ ኣትና፡ እየሱን ጎአመን ፈኢቱ ሀሌኖን ግራን ፈኢታ ሀሌቶ።” 43 ኤርግቻ ዳሩርኮ ኡሱን ሙተጉረ ኡሱ አታይሰ። 44 ኣሎ ሙዳመረ አታተ ኤባታ ግረ። ፎጎሎ ካኦቲ ኢግኮክ ጫጫርቃታኖ ኣን ኡሊ ኡባታ ግረ። 45 ኤብኮና ኬጉረ ኡሱኮ ኦኦጋልሳታራን ቶስ ኤመተ፡ እሶና ያዳኮ ካኮኬይ ኦሁዳሬራን ሄለረ ሃ አመ። 46 “ሙን ሁዳርቲታን?” ጫፍት ኦሮድ ጎጎታቦንኮ “ክያዴን ኤባየን አመ።” 47 ኡሱና ጋና አዬሳ ግራን፡ ካሞጋን እባዶ ኤመተ። ቶሞንኮ ላማኮ ኮ ይሁዳ ካአማመረ እባዶት ሆረ ሀየ ገጌሳ ግረ፡ እንጋዬና የሱሳ ቶስ ጋባላመ። 48 የሱሳና አደ፡ “ይሁዳ፡ ኤረ ካእባዶ እንጋታኖይ ሮርስ ሰሰናታ?” አመ። 49 የሱሳ ማራሙረን ኦግረን ኡሱኮ ኦኦጋልሳታረን እየሰ ታላሮ ዴንጉሬን “ጎታ፡ ሺፋይ ጎንሱ?” አመን። 50 እሶኮና ኮ ካቱቃሞል ዋይቻሉን ካህንዳርኮ ባሰጉረ ነበ ታመርገ ጎሰ። 51 የሱሳ አደ፡ “ኢሳ! ሂካ ኣንክክ እየሰ እሮፈልቲን አመ።” ታእባዶቲ ነበና ድንጉረ ፋይሰ። 52 ኤሰኮና የሱሳ ኡብን ኦኤመቲረን ካቱቃሞል ዋይቻል፡ ቁሉክ ምን ካዋ ኦኦራራን ካእጃጃሮና ጃርሶለነ ሃ አመ። “ሽታ ካኡብናሮ እባዶ ኣን፡ ሺፋና ዱላ ኡብተዴን ኤማቲን? 53 ኣርጌቶ ቁሉክ ምን ካዋይ እስን ዋታ ታኮግረ እን ላኮኡብተቲን። ሂክ ጎአመን ሙጉድ ካኮሬደሮ ጎራታክሰንያ።” 54 ኤሰኮ ኣባባተረን የሱሳ ኣበን ጌሰን። ቱቃሞን ኦዶናት ካኣቦኮክ ምን ቶስ ታብሰን። ዴጢሮሳና ፋክመ ኡሱ ዴበ ሰሴታ ግረ። 55 እባዶ ካቱቃሞል ዋይቻልኮክ አዉድ ኦሮ ኤለን ቤብሰኔን ኮሌን ሀማዴሬን ግራን፡ ዴጢሮሳና እሶ ዋታ ሀማዴ ግረ። 56 ድይት ቶ ዴጢሮሳ ኤለን ዶሌ ካሀማዴሮ ትቶስ ዴተደ “ሂክ እባዶት አደ የሱሳ ዋታ ግረ” አንተ። 57 ዴጢሮሳ አደ፡ “ኣት ሄለልተቲ፡ ኣን ኡሱ ላኮካሶ” አመ ካካተ። 58 እባራን ጋጭመረ ካካለ እባዶት ኮ ኡሱ ዴረ፡ “ኣትና አደ እሶኮ ኮታ” አመ። ዴጢሮሳ ጎአመን፡

“እት እባዶት፡ ላኮእነዮ” አመ። 59 ሳቲ ቶ ግታ ጋጭመረ ካካለ እባዶት ኦግራን፡
 “ሂክ እባዶት ካጋሊላ ማንኮሌ ማራን ሄዳታኖ ካሊ የሱሳ ዎታ ግረ” አመ። 60
 ጴጢሮሳ አደ፡ “እት እባዶት እት ካእዬሳቶ እየሰ እን ላኮካሶ” አመ። ሂካና
 እዬሰረ ጋና ሀጉድሶን ግራን ሉካለ ኦየ። 61 ጎታ የሱሳ ካምባል አመረ ጴጢሮሳ
 ዴ፤ ጴጢሮሳና፡ “ህታር ሉካለ ሀኦይኖን ግራን ሴድ ጋል እን ካካይናታ” አመ፡
 ጎታ ኡሱን ካእዬሰሮ ሃፋራ ቃል አመ። 62 ጴጢሮሳና ሳር ቤጉረ ዩሩሩ አመ
 ኦተ። 63 የሱሳ እበን ኦራ ኦግረን እባዶጂ ቃጭፋታና ኡሱ ባሳኖ ሀጋእበን። 64
 ኢልኦና ጎልሰሬ፡ “አላ ካሄገሮ ጎሌተ፡ ኩ ካባሰ እዮያ ኖን ሰጊ?” አማ ኡሱ
 ሆሳታ ግረን። 65 ኡሱ ሀባራና የራሳ ግረን። 66 ኡል ካኮባሬረ ጎራታ፡ ጃርሳ
 ካኡሌ፡ ቱቃሞኮክ ዎይቻልና ሴራ ካሙሴ ኦኦጋልሰሳረን ራቶ ኩኩአመን፡
 የሱሳ ታእይሁድ ሾንጎ ቶሰ ጌሰን። 67 እሶና፡ “እት ካፋይሳሮ ክርሰቶሳታ? አላ
 ሰግን” አመን። የሱሳና ሃ አመ። “እን እሰኑን ጎሰጌና እሰን እን ላኮእማናይናታን።
 68 እሰን ጎሆሳየና ኢን ላኮእባብናታን። 69 እየሱን ጎአመን ሂታኮ ሀጋእበረ ኤረ
 ካእባዶ ሁና ካዋኮት መርጌ ሀማጽናራ።” 70 ሀሱ ጎራታ ዱባና፡ “ሀያ፡ እት ኤረ
 ካዋታ?” አመን። የሱሳና፡ “ላኖኬ ሂክማ እሰንዋ ሰጋታን” አመ። 71 እሶና፡
 “ጎርታ ካካለ አቶናት መ ዶትሳራ? ኖ መተካኑን ሀኢቱሳኮ ማልነና!” አመን።

23 ኤሰ ኩኩአመረ ካግረ እባዶ ዱባ ኬጉረ የሱሳ ጲላጦሳ ቶሰ ጌሰን።
 ሃ አማና ሞቶ ሀጋእበን። 2 “ሂክ እባዶት ጎሳካን ሶሶይሳ፡ ቄሳርጪን ጊራ
 ጎሳሙራሞንኮ ትራ፡ አደና፡ እን ክርሰቶሳ ካፋይሳሮ ዋኖያ አማ ግራን ሄልነና።”
 3 ጲላጦሳ፡ “እት ካእይሁድ ዋኖታ?” አመ የሱሳ ሆሳተ። የሱሳና እ “እት
 ጎሳአማቶያ” አመ። 4 ኤሰኮና ጲላጦሳ ካቱቃሞል ዎይቻልና ጎሳነ፡ “እን ሂካ
 እባዶት ጉት ባሰ ኮና ላኮሄለሮ” አመ። 5 እሶ አደን፡ ሂክ እባዶት ጋሊላኮ
 ሀጋእበረ ህታ ታጌሮ ኡል ካይሁዳ ዱባ ሀሄሶን ጎሳ ኦጋልሰሳ ሻላጋራ አመን
 አታይሰን እዬሴን። 6 ጲላጦሳና ሂካ ካኮማላረ ጎራታ፡ “ሂክ ካጋሊላ እባዶትያ?”
 አመ ሆሳተ። 7 የሱሳ ካሄረዶሳ ቃላዳኮ ካኤመተሮ ላኖ ጲላጦሳ ካኮአዴሰረ
 ጎራታ፡ ሄሮዶሳ ሀሱ አልማ ኢየሩሳሌም ማንኮግረ ማራን የሱሳ ሄሮዶሳ ቶሰ
 ፋረ። 8 ሄረዶሳና የሱሳ ድን ካሞጋን ጎራታ ዶታ ማንኮግረ ማራን፡ የሱሳ
 ካኮደያረ ጎራታ ኦሎ ገጌላተ። ጋራኬሳክ እየሰ ማለ ማንኮግረ ማራን ኡሱ ባሳ
 ጎፈለ ድን አብድ የላታ ግረ። 9 ሄሮዶሳ ሆሰን ታሞጋን የሱሳ ሆሳተ፡ ኡሱ

ጎአመ ቶና ላኮአባበር። 10 ቱቃሞኮክ ወይቻልና ሴራ ካሙሴ ኦኦጋልሰሳራን
 ኤስ አሌረን አታይሰን ሞታ ግረን። 11 ሄሮዶስ ወታዳራልኬሳ ወታ ኡሱ ቱፊ
 ቃጭፋተ፡ ካካባጃ ሳርስ ሳርስሰጉረ ጲላጦሳ ቶስ ፋረ። 12 ሄሮዶስና ጲላጦሳ
 ኤስሪ ሳትንተ ናቃቴን፡ ጣየ ጎአመን እሶ ኦሮ ቁጠ አባናየን። 13 ጲላጦሳና
 ቱቃሞኮክ ወይቻል፡ ካአይሁድ ሞትጆልና ጎሳና ራቶ ኩኩይሰረ፡ 14 ሃ አመ፡
 “ሂክ እባዶት ጎሳ ሜላነውን ከኬሳራ አንተዴን ኡሱ እን ቶስ ኬንቴተን፡ አንና
 እስን ሆረ አየስ ቁሌሴረ፡ እስን ካኬንተቴን ሞቶን ባስ ኮና ላኮሄለሮ። 15
 አደ ሄሮዶስ ኡሱማሌ ኮና ሄላኖ ዋት ኖ ቶስ ኡሱ አባበራ። እስን ጎጎድያታኒ
 ሂክ እባዶት ጎይን ካጌግሰሮ ኮና አየስ ላኮፈለሮ። 16 ሃንሱን እን ኡሱ ቦጪረ
 ፋርናራ።” 17 [ሂክ ኡሱ ካኮንአመረ ካፋሰካ ባላይ እባዶት ኮ ሻኖኮ ጎጎፋራምሮ
 ማንኩዶትሳረ ማራንየ።] 18 ጎሳና ዱባ ራቶ ሌረ፡ “ሂክ እባዶት ላጋድ! ባርባነ
 ኖን ፋር!” አማ እዩን። 19 ባርባነና ካታማ ኦሮ ጎሳ ሜላነይ ከኬሳናይና ኔፎ
 ላጋዳናይ ካሸያመረ እባዶትየ። 20 ጲላጦሳና የሱሳ ፋርን ማንኩዶተረ ማራን፡
 አደ አባበ ጎሳ እዩሰሰ። 21 ጎሳ ጎአመን፡ “ሱይና! ሱይና” አማ እያ ግረ። 22
 ጲላጦሳና ሴድ ጋለ፡ “መውን? ሂክ እባዶት ካፈለራ ባስ መያ? ኡሱ ካላጋሰሰሮ
 ባስ ኮና እን ላኮሄለሮ፡ ሃንሱን ቦጪረ ፋርናራ” አመ። 23 እሶ ጎአመን ያየትሶ
 ጦቂኢሴነ የሱሳ ጎጎሱዋምሮ አታይሰን ኡሱ ኤባተን፡ ኢያክሶና አዋዳተ። 24
 ሃንሱን ጲላጦሳ እሶ ካሆሳተራን ፈሎ ጎጎሀይሮን ፍርዴ። 25 ጎሳ ሜላነይ
 ከኬሳና ኔፎ ላጋዳኖ ሻመ ካግረ፡ ጎጎፋራምሮ ካኤባተናን ኣንክ ባርባነ ፋረ።
 የሱሳ አደ እሶ ታጌላቴን ጎጎየላራውን ሮርስ ሰሰ። 26 የሱሳ አበን ጌሳ ግራን፡
 ሰሞና ካአማመረ ካቀሬና እባዶት ጋጣረኮ ካኤሜታሮ ሄሌንጉሬነ ማስቃሊ
 ሰድሴረን የሱሳ ዴበ ጎጎሴሮ አበን ሁኖመን። 27 ካሞጋን ጎሳና ጌግዮታትሶ
 ባባሳታ ካኦታረ ሄለልና የሱሳኮ ሃሬ ዴበ ሰሴታ ግረን። 28 የሱሳ አደ እሶ ቶስ
 ካምባል አመረ ሃ አመ፡ “እስን ካኢየሩሳሊም ሄለል እስኦትሰኑና ይስክሰኑን ኦዬን
 ኳሬ እዩን አሮኦቴን። 29 ሂክማ ማሴናጆልና ታኡሙሎን ግታ ገዳም፡ ሀኢልሶን
 ኦግራን ናሳሶ ኦሶማሳመንያን እስን ካኮኦንታን ጎራታ ኤመይናራ። 30 ሀሱ
 ጎራታና፡ እሶ ‘ዋዳሚልን ‘ኖ ጉት እያ’ ጋጋጆሉና ‘ኖ ጎልሳ አምናራን።” 31 ጎርታ
 ጋ ኡንጃንክ ሃ ጎየሌን፡ ካአንጋገ አድ ሞስ የልናረን?” 32 ኡሱን ወታ ላጋዲን
 ኦካለ ባስ ኦፈለራን ላማ አተን ሴተን። 33 ቀራንዮ ታአማንተቴ ባንኤ ካኮገያረን

ጎራታ ሱዬን፡ ባስ ኦፊሊራና ኮ ምና ታመርገነ ኮ ምና ታበተነ ሱዬን። **34** የሱሳና፡
 “አቦኬ! እር ካፈላራና ላኮካሳን እሱን ሀሄሶ አምና” አመ። እሱና ሳርስኬሳ
 ኢጣይ ሄዴዳመን። **35** ጎሳና አሌረ ዲያ ግረ። አይሁድኮክ ወይቻልና፡ “ካካለ
 እባዶ ፋይሰራ። ዋይ ካእሳባመሮ ክርስቶሳ ጎሌ፡ አላ ኡሱ እስኦቴሳ ሀሃሳቶ”
 አማ ቃጭፋቴን። **36** ዋታዳራልና ጋባላመረ ካኦኮኮታሮ ጣሞ ካወይኒ ሰሳና
 ቃጭፋታ ግረ። **37** “እት ካእይሁድ ዋኖ ጎሌተ፡ እስኦታ ሃሳ አማ ግረን።” **38**
 መተኬሳኮ ጉንተ ማስቃሊ ጉት፡ “ሂክ ካይሁዳ ዋኖያ” ታእማታ ጸፍ ግቴ። **39**
 ፈሎ ኦሜላን ፈሌረን ኦሱዋሜሬንኮ ኮ፡ “እት ላ ካፋይሳሮ ክርስቶሳቶላ? አላ፡
 እስኦታና ኖና ሃሰ” አማ ሀባራ ግረ። **40** ካላምክና ጎአመን ሃ አመ ኡሱ ሀድሰ፤
 “ኖ እማለኮክ ፍርዳ እታታ ግራንቴ፡ እት ዱዶ ዋ ላኮአብሳቶያ? **41** ኖ ኦፊልነኖ
 ፈሎይ ሙሮ ኦአታታኖ ማንኮሌነኖ ማራን፡ ካዶትሳሮ ፍርዳ ጉት ግና። ሂክ
 እባዶት ጎአመን ኮና ካሜላን እየሰ ላኮፈለሮ።” **42** አደና፡ “የሱሳ፡ ዋኖናትካይ
 ካኮኤሜተ ጎራታ እን ሻድና” አመ። **43** የሱሳና፡ “እን ሩምና አማራ፡ ህታር ኢነ
 ዋታ ጋናቴ ግርናታ!” አመ። **44** ሀሱ ጎራታና ሳቲ ሌ ካሌሮየ፡ ሳቲ ሳጋሊ ታጌቶ
 ኡል ዱባይ ጉት ሙጉድ ሌ። **45** አርት ሙጉድ ሌተ፡ ቁሉክ ምን ካዋኮክ
 ጎሳሎ ፊላመ ላማ ባንኤ ቤ። **46** የሱሳና ያየ ታኦቲት እዬ፡ “አቦኬ፡ እያናኬ እን
 ገነታይ ሰሳታራ!” አመ። ሃና አመረ ጎየ። **47** ዋታዳራ ቦሉን ወይቻና ካሌሮ
 እየሰ ካኮደያረ ጎራታ፡ “ሂክ እባዶት ኦግራን ቁሉክየ” አመረ ዋ ጋላቴ። **48**
 ሂካና ድን ኤሰ ባንኤ ኩኩመ ካግረ እባዶ ዱባና ካሌሮ እየሰ ካኮደያረ ጎራታ
 ጌግዮትሶ ቦቦጫታ ምን አባባተን። **49** እየሱን ጎአመን የሱሳ ኣሎ ኦካሳናዬን
 ዱባ ኡሱማሌ ጋሊላኮ ካየረ ዴቦ ካሰሰታረ ሄለል ሂካ ዲያ ፋክመ አሌ ግረ።
50 አይሁድኮት ሾንጎ ኡና ካሌረ ዮሴፋ ካአማመረ ካአዳንክና ቁሉክ እባዶት
 ግረ። **51** ሂክ እባዶት ታሾንጎ ማርካና ኦፊላሬን ፈሎ ዋታ ላኮሌረ። ኡሱና
 እርማትያሰ ታእማንተቴ ታይሁዳ ካታማኮክ እባዶት ጎሌሮ፡ ዋኖናት ካዋኮት
 ኤመቶ ኦራታ ግረ። **52** ሂክ እባዶትና ጸላጦሳ ቶሰ ሴተረ ሬሰ ካየሱሳ ኤባተ።
53 ኡሱን ፈኢ ካኮሰሳማተ ጎራታና ሬሰ ዳግሰረ ታቃማል ጋሼ ኢድሰረ፡ ኤኤሞኮ
 ቆራመ ፈላመ ካኤካተሮ ዱዶ ማዮና ቃማላሞን ታኮግሮ ባንኤ ቃማለ። **54**
 እርና ታኮኤካሳታናን አርተ። አይሁድን ታፎሊሰ አሪ ሀጋአቢን ላቴ። **55** ጋሊላኮ
 ካየረ የሱሳ ዋታ ካኤመተረ ሄለልና ዴቦ ሰሴታ ታቃማል ባንኤ ዴ። ሬሰና ምሲ

ቃማሌራን ዴ። 56 ኤስኮ ምንክሶ አባባተረን ሽቶና ቅባት ሬሱን ኤካሰን፤ ሴራ ጎሳሰጋሮክ ማለ አይሁድን ታፎስ እሪ ፎልሳቴን።

24 አልማኮ ታሆሬ አሪ ሄለል ታኤካሳተራን ሽቶ አበረ ኡል ቡላኦዋ ግራን ቃማል ቶስ ሴተ። 2 ቃማል ጉኮ ካኦቶቶለሮ ኤኤዋ ዴን። 3 ኦሮዴን ካኮታባሬን ጎራታ አደ ጎታ የሱሳኮክ ሬስ ላኮሄሌን። 4 ኡሱ አዬሲ ግርድ አመን ግራን፤ አሎ ካህንቃሮ ሳርስ ኦሳርሳቴራን እባዶጃ ላማ ደራኣ እሶ ዶሌ አሌን። 5 ሄለልጃና አብስኮ ካከይ ሁስ አመን ግራን፤ እባዶጃ ሃ አመን “እርዶክ ካሌሮ ኡሱ ቃማል ኦሮኮ መን ዶታታን? 6 ኡሱ ኬራ! ህታኒ ላኮግሮ፤ አደና ጋሊላይ ታኮግረ መ ኡሱ እስኔ አመሮ ሻዳ። 7 ‘ኤረ ካእባዶ ገነ ታጩባለሳይ ሮር ሰሳምን፤ ሱዋሚና ታሴድ አሪ ጎይኮ ኪን ዶትሳራ’ አመ ግረ።” 8 ሄለልና ሀሱ ጎራታ ሃፋራ ካየሱሳ ሻደ። 9 ሄለልና ባንኤ ታቃማልኮ አባባተረ ሂካ እየሰ ዱባ ቶሞንኮ ኮዉና ካካለ እባዶ ዱባን ሰገን። 10 ሂካ እየሰ ኦፋራሜራውን ኦስጌራና፤ ካመግደላ ኡልኮት ማይራመ፤ ዮሃና፤ አዬ ታያይቆባ ማይራምኔ እሶን ዋታ ካካለ ሄለልና ግረ። 11 እሶ ጎአመን ሄለል ካአዬሰረ እየሰ ካዳንዶዋራን እን እሶን ማንኮሌ ማራን ላኮአብዳተረን። 12 ጴጢሮሳ ጎአመን ኬጉረ ቃማል ቶስ ቲየ። ኤስራ ጌጉረና ሁስ አመረ ኦሮድ ጎዎቾሮ ጋሽ ታላል ግራኖ ዴ። ካሌሮ እየሱን ማማ ምንኬሳ አባባተ። 13 ኤስ አሪ የሱሳኮ ኦአጋልሳታረንኮ ላማ፤ ኢየሩሳሌምኮ ኩማ ቶሞንኮ ኮ ታላብሰ ግታክ ፋክ ካአመ፤ ኤማሁስ ካአማማሮ ማማን ቶስ ሴታ ግረን። 14 እሶና ካሌሮ እየሰ ዱባ እስ እስሰኦሮ አዬሳ ግረን። 15 አዬሳና ሰስታን ጉት ግራን የሱሳና እሶ ቶስ ጋባላመረ እሶነታ ሴታኖ ሀጋእበ። 16 እየሱን ጎአመን እሶ ኡሱ ጎሳኤዳሶንኮ አልኦ ኦትሶ አባማን ግረን። 17 የሱሳ፤ “እስን ሰሴታ ግራን፤ ራድ እስ እስኦሮ ሃ ካአዬሳቴን መያ?” አመ። እሶና ኣሎ ያዳ ኦሮ ታቤን ቶልማን አሌን። 18 እሶኮና ኮ፤ ቀልዮጳ ካአማመረ፤ “ሂናኣ አርጃሊ ህታኒ ኢየሩሳሌም ካሌሮ እየሰ ካካሶን፤ አት ኡሉን ማርትታ?” አመ አባበ። 19 የሱሳ፤ “ካሌራ እየሰ መያ?” አመ። እሶና ሃ አመን። ዋይና እባዶ ዱባ ሆረ ፈሎይና ሃፋራይ ካአቲ ካሄገሮ ማንኮሌረ ማራን፤ “ሀክና ካናዝረት የሱሳ ጉት ካፈላመሮ አዬስያ። 20 ኡሱ ቱቃሞኮክ ዋይቻልና ሞትጆልካን ጎይኮክ ፍርዳን ኡሱ ሮርሰን ሰሰን፤ ሱዬን። 21 ኖ እንዴ ካእስራኤል ጎሳውን ዋዶ ሌሮዋ አምነ አብድ ካየላኔ ኡሱየ፤ ካካለኮና አደ፤ ሂክ ሃ ጎሌኮ ህታር አሪ ታሴድታ። 22

አደና ኖ ኦሮኮ ሄለል ኮኮ ኖ ማምሰ፡ አሶና ቡላነ ቃማል ቶሰ ሴተሬን። 23 ሬሰና ካኮዋታሬን ጎራታ ኤሜተረን 'የሱሳ ኔፎን ግራ' ኦአማራን ኤርግቻል ራጋ ዴነ አማ አባባተን ኤመተን ኖን ሰገን። 24 ኖ ኦሮኮ ኮኮ ቃማል ቶሰ ሴተረ፡ ልክ ሄለል ጎጎአመሮ ካሌሮ ዴን። የሱሳ አደ ላኮዴረን።” 25 የሱሳ ሃ አመ፡ “እሰን ጎዋሌ አባዶ፡ ዋዳናትሰና ካሄገሮል ካአዬሰናን ዱባ አማናታና ዋቲ አዳላተ፡ 26 ክርሰቶሳ ሂካ አየሰ ህታ ራኮ አታታኖና ካባጃ ቶሰ ታባኖ ላኮዶትሳሮያ?” 27 ሙሴኮና ካሄገሮ ዱባኮ ሀጋአበረ ቁሉክ ማጻፋጃል ጋራኬሳ ካጻፋመሮ ቱሳ ፋረ ሰገ። 28 ካሴታረን ማማን ካኮጋባላመሬን ጎራታ፡ የሱሳ እሰ ካሮርናሮ ኣን ሌ። 29 እሶ አደን፡ “አርት ኢተ ቡይተታ፡ ኡል ሄመን ላራ፡ ሃንሱን ኖኔ ዋታ ህታኒ ባር!” አመረን አታይሰን ኤባተን። ሃንሱን እሶነታ ባርን ታብ። 30 እሶነታ ባቦ ኣምን ካኮሀማጼረ ጎራታ ባቦ ኬሰረ ዋ ጋላቴረ ኤብሰ እሶን ሰሰ። 31 ኡሱ ጎራታ አልኦ ኦትሶ ባናመሬን የሱሳ ላኖ አዴሰን፡ ኡሱና እሶኮ ሰያመ። 32 እሶና፡ “ኖ ራድ ግራን፡ ኖ አዬሰሳ ቁሉክ ማጻፋና ባነ አጋልሰሳ፡ ዋዳናታን ጉባታ ላግቴላ?” አመን። 33 ኡሱ ጎራታዋ ኬንጉሬነ ኢየሩሳሌም አባባተን ሴተን። ቶሞንኮ ኮ ኡሱኮ ኦአጋልሳታራና ኦካላ እሶነ ዋታ ኮሌን ኩኩሜን ኦግራን ሄሌን። 34 እሶና፡ “ጎታ የሱሳ ኦግራን ኬራ! ሰሞናና ሙተራ” አማ ግረን። 35 የሱሳኮ ኦአጋልሳታረን ላማ ራድ ካሌሮ አዬሰና የሱሳ ባቦ ኤብሰ ካኮሰሳረ ጎራታ ምሲ እሶን አዴሳመሮ ሰገን። 36 እሶ ሂካ አዬሳ ግራንቲ፡ የሱሳ እሶ ኦሮ አሌረ፡ “ኖጎዳ እሰኑን ሀሌቶ” አመ። 37 እሶ አደ ኔንጉሬነ አብሳተን። ጋሪ ካዴራን ኣን እሶን ሌ። 38 የሱሳና ሃ አመ፡ “ሙን ንያታን? ዋዳናትሰኒ ሙን ሄዳታን? 39 ንነኖኦቴና ሉቃቆኦቴ ዲያ፡ አንዋያ። አዲ አን ድና ዲያ፡ አን ጉት ጎጎድያታኒ ጋር ሶና ለፋልና ላኮአብቶ።” 40 ሂካ አመጉረ ንነኖና ሉቃና እሶን ቱሳተ። 41 እሶና ንገሎኮና ማማኖኮ ካከይ ጋና ሀአብዳኖን ግራን፡ “ህታኒ ኮኮ ካአምራን አብታነ?” አመ። 42 እሶና ኤለኒ ካዱባመሮ ኩኩኡብኮ ኡሱን ሰሰን። 43 የሱሳና አታተረ እሶ ሆረ አመ። 44 ኡሱና፡ “ኣን እሰነታ ታኮግረ፡ ሴራ ካሙሴይ፡ ካሄገሮልና ማዛሙርኮክ ማጻፋይ እን ማራን ካጻፋመረ ዱባ ጉዳይን ዶትሳራ አመ እን እሰኑን ካሰጌረ ሃፋራክ ሂካያ” አመ። 45 ኡሱ ጎራታ ቁሉክ ማጻፋጃሊ ጎጎሻድናዉን ሳሙትሶ ባነ። 46 ሃና አመ፡ “ክርሰቶሳ ራኮ አታይናራ። ታሴድ አርና ጎይኮ ክናራ። ሃ አማመ ማጻፋ ቁሉክ ጻፋመራ። 47

ኢየሩሳሌምኮ ሀገረኛ ጎሳ ዱባን ጨቦኮ ጉላ ጋላኖና ጨቦ ሀሄሶ አማማኖ
 መገኬሳይ ላላባምናራ። 48 እስና ሂካኑን አቶታን። 49 አንና ኣቦክ ታስሰሮ
 አብድ እስኑን ፋርናራ። እስን አድ ኤለኮ ሁና ታኣታታኒ ኢየሩሳሌም ግራ።” 50
 ኤስኮ አባባተረ የሱሳ ኡሱኮ ኦኣጋልሳታራን ካታማኮ ቤስረ ብታንያ ታጌሮ ኣተ
 ቤ። ገነኖኦቴሳና ኬስረ እሶ ሶማሳተ። 51 እሶ ጋላታ ግራና፥ እሶኮ አሳባመ ዳሩር
 ቶስ ቤ። 52 እሶና ሳጋደን፥ ገጌሎ ኦኣቲትና ኢየሩሳሌም ቶስ አባባተን። 53 ዋ
 ጋላታ አርጌቶ ቁሉክ ምን ካዋይ ግረን።

ያንሳ

1 ሆራርጀ ሃፋራ ግረ፡ ሃፋራና ዋ ዶሌ ግረ፡ ሃፋራና ዋየ፡ **2** ኡሱና ሆራርጀ ዋኔታ ግረ፡ **3** ካመን ዱባና ኡሱ ቶንሴ መጣመ፡ ካመጣመሮ ዱባኮና ኡሱ ካላይ ካመጣታመራ ኮና ላግሮ፡ **4** ኔፎ ኡሱ ግቴ፡ ህት ኔፎና እባዶን ኢፋቴ፡ **5** እፋና ሙጉዲ ሀንቃራ፡ ሙጉድና ላኮአዎዳሮ፡ **6** ዋኮ ካፋራመራ ያንሳ ካአማማረ እባዶት ኮ ግረ፡ **7** እባዶ ዱባ አቶናትኬሳ ማልረ ጋራኬሳነ ጎንአማንሮን፡ ኢፋ ማራን አቶ ሊን ኤመተ፡ **8** እፋ ማራን አቶ ሊን ኤመተራ ኳሬ ኡሱ ኡሱን ኢፋ ላኮየ፡ **9** እባዶ ዱባን ኢፋ ካሰሳሮ ካሌራ ካሩም ኢፋ አላም ቶሰ ኤመታ ግረ፡ **10** ኡሱ አላም ኦሮ ግረ፡ አላም ካኮመጣመራ ኡሱ ጎሌና፡ አላም አደ ኡሱ ላኮአዳሰረ፡ **11** ካኬሳ ካሌሮ ቶሰ ኤመተ፡ ፋልኬሳና አደ ኡሱ ላኮአታተሮ፡ **12** ሀሌዎ ኳሬ ኦአታቴራውና መገኬሳ ኦአማናራን ዱባውን አደ ኤረ ካዋ ታኮሌራን ፈኢ ሰሰራ፡ **13** እሶና ዋኮ ኡሙላማናን ኳሬ፡ ታኢ ጎርቱን ታሶየ ፈኢ ጎርቱን ታባባር ፈኢኮ ላኮኡሙላመራን፡ **14** ሃፋራና እባዶ ሌ፡ ሰኖና ሩም አማጋመ ኖ ኦሮ ባሬ፡ ኣቦኬሳ ዶለኮ ካኤመተሮ፡ ኤረ ኮኮት ካባጃ ኖ ዴ፡፡ **15** ያንሳና፡ “እንኮ ሃሬ ካኤመታራ እንኮ ሆረነ ማንኮ ግረ ማራን እንኮ ሮራራ አመ እን ካኮንአቶታረ ሂካኩንያ” አማ እዬ ኡሱ ማራን አቶቴ፡ **16** ሰኖተሳ አማጋማኖኮ ካከይ ኖ ዱባና ሰኖ ጉት ሰኖ አታኔና፡ **17** ዋ ሴራ ጋራ ካሙሴነ ሰሰረ፡ ሰኖና ሩምና አደ ጋራ ካየሱሳ ክርሰቶሳነ ኤመተ፡ **18** ሱረዋና ዋ ካዴራ ማዮና ላግሮ፡ አየሱን ጎአመን ዋ ኦዶ ዶሌ ካግረ ኤረ ኮ ካሌራ ሄዶ ኡሱ ኖን አዳሰሰ፡ **19** አይሁድና፡ “አት አዮታ?” አም ጎንሆሳራውን ቱቃዋልና ዎዩል ኢዩሩሳለምኮ ኡሱ ቶሰ ካኮፋራነን፡ ጎራታ ያንሳ ካሰሰራ አቶናት ሂካየ፡ **20** አቶታኖኮና ሃር ላኮጋለ፤ “እን ክርሰቶሳ ላኮየ” አመ አዳሰሰ አቶተ፡ **21** እሶና፡ “ሀያ አት አዮታ? ኤላሳታ?” አመን ሆሳተን፡ ኡሱና፡ “ላኮየ” አመ፡ እሶና፡ “ሀያ ካሄገሮታ?” አመን፡ ኡሱና፡ “ላኮየ” አመ አባበ፡ **22** እሶና፤ “ሀያ አት አዮታ? አት ካፋርተተ እባዶን አባብ ኖ ጎንሰንሶ እሰ ኦታውን መማታ?” አመን፡ **23** ያንሳና ካሄገሮ እስያሳ ጎንሰጋመሮ፡ “ጎታውን ራ ኤካሳ አማ ቃሉላቶክ ኡሊ ታእያተ ያየ እንያ” አመ አባበ፡ **24** ፋራሳውልኮ ኦፋራመራና፡ **25** ሃና አመን፤ “ሀያ ክርሰቶሳ ጎርቱን ኤላሳ ጎርቱን ካሄገሮ ጎሌኖን ሙን ጣማቃታ?” አመን ሆሳተን፡ **26** ያንሳና፡ “እን በከ ጣማቃራ፡ እሰን ካካሶና አደ እሰን ኦሮ አሌራ አመ አባበ፡ **27** እንኮ

ዳንበኔ ካኤመታራ፡ እን ከፈሮ ኦቴሳኮክ ሻኖ ፋርን ካኮዳዴኖን ኡሱያ።” 28 ሂክ ዱባ ካሌራ ያንሳ ጣማቃ ታኮግረ ዮርዳኖስኮ፡ ጋማ ታብታንያ ካታማይዮ። 29 ያንሳ ታላም አሪ፡ የሱሳ ኡሱ ቶስ ካኤማታሮ ዴረ ሃ አመ፡ “ሂክማ! አላምኮክ ጨቦ ካባሳራ ኢዳዶ ካዋ፡ 30 ‘እንኮ ሃሬ ካኤመታራ እንኮ ሆረን ማንኮ ግረ ማራን እንኮ ሮራ’ እን እስኩን ካአማረ ኡሱያ። 31 እን መተኬዉን ላኮማላበረ፡ በከ ጣማቃ ካኤማደራና ኡሱ እስራኤል ኦሮ ጎጎሙትሮንያ” አመ። 32 ኤስኮና ያንሳ፡ “እያና አራበ እን ዳሩርኮ ዳገረ ኡሱ ጉት ሀማጸ ግራን ዴ። 33 እን መተኬዉን ላኮማላበረ እየሱን ጎአመን በከ ጎጎጣማቅሮ ካፋረራና፡ ‘እያና ቁሉክ ካጣማቃራ፡ እያና ዳጋና ኡሱ ጉት ሀማጸ ካሙታራ ኡሱያ’ አመ። 34 እንና ሂካ ዴራ፡ ኡሱ ኤረ ካዋ ላኖ እቶትናራ” አመ እቶናት ሰሰ። 35 ታላም አሪ ያንሳ የሱሳኮ ኦአጋልሳታረን ላማነ ዋታ ኤስ ባንኤ አሌ ግረ፡ 36 ያንሳ የሱሳ ኤስነ ሮራ ግራን ዴረ፡ “ሂክማ ኢዳዶ ካዋ!” አመ። 37 ላማ ያንሳኮ ኦአጋልሳታረና ያንሳ ሂካ እዬሳ ግራን ማሌረን የሱሳ ዴበ ሰሴተን። 38 የሱሳና ካማባል አመረ ኡሱ ዴበ ኦስሴታራን ዴረ፡ “መ ዶታታን?” አመ ሆሳተ። አሶና፡ “ራቢ፡ ሀጌ ግታ?” አመን፡ [“ራቢ” አማኖ ካአጋልሰሳሮ አማኖያ።] 39 ኡሱና፡ “ኮዬን ዲያ” አመ። “ሃንሱን ሴተረን ኡሱ ማንኮግሮ ዴን፡” ኤስርና ኡሱ ዋታ ሀዬን፡ አሪኮና ሳቲ ቶሞንክ ጎራታ ሌ ግረ። 40 ያንሳ ካአዬስሮ ማለን፡ የሱሳ ዴበ ኦስሴታረን ላማኮ ኮ ካስሞና ጴጢሮሳኮክ አቢ እንድራሳ ግረ። 41 እንድራሳ ሆራርጀ አቢኬሳ ሰሞና ሄለረ፡ “ኖ መስህ ሄላነና” አመ፡ [“መስህ” አማኖ ክርስቶሳ አማኖያ።] 42 የሱሳ ቶንሳ ኬነ። የሱሳና ዴጉረ፡ “እት ካዮና ኤረ ሰሞናታ፡ ከፋ አማሞ ኡማሞናታ” አመ፡ “ከፋ” አማኖና ጴጢሮሳ ጎርቱን “ኤኤሞ” አማኖያ። 43 ታላም አሪ፡ የሱሳ ጋሊላ ቶስ ሴይን ጎሳተ፡ ፍልጶሳና ሄለረ፡ “እን ዴበ ሰሴና” አመ። 44 ፍልጶሳና እንድራሳ ጴጢሮሳ እን ካቤተሳይዳ ካታማኮክ አባዶትዮ። 45 ፍልጶሳና ናትናኤል ሄለረ፡ “ሙሴና ካሴራ ማጻፋይ፡ ካሄገሮልና ኡሱ ማራን ካኮንጻፌረን ካዮሴፋ ኤረ ካናዝረት የሱሳ ሄላኔና” አመ። 46 ናትናኤልና፡ “ናዝረትኮ ካአዳንክ እየስ ሄላምን ዳንዳራ?” አመ። ፍልጶሳና፡ “ኤማዴ ዴና” አመ። 47 የሱሳና ናትናኤል ኡሱ ቶስ ካኤማታሮ ዴረ፡ “ሂክማ፡ ማላነ ካላይክ ካሩም እስራኤልት” አማ ጋራ ኬሳ አዬስ። 48 ናትናኤልና “እት እን ምሲ አዴስ?” አመ የሱሳ ሆሳተ። የሱሳና፡ “እት ጋ ካባላስ ሄገሊ ግራን፡ ጋና

ፍልጻሳ ኩ ሀኡሞን ግራን እን ኩ ዴራ” አመ አባበ። 49 ናትናኤልና አባበረ፤ “ካእጋልሰሳቶ! እት ኤረ ካዋታ፤ እት ካእስራኤል ዋኖታ” አመ። 50 የሱሳና፤ “እት ካአማንተታ፤ ካባላሰ ጋ ሄገሊ እን ኩ ዴራ ማንኩ አመሮ ማራንያ? ጋና ሂካኮ ካሮረ እየሰ እት ዴታ” አመ። 51 አደና፤ “እን ሩምና ሩምና አማራ፤ ዳሩር ባናንተደ፤ ኤርግቻ ካዋ ኤረ ካእባዶ ጉት ኮራታና ዳጋ ግራን ድናታን” አመ።

2 ታሴድ እሪ ታጋሊላ አዉራጃ፤ ታቃና ካታማይ ሃሰኖ ግቴ፤ እዬ ታየሱሳና ኤሰ ግቴ፤ 2 የሱሳና ኡሱኮ ኦእጋልሳታረና ባንኤ ታሃሰኖ ኡማማን ግረን። 3 ጣሞ ካዋይኒ ካኩጉዳታረ ጎራታ እዬ ታየሱሳና፤ “ጣሞ ካዋይኒ ጉዳተለ እንተ።” 4 የሱሳና፤ “እት ሄለልትቲ እን መ ጎጎየሎ ዶታታ? ጎራታክ ጋና ላኮጌሮ” አመ። 5 ኣየቴሳና ኤሰ ኦግረን ኦሀንዳራዉን፤ “ኡሱ ካአማሮ ዱባ ፈላ” እንተ። 6 ካአይሁድ ካሁሩፋ ሴራ ማለ፤ ቶዶባታሞኮ ከንኮ ታ ቦልኔ ቶሞንኮ ከን ሊትሮ ካአባራ ቶሳ ለዎ ኤሰ ግረ። 7 የሱሳ ኦሀንዳራን “ቶሳሊ በክ አማጋ” አመ። እሶና ቶሳሊ ሀኢ ገግሰን አማጌን። 8 ኡሱና፤ “ጉኮ ሁሙሳደን ሞን ካሃሰኖክ አሞና ጣሞን ኦዶናት ካእቦን ሰሳ” አመ። እሶና ኡሱ ጎጎሰጌሮክ ማለ የሌን። 9 ኦዶናት ካአባናየክና ጣሞ ካዋይኒ ቶሰ ኦእግልሳመራን በክ ሁሙገ ዴ። ጎሌና ኤትኮ ኤመቴራን ላኮኦደሰሮ፤ በክ ኦሁሙሰራን ኦሀንዳረን እደን ካሳናየንዋ፤ ኡሱና ካማሻሽ ካለ ኡመረ፤ 10 “እባዶ ዱባ ሆራርጀ ካሮርሳራ ካእዳንክ ጣሞ ካዋይኒያ፤ እባዶና ኣሎ ጣመ አባባተረ ካዳንቤ ጣሞ ካዋይኒ ሮርሳራ እት እደ ካእዳንክ ጣሞ ካዋይኒ ግዳ ጊን ካይተታ” አመ። 11 የሱሳና ሂካ ባሳክ ማላታልኮ ካሆሬ ታጋሊላ አዉራጃ ቃና ካታማይ ፈለ፤ ካባጃና ቱሰ፤ ኡሱኮ ኦእጋልሳታረና ኡሱ አማኔን። 12 ኤሰኮ አባባተረ የሱሳ ኣየቴሳን፤ አቢላል ቴሳኔ ኡሱኮ ኦእጋልሳታረን ዎታ ካቅፍረናሆም ማማን ቶሰ ዳገ፤ ኤሴና እሪ ትጫር ሀማጼን። 13 ካአይሁድ ባለ ካፋሰካ ጎጎጋባላሜ፤ የሱሳ ኢየሩሳሌም ቶሰ ቤ። 14 ቁሉክ ሞን ካዋኮት ኣል ኦሮ ግድጆል፤ እዳድጆልና እራበጆል ኦዳዳላታሬን ኡሱማለና ሀማጼን ማራጋደ ኢግልሳታ ካዳዳላታረ እባዶ ሄለ። 15 ሀሱ ጎራታ ጦርቃየ ሀረ ኤካሰረ እዳድጆልና ግድጆል ዱባ ሞን ካኤብኮት ኣል ኦሮኮ ሆሮረ፤ ማራጋደ ኦእግልሳታንና ማራጋደክሶ ዳረኤ፤ ጣራዴዛልና ኬሰ ሉጉደ። 16 እራበ ኦዳዳላታሬንና፤ “ሂታኮ ቤሳ፤ ኣቦኬክ ሞን ካዶክ ሞን እሮየልቴን!” አመ። 17 የሱሳኮ ኦእጋልሳታረና፤ “ሞን ካዉን ታግታ ኢዳን ጉባታ” አማመ

ካጻፋመራ እሱን ሻዳመ። 18 አይሁድና፡ “ሂካ ዱባ ፌላኖካውን መ ማላታ ኖን ቱሰናታ?” አመን። 19 የሱሳና “ሂካ ምን ካኤብ ባሳ፡ እንና አሪ ሴድ ኦሮ አባብ ኬሰናራ” አመ አባበ። 20 አይሁድና፡ “ሂካ ቁሉክ ምን ካኤብ ማዳርን ጌሰ አፋርታምኮ ሌ ጉድሰራ፡ ሀያ እት ምሲ አሪ ሴድ ኦሮ አባብ ማዳርናታ?” አመን። 21 የሱሳ ቁሉክ ምን ካዋ ጎአምሮ አደ እሰ ኦቴሳክ ማር አዬሳኖ። 22 የሱሳ ጎይኮ ካኮ ኬ ጎራታ፡ ኡሱኮ ኦአጋልሳታረን ኡሱ መ አዬሰሮ ሻደን፡ ቁሉክ ማጻፋና የሱሳ ካአመሮ ሃፋራ አማኔን። 23 የሱሳ ካፋሰካ ባላ ኢየሩሳሌም ካታማይ ግራን፡ አባዶ ካሞጋን ኡሱ ካፈለሮ ማላታል ዴረ መገኬሳ አማን። 24 የሱሳ አደ አባዶ ዱባ ማንኮካሶ ማራን እሶ ላኮአብዳተረ፡ 25 ኡሱ ዋዳና ታአባዶ ኦሮ ካግሮ ማንኮካሶ ማራን፡ ማዮና ጋራ ካአባዶ ኡሱን ጎጎአቶትሮን ላኮዶትሰሮ።

3 ታፋራሳውል ኡናና፡ ካአይሁድ ዋይቻልኮ ኮ ካሌራ ንቆድሞሳ ካአማማረ አባዶት ግረ። 2 ኡሱ አባዶትና ሄመን የሱሳ ቶሰ ኤመተረ፡ “ካአጋልሰሳቶ! ዋ ኡሱን ዋታ ካሌ አባዶት ኳሬ እት ካፈላቶ ባሳክ ማላታ ማዮና ፈልን ማንኮዳንዴኖን ማራን፡ ዋ ዶለኮ ካኤመተቶና ካአጋልሰሳቶ ላኖ ኖ ካንሶዋ” አመ። 3 የሱሳና አባበረ፡ “እን ሩምና ሩምና አማራ፡ ማዮና ካላም ጎአሙላመ ኳሬ ዋኖናት ካዋ ድን ላኮዳንዳሮ” አመ። 4 “ንቆድሞሳና አባዶ ዶአይረ አባባይ ምሲ ኡሙላምን ዳንዳራ? ካላም ኡሙላምን አባባይ ገዴም ታአዋ ቶሰ ታብን ዳንዳራ?” አመ ሆሳተ። 5 የሱሳና ሃ አመ አባበ፤ “እን ሩምና ሩምና አማራ፡ ማዮና በከኮና አያናኮ ጎአሙላመ ኳሬ ዋኖናት ካዋ ቶሰ ታብን ላኮዳንዳሮ። 6 አባዶኮ ካኡሙላመ አባዶያ፡ አያናኮ ካኡሙላመና አያናያ። 7 ‘ካላም ኡሙላማኖ ዶትሳራ እን ማንኮ አመ ማራን አሮሳደ።’ 8 አምባል ማንኮጌላተ ክያታ፡ ያየና ማላታ፡ አየሱን ጎአመን ኤትኮ ኤማቶ፡ ኤትራ ሰያቶና ላካሶ፡ አያናኮ ካኡሙላመ ዱባና ሂካማሌያ” አመ አባበ። 9 ንቆድሞሳና “ሂክ ምሲ ሊን ዳንዳራ?” አመ ሆሳተ። 10 የሱሳና “እት እሰራኤል ካአጋልሰሳቶ” ሌተ ግራን ሂካ አየሰ ላካሶያ? 11 እን ሩምና ሩምና አማራ፡ ካካንሶ አዬሰናና፡ ካዴነኖ አቶትናና፡ እሰን አዴን አቶታኖካንና ላኮአታታን። 12 ጋራ ካኡሌክ አየሰ እን እሰኑን ጎሰግሮ አማናታና ካዋተታን፡ ካዳሩረ አየሰ ጎሰጌ ምሲ አማናይናታን? 13 ዳሩርኮ ካዳገሮ ኤረ ካአባዶ ኳሬ፡ ዳሩር ቶሰ ካቤራ ማዮና ላግሮ አመ

አባባ። 14 ሙሴ ቃላቶቹን አሊ ሀበሳ ጎሳቸው ማለ፡ ኤረ ካእባደና ኡሱማሌ ሱዋምን ደትሳራ። 15 ህክና ኡሱ ካእማን ዱባ ጅሩ ጅሮማክ ግር ጎጎግሮንያ።

(aiōnios g166) 16 “ኡሱ ካእማን ዱባ ጅሩ ጅሮማክ ግር ጎጎግሮን ኳሬ ጎጎባኖንኮ ዋ ኤረ ኮ ታሰሰሮ አላም አዱ ጌላተራ። **(aiōnios g166)** 17 ዋ ኤረኬሳ አላም ቶስ ካኮን ፋረራ አላም ጉት ፍርድን ሀሌኖን ግራን፡ አላም ኡሱይ ጎጎፋይሮንያ። 18 ኡሱ ካእማናራ ዱባ ላኮፍርዳማሮ፡ ኡሱ ካእማኖን አደ ኮ ኤረ ካዋክ መገ ማንኮ አማኖን ግሮ ማራን፡ ጣየዋ ፍርዳመራ። 19 ፍርዳና ሂካያ፡ ኢፋ አላም ቶስ ኤመተ፡ አባዶ አደ ፈሎኦትሶ ኦሜላን ማንኮሌን ማራን፡ ኢፋኮ ሮርሳቴ ሙጉድ ጌላተ። 20 ታሜላን ካፈላራ ዱባ ኢፋ ዲዲራ፡ ፈሎ ኦሜላን ኦቴሳ ጎጎሙቶንኮ ኢፋ ቶስ ላኮኤሜታሮ። 21 ሩሚ ካሰሴታራ አደ ፈሎ ዋይ ኦፈላመራን ላኖ አዴሳም ሙትን ኢፋ ቶስ ኤመታራ።” 22 ኤሰኮ አባባተረ የሱሳና ኡሱኮ ኦአጋልሳታረና ኡል ካይሁዳ ሴተን፡ ኤሴና አሶ ጣማቃ አባራን አዳላተ። 23 ሀሱ ጎራታ ያንሳ ሳለም ዶሌ ሄኖን ታአማማቶ ባንኤ በከ ኦንጂን ማንኮግሬን ማራን፡ ጣማቃ ግረ፡ አባዶና ጣማቃምን ኤመታ ግረ። 24 ህክና ካሌራ ያንሳ ሀሻሞን ግራንየ። 25 ኮኮ ያንሳኮ ኦአጋልሳታረና አይሁድ ኦሮ ሁሩፋማኖኮክ ሴራ ዶጋማ ኬተ። 26 ያንሳኮ ኦአጋልሳታረን ያንሳ ቶንሳ ኤሜተን፡ “ካአጋልሰሳቶ፡ ዮርዳኖስኮ ጋማ ኩኔ ዋታ ካግረ፡ ጋራኬሳና አት ካኮንአቶቲታታ አባዶት፡ ሂክማ ጣማቃራ፡ አባዶ ዱባ ኡሱ ቶስ ሴታ ግራ” አመን። 27 ያንሳና፡ “ዋኮ ጎሰሳመ ኳሬ ማዮና ኮና አታይን ላኮዳንዳሮ አመ አባባ። 28 ‘እን ላኮክርሰቶሳዮ፡ እየሱን ጎአመን ኡሱኮ ሆረን ፋራመራ’ ካእመሮ እሰን መተክሰኒዋ አቶትናታን። 29 ማሻሻ ካኮን ግታ ኡሱ ካማሻሼያ፡ ያየ ማልን ዶሌ ካአላራ ሳት አደ፡ ያየ ታማሻሼ ጎማሎ አሎ ገጌላታራ፡ ሃንሱን ሀሴ ገገላንጀት፡ ግዳ ጉዳተታ። 30 ኡሱ ጦቂ ጦቂ አምን፡ እን አደ የራይን ደትሳራ አመ አባባ። 31 “ኤለኮ ካእመታራ ዱባንኮ ካንጂንክያ፡ ኡልኮ ካሌራ ካኡሌያ፡ ታኡሌና አይሳራ፡ ዳሩርኮ ካእመተራ ዱባንኮ ካንጂንክያ። 32 ኡሱ ካዴሮና ካማለሮ አቶታራ፡ እየሱን ጎአመን አቶናትኬሳ ማዮና ላኮአታታሮ። 33 አቶናትኬሳና ካአታተረ አባዶ፡ ዋ ካሩም ላኖ አዴሰ። 34 ዋ አያናኬሳ ጂናሰ ማንኮሰሳሮ ማራን፡ ዋ ካፋረራ ኡሱ ሃፋራ ካዋ አዴሳራ። 35 ኦዶ ኤረኬሳ ጌላታራ፡ ካመን ዱባና ገነቴሳ ሰሰራ። 36 ኤረኬሳይ ካእማናራ ዱባ ጅሩ

ጅሮማክ ግር አባ፡ ኤረኬሳ ካእማኖን አደ ኤንገ ታዋ ኡሱ ጉት ላታ ኳሬ ግር ላኮሄላታሮ።” (aiōnios g166)

4 ካፋራሳው አባዶ ያንሳኮ ሮረ የሱሳ ኦሞጋን ኡሱኮ ኦኦጋልሳታራን ኤካሳኖና ጣማቃኖ ማለን። **2** እየሱን ጎእመን ካጣማቄራ የሱሳ ሀሌኖን ግራን ኡሱኮ ኦኦጋልሳታራንያን። **3** የሱሳና ሂካ ጎጎአዴሰ ኡል ካይሁዳ ኢሰረ ጋሊላ ቶስ አባባተ ሴተ። **4** ኤስራ ሴታ ግራን ሳማርያ ኦሮን ሮራኖ ዶትሳረ። **5** ሃንሱን ሳማርያን፣ ያይቆባ ኤረ ኬሳ ዮሴፋን ታኮሰሰሮ ባንኤ ዶሌ ታግቶ ሰካር ታእማማቶ ካታማ ቶስ ኤመተ። **6** ኤሴና ካያይቆባ ጉምቢ ካበከ ግረ፣ የሱሳና ሰሴታንኮ ካከይ ሀረ ማንኮ ግረ ማራን ጉምቢ ካበከ ዶሌ ሀማጼ፣ ጎራታና አርኮ ሳቲ ሌክ ጎራታዮ። **7** ሄለልትቲ ቶ ታሳማራውት በከ ሁሙሳይን ካኮኤማተ ጎራታ የሱሳ፣ “እን በከ ጣምሰና” አመ። **8** የሱሳኮ ኦኦጋልሳታራን ባቦ አምናይን ካታማ ቶስ ሴተን ግረን። **9** ኤስ ሳማራውትና፣ “እት አይሁድት ሌተ ግራን፣ እን ሳማራው ሄለልትቲን ሞሲ በከ ጣምሰን አማታ?” አንተ፣ ሂካ አማኖና አይሁድን ሳማራውጆልነ ዋታ ኤሴላ ማንኮግኖን ማራንዮ። **10** የሱሳና አባበረ፣ “እላቦ ካዋ አዴሰዋ እን በከ ጣምሰ ካአማራ አዮዮ አዴሰ ግቴዋ አትዋ ኡሱኮ ሆሳተዋ፣ ኡሱና በከ ኦግር ኩን ሰሳረዋ” አመ። **11** ሄለልትቲና ሃ አንተ፣ “ጎታክ፣ እት ካኮሁሙሰና ላኮአብቶ፣ ጉምቢና ኬልዶክያ፣ ሀያ ሂናኦ በከ ኦግር ኤትኮ ሄልናታ? **12** እየሱን ጎእመን፣ እት ሂካ ጉምቢ ኖን ካሰሰሮ ኣቦካን ያይቆባኮ ሮራታ? ኡሱና ይሰኬሳ፣ ግድኬሳና ሂካ ጉምቢኮ ጣሜናን፣” አንተ። **13** የሱሳና “ሂናኦ በከኮ ካጣማራ ዳንበ ሱጉባይናራ። **14** እን ኦስሳሮ በከኮ ካጣማራ አደ ሱረዋ ላኮሱጉባሮ፣ እን ኦስሳሮ በከ ካጣማራ አባዶ ጅሩ ጅሮማን ካፋልታሮ ካግር በከኮክ ፋልቶ ላራ” አመ አባበ። (aiōn g165, aiōnios g166)

15 ሄለልትቲና፣ “ጎታክ፣ እን ጎጎሱጉባኖንኮና በከ ሁሙሳይን ጎጎሰሴኖንኮ፣ ማጋኔ ሂናኦ በከ ኢን ሰሰ” አንተ። **16** የሱሳና፣ “ሴዴ ኤንተርካ ኡም ኮይ አመ።” **17** ሄለልትቲና፣ “እን ኤንተር ላኮአቦ” አንተ አባብቴ። የሱሳና፣ “ኤንተር ላኮአቦ አማኖ ጋራያ። **18** ኦግራን ኤንተር ከን ኩን ካግረ፣ ግዳ ኩኔ ዋታ ካግራና ኤንተርካ ማንኮሌኖን ማራን፣ ካእዬስታ ሩምያ” አመ አባበ። **19** ሄለልትቲና፣ “ጎታክ፣ እት ካሄገሮ ላኖ ግዳ እን አዴሰ። **20** ኦዶላልካን ህታ ዋዳም ጉት ሳጋደን፣ እሰን አይሁድ አደን አባዶ ሳጋደን ካኮንዶትሳራ ኢየሩሳሌምያ አማታን”

አንተ። 21 የሱሳና፡ “አት ሄለልትቲ፡ ህታ ዋዳሚ ሌረ ኢየሩሳሌምና ኦዶን ካኮሳጋዶን ጎራታ ኤመታ ግራኖ አማን። 22 እስን እባዶ ካሳማርያ ካካሶቱን ሳጋዳታን፡ ኖ እንዴ ፋይና አይሁድኮ ማንኮሌሮ ማራን ኖ ካካንሶን ሳጋዳና። 23 ሩሚ ኦሳጋዳራን፤ ኦዶን እያናና ሩሚ ካኮሳጋድራን ጎራታ ኤመታራ፡ ግዳና ኤመተራ፡ ኦዶና ሂካማሌ ሩሚ ኦሳጋዳራን ዶታራ። 24 ዋ እያናያ፤ ኦሳጋዳራና እያናና ሩሚ ሳጋዳኖ ዶትሳራ” አመ። 25 ሄለልትቲና፡ “ክርስቶሳ ካአማማራ ካሽግዳመ ኤመይን ግራኖ ካሶዋ፡ ኡሱ ጎኤመተ እየሰ ዱባ ኖን ሰግናራ” አንተ። 26 የሱሳና፡ “ካእዬሰሳራ ሀያ እን ኡሱዮ” አመ እዳሰሰ ጋራኬሳ ኤሰን ሰገ። 27 ኡሱ ጎራታ የሱሳኮ ኦአጋልሳታረን አባባተን ኤመተን፡ ኡሱ ሄለልትቲክ ዋታ እዬሳ ግራን ዴንጉሬን ሳደን፡ ጎሌና እደ፡ “መ ዶታታ?” ጎርቱን፡ “ኤሰ ዋታ ካኮንአዬሳታ መወንያ?” አመ ኡሱ ካሆሳተራ ማዮና ላግረ። 28 ሄለልትቲና ኡላ ኢሰደ ካታማ ቶስ አባባተ፡ ጎሳና፡ ሃ አንተ። 29 “እን ካፈለሮ ዱባ እን ካሰገሮ እባዶት ኮዬን ዲያ፡ ኡሱ ክርስቶሳ ሌወና?” አንተ። 30 እሶና ካታማኮ ቤሬን ኡሱ ማንኮግሮ ቶስ ሴተን። 31 ኡሱ ጎራታ የሱሳኮ ኦአጋልሳታረን፡ “ካአጋልሰሳቶ፡ ባቦ አም” አመን። 32 ኡሱ እደ፡ “እስን ካካሶን እን ካአማሮ ባቦ አባ” አመ። 33 ኡሱኮ ኦአጋልሳታረና፡ “እባዶ ኡሱን ባቦ ኬን ግሮ?” አማ እስሮ አዬሴን። 34 የሱሳና፡ “ባቦ ካክ እን ካፋረሮኮት ፈኢ ፈላኖና ፈሎ ኦቴሳ ጉድሳኖያ። 35 እስን፡ ‘ድግኒ አፋርኮ ሃሬ ወጣ ግያራ’ ላ አማታና? ሂክማ፡ ወጣ ኩኩምን ጋባላማኖ ‘ጠቂ ማዴን እራ ዲያ’ አመ። 36 ካታጋታራ ግዳና ጎሌ ዳሞዛ ካአታተያ፡ ጅሩ ጅሮማክ ግርን ታሌቶ ኢል ኩኩይሳታራ፡ ህክና ካወጣተራና ካታካታራ ዋታ ጎጎገገላናወንያ። (aiōnios g166) 37 ሃንሱን፡ ‘ኮ ወጣታራ፡ ካካለ እደ ታጋታራ’ ካአማመራ ማሱሳ ሩምያ። 38 ካንዳፋሮን ግታን ጎጎታጋታወን ፋረራ፡ ካካለ ፈሎይ ሀረ፡ እስን አዴን ዳፋርክሶት ኢል ኩኩይሳታን” አመ። 39 ሄለልትቲና፡ “እን ካፈለሮ ዱባ ኢን ሰገ” አንተ ማንኮ አቶተተ ማራን ኤሰ ካታማኮ ካሞጋን ካሳማራው እባዶ ኡሱ አማን። 40 ሃንሱን፡ ካሳማራው እባዶ የሱሳ ቶስ ታኮኤመተሬ የሱሳና እሶ ዋታ ጎጎአዳላሮን አታይሰን ኡሱ ኤባተን፡ ኡሱና አሪ ላማ ኤሰ አዳላተ። 41 ሃፋራኬሳኮና ካክይ ካካለ ካሞጋን እባዶ አማን። 42 ሄለልትቲና፡ “ጎርታ ኖ ኡሱ ካኮን አማናና አት ኖን ማንኮ ሰግተ ካላወን ላኮዮ፡ ኖ እሲዋ ማልነና፡ ሂክ እባዶት ሩምና አላም

ካፋይሳሮ ላኖ ካንሶዋ” አመን። **43** የሱሳ አሪ ላማኮ አባባተረ ጋሊላ ቶስ ሴተ።
44 “ካሄገሮ ኡልኬሳ ላኮካባጃማሮ” አመ የሱሳ አሲዋ አዬስ ግረ። **45** ጋሊላ ጎንጌይና ካጋሊላ እባዶ ገጌላንጃ ኡሱ አታተ። አላንቲና፡ እሶ ካፋሰካ ባላ ኢየሩሳሌም ማንኮ ግረ ማራና ኤስ ካፈለሮ ዱባ ማንኮ ዴራን ማራንያ። **46** የሱሳና በከ ጣሞ ካዎይኒ ቶስ ታኮኢግልሰሮ፡ ጋሊላ ታግቶ ቃና ካታማ ቶስ ካላም ኤመተ፡ ቅፍረናሆምና ኤረ ካኮንሀዉአመረ ኮ ምን ካዎኖኮክ ሹሚ ግረ። **47** ሂክ እባዶትና የሱሳ ይሁዳኮ ጋሊላ ቶስ ኤመታኖ ካኮማላረ ጎራታ፡ ኡሱ ቶስ ሴተረ ሀዉአመረ ጎይ ህኢ ካግሮ ኤረኬሳ ኤሜይ ጎንፋይሰሮ ኤባተ።
48 የሱሳና፡ “ማጎሬና እስን ማላታና ባሳክ እየሰ ጎዴኖን ላኮአማናታን” አመ።
49 ሹምትና፡ “ጎታክ፡ ኤረክ ጎዋኖኮ ሆረን ማጋኔ ጌና” አመ። **50** የሱሳና፡ “ኤረካ ኔፎ ግራ ሴ” አመ፡ እባዶትና የሱሳ ካእዬሰሮ ሃፋራ አማን ሴተ። **51** ራድ ግራንቱና ኦሀንዳረን ኡሱ ሄሌረን፡ “ኤረካ ፋዬራ” አመን ኡሱን ሰገን። **52** ኡሱና ኤረኬሳ ሳቲ ምያይ ኢደሮ ጎሆሳሮ፡ “ማር ጉባኖና ኡሱ ካኮጋፋረራ ከለ ሳቲ ቶዶባይያ” አመን። **53** ካኡኑት ኦዶና የሱሳ፡ “ኤረካ ኔፎን ግራ” ታኮአመሮ ሳቲ ላኖ አዳሰ፡ ኡሱና ካምን እባዶ ኬሳ ዱባ የሱሳ አማኔን። **54** ህክና፡ የሱሳ ይሁዳኮ ጋሊላ ቶስ ኤመተ ካፈለሮ ካላምክ ባሳክ ማላታዮ።

5 ኤስኮ አባባተረ ካእይሁድ ባላ ማንኮ ግረ ማራን፡ የሱሳ ኢየሩሳሌም ቶስ ቤ። **2** ኢየሩሳሌምና፡ ካእዳድ ኡፋ ዶሌ፡ ካራ ከን ጉንተ ካሳራመ ካኮሰሴታራን ታኡብታ፡ ሄኢ ታአራማይኪ ቤተሳይዳ ታአማማተ ባንኤ ካኮጣማቃራን ካፋልቶ ኤላ ኮ ግረ። **3** ሂካ ካኮሰሴታራን ራጆሊ ካሞጋን ናፋለሳል፡ ኢልኦ ካድያኖን፡ ኦኤሳራና ናፋለሳል ሁዱረን ግረን። [በከኮክ አአኖና ኦራታ፡ **4** ሮረ ሮረ ኤርግቻ ካዋ ዳገ በከ ካኮአኢሳሮ ጎራታ፡ ጣየ ኤላ ቶስ ካታበ ካእቦ ዲኩባ ማምሰክኮና ፋያ ግረ።] **5** ኤሴና ጌስ ሶንዶምኮ ሰዴዱን ዲኩባሌሳ ሌ ካግረ እባዶት ኮ ግረ። **6** የሱሳና ሂካ እባዶት ኤስ ካሁዱረሮ ዴጉረ፡ ጎራታ ካሞጋኑን ሂካ ማለ ግራኖ አዳሰረ “ፋይን ዶታታ?” አመ። **7** ዲኩባሌሳትና አባበረ፡ “ጎታ! በከ ካኮአኢራን ጎራታ ኤላ ቶስ እን ካዳግሰሮ እባዶ ላኮአቦ፡ እን ታብን ጎሄድሮ ካካለ ሆረሃራ” አመ። **8** የሱሳና፡ “ክ! ታኮሁዱርተቶ አልጋታ ሰዳዴ ጋል” አመ። **9** እባዶትና ጎርሰዋ ፋዬ፡ ታኮሁዱረረ አልጋና ሰዳተ ጋለ። ህክና ካሌራ አይሁድን ታፎልሲ አሪየ፡ **10** አይሁድን ኦዶናት ኦአባና ካፋዬሮ እባዶት፡

“ታፎልሲ አሪ ማንኮሌተ ማራን ታኮሁዲርተቶ አልጋታ ጎሳሰዳቶን ሴራ ኩን ፈኢ
 ላኮሰሳሮ አመን።” **11** ኡሱ አደ፡ “አንክ እን ካፋይሰራ አባዶት፡ ታኮሁዲርተቶ
 አልጋታ ሰዳዴ ጋል’ አመራ” አመ አባበ። **12** እሶና፡ “ታኮሁዲርተቶ አልጋታ
 ሰዳዴ ጋል ካአመራ ኡሱ እየያ?” አመን ሆሳተን። **13** የሱሳና ፋክመ ሴተ ጎሳ
 ኦሮ ታበ ማንኮግረ ማራን፡ አባዶትና ማዮ ኡሱ ፋይሰሮ ላኮአዴሰሮ። **14** ኤሰኮ
 አባባተረ የሱሳ ኡሱ አባዶት ምን ካኤብ ኦሮ ሄለረ፡ “ሂክማ፡ ፋይተታ፡ ሂካኮ
 ካሮረ እየሰ ኩ ጎሳጌኖንኮ ሂታኮ ዳንቤባን አድ ጨቦ አሮፈልተ” አመ። **15**
 አባዶትና ኡሱ ካፋይሰራ የሱሳ ላኖ ሴተ አይሁድን ሰገ። **16** አይሁድን ኦዶናት
 ኦአባን፡ ታፎልሲ አርተሶይ ሂኒዕ ፈሎ ፈላማኖይ፡ የሱሳ ሆሮራኖ ሀጋአበን።
17 የሱሳና፡ “ኦዶክ ግዳግን ፈላ ግራ፡ አንና አድ ፈልናራ” አመ። **18** ጎርታ
 አይሁድን ኦዶናት ኦአባን፡ የሱሳ ታፎልሲ አርተሶ ማንኮኢግልሰ ካላውን ሀሌኖን
 ግራን ዋ ኦዶ የላተ፡ አስኦቴሳ ዋኔታ ኤካ የላታኖይ፡ ላጋዲን አታይሰን ዶታ
 ግረን። **19** የሱሳና፡ “እን ሩምና ሩምና አማራ፡ ኦዶ ፈላ ግራን ካዴሮ ካላል ኳሬ
 ኤረ ካለ እሰኮ ኮና ፈልን ላኮዳንዳሮ፡ ኦዶ ካፈላሮ ዱባ ኤረ ካዋ አደ ፈላራ።
20 ኦዶ ኤረ ማንኮጌላታሮ ማራን ኡሱ እሲ ካፈላሮ ዱባ ቱሳራ፡ ጎሳሳዳውና
 ሂካኮ ካሮረ እየሰ ቱሰሮዋ። **21** ኦላንቲና ኦዶ ካጎየ ጎሳኬሳሮ ማለ፡ ኔፎና
 ጎሳሰሳሮ ማለ፡ ኤረ ካዋና አደ ካይታተ ዱባን ግር ሰሳራ። **22** ኦዶ ማዮ ጉቲና
 ላኮፍርዳሮ፡ እየሱን ጎአመን ፍርዳ ዱባ ኤረኬሳን ሮርሰ ሰሰራ። **23** ህክና፡
 ኦዶ ጎሳካባጃና ማለ ዱባ ኤረኬሳና ጎሳካባጃናውንያ፡ ኤረ ካዋ ካካባጃኖን፡
 ካፋረሮ ኦዶና ላኮካባጃሮ። **24** “እን ሩምና ሩምና አማራ፡ ሃፋራኬ ካማላራ፡
 እን ካፋረሮና ካአማናራ ጅሩ ጅሮማክ ግር አባ፡ ጎይኮ ግር ቶሰ ናቀራ ኳሬ ፍርዳ
 ቶሰ ላኮኤማታሮ። (aiōnios g166) **25** እን ሩምና ሩምና አማራ፡ ካጎየራ አባዶ
 ኤረ ካዋኮት ያየ ካኮማላን ጎራታ ኤመታራ፡ ጎራታና ግዳያ፡ ኦማላራና ኔፎ
 ግርናና። **26** ኦዶ እሲዋ ካግር ፋልቶ ጎሳሌሮ ኡሱማሌ፡ ኤረኬሳና መተኬሳውን
 ካግር ፋልቶ ጎሳሌሮን የለራ። **27** ኡሱና ኤረ ካአባዶ ማንኮሌ ማራን ፍርዳ
 ጎሳፍርዳሮን ኦዶናት ሰሰራ። **28** “ሂካኒ አሮሳዴን፡ ቃማላሜን ኦግራን ዱባ
 ያየቴሳ ካኮማላን ጎራታ ኤመታራ። **29** ታኢዳን ኦፈሌራን ግርኮክ ክያኖን፡
 ታማላን ኦፈሌራን አደን ኪረን ፍርዳ አታይናራን አመ።” **30** “እን ካለ እሰኮ
 ኮና ፈልን ላኮዳንዳሮ፡ እን ካፍርዳራ ካማላሮ ካላያ፡ እን ካፋረሮኮት ፈኢ

ኳሬ ፈኢቴ ማንኩ ደታኖን ማራን ፍርዳክ ጋራያ። **31** “እን እስከቴወን ጎአቶቴ፡ አቶናትክ አታማኖ ላኮአቦ። **32** እን ማራን ካአቶታራ ካካለ ግራ፡ ኡሱ እን ማራን ካስሰናራ አቶናት ሩም ላኖ እን ካሶዋ። **33** “እስን ያንሳ ቶስ ፋርቴተን፡ ኡሱና ጋራ ካሩም አቶቴራ። **34** እን አቶታኖ ካአባዶ ካአታታሮ ላኮዮ፡ እን ሂካ ካኮንዬሳራ አደ እስን ጎሳፋይታወንያ። **35** ያንሳ ቤባ ኢፋ ካስሳሮ ኮሮንታ እንዮ፡ እስና ጎራታ ክጫሩን ኢፋኬሳይ ገጌላይን ደታቴን። **36** “እን አደ ካያንሳ አቶናትኮ ካሮረ አቶናት አባ፡ ጎጎጉድሰሮን ኦዶ ኦስሰራ፡ አንና ኦፈላራ ፈሎ ኦዶ እን ፋራኖ አቶታራን። **37** እን ካፋረራ ኦዶ ኡሱዋ ጋራኬ አቶቴራ፤ እስን አዴን ያየቴሳ ሱረ ላኮማልተታን፡ ምዲቴሳና ሱረ ላኮዴቴታን። **38** እን ካፋረሮና ማንኮአማናና ዋተን ማራን ሃፋራኬሳ እስኒ ላኮግሮ። **39** እስን ማጻፋ ቁሉኪና ጅሩ ጅሮማክ ግር ኦሄላይናታን እን ማንኮላሮ ማራን ማጻፋል ቆቆራታን፡ ሂክ ማጻፋና ጋራኬ ካአቶታሮያ፤ (aiōnios g166) **40** እስን አዴን፡ ኔፎ ግርን እን ቶስ ኤመይን ላኮደታታን። **41** “እን አባዶኮ ካባጃ ላኮደታታሮ፤ **42** አየሱን ጎአመን እን እስን ካሶዋ፤ ጌላንጀ ታዋና ዋዳናትሰኒ ኦሮ ግርዋት እን ካሶዋ። **43** እን አቦኬክ መገ ኤማየ እስን ጎአመን እን ላኮአታቴታን፤ ካካለ መገኬሳ ኤመተዋ አታታቴንዋ። **44** እስን እስእስ ኦሮ ካባጃ ኦስሳታን፡ አየሱን ጎአመን ዋ ኮኮ ታኤማቶ ካባጃ ኦዶታኖን ጎሌተን፡ ምሲ አማንን ዳንዳታን? **45** “ካሞታራክስን አብድ ካኮንሉጉዳቴታን ሙሴ ኳሬ፡ እን ኦዶ ሆረ እስን ካሞታሮ እን አሮሌኖ፤ **46** ሙሴ ካአማናታን ሌቴንዋ፡ እን አማናቴንዋ፤ ኦላንቲና ኡሱ ካጻፈራ ጋራኬያ። **47** ኡሱ ካጻፈሮ ጎአማናኖን፡ እን ካአዬሳሮ ሃፋራኬ ምሲ አማንናታን?” አመ።

6 ሂታኮ ዳንበኔ የሱሳ ጥብራዶስ ታአማማተ ታጋሊላ ላቡኮ ጋማ ናቀረ ላቡ ግርን ሴተ። **2** አባዶ ካሞጋና ዴኩባሌሳል ፋይሳ ካፈለሮ ባሳክ ማላታጆል ማንኮዴራን ማራን ዴበ ሰሴተን። **3** ኤስኮና የሱሳ ዋዳም ቶስ ቤረ ኡሱኮ ኦአጋልሰሳራን ዋታ ሀማጼ። **4** ካአይሁድ ፋሰካ ባላና ጋባላመ ግረ። **5** የሱሳና ጦቂመ ጎሳ ካሞጋን ኡሱ ቶስ ኤመታ ካግሮ ዴረ፤ ፍልጶሳ፤ “ሂክ አባዶ ጎሳአምሮን ባቦ ኤትኮ ኢምና?” አመ። **6** ሂካ ካኮንሆሳተራ ኡሱ ጫፍንያ ኳሬ ኡሱ ኡሱን ፈልን ካሄደረ ካሳናየዋ። **7** ፍልጶሳና፡ “መተመቴ አባዶ ክጫር ክጫር ጎሳቃማስሮን የልን፡ ዲናራ ላማ ቦሌክ ቡዴና ላኮሌሮ” አመ አባበ። **8** የሱሳኮ ኦአጋልሳታረንኮ ኮ፡ ካስሞና ጴጢሮሳኮክ አቢ እንድራሳና ሃ

እመ፤ **9** “ካህኤሬ ባቦ ከና ኩኩብ ላማ ካአበራ ኡኑ ኮ ህታኒ ግራ፤ ሂክ እደ ሂካ ጎሳ ዱባን ሞሲ ጌግናራ?” **10** የሱሳና፤ “እባዶ ጎሳህማጽሮን የላ” እመ፤ ኤስ ባንኤ ኤስ ካሞጋን ግረ፤ እባዶና ሀማጼ ቶቶኦትሶና ኩማ ከን ካሌሮየ። **11** የሱሳ ባቦ ከን ኬስ ጋላቴ ካኮ አባባታረ ጎራታ፤ ካሀማጼሮ ጎሳን ሄደደን፤ ኩኩብና ኡሱማሌዋ ሄደደን ዱባና ካዶትሳሮ ግታክ ሄላቴን። **12** ዱባ እመ ካኮባራራረ ጎራታ፤ የሱሳ ኡሱኮ ኦአጋልሳታረን፤ “ታሄሰቶ ሀንባኮ ቶና ጎሳዳርአሞንኮ ኩኩይሳ” እመ። **13** እሶና፤ ካአማመሮ ካህኤሬ ባቦ ከንኮ ታሄሰቶ ሀንባ ዱጉድ ቶሞንኮ ላማ ኩኩይሴን አማጌን። **14** እባዶ የሱሳ ካፈለሮ ባሳክ ማላታ ካኩድያረን ጎራታ፤ “አላሞ ቶስ ካኤመታራ ካሄገሮ ኦግራን ሂካያ” እመን። **15** የሱሳና እባዶ ኤመይረ ሁና ኡሱ ዋኖ የላይን ቆፓኖክሶ አዴሰረ እደና ካለካለ ዋዳሞ ቶስ ሴተ። **16** ኡል ሄመን ካኮላረ ጎራታ ኡሱኮ ኦአጋልሳታረን ላቡ ዳጌን። **17** ዋላቦና ኮራተኔ ቅፍረናሆም ቶስ ናቅን ኬን። ጎራታና ሄመን ሌረ፤ የሱሳና ጋና እሶ ቶስ ላኮኤመተረ። **18** አምባል ታኦቲ ማንኮ ክያ ግቴ ማራን በከ ኬን። **19** ክሎ መትራ ከን ጎርቱን ሌ ዱዴን ግራን፤ የሱሳ በከ ጉት ሰሴታ ዋላቦ ቶስ ካኤማታሮ ዴኔ አብሳተን። **20** የሱሳ አደ፤ “እንያ፤ አሮአብሳቴን” እመ። **21** እሶና ኡሱ ጎንኮራሮ ዶታቴን፤ ዋላቦና ጎርሰዋ ማንኮ ሴታራን ጌተ ባጋ አባተ። **22** ታላሞ አሪ በከኮ ጋማን ካሄሰራ እባዶ ኤስ ዋላቦ ቶ ታላል ግራኖ አዴሰ፤ የሱሳ እደ ዋላቦይ ኮራታናዋትና ኡሱኮ ኦአጋልሳታረን ካለ ናቃኖና አዴሰ። **23** ኤስኮ አባባተረ፤ ካካለ ዋላቦል ጥብራዶስኮ፤ ጎታ ካሶማሳተሮ ባቦ ጎሳ ማንኮ አመሮ ባንኤ ቶስ ኤመተ። **24** እባዶና፤ የሱሳ ጎርቱን ኡሱኮ ኦአጋልሳታረን ኤስ ግራናዋት ጎሳኤሴኒ፤ የሱሳ ዶታ ዋላቦሊ ታቤን ቅፍረናሆም ቶስ ሴተን። **25** በከኮ ጋማን ኡሱ ካኮሄላሬን ጎራታ፤ “ካአጋልሰሳቶ፤ እት ሂታራ ጎረ ኤማተታ?” እመን። **26** የሱሳና፤ “እን ሩሞና ሩሞና አማራ እን ካኮንዶታታን ባቦ ማንኮእንቴን ማራና ማንኮባራርቴን ኳሬ፤ ማላታ ማንኮዴተን ማራን ላኮየ። **27** ካባሮ ባቦን አሮፈልቴን፤ አየሱን ጎአመን ኤረ ካእባዶ ካሰሳሮ ጅሩ ጅሮማክ ግር ካሌሮ ባቦን ፈላ፤ ህክና ዋ ኦዶ ካአዴሰሳሮ ማታማ ኡሱ ጉት ካየራ።”

(aiōnios g166) **28** እሶና፤ “ሀያ ፈሎ ኦዋ ፈልን መ የላኖ ዶትሳራ?” እመን። **29** የሱሳና፤ “ኡሱ ካፋረሮዬ ጎሳአማንታውን፤ ሂኒዕ ፈሎ ኦዋያን” እመ አባበ። **30** እሶና፤ “ኖ ዲጉኑ ኩ ጎሳአማኖን መ ማላታ ፈልናታ? መና የልናታ? እመን

ሆሳተን። 31 ጎጎአምናውን ዳሩርኮ ባቦ ሰሰራ አማመ ጎጎጸፋመሮ፤ ኦዶላልካን ቃሉላቶክ ኡሊ ባቦ ካዳሩረ አመን።” 32 ሃንሱን የሱሳና፡ “እን ሩምና ሩምና አማራ፡ ዳሩርኮ ባቦ ካሰሳራ ላኮሙሴዮ፡ ካሩም ባቦ ዳሩርኮ ካሰሳራ አደ ኦዶኬያ። 33 ባቦ ካዋ ኡሱ ዳሩርኮ ካዳጋሮና አላምን ግር ካሰሳሮያ” አመ። 34 እሱና፡ “ጎታ፡ ጎርታኑን ሂካ ባቦ አሪ ዱባ ኖን ሰሰ” አመን። 35 የሱሳና ሃ አመ፤ “ካግር ባቦ አንያ፡ እን ቶሰ ካኤመታራ ዱዶ ላኮኤኢሮ፡ እዬና ካእማነ ሱረ ላኮሱጉባሮ። 36 አየሱን ጎአመን እን እሰኑን ጎጎሰጌሮ፡ ዳተታን ግዳና ሱረ ላኮአማናታን። 37 ኦዶ ካሰሳራ ዱባ እን ቶሰ ኤመታራ፤ እን ቶሰ ካኤመታሮና ሱረ ሳርደሰ ላኮሆሮራሮ። 38 ዳሩርኮ እን ካኮንዳገራ ፈኢቴ ፈላይን እንሌኖን ግራን፤ ካፋረሮኮት ፈኢ ፈል ጉድሰንያ። 39 እን ካፋረሮኮት ፈኢ፡ ካሰሰሮ ዱባኮ ኮና ሀባኖን ግራን ታጋቾ አሪ ጎይኮ ጎጎኬሰሮንያ። 40 ኣቦኬት ፈኢ ኤረ ደረ ኡሱይ ካአማናራ ዱባ ጅሩ ጅሮማክ ግር ጎጎግሮንያ፡ አንና ታጋቾ አሪ ጎይኮ ኬሰናራ።” (aiōnios g166) 41 አይሁድና “ዳሩርኮ ካዳገራ ባቦ አንያ” አማኖኬሳን ጉምጉማኖ ሀጋአበን። 42 ሃና አመን፡ “ሂክ ካዮሴፋ ኤረ ላ የሱሳናላ? ኣቦኬሳና ኣየቴሳ ላ ኖ ኦካንሶያና? ሀያ ግዳ ኡሱ ምሲ ‘እን ዳሩርኮ ዳገራ’ አማራ” አመን። 43 የሱሳና አባባ ሃ አመ፡ “እሰ አሰሮ አሮ ጉምጉምቴን። 44 እን ካፋረራ ኦዶ እሰ ቶሰ ጎአባባ ኳሬ ማዮና እን ቶሰ ኤመይን ላኮዳንዳሮ እን ቶሰ ካኤመታሮ አንና ታጋቾ አሪ ጎይኮ ኬሰናራ። 45 ካሄገሮልና፡ ‘ዱባ ዋኮ ኦአጋልሳቴን ሌራን’ አማመ ጸፋመራ፡ ኦዶ ካማላራና ኡሱኮና ካአጋልሳተራ ዱባ እን ቶሰ ኤመታራ። 46 ዋ ዶለኮ ካኤመተሮ ኳሬ ኦዶ ካዴራ ኮና ላግሮ፡ ኦዶ ካዴራ ኡሱ ካላልያ። 47 እን ሩምና ሩምና አማራ፡ ካአማናራ ዱባ ጅሩ ጅሮማክ ግር አባ።” (aiōnios g166) 48 ካግር ባቦ አንያ። 49 ኦዶጆላልክሰን ቃሉላቶክ ኡሊ ባቦ ካዳሩረ አመን ሀሌዋ ኳሬ ጎዬን። 50 አየሱን ጎአመን አባዶ ጎጎ ጎኖንኮ ጎጎአምሮን ዳሩርኮ ካዳገራ ባቦ ሂካያ። 51 ዳሩርኮ ካዳገራ አርዶክ ባቦ አንያ፤ ሂካ ባቦኮ ካአማራ ዱባ ጅሩ ጅሮማን ግራራ፤ አላምን ግር ጎጎሌሮን እን ካሰሳራ ባቦ ሶኦተያን አመ።” (aiōn g165) 52 አይሁድና፡ “ጎጎአምኖን ሂክ እባዶት ሶ ኦቴሳ ምሲ ሰሰን ዳንዳራ?” አማ እሰ አሰሮ አታይሰን ዶጋማኖ ሀጋአበን። 53 የሱሳና፡ እን “ሩምና ሩምና አማራ፡ ኤረ ካአባዶንኢ ሶ ጎአማናዋተን ኢግና ጎጣማናዋተን እሰ ኦትሰኑን ግር ላኮአብታን። 54 ሶኦቴ

ካለማራ፡ ኢግኬና ካጣማራ ጅሩ ጅሮማክ ግር አባ፡ አንና ታጋቾ አሪ ኡሱ ጎይኮ ኬሰናራ። (aiōnios g166) 55 ሶኦት ካሩም ባቦ ኢግክና ካሩም ጣሞያ። 56 ሶኦቴ ካለማራ፡ ኢግኬና ካጣማራ እዬ ግራራ፡ አንና ኡሱ ግርናራ። 57 አርዶክ ኦዶ እን ጎጎፋረሮ፡ አንና ኡሱኮ ካከይ ግር ጎጎግሮ ማለ፡ ካለማራና ሂካማሌ እንኮ ካከይ ግር ግራራ። 58 ዳሩርኮ ካዳገራ ባቦ ሂካያ ኦዶላልክሰን ካአመራን ባቦ እንክክ ላኮዮ፡ ሀሱ ባቦ ኦአማራን እደን ጎዬራን፡ ሂካ ባቦ ካለማራ እደ ጅሩ ጅሮማን ግራራ።” (aiōn g165) 59 ሂካ ካኮን አዬሰራ ካቅፍረናሆም ማማኒ እይሁድኮክ ምን ካኤብ አጋልሰሳ ግራንዮ። 60 ኡሱኮ ኦአጋልሳታረንኮ ኦሞጋን ሂካ ማለን፡ “ሂክ ካጫናቅሰሮ ሃፋራያ፡ እዮያ አታይን ካዳንዳራ?” አመን። 61 ኡሱኮ ኦአጋልሳታረና ሂካ እዬሲ ጉምጉማኖ የሱሳ አሲዋ አዳሰረ፡ “ሂክ እስኩን ሀንዱዱፎ ሌሮ ማና? 62 ሀያ፡ ኤረ ካእባዶ ጣዩ ታኮግረ ቶሰ ብያ ግራን ጎዴተን መ አምንዮ? 63 እያና ካዋ ግር ሰሳራ፡ ሶ እደን ላኦ ቶና ላኮአባን፡ እን እስኩን ካሰጌራ ሃፋራ እያናና ግርናያ። 64 ሀሌዎ ኳሬ እስንኮ ካአማኖን ኮኮ ግራ” አመ። ሀክና፡ የሱሳ እዮሰ አማኖን ግራና እዮ ኡሱ ሮርሰ ሰሰናሮ ጣዩዋ ማንኮካሳናየ ማራንያ። 65 ሆረዴና፡ “ኦዶኮ ጎሰሳመ ኳሬ፡ ማዮና እን ቶሰ ኤመይን ላኮዳንዳሮ እን ካኮን አመራ ሂካኩንያ” አመ። 66 ሂካኮ ካከይ የሱሳኮ ኦአጋልሳታረን ኦሞጋን ሃራርቲ አባባተን፡ ኤሰኮ አባባተን ዴበ ላኮሰሴተን። 67 የሱሳና ቶሞንኮ ላማን፡ “እሰና እደን ሴይን ዶታታን?” አመ። 68 ሰሞና ጴጢርሳና፡ “ጎታክ፡ እዮ ቶሰ ሴይናና? ኦት ጅሩ ጅሮማክ ካግር ሃፋራ አብታ። (aiōnios g166) 69 ኦት ኮ ካዋ ቁሉክ ላኖ ግዳ አማንና፡ አዴንሰና” አመ አባበ። 70 የሱሳና አባበረ፡ “እስን ቶሞንኮ ላማና ካእሳበራ ላ አንዮላ? እየሱን ጎአመን እስንኮ ኮ ዱርሳያ” አመ። 71 ካእሰቆሮቱ ሰሞና ኤረ ካይሁዳ፡ ቶሞንኮ ላማኮ ኮ ጎሌና፡ ዳንበኔ ሮርሰ ማንኮሰሰናሮ ማራን ጋራኬሳ አዬሳኖያ።

7 ኤሰኮ አባባተረ የሱሳ፡ ኤሰ ካግረ አይሁድል የሱሳ ላጋዲን ማንኮዶታረ ማራን፡ ይሁዳኮክ አወራጃይ ማራሙራኖ አሳገረ ጋሊላ ማራሙረ። 2 ካእይሁድ ካዳሴ ባላ ካኮጋባላማረ ጎራታ አደ፡ 3 አቢላል ታየሱሳ፡ “ኩኮ ኦአጋልሳታረና እደን ኦት ኦፈላቶ ፈሎ ጎጎዴናዉን፡ ሂታኮ ይሁዳ ቶሰ ሴ አመን። 4 እስ ቱሳይን ዶታታ ግራን ሰያመ ካፈላራ ማዮና ላግሮ። ኦትና ሂካ እየሰ ካፈላቶ ጎሌተ፡ እስኦታ አላምን አዴሰሳ” አመን። 5 አቢላልቴሳ ሱረ ላኮአማንተተ። 6 የሱሳና፡

“እየን ልክኪ ጎራታ ጋና ላኮጌሮ፤ እስኩን አደ ማኅሬና ጎራታና ካኤካተያ። 7
 አላም እስን ዲድን ላኮዳንዳሮ፤ አን አደ፤ ፈሎኦቲሳ ስሜላን ላኖ ማንኮአቶታሮ
 ማራን እን ዲዳራ። 8 እስን ባላ ቶስ ሰዬን፤ እዬን ልክኪ ጎራታ ማንኮጌኖን ግሮ
 ማራን ባላ ቶስ ላኮሴይናሮ አመ።” 9 ሂካ እሶን አመረ ጋሊላ አዳላተ። 10 ሀሌዎ
 ኳሬ፤ አቢላል ባላ ቶስ ካኮሴታተ ጎራታ ኡሱና ሙታ ሀሌኖን ግራን ሰያመ ባላ
 ቶስ ሴተ። 11 ባላ ጉቲና አይሁድ፤ “ኡሱ አባዶት ሀጌ ግራ?” አማ ዶታ ግረን።
 12 ጋራኬሳ ጎሳ ኦሮ ታንጂን ጉምጉማኖ ግረ። ኮኮና፤ “ኡሱ ካእዳንክ እባዶትያ”
 አመን። ኦካላ አደን፤ “ላ፤ ጎሳ ካሸርሳሮያ” አመን። 13 ሀሌዎ ኳሬ አይሁድ
 አብሳታኖኮ ካከይ ጋራኬሳ ፋትስ ካእዬስ ማኖና ላግረ። 14 ባላና ታኮጠኤላ
 ሴቴ የሱሳ ቁሉክ ምን ካዋ ቶስ ቤረ አጋልሰሳኖ ሀጋእበ። 15 አይሁድና ሳዳ ሂክ
 እባዶት ሀእጋልሰኖኒ ሂክ አጋልሰሰ ምሲ አዳሰን ዳንዴ? አመን። 16 የሱሳና፤
 “እን ካአጋልሰሳራ አጋልሰሳኖ እንኮ ሀሌኖን ግራን እን ካፋረሮኮ ካኤሜተሮያ።
 17 ማኖና ፈኢ ታዋ ፈልን ጎዶተ፤ ሂክ አጋልሰሰ ዋኮ ጎርቱን እንኮ ካኤመተሮ ላኖ
 ካለቤስ ካሳ። 18 እስኮ ካእዬሳራ፤ ሀሱ ካኮንፈላራ ኡሱን ካባጃ ማንኮዶታታሮ
 ማራንያ፤ ካፋረሮኮት ካባጃን ካፈላራ አደ ኡሱ ካሩሚያ፤ ጣራና ላኮሄላማቶ።
 19 ሙሴ ሴራ ላኮሰሰሮያ? እየሱን ጎአመን ኮና ሴራ ላኮኦራቴን። እስን መዉን
 እን ላጋዲን ዶታታን?” 20 ጎሳና፤ “እት ዱርሳ ካአብታ!” “ኩ አደ እኖያ ላጋዲን
 ካዶታራ?” አመን። 21 የሱሳ አባበረ እሶን ሃ አመ፤ “እን ባሳ ኮ ፈለ፤ እስን
 ዱባና ሳደን። 22 ሀማጽሳማኖ ካኮኤመተራ ኦዶላልኮ ኳሬ ሙሴኮ ላኮኖ፤
 ጎሌና ሙሴ ሀማጽሳማኖ ማንኮሰስ ማራን አይሁድን ታፎልሲ አርና ሀኢሶን
 ይስ ሀማጽሳታን። 23 ሴራ ካሙሴ ጎጎኢግልሳሞንኮ ይስ አይሁድን ታፎልሲ
 አሪ ካሀማጸሳታን ጎሌተን፤ ታእባዶ ኔፎ ታፎልሲ አሪ ጎፋይስ መዉን እን ጉት
 አማራታን? 24 በቤድ ታእባዶ ዲያ ፍርዳኖ ኢሳጋዴን ፍርዳ ካሩም ፍርዳ”
 አመ። 25 ኡሱ ጎራታ እየሩሳሌም ካግረ ኮኮ እባዶ፤ “ላጋዲን ካዶታራን እባዶት
 ላ ሂካኖላ? 26 ሂክማ ኡሱ ዲዳ ቤስ እዬሳራ፤ እሶ እየሰ ኮና ላኮእዬሳራን፤ ሂክ
 እባዶት ክርሰቶሳ ላኖ ኦዶናት ኦአባን አዳሰ ግራን? 27 ሂክ እባዶት አደ ኤትኮ
 ኤሜተሮ ኖ ካንሶዋ፤ ክርሰቶሳ ኤመታ ግራን ኤትኮ ኤሜይናሮ ማኖና ላካሶ”
 አመን። 28 የሱሳ ቁሉክ ምን ካዋ ኦሮ አጋልሰሳ ያየ ጦቂሰረ፤ “እ፤ እን ካሳንዋ፤
 ኤትኮ ኤሜየሮና ካሳንዋ፤ እን ሀታኒ ካኮንግራ እስኦቴይ ላኮኖ፤ እየሱን ጎአመን

እን ካፋረራ ኡሱ ካሩምያ፡ እሰን አዴን ላኮካሳን፡ 29 እን አደ ኡሱ ደለኮ ማንኮኤሜየሮ ማራና ኡሱና እን ማንኮፋረሮ ማራን እን ኡሱ ካሶዋ” አመ።

30 ሃንሱን አብን ዶተን፡ አየሱን ጎአመን ጎራታ ጋና ማንኮጌኖን ግሮ ማራን ማዮና ገነ ጉት ላኮካየ። 31 ጎሌና ጎሳኮ ካሞጋን ኡሱ አማኔረ፡ “ሀያ፡ ክርስቶሳ ኤመታ ሂክ አባዶት ካፈላሮ ማላታኮ ካሮረ ፈሎ?” አመን። 32 ፋራሳዊልና፡ ጎሳ ጋራኬሳ ጉምጉማ ካእዬሳሮ አየሰ ማለ፡ ካቱቃሞል ዋይቻልና ፋራሳዊል ጎሳአብናዉን እሰን ቁሉክ ምን ካዋ ኦኦራሬን ፋረን። 33 የሱሳና፡ “እን እሰን ዋታ ካኮአዳላይናራ ጎራታ ክጫሩንያ፡ ኤሰኮ እን ካፋረሮ ቶሰ ሴይናራ፡ 34 እሰን እን ዶትናታን፡ አየሱን ጎአመን ላኮሄልናታን፡ እን ማንኮግሮ ቶሰ ኤመይን ላኮዳንዴታን” አመ። 35 አይሁድን ኦዶናት ኦአባን እሰ አሰሮ፡ “ሂካ አባዶት፡ ሄልን ኖ ካኮዋይናና ኤትራ ሴይን ጎሄድሮያ? ግሪክጆል ኦሮ ዳርአመን ኦግራን ኡናታን ቶሰ ሴይረ ግሪክጆል አጋልሰሰን ዶተረያ? 36 ‘እን ዶትናታን፡ አደን ላኮሄልናታን አድና፡ እን ማንኮግሮ ቶሰ ኤመይን ላኮዳንዴታን’ ጎአምሮ መ አማኖያ?” አመን እዬሴን። 37 ባላን ጉዳታኖ ታላቶ ታንጂንት አሪ፡ የሱሳ አሌረ ያየ ጦቂሰረ፡ “ማዮና ካሱጉባተራ ጎግረ እን ቶሰ ኤመይረ ሀጣመ አመ። 38 እየ ካአማናራ፡ ማጻፋ ቁሉክ ጎሳአማሮ ኦግር በከኮክ ፋልቶ ኦሮኮ ብያራ” አመ እዬ።

39 ሂካ ኡሱ ካኮንአመራ ኡሱ ኦአማናራን ካአታይናራን አያናኮክ ጋራየ፡ ኣላንቲና የሱሳ ጋና ማንኮካባጃሞን ግረ ማራን አያና ቁሉክ ላኮሰሳመረ። 40 ጎሳኮና ኮኮ ሂካ ሃፋራ ካኮማላረ ጎራታ፡ “ሂክ አባዶት ኦግራን ካሄገሮያ” አመ። 41 ኦካለ፡ “ኡሱ ክርስቶሳያ” አመን። ኩክና አደ ሃ አመ፡ ክርስቶሳ ጋሊላኮ “ምሲ ኤመይን ዳንዳራ? 42 ማጻፋ ቁሉክ፡ ክርስቶሳ ካዳዉተ ህዲድኮ፡ ዳዉተና ታኮግረ ቤተሌምኮ ኤመታኖ ላ እዬሳሮላ?” አመን። 43 ሃኑና የሱሳኮት ኣላንቲ ጎሳ ኦሮ ካለካለ ብያኖ ሌ፡ 44 ኮኮና ኡሱ አብን ዶቲ፡ አየሱን ጎአመን ማዮና ገነ ጉት ላኮካየ። 45 ኤሰኮ አባባተረ ቁሉክ ምን ካዋ ኦኦራሬን ቱቃሞኮክ ዋይቻል ቶሰ አባባተን ኤመተን፡ እሶና “ሙን አት ኤሜኖን ኢሳይዴታን?” አመን። 46 “ኦሀንዳረና፡ ሂካ አባዶት ኣን፡ ማዮና ሱረ እዬሰ ላካሶ” አመን አባበን። 47 “ፋራሳዊል አደ፡ እሰና ሶባንቴታን አማኖያ? 48 ጎሌና ኦዶናት ኦአባንኮና ፋራሳዊልኮ ኡሱ ካአማነራ ግሮ? 49 ሴራ ካካሶን ሂክ ጎሳ አደ ካቃንጋመያ” አመን አባበን። 50 ሂታኮ ሆረን የሱሳ ቶሰ ሴተ ካግረና እሶኮ ኮ

ካሌራ ንቆድሞሳ፡ **51** “ሴራካን፡ ሆራርጀ እባዶት ኮ መ ፈለሮ ሀማሎንና ሀእዴሶን ፍርዳራ?” አመ፡፡ **52** እሶና፡ “እትና አደ ጋለላኮታ? ካሄገሮ ጋለላኮ ክዋት ቆቆርና፡ ጋቾጌታ” አመን አባበን፡፡ **53** [ኤስኮ ዳንበኔ ዲባ ምን ምን ሴተን፡፡

8 የሱሳ አደ ዛይቲ ካብያራ ጋ ታኮአላታሮ ዋዳም ቶስ ቤ፡፡ **2** ታላም አሪ ባርባሪኖ ቁሉክ ምን ካዋ ኦሮ አደ ሙተ፡ ጎሳና ማራሙረ ኩኩ አመ፤ አጋልሰሰና ሀማጼ፡፡ **3** ሴራ ካሙሴ ኦአጋልሰሳራና ፋራሳዊል ሻርሙጡማ ታከባንተቶ ሄለልትቲ ከኔን ጎሳ ኦሮና ኣልሴን፡ **4** የሱሳን፡ “ካአጋልሰሳቶ፡ ህት ሄለልትቲ ሻርሙጣ ካባንተታ፡ **5** ሙሴና፡ ህታ ሄለልትቲ ኣንክክ ኤሌም ጎሳጌጋምሮ ሴራ አጃጃራ፡ እት አደ መ አማታ?” አመን፡፡ **6** ህታ ሆሰን ኡሱ ካኮንሆሳተራን፡ ኡሱ ታኮሞትራን ኣላንቲ ዶታ ጫፍትንየ፡ የሱሳ አደ ሁሰ አመረ ፈሪ ኡል ጉት ጸፋኖ ሀጋአበ፡፡ **7** ሆሲኒ ካኮጃርሳረን ጎራታ ጦቂ አመረ፡ “እሰን ኦሮኮ ጨቦ ካላይክ ኡሱ ጣይ ኤሌም ሀኤገ” አመ፡፡ **8** አደና ሁሰመረ ኡል ጉት ጸፈ፡፡ **9** እሶ ሂካና ካኮማላረን ጎራታ፡ ጃርሶለኮ ሀጋአበረ ቶቶል ኤስኮ ኢሰን ሴተን፡ ኤስ ኡሱ ሆረ አሊተ ታግቲ ሄለልትቲን ዋታ የሱሳ ካለ ሄሰ፡፡ **10** የሱሳና ጦቂ አመረ፡ “ተ ሄለልትቲ፤ አባዶ ሀገራ ሴተ? ኩ ጉት ካፍርዳረ ላግሮያ?” አመ፡፡ **11** ኤስና፡ “ጎታክ! ኮና ላግሮ” አንተ፡ የሱሳና፡ “እንና ላኮፍርድናሮ፡ ሴ፡ ጎርታ ሂታኮ ዳንበባን አድ ጨቦ አሮፈልተ” አመ፡፡ **12** አደና የሱሳ አባዶን፡ “እን ካአላም ኢፋያ፡ እን ዴበ ካሰሴታራና ካግር ኢፋ ላራ ኳሬ ሱረ ሙጉዲ ላኮሰሴታሮ” አመ፡፡ **13** ፋራሳዊልና፡ “እት እሰኦታውን ማንኮአቶታቶ ማራን አቶናትካ ላኮአታማሮ” አመን፡፡ **14** የሱሳ፡ “እን ጋራኬ ጎአቶታየና እን ኤትኮ ኤማያሮና ኤትራ ሴይናሮ ማንኮካሶ ማራን አቶናትክ ሩምያ፡ እሰን አዴን ኤትኮ ኤማያሮ ጎርቱን ኤትራ ሴይናሮ ካካሳን አየሰ ላግሮ፡፡ **15** እሰን ያዳ ካአባዶ እን ፍርዳታን፡ እን ማዮ ጉቲና ላኮፍርድናሮ፡፡ **16** ጎፍርዴና፡ ካፋረሮ ኦዶ ዋታ ኳሬ እን ካለ ማንኮግኖን ማራን ፍርዳክ ጋራያ፡፡ **17** አባዶ ላማክ አቶታኖ አታማኖ ጎሳእቦ ማለ ሴራክሰኒ ጸፋመራ፡፡ **18** ጋራኬ ካአቶታታሮኮ ኮ እንያ፤ ካካለና እን ካአቶታራ እን ካፋረሮ ኦዶኬያ አመ፡፡” **19** ኤስኮና፡ “ኣቦካ ኤቲ ግራ?” አመን፡፡ የሱሳና፡ “ኣቦኬና ሌረ እና ላካሳን፡ እን ካካሳን ሌቴንዋ፡ ኣቦኬና ካሳቴንዋ” አመ አባበ፡፡ **20** የሱሳ ሂካ ካኮንአዬሰራ ቁሉክ ምን ካዋ ኦሮ፡ ሁ ካኮካማሮ

ምን ዶሌ አጋልሰሳ ግራንዮ፡ ሀሌዎ ኳሬ ጎራታኬሳ ጋና ማንኮጌኖን ግሮ ማራን ማዮና ኡሱ ላኮአበሮ። 21 የሱሳ አደና፡ “እን ሴይናራ፡ እሰና እን ዶትናታን፡ ጨቦክሰኒና ጎይናታን፡ እን ማንኮሴታሮ ቶሰ አድ ኤመይን ላኮዳንዴታን” አመ። 22 አይሁድን ኦዶናት ኦአባናየና፡ “እን ማንኮሴታሮ እሰን ኤመይን ላኮዳንዴታን ኡሱ ካኮንአመራ እሰኡቴሳ ላጋዳይንያ?” አመን። 23 የሱሳ አደና፡ “እሰን ሃገልኮታን፡ እን ኤለኮያ፡ እሰን ሂካ አላምኮታን፡ እን ላኮሀካ አላምኮዮ። 24 ጨቦክሰኒ ጎዋሮ ሰገራ፡ እን ኡሱያ ጎአምሮ እን ኡሱ ላኖ ጎአማናታና ዋተን፡ ጨቦክሰኒ ጎይናታን” አመ። 25 እሰና “እት አዮታ?” አመን። የሱሳና “ሆራርጀዋ፡ ካአዬሳረ ኡሱ አንዮ። 26 እን እሰን ጉት ካአዬሰሮና ካፍርድናሮ ካሞጋን አየሰ አባ፡ አየሱን ጎአመን እን ካፋረራ ካአብዳመያ፡ ኡሱኮና ካማለሮ አላምን አዬሰናራ።” 27 እሰና ጋራ ካኦዶ ሰጋ ግራኖ ላኮአዴሴራን። 28 ሃንሱን የሱሳ፡ “ኤረ ካአባዶ ጦቂሰ ካኮሱይቲን ጎራታ፡ አንክ ካአመራ ኡሱ እን ላኖ ኦዶ ካአጋልሰሰሮ አዬሳኖ፡ ፈኢቴይ ኮና ፈልዋት ካሳንዋ። 29 እን ካፋረራ ኡሱ ኢነታ ግራ፡ ማኤክ ጎራታና ካገጌላይሰሮ ፈልን ካለ እን ላኮኢሳገሮ አመ።” 30 የሱሳና ሂካ ጎጎአዬሰ ኦሞጋን ኡሱ አማኔን። 31 የሱሳና ኡሱይ ካአማናሮ አይሁድን፡ “እሰን አጋልሰሳኖኬይ ጎአታቲን ሩምና እንኮ ኦአጋልሳታንታን አመ። 32 ሩምና ካሳንዋ፡ ሩምና እሰን ባልቹማ ቤሰናታ አመ።” 33 እሰና አባበን፡ “ኖ ይሰ ካአብራመና፡ ማዮና ድይ ሌነ ላካንሶ፡ ሀያ ኖኔ ባልቹማ ብናታን ምሲ አማታ?” አመን። 34 የሱሳና “እን ሩምና ሩምና አማራ ጨቦ ካፈላራ ካጨቦ ድይያ፡ 35 ድይ ኤርናዉና አባዶ ካምን ኦሮ ላኮግራሮ ኤረ አደ ማጎሬና ምኒ ግራራ። (aiōn g165) 36 ጎርታ ኤረ ካዋ ባልቹማ ጎቤሰ፡ ሩምና ባልቹማ ብናታን። 37 እሰን ይሰ ካአብራመ ላኖ እን ካሶዋ አየሱን ጎአመን ሃፋራኬ አታታና ማንኮዋታን ማራን እን ላጋዲን ጎሳቲን ኬቲታን። 38 እን አቦኬ፡ ዶሌ ካዴሮ አዬሳራ፡ እሰና አቦክሰንኮ ካማልቲታን ፈላታን አመ።” 39 እሰና፡ “አቦካን አብራመያ” አመን አባበን። የሱሳና “እሰን ይሰ ካአብራመ ሌቲንዋ፡” አብራመ “ካፈለሮ ፈላቲንዋ። 40 ዋኮ ማለረ ሩም ካሰገሮ እን ላጋዲን ዶታታን አብራመ አደ ሂካማሌ ላኮፈለሮ። 41 እሰን ካፈላታን አቦክሰን ካፈለሮያ።” እሰና፡ “ኖ ቫርሙጡማ ኦኡሙላምንኖ ላኮኖ፡” “አቦካንና ኮ ዋ ካላያ” አመን አባበን። 42 የሱሳና፡ “ዋ አቦክሰን ሊ ግረዋ፡ እን ዋ ዶለኮ ማንኮኤማየሮ ማራን

ጌላታተንዋ ኡሱ እን ፋረራ ኳሬ እን እስክቴይ ላኮኤማየሮ። 43 እን ካአዬሳሮ መወን ሻዳናዋታን? አላንቲና ሃፋራኬ ማልን ማንኮዶታኖን ማራንያ። 44 እስን አቦክሰንክ ካዱርሳ ይሰታን። አቦክሰንክ ሀልቻ ፈልን ዶታታን። ኡሱ ሆራርጀዋ ኔፎ ካላጋዳሮ፣ ኡሱ ዶሌ ሩም ማንኮግኖን ማራን ሩሚ ላኮአታተሮ፤ ኡሱ ጣራና ካጣራ ዶዶ ማንኮሌወን ጣራ አዬሳራ ካአዬሳራና እስኮ መጠረያ። 45 እን አደ ሩም ማንኮ አዬሳሮ ማራን ላኮአማናታን። 46 እስንኮ አት ጨባለሳታ አም ሞትን ካዳንዳራ አዮያ? ሩም ካአዬሳሮ ጎሌ፣ መወን አማናና ዋታን? 47 ካዋ ካሌ ሃፋራ ካዋ ማላራ፣ እስን አዳን ዋኮ ማንኮሌኖን ማራን ላኮማላታን አመ።” 48 አይሁድና አባበረ፣ “አት ሳማራውታ፣ አደና ዱርሳ ኩ ጉት ግራ አማኖካን ላ ጋራዮላ?” አመን። 49 የሱሳና፣ “እን አቦኬ ካባጃራ ኳሬ ዱርሳ ላኮአቦ።” “እስን አዳን እን የራሳታን። 50 እን ካባጃቴ ላኮዶታታሮ፣ ካባጃቴ ካዶታራ አደ ግሮዋ፤ ካፍርዳራና ኡሱያ። 51 እን ሩምና ሩምና አማራ፣ ማዮና ሃፋራኬ ጎኡራተ፣ ጎይ ሱረ ላኮዳሮ” አመ አባበ። (aiōn g165) 52 አይሁድና፣ “ዱርሳ ግራኖ ግዳ አዳንስ፣ አብራመ ጎየራ፣ ካሄገሮልና ሂካማሌዋ፣ አት አደ ማዮና ሃፋራካ ጎኡራተ ሱረ ላኮጎሮ አማታ። (aiōn g165) 53 አት አቦካን አብራመኮ ሮራታ? ኡሱ ጎየ፣ ኦሄገሮልና ኡሱማሌዋ ጎዬን፣ ሀያ አት አዮያ አምን ላታ አመን?” 54 የሱሳና “እን እስክቴ ጎካባጃየ ካባጃት ላኦ ካሊትታ፣ ካካባጅናራና አደ እስኬ ዋታ፣ እስን ሄዶካን ካአማታን አቦኬያ። 55 እስን ጎካሳናዋተና እን ካሶዋ ላካሶ ጎአመ፣ እን አደ እስን እን ካጣራ ላራ፣ እን አደ ካሶዋ ሃፋራና ኦራይናራ። 56 አቦክሰን አብራመኮክ ሀልቻ አርቴ ዲ ገጌላይን ዶተረ፣ ዴጉረና ገጌላተ፣ ካገገላተና ሌ አመ አባበ።” 57 አይሁድና፣ “ጋና ጌሰ ኮንቶም ካኮሌና።” “አት አብራመ ዴተታ!” አመን። 58 የሱሳና፣ “እን ሩምና ሩምና አማራ” “አብራመ ኡሙላማናኮ ሆረነ እን አንያ” አመ። 59 ኡሱ ጎራታ ኡሱ ኤጊን ኤኤዋ አተን፣ የሱሳ አደ ጎላተ፣ ቁሉክ ምን ካዋኮና ቤ ሴተ።

9 የሱሳ ራኔ ሮራ ግራን ታኮኡሙላመኮ ሀጋአበረ ኢልኦ ካባየረ እባዶት ዴ። 2 ኡሱኮ ኦአጋልሳታረና የሱሳን፣ “ካአጋልሰሳቶ! ሂክ እባዶት ኢልኦ ባይ ጎጎኡሙላምሮን ጨቦ ካፈለራ አዮያ? ኡሱያ ሙ ኦኡሙላራንያን?” አመን ሆሳተን። 3 የሱሳና፣ “ኡሱ ጎርቱን ኦኡሙላራን ጨቦ ላኮፈሌራን።” “ሂክ ካኮንሌራ አደ ፈሎ ኦዋ ኡሱ ጎጎሙትናዉንያ። 4 አሪ ግራን እን ካፋረሮኪኒዕ

ፈሎ ፈላኖ ዶትሳራ፡ ማዮና ፈልን ታኮዳንደኛን ሄመን ኤማታ፡ **5** ሂካ አላም ግራን አላምኮክ ኢፋ አንያ አመ።” **6** ሂካ አመ አባባተረ ኡሊ ሀንጨፈ ቱፈረ ሀንጨፈ ኤረ ጫወድሰረ ኢልኦ ኦአባዶቲ ሽግደረ፡ **7** “ሴዴ ሰልሆም ካአማማሮ ኤላ አልና” አመ። (ሰልሆም አማኖ “ካፋራመ” አማኖ።) አባዶትና ሴተ አለ። ዴንዳና አባባተ ኤመተ። **8** ኦላቴሳና ሂታኮ ሆረን ኡሱ ኤባታ ግራን ካዴራ አባዶ፡ “ሂክ አባዶት ላ ሀማጼ ካኤባታረዮላ?” አመን። **9** ኮኮና፡ “አግራን ኡሱያ” አመን፡ ኩክና ኡሱ ኣን ላራ ኳሬ ላኮኡሱዮ አመን፡ ኡሱ አደ፡ “አንዋያ” አማ ግረ። **10** አባዶና፡ “ሀያ ኢልኦ ኦታ ምሲ ባናሜን?” አመን ሆሳተን። **11** ኡሱና፡ “የሱሳ ካአማራን አባዶት ኤሬ ጫወድሰረ ኢልኦ ኦቴይ ሽግደ፡ ሰልሆም ቶሰ ሴይረ ጎጎኣሎን ሰገ፡ ሴይረና ኣለ፡ ድያኖና ዳንዴ” አመ አባባ። **12** አሶና፡ “ሀያ፡ ኡሱ አባዶት ኤቲ ግራ?” አመን። ኡሱና፡ “እን ላካሶ” አመ። **13** አሶና ኢልኦ ባየ ካግረ አባዶት ፋራሳዊል ቶሰ ጌሰን። **14** የሱሳ ጫወዶ ሽግደረ ኢልኦ ኦአባዶት ካኮባነራ አይሁድን ታፎልሲ አርተ። **15** ሃንሱን ፋራሳዊል ምሲ ድያኖ ዳንዴሮ ሆሳተን። አባዶትና፡ “ኡሱ ኢልኦኦቴይ ጫወዶ ሽግደ” አንና “ኣለ ሂክማ ዲያ ግራ አመ።” **16** ፋራሳውልኮ ኮኮ፡ “ሂክ አባዶት ታፎልሲ አሪ ማንኮካባጂኖን ማራን፡ ዋኮ ላኮዮ” አመን። ኩክና አደን፡ “ጨባለሳ፡ ሂካ ኣንክክ ማላታ ምሲ ፈልን ዳንዳራ?” አመን። እሰኦሮና እሰኦትዋት መጣንተ። **17** ሃንሱን፡ ኢልኦ ባየ ካግረ አባዶት ቶሰ አባባተሬን፡ “ኢልኦ ኦታ ካባነሮ አባዶትኮክ ጋራ አት መ አማታ?” አመን። አባዶትና፡ “ኡሱ ካሄገሮያ” አመ። **18** አይሁድና ኡሱ ኦኡሙለራን ቶሰ ፋርጉሬን ታኡምሰሰራኒ አባዶት ኢልኦ ባየ ካግረ ላኖና አደና ድያኖኬሳና ላኮአማናተሬን። **19** አሶና፡ “ኢልኦ ባየ ኡሙላመራ ካአማታን ኤረክሰን ሂካያ? ሀያ ግዳ ምሲ ድን ዳንዴ?” አመን። **20** ኦኡሙለራና፡ “ኤረካን ላኖና ኢልኦ ባይ ኡሙላማኖ ካንሶዋ።” **21** ግዳ አደ ምሲ ድያኖ ዳንዴሮ ኢልኦ ኦቴሳ ማዮ ባነሮ ኖ ላካንሶ እሰ ካዳንዴ አባዶት ማንኮሌ ማራን፡ እሰኦቴሳዉን አይሰን ዳንዳራ ኡሱ ሆሳየን አመን አባባ። **22** የሱሳ፡ ክርሰቶሳያ አም ካኦቶቴ ዱባ ምን ካኤብ ካአይሁድኮ ጎጎሆሮራምሮ አይሁድ ጣዬን ሙርተሴን ማንኮግሬን ማራን፡ ኦኡሙለራን ሂካ ካኮንአሜረን አይሁድ አብሳቴረንያ። **23** ሃንሱን ኦኡሙለራን ኡሱ እሰ ካዳንዴ አባዶት ማንኮሌሮ ማራን ኡሱ ሆሳየን አመን። **24** ኢልኦ ካባየረ አባዶትና

ካላም ኡሜነ፡ “እት እባዶት፡ ዋ ካባጂና፡” “ሂክ እባዶት ጨባለሳ ላኖ ኖ ካንሶዋ” እመን። 25 ኡሱና “ጨባለሳ ላኖ እን ላካሶ እየሱን ጎእመን እን እልኦ ባየ ካግረ ላኖና ግዳ አደ ድያኖኬ ሂካ እየሰ ኮ ካሳ” እመ። 26 እሱና፡ “ኡሱ ኩን መ ፈለራ? ኢልኦኦታና ምሲ ባነራ?” እመን ሆሳቴን። 27 ኡሱና፡ “ሆራ እን እስኩን ሰገራ፡ ላኮጫቃሰታን፡ መዉን አድ ማልን ዶታታን? እስና አዳን ኡሱኮ ካእጋልሳታሮ ሊን ዶታታን?” እመ። 28 እሱና፡ “እት ሂካ እባዶትኮ ካእጋልሳቶታ፡ ኖ ሙሴኮ ኦእጋልሳታኖና! 29 ዋ ሙሴነ ዋታ አዬሳኖ ኖ ካንሶዋ፡ ሂክ እባዶት አደ ኤትኮ ኤሜተሮ ሱረ ላካንሶ” እመን አዬሴን። 30 እባዶትና፡ “እሰን ኡሱ ኤትኮ ኤሜተሮ አዳሰዋት ካሳድሰሮያ፡ ሀሌዎ ኳሬ ኡሱ ኢልኦ ኦቴ ባነራ። 31 ዋ ካማላራ፡ ኡሱ ካአብሳታሮና ፈኢቲሳ ካፈላሮ ኳሬ፡ ጨባለሳል ማልዋት ኖ ካንሶዋ። 32 ኢልኦ ባየ ካኡሙላመሮ እባዶት ኢልኦ ካባነራ ግሮዋ ጎእመን፡ አላም አሮ መጣመኮ ሀጋእበረ ማዮና ማለ ላካሶ። (aiōn g165) 33 ሂክ እባዶት ዋኮ ሊ ዋተዋ ሂካ ፈልን ላኮዳንዳረ አመ አባበ።” 34 እሱና፡ “ማር ዱባ ጨቦ ባተ ካኡሙላንተታ፡ እት ኖ አጋልሰሰን ምሲ ጂቡ ቱሳታ?” እመን አባበን፡ ሆሮረን። 35 የሱሳና እባዶት ሆሮራማኖ ማለ፡ ኡሱ ካኮሄላረ ጎራታና፡ “እት ኤረ ካእባዶይ አማናታ?” እመ። 36 እባዶትና፡ “ጎታክ እን ኡሱ ጎጎአማኖን ኡሱ አዮያ?” እመ ሆሳተ። 37 የሱሳና፡ “ዳተታ፡ ግዳና ኩኔ ዋታ ካእዬሳራ ኡሱያ” እመ። 38 እባዶትና፡ “ጎታክ እን አማንናራ” እመ ሳጋደ። 39 የሱሳና፡ “ኦድያኖን ጎጎዴራዉን፡ ኦድያራና ጎጎድያኖንኩ፡ ፍርድን ሂካ አላም ቶሰ ኤመየራ” እመ። 40 የሱሳ ዋታ ኦግረን ፋራሳውልኮ ኮኮ ሂካ እየሰ ማሌንጉረን፡ “መ አማኖያ? ሀያ ኖና ኢልኦ ኦድያኖና አማኖያ?” እመን። 41 የሱሳና፡ “ኦድያኖን ሊ ግቴንዋ እስኩን ጨቦ ላኮላረ፡ ግዳ አደ ድያና ማንኮአማታን ማራን፡ ጨቦክሰን ጎጎግሮ ግርናራ” እመ።

10 ኤሰኮና የሱሳ “እን ሩምና ሩምና አማራ፡ አዉድ ካእዳድ ቶሰ ኡፋነ እንሌኖን ግራን ባንኤ ታካለነ ፍርመ ካታባራ ካሄታሮና ካሳማሮያ። 2 ካራነ ካታባራ አደ ኡሱ እዳድ ካፎፋሮያ። 3 ካራ ካኦራራ ካራ ባናራ፡ እዳድኬሳና ያየቴሳ ማላራ። እዳድኬሳና መገክሶይ ኡማ ቤሰናራ። 4 ኦቴሳ ኦሌራን ዱባ ካኮቤሰ ጎራታ ሆረ ሀየ ሰሴታራ ኢዳንዳ ያየቴሳ ማንኮካሶ ማራን ዴበ ሰሴታራ። 5 ማርት ካሌሮ ጎእመን እሶ ያየቴሳ ማንኮካሶን ማራን ኡሱኮ ባቃታራን ኳሬ

ሱረ ኡሱ ዴበ ላኮሰሴታራን” አመ። 6 የሱሳ ሂካ ማሱሳ ሰገ፤ እሱ አደን ኡሱ መ ሰጌሮ ላኮሻደራን። 7 ሃንሱን የሱሳ ካላም፡ “እን ሩምና ሩምና አማራ፡ ካእዳድጃል ካራ አንያ። 8 እንኮ ሆረነ ኦኤመቲረን ዱባ ሄቶና ኦሳማራንያን፡ አዳድጃልና አደን እሱ ላኮማሌን። 9 ካራ አንያ፡ እን ቶሰነ ካታባራ ዱባ ፋያራ፡ ታባራ፡ ብያራ፡ ቦባና ሄላታራ። 10 ሄቶ ሄትን፡ ላጋዲን ባሰን ካላውን ኤማታ፡ እን አደ ካኮን ኤመየራ ዱዶት ኔፎ ጎጎግርቶንያ አመ።” 11 አደና “ካእዳንክ ካፎፌ አንያ፡ ካእዳንክ ካፎፌ ኔፎቴሳ እዳድጃል ማራን ሮርሰ ሰሳራ። 12 ማራጋዴን ካፎፋራ አደ እዳድጃል ካኬሳ ማንኮሌኖን ማራን፡ ህዬይ ጎኤማቶ እዳድ ኢሰረ ባቃታራ፡ ህዬይና እዳድ አባታ፡ ዳርአታ። 13 ካኮንባቃታራና ማራጋዴን ካፎፋሮ ማንኮሌ ማራን ኢዳዱን ካነኤኤይሳኖንያ። 14 ካእዳንክ ካፎፌ አንያ፡ ካኬ ካሌሮ እዳድ እን ካሶዋ፡ እሶና እን ካሳንዋ። 15 ህክና ኦዶ እን ጎጎካሶ ማለ አንና ኦዶ ጎጎካሶ ማሌያ፡ ኔፎቴና እዳድኬ ማራን ሮርሰ ሰሰናራ። 16 ሂካ አዉድኮ ካሌኖን ካካለ እዳድ ግራ፡ እሶና ኬናኖ ዶትሳራ፡ እሶና ያየቴ ማላራን፡ ማተ ቶና ሌራን፡ ካፎፈና ኮያ። 17 “እን አባብ አታይን ኔፎቴ ሮርሳይ ማንኮሰሰናሮ ማራን አቦክ እን ጌላታራ። 18 ኔፎቴ ፈኢቴይ ሮርሰ ሰሰናራ ኳሬ እንኮ ማዮና ላኮአትሮ፡ ሮርሰ ሰሰንና ሌረ ኬሰን ኦዶናት አባ፡ ሂካ አጃጃ ካኮአታየራ አቦኬኮያ” አመ። 19 ሂካ ሃፋራኮ ካከይ አይሁድ ኦሮ አደና እሰአታናዋት መጣመ። 20 እሶኮ ኦምጋና፡ “ኡሱ ዱርሳ አባ፡ ቆላመራ፡ ሙን ማላታን?” አመን። 21 ካካለ አደ፡ “ሂክ አየሰ ዱርሳ ካኮግሮ እባዶትኮክ አየሰ ላኮዮ፡ ዱርሳ ኢልኦ ካባየ ባንን ዳንዳራ?” አመን። 22 ኢየሩሳሌምና ቁሉክ ምን ካዋክ ኡሱባታኖኮክ ባላ ሌ፡ ጎራታና ባጠሳየ፡ 23 የሱሳና ቁሉክ ምን ካኤብ ሶሎሞን ካኮሰሴታሮን ሮራ ግረ። 24 አይሁድና ማራሙሬን፡ “ሀጌ ታ ጌቶን ዎዳናታን ረሬሰ ካይናታ? አት ጎክርሰቶሳቶ አዴሰሰ ኖን ሰጊ” አመን። 25 የሱሳና፡ “እን እሰኑን ሰገረ፡ እሰን አዴን ላኮአማናታን፡ አቦኬክ መገ እን ኦፈላራ ፈሎ ጋራኬ አቶታራን። 26 እሰን አዴን እዳድኬ ማንኮ ላናዋቴውን ላኮአማናታን። 27 እዳድክ ያየቴ ማላራ፡ አንና ካሶዋ፡ እሶና እን ዴበ ሰሴታናን። 28 እን እሰኑን ጅሩ ጅሮማክ ግር ሰሰናራ፡ ዱዶ ላኮባታን፡ ገነቴኮና እሰን ባሰ አትን ካዳንዴራ ማዮና ላግሮ። (aiōn g165, aiōnios g166) 29 እሶ ኢን ካሰሰራ አቦክ ዱባንኮ ሮራራ፡ አቦኬት ገነኮ ማዮና ባሰ አትን ላኮዳንዴሮ። 30 አንና ኦዶክና ኮና አመ።”

31 አይሁድ የሱሳ አደን ኤጊን ኤኤሞ ኬሴን። **32** የሱሳ አደ፡ “ኦዶ ዶለኮ ኦሞጋን አጅንጂን ፈሎ ኦኢዳን ቱሰዋ፡ ሀያ ሂካስኮ ኤኩን ኤግናታን?” አመ። **33** አይሁድና፡ “ኖ ኩ ካኮንኤግናና፡ ጋዴክ እባዶት ሌተ ግራን፡ እስኦታ ሄዶ የላተደ ዋ ማንኮሀባርተ ማራንያ ኳሬ ኦኢዳኒዕ ፈሎኦታውን ላኮዮ” አመን አባበን። **34** የሱሳና፡ “ሴራክሰኒ፡ ‘እስን ዋልታን አመ አማመ ላኮጸፋመሮያ’? **35** ሃፋራ ካዋ ኦኮንኤሜተሮ ‘ዋልታን’ ጎአመ ማጸፋ ቁሉክና ኢግልሳሞን ካዳንዳሞን ጎሌ። **36** ሀያ፡ ‘እን ኤረ ካዋያ’ ማንኮአመሮ ማራን፡ ኦዶ ኡሱን ካለ የላተረ አላሞ ቶስ ካፋረሮ፡ እት ዋ ኢንጋማታ መውን አማታን? **37** እን ኣቦኬኒዕ ፈሎ ካፈላሮ ጎሌኖን አሮአማናቴን። **38** ካፈላሮ ጎሌ አደ እን ጎአማናታና ዋቴና፡ ኦዶ ኢን ግራኖ አንና ኦዶን ግራኖ አዴሰና ሻድ ጎጎሌታውን ፈሎኦታሳ አማና አመ አባበ።” **39** አደና ኡብን ዶተን፡ ኡሱ አደ ገነኮ ቤሳተ። **40** ኤሰኮ የሱሳ ጣየ ያንሳ ታኮጣማቃረ፡ ዮርዳኖስ ጋማ ቶስ አባባተ፡ ኤሴና አዳላተ። **41** እባዶ ካሞጋና ኡሱ ቶስ ኤመተ፡ እሶና፡ “ያንሳ ኮና ማላታ ላኮፈለሮ፡ አየሱን ጎአመን ሂካ እባዶትክ ጋራ ካኤሰራ ዱባ ሩሞያ” አመን። **42** ኤስ ባንኤ ኦሞጋን የሱሳ አማኔን።

11 ካማይራመና አባትሴክ ካማርታ ማማን ብታንያይ ካግረ አላዛር ሀወአማ ግረ። **2** ህት አቢክስ አላዛር ታኮን ሀወአማረ ማይራመ፡ ጎታ ጉት ሸቶ ክብተደ ሉክቴሳ መተክሴይ ታሻካራተታ። **3** አባላል ላማ፡ “ጎታ፤ እት ካጌላታ እባዶት ሀወአማራ” አመን ሀንዳ ፋረን። **4** የሱሳ ሂካ ካኮማላረ ጎራታ፡ “ሂክ ሀወአም ኤረ ካዋ ኡሱ ጎጎካባጃሞሮና ካባጃ ታዋውንያ ኳሬ ጎይን ካጌግሰሮ ላኮዮ” አመ። **5** የሱሳና ማርታና፡ አባትሴ ማይራመና አብክሶ አላዛር ጌላታ ግረ። **6** ጎሌና ካአላዛር ሀወአማኖ ማለ ግራን ታኮግረ ባንኤ አርት ላማ ሀየ። **7** ኤሰኮ አባባተረ ኡሱኮ ኦአጋልሳታራን “ኡል ካይሁዳ ቶስ አባባና” አመ። **8** ኡሱኮ ኦአጋልሳታራና፡ “ካአጋልሰሳቶ፡ አሪ ትጫርኮ ሆረን አይሁድ ኩ ኤኤሞ ኤጊን ዶታ ግረ፡ አደና ኤሰራ ሴይናታ?” አመን። **9** የሱሳና “አሪ ቶ ላ ሳቲ ቶሞንኮ ላማቶላ? ሂካ አላምኮክ ኢፋኮ ካከይ ማንኮድያሮ ማራን አሪ ካሰሰታራ ላኮሀንዱዱፋታሮ። **10** ካሀንዱዱፋታራና አደ ሄመን ካሰሴታሮያ፡ ኣላንቲና ኢፋ ላኮአቦ አመ አባበ።” **11** ሂካ ሰገ አባባተረ፡ “ኖ ካጌላታና አላዛር ሁዱረራ፡ አንና ሁዱሮኮ ኡሱ ኬሰን ሴይናራ” አመ። **12** የሱሳኮ ኦአጋልሳታረን “ጎታ!

ጎህዱረሮ ፋይሮዋ” አመን። **13** የሱሳ ሂካ ካኮሴገራ ካአላዛር ጎይኮክ ጋራየ፡
 ኡሱኮ ኦአጋልሳታረን አደን ሁዱራኖኮክ ጋራ ካአዬሰሮ ኣን ሌራ። **14** ሃንሱን
 የሱሳ አዳሰሰ፡ “አላዛር ጎየራ። **15** እሰን ጎጎአማንታኑን፡ ኤሰ ግርዋትክ እሰን
 ማራን ገቤላይሳራ፡ ግዳ እድ ኡሱ ቶሰ ሴና።” **16** ኤሰኮና ዲዲሞሳ ካአማማረ
 ቶማሳ ኦካለ የሱሳኮ ኦአጋልሳታረን፡ “ኖና ሴይነ ኡሱነ ዎታ ጎና” አመን። **17**
 የሱሳ ኤሰራ ካኮግያረ ጎራታ አላዛር ጎቃማላመሰኮ አሪ አፋር ሌተቴ። **18**
 ብታንያ ኢየሩሳሌምኮ ክሎ መትራ ሴድ ግታክ ፋክንተ ግቴ። **19** ካሞጋን
 አይሁድና ማርታና ማይራመና አቢክሶክ ጎይ ጎጎአሰን ኤመተን ግረን። **20**
 ማርታ የሱሳኮክ ኤመታኖ ማልተደ ቆጶይን ቤተ፡ ማይራመ አደ ምን ሄሰ
 ግቴ። **21** ማርታና የሱሳን፡ “ጎታ! እት ህታኒ ግቴዋ፡ አቢክ ላኮጎዋረ። **22** ግዳ
 ጎሌ ካኤባቶ ዱባ ዋ ሰሳኖ ካሶዋ አንተ።” **23** የሱሳና፡ “አቢክ ጎይኮ ክናራ”
 አመ። **24** ማርታና፡ “ታጋቾ አሪ ጎይኮ ካክናራ እን ካሶዋ” አንተ። **25** የሱሳና፡
 “ጎይኮ ክያኖና ኔፎና አንያ፡ እዬ ካአማናራ ጎጎየና ኔፎ ግራራ። **26** እዬ ካግራ፡
 ካአማናራና ሱረ ላኮጎሮ፡ ሂካ አማናታ?” አመ። (aiōn g165) **27** ኤሰና፡ “አ
 ጎታክ፡ እት አላም ቶሰ ካአማቶ ክርሰቶሳ ኤረ ካዋ ላኖ አማናራ” አንተ። **28**
 ማርታ ሂካ አንተ አባባተደ፡ አባትሴ ማይራመ ካለ ኡንተደ፡ “ካአጋልሰሳራ
 ኤመተራ፡ ኩ ኡማራ” አንተ። **29** ማይራመና ሂካ ጎጎማልቴ ሳንተ ኬተደ የሱሳ
 ቶሰ ሴተ። **30** ኡሱ ጎራታ የሱሳ፡ ማርታ ኡሱ ታኮቆጶተቶ ባንኤ ግረ ኳሬ፡
 ጋና ማማን ቶሰ ላኮታበረ። **31** ማይራመ ጎጎኢሳ ምን ኦሮ ኦግረን አይሁድና፡
 ፍርም ብያኖ ዴ፤ ቃማል ቶሰ ሴተ ካአዋቶ ኣን ሌረ ዴበ ቤን። **32** ማይራመና
 የሱሳ ማንኮግሮ ባንኤ ቶሰ ጌተ ጎጎዴቴና፡ ሉኪ ሄገሊ ኢተደ፡ “ጎታክ፡ እት
 ህታኒ ካግቴ ሌተዋ፡ አቢክ ላኮጎዋረ” አንተ። **33** የሱሳና ኤሰ ኦታ ግራን፡
 ዴበ ካኤመተራ አይሁድና ኦታ ግራን ዴጉረ አያና ጋዳ ሻላጋመረ፡ **34** “ሀጌ
 ቃማልቴታን?” አመ ሆሳተ፡ እሶና፡ “ጎታክ፡ ኮይ ዴና” አመን። **35** የሱሳና
 ኢልም ቤሳተ። **36** አይሁድና፡ “ምሲ ኡሱ ጌላታ ግረ ዴተነ!” አመ። **37** እሶኮ
 ኮኮ አደ፡ “አልኦ ካባየረ ኢልኦ ካባናራ፡ ሂክ አባዶት ጎጎ ጎኖንኮ ኡሱ የልን
 ላኮዳንዳረያ?” አመን። **38** የሱሳ ዋዳናቴሳ ካላም ጋዳ ድናንተደ ቃማል ቶሰ
 ሴተ፡ ቃማልኬሳና ኤኤሞ ካጨፋመሮ ላጋየ። **39** ኡሱና፡ “ኤኤሞ ኬሳ” አመ።
 ካጎየረኮት አባ ማርታ፡ “ጎታ! ኡሱ ጎየረ አሪ አፋር ማንኮአዳላተሮ ማራን ግዳ

ኡርማታራ” አንተ። **40** የሱሳና፡ “እት ጎአማናተ ካባጃ ታዋ ጋቾ ዴታ አመ አን ኩን ላኮሰጌረያ?” አመ። **41** ሃንሱን አባዶ ኤኤዋ ኬሰ፡ የሱሳና ኤልዴ ዴረ፡ “አቦክ፡ ማንኮማልተ ማራን አን ኩ ጋላታራ። **42** አሪ ዱባ አት እን ማላኖ አን ካሶዋ ሂካ አዬሳኖ አደ ህታኒ ካአሌራ አባዶና አት እን ፋራኖ ጎንአማናውን አመረያ” አመ። **43** የሱሳ ሂካ አመ አባባተረ ያየ ጦቂኢሰረ፡ “አላዛር፡ ኮይ ቤን!” አመ ኡመ። **44** ካጎየረ አላዛርና ገነና ሉኪና ታማማራንተ ጋሽን ዋታ፡ በቤዲና ሆጮ ጎሳማማራንቱ ቤ። የሱሳና “ጋሽ ታቃማል ፋራዴን ኢሳጋ ሀሴተ” አመ። **45** ሃንሱን ማይራመ ቶሰ ካኤመተረ አይሁድኮ ካዋጋን አባዶ፡ የሱሳ ኦፈለሮ ፈሎ ዴጉረ ኡሱ አማነ። **46** ኮኮና አደ ሴቴረን የሱሳ ካፈለሮ ፋራሳውሉን ሰጌን። **47** ኤሰኮ ካቱቃዋል ዋይቻልና ፋራሳዊል ታአይሁድ ሶንጎኒ ኩኩይሰንጉረን ሃ አመን፡ “ሂክ አባዶት ካዋጋን ማላታ ፈላ ማንኮግሮ ማራን ኖ መ ጎየልን ኢድራ? **48** አዲ ኖ ጎኢንሰ አባዶ ዱባ ኡሱ አማንናራ፡ ካሮም አባዶና ኤመይረ ኡልካንና ጎሳካን ባሰናራ አመን።” **49** እሶኮና ኮ ኡሱ ጌሲ ቱቃዋን ዋይቻ ካሌራ ቀያፋ፡ “እስን ኮና ላካሳን! **50** ጎሳ ዱባ ካባሮኮ ጎሳ ማራን ኦዶ ኮ ጎሳየ እስኩን ካአዳን ላኖ ላኮሻዳን? አመ።” **51** ሂካ ካአመራ እስኮ ላኮየ፡ አየሱን ጎአመን ኡሱ ጌሲ ኡሱ ቱቃዋን ዋይቻ ማንኮሌረ ማራን፡ የሱሳ ጎሳን ካጎይናሮ ላኖ ሂናኣ ሄገሮ አዬሳኖያ። **52** ኡሱ ካኮንጎዋራ ጎሳ ካላውን ሀሌኖን ግራን ካዳራመሮ ይሰ ካዋ ራቶ ኩኩይሰንያ። **53** ኤሰ አርኮ ሀጋአበሬን የሱሳ ላጋዲን ማካረን። **54** ሃንሱን የሱሳ ኤሰኮ አባባተረ አይሁድ ኦሮ ዲዳ ቤ ላኮሰሴተሮ፡ አየሱን ጎአመን ኡል ቃሉላቶክ ዶሌ ታግቶ ኤፍሬም ካአማማሮ ማማን ቶሰ ሴተረ ኤሴና ኡሱኮ ኦአጋልሳታረን ዋታ አዳላተ። **55** ካአይሁድ ፋሰካ ጎሳጋባላሜ፡ ባላ ግያኖኮ ሆረን ካሙጭማኖ ሴራ ፈልን ኦዋጋን ኡል ኡልኮ ኢየሩሳሌም ቶሰ ቤን። **56** የሱሳና ዶታ ግረን፡ ቁሉክ ምን ካዋይ አሌነ፡ “መአን ላራ? ባላን ሱረ ላኮኤማሮያ?” አማ እስእስ ሆሳተን። **57** ካቱቃዋ ዋይቻልና ፋራሳዊል አደ የሱሳ አብን ኤቲ ግሮ ካካሳ እባዶ ጎሳቱሰሮና ጎሳአብሮን አጃጃን ግረን።

12 ካፋሰካ ባላውን አሪ ሌዎ ሄሳ የሱሳ፡ ጎይኮ ካኬሰራ አላዛር ማንኮግሮ ብታንያ ቶሰ ሴተ። **2** ኤሴና የሱሳን ክታ ካሄመን ኤካሰን፡ ማርታ ጎሀንዳይቶ፡ አላዛር ኡሱን ዋታ ባቦ አምን ካሀማዴሮኮ ኮየ። **3** ማይራመና ዶክ አዉአሎ ታሌተ ሊትሮ ምና ታሙጭንተ ታናርዶሳ ሸቶ ኬንተዴ ሉክ ታየሱሳ ጉት ክብተ፡

ሉክቴሳና መተክሴይ ሻካርተ፥ ምና ሸቶኮት ኡርቲ አማጋመ። **4** የሱሳኮ
 ኦኦጋልሳታራኮ ኮ ዳንበኔ ሮርስ ካሰሰራ ካእስቆሮቱ ይሁዳ እደ ኔባታ። **5** “ህት
 ሽቶ ሴድ ቦሌ ጣጋራውን ዳዳላምደ ማራጋደና ህየሳን ሙን ሰሰዋተ?” አመ።
6 ሂካ ካኮንአዬሰራ ካማራጋደ ሸለ ካእባረ ማንኮሌ ማራን ካካማሮ ማራጋደኮ
 ኡሱን አታተ ካሃረ ሄቶ ማንኮሌውን ኳሬ ህየሳን ማራረረ ላኮየ። **7** የሱሳን፡
 “ህት ሽቶ ታቃማል አርውን ካየልተቶ ኤካሳኖ ማንኮሌ ማራን ኢሳጋ። **8** ህየሳል
 ማጎሬና እስን ዋታ ግራን፡ እን አዴን አሪ ዱባ ላኮሄልናታን።” አመ። **9** ኡሱ
 ጎራታ ካሞጋን ካእይሁድ አባዶ የሱሳ ኤሰ ግራኖ አዴሰረን ኡሱ ቶስ ኤመተን፡
 ኦኤማተራና የሱሳ ካላ አመን ሀሌኖን ግራን፡ ኡሱ ጎይኮ ካኬሰሮ አላዛርና
 ዲንያ። **10** ሃንሱን ቱቃሞኮክ ወይቻል እደን አላዛር ላጋዲን ማካረን። **11** ህክና
 አላንቲቲሳ ካሞጋን ካእይሁድ አባዶ የሱሳ ቶስ ሴቴረ አማና ማንኮግረ ማራንያ።
12 ባባርንሳ ባላን ካኤመታራ ጎሳ ካሞጋን የሱሳ ኢየሩሳሌም ቶስ ኤመታ ግራኖ
 ማለን፡ **13** ባላሎ ኦዛንባባ አበን ቆጶይን ቤን፡ ያየትሶና ጦቂሴን፡ “ሆሳኢና!”
 “መገ ካጎታይ ካኤመታራ ካሶማሳመያ!” “ዋኖ ካእስራኤል ካሶማሳመያ!”
 አመን። **14** የሱሳና ዳርሜ ታደሜር ሄላተረ ሀማጼ፡ ሃ አማመና ጎሳጻፋመሮ፡
15 “ኤረ ካጽዮን አሮአብሳተ! ሂክማ ዋኖካ ዳርሜ ታደሜር ሀማጼረ ኤመታራ”
 አማማን ኦጻፋመራን ሄገሮ ጎሳጉዳራውንያ። **16** የሱሳኮ ኦኦጋልሳታራና ሂካ
 ዱባ ሆራርጀ ላኮሻደረን፡ ኡሱ ማራን ካጻፋመራና ኡሱና ኦፈላመሬን ፈሎ
 ካኮአዴሰራን የሱሳ ካባጃመ ካኮአባባታረ ጎራታያ። **17** የሱሳ አላዛር ጉምቢኮ
 ኡመጉረ ጎይኮ ካኮኬሰረ ጎራታ፡ ኡሱን ዋታ ካግረ አባዶ ዱባ ጎይኮ ክያኖኬሳ
 አቶታ ግረ። **18** አባዶ ካሞጋን ኡሱ ሂካ ባሳክ ማላታ ፈላኖ ማንኮማለረ
 ማራን ቆጶይን ቤ። **19** ሃንሱና ካፋራሳውል አባዶ እስእስኦሮ፡ “ጎርታ መ የላኖ
 ዶትሳራ? ዴተነ! አላም ዱባ ምና አባባተ ኡሱ ዴበ ሰሴተራ” እስኦሮ አመን።
20 ሄዶይሳዬን ባላ ቶስ ኦቤራን ኦሮኮ ካግርክ አባዶና ግረ። **21** እሶና ጋሊላ
 ታግቶ ቤተሳይዳኮ ካሌሮ እባዶት፡ ፍልጶሳ ቶስ ኤማተን፡ “ጎታ፡” ማጋኔ፡ “ኖ
 የሱሳ ድን ዶታና” አመን። **22** ፍልጶሳና፡ እንድራሳን ሰግን ሴተ፡ እንድራሳና
 ፍልጶሳና ሴተረን የሱሳን ሰገን። **23** የሱሳና፡ “ኤረ ካእባዶ ታኮካባጃምናራ ሳቲ
 ጌተታ። **24** እን ሩምና ሩምና አማራ፡ ኢል ታዳርጋማ ኤሬ ጉት ኢደ ጎሳኖን ካለ
 ሄሳታ፡ ጎሳተ አደ ኢል ታሞጋን ሰሳታ። **25** ኔፎቴሳ ካጌላታራ ዋታራ ሂካ አላምን

ኔፎቴሳ ካዲዳራ አደ ጅሩ ጅሮማክ ግር ኡሱ ኦራታራ። (aiōnios g166) 26

እዬን ሀንዳይን ካዳታራ ጎግረ እን ዴበ ሀሰሴተ፤ እንና ማንኮግሮ እን ካሃንዳራና ኤስ ግርናራ እን ካሀንዳሮና አቦክ ካባጅሮዋ። 27 “ግዳ ኔፎት ጫናቃንተታ መ እምራ? ‘አቦክ ህታ ሳትኮ እን ሃስ አመ’? ሀሌዎ ካኮንኤማየራ ህታ ሳቲዉንያ። 28 አቦክ! መገካ ካባጂ” አመ። ኤስኮ አባባተረ፤ “መገኬና ካባጃየራ፤ አድና ካባጅናራ” ታእማታ ያየ ዳሩርኮ ኤመተ። 29 ኤስ አሌ ካግረ ካሞጋን እባዶ ያየ ካኮማለ ጎራታ፤ “ሁሩንታ” አመ፤ ካካለ አደ፤ “ኤርግቻያ ካአዬሳራ” አመ። 30 የሱሳ፤ “ህት ያየ ካኮንኤማተታ እን ማራን ሀሌኖን ግራን እስን ማራንያ፤ 31 ሂክ አላም ካኮፍርዳምናራ ጎራታ ግዳያ፤ ሂክ አላም ኮክ ሞቲ ግዳ ሳርድ ሻፋምናራ። 32 እን አደ ኡልኮ ጦቂ ጦቂ ካኮአመ ጎራታ እባዶ ዱባ እን ቶስ ኩኩይስናራ።” አመ። 33 ሂክ ካኮንኤሰራ ምስክ ጎይ ጎይናሮ ቱስንየ። 34 ጎሳና፤ “ኖ ክርስቶሳ ጅሩ ጅሮማን ግራኖ ሴራኮ ማልነና፤ ሀያ፤ ‘ኤረ ካእባዶ ጦቂ ጦቂ አማኖ ዶትሳራ ምሲ አማታ’? ሂክ ‘ኤረ ካእባዶ አዮያ’?” አመን። (aiōn g165) 35 የሱሳና፤ “ጎርታኑ ጎራታ ክጫሩን ኢፋ አብታን፤ ሙጉድ ሀኤመኖን ግራን፤ ኢፋ ግራን ሰሴየን፤ ሙጉድ ካሰሴታራ ኤትራ ሴታሮ ላካሶ። 36 ይስ ካኢፋ ጎጎሌታዉን ኢፋ ግራንቱን ሂክ ኢፋ አማና።” አመ። የሱሳ ሂክ አዬስ ጎጎጉድሴ ካለ ቤ ጎላተ። 37 የሱሳ ሂክ ማላታ ዱባ እሶ ሆረ ጎፈለና ሱረ ግዳና ላኮአማናተራን። 38 ህክና ካሄገሮ እስያሳ፤ “ጎታክ አቶናትካን እዮያ ካአማን? ካጎታ ሁናና እዮን ሙተ?” ካአማመራ ሃፋራ ጎጎጉዳሮንያ። 39 ሃንሱን አማንን ላኮዳንዴራን፤ ህክና እስያሳ ባንኤ ታካለይ ሃ አመ ጎጎአዬሰሮያ። 40 “አልኦ ኦትሶይ ጎጎድያኖንኮ ዎዳናትሶይና ጎጎሻዶንኮ አባባይና ጎጎፋይኖንኮ ዎ አልኦ ኦትሶ ባሰራ፤ ዎዳናትሶና ዱድሰራ።” 41 እስያሳ ሂክ ካኮንአመራ ካባጃቴሳ ማንኮዴሮ ማራንያ፤ ጋራኬሳና አዬስ። 42 ጎሌና፤ ካእይሁድ ዎይቻልኮና ካሞጋን ኡሱ አማን፤ ሀሌዎ ኳሬ ፋራሳዊል አይሁድኮክ ምን ካኤብኮ እሶ ጎጎቤሶንኮ አብሳቲረን አማናኖክሶ ቤሴን ላኮሰጋተረን። 43 ህክና ካኮንኤራ ዋኮ ታኤማቶ ካባጃኮ ሮርሳተን እባዶ ዶለኮ ታኤማቶ ካባጃ ማንኮጌላተን ማራንያ። 44 ኤስኮና የሱሳ ያየ ጦቂሰረ፤ “ማዮና እዬ ጎአማን እን ካላሊ ሀሌኖን ግራን እን ካፋረሮና አማናራ። 45 እን ካድያራ እን ካፋረሮ ድያራ። 46 እዬ ካአማን ሙጉዲ ጎጎግሮንኮ ኢፋሌ አላም ቶስ ኤመየራ። 47 “ሃፋራኬ ማልረ ካኦራኖ ጉት

ካፍርድናራ ላኮአንዮ፡ እን አላም ፋይሰን ኳሬ አላም ጉት ፍርድን ላኮኤማየሮ።

48 እን ካእታኖና ሃፋራኬ ካየራሳሮ ጉት እን ካኮፍርድናሮ አባ፡ እን ካእዬሰራ ሃፋራ ኡሱዋ ታጋቾ አሪ ፍርድናራ፡ ኣላንቲና **49** እን እስኮ ላኮእዬሳሮ እየሱን ጎእመን እን ካፋረራ ኦዶ መ እዬሰናሮና ምሲ እዬሰናሮ እጃጄራ። **50** እጃጃከሳ ጅሩ ጅሮማክ ግር ላኖ ካሶዋ፡ ሃንሱን እን ካእዬሳራ ዱባ ኦዶ ካሰገሮ ካላያ እመ አባበ።” (aiōnios g166)

13 ጎራታና ካፋሰካ ባላኮ ሆረን ግረ፡ የሱሳና ሂካ አላም ኢሰረ ኦዶ ቶስ ካኮሴይናራ ጎራታ ግያኖ አዳሰረ፡ አላም ኦግረን ኦቴሳ ኦሌራን ጌላተራ፡ ታ ጋቾ ጌሮና ጌላተ። **2** ክታ ካሄመን ሆረ ሮረ ግራን፡ የሱሳ ሮርስ ጎጎሰሰሮን ዱብሎሳ ኤረ ካሰዋና ካእስቆሮቱ ይሁዳ ዋዳና ከኬስ ግረ። **3** የሱሳና፡ ኦዶ እየሰ ዱባ ኦዶናትኬሳ ሄገሊ ጎጎየለሮ፡ ዋኮ ፋራማኖና ዋ ቶስ አባባታኖኬሳ አዳሰረ፡ **4** ክታ ካሄመንኮ ኬ፡ ሳርስ ካየጉረ ሞኢና ሆጮ ሞዋተ። **5** ኤሰኮና ካኮእልሳራን ሁይ በከ ክበረ ኡሱኮ ኦእጋልሳታሬንኮኒዕ ሉቃ. እልሳ ታሙዋተሮ ሆጮ ሻካራኖ ሀጋአበ። **6** ሰዋና ጴጢሮሳ ቶስ ኤመተ፡ ጴጢሮሳና፡ “ጎታክ፡ እት ሎቃቆኦተ አልሰናታ?” አመ። **7** የሱሳና አባበረ፡ “እን ካፈላሮ እት ግዳ ላካሶ፡ ሃሬ አድ ሻዶዋ” አመ። **8** ጴጢሮሳና፡ “ላ እት ሎቃኦተ እንኮ ሱረ ላኮእልሶ አመ። የሱሳና እን ኩ ጎእልሳናዋየ እት ኢነ ዋታ ኤሴላ ላኮአብቶ” አመ። (aiōn g165) **9** ሰዋና ጴጢሮሳና፡ “ጎታክ” ጎርታኑን “ሎቃቆኦተ ኦላል አንሌኖን ግራን ገነቴና መተኬና አልሰና አመ።” **10** የሱሳና፡ “ማር ካእለሮ አባዶቲን ካዶትሳራ ሎቃቆ ኦላል አላኖያ፤ ካሄሰራ ማር አደ ካሙጭመያ። ዱባና ጎላናዋቴና እስን ኦሙጭንቴንታን” አመ። **11** እስን ዱባና ኦሙጭንቴን ላኮታን ኡሱ ካኮንአመራ ኡሱ ሮርስ ካሰሰናራ አዮዮ ማንኮካሶ ማራንዮ። **12** ሎቃቆኦትሶ ኣልስ አባባተረ፡ ሁ ሳርሳተ አባባተረ ባንኤ ሀማጼረ፡ ሃና አመ፡ “እን እስኩን ካፈላሮ ሻዳታን?” **13** “እስን፡ እን ‘ካእጋልሰሳሮና’ ‘ጎታ’ አማታን፡ ጋራያ፡ ጎጎአማታን ኡሱማሌዋያ። **14** ጎርታ እን ጎታክሰና ካእጋልሰሳሮ ሌ ግራን ሎቃቆኦትሰን ጎእልስ፡ እስና ሂካማሌ እስእስኦሮ ሎቃቆኦትሰን አልሳዬን ዶትሳራ። **15** እን ጎጎፈለሮክ ማለ እስና ሂካማሌዋ ጎጎፈልታኑን ማሱሳ ሰገራ። **16** እን ሩምና ሩምና አማራ፡ ካሃንዳራ ጎታኮ፡ ካፋራመራና ካፋረሮኮ ላኮሮራሮ። **17** ጎርታ ሂካ እየሰ አዳሰዴን ፈሎይ ጎሀይሴን ኦሶማሳንቴንታን። **18** “እስን

ዱባን አይሳኖ ላኮዮ፡ ኦላሳበሮ ካሶዋ፡ አየሱን ጎአመን፡ ‘ባቦኬ ኢነ ዋታ ካኤብሳተራ ዲና ሌ ኬ ካአማራ ማጻፋ ቁሉክኮክ ሃፋራ ጎጎጉዳሮንያ፡’ **19**

“ካኮጉዳተ ጎራታ አን ላኖ ጎጎአማንታኑን፡ ሂክ ላኖኮ ሆረነ ግዳ ሰገራ፡” **20**

አን ሩምና ሩምና አማራ፡ አን ካፋረሮ ካአታታራ አን አታታራ፡ አን ካአታተና ካፋረሮ አታታራ፡” **21** ሂካ አመ አባባተረ የሱሳ አያና ሻላጋመረ፡ “አን ሩምና ሩምና አማራ፡ አሰን ኦሮኮ ኮ አን ሮርሰ ሰሰናራ” አመ አዳሰሰ ሰገ፡” **22** የሱሳኮ ኦአጋልሳታረን ኡሱ አዮ አመሮ ግርድ አመረን አሰአሰኦሮ አሰአሰ ድያተን፡” **23**

አሶኮ ኮ፡ የሱሳ ካጌላታረ ኡሱኮ ካአጋልሳታረ የሱሳ ዶሌ ጋባላመ ሀማጼ ግረ፡” **24** ሰሞና ጴጢሮሳና ሂካ ኡሱኮ ካአጋልሳታረን ማላታ ቱሰረ “ማዮ አማሮ ሆሳ” አመ፡” **25** ኡሱና ጌግዮ ታየሱሳ ጋባላመረ፡ “ጎታክ፡ ኩ ሮርሰ ካሰሰናራ አዮያ?” አመ ሆሳተ፡” **26** የሱሳና “ሂካ ባቦ ቱዋኖ ኮ ካነአምራነታ ኤገረ ካኮንሰሳራ ኡሱያ” አመ፡ ኤሰኮና ባቦ ካነአምራነታ ኤገረ ኤረ ካሰሞና ካአሰቆሮቱ ይሁዳ ቱይሰ፡” **27** ይሁዳና ባቦ ቱዋኖ ኮ ጎጎቱዋቴ ጎርሰዋ ጸላየ ታብተ፡” የሱሳና፡ “ካፈልናቶ ሳሜ ፈል” አመ፡” **28** ሀሌዎ ኳሬ የሱሳ መወን ሃ አመሮ አምን አሀማጼራንኮ ማዮና ላኮአዳሰሮ፡” **29** ይሁዳ ማራጋደ ካአባረ ማንኮሌ ማራን ባላን ካዶትሳሮ ኮኮ ጎጎአምኖን ጎርቱን ህየሳን ጎጎሰሰሮ የሱሳ ካአዬሰሮ ኣን ሌራ፡” **30** ይሁዳና ኡሱ ባቦ ቱዋኖ ኮ ጎጎቱዋቴ ቤ ሴተ ጎራታና ሄመንዮ፡” **31** ይሁዳ ካኮቤቦዋረ ጎራታ፡ የሱሳ ሃ አመ “ግዳ ኤረ ካአባዶ ካባጃመዋ ኡሱይና ዋ ካባጃመዋ፡” **32** ጎርታ ዋ ኡሱይ ጎካባጃመ፡ ዋ ኤረኬሳ እሲ ካባጃታራ፡ ጎርሰዋ ካባጅናራ፡” **33** “ይሰኬ፡ አሰን ዋታ ካኮአዳላይናራ ጎራታ ክጫሩንያ፡ አሰና አን ዶትናታን፡ አይሁድነ፡ አን ማንኮሴታሮ ኤመይን ላኮዳንዴታን እሶን ጎጎአመሮ፡ ግዳና አሰኑን ሂካዋ አማራ፡” **34** “አጃጃ ካኡሱብ ሰሰናራ፡ ህክና አሰአሰኦሮ ጎጎጌላታዉንያ፡ ጎርታ አን ጎጎጌላየሮ ማለ አሰና አሰአሰኦሮ ጌላየን፡” **35** አሰን አሰአሰኦሮ አሰአሰ ጎጌላቴን፡ አባዶ ዱባ አሰን ኦተ እንኮ ኦአጋልሳታን ላኖ ሂካኒ አዳሰናራ፡” **36** ሰሞና ጴጢሮሳና፡ “ጎታክ ሀገራ ሴይናታ?” አመ፡ የሱሳና፡ “አን ማንኮሴታሮ ግዳ ዴቦ ሴይን ላኮዳንዴቶ፤ ሃሬ አድ አን ዴቦ ሰሴቶዋ አመ አባባ፡” **37** ጴጢሮሳና፡ “ጎታክ፡ ግዳ አን ኩ ዴቦ ሰሴታና ካኮንዋታራ መዉንያ? ኩ ማራን ኔፎቱ ጎሌተና ሮርሳይ ሰሳይናራ” አመ፡

38 የሱሳና፡ “ኦግራን ኔፎታ እዩን ሮርስ ሰሰናታ? እን ሩምና ሩምና አማራ፡ ሉካላ ሀኦይኖን ግራን ሴድ ጋል እን ካካይናታ።” አመ አባባ።

14 “ዋዳናትሰን አሮጫናቃሞ፡ ዋይ አማና፡ እና አዱ አማና። 2 አቦኬክ ምኒ ምንጆል ካሞጋን ካግራ፡ ሂክ ልዋተዋ እን ሰጋረዋ፡ ካኮንሴይናራ ባንኤ ኤካሰንያ። 3 እን ሴይረና ባንኤ ካኮኤካሰ ጎራታ፡ እን ማንኮግሮ እስና ኢነ ዋታ ጎጎግርታውን እስን ኣትን ካላም ኤመይናራ። 4 እን ካኮሴታራ ራ ማኤክዮ እስን ካሳንዋ።” 5 ቶማሳና፡ “ጎታክ፡ ኤትራ ሰያቶ ላካንሶ፡ ሀያ፡ ራ ምሲ አዴሰን ዳንዳና?” አመ። 6 የሱሳና፡ “ራ እንያ፡ ሩምና ግርና እንዋያ፡ ጋራኬነ ጎሌ ኳሬ ኦዶ ቶስ ካኤመታራ ላግሮ። 7 እን ካካሳን ሌቴንዋ አቦኬና አዳሳተንዋ፡ ግዳኮ ሀጋኦብዴነ አድ አዳሳንዋ፡ ዴተታን።” አመ። 8 ፍልጶሳና፡ “ጎታክ፡ ኦዶ ቱስና ኖን ሌራ” አመ። 9 የሱሳና፡ “ፍልጶሳ! ግዳ ጊን እን እስኔ ዋታ ጎግሮ እን ላካሶያ? እን ካዴ ኦዶ ዴራ፡ ምሲ ኖን ‘ኦዶ ቱስ አማታ’? 10 እን ኦዶ ጎጎግሮ ማለ፡ ኦዶና እዬ ግራኖ ላኮአማናቶያ? እን እስኩን ካሰጌራ ሃፋራ እስኮ ላኮዮ፡ እየሱን ጎአመን ፈሎ ካፈላራ እዬ ካግሮ ኦዶያ። 11 እን ኦዶ ጎጎግሮ ማለ ኦዶና እዬ ጎጎግሮ ማለ እን እስኩን ካሰጋሮ አማና፡ ካካላ ጎሄሰና ፈሎ ኦቴሳ አማና። 12 እን ሩምና ሩምና አማራ፡ እዬ ካአማናራ እን ኦፈላሮ ፈሎ ፈላራ፡ ህክና አደ እን ኦዶ ቶስ ማንኮሴይናሮ ማራን፡ ሂካኮ ካሮረ ፈልናታን። 13 ኦዶ ኤረ ጎጎካባጃምሮ፡ መገኬይ ካኤባታን ዱባ ፈልናራ። 14 ማምሰክ እዬሰና መገኬይ ጎኤባቴን፡ እን ፈልናራ። 15 “ጎጌላቴን አጃጃኬ ኦራይናታን። 16 እን ኦዶ ኤባይናራ፡ ኡሱና እስን ዋታ ጅሩ ጅሮማን ካግሮ ካካላ ካጎጎእስሮ ሰሰናራ። (aiōn g165) 17 ኡሱና አያና ቁሉክያ፡ አላም ማንኮዴኖን ማራንና ማንኮካሶን ማራን አታይን ላኮዳንዳሮ፡ እስን አዴን፡ እስን ዋታ ማንኮግርናሮ ማራና እስን ኦሮ ማንኮልናሮ ማራን ካሳንዋ። 18 ኦዶ ካላይክ ይሰ ኣን እን እስን ላኮእስናሮ፡ እስን ቶስ ኤመይናራ። 19 ጎራታ ክጫርኮ አባባይ፡ አላም ሱረ እን ላኮድናሮ፡ እስን አዴን ድናታን፡ እን አርዶክ ማንኮሌ ማራን እስና አርዶኒሪ ልናታን። 20 እን አቦኬይ ጎጎግሮ ማለ፡ እስና እዬ ጎጎግታን ማለ፡ አንና አደ እስኒ ጎጎግሮ ማለ ኤሰ አሪ አዴሰናታን። 21 እን ካጌላታራ አጃጃኬ ካኦራታሮያ፡ ካጌላታሮና ኣቦክ ጌላታራ፡ እንና ጌላታራ፡ እስኦቴና ቱሰናራ።” 22 ኤሰኮና ካእስቆሮቱ ካሌኖን ይሁዳ፡ “ጎታክ፡ ሀያ፡ አላምን ሀሌኖን ግራን እስኦታ ኖዬን ካኮቱሰናታ ምሲያ?”

አመ። 23 የሱሳና፡ “ካጌላታራ ጎግረ ሃፋራኬ ኦራታራ፡ አቦክና ጌላታራ፡ ኡሱ ቶስ ኤመይናና፡ ኡሱ ዋታና ግርናና። 24 ካጌላኖን ሃፋራኬ ላኮኦራታሮ፡ ሂክ ካማላታን ሃፋራ እን ካፋረሮ ካኦዶያ ኳሬ ካኬ ላኮኖ። 25 “ግዳ እስኔ ዋታ ግራን ሂካ ዱባ ሰገራ። 26 ኦዶ መገኬይ ካፋራራ ካጎጎኢሳራ አያና ቁሉክ አደ እየሰ ዱባ አጋልሰሰናራ፡ እን ካሰጌሮና ዱባ ሻድሰናራ። 27 ኖጎዳ እስኩን ካይናራ፡ ኖጎዳቴና ሰሰናራ፡ እን ታሰሳራ አላም ታሰሳሮ አንትት ላኮቶ፡ ዋዳናትሰን አሮጫናቃሞ፡ አሮናክብሳኖ። 28 ‘እን ሴይናራ፡ አባባይና እስን ቶስ ኤመይናራ’ አማኖኬ ማልቲታን፡ አቦክ እንኮ ማንኮሮራሮ ማራን እን ካጌላታን ሌቴንዋ ኦዶ ቶስ ብያኖኬይ ገገላተንዋ። 29 እን ካሰጌራ ጎጉዳተ ጎጎአማንታኑን፡ ሂክ ላኖኮ ሆረ ጣየ ሰገራ። 30 ሂካ አላምኮት ሞት ጸላየ ማንኮኤመታቶ ማራን ሂታኮ ዳንቤባን እስን ዋታ ታንጂን ላኮአዬሰናሮ፡ ኡሱና እን ጉት ኦዶናት ላኮአቦ፡ 31 እየሱን ጎአመን እን ኦዶ ጎጎጌላታሮ፡ ማለ አቦክ ካሰሰሮ አጃጃ ጎጎፈላሮ፡ አላም ጎጎአዴሰሮንያ። ክያ፡ ሂታኮ ሴኖ” አመ።

15 “ካሩም ጋ ካዋይኒ አንያ፡ ካአባራተራና አቦኬያ። 2 ኡሱና እን ጉት ታግቶ ኢል ካዱባሞን ባላል ዱባ አቦክ ጎሰ ሉጉድናራ፡ ኢል ካሰሳሮ ባላል ዱባ አድ አሎ ኢል ጎጎዱባንቶን ኢድሰ ቃጭሰናራ። 3 ካሰገሮ ሃፋራኮ ካከይ እስን ግዳ አመጭንቴንታን። 4 እዬ ግራ፡ አንና እስኒ ግርናና፡ ባላል ጋ ካዋይኒ ጉት ጎሌኖን ካለ ኢል ሰሰን ላኮዳንዳሮ፡ እሰና እዬ ጎግሮን ኢል ሰሰን ላኮዳንዳታን። 5 “እን ጋ ካዋይኒያ፡ እሰና ባላልታን፡ ማኖና እዬ ጎግረ አንና ኡሱ ጎግረ ኡሱ ኢል ታሞጋን ሰሳራ እን ካላይ ኮና ፈልን ላኮዳንዳታን። 6 እዬ ካግኖን ባላል ሻፋመ ካአንጋጋሮ ባላል አንክክያ፡ ሂካ አንክክ ባላል አባባም ኤለን ቶስ ሻፋምናረ፡ ጉባምናራ። 7 እዬ ጎግቴን ሃፋራክና እስኒ ጎግረ፡ ካዶታታን ማምሰክ ኮኮና ኤባየን ሰሳምሮዋ። 8 እል ታሞጋን ዱባማኖ እንኮ ኦአጋልሳታን ኦተ ላኖ ጎቱሴን፡ ሂካኒ አቦክ ካባጃማራ። 9 “ኦዶ እን ጎጎጌላተሮ አንና እስን ጌላየራ፡ ጌላንጀቴይ ግራ። 10 እን አቦኬክ አጃጃ ኦራዬረ ጌላንጀቴሳይ ጎጎግሮ ማለ እሰና አጃጃኬ ጎራቴን ጌላንጀቴይ ግርናታን። 11 ገጌሎኦት እስኒ ጎጎሌራውን ገጌሎኦትሰን ኦአማጋማን ጎጎሌራውን ሂካ እን እስኩን ሰገራ። 12 አጃጃክ ሂካያ፡ እን ጎጎጌላየሮ ማለ እሰና እስእስ ኦሮ ጌላየን። 13 ኦጌላታሮ ማራን ኔፎ ሮርሳይ ሰሳታናኮ ታሮርቶ ጌላንጀ ማኖና ላኮአቦ። 14 እን እስን ካአጃጃሮ ፈሎይ

ጎህይሴን እን ኦጌላታርታን። 15 ጎርታኑ ድይጆልኬ ላኮአምናሮ፡ ድይጆልና ጎታ ካፈላሮ ላካሶ፡ እየሱን ጎአመን ኣቦኬኮ ካማለሮ ዱባ ማንኩአዳሰሰሮ ማራን ኦጌላታሮ አመራ። 16 እንያ እሰን ካአሳባየራ ኳሬ እሰን እን ላኮአሳብተታን፡ ሴይዳን ኢል ጎጎየላታኑን ኢልትሰና ጎጎግርቶን እን እሰን ሹመራ፡ ሃንሱን ኦዶ መገኬይ ካኤባታን ዱባ ሰሳራ። 17 እሰእሰ ኦሮ ጎጎጌላታውን፡ አጃጃክ ሂካያ። 18 “አላም እሰን ጎዲይ፡ እሰንኮ ሆረን እን ዲዳኖ አዳሳ። 19 እሰን ኦአላም ሊ ግቲንዋ፡ አላም ኦቲሳ ላኖ አዳሰረ እሰን ጌላታረዋ፡ እን አላምኮ እሰን ካለ የለ ማንኩአሳበሮ ማራን ኦአላም ላኮታን፡ አላምና ካኮንዲዳራ ሃንሱንያ። 20 ካሃንዳራ ጎታኬሳኮ ላኮሮራሮ አመ እን ካሰገሮ ሃፋራ ሻዳ። እን ሆሮራ ጎግሬን፡ እሰና አድ ሆሮርናራን፡ ሃፋራኬ ካኦራተራን ጎሌን ሃፋራክሰና ኦራይናራን። 21 እን ካፋረሮ ማንኩካሶን ማራን፡ መገኬኮት ኣላንቲ ሂካ ፈልናራን። 22 ኤሜይ ሰግዋየዋ ጨቦ ላኮላረ፡ ግዳ አደ ጨቦክሶውን አደ ኣላንቲ ላኮአባን። 23 እን ካዲዳራ፡ ኣቦኬና ዲዳራ። 24 ካካለ እባዶ ካፈሎንግሮ እሶ ኦሮ ፈልዋየዋ፡ ጨቦ ላኮላረ፡ ግዳ አደ እና ኣቦኬና ዳናን፡ ግዳ አደ እና ኣቦኬና ዲደራን። 25 ህክና፡ ‘ኣላንቲካላይ ዲዳን’ አማመ ሴራክሶይ ካጸፋመራ ሃፋራ ጎጎጉዳርንያ። 26 “እን ኦዶ ዶለኮ እሰኩን ካፋርናራ፡ ኦዶኮ ካብያሮ ካጎጎእሰሮ ካሩም አያና ካኮኤሜተ ጎራታ፡ ኡሱ ጋራኬ አቶትናራ። 27 እሰና አዳን፡ ሆራርጀዋ ኢነ ዋታ ማንኩግቲን፡ ማራን አቶትናታን።

16 “ሂካ ዱባ ካሰጌራ አማኖክሰንኮ ጎጎሽርአምንኩያ። 2 አይሁድ ካኮኩኩአማረኮና፡ ቤሰናራን ሱረዋ ካላጋድናራ ዱባ ዋውን ጎጎህንዳየ ማለ ካኮቶታምራ ጎራታ ኤመታራ። 3 ሂካ ዱባ ካኮንየልናና፡ ኦዶ ጎርቱን እን ማንኩካሶን ማራንያ። 4 ሆረን ሂካ እን እሰኩን ካኮንሰጌራ ጎራታ ጎጌ ጎጎሻዳኩንያ፡ እሰን ዋታ ማንኩግረ ማራን፡ ጣየ ሂካ ላኮሰጌሮ። 5 “ጎርታ እን ካፋረሮ ቶሰ ሴይናራ፡ ሀሌዎ ኳሬ እሰንኮ፡ ‘ሀገራ ሴይናታ?’ አም እን ካሆሳይናራ ላግሮ። 6 ሂካ አዬሳኖና ዋዳናትሰን ጋዳ አማጋንተታ። 7 እየሱን ጎአመን እን ሩምና ሩምና አማራ ሴታኖክ እሰኩን ላኦ ሰሰሮዋ፡ እን ጎሴታናዋየ ካጎጎእሳራ እሰን ቶሰ ላኮኤሜታሮ፡ እን ጎሴየ አድ አያና ቁሉክ እሰን ቶሰ ፋርናራ። 8 ካኮኤሜተ ጎራታና አላም ጨቦ ማራን፡ ጋራ ካቁሉማና ጋራ ካፍርዳ አዳሰሰ ቱሰናራ። 9 ጨቦክሶ አዳሰሰ ካኮንቱሳራ፡ እባዶ እዬ ማንኩ አማኖን ማራንያ። 10 ጋራ

ካቁሉማ አዳሰስ ካኮንቱሳራ፡ ኦዶ ቶስ ማንኮሴይናሮና ሂታኮ ዳንቤባን እን
 እስን ማንኮዳናን ማራንያ። 11 ጋራ ካፍርዳ አዳሰስ ካቱሳራ ሂካ አላምኮክ ሞት
 ታሌተታ ጸላዩ ማንኮፍርዳንተቶ ማራንያ። 12 “ጋና ካሞጋን እን እስኩን ካሰግናራ
 ግራ፡ ግዳ እድ አታይን ላኮዳንዴታን። 13 ካሩም እያና ካኮኤሜተ ጎራታ ሩም
 ዱባ ቶስ ጌሰሰሮዋ፡ ኡሱ እስኮ ላኮአዬሳሮ፡ ካማለሮ ካላል አዬሳራ፡ ኡሱማለና
 ሆረንባን ካልናሮ ሰግናራ። 14 ካኬ ካሌሮኮ አተረ ጎንአዳሳውን ያላ እን
 ካባጅናራ። 15 ካኦዶ ካሌራ ዱባ ካኬያ፡ ጎርታ ‘ካከ ካለሮኮ አትረ ጎንአዳሳውን
 ሰግናራ’ ካኮን እመራ ሃንሱንያ። 16 “እሪ ኡጫርኮ አባባይ ላኮድናታን፡ ሀሌዎ
 ኳሬ እሪ ኡጫርኮ አባባይ እድ ድናታን።” 17 የሱሳኮ ኦኦጋልሳታረንኮ ኮኮ፡
 “ጎራታ ክጫርኮ አባባይ እን ላኮድናታን፡ ሀሌዎ ኳሬ ጎራታ ክጫርኮ ዳንበኔ
 እድ ድናታን ኡሱማለና፡ ኦዶ ቶስ ማንኮሴይናሮ” ማራን ጎአምሮ መአማኖያ?”
 እስእስ ኦሮ አመን። 18 “ጎራታ ክጫር አማኖ መ አማኖያ?” ኡሱ ካአዬሳራ አየሰ
 ላኮታበሮ” አማ እስእስ ኦሮ ሆሳታ ግረን። 19 የሱሳና ኡሱ ሆሳይን ዶታኖ
 ካኮአዳሰ ጎራታ፡ “እን፡ ጎራታ ክጫርኮ ዳንበኔ እን ላኮድናታን፡ ‘ሀሌዎ ኳሬ
 ጎራታ ክጫርኮ ዳንበኔና እድ ድናታን ማንኮአመሮን፡ መ አማኖኖ እስእስ ኦሮ
 እስእስ ሆሳታን’? 20 እን ሩምና ሩምና አማራ፡ እስን ኦይናታን፡ ጋድናታን፡
 አላም እድ ገገላይናራ፡ ሀሌዎ ኳሬ ጋዳክስን ገጌሎ ቶስ ኢግልሳምናራ። 21
 ሄለልትቲ እሪ ጊደ ኡሙላግራን ጫናቃማታ፡ ካኮኡሙልተ ጎራታ አደ አባዶ
 አላም ቶስ ማንኮኤሜተሮ ማራን ካጫናቃማተ ኢሎዋታ። 22 እስኩና ሂካማሌ
 ግዳ ካጋዳ ጎራታያ፡ ጎሌና እድ እን እስን ማንኮድናሮ ማራን እን ገጌላይሳራ፡
 ገጌሎኦትሰና እስንኮ ካኦትራ ላግሮ። 23 ኤሰርት እንኮ ኮና ላኮኤባይናታን፡
 እን ሩምና ሩምና አማራ ኦዶ መገኬይ ካኤባታን ዱባ ሰሰናራ። 24 ግዳግን
 መገኬይ ኮና ላኮኤባቲታን፡ ኤባየን አታታንዋ፡ ገጌሎኦትሰና ኦአማጋማን
 ጎንሌራውን ኤባየን። 25 “ግዳግን ካሰጌራ ማሱሳይ ጎሌና ሂታኮ ሆረንባን ጋራ
 ካኦዶ ማሱሳይ ሀሌኖን ግራን ዲዳቤሰ ካኮአዬሰራ ጎራታ ኤመታራ። 26 ኤሰሪ
 መገኬይ ኤባይናታን፡ እንና ኦዶ እስን ማራን ላኮኤባይናሮ። 27 ኦላንቲና ኦዶ
 መተኬሳዋ እስን ማንኮጌላተሮ ማራና ዋ ዶለኮ ኤሜታኖኬ ማንኮአማንቲታን
 ማራንያ። 28 ኦዶኮ ቤረ አላም ቶስ ኤመወራ፡ ግዳ አደ አላም ኢሰረ ኦዶ ቶስ
 ሴይናራ” አመ። 29 ኤሰኮና የሱሳኮ ኦኦጋልሳታራን ሃ አመን፡ “ጎርታ ግዳ አት

ማሰሳ ካላይ አዳሰስ አይሳ ግታ። 30 ግዳ አየሰ ዱባ ጎጎአዳሳቶና ማዮና ኩ ሆሳይን ዶትስ ዋት አዳሴራን፤ ህክና ዋ ዶለኮ ኤመታኖ ጎጎአማኖን የለራ” አመን። 31 የሱሳና፡ “ግዳ አማንቴታን አማኖ?” 32 “ሂክማ እሰን ዱባና ራራን ካኮዳርአምናታን ጎራታ ኤመተራ፤ ኡሱ ጎራታና ግዳያ፤ እና ካለ ኢሳግናታን፤ ሀሌዎ ኳሬ አቦክ ኢነታ ማንኮግሮ ማራን እን ላኮካለ ግሮ። 33 “እዬ ግርዴነ ሮጎዳ ጎጎግርታኑን፤ ሂካ ሰገራ፤ አላም ግራንቱን ራኮ አብታን፤ አየሱን ጎአመን አላማንደ፤ እን አላም አዋደራ” አመ አባበ።

17 የሱሳ ሂካ ሃፋራ እዬሰ አባባተረ፤ ዳሩር ቶስ ጦቂመረ ሃ አመ ኤባተ፤ “አቦክ፤ ጎራታ ጌራ፤ ኤረካ ኩ ጎጎካባጅሮ ኤረካ ካባጂና። 2 ካኮንካባጂታና እት ካሰሰቶ ዱባን ኤርካ ጅሩ ጅሮማክ ግር ጎጎሰሰሮን አባዶ ዱባ ጉት ኦዶናት ማንኮሰሰቶ ማራንያ። (aiōnios g166) 3 ጅሩ ጅሮማክ ግርና እት ካላ ካሩም ዋ ሄዶና ካፋርተቶ የሱሳ ክርሰቶሳ አዳሳኖያ። (aiōnios g166) 4 እት ኢን ኦሰሰተ ፈሎ ጉድሰጉረ ኩ ኡሊ ጉት ካባጂ። 5 ጎርታ አቦኬ! አላም ሀመጣዋን ኩኔ ዎታ ታግቴ ካባጂ ኩ ዶሌ እን ካባጂ።” 6 “ሂናኦ እት አላምኮ አሳብተደ እን ኦሰሰቶ አባዶጃን መገካ አዳሰሰራ። ኦታዬን፤ እዬን ሰሰ፤ እሶና ሃፋራካ ኦራቴን። 7 እት ካሰሰታ ዱባ ኩኮ ላኖ እሶ ግዳ አዳሴራን። 8 አላንቲና እት እን ካሰሰቶ ሃፋራካ እን እሶን ሰሰ ጎሌ አታቴራን፤ አንና ኩ ዶለኮ ብ ኤመታኖ ኦግራን እሶ አዳሴራን፤ እት እን ፋራኖና እሶ አማነራን። 9 እሶ ኦታ ማንኮሌራን ማራን እሶን ኤባይናራ፤ እት ኢን ኦሰሰቶና ኦታ ኦሌራውን ኳሬ አላምን ላኮኤባይናሮ። 10 ካኬ ካሌራ ዱባ ካካያ፤ ካካ ካሌራና ዱባ ካኬያ፤ እሶና ካባጂመራ። 11 ጎርታ እን አላም ኦሮ ላኮአዳላይናሮ፤ እሶ አደን አላም ኦሮ ግናን፤ እን ኩ ቶስ ኤሜታኖያ፤ ቁሉክ አቦክ፤ ኖ ኮ ጎጎሌንኖ፤ እሶና ኮ ጎጎሌናውን ካሰሰቶ መገ ኦር። 12 እን እሶን ዎታ ታኮግረ፤ እት ካሰሰቶ መገካይ እሶ ጎልሰራ፤ አንና ኦረራ፤ ካማጸፋ ሃፋራ ጎጎጉዳር ኮ ካባይ ኤረ ኳሬ እሶኮ ማዮና ላኮባየሮ።” 13 “ግዳ እን ኩ ቶስ ኤሜታኖያ፤ አየሱን ጎአመን ገጌሎኦት እሶ ዶሌ ኦአማጋሜን ጎጎሌራውን፤ ግዳ አላም ግራን ሂካ እን አዬሳራ። 14 እን ሃፋራካ እሶን ሰሰራ፤ እን አላምኮ ላኮዮ፤ እሶና አላምኮ ላኮያን፤ ሃንሱን አላም እሶ ዲደራ። 15 ካኮን ኤባታራና ካሜላንኮ ጎጎኦርቶን ኳሬ፤ አላምኮ ጎጎቤሶን ላኮዮ። 16 እን አላምኮ ጎጎሌኖን ግሮ ማለ፤ እሶና አላምኮ ላኮያን። 17 ሃፋራካ ሩምያ፤ ሩምታይ ቁሎይሰና።

18 እት አላም ቶስ እን ጎጎፋርተቶ እንና አላም ቶስ እሶ ፋረራ። 19 እሶ ሩምና ጎጎቁሎይናዉን፡ እስኦት እሶ ማራን ቁሎይሳየራ።” 20 “እጋልሰሰክሶ እታቴረን እዬ ኦአማናራዉን አደረያ ኳሬ ሂናኣ ኦላሉን እን ላኮኤባይናሮ። 21 ህክና፡ አቦ! እት እዬ ጎጎግቶ፡ እንና ኩዬ ጎጎግሮ፡ ዱባና ኮ ጎጎሌናዉን፡ ኡሱማለና እት እን ፋራኖ አላም ጎጎአማኖን፡ እሶና ኖዬ ጎጎግራዉንያ። 22 ኖ ኮ ጎጎሌነኖ እሶና ኮ ጎጎሌናዉን፡ ታሰሰቶ ካባጃ ሰሰራ። 23 ህክና እን እሶ፡ እትና እዬ ላኖያ፡ እት እን ጎጎፋርተቶና እን ጎጎጌላተቶ ግታክ እሶና ጎጎጌላተቶ አላም ጎጎአዴሰሮን፡ ኮናትክሶ ካአዴሳመ ሀሌዎ።” 24 “አቦኬ! ሂኒዕ እት ኢን ኦሰሰታ፡ እን ማንኮግሮ ጎጎግራዉን አላም ሀመጣሞን እን ማንኮጌላተቶ ማራን እት ኢን ታሰሰቶ ካባጃቴ እሶ ጎጎዴራዉን ዶታራ።” 25 “ቁሉክ አቦኬ! አላም ጎካሳናዋተና፡ እን ካሶዋ፡ ሀኒዕና እት እን ፋራኖ ካሳንዋ። 26 እዬን ታግታ ጌላንጀታ እሶን ጎጎግሮቶ፡ እንና እሶ ጎጎግሮ፡ መገካ ጎጎአዴሰናዉን የለራ፡ ጎጎአዴሰናዉና የልናራ።”

18 የሱሳ ሂክ ኤብ ጉድሰ አባባተረ ኡሱኮ ኦአጋልሳታረን ዋታ ካቀድሮን ላጋናቄነ፡ ጣዬን ታኮግሬን ታአካክልተ ባንኤ ቶስ ታቤን። 2 ጎራታ ካሞጋን የሱሳ ኡሱኮ ኦአጋልሳታረን ዋታ ኤሰ ማንኮኤሰላሮ ማራን፡ ሮርሰ ካሰሰራ ይሁዳና ባንኤ ካሳናየዋ። 3 ይሁዳና ዋታዳራል ኡሱማለና ካቱቃሞል ዋይቻልኮና ፋራሳውልኮ ኦፋራመራን ቁሉክ ምን ካዋ ኦኦራኔን ዋታ ቃጄልሳ ባንኤ ታአካክልተ ቶስ ኤመተ፡ እሶና ዱብ፡ ፋኖሰና ሁ ካጀረነ አባተን ግረን። 4 የሱሳና ኡሱ ካግናሮ ዱባ አዴሰረ እሶ ቶስ ቤረ፡ “እሰን ካዶታታን አዮያ?” አመ። 5 እሶና፡ “ካናዘረት የሱሳያ” አመን። የሱሳና፡ “ኡሱ አንያ” አመ። ሮርሰ ካሰሰራና ይሁዳ እሶ ዋታ አሌ ግረ። 6 የሱሳና፡ “ኡሱ አንያ” ካኮአማረ ጎራታ ሃራርቲ ጋጋቤንጉረን ኡል እዬን። 7 አደና “እሰን ካዶታታን አዮያ?” አመ ሆሳተ። እሶና “ካናዘረት የሱሳያ አመን።” 8 የሱሳና አባበረ፡ “ኡሱ አንያ” አመራ ሀያ፡ “እን ካዶታታን ጎሌ ሂኒዕ ሀሴተን ኢሳጋ አመ።” 9 ሂክ ካኮሌራ፡ “እት ኢን ኦሰሰቶ ህናኣኮ ኮና ላኮባየሮ” አመ ካአዬሰራ ሃፋራ ጎጎጉዳሮንያ። 10 ሺፋ አባተ ካግረ ሰሞና ጴጢሮሳ ሺፋ ሞአተ ቱቃሞኮክ ዋይቻን ካሀንዳረ ባሰረ ነበ ታመርገ ጎሰ “ካሀንዳረኮክ መገና ማልኮሳ አማማረ”። 11 የሱሳና ጴጢሮሳነ፡ “ሺፋ ኮፎ ታብሰና! ኦዶ ኢን ታሰሰሮ ታራኮ ጡጋ ካጣሞን ኣን ላራ?” አመ። 12 ዋታዳራና ካአጃጃሮ ካክሶን ዋታ አይሁድን ኦሀንዳሬና ራቶ ሌነ የሱሳ አበን፡ ሸዬን። 13

ሆራርጀ፡ ካቀያፋ ሶዶ ካሌሮ ሃና ቶስ ጌሰን፡ ቀያፋ ኡሱ ጌሲ ቱቃሞን ኦዶናት ካእቦየ። **14** ቀያፋ፡ ጎሳ ማራንቱን ኦዶ ኮ ጎጎየ ካእዳንክያ እማ አይሁድን ማርካስሳ ካግረ እባዶትየ። **15** ሰሞና ካእማማረ ጴጢሮሳና ካካለ ኮ የሱሳኮ ካእጋልሳታረ የሱሳ ዴበ ሴተን፡ ቱቃሞን ኦዶናት ካእቦን ማንኮእዳሳማረ ማራን፡ የሱሳ ዎታ ቱቃሞን ኦዶናት ካእቦኮክ አዉድ ቶስ ታበ። **16** ጴጢሮሳ እደ ካራኮ ሳሬ ሄሰ። ቱቃሞኮክ ዎይቻነታ ካእዳሳማረ ካካለ የሱሳኮ ካእጋልሳታረ አባባተረ ካራ ታኡራተ አይሰሰረ ጴጢሮሳ አተ ታበ። **17** ካራ ታኡራተና ጴጢሮሳን፡ “አት ሂካ እባዶትኮ ካእጋልሳታሮኮ ኮ ላኮቶያ?” እነተ። ኡሱና “ላኮእንዮ” እመ። **18** ጎራታና ካእንቦሎልሳረ ማንኮሌ ማራን ኦሀንዳሬና ኤለን ቤበሳቴን ማራሙረን ማር ኮልኮልሳይን አሌን ግኔን፡ ጴጢሮሳና እሶ ዎታ አሌረ ኤለን ጣንጣማ ግረ። **19** ኡሱ ጎራታ ቱቃሞኮክ ዎይቻ የሱሳ ኡሱኮ ኦእጋልሳታሬንኮክ ጋራና አጋልሰሳኖኬሳኮክ ጋራ ሆሳተን። **20** የሱሳና፡ “እን አላምን እዳሰሰ እዬሰራ አይሁድ ታኮኩኩእማረና፡ ቁሉክ ምን ካኤብ አሪ ዱባ አጋልሰሰራ፡ ሰያመ ካእዬሰራ ላግሮ። **21** መዉን እን ሆሳታ? እን እሶን ካሰገሮ ኦማሌራን ሆሳ፡ ሂክማ፡ ሂኒዕ እን ካእዬሰሮ ካሳንዋ።” **22** የሱሳ ሂካ ካኮእዬሳረ ጎራታ ዶሌ አሌን ኦግረን ቁሉክ ምን ካዋ ኦኦራሬንኮ ኮ፡ “ቱቃሞኮክ ዎይቻን ሃ አባባታ?” እመረ ባላባንጆ ኡሱ ባሰ። **23** የሱሳና፡ “ታሜላን ካእዬሰ ጎሌ” “ታሜላን እዬሳኖኬ አቶቲን፡ ሩም ጎእዬሰ እደ መዉን ባሳታ?” እመ። **24** ኤስኮ ሃና የሱሳ ሻመ ጎጎግሬ ቱቃሞኮክ ዎይቻ ቀያፋ ቶስ ፋረ። **25** ሰሞና ካእማመረ ጴጢሮሳ አሌረ ኤለን ጣንጣማ ግራን፤ ካካለ አባዶና “ኡሱኮ ኦእጋልሳታሬንኮ ኮ ላ አትቶላ?” እመ። ኡሱና፡ “ላኮእንዮ” እመ ካካተ። **26** ቱቃሞኮክ ዎይቻን ኦሀንዳሬንኮ ኮ ጴጢሮሳ ነበ ካጎሰሮ እባዶትን ፋል ካሌረ፡ “ታኦካክልተ ባንኤ እን ኩ የሱሳን ዎታ ላኮዴያ?” እመ ሆሳተ። **27** ጴጢሮሳና እደ ካካተ፡ ጎርሰዋ ሉካለ ኦየ። **28** አይሁድ የሱሳ ምን ካቀያፋኮ ካሮም ሞት ጲላጦሳኮት ቃየ አተን ሴተን፡ ጎራታና ባርየ፡ አይሁድና ካፋስካ ባላ ማንኮእምናረ ማራን ባቶዋናኮ እመረን አዉድ ካሞትት ቶስ ላኮታቤራን። **29** ሃንሱን ጲላጦሳ እሶ ቶስ ቤረ፡ “ሂካ እባዶት ጉት ካሞታታን ሞቶ መያ?” እመ እሶ ሆሳተ። **30** እሶና አባበን፡ “ሂክ እባዶት ፈሎ ኦሜላን ፈልዋተዋ ኖ ኩን ሮርሰ ላኮሰሰናኔ” እመን። **31** ጲላጦሳና፡ “እሰን እሲዋ ጌሳዴን ሴራክሰን ማለ ፍርዳ” እመ። አይሁድና፡ “ኖ

ማዮና ጎሳጋንዶን ፈኢ ላኮአብኖ” አመን። 32 ህክና ካኮንሌራ የሱሳ ምስክ ጎይ ጎይናሮ ቱስን አመረ ካእዬስራ ሃፋራ ጎሳጉዳሮንያ። 33 ጲላጦሳና አዉድ ቶስ አባባተረ የሱሳ ኡምስሰረ፡ “አት ካእይሁድ ዋኖታ?” አመ ሆሳተ። 34 የሱሳና፡ “ሂክ ያዳ ካካያ?” “ጎርቱን ካካለ ጋራኬ ካሰገናንያ?” አመ አባበ። 35 ጲላጦሳና አባበረ፡ “እን እይሁድያ?” “ኩ እን ቶስ ካፋረራ ጎሳካና ካቱቃሞል ዋይቻልያ፤ እየሱን አት መ የልተደያ?” አመ አባበ። 36 የሱሳና፡ “ዋኖናትክ ሂካ አላምኮ ላኮዮ፡ ሊገረዋ እይሁድ ጎሳክቦንኮ ኦሀንዳረን ጀሬን ሻፋታኔዋ፡ ግዳ አደ ዋኖናትክ ሂካ አላምኮ ላኮዮ” አመ። 37 ጲላጦሳና፡ “ሀያ አት ዋኖታ አማኖዮላ!” አመ። የሱሳና፡ “እን ዋኖ ላኖ ጋራ አንተታ፡ እን ካኮንኡሙላመራና ሂካ አላም ቶንሳ ካኮን ኤመየራ ጋራ ካሩም አቶቲንያ፡ ሩምኮ ካሌ ዱባ ሃፋራኬ ማላራ” አመ። 38 ጲላጦሳና፡ “ሩም መታ?” አመ። ሂካ እዬስ አባባተረ አደና እይሁድ ቶስ ቤረ ሃ አመ፤ “እን ሂካ አባዶት ጉት ካሞትሰሮ ባስ ኮና ላኮሄለሮ፡ 39 እየሱን ጎአመን ፋስካይ ካሽያመሮኮ ኦዶ ኮ ፋራኖኮክ ዋጋ አብታን፡ ‘ሃንሱን ካእይሁድ ዋኖ ጎሳፋሮን ዶታታን?” አመ። 40 እሶና አደን እያ፡ “ላ ላኮኡሱዮ! ባርባክ ፋር!” አመን። ባርባክ አደ ሽታዮ።

19 ጲላጦሳ የሱሳ ሀጋአተረ ቦጪስ። 2 ዋታዳራልና ኤኤን ማማረን ካላቻ ኣን መተ ካየሱሳ ጉት ካዬን፡ ሄላ ቡራቡረክ ሳርስ ሳርስሴን። 3 ማራሙረን “ካእይሁድ ዋኖ ገጌላና” አማ ባላባንጆ ባሳ ግኔን። 4 ጲላጦሳና አደ አዉድ ቶስ ቤረ፡ ኮና ሞቶን ኦጌግሰራን ፈሎ ኦሜላን ሄልዋት ጎሳኤሳኑን፡ “ጎርታ እን ኡሱ እስን ቶስ ቤስናራ” አመ። 5 የሱሳ ካላቻ ካኤኤኔ ካተረ ሄላ ቡራቡረክ ሳርስ ሳርሳተ ቤ፡ ጲላጦሳና፡ “ሂክማ፡ አባዶት!” አመ። 6 ካቱቃሞል ዋይቻልና ቁሉክ ምን ካዋ ኦኦራኔን የሱሳ ካኮድያሬን ጎራታ፡ “ሱይና! ሱይና!” አማ ኦኬን። ጲላጦሳና አደ፡ “እስን ጌሳየንደን ሱዋየን፡ እን ቶንሴ ሞቶን ኦጌግሰራን ፈሎ ኦሜላን እን ላኮሄለሮ” አመ። 7 እይሁድና፡ “ኖ ሴራ አብና፡ እስኦቴሳ ኤረ ካዋ ማንኮየለ ማራን ሴራካን ማለ ጎይን ዶትሳራ” አመን። 8 ጲላጦሳ ሂካ ካኮማላረ ጎራታ ኣሎ አብሳተ፡ 9 አዉድ ቶስ አባባተረ የሱሳ፡ “አት ሀየኮ ኤሜተታ?” አመ ሆሳተ፡ የሱሳ አደ ኮና ላኮአባበሮ። 10 ጲላጦሳና፡ “ላኮስጋቶያ? እን ኩ ፋርን ጎርቱን ሱይን ኦዶናት አባኖ ላካሶያ?” አመ። 11 የሱሳና፡ “ዋኮ ሰሳምዋተዋ እን ጉት ኦዶናት ላኮግራረ፡ ሃንሱን ኩዬን ሮርስ

ካሰሰው እባዶት ጨቦኮ ካሮረ ጨቦ አባ” አመ። **12** ኤስኮ አባባተረ ጲላጦሳ
 የሱሳ ፋርን ዶተ፡ አይሁድ አደ፡ “ሂካ እባዶት ጎፋርተ ቄሳር ካጌላቶ ላኮቶ፡
 እስኦቴሳ ዋኖ ካየላታራ ቄሳር ካዲዳሮያ” አማ ኦካኖ ሆረዴን። **13** ጲላጦሳ
 ሂካ ማለረ የሱሳ ሳርደስ ቤስ፡ ኤኤሞኮክ ያማኖ ታአማማተ ባንኤ ካፍርዳ
 ባርጨማ ሀማጽ፡ ህት ባንኤና ታአራማይክ ሄኢ ገበታ አማንተ ኡማማተ።
14 እሪ ካፋስካ ባላ ታኮኤካሳናተ ጎራታና እርኮ ሳቲ ሌክ ሌ ግረ። ጲላጦሳና
 አይሁድን፡ “ሂክማ ዋኖክሰን” አመ። **15** እሶ አደን፡ “ባሰና! ባሰና! ሱይና!” አማ
 እዬን። ጲላጦሳና፡ “ዋኖክሰን ሱዩ?” አመ። ካቱቃሞ ዋይቻልና፡ “ካሮም ዋኖ
 ቄሳር ኳሬ ካካለ ዋኖ ኖ ላኮአብኖ” አመን አባበን። **16** ጉድሳኖና ጲላጦሳ
 የሱሳ ጎሳሱይራውን ሮርስ ሰሰ። ዋታዳራልና የሱሳ አበን ጌሰን። **17** ኡሱና
 ማስቃሊቴሳ ሰዳተረ ታአራማይክ ሄኢ “ጎልጎታ” አማንተ ታኡማማቶ “ቡቀ
 ታመተ” ታአማማተ ባንኤ ቤ። **18** ኤሴና ሱዬን፡ ኡሱ ዋታና እባዶ ላማ፡ ኮ
 ምና ታበተነ፡ ኮና ምና ታመርጌነ፡ የሱሳ ጠኤ የሌነ ሱዬን። **19** ጲላጦሳና
 ጹፍ ጸፈረ ማስቃሊ ጉት ሬረስ፤ ጹፍና፡ ካናዘረት የሱሳ፡ ካአይሁድ ዋኖ
 ታአማቶተ። **20** የሱሳ ታኮሱዋመረ ባንኤ ካታማ ዶሌ ማንኮግቲ ማራን ኦሞጋን
 አይሁድ ጹፍ ናባቤን፡ ጹፍና፡ ሄኢ ታኢብራይስጢ ታላትንና፡ ታግሪክተ። **21**
 ካአይሁድ ቱቃሞልኮክ ዋይቻልና ጲላጦሳ ዲዳ፡ “ኡሱ፡ ‘ካአይሁድ ዋኖያ’
 አመራ አም ጻፍ ኳሬ ካአይሁድ ዋኖ አም እርጻፍተ” አመን። **22** ጲላጦሳና፡
 “እን ካጸፈሮ ጸፈራ” አመ አባበ። **23** ዋታዳራል የሱሳ ሱዬን አባባተን፡ ቆሎኬሳ
 ሄሳ፡ ሁኬሳ አቲረን መተመተውን ኮ ኮ ጎሳገገሮን በንኤ አፋር ሄዴዳመን፡
 ኤለኮ ታ ሄገል ጌቶን አማለኮ ሌተ ሀኢሪራሞን ታፈላንተታ። **24** ሃንሱን፡ “እጣ
 ቤሳይን ካኮንቤተ ሀጌተ” ኳሬ “ላኮፊልኖ” አመን። ህክና ካኮንሌራ “ሁኬ
 ሄዴዳመን፡ ቆሎና ኢጣ ቤሳተን” ካአማመራ ካማጻፋ ሃፋራ ጎሳጉዳሮንያ።
 ዋታዳራልና ካፌለራን ሂካዋያ። **25** ታየሱሳ ማስቃሊ ዶሌ አየቴሳና አየቴሳኮት
 አባ፡ ታቀልዮጸ ኦር ማይራመና ኡል ካመግደላኮት ማይራመ ኤስ አሌን
 ግረን። **26** ኤሴና የሱሳ አየቴሳና ካጌላታረ ኡሱኮ ካእጋልሳታረ ዶሌ አሌን
 ግራን ካኮድያረ ጎራታ አየቴሳን፡ “አት ሄለልትቲ፡ ኤረካ ሂክማ” አመ። **27**
 ኡሱኮ ካእጋልሳታረን፡ “አየታ ህትማ” አመ። ኡሱ ጎራታኮ ሀጋአበረ ሂክ ኡሱኮ
 ካእጋልሳታረ ምንኬሳ ቶስ አታተ። **28** ኤስኮ የሱሳ አየሰ ዱባ ጉዳታኖ አዴሰረ፡

ካማጸፋ ሃፋራ ጎገጉዳሮ፡ “እን ሱጉባየዋ!” አመ። **29** ኤሴና ታኦኮካታ ዋይኒ ሁቡቾ ምግ ሌተ ግቴ፡ እሶና እስፎንጅ ጣሞ ካዋይኒቲ ጡቅሴነ፡ ኦጎሮ ካእቦ ባሊ ህኢ ቶስ ጋባሌን። **30** የሱሳና ካኦኮኮታሮ ካኮቃማሳረ ጎራታ “ጉዳተዋ” አመ። መተኬሳ ሁሰሳተረ፡ ኔፎቴሳ ሮርስ ሰሰ። **31** ኤስኮ አባባተረ አሪ አይሁድን ታፎልሲ አርፎን ታኮኤካሳታራንተ። አይሁድ፡ ካሱዋመሮ እባዶኮክ ፊስ ታፎልሲ አሪ ማስቃሊ ጉት ጎጎሀይኖንኮ ማንኮዶታቴን ማራንና ካለት ታፎልሲ አሪ ማንኮሌተ ማራን፡ ኦሱዋሜራን እባዶጃ ግልብ ኤብሰሬን ፊስ ጎጎዳግሮን ጲላጦሳ ኤባተን። **32** ሃንሱን ዋታዳራል ኤመተረ ክርስቶሳነ ዋታ ሱዋመ ካግረ ካሆራርጃ እባዶትኮክ ግልብ ኤብሰሬን፡ አደን ካካለኮክ ግልብ ኤሱማሌ ኤብሰሬን። **33** የሱሳ ቶስ ካኮኤሜተረን ጎራታ ካጎሮ ማንኮዴረን ማራን ግልብ ላኮኤብሰሬን። **34** እየሱን ጎአመን ዋታዳራልኮ ኮ አራንጃ ታየሱሳ ጀሬን ኤገ፡ ጎርስዋ ኢግና በከና ኡባተ። **35** ሂካ ካዴራ እባዶት አቶናት ሰሰራ፡ አቶናትና ሩምያ፡ ሩም አዬሳኖና ካሶዋ፡ እስና ጎጎአማንታኮን አቶታራ። **36** ህክና ካሌራ፡ ማጸፋ፡ “ለፋልኮ ኮና ላኮኤብሮ” ካአማመራ ጎጎጉዳሮንያ፡ **37** ካካለ ቁሉክ ማጸፋና፡ “ሀሱ ካኔገራን እሶ ድናራን” አማራ። **38** ሂታኮ አባባተረ ካኦርማትያስ ዮሴፋ ካየሱሳ ፊስ አታይን ጲላጦሳ ኤባተ፡ ዮሴፋና አይሁድ ማንኮአብሳተሮ ማራን ሄቶ የሱሳኮ ካኦጋልሳታሮ። ኤሱና ጲላጦሳ ፈኢ ካኮሰሳረ ጎራታ ኤመተ ፊስ አታተ። **39** ኤስኮ ሆረኒ ሄመን የሱሳ ቶስ ኤመተ ካግረ ንቆድሞሳ ኮፍቻ ሶንዶም ታሌቶ አሎ አዉአሎ ፑልፑልሶና ካኦኮኮታሮ ባጩ አተ ኤመተ። **40** እሶና ፊስ ካየሱሳ አቴረን ካአይሁድ ፊስ ኤካሳኖኮክ ሴራ ሸቶነ ዋታ ቃማሉን ጋሼ ማማሬን። **41** የሱሳ ታኮሱዋመራ ባንኤና ታኦካክልተ በንኤተ፡ ታኦካክልተ ባንኤ ማዮና ታኮቃማላሞን ግሮ ካኡሱብ ቃማልየ። **42** አይሁድን ታፎልሲ አርፎን ታኮኤካሳታራን አሪ ማንኮሌተዉን ታቃማል ባንኤ ኤነ ማንኮሌዉን የሱሳ ኤስ ቃማሌን።

20 ታዋጋ አሪ፡ ባሪኖ ጋና ኡል ድምምሳነ ግራን፡ ታመግደላ ማይራመ ቃማል ቶስ ሴተ፡ ኤኤሞና ቃማልኮ ካኦቶቶለሮ ዴተ። **2** ሃንሱን ሰሞና ጴጢሮሳ ቶስ የሱሳ ጌላታ ካግረ ካካለ ኡሱኮ ካኦጋልሳታረ ቶስ ትያ ኤመተዴ፡ “ጎታ ቃማልኮ ቤስን አቴና፡ ኤቲ ካዬራን ላካንሶ” አንተ። **3** ኤስኮና ጴጢሮሳና ካካለ የሱሳኮ ካኦጋልሳታረና ቤኔ ቃማል ቶስ ሴተን። **4** ላማ ትያ ግራን፡

ካካለ የሱሳኮ ካኦጋልሳታራና ጸጢሮሳኮ ጣየ ታቃማል ባንኤ ጌ። **5** ሁሰመረ ታኮቃማላመሮ ባንኤ ጎዴሮ ጋሽ ታላል ግራኖ ዴ፣ ቃማል ቶስ እደ ላኮታበረ። **6** ደቤስሴታ ካግረ ሰዋና ካእማመረ ጸጢሮሳ ጌረ ቃማል ቶስ ታበ፣ ኡሱና ታነቃማለሬን ጋሽ ታላል ዴ። **7** ኡሱማለና መተ ካየሱሳ ጉት ታማማራንተ ግቴ ሆጮ ዴ፣ ህት ሆጮና ታቃማል ጋሽኮ ካለ ቤተ ማማራንተ ግቴ። **8** ኤስኮና ጣየ ቃማል ቶስ ካጌራ ካካለ የሱሳኮ ካኦጋልሳታረ ቃማል ኦሮዴ ታበ፣ ዴረና አማነ። **9** ህክና የሱሳ ጎይኮ ክያኖ ግራኖ ጋና ማጻፋኮ ላኮአዴሰረን። **10** ኤስኮ አባባተሬን የሱሳኮ ኦኦጋልሳታረን ላማና ምን ምንክሶ ጋለን። **11** ኡል ታመግደላኮት ማይራመ እደ ቃማልኮ ሳሬ አለተደ ኦታ ግቴ፣ ኦታና ቃማል ድን ሁሰ አንተ። **12** ሬስ ካየሱሳ ማንኮግረ ባንኤ፣ ሁ ጉማራ ጉማራክ ኦሳርሳቴራን ኤርግቻ ላማ ኮ መተነ ኮ ሉቃነ ኦሀማጼራን ዴተ። **13** እሶና ማይራምነ፣ “እት ሄለልትቴ፣ መዉን ኦዋታ?” አመን ሆሳተን። ኤስና፣ “ጎታኬ አቴና፣ ኤቴ ካይራን ላካሶ” አንተ። **14** ሂካ አንተደ ሃራርቴ ጎዋቺቶ የሱሳ ኤስ ካአሌሮ ዴተ፣ የሱሳ ላኖ ኤስ እደ ላኮአዴሰቶ። **15** የሱሳና፣ “እት ሄለልትቴ፣ መዉን ኦዋታ? አዮና ዶታታ?” አመ። ኤስና ታኦካክልተ ባንኤ ካኡራሮ ኣን ሌረ፣ “ጎታክ፣ አት ጎአተቶ፣ ማጋኔ ማጌ ካይተቶ ሰጊ አን ኦታሮ” አንተ። **16** የሱሳና፣ “ማይራመ!” አመ። ኤስና፣ ኡሱ ቶስ አባባተደ ታኢብራይስጢ ሄኢ፣ “ረቡን!” አንተ፣ ፋረንና “ካኦጋልሰሳቶ!” አማኖያ። **17** የሱሳና፣ “ጋና ኦዶ ቶስ ማንኮቤኖን ግሮ ማራን፣ አርድንተ፣ ሀለዋ ኳሬ አቢላልቴ ቶስ ሴዴ፣ ‘ኣቦኬ ቶስና ኣቦክሰን ቶስ፣ ሄዶኬ ቶንሳ ሄዶክሰን ቶስ ብናራ አመራ’ አምደ ሰጊ” አመ። **18** ካመግደላ ኡልኮት ማይራመና የሱሳኮ ኦኦጋልሳታረን ቶስ ሴተደ፣ “ጎታ ዴለ!” አንተ ኡሱ ካአመሮና ሰግተ። **19** ኡሱ አልማዋ፣ ታሆራርጄ አሪ ታዋጋ ሄመን፣ የሱሳኮ ኦኦጋልሳታረን አይሁድ አብሳተኔን ኡፋ ጨፋቴን ኩኩአመን ግራን፣ የሱሳ ኤመተረ አሶ ጠኤ አሌረ፣ “ኖጎዳ እሰኑን ሀሌቶ!” አመ። **20** ሂካና አመረ ገነኖና አራንጃና ቱሳተ፣ የሱሳኮ ኦኦጋልሳታረና ጎታ ካኮድያረን ጎራታ ኣሎ ገጌላተን። **21** የሱሳ አደና፣ “ኖጎዳ እሰኑን ሀሌቶ፣ ኦዶ አን ጎጎፋረሮ፣ አንና እሰን ፋርናራ” አመ። **22** ሂካ አመ አባባተረ፣ ኡፋ አመረ፣ “አያና ቁሉክ ኦታዬን። **23** እሰን ጨቦ ካአባዶ ሀሄሶ ጎአንቴን፣ ጨቦክሰን ሀሄሶ አማምሮዋ፣ እሰን ጨቦክሶ ሀሄሶ ጎአሞን፣ እደ ጨቦክሶ እሰን ሀሄሶ ላኮአማምሮ” አመ። **24** ሀሱ ጎራታ ቶሞንኮ

ላማኮ ኮ ካሌራ፡ ዲዲሞሳ ካአማማረ ቶማሳ የሱሳ ካኮኤማታረ ጎራታ ኡሱኮ
 ኦኦጋልሳታረን ዋታ ላኮግረ። 25 ኦካላ የሱሳኮ ኦኦጋልሳታረን ቶማሳነ፡ “ኖ ጎታ
 ዴነለ!” አመን። ኡሱ አደ፡ “ምሰማረ ኦኤጋማራን ገነኖኦቴሳክ ማላታ ጎዴኖን፡
 ምሰማሬል ታኮኤጋመሮ ባንኤ ፈር ታብሰ ጎዴኖን፡ እራንጃቴሳና ገነቴ ጎታብሶን
 ላኮአማንናሮ” አመ። 26 አሪ ሰዴድኮ አባባተረ፡ የሱሳኮ ኦኦጋልሳታረን ሞን ኦሮ
 ግኔን፡ ቶማሳና እሶ ዋታ ግረ፡ ኡፋልና ጨፋመ ግረ፡ የሱሳ አደ ኤመተረ እሶኦሮ
 አሌረ፡ “ኖጎዳ እሰኑን ሀሌቶ!” አመ። 27 ኤሰኮና ቶማሳነ፡ “ፈርታ ሂታራ ኬን፡
 ገነኖኦቴና ዴና ገነ ድሪርሳደ እራንጃተይ ታብሰ፡ እሮሄዳተ አማና” አመ። 28
 ቶማሳና፡ “ጎታ! ሄድኬ!” አመ አባበ። 29 የሱሳና፡ “እት እን ማንኩዴተ ማራን
 አማንተታ እን ሀዴኖን ኦአማናታራን እደን ኦሶማሳመንያን” አመ። 30 የሱሳ ሂካ
 ማጻፋ ካጻፋሞን ካካላ ካሞጋን ማላታ ኡሱኮ ኦኦጋልሳታራን ሆረ ፈለራ፡ 31
 እየሱን ጎአመን የሱሳ ኡሱ ክርሰቶሳ ኤረ ካዋ ላኖ ጎጎአማንታኑና፡ አማንዴን
 መገኬሳ ግር ጎጎሄላታኑን ሂክ ጻፋመራ።

21 ኤሰኮና ዳንበኔ የሱሳ ታጢብራዶስ ላቡ እደና ኡሱኮ ኦኦጋልሳታሬውን
 ሙተ፡ ሂካማሌና አደ ሙተ። 2 ሰሞና ካአማማረ ጴጢሮሳ፡ ዲዲሞሳ ካአማማረ
 ቶማሳ፡ ካቃና ዘጋሊላ ናትናኤል፡ ይሰ ካዛብዶሳና የሱሳኮ ኦኦጋልሳታረን ኦካላ
 ላማ ራቶ ግኔን። 3 ሰሞና ካአማማረ ጴጢሮሳና፡ “ኩኑኡብ አባይን ዳጋኖያ”
 አመ። እሶና፡ “ኖ ኩኔ ዋታ ዳግናና” አመን። ኤማተነ ዋላቦ ኦርዴን ታቤን፡
 ኤሰ ሄመን እደን ኮና ላኮአባተን። 4 ባሪኖ፡ የሱሳ ላቡ ግሪ አሌ ግረ፡ ኡሱኮ
 ኦኦጋልሳታረን እደን የሱሳ ላኖ ላኮአዴሰን። 5 የሱሳና፡ “ይሶ፡ ኩኑኡብ አብታን?”
 አመ። እሶና፡ ኮና “ላኮአብኖ” አመን። 6 ኡሱና፡ “ማራብትሰን ዋላቦኮ ሞና
 ታመርገነ ሉጉዳዴን፡ ኩኑኡብ ሄላታንዋ” አመ። እሶና ካኮሉጉዳታሬን ጎራታ
 ኩኑኡብ ሞጋንኮ ካከይ ማራብ ናትን ዋተን። 7 ሀሱ ጎራታ የሱሳ ካጌላታረ
 ኡሱኮ ካኦጋልሳታረ፡ ጴጢሮሳነ፡ “ጎታዮ!” አመ። ሰሞና ጴጢሮሳና፡ “ጎታዮላ!”
 ካአማሮ ሃፋራ ካኮማላረ ጎራታ፡ ቤሳተ ካግረ ሳርሰ ታብሳተረ ፍርመ በከሮ
 ታበ። 8 ኦካላ የሱሳኮ ኦኦጋልሳታረን እደን ባጋኮ ባድ ቶሰ ፋክካማራን ህሰል
 ላማ ቦሌ ካሌሮ ኳሬ አሎ ላኮፋክማናን፡ ኩኑኡብ ታኮአማጋመረ ማራብ ናታ
 ባጋ ኤመተን። 9 ባጋና ካኮግያኔ ጎራታ፡ ቦላል ካኤሌኔ ጉት ካግሮ ኩንኡብና
 ባቦ ዴን። 10 የሱሳና፡ “ግዳ ካአብቴታን ኩኑኡብኮ አላ ኬና” አመ። 11 ሃንሱን

ሰዎና ካለማመረ ጴጢሮሳ ዋላቦ ታበረ ማራብ ባጋ ቶሰ ናቱ፤ 153 ካጅንጂን ኩኑኡብ እማጋመ ግረ፤ ሂካ ግታክ ኩኑኡብ ጎአብተና ማራብ ላኮፊላንተቶ።
12 የሱሳና “ኮዬን አማ” አመ። እሱና ኡሱ ጎታ ላኖ እዳሰን ማንኮግሬን ማራን ኡሱኮ ኦአጋልሳታረንኮ ኮና “እት እዮታ?” አም ሆሳይን ካጃባተ ላግረ። **13** የሱሳና ኤመተረ ባቦና ኩንኡብና ኣተ ሰሰ። **14** የሱሳ ጎይኮ ጎኬኮ አባባተረ ኡሱኮ ኦአጋልሳታራውን ሙታኖ ሂክ ካሴድዮ። **15** ዎዳና አዋተን ካኮአባባታሬን ጎራታ፤ የሱሳ ሰዎና ካለማመረ ጴጢሮሳን፤ “ኤረ ካዮና ሰዎና!፤ ህናኣኮ ሮርሰ እን ጌላታ?” አመ። ኡሱና “እ ጎታክ!፤ ጌላታኖኬ እትታ ካሳ” አመ። የሱሳና “ጭባርኬ ፎፍ” አመ። **16** የሱሳና ካላም፤ “ኤረ ካዮና፤ ሰዎና፤ ሩምና እን ጌላታ?” አመ። ኡሱና፤ “እ፤ ጎታክ፤ እን ኩ ጌላታኖ እትታ ካሳ” አመ። የሱሳና፤ “ጭዴልኬ ኦር” አመ። **17** ጎራታ ካሴድዮ፤ “ኤረ ካዮና፤ ሰዎና፤ እን ጌላታ?” አመ። ጴጢሮሳና ጎራታ ካሴድ የሱሳ፤ “እን ጌላታ?” አመ ማንኮሆሳተውን ጋዳ ታበረ “ጎታ እት ዱባ ካሶዋ ጎጎጌላታሮና ካሶዋ” አመ። የሱሳና፤ “እዳድኬ ፎፍ አመ። **18** እን ሩምና ሩምና አማራ፤ እት ዎዳሉማ ግራን ሳርሰካ እሲ ታብሳተደ ማንኮጌላተ ሴታ ግቱ፤ ጎጃሮንተ አድ ገነ ድሪርሳይናታ፤ እባዶ ካካለና ሁካ ታብሰረ ሴይን ማንኮጌላኖን ጌሰናራ።” **19** የሱሳ ሂካ ካኮን አመራ ጴጢሮሳ ምሰክ ጎይ ዋ ካባጅን ዶትሳሮ ቱሰንያ። ሂታኮ ዳንቤባን ጴጢሮሳን፤ “እን ዴበ ሰሴና” አመ። **20** ጴጢሮሳ ሃራርቲ ጎዎኛሮ፤ የሱሳ ጌላታ ካግረ ኡሱኮ ካአጋልሳታረ እሶ ዴበ ካሰሰታሮ ዴ፤ ሂክ ኡሱኮ ካአጋልሳታረ ኡሱ ጎራታ ክታ ካሄመን አማ ግራን ጌግዮ ታየሱሳ ጋባላመረ፤ “ጎታ፤ ኩ ሮርሰ ካሰሰናራ እዮያ?” አማ ካግረያ። **21** ጴጢሮሳና ኡሱ ካኮድያረ ጎራታ፤ “ጎታ! ሂክ እባዶት ምሰ ልናራ?” አመ ሆሳተ። **22** የሱሳና፤ “እን ታአባባሮቲ ኔፎ ጎጎግሮ ጎዶታተ ዱዶ ኩ መካጠበ? እት መተካውን እን ዴበ ሰሴና” አመ። **23** ሂካኮት ኣላንቲ ሂክ የሱሳኮ ካአጋልሳታረ ላኮጎሮ ታአማታ ኦዱ እማኒል ኦሮ ዳርኣንተ። የሱሳ አደ፤ እን “ታአባባሮ ጌግን ኔፎ ጎጎግሮ ጎዶታተ ኩ መካጠበ?” አመ ኳሬ ላኮጎይናሮ አመ ላኮሰጌሮ። **24** ሂካኮክ ጋራ ካአቶታራና ሂካ ካጻፈራ ሂካ የሱሳኮ ካአጋልሳታሮያ፤ አቶናትና ሩም ላኖ ኖ ካንሶዋ። **25** የሱሳ ካፈለራ ካካለ ካሞጋን እዬሰጆል ካግራ፤ እየሰ ዱባ ጎጻፋመ፤ ካጻፋመሮ ማጻፋ ዱባን አላም ታሌቶ ባንኤ ካአቦ እን ላኮላሮ።

ኦፋራሜራንኮኒዕ ፈሎ

1 ተዋፍሎሳ! ካሆራርጀ ማጻፋኬይ የሱሳ ካፈለሮና ካአጋልሰሰሮ ዱባ እን ኩን ጸፈራ፤ እን ካኩንጸፈራና የሱሳ ፈሎኦቲሳ ካኮሀጋአበሮ ጎራታኮ ኬሰረ **2** ዳሩር ታቤሮ እሪ ታ ጌሮ ካፈለሮያ፤ ዳሩር ካኮቤራና ኦአሳባተሮ ኦፋራሜራውን እያና ቁሉክኮክ ጋራ፤ እጃጃ እሶን ሰሰ አባባተረያ። **3** ራኮ ታሞጋንኮና አባባተረ ኡሱ እሲ ጋባላመረ አርዶክ ላኖ፤ ህናኣኑን ካሞጋን አቶዪ እዴሰሳ እሪ አፋርታሞ ኦሮ ርረ ርረ ሙታ ዋኖናት ካዋኮክ ጋራ እሶን ሰገ። **4** እሶ ዋታና ባቦ እምን ሀማጼ ግራን ሀእመ እሶ እጃጃ፤ “ኢየሩሳሌምኮ አርቤተን፤ እየሱን ጎአመን እን እዬሳ ግራን ካማልቲታን ኦዶ ታሰሰሮ አብድ ኦራዬን። **5** ያንሳ በከይ ጣማቃ ግረ፤ እሰን ጎአመን እሪ ኡጫርኮ አባባይዴን እያና ቁሉክ ጣማቃምናታን።” **6** እሶና ራቶ ኩኩማን ግራን፤ “ጎታ! ዋኖናት እስራኤልውን አባብ እት ካኩኡብይሰናታ ጎራታ ግዳያ?” እመን ሆሳተን። **7** የሱሳና ሃ እመ እሶን አባበ፤ “ኦዶ ኦዶናትከሳይ ካሙርቴሴሮ ጎራታጀል ጎርቱን አልማል ማላቢን እሰን ላኮዳንዴታን። **8** እየሱን ጎአመን እያና ቁሉክ እሰን ጉት ካኮዳገ ጎራታ ሁና አታይናታን፤ ኢየሩሳሌም፤ ይሁዳይና ሳማርያይ ዱባ፤ ኡልኮት ጋቾ ታ ጌታኒ አቶልኬ ልናታን።” **9** ኡሱ ሂካ እዬሰ አባባተረ እሶ ዲያ ግራን ዳሩር ቤ፤ ዱማንቻና ኢልትሶኮ ጎልሰ። **10** ኡሱ ዳሩር ቶሰ ብያ ግራንቲን፤ እሶና ትቾሴን ዲያ ግራን ሳርሰ ጉማራክ ኦሳርሳተሬን አባዶጃ ላማ ደራኣ እሶ ዶሌ አሌረን፤ **11** ሃና እመን፤ “እሰን እባዶ ካ ጋሊላ፤” “ዳሩር ዲያ ህታኒ ካኮንአልቲታን መወንያ? ሂክ እሰን ዶለኮ ዳሩር ብያግራንቲ እሰን ካዴተታን የሱሳ፤ ዳሩር ቶሰ ብያ ጎሳዴተታንክ ማለ ኡሱማሌዋ አባባይ ኤመይናራ” እመ። **12** ኤሰኮ አባባተረ ዛይቲ ካብያራ ጋ ታኮአላታሮ ዋዳምኮ ኢየሩሳሌም አባባተን ሴተን፤ ህት ዋዳም ኢየሩሳሌምኮ ታፎልሲ እሪ ጎሳሰሴራውን ካሰሳመሮ ራ ግታክ ፋክ አማተ። **13** ካታማ ቶሰ ካኮታቤረን ጎራታ ካኮኩኩአማሬን ፎቂ ኮራቲን፤ ህኒዕና ጴጢሮሳ፤ ያንሳ፤ ያይቆባ፤ እንድራሳ፤ ፍልጾሳ፤ ቶማሳ፤ በርተሎሜዎሳ፤ ማቶሳ፤ ካኢልፎሳ ኤረ ያይቆባ ኡልኬሳውን ካሀኡሳታሮ ሰሞናና፤ ኤረ ካያይቆባ ይሁዳን ግረን። **14** ሂክ እባዶ ዱባ ሄለል ኮኮን፤ እዬ ታየሱሳ ማይራመኔ፤ ኡሱማሌ አቢላልቲሳ ዋታ ዋዳና ቶ ሌንጉረን ኤብ ሀኢሶን አርጌቶ ኤባታ ግረን። **15** ሀሱ ጎራታ ጴጢሮሳ ቦልና ላማታን ኦሌራን አቢላል ኦሮ ኬ አሌረ፤ **16** “አቢላልቲ! የሱሳ

ካአበሮ እባዶን ሆረሃየ ካቃጃልሳሮ ካሌሮ ይሁዳኮክ ጋራ፥ አያና ቁሉክ ጣየ ህኢ ታዳወቱ ካእዬስራ ካማጸፋ ሃፋራ ጉዳይን ማንኮዶትሳሮ ማራንያ። 17 ኡሱ ኖኮ ኮ እን ቶታመረ ሂካ ሀንዳዉን ለሌዳማኖኮክ ኢድሊ ሄላተ ግረ አመ።”

18 ሂክ እባዶት ፈሎ ኦሜላንኮት ሙራይ ኡል እምናተ፤ ሆረ ሆረ እዬ በቤድ ኡል ኦየረ፥ ጠኤኮ ቦግ በረኤ ሁቦ ቤ ኡባተ፤ 19 ህክና ኢየሩሳሌም ካግሮ እባዶ ዱባን ማልሳመ፤ ኡሱ ኡልና ሄኢትሶይ “አከልዳማ” እማመ ኡማመ፥ ፋረንና “ኡል ካኢግ” እማናያ። 20 ጴጢሮሳና ዴበ፥ “ካማዛሙር ማጸፋይ ሃ አመ፥ “ኡሱ ታኮግረ ባንኤ ሀላል ሀሌቶ፤ ኤስ ካግራ እባዶና እሮሄላሞ፤ እደና “ኦዶናትኬሳ ካካለ ሀኢታቶ፤ እማመ ጸፋመራ። 21 “ሃኑን ጎታ የሱሳ ኖ ኦሮ ታኮስሴታሪ እርጌቶ ኖኔ ዎታ ካግረ እባዶኮ ኦዶ ኮ አሳባሚን ዶትሳራ፤ 22 ህክና፥ ካያንሳ ጥንቃታኮ ሀጋአበረ ጎታ የሱሳ ዳሩር ታቤሮ እሪ ታ ጌሮ ኖኔ ዎታ ካግረ ሂካ እባዶኮ ኮ ኖኔ ዎታ ጎይኮ ክያኖኮክ አቶ ጎጎሌሮን ዶትሳራ።” 23 ሃኑን እየሰጠሳ ጎርቱን በርሳባሰ ካአማመረ ዮሴፋና ማቶያሳን እሶ ላማ ከነን፤ 24 ሃ አመን ኤባተን፥ “ጎታ፥ እት እባዶ ዱባኮት ዎዳና ካሶዋ፤ ሂናኣ ላማ ኦሮኮ ካአሳባተቶ እባዶ ኖን ቱስ። 25 ካኮንኤባታናና ይሁዳ ኢስ ታሴተሮ ባንኤቴሳ ሂካ ሀንዳዉና ኦፋራሜራኮት ባንኤ ኖን ጎጎሹሞቶንያ።” 26 ኤስኮና ኢጣ ቤስን፥ ኢጣና ማቶያሳ ቤስ፥ ኡሱና ቶሞንኮ ኮ ኦፋራሜራን ዎታ ቶታመ።

2 ካጴንጠቆስጠ ባላ ካኮገያረ ጎራታ፥ የሱሳኮ ኦአጋልሳታረን ዱባና ራቶ ባንኤ ቶይ ኩኩሜን ግረን፤ 2 ደራኣና ታኦቲ ሁፎ ኣንትት ያየ ዳሩርኮ ኤመተዴ ካኮግሬን ምን እማጋንተ። 3 ላጫ ካኤሌኔ ኣን ካላሮ ካለካለክ ኤፊብጆል ዴን፤ ካለካለ ቤተ መተመቱ እባዶ ጉት ዳይደ። 4 ዱባና አያና ቁሉክ እማጋሜን፥ አያናና ጎጎአዬሰናዉን እሶን ካሰሰሮኮክ ጅልባ ታካለ ሄኢ እዬሳኖ ሀጋአበን። 5 ኡሱ ጎራታ አላም ካግሮ ጎሳ ዱባኮ ካኤመተረ ዋ ካእብሳታረ አይሁድ ኢየሩሳሌም ግረ። 6 ህታ ያየ ካኮማላረን ጎራታ ጎሳ ካሞጋን ራቶ ኩኩመ፤ ካኩኩአመራ ጎሳና፥ መተመተይ ካኩኩአመሮ ጎሳኮት ሄኢ እሶ እዬሳ ግራን ማለረ ሳይ። 7 ጎሳ ማማና ሳዳ ሃ አመ፥ “ሂክ ካእዬሳራ እባዶ ዱባ ላ ካጋሊላዮላ? 8 ሀያ ኖ መተመቱ ካኮአላንኖ ኡልኮት ሄኢታን እሶ እዬሳ ግራን ካማላና ሂክ ሞሲያ? 9 ኖ ኡል ካጳርተናይ፥ ኡል ካሜድ፥ ኡል ካኢላምያይ፥ ኡል ካመሰጸጦምያይ፥ ኡል ካይሁዳይ፥ ኡል ካቀጸዶቅያይ፥ ኡል ካጳንጦስ፥ ኡል ካእስያይ፥ 10 ኡል

ፍርግያይ፡ ኡል ካጸነፍልያይ፡ ኡል ካግብጽ፡ ኡል ካቀሬናይ ዶሌ ካግሮ ታሊብያ
 እውራጃይ ኦግኖና፤ ሮምኮ ኦኤመነኖ፤ **11** እይሁድና ካእይሁድ አማኖ ቶስ
 ኦታብነና ኖ፡ ካቀርጠሰና ካአረብ እባዶ ጎለኖ፡ እባዶና ኦአቲ ፈሎ ኦዋ ሄኢታኒ
 ጎአዬስሮ ማላና።” **12** ሃንሱን ዱባ ማማና ግርድአመነን፡ “ሂክ እየስ ምስ
 ልናራ!” አመን። **13** ኮኮ እባዶ አደ፡ “ሀቤኖን ካግሮ ጣሞ ካዎይኒ ጣመሬን
 ሰቴራን” አማ ቃጭፋተ። **14** ሀሱ ጎራታ ጴጢሮሳና ቶሞንኮ ኮኔ ዎታ ኬ እሌረ፡
 ያዬ ጦቂስ ሃ አመ ጎሳን አዬስ፡ “እስን እባዶ ካይሁዳ ኢየሩሳሌም ኦግታን ዱባ
 ሂካ እየስ ኮ እዳሳ፡ ማዳራ ጫቃሳ።” **15** ጎራታ ጋና ባርኮ ሳቲ ሴድ ማንኮሌ
 ማራን እስን ጎሳሄዳታን ማለ ሂክ እባዶ ላኮሴቲሮ። **16** እየሱን ጎአመን ሂክ
 ካሄገሮ ኢዩኤሊ ሃ አማመ ጎሳአዬሳመሮያ፤ **17** “ዋ ሃ አማራ፡ ካጋቾ አርጂሊ ሃ
 ልናራ፡ አያናኬ ሶ ካሳርሳተሮ እባዶ ዱባ ጉት ዳግሰናራ፡ ባባር ይሰክሰና ዴሌል
 ይሰክሰን ሄገሮ እዬሰናራን፤ ዋዳላክሰና ራጋ ድናራ፡ ጃርሶለትሰና ሀሰሎይናታ።
18 ኡሱ ጎራታ ኢን ኦሀናዳራን ባባርና ሄለልና ጉት አያናኬ ዳግሰናራ፡ እሶና ሄገሮ
 እዬሰናራን።” **19** ኤለኔ ዳሩሪ ካሳድሰሮ ኮኮ ቱሰናራ፡ ሄገሌ ኡልና ባሳና ማላታል
 ቱሰናራ፡ ኢግ፡ ኤሌና፡ ኢዮተና ልናራ።” **20** ታንጂንትና ታካባጃንተ ታጎታ አሪ
 ኤሜቶኮ ሆረነ፡ አርት ሙጉድ ቶስ ድግንና ኢግ ቶስ ኢግልሳምናራን። **21** ካጎታ
 መገ ካኡማታራ ዱባ ፋይናራ።” **22** “እስን ካእስራኤል እባዶ! ሂካ ሃፋራ ማላ፤
 እስን መተክሰኑን ጎሳካሳኒ፡ ጎታ እስን ኦሮ ባሳና ካሳድሰሮ ኮኮና ማላታል
 ፈላኖይ ጋራ ካናዘረት የሱሳኮክ እዮናት አዴሰሰራ።” **23** ኡሱ መተኬሳውን
 ዋ ጣየ ኦሄደሮና ኦማላበሮ ፈሎኮክ ማለ እስኑን ሮረ ሰሳመ፤ እሰና፡ እባዶ
 ካማላንኮት ገነ ጎሳሱዋምሮና ጎሳ ጎሮ የልቴን። **24** ዋ አደ ጎይኮክ አቦሳ
 ትረጉረ ኡሱ ኬስ፡ ኦላንቲና ጎይና ኡሱ አብ ሃሰን ላኮዳንዴ።” **25** ዳዉተና
 ጋራኬሳ ሃ አመራ፡ “ጎታ አርጌቶ ሆረቴይ አን ድያራ፤ ኡሱና መርገቴይ ግራ፤
 ዱዶ እን ላኮሻላጋምናሮ።” **26** ሃንሱን ዋዳናት ገጌላተ፡ ሀኢትና ገጌላንጄ
 አማጋንተ ሶኦትና አብዲ ግርናራን። **27** ኔፎቴና ካሳየ እባዶ ታኮግሮ ባንኤ (ቦዋ)
 ላኮእስናቶ፡ ቁሉክካና ሻም ጎሳሄሰሮን ላኮየላቶ። (Hadēs g86) **28** ራ ካኔፎ
 እን ጎሳአዴሰሮን የልተታ፤ እን ኩ ሆረ ገጌሎይ አማግናታ።” **29** “አቢላልቴ!
 ኦዶላል ካጣዎኮ ዳዉተ ጎየ ጎሳቃማላመሮ፡ ቃማልኬሳና ህታር ታ ጌሮን ኖ ኦሮ
 ግራኖኮክ ጃቡይ እን አዬሰን ዳንዳራ።” **30** ዳዉተ ሂካ ካኮንአዬሰራ ካሄገሮ

ላኖና ዋ ሳኒቴሳኮ ካላል ኮርፍንጀኬሳ ጉት ጎሳህማጽሮን ካአማቶኮክ ሃፋራ ኡሱን ካታበሮ ላኖ ማለበ። **31** ህታ አላንቲ ክርሰቶሳ ጎይጉረ ካጎየ እባዶ ታኮግሮ ባንኤ ካሄሶን ላኖና ሶኦቴሳና ጉምቢ ኦሮ ሻም ኦሄሶን ላኖ ዳወተ ጣየ ዴጉረ ጎይኮ ከያኖከሳኮክ ጋራ እዬሰ። (Hadēs 986) **32** ሂካ የሱሳ ዋ ጎይኮ ኬሰ፣ ኖ ዱባና ሂካ እየሱን አቶጆልና። **33** ሃንሱን ኡሱ መርጌ ታዋይ ሀማጸን ጦቂ ካኮአማረ ጎራታና፣ እያና ቁሉክኮት አብድ ኦዶኮ አታተረ ግዳ ካደያታና ካማላታን ዳግሰ። **34** ዳወተ ዳሩር ላኮቤሮ ኡሱና መተኬሰውን አደ ሃ አመራ። “ጎታ፣ ጎታኬውን “አን ዲናካ ሉክታይ ታዳዳርሰሮ መርገቴይ ሀማጸ” አመ። **36** “ጎርታ፣ ዋ ሂካ እሰን ካሱይተታን የሱሳ ጎታና ክርሰቶሳ የላኖ እስራኤልኮክ ጎሳ ዱባ ሀእዳሶ!” **37** ጎሳና ሂካ ካኮማላረ ጎራታ ዋዳናትሶ አሎ ድናንተደ፣ ጴጢሮሳና ኦካለ ኦፋራሜራውን፣ “አቢላልቴ፣ ሀያ መ የልና?” አመ። **38** ጴጢሮሳና አሶነ፣ “ጨቦኮ ጉላ ጋላ፣ ጨቦክሰና ሀሄሶ ጎሳአማምሮን፣ መተ መተክሰኩን የሱሳ ክርሰቶሳኮክ መገ ጣማቃማ፣ እላቦ ካዋ ካሌሮ እያና ቁሉክ አታይናታን። **39** ካአብዱ ሃፋራ እሰኑና ይሰክሰኑን ኡሱማለና ጎታ ሄዶካን እሰኦቴሳ ቶሰ ኦኡማሮ፣ ኤባ ኦግራን ዱባውንያ” አመ። **40** ካካለ ካሞጋን ሃፋራ እሶን አቶታ፣ “ህታ ታዋጫጫንተ አላታን ጉት ካኤሜታሮ ባይኮ እሰኦትሰን ሃሳዬን!” አማ ጎርሴ። **41** ሃፋራ ኦአታቴራና ጣማቃማን፣ ኤሰሪ ኩማ ሴድ ካሌራ እባዶ ቶቶኦትሶ ጉት አዳመ። **42** እሶና ኦፋራሜራንኮክ አጋልሰሲ እሰአታ፣ ራቶ ባቦ አማና ኤቢ አታታ ግረን። **43** ኦፋራሜራንኮት ገነ ኦሞጋን ኦሳዳምራና ባሳኒሰ ፈሎ ፈላማ ማንኮግሬን ማራን እባዶ ዱባን አብሰ ባሪተ። **44** አማኒል ዱባ ራቶ ኮሌ ግረ፣ ካአባናየን ዱባ ራቶክ የላቴን። **45** ዱሩማትሶና ኡራዋኦትሶ ዳዳላተን እባዶን መተ መተ ካዶትሳሮ ግታክ ሰሳ ግረን። **46** አርጌቶ ቁሉክ ምን ካዋይ ራቶ ኤሴላ፣ ምንጆልክሶይና ባቦ አማ ገጌሎይና ታኢዳንት ዋዳናይ አማ ግረን፣ **47** ዋ ጋላታና ጎሳ ዱባይ ሆረ ጋሻና አባናየን፣ ጎታና ኦፋያራን አሪ አሪ ቶቶኦትሶ ጉት አዱ ግረ።

3 አሪ ቶ ጴጢሮሳና ያንሳና ካኤብ ጎራታ አርኮ ሳቲ ሳጋሊ ቁሉክ ምን ካዋ ቶሰ ብያ ግረን። **2** ቁሉክ ምን ካዋ ቶሰ ካታባሮ እባዶኮ ኮኮ አታይን ጎሳኤባሮን፣ እባዶ አርጌቶ ከነን “ታኢዳንት” ታአማናን ቁሉክ ምን ካዋ ካኮታባራን ጎጫ ሆረ ካካነን ኮ ታኡሙላመ አርኮ ሀጋአበረ ናፋለሳ ካሌረ እባዶት ኮ ግረ። **3** ኡሱና

ጴጢሮስና ያንሳ ቁሉክ ምን ካዋ ታባ ግራን ዳጉረ ኮኮ አታይን እሶኮ ኤባተ። **4**
 ጴጢሮስና ያንሳ ኡሱ ቶስ ትችሉን ዳንጉሬን፤ ጴጢሮስና ኡሱን፤ “አላ ኖ ቶስ
 ዴ!” አመ። **5** እባዶትና እሶኮ ኮኮ አታይን ሄደረ ትችሉ እሶ ዴ። **6** ጴጢሮስ አደ፤
 “እን ማራጋደና ዋርቂ ላኮአቦ፤ እየሱን ጎአመን እን ካአቦ ኩን ሰሰናራ፤ ካናዘረት
 የሱሳ ክርስቶሳኮክ መገ ክንጉዴ ሰሴ!” አመ። **7** ንነ ታመርገታቴሳ አበ ኬሰ፤
 ጎርሰዋ ሉቃና ምክታጆልና አታተ፤ **8** ኤልዴ ፍርመረ ቱኩል አሌ፤ ሰሴታኖና
 ሀጋአበ፤ ሂታራ ሀሴራ ሰሴታና ፍርፍር አማ ዋ ጋላታ እሶነ ዋታ ቁሉክ ምን ካዋ
 ታበ። **9** ጎሳ ዱባና ኡሱ ዋ ጋላታ ካሰሴታሮ ካኮደያረ ጎራታ፤ **10** ሂክ እባዶት
 “ታኢዳንት” ታአማማቶ ባንኤ ቁሉክ ምን ካዋ ካኮታባራን ጎጫ ሀማጼረ ኮኮ
 ኤባታ ካግረ ኡሱ ላኖ ማላበ፤ ኡሱን ኦፈላመራን ፈሎኮ ካከይ አባዶ ሳዳኖና
 ማማኖይ አማጋመ። **11** ካፋዬራ ካኤባታረ እባዶት ጴጢሮስና ያንሳን ዋታ
 ኩቱታመ ግራንቲ ጎሳ ዱባ ማማኖይና እሶ ማንኮግራን ሶሎሞን ታኮሰሴታሮ
 ታአማንተቶ ባንኤ ቶስ ትያ ኤመተን። **12** ጴጢሮስና ሂክ ካኮደያረ ጎራታ ሃ
 አመ፤ “እሰን ጎሳ ካእሰራኤል! ሂክ እየሰ ሙን ሳዳታን? አደና ሁናካን ጎርቱን
 ቁሉማታን ሂክ እባዶት ፋይረ ጎሳሰሴሮ ኖ ካየልነኖ እን የልቴዴን ሙን ኖ ትችሉን
 ድያታን? **13** ኦዶላልካንክ ሄዶ ካአብራመ፤ ካይሳቃና ካያይቆባ ሄዶ ኤረኬሳ
 የሱሳ ካባጃ፤ እሰን አዴነ ኡሱ ጎሳ ጎሮ ሮርሰን ሰሰን፤ ጲላጦሳ ፋርን ጎዶተና
 እሰን አዴን ኡሱ ሆረ ካካቴን። **14** እሰን ጎአመን ካሩሚና ቁሉክ ካካተንዴን
 ኔፎ ካላጋደራ እሰኑን ጎሳፋራምሮን ኤባተን። **15** ግር ካኮሄላማሮ ላጋዳታን፤
 ዋ አደ ኡሱ ጎይኮ ኬሰ፤ ኖና ሂካኑን አቶና። **16** ሂክ እሰን ካድያታና ካካሳን
 እባዶት ካአታተራ መገ ካየሱሳ አማኖይያ፤ እሰን ዱባና ጎሳድያታኒ ዱዶክ
 ፋይና ጎሳሄላሮ ካየላራ መገ ካየሱሳና ጋራኬሳን ካሄላማሮ አማኖያ። **17** “ግዳና
 አቢላልቴ! እሰን ሂክ ካኮንየልቴታን ዎይቻልክሰን እን ማላባናዋቲኮ ካከይ
 ካሌሮ ላኖ እን ካሶዋ። **18** ዋ አደ ካኬሳ ካሌሮ ክርስቶሳ ራኮ ጎሳአታሮ ጣየ
 ካሄገሮል ዱባኮት ህኢ ካአዬሰራ ሂካማሌ ጎሳጉዳሮ የለ። **19** ጎርታ ጨቦኮ
 ጉላ ጋላዴን ጎታ ቶስ አባባዬን፤ **20** ሂካኒና ዋይ ዶሌ ካኮኡሱባታን ጌሰጆል
 እሰኑን ኤመይናራ፤ ዋ ጣየ ካአሳበሮ ክርስቶሳ የሱሳ እሰኑን ፋርናራ። **21** ኡሱና
 ዳሩሪ ካኮአዳላይናራ ዋ ጣየ ቁሉኒዕ ኦሄገሮልኮት ህኢ ጎሳአዬሰሮ አላም
 ዱባ ታኡሱባሮንያ። (aiōn g165) **22** ሙሴ ሃ አመራ፤ “ጎታ ሄዶ እን ጎሳኬሰሮ

ኡሱማለና አበላልትሰን ኦሮኮ እን ኣንክክ ካሄገሮ እሰኑን ኬሰሮዋ፤ ኡሱ እሰኑን ካሰጋሮ ዱባ ማላ። 23 ሀሱ ካሄገሮ ካማሎን ዱባ ጎሳ ኦሮኮ ካለ ብረ ሀባዎ አመ። 24 “ኦግራን ሳመላኮ ሀጋአበረ ካኬራ ካሄገሮል ዱባ ሂካ ጎራታጆልኮክ እዬሰራን። 25 እሰን ካሄገሮልኮክ ይሰታን፤ አደና ዋ አብራመነ ‘ሳኒታይ ጎሳ ካኡሌ ዱባ ሶማሳምናራ’ አመረ ኦዶላልክሰኑን ኦታበሮ አማቶ ኦኤልናታንታን። 26 ዋ ኤረኬሳ አሳበ ካኮኬሰረ ጎራታ፤ እሰን መተመቴ ሜላነትሰንኮ አባብጉረ ጎሳሶማሳሮን ጣዩ ኡሱ እሰን ቶሰ ፋረ።”

4 ጴጢሮሳና ያንሳና ጎሳውን እዬሳ ግራን ቱቃሞልና ቁሉክ ምን ካዋ ካኡራሮን ኦዶናት ካአባናየ ኡሱማለና እባዶ ካሶዶቃዊል ደራኣ እሶ ቶሰ ኤመተ። 2 ኦፋራመራን ላማና የሱሳኮክ ጎይኮ ክያኖ ጎሳ አጋልሰሳኖይና ጎይኮ ክያኖ ግራኖ እሶ ላላባኖይ አማራቱን። 3 ጴጢሮሳና ያንሳና አበን፤ ጎራታና ሄመን ማንኮሌረ ማራን ኡል ታባርሮይ ምን ካሻኖ ባሪሴን። 4 ሀሌዎ ኳሬ ሃፋራ ካማለሮ እባዶ ኦሮኮ ካሞጋን እባዶ ዋ አማነ፤ ቶቶ ኦባባረና ኩማ ከን ግታኒሪ ሌን። 5 ታላሞ አሪ ወይቻልክሶና፤ ጃርሶለትሶ ኡሱማለና ሴራ ኦአጋልሰሳረን አየሩሳለም ኩኩአመን። 6 ቱቃሞሉን ኦዶናት ካአባናየ ሃና፤ ቀያፋ፤ ያንሳ፤ እስክንድሮሳና፤ ካቱቃሞል ወይቻትኮክ ካምን እባዶ ዱባ ኤሰ ባንኤ ግረ። 7 እሶና ጴጢሮሳና ያንሳና ጠኤ ኣልሰፊነ፤ “ሂካና ካኮየልተታን ኤክ ሁናይ ጎርቱን መገ ካዮያ?” አመን እሶ ሆሳተን። 8 ኡሱ ጎራታ ጴጢሮሳና እያና ቁሉክ አማጋመረ ሃ አመ፤ “እሰን ካጎሳ ወይቻልና ጃርሶለ! 9 ህታር ሂካ ናፋለሳክ እባዶትን ፈሎ ኦኢዳን ማንኮፈላመራን ማራን ምስ ምሲ ፋዬሮ ኖ ካሆሳታን ጎሌ፤ 10 ሂክ እባዶት ፋዬጉረ እሰን ሆረ ካአሌራ ካሱይተቴንና ዋ አደ ጎይኮ ካኬሰሮ ካናዘረት የሱሳ ክርሰቶሳኮክ መገ ላኖ እሰን ዱባና፤ ካእሰራኤል ጎሳ ዱባና ካአዳሳመ ሀሌዎ። 11 ኡሱና፤ እሰን ኦግንባታን ካቱፋቴታን ኤኤሞ ምና አፋሩን መተ ሌ። 12 ሃንሱን ፋይና ኡሱ ኳሬ ካካለ ማዮና ላግሮ፤ ኖ ጎሳፋይኖን እባዶን ካሰሳመራ ሂካ መገኮ ካካለ መገ ዳሩርኮ ሄገሌ ላግሮ።” 13 እባዶና ጴጢሮሳና ያንሳ ሃ ጃቡይ እዬሳ ግራን ካኮደያረን ጎራታ፤ ካአጋልሳኖንግሮ እባዶ ላኖ አዳሰረን ሳደን፤ እሶ የሱሳነ ዎታ ግራኖ አዳሰን። 14 ካፋዬራ እባዶትና ኤሰ እሶ ዎታ አሌ ግራንቲ ማንኮዳን ማራን ካአላራን ዋተን። 15 ሃንሱን እሶ ሾንጎኮ ሳሬ ብ ጎሳግራውን አጃጃን፤ ኤሰኮና ራቶ ኩኩሜን ማካረን። 16

“ጎርታ ሂናኦ እባደጃ ምስ የልና? ሂክ ካኦቲ ባሳ ገነትሶይ ፈላማኖ ኢየሩሳሌም
 ካግራ እባደ ዱባ አዴሰራ፤ ሃንሱን ካካይን ላኮዳንዳኖ። 17 ሀሌዎ ኳሬ ሂክ
 እየሰ ጎርታ ጎሳ ኦሮ አሎ ጎሳባልኦኖኩ። ሂኒዕ እባደጃ እድ መገ ካየሱሳ ኡማ
 ማዮና ጎሳእዬሶንኮ ሴሪና።” 18 ኤሰኮ እሶ ኡመንጉረን መገ ካየሱሳ ዱዶ
 ጎሳእዬሶንኮና ጎሳእጋልሰሶንኮ አጃጃ። 19 ጴጢሮሳና ያንሳና አደን አባበን
 እሶነ ሃ አመን። “ዋኮ ሮርንስ እስኩን እጃጃማኖ ዋይ ሆረ ካዶትሳሮ ጎሌ አላ
 እስንዋ መተክስን፤ ፍርዳ። 20 ኖ ካዴነኖና ካማልነኖ እዬሳናኮ ሃር ላኮጋልኖ።”
 21 አደና ማንዴን አባባቲንጉረን ጋፋሬን፤ አላንቲና ጎሳ ዱባ ካሌሮ እየሰ ዋ
 ጋላታታ ማንኮግረ ማራን እሶ ሙርሰን ላኮዳንዴን። 22 ሂክ ባሳ ካፋዬራ
 እባዶት ጌስ አፋርታምኮ ካሮረ። 23 ጴጢሮሳና ያንሳ ፋራሜን እማኒል ቶስ
 አባባተን ሴተሬን ቱቃዋልኮክ ዋይቻልና ጃርሶላ ካእመራን ዱባ ሰገን። 24 እሶና
 ሂክ ካኮማላረን ጎራታ ያየትሶ ራቶ ዋ ቶስ ጦቂሰረን ሃ አመን፤ “ጎታካን እት
 ዳሩርና ኡል፤ በከና በከ ኦሮ ካግሮ ዱባ እት መጠተታ። 25 እያና ቁሉክኮክ
 ጋራነ ኩን ካህንዳሮ ኣቦካን ዳወተኮት ህኢ ሃ እንተ እት እዬሰታ፤ “እይዛብ
 ኤንጌ ሙን ከኬ? ጎሳና ሙን ጦየ? 26 ካኡሌ ዋኖላል ኬጉረ፤ ሞትጃል ራቶ
 ኩኩሜንጉረ፤ ጎታይና ክርሰቶሳ ጉት ኬን።” 27 “ኦግራን ሄሮዶሳና ካጸንጢዮሳ
 ጲላጦሳ ካእይዛብና ካእስራኤል ጎሳነ ዋታ ህታ ካታማይ እት ካሽግደቶ ቁሉክ
 ኩን ካህንዳሮ የሱሳ ጉት ጫፍን ኩኩሜን። 28 ህክና ካኮንሌራ እት ጣይተ
 ሁናካይና ፈኢታይ ካህልቶቶ ፈሊንያ። 29 ግዳና ጎታኬ! አብሰሳቶ እዬሳናክሶ
 ዴ፤ ድይልካ ሃፋራ ዱዶት ጃቡይ እዬሰን ጎሳዳንዴራውን የል። 30 ፋይሰን
 ገነታ ድሪሪሳ፤ ቁሉክ ኩን ካህንዳሮ ካየሱሳ መገ ካሳድሰሮና ባሳ ፈል።” 31
 ኤባተን ካኮእባባጋሬን ጎራታ እሶ ታኮግሬን ባንኤ ሻላጋንተ፤ ዱባና እያና ቁሉክ
 እማጋሜን፤ ሃፋራ ካዋና ጃቡይ እዬሰን። 32 እማኒል ዱባና ዋዳና ቶይና ያዳ
 ኮይ እስኣተን ግረን፤ ካእባናዬን ዱባ ራቶክየ ኳሬ ኦቴሳ ኦሌራን ኡራዎ እስኮኒዕ
 እን ካቶታተራ ማዮና ላኮግረ። 33 ኦፋራመራና ጎታ የሱሳ ጎይኮ ከያኖኮክ ጋራ
 ካኦቲ ሁናይ እቶታኖ ሆረዴን፤ እሶ ዱባ ጉት ታኦቲ ሰኖ ታዋ ግቲ። 34 እሶ
 ኦሮ ራካታ ኮና ላኮግረ፤ አላንቲና ኡልና ሌረ ምኒ ካእባናዬን ዱባ ዳዳለሬን
 ማራጋደ ኬናረን፤ 35 ማራጋደ ኬነሬን ኦፋራሜራውን ሰሳ ግረን፤ እሶና ኦዶ
 ኦዶ ጎሳዶትሳሮክ ጅልባ ማለ ሄዴዳ ግረን። 36 ታቆጲሮሳ ኦዶላይ ካግረ

የሱፋ ካእማማረ ዋዩት ኮ ግረ፤ ኦፋራመራና ኡሱ፡ “ባርናባሰ” አመን ኡማን፤ ፋረንና “ካጎጎ ኢሳሮ ኤረ” አማኖያ። 37 ኡሱና ኤረ ዳዳለረ፤ ማራጋደ ጌሰ ኦፋራማራውን ሰሰ።

5 ሀናንያ ካእማመረ እባዶት ኦርቴሳ ሳጸራነ ዋታ ኤሬ ዳዳለ፤ **2** ኦርቴሳና ማዳርተ እዳሳ ግራን ካዳዳሌራንኮ ጋምሳ ሀሰጉረ ጋምሳ ኬነ ኦፋራማራውን ሰሰ። **3** ጴጢሮሳ አደ ሃ አመ፡ “ሀናንያ! አያና ቁሉክ ጎንቦብቶና ኤሬ ታኮዳዳንተቶ ማራጋደኮ ጋምሳ ጎንሃሶን ጸላየ ዋዳናታይ ሙን ታብተ? **4** እት ዳዳላኖኮ ሆረነ ኤሬ ላኮታታተያ? ጎዳዳላተና አደ ማራጋደ ላኮገነታይ ግረያ? ሀያ፡ ሂካ እየሰ ምሲ ዋዳናታይ ቆፕተ? እት ካሶብተታ ዋያ ኳሬ እባዶ ላኮኖ” አመ። **5** ሀናንያ ሂካ ሃፋራ ጎንማሌ ኡሊ እዬ ጎየ፤ ሂካ ካማለ እባዶ ዱባ አሎ አብሳተ። **6** ዳርጋጌሳልና ኬጉረ ሬሰ ጋሼ ማሬንጉረን፤ ጌሰን ቃማሌን። **7** ሳቲ ሴድ ለተ ሮርተ ግራን፤ ኦርቴሳ ካሌሮ እየሰ ሀማሎ ግራን ኤመተ ታብተ። **8** ጴጢሮሳና፡ “ኤሬ ካኮዳዳቴታን ማራጋደ ሀናኣያን አላ ኢን ሰጊ?” አመ። ኤሰና “እ ሀናኣያን” አንተ። **9** ጴጢሮሳና፡ “ካጎታ አያና ጫፍን ምሲ ሂካማሌ ሀኢ ቶ ሌተን? ሂክማ ኤንተርካ ካቃማለራ እባዶ አባባተረ ጎጫ ጌራ፤ ኩና ጌሰረን ቃማልናራን” አመ። **10** ኤሰና ጎርሰዋ ሉቃኦቴሳ ሃገሊ ኢተ ጎተ፤ ዳርጋጌሳልና ጎታብራን ታጎተቶ ዴን፤ ሰዴን ጌሰንጉረን ኤንተርክሴ ዶሌ ቃማሌን። **11** ምን ካዋክ እባዶና ሂካ እየሰ ካማለራ ካካለ እባዶ ዱባ አሎ አብሳተ። **12** ኦፋራማራንኮክ ጋራጎ ጎሳ ኦሮ ካሞጋን ባሳክ ማላታልና ኦሳዳምራን ፈሎ ፈላማን፤ አማኒል ዱባ ሶሎሞን ካኮሰሴታሮ ጎጫ ኩኩአማ ግረ። **13** እሶ ዋታ ለሌዳሚን ካጃባተ ማየና ላኮግረ፤ ጎሌና ጎሳና እሶ አሎ ካባጃ ግረ። **14** ዋይ ካእማናራ ባባርና ሄለልና አሪ አሪ ቶቶኦትሶና አሎ አዳማ ሴተን፤ **15** ሂካኮ ካከይ ጴጢሮሳ ኤሰነ ሮራ፡ ግራን አባራንቲ ሆሰንደቴሳ ኡጫር ጉት ጎንአልቶ አማ ካሀዉአማሮ እባዶ ሳርዴድሴን ቤሳ አልጋይና ራሬይ ራድ ሁዱርሳ ግረን። **16** ካኢየሩሳሌም ጎቦቢ ካግሮ ካታማልኮ ካሀዉአማሮና ባቲክ አያና አባመረ ካአቦሳሮ እባዶ አተ ካኤመታራ እባዶ ካሞጋን ኡሱ ጎቦብ ኡናኣ ግረ፤ ካኤማተ ዱባና ፋያ ግረ። **17** ሂካኮ ካከይ ቱቃሞልኮክ ዋይቻትና ራቶ ታግቴ ታሶዶቃውል ኡና ዱባ ጋቢ አማጋንተ። **18** ኦፋራመራና አቤረን ምን ካሻኖ ታብሰን። **19** ሀሌዎ ኳሬ ኤርግቻ ካዋ አደ ሄመን ጠኤ ምን ካሻኖኮክ ኡፋ ባነ ቤሰረ፤ **20**

“ሴይን!፤ ቁሉክ ምን ካዋክ እዉዲ አላ፤ ሂካ ሃፋራ ካግር ጎሳ ዱባን ሰጋ!”
 እመ። **21** ኡል ጎጎባሬይ እሱን ጎጎሰጌሮክ ማለ ቁሉክ ምን ካዋ ታቤረን
 ጎሳ አጋልሰሳኖ ሀጋእበን። ካቱቃሞል ወይቻትና ኡሱነ ዋታ ኦግረን ኤሜተረን
 ታእይሁድ ሾንጎና ታእሰራኤል ጃርሶለ ዱባ ራቶ ኩኩይሴን፤ እፋራመራና እሶ
 ቶሰ ጎጎኬናዉን እባዶ ምን ካሻኖ ፋረን። **22** ሀንዳ ኦሴተረና ምን ካሻኖ ሴተሬን
 ኤሰ ኦሻሜሬን ላኮሄለሬን፤ እባባተን ኤሜተረን ሃ እመን፤ **23** “ምን ካሻኖ
 አሎ ጨፋመረ፤ ኦኦራራና ጎጫ ሆረ ኦኦሌሬን ዴን፤ ኖ ኡፋ ባንነ ጎታብኖ ኦሮ
 ማዮና ላኮግረ።” **24** ቁሉክ ምን ካዋ ካኦራሮ ካእጃጃረ ቱቃሞልኮክ ወይቻልና
 ሂካ ካኮማላረን ጎራታ እየሰ ማማ ግርድ እመን። **25** ኡሱ ጎራታ እባዶት ኮ
 ኤመተጉረ፤ “እሰን ምን ካሻኖ ኦታብሰቴን እባዶጃ ቁሉክ ምን ካዋይ አሌረን
 ጎሳ አጋልሰሳ ግራን” እመ ሰገ። **26** ጎርሰዋ ካኦራሮ ካእጃጃረክ ዋታዳራልኬሳነ
 ዋታ ሴተረ እበ ኬን፤ ኦኬነራን አደን ጎሳ እሶ ኤኤሞ ጎጎኤጎንኮ አብሳቴንጉረን
 እነሁኖሞን ከነን። **27** እፋራመራና ኬነንጉረን ሾንጎ ሆረ አልሴን፤ ቱቃሞልኮክ
 ወይቻትና ሃ እመ እሶ ሆሳተ፤ **28** “ሂካ መገ እሰን ጎጎአጋልሰሶንኮ ኖ እሰኑን
 አታይንሰ ሰግነነ፤ እሰን ጎእመን ኢየሩሳሌም አጋልሰሰክሰን ጋምባይሴን፤ አደና
 ሂካ እባዶትኮክ ኢጉን ኖ ጎጎሆሳምኖን የልን ዶታታን።” **29** ጴጢሮሳና ኦካለ
 እፋራመራን አደን ሃ እመን አባበን፤ “እባዶኮ ሮርሳይ ዋዉን እጃጃማኖ ዶትሳራ!
30 እሰና ጋ ጉት ሱይቴን ካላጋዴቴን የሱሳ፤ ኦዶላልትሰንኮክ ሄዶ ጎይኮ ኡሱ
 ኬሰራ፤ **31** ዋ ጎሳ ካእሰራኤልዉን ጨቦኮ ጉላ ጋላኖና ጨቦኮ ሻጋ ጎጎየሎን፤
 ዋ ዱባዉን የሱሳ መተና ካፋይሳሮ የለ መርገተሳይ ካባጃይ ጎጎሀማጽሮን የለ።
32 ኖና ሂካ እየሱን አቶና፤ አደ ዋ ኡሱን ኦእጃጃማራኑን ካሰሰራ አያና ቁሉክ
 አቶያ።” **33** ካሾንጎ ማጋናልና ሂካ ካኮማላረን ጎራታ ጎሜላን አማራተ ላጋዲን
 ዶተን። **34** እየሱን ጎእመን ጎሳ ዱባ ሆረ ካካባጃመ ኮ ሴራ ካአጋልሰሳራ፤
 ኡሱና ገማልያ ካእማማራ ፋራሳውት ሾንጎ ሆረ ኬ አሌጉረ እፋራመራን ጎር
 ቤሰረ ጎራታ ክጫሩን ጎጎፋክሰራኑን አጃጁ። **35** ሾንጎዉና ሃ እመ፤ “እሰን
 ካእሰራኤል እባዶ! ሂናኦ እባዶጃ ጉት ፈልን ካሄዴታን እየሰ እሰን ማዳር አዴሰን
 ዶትሳራ። **36** ሂታኮ ሆረነ ተዋዳሰ እሰኡቴሳ ካንጅንክ የላታኖኮ ካከይ አፋር ቦሌ
 ካሌራ እባዶ ኡሱን ዋታ ሌ። እየሱን ጎእመን ኡሱና ገነ ታእባዶይ ጎየ፤ ኡሱ ዴበ
 ካሰሰታረ እባዶ ዱባ ዳርእመ ቆፋተሳና ሄሰ። **37** እሶኮ ሃሬ ጎሳ ካኮቶታማሮ

አልማ ጋሊላት ይሁዳ ኬጉረ ካሞጋን ጎሳ አተ ቤ፤ ኡሱ ዴበ ኦሰሴታራና ሄላተረ፤ ኡሱና ገነ ታአባዶቲ ጎየ፤ ዴበ ኦሰሴታራና ዳርአመን። **38** ሃንሱን ግዳና እን ካአማራ፡ ሂናኣ አባዶጃ ኢሳጋ አሮድንቴን፤ ያዳክሶ ጎርቱን ፈሎኦትሶ እባዶኮ ጎሌን ባናዋ። **39** ዋኮ ኦኤማተራን ጎሌን እሰን እሶ ባሰን ላኮዳንዴታን፤ ሱረዋ ዋኔታ ኢንሰኢንጋማኖ ሌራ።” **40** እሶና ጎርሳ ካገማልያ አታቲረን፤ ኦፋራመራን ኡምሰሴንጉረን ቦጨሴን፤ ካላም መገ ካየሱሳ ጎንኦሎንኮ አጃጃንጉረን ጋፋሬን። **41** ኦፋራማረና መገ ካየሱሳ ማራን የራን አታይን ማንኮዳንዴን ማራን ገጌላታ ሾንጎኮ ቤን ሴተን። **42** አርጌቶ ቁሉክ ምን ካዋይና ሌረ ምን ምኒ ታገጌሎ ኦዱ ካሌራ የሱሳ ኡሱ ክርሰቶሳ ላኖ አጋልሰሳኖኮና ላላባኖኮ ሃር ላኮጋለሬን።

6 አማኒልኮኒዕ ቶቶ አዳማ ካኮሴታሬን ጎራታ ታግሪክ ሄኢ ካአዬሳረ አይሁድል ይሁዳይ ካግረ ካአይሁድ አባዶ ጉት ጉምጉመ፤ ካኮንጉንጉማራና አርጌቶ ጋርጋርሳን ካሰሳማረ ካም ሄዴዳኖኮኒዕ ፈሎ ጉት ኡናትሶክ ጋልታንተጃሉን ሰሳኖኮ ማንኮሾካቴን ማራንያ። **2** ሃኑን ኦፋራመራን ቶምንኮ ላማ ካካለ አማኒል ራቶ ኩኩይሰሬን ሃ አመን፤ “ኖ ባቦ አምሳኖኮክ ሀንዳ ሀንዳይን አማ ሃፋራ ካዋ ሀንዳኖ እሰን ላኮዶትሳሮ። **3** ሃኑን አቢላልቲ! እሰን ኦሮኮ አያና ቁሉክና ቃሩማ ካአማጋመሮ አቶ ካአዳን ካአቦ አባዶ ቶዶባ አሳባ፤ ሂካ ኦዶናት እሶን ሰንሳ፤ **4** ኖ ጎአመን ኡብና ሃፋራኬሳ ሀንዳኖይ አታይና።” **5** ሂክ አዬንሳ እሶ ዱባ ገጌላይሰ፤ አማኖና አያና ቁሉክ ካአማጋመሮ እሰጢፋኖሳ፤ ኡሱማለና ፍልጶሳ፤ ጰሮኮሮሳ፤ ንቃሮና፤ ጢሞና፤ ጰርመና ካአይሁድ አማኖ ካአታተረ ኡል ካአንጾክያክ ንቆላዋሳ አሳቤን። **6** እሶና ኬንጉረን ኦፋራመራን ሆረ ኣልሴን፤ ኦፋራመራና ኤባተን ኬንጉረን ገነትሶ እሶ ጉት ካዬን። **7** ሃፋራ ካዋና ባልአታ ሴተ፤ አማኒልኮኒዕ ቶቶና ኢየሩሳሌም ኣሎ ሞጋታ ሴተን፤ ቱቃሞልኮና ካሞጋን አማን። **8** ሀሱ ጎራታ እሰጢፋኖሳ ሰኖ ታዋይና ሁናይ አማጋመረ ጎሳ ኦሮ ካሳድሰሮ አዬንሳ ባሳክ ማላታል ፈላ ግረ። **9** ኡሱ ጎራታ፡ “ባልቹማ ኦቤራን አይሁድኮክ ምን ካኡብ” አማመ ካኡማማሮ ካአይሁድ ምን ካኡብዉን ኡና ኦሌረን ቀሬኮና እሰክንድራኮ፤ ኡሱማለና ክልቅያኮና ታእሰያ አዉራጃኮ ካኤመተራ አባዶ ኔባተጉረ እሰጢፋኖሳን ዋታ ዶጋማኖ ሀጋአበን፤ **10** እየሱን ጎአመን እሰጢፋኖሳ ካኮአዬሳረ ቃሩማና አያና አዋድን ላኮዳንዴን። **11**

ሃንሱን፡ “እስጢፋኖስ ሙሴና ዋና ሀብራ ግራን ኖ ማልነና” ካአማሮ እባዶ ሰያምሴን ኤካሰን። **12** ሂካማሌ ጎሳነ፡ ጃርሳ ካኡሌ፤ ሴራ ኦኦጋልሰሳራን ከኬሳ እስጢፋኖስ አብሰሴን ታኦይሁድ ሾንጎ ሆረ ኣልሴን፤ **13** ሂካኑና ጣራ ኦኦቶታራን አቶጆል ኬነነ፡ “ሂክ እባዶት ህታ ቁሉት ባንኤና ሴራ ኢንጋማኖ ዱዶ ላኮኢሰሮ። **14** አደና ሂክ ካናዝረት የሱሳ ቁሉክ ምን ካዋ ዲግናራ፤ ኖ ሙሴኮ ካኦታኖ ዋጋና ኢግልሰናራ፤ እመ ኡሱ እዬሳ ግራን ኖ ማልነና” እመን። **15** ኡሱ ጎራታ ሾንጎይ ሀማጼ ካግረ እባዶ ዱባ እስጢፋኖስ ትቶሰ ጎደራን በቤድቴሳ ታኤርግቻ በቤድ ኣን ሌተ እሱን ሙተ።

7 ቱኤቃዋልኮክ ዋይቻትና እስጢፋኖስነ፡ “ሂክ እን ካማላራ እየሰ ሩምያ?” እመ ሆሳተ። **2** እስጢፋኖስና ሃ እመ አባበ፤ “አቢላልትና ኦዶላልክ ማላ! አቦካን አብራመ ኡል ካካራን ሀማጺን ብያኖኮ ሆረነ ጋና መሶጸጦምያ ግራን ካካባጃ ሄዶ ኡሱን ሙተጉረ፡ **3** ‘ኡልካኮ ቤጉደ፡ ፋልካኮ ካለቤጉደ፡’ ኣን ኩን ካቱሳሮ ኡል ቶሰ ሴ’ እመ። **4** ሀሱ ጎራታ ኡል ካከለዳውኮ ቤጉረ ኡል ካካራን ሀማጼ። አቦኬሳ ካኮጎዋረ ጎራታ ዋ ካካራን ኡልኮ ቤሰጉረ ህታር እሰን ካኮግታን ኡል ኡሱ ኬነ። **5** ሀሌዎ ኳሬ ሉክ ታኮካሮ ግታት ርቲ ኡሱን ላኮሰሰረ፤ እየሰን ጎእመን ሂካ ኡል ኡሱና ኡሱኮ ሃሬ ሳኒቴሳን ርቲ የል ካሰሰናሮ ዋ ኡሱን አብድ ሰሰ ግረ፤ ህታ አብድ ካኮሰሰረና አብራመ ጋና ይሰ ሀኡሙሎን ግራንየ። **6** አደና ዋ ሃ እመ አዬሰ፤ “ሳኒታ ኡል ካናጳይ ማርትናይ ሀማጺናታ፤ አፋር ቦሌ ጌንሳ ድዩማ ኦሮ አቦሳምናታ። **7** አደና ድይ የለ ካእምናሮ ጎሳ እን ጎእመን ፍርድናራ፤ ኤሰኮና ባልቹማ ቢሬን ህታ ባንኤ እን ሄዶይሳይናራን” እመ ዋ አዬሰራ። **8** ኤሰኮና ሀማጽሳማኖኮክ ካእማቶ ሃፋራ ሰሰ፤ ሃኑን አብራመ ይሳቃ ኡሙለ፤ ታኮኡሙላመረ ታሰዴድ አሪ ሀማጽሰ፤ ኡሱማለና ይሳቃ ኤረኬሳ ያይቆባ ኡሙለ። ያይቆባና ካጎሳ ኦዶላል ካሌሮ ይሰ ቶሞንኮ ላማ ኡሙለ። **9** “ካያይቆባ ይሰና አብክሶ ዮሴፋ ቃናተንጉረነ ካድዩማ ኡል ካግብጽን ዳዳሌን፤ ዋ አደ ኡሱን ዋታ ማንኮግረ ማራን፤ **10** ራኮ ዱባኮና ኡሱ ቤሰ፤ ካግብጽ ዋኖ ፈረኣን ሆረ ጋሻናና ቃሩማ ኡሱን ሰሰ። ግብጺና ምንኬሳ ዱባ ጉት ካእጃጃሮ የለ። **11** “ኡሱ ጎራታ ግብጽና ካከነእን ኡል ዱባ ጉት ታንጂን ራኮ ካግብሰራ ኡኢና ኤመተ፤ ኦዶላልካን ካእምሮ ባቦ ሄላይን ዋተ። **12** ያይቆባ ካም ግብጽ ግራኖ ካኮማላረ ጎራታ፡ ኦዶላልካን ሆራርጀ ኡል ካግብጽ ቶሰ ፋረ፤ **13** ካላም

ካኮሴራን ጎራታ አደ ዮሴፋ አዮናትኬሳ አቢላልቴሳውን አዳሰሳት፤ ፈረኣንና
 ፋል ካዮሴፋኮክ ጋራ አዳሰ። **14** ኤስኮ አባባተጉረ ዮሴፋ አቦኬሳ ያይቆባና
 ፋልኬሳ ዱባ ኡሱ ቶስ ኬንሰሰ፤ እሶና ራቶ እባዶ ቶዶባታምኮ ከንዮ። **15**
 ሃንሱን ያይቆባ ግብጽ ሴተ፤ ኡሱና ኦዶላልካንና ኤስ ጎዬን። **16** ለፋልክሶና
 ኡል ካሴከም ቶስ አታመረ፤ አብራመ ኡል ካሴከም ካኡመር ይሰኮ ማራጋዴ
 ካእምነሮ ሀየሊ ቃማሌን። **17** “ዋ አብራመን አታበሮ አማቶ ፈሎ ካኮሀይሰናራ
 ጎራታ ካኮጋባላማረ ጎራታ ግብጽ ካግሮ ጎሳኮኒዕ ቶቶ አዳማ ሴተን። **18** ኤስኮ
 አባባተረ ዮሴፋ ካካሶን ካካለ ዋኖ ግብጽ ሬደ። **19** ኡሱና ጎሳካን ምጌቴሳይ
 ጫናቅሰ፤ ይስ ጎሳኡሙላሜ ጎሳ ጎሮና ሳርቤስ ጎሳሻፍናውን፤ ኦዶላልካን ጉት
 ሁኖመ። **20** “ኡሱ ጎራታ ሙሴና ኡሙላሙ፤ ኡሱና ዋይ ሆረ ካእዳንክ ይትት
 ሌ፤ አቦኬሳክ ምን ድግኒ ሴድ ኮኮባመ ጂናተ፤ **21** ሳርዴ ካኮሻፋመረ ጎራታ
 ኤረ ታፈርኦን ሄልተ አተጉዴ ኤረካክሴ እን ጂናሰ። **22** ሙሴና ታግብጽ ቃሩማ
 ዱባ አጋልሳተ፤ አዬሰና ፈሎይ ካአታተ ሌ። **23** “ሙሴን ጌሲ አፋርታም ካኮላረ
 ጎራታ፤ አቢላልቴሳ ካእስራኤል ይስ ድን ዋዳናቴሳይ ቆጋተ። **24** ግብጽት ኮ
 ታእስራኤል ኡናኮ ኮ ሚራኣ ገጊሳ ግራን ሙሴ ዳጉረ ኡሱ ግብጽት ላጋደ፤
 ታሚራኣንተቶ ኡናቴሳውን ሀሎ ቤ። **25** ታእስራኤል ኡናቴሳና ዋ ገነቴሳ ባልቹማ
 ካቤሰናሮ እሶ ካሻዳራን እን ኡሱን ሌረ፤ እሶ ጎአመን ሂካ ላኮሻደረን። **26** ታላም
 አሪ አደ ካእስራኤል እባዶ ላማ ኢንሰኢንጋማ ግራን ሄለጉረ፤ ዋጋርሰና ዶተረ፤
 እባዶ! ‘እሰን ላ አብላልታና ሙን እስእስ ሚራኣታን?’ አመ። **27** “ኡናቴሳ ጉት
 ሚራኣ ገጊሳ ካግረ እባዶት ጎአመን፤ ሙሴ ሻፈጉረ ሃ አመ፤ ‘ኩ ኖ ጉት ሞትና
 ካፍርዳቶ የለ ካሹመራ አዮያ? **28** ሙ ከለ ግብጻውት ጎሳጋደቶ እና ላጋዲን
 ዶታታ?’ **29** ሙሴና ሂካ ጎሳማሌ ባቃተረ ኡል ካምዲያም ማርትና ሀማጼ፤
 ኤሴና ባባር ይስ ላማ ኡሙላ። **30** “ጌስ አፋርታም አማጋመ ካኮሮራረ ጎራታ፤
 ታሲና ዋዳምኮክ ጎቦቢ ካግቶ ጋ ኦሮ፤ ካቤባሮ ሁርሰኮክ ላጫ ኦሮ ኤርግቻ
 ኡሱን ሙተ። **31** ሙሴና ካዴሮ አየሰ ሳደ፤ አየሰ ቁሌሲን ኤስራ ጎጋባላምሮ
 ታጎታ ያየ፤ **32** ‘እን ኦዶላልካክ ሄደ፤ ካአብራመ፤ ካይሳቃ፤ ካያይቆባ ሄደያ’
 አማ ግራን ማለረ፤ ሙሴና አብሳተ፤ ኤስራ ዲና ላኮዳንዴ። **33** “ጎታና ኡሱኑ
 ሃ አመ፤ ‘ሉቃኦታኒዕ ከፈሮ ቤሳ፤ እት ታኮአልተታ ባንኤ ታቁሎይተታ። **34**
 ግብጽ ካግሮ ጎሳኬኮት ራኮ ኦግራን እን ዴራ፤ ካአቦሳ ኢያክሶና እን ማለራ፤

እሶ ሃሰን ዳገራ። ግዳና ኮይ፤ ግብጽ ቶሰ አባብ እን ኩ ፋርናራ።’ 35 “ጎርታ ሁኑኡ፡ ‘ሞቲና ካፍርዳቶ የለ ኩ ኖ ጉት ካሹመራ እየያ?’ እመን ካቱፋተራን ሂካ ሙሴ ዋ ሁራ ኦሮ ካሙተሮ ኤርግቻኮክ ጋራን ሞቲና ካሃሳሮ የለ ጎሳ ካእሰራኤል ቶሰ ፋረ። 36 ኡሱና እሶ ቃጂልሳ ግብጽኮ ቤሰ፤ ግብጽ፡ በከ ኦሄልና ቃሉላቶክ ኡሊ ጌስ አፋርታሙን ካሳድሰሮ አዬንሳ ባሳክ ማላታል ፈለ። 37 “ጎታ ሄዶክሰን እን ጎንኬሰሮ ኡሱማሌዋ እሰን ኦሮኮ ካሄገሮ ኬሰሮዋ አመረ ጎሳ ካእሰራኤሊን ካአዬሰረ ሂካ ሙሴየ። 38 ኡሱና ታሲና ዋዳሚ ካአዬሰረ ኤርግቻንና ኦዶላልካንን ዋታ ቃሉላቶክ ኡሊ ታጎሳ ሀጋና ኦሮ ግረ፤ ሀንዳል ካዋና ኖ ቶሰ ሮርሰን አታተ። 39 “ኦዶላልታንና አደ ኔባተ ኳሬ ኡሱን አጃጃምን ማንኮዶታኖን ማራን ዋዳናትሶይ ግብጽ ቶሰ አባባተን። 40 አሮንነና፡ ‘ኖኮ ሆረሃይ ካሰሰሮ ዋል ኖን ኤካሰና፤ ኡል ግብጽኮ ቃጂልሰ ኖ ካቤሰሮ ሀሱ ሙሴ መ ኡሱ ጌሮ ኖ ላካንሶ’ እመን። 41 ኡሱ ጎራታ ታያይዶ ሞሰሊ ፈሊንጉሬን፡ ቶልቻን ጃርሶ ሰሰን፤ ገነትሶኒዕ ፈሎይና ገጌላተን፤ ቡራቄን። 42 ዋ አደ እሶኮ ፋክመ ካዳሩረ ባራጃሉን ጎንሄዶይሳናውና ሮርሰ እሶ ሰሰ፤ ህክና ካሄገሮል ማጻፋይ ሃ አማመ ጎንጻፋመሮክ ማለ ጉዳተ፤ “እሰን ካእሰራኤል አባዶ ኦሌቴታን ጌስ አፋርታሙን ቃሉላቶክ ኡሊ ታኮግቴኒ ጃርሶና ሜባ ኢን ሰሴቴን? 43 ሱረዋ ሄዶይሳዬን ካፈላተታን ታሞሎክ ዳሰና ቶልቻክሰንክ ካሬንፋ ባራጃ ጦቂ ጦቂሴን፡ ሃንሱን አንና እሰን ጎንባቃታውን የልናራ፤’ ባብሎንኮ ጋማ ሆሮርናራ። 44 “ዋ ሙሴን ጎንቱሰሮክ ማሌና ጎንአጃጃሮክ ማለ ታማዳራንተተ ታአቶ ዳሰ፡ ኦዶላልካንን ዋታ ቃሉላቶክ ኡሊ ግቴ። 45 ዋ እሶ ሆረኮ ካሆሮረሮ አይዛብኮክ ኡል ካኮኤላሬን ጎራታ ኦዶላልካን ህታ ታአታቴራን ዳሰ ኢያሱነ ዋታ ኤሰራ አተን ታቤን፤ ካዳወተ ጌስ ታጌሮና ኤሰ ግቴ። 46 ዳወተና ዋይ ሆረ ጋሻና ሄላታኖይ ካያይቆባ ሄዶ ካኮግሮ ሞን ጎንማዳሮ ኤባተ፤ 47 እየሱን ጎአመን ካኮግሮ ሞን ኡሱን ካማዳረረ ሶሎሞንየ። 48 “ሀሌዋ ኳሬ ዱባንኮ ጦቂ ካአመ ዋ ገነ ታአባዶ ካማዳራመሮ ሞን ኦሮ ላኮባራሮ፤ ህክና ካሄገሮት ሃ ጎንአመሮ ማሌያ፤ 49 “ዳሩረ ኮርፍንጀኬታ፤ ኡልና ሉቃኦት ማንኮፎልሳታራንያን፤ ሀያ ሞሰክ ሞን እሰን እን ማዳርናታን? አማራ ጎታ፤ ጎርቱን እን ፎልሲ ታልናታ ኤቲ ባንኤታ? 50 ሂካ ዱባ ታፈልተታ ላገነቴቶላ? 51 “እሰን ዋዳናትሰን ኦኮንዱደታና! ነበቦኦትሰን፤ ኦኮንማሎን! ኦዶላልክሰን እን አያና

ቁሉክ እርጌቶ ነባታን። 52 ካሄገሮል ኦሮኮ ኦዶላልክሰን ካሆሮኝ ግራን እየያ ካግራ? ቁሉክኮት ሌመቶ ጣዬን ኦኤዬሰራና ላጋዳታን፤ እሰን ግዳ ኡሱ ሮርሰን ሰሰን፤ ላጋዳን። 53 ኤርግቻኮክ ጋራን እሰኑን ካሰሳመሮ ሴራ አታቴታን ኳሬ ላኮኦራቴታን።” 54 ታሾንጎ ሀጋና ጉት ካግረ አባዶ ሂካ ካኮማላረን ጎራታ ኣሎ እማራቴን፤ ኢልኮ ቃኒንሳቴን ኬን። 55 እስጢፋኖሳ ጎአመን እያና ቁሉክ እማጋመረ ዳሩር ቶስ ትችሰ ጎዴ፤ ካባጃ ታዋ ኡሱማለና፤ የሱሳ መርጌ ታዋይ አሌ ግራን ዳጉረ። 56 “ሂክማ ዲያ” “ዳሩር ባናተደ፤ ኤረ ካእባዶ መርጌ ታዋይ አሌ ግራን እን ድያራ” አመ። 57 ኡሱ ጎራታ ታአቲ ያየ ኦካ ነበቦኦትሶ ሁጭሳቴን አባቴረን ኡሱ ማንኮግሮ ቶስ ራቶ ቲዬን፤ 58 ኡሱ አቤረን ካታማኮ ሳር ቤሰን ሻፌን፤ ኤኤሞና ኤጋኖ ሀጋአበን። ሂክ ካኮላረ ጎራታ ኤሰ ኦግረን አቶጆልና ሳርሰክሶ ሳዉላ ካአማማረ ዳርጋጌሳትኮኒዕ ሉቃ ሄገሊ ካዬን። 59 እስጢፋኖሳና ኤኤሞ ኤጋማ ግራን፤ “ጎታ የሱሳ ኔፎቴ አታ” አመ ኤባተ። 60 ኤሰኮና ግልቢሰጉረ ያየ ታአቲይ፤ “ጎታ! ሂክ ጨቦ እሰን አሮቶትተ” አመ ኦኬ፤ ሂካ አመ አባባተረ ጎዮ።

8 ሳዉላና ጎይ ካእስጢፋኖሳ እሰአተ ግረ። ኤሰ አሪ ኢየሩሳሌም ካግረ አማኒሉን ካአቲ ሆሮራማኖ ኬ፤ ኦፋራመራን ኳሬ አማኒል ዱባ ይሁዳና ሳማርያኮት አዉራጃ ዱባ ዳራማን። 2 ዋ ካአብሳታረ አባዶና እስጢፋኖሳ ቃማለ፤ አደና ኣሎ ኡሱን ኦተ። 3 ሳዉላና አደ አማኒል ባሰን ሙዋተ ኬ፤ ሞንኮ ሞን ማራሙራ ባባርና ሄለል ጌተ ቤሰ ሞን ካሻኖ ታብሳ ግረ። 4 ካዳራመረ አባዶና ታኮሴተ ባንኤ ዱባ ሃፋራ ካዋ ላላበ፤ 5 ፍልጶሳና ቶ ታሳማርያ ካታማ ቶስ ዳገረ ጋራ ካክርሰቶሳ ላላበ። 6 ጎሳ ካሞጋና ፍልጶሳ ካኤሰሮ ማላና ኡሱ ካፈለሮ ማላታል ዲያ፤ ዋዳና ቶ ሌ ጫቃሳ ግረ። 7 ባቲክ እያናልና እያ ካሞጋን አባዶኮ ቤ፤ ካሞጋን ናፋለሳልና ካኤሳረና ፋዬ፤ 8 ሂካኮ ካከይ ኤሰ ካታማትና ኦአቲ ገጌሎ ሌን። 9 አየሱን ጎአመን ሂታኮ ሆረን ካታማት ኦሮ ሞራ ካሳማርያ አባዶ ዱባ ካማምሰረ ሰሞና ካአማማረ አባዶት ኮ ግረ፤ ኡሱና እስኦቴሳ ካአቲ አባዶ ኣን የላተ ቶታታረ። 10 ክጫር ካንጂን አባዶ ዱባ፤ “ሂክ አባዶት ካአቲ አማመ ካአዳሳመሮ ሁና ካዋያ” አማ ዋዳናኮ ኡሱ ማላ ግረን። 11 ጎራታ ካሞጋንኮ ሀጋአበረ ፈሎ ኦሞሩ ኦቴሳይ ማንኮማምሳረ ማራን ክንትቢ አበን ኡሱ ዴበ ሰሴታ ግረን። 12 አየሱን ጎአመን ፍልጶሳ ጋራ ካዋኮክ ዋኖናትና ጋራ

ካየሱሳ ክርስቶስክ መገ ካላላበሮ ዋንጋላ ማለፊን አታታኖይ ባባርና ሄለልና ጣማቃመ፤ **13** ሰዋናና መተኬሳውን እንሄሶኒ፤ ጣማቃመ፤ ኡሱና ፍልጶሳ ዴበ ሴተ፤ ካፈላማሮ ማላታልና ካኦቲ ባሳ ዴንጉሬን ሳደን። **14** ኢየሩሳሌም ኦግረን ኦፋራመራን ታሳማርያ ካታማክ እባዶ ሃፋራ ካዋ አታታኖ ካኮማላረን ጎራታ፤ ጴጢሮሳና ያንሳ እሶ ቶስ ፋረን። **15** እሶና ታሳማርያ ካታማ ካኮግያረን ጎራታ እያና ቁሉክ ጎንኦታናውን ካሳማርያ እባዶን ኤባተን፤ **16** አላንቲና ኡሱ ጎራታ ካጎታ የሱሳክ መገ ጣማቃመ ግረ ኳሬ ጋና እያና ቁሉክ ማዮ ጉቲና ላኮዳገረ። **17** ሃንሱን ጴጢሮሳና ያንሳ ገነትሶ ጉት ካዬን፤ እሶና እያና ቁሉክ አታቲን። **18** ሰዋናና ኦፋራመራን ገነትሶ አማኒል ጉት ካኮካሬን ጎራታ እያና ቁሉክ እሶን ሰሳማኖ ዴጉረ ማራጋደ ኬነረ፤ እሶን ሃ አመ፤ **19** “ገነቱ እን ጉት ጎካየ እባዶ ዱባ እያና ቁሉክ ጎንኦታሮ ሂካ ኦዶናት እና ሰሳ” አመ። **20** ጴጢሮሳና አደ ሃ አመ። “አላቦ ካዋ ማራጋዴይ እምንን ቆፕተታ፤ አትና ማራጋደካና ራቶ ባ! **21** ዋዳናታ ዋይ ሆረ ቱኩልት ማንኮላናዋተ ማራን አት ሂካ ሀንዳኖይ ቆባ ጎርቱን ኢጣ ላኮአብቶ። **22** ግዳና ህታ ሜላን እስደ ጨቦኮ ጉላ ጋልጉደ ጎታ ቶንሳ ኤባ፤ ዋዳሳ ዋዳናታክ ያዳ ሀሄሶ ካአማምሮ ሌራ፤ **23** አላንቲና አት አታቤ አማጋንተደ ካሜላን ሳንሳላታይ ካአባንተቶ ኩ አን ደያራ።” **24** ሰዋናና አባበረ፤ “እስን ካአዬሰታን እየሰኮ ኮና እን ጎንጌኖንኮ ጎታ እን ኤባየን” አመ። **25** ጴጢሮሳና ያንሳ ካጎታ ሃፋራ አቶቴሬና አዴሰስን ሰገን አባባተረን፤ ካሞጋን ካሳማርያ ማማኒ ዋንጋላ ላላባ ኢየሩሳሌም አባባተን። **26** ካጎታ ኤርግቻ ፍልጶሳነ፤ “ክንጉዴ ምና ታሄገሌን ታኢየሩሳሌም ካታማኮ ታጋዛ ካታማ ቶስ ካዳግሳሮ ቃሉላቶክ ራኔ ሴ” አመ። **27** ኡሱና ኬጉረ ሴተ። ታቶጲያ ኦር ዋኖ ሄንዴክ ታአማማቲን ኡራዋኦትሴዉና ዱሩማትሴ ዱባን ኦዶናት ካአባናየክ ካቶጲያ ሙሬሳት ሄለ። ሂክ እባዶትና ሳጋድን ታኢየሩሳሌም ካታማ ቶስ ሴተ ግረ። **28** ኡሱ ኡልኬሳ አባባተ ሴታ ግራን ጎንገ ታፋራዲ ሀማጼጉረ ካሄገሮ ካኢሰያሳ ማጻፋ ናባባ ግረ። **29** እያና ቁሉክና ፍልጶሳነ፤ “ሴ፤ ሀሱ ፋራድ ቶስ ጋባላም” አመ። **30** ፍልጶሳና ሳመ ኡሱ ፋራድ ቶስ ሴተ፤ ሙሬሳት ካሄገሮ ካኢሰያሳ ማጻፋ ናባባ ግራን ማለረ፤ “አት ካናባባቶ ማላባታ?” አመ። **31** ሙረሳትና፤ “እን ፋር ካሰግራ እባዶ ሀግኖን ምሲ እዴሰን ዳንዳራ?” አመ፤ ኡሱና ፋራድ ቶስ ኤመተረ ዋታ ጎንሀማጽሮን ፍልጶሳ ኤባተ። **32** ሙረሳትና ናባባ ታግረ ሃፋራ

ካዋኮት ባንኤ ህታታ፤ “ኡሱና ኤናኣምን ካዋዳማሮ እዳድ አንያ፤ ኦጎሮ ጎሳ ግራን ጫልኢ ካእማሮ እዳድ አን፤ ኡሱና እዬሰን ህኢ ላኮባናተረ። 33 እስክቴሳ የራሳተ፤ ካሩም ፍርዳና ኡሱን ላኮሰሰን፤ ኔፎቴሳና ኡልኮ ባተታ፤ ሳኒቴሳ ማራን እዮያ እዬሰን ካዳንዳራ?” 34 ሙረሳትና አባባ ፍልጽሳ፤ “ካሄገሮት ሂካ ካኮንእዬሰራ እዮ ማራንየ? እስክቴሳ ማራንያ፤ ሙ እባዶ ካካለ ማራንያ? ማጋኔ እን ሰጊና” አመ። 35 ፍልጽሳ እዬሰ፤ ሂካ ማጻፋኮ ባንኤ ቶ ሀጋእበረ ካየሱሳ ዋንጋላ ላላበ። 36 እሶ ሴታ ግራንቲ በከ ማንኮግራን ባንኤ ጌን፤ ሙረሳትና፤ “ህኒዕማን በከ ህታኒ ግራንዋ፤ ሀያ ጎጎጣማቃሞንኮ እን ካትራራ መያ?” አመ። 37 ፍልጽሳና፤ “ዱዶት ዋዳና ጎእማንተ ጣማቃሞን ዳንዳታ” አመ። ሙረሳትና፤ “የሱሳ ክርሰቶሳ ኤረ ካዋ ላኖ እን እማናራ” አመ አባባ። 38 ፋራንዳ ጎጎእልሮ እጃጃ፤ ኤሰኮና ላማ በከ ቶሰ ሴተን፤ ፍልጽሳና ሙሬሳት ጣማቁ። 39 በከኮ ካኮበያረን ጎራታ፤ ካጎታ እያና ጎርሰዋ ፍልጽሳ ኣተ፤ ሙረሳትና ኤሰኮ አባባተረ ላኮዴሮ፤ ጎሌና ገጌላታ ሰሴታን ሆረዴ። 40 ኤሰኮ አባባተረ ፍልጽሳና እዞጦስ ካእማማሮ ኡሊ ሙተ፤ ታቅሳርያ ካታማ ታ ጌሮ፤ ካታማል ዱባ ሴታ ዋንጋላ ላላባ ግረ።

9 ሳዉላ አደ ጎታኮ እኣጋልሳታራን ላጋዲን ማንዳ ቱቃሞልኮክ ዋይቻት ቶሰ ሴተ። 2 ካጎታ ራድ እስሰታሬን ባባርና ሌረ ሄለል ኤሰ ጎሄሎ ሸየጉረ ኢየሩሳሌም ቶሰ እት ሴይን ጎጎዳንዴሮ፤ ደማስቆ ካግሮ አይሁድኮክ ሞን ካኤብጃሉን ዳብዳቤ ጎጎሰሰራውን ቱቃሞልኮክ ዋይቻት ኤባተ። 3 ደማስቆ ቶሰ ጊን ጋባላማ ግራን ኢፋና ዳሩርኮ ደራኣ ኡሱ ማራሙረ ሀንቃየ። 4 ኡሱና ኡሊ እዬ፤ ሀሱ ጎራታ “ሳዉላ፤ ሳዉላ፤ መዉን እን ሆሮራታ?” ታእማቶ ያየ ማለ። 5 ሳዉላና፤ “ጎታክ፤ እት እየታ?” አመ። ኡሱና ሃ አመ፤ “አንና እት ካሆሮራቶ እን የሱሳያ። 6 ግዳ ክንጉዴ ካታማ ቶሰ ታብ፤ እት ፈልን ካዶትሳራ ኤሰ ኩን እን ሰጋምሮዋ” አመ። 7 ሳዉላን ዋታ ሰሴታ ኦግረን እባዶጃ ያየትሶ ማላና ኳሬ፤ ማዮና ድያናዋትኮ ካከይ፤ እሶ ህኢትሶ አባተን አለን። 8 ሳዉላና ኡሊ ማንኮኢየረኮ ኬጉረ ኢልኦ ኮና ድን ላኮዳንዴ፤ ሃንሱን እባዶጃ ገነቴሳ አበን ገጌሳ ደማስቆ ገግሰን። 9 አሪ ሴንዳ ኢልኦ ባየ፤ ባቦና በከና ህኢ ላኮአበ። 10 ደማስቆ ሀናንያ ካእማማረ ኮ የሱሳኮ ካእጋልሳታረ ግረ፤ ጎታ ራጋይ፤ “ሀናንያ!” አመ ኡመ። ኡሱና “ዬ ጎታኬ፤” አመ። 11 ጎታና፤ “ክንጉዴ

ቱኩልክ ራ ካእማማሮ ራድ ይሁዳ ካእማመሮ እባዶትኮክ ምን ሴ፤ ኤሴና ሳዉላ ካእማማራ ኮ ኡል ካጠርሰሰክ እባዶት ዋ ኤባታ ግራ ዶት እመ። 12 እየሱን ጎእመን ሀናንያ ካእማማረ እባዶት ኡሱ ማንኮግሮ ታብረ ገነቴሳ ኡሱ ጉት ካካይናሮና ኢልኦ ኦቴሳ ባናማኖ ሳዉላ ራጋይ ዴ።” 13 ሀናንያ እባበረ፤ “ጎታኬ፤” “ሂክ እባዶት ኢየሩሳለም ካግሮ እማኒል ጉት ኤግታት ሚራኦ ጌግሰሮ እባዶ ካዋጋንኮ እን ማለራ፤ 14 ህታራና ካኮንኤመተራ መገካ ኦኡማታራን ዱባ ሺን ካቱቃሞል ዋይቻልኮ ኦዶናት አታተረያ” እመ። 15 ጎታና፤ “ሴ፤ ሂክ እባዶት እይዛብልና ዋኖላል ሆረ ኡሱማለና ካእስራኤል ጎሳ ሆረ መገኬ ጎጎእዴሰሰሮ እን ካአሳባየሮ ሁኬያ፤ 16 አንና መገኬ ማራን ኤግታት ራኮ አታይን ዶትሳሮ እን ኡሱን ቱሰናራ” እመ። 17 ሀናንያ ሴተጉረ፤ ኡሱን ካሰጋመሮ ምን ታበ፤ ሳዉላ ጉት ገነኖኦቴሳ ካየረ፤ “አቢኬ ሳዉላ፤ አት ሂታራ ኤመታ ግራን ራድ ኩን ካሙተረ ጎታ የሱሳ ኢልኦ ኦታ ጎጎዴንደናዉና፤ እያና ቁሉክ ጎጎእማጋንቶ እን ኩ ቶስ ፋረራ” እመ። 18 ጎርሰዋ ኢኦ ኦሳዋላኮ ሆንቆፍ አንክክ ኮኮ እዬ፤ አባባተ ዲና ዲንዴ፤ ኬና ጣማቃመ። 19 ባቦና አመጉረ አታተ። ሳዉላ ደማስቆ ኦግረን እማኒልን ዋታ አሪ ኡጫር አዳላተ። 20 ጎርሰዋ ሳዉላ የሱሳ ኤረ ካዋ ላኖ እይሁድኮክ ምን ካኤብጆሊ ላላባኖ ሀጋእበ። 21 ካማለራ ዱባና ማማ፤ ሂክ እባዶት “ኢየሩሳለም ሂካ መገ ካኡማሮ ዱባ ካባሳረ ላኮኖያ? አደና ሂታራ ካኮንኤመተራ እሶ ሺረ ቱቃሞኮክ ዋይቻል ቶስ ጌሰን ላኮኖያ?” እመን። 22 ሳዉላ ጎእመን አታታ ሴተ፤ ደማስቆ ኦግራን እይሁድን የሱሳ ኡሱ ክርሰቶሳ ላኖ አቶ ሰሳ ህኢ አብሰሳ ግረ። 23 አሪ ታንጂንኮ አባባተረ፤ እይሁድ ሳዉላ ላጋዲን ጦየ፤ 24 ኡሱ ጎእመን ሀልቻክሶ አዴሰ፤ እሶና ኡሱ ላጋዲን ካካታማ ካራ ኦራ ግረን፤ 25 ኡሱ ዴበ ኦሰሴታሬን ጎእመን ሄመን ኤሜተረን ታካታማ ታግምቦ አልኮት ማስኮትን ዳቾይ ኡሱ ዳግሰን። 26 ሳዉላ ኢየሩሳለም ካታማ ቶስ ኮኮኤመተረ ጎራታ፤ እማኒልን ዋታ ለሌዳሚን ሄደ፤ እሶ ጎእመን ሩምና ዋ ካእማናሮ ላኖ ማንኮአብዳታና ዋተን ማራን ዱባና አብሳተን። 27 ሀሌዋ ኳሬ ባርናባስ ሳዉላ ኦፋራመራን ቶስ ገሰረ፤ ሳዉላ ሴቶ ጉት ግራን ጎታ ምሲ ዴሮና ጎታ ኡሱን ምሲ አዬሰሮ ኡሱማለና፤ ደማስቆይ መገ ካየሱሳ ምሲ ጃቡይ ላላበሮ እሶን ሰገ። 28 ሃንሱን ሳዉላ እሶ ዋታ ሀማጼ፤ ኢየሩሳለም ማራሙራራ መገ ካጎታይ ጃቡይ አዬሳ ግረ። 29 ሄኢ ታግሪክ ካአዬሳረ እይሁድ ዋታ

እዩሳና ዶጋማ ግረ፤ እሶ ጎአመን ኡሱ ላጋዲን ዶታ ግረን። **30** አማኒልና ሂካ ኮኮአዴሳሬን ጎራታ፤ ቅሳርያ ቶስ ዳግሴረን ጠርሰሰ ቶስ ኡሱ ፋረን። **31** ኡሱ ጎራታ ይሁዳ፤ ጋሊላይና ሳማርያይ ካግራ አማኒል ዱባ ኖጎዳ ግራኖ ሀጋአበ፤ እታተ። አደና ዋ አብሳታ ሰሴታና አያና ቁሉክ ጎጎአ ቶቶይና ጂናታ ሴተ። **32** ጴጢሮሳና ኡልኮ ኡል ማራሙራ ካኮግረ ጎራታ፤ ኡል ካሊዳት ካታማይ ካግረ አማኒል ድን ዳገ። **33** ኤሴና ኤንያ ካአማማረ፤ ጌሲ ሰዴዱን አልጋይ ሺለ ካግረ ናፋላሳክ አባዶት ኮ ሄለ። **34** ጴጢሮሳና፡ “ኤንያ!” “የሱሳ ክርስቶስ ኩ ፋይሰሮዋ፤ ክንጉዴ አልጋታ ኬሳ” አመ። ኤንያና ሳመ ፍጣ አመ ኬ። **35** ታሊዳ ካታማይና ሳርናይ ዶግረን ዱባ ኡሱ ዴንጉሬን ጎታይ አማኔን። **36** ታሊዮጴ ካታማይ ጣብታ ታአማማተ ዋ ታአማናተ ሄሌትቲ ቶ ግቲ፤ ሄኢ ታግርኪና “ዶርቃ” አማኖ ጎሌሮ ፋረንና “ሲቄ” አማኖያ። ኤሰና አርጌቶ ፈሎ ኦኢዳን ፈላና ሀየሳል ጋርጋራ ግቲ። **37** ኡሱ ጎራታና ኤሰ ሀወአንተ ጎተ፤ አባዶና ሬሰክሰ አልሰረ ጉንተ ታግቶ ክፍሊ ካዩን። **38** ታሊዳ ካታማ ኡል ካኢዮጸን ኤን ማንኮግቲ ማራን አማኒል ጴጢሮሳ ካታማ ታሊዳ ግራኖ ካኮማላረ ጎራታ፤ አባዶ ላማ ሀንዳ ፋሬንጉሬን፡ “ማጋኔ ኖ ቶስ ሳሞ ኮያ” አመን ኤባተን። **39** ጴጢሮሳና ኬጉረ እሶ ዋታ ሴተ፤ ኤሰራና ካኮግያረ ጎራታ ጉንተ ታግቶ ክፍሊ ቶስ ጌሰን። ጋልታንተጆል ዱባ ዶርቃ እሶን ዋታ ታኮግቲ፤ ካፈልተቶ ቃሞሰጆልና ሁጆል ቱቱሳ ማራሙረን ኦታ ግረን። **40** ጴጢሮሳና ዱባ ክፍሊኮ ቤሰጉረ ግልበሰ ኤባተ፤ ሬሰ ቶስ አባባተጉረ፡ “ጣብታ! ክ!” አመ። ኤሰና ኢልኦኦትሴ ባናተ፤ ጴጢሮሳና ካኮደያተ ጎራታ ጦቂአንተ ሀማጺተ። **41** ኡሱና ገነትሴ አበ ኬሰ፤ ዋ ኦአማናራን ጋልታንተጆል ኡመጉረ ኔፎን ታግቶ እሶን አባበ ሰሰ። **42** ሂክ እዩሰና እዮጸ ዱባ ማልሳመ፤ ካሞጋን አባዶና ጎታይ አማኔ። **43** ጴጢሮሳና ሰሞና ካአማማረ ኮ ጋልባ ካሆቆቃረን ዋታ እዮጸ አሪ ታንጂን ሀማጼ።

10 ቅሳርያይ ካግረ፤ ኢጣልያውን ታኦላማቶ ኡናኮክ ካቦሎ ዋይቻ ካሌራ ቆርኖሎሳ ካአማማረ አባዶት ኮ ግረ። **2** ኡሱና ካምን አባዶኬሳ ዱባን ዋታ ፈሎ ኦአያናይ ካአታታረና ዋ ካአብሳታረ አባዶትየ፤ ሀየሳን ኮኮ ካሰሳረና አርጌቶ ዋ ካኤባታረየ። **3** አሪ ቶ፡ አሪኮ ሳቲ ሳጋልኮክ ግታ ኤርግቻት ካሞ ራጋይ ኡሱ ቶስ ኤመተረ፡ “ቆርኖሎሳ!” አማ ግራን ታቻ ኡሱን ሙተ። **4** ቆርኖሎሳና ኔምን ዋታ ትቶስ ዲያ ግራን “ጎታ፤ መያ?” አመ። ኤርግቻትና ሃ አመ፤ “ኤብና ሀየሳን አት

ካሰሳታ ኮኮካ ሻዳማኖ ሌ ዋ ቶስ ጌራ። **5** ግዳና እባዶ እዮጳ ቶስ ፋርጉደ
 ጴጢሮሳ ካእማማረ ሰሞና ኬንሰስ፤ **6** ኡሱና ላቡ ግሪ ካግሮ ጋልባ ካሆቆቃሮ
 ምን ካሰሞና ማርትና ሀማጼራ።” **7** ቆርኖሎሳና፡ ካእጼሰሰራ ኤርግቻት ኡሱኮ
 ካለ ቤ ካኮሴታረ ጎራታ፤ ኡሱን ኦሀንዳሬንኮ ላማ፤ ኡሱማለና ካእያና እጼሲ
 ካእታተሮና ኡሱን ካኡብዳመ ካሌሮ ዋታዳራት ኮ ኡምሰሰረ፤ **8** ካሌሮ እየሰ
 ዱባ ሰገ እባባተረ እዮጳ ቶስ እሶ ፋረ። **9** ካፋራመረ እባዶና ታላም አሪ ካታማት
 ቶስ ጎጎጋባላመን፤ ጴጢሮሳ አሪ እሳሳ ካኮላረ ጎራታ፤ ኤባይን ጉንተ ካግሮ ፎቂ
 ቤ። **10** ሀሱ ጎራታ ጴጢሮሳ ማንኮኤኤረ ማራን፤ ካእምሮ ኮኮ ዶታተ፤ ባቦ
 ኤካታ ግራን ኡሱ ሳላልሰረ ራጋ ዴ፤ **11** ዳሩርና ባናተደ ቶ ታንጂንት ሆጮ እን
 ካላራ ምና አፋርን እባመረ ኡሊ ዳጋ ግራን ዴ። **12** ሆጮ ጉት ሉቃ አፋር ካእቦ
 ካለካለክ ሱላለ፤ ኡሊ ታጊታማቶ መጣና ካቡባረ ክምብርጆል ግረ። **13** ኡሱ
 ጎራታ፤ “ጴጢሮሳ! ክ፤ ሂናኣ ኤናኣ አም” ታእማታ ያየ ኡሱን ማልሳንተ። **14**
 ጴጢሮሳና አደ፤ “ጎታኬ፤ ሂክ ሃ ሊን ላኮዳንዳሮ፤ እን ቁሉክ ካሌኖን ጎርቱን
 ባቲክ ኢጂ አመ ላካሶ” አመ። **15** ሀሴ ያየ አደ ካላም ኡሱን ማልሳንቲደ፤ “ዋ
 ካሙጭሰሮ አት ባቲክ እን እሮቶትተ” አመ። **16** ህክና ኡሱን ሴድ ጋለ ሰጋመ፤
 ሆጮና ጎርሰዋ ዳሩሪ ቶስ አታንተ። **17** ጴጢሮሳና ታዴሮ ራጋኮት ፋሬኑን አሎ
 ጫናቃመረ ኤለ ሄገል ሄዳ ግራን፤ ቆርኖሎሳ ኦፋረረ እባዶጃ ምን ካሰሞና
 ዶተን ካኮሄላሬን ጎራታ ኡፋ ዶሌ አሌን፤ **18** ያየትሶና ጦቂሴንጉረን፤ ጴጢሮሳ
 ካእማማረ ሰሞና ኤሰ ግራኖ ሆሳተን። **19** ጴጢሮሳ ካራጋ ጋራ ኤለ ሄገል
 ሄዳ ግራን፤ እያና ቁሉክ ኡሱን ሃ አመ፤ “ሀኒሶማ፤ እባዶጃ ሴዶ ኩ ዶታራን፤
20 ሃንሱን ክንጉዴ ዳግ፤ እሶ ካፋረራና እን ማንኮሌ ማራን እንሄዳኖኒ እሶን
 ዋታ ሴ።” **21** ጴጢሮሳና ዳገጉረ፤ “ሂክማ፤ እሰን ካዶታታን እባዶት እንያ፤
 ሀያ እሰን ታኮንኤመቲታን ሃጃ መታ?” አመ። **22** እባዶጃና፤ “ኖ ካኮንኤማነና
 ቆርኖሎሳ ካእማማረ ካቦሎ ዋይቻት ዶለኮያ፤ ኡሱና ቁሉክና ዋ ካእብሳታሮ፤
 ጎሳ ካእይሁድ ዱባ ዶሌ ካካባጃመ እባዶትያ። ኩ ምን ቶስ ጎጎኬኖና አት
 ካእማቶ ጎጎማሎ ቁሉክ ኤርግቻ ኡሱን ሰገራ” አመን። **23** ጴጢሮሳና እባዶ
 ማርትሳይን ምንኬሳ ታብሳተ። ጴጢሮሳ ታላም አሪ ኬጉረ እሶ ዋታ ሴተ፤ ኡል
 ካእዮጳኮ ታኤመተተ እቢላል ቶቶና ኡሱን ዋታ ሴተ፤ **24** አሪ ታላሚ ታቅሳርያ
 ካታማ ታቤን። ቆርኖሎሳና ፋልኬሳና ሳትላልቲሳ ኩኩይሰረ ጴጢሮሳስ ኦራ

ግረ። 25 ጴጢሮሳ ምን ካኮታባረ ጎራታ ቆርኖሎሳ ኡሱ ቆጶተ፤ ሉቃጵፍሳ ጉት
 ኢየረ ሳጋደ። 26 ጴጢሮሳ ጎአመን፡ “አንና ኩ አንክክ እባዶያ” “ክ አሊ!”
 አመ ኬሰ። 27 ጴጢሮሳ አዬሰሳ ኡሱነ ዎታ ጎታብሮ እባዶ ካሞጋን ኩኩመ
 ግራን ዴ፤ 28 ሃ አመ፤ “እይሁድት ኮ ታካለ ኡና ዎታ ጎሳሌሮ ጎጎጋባላምሮ
 ሴራካን ፈኢ ካሰሶን ላኖ እሰንዋ ካሳን፤ እየሱን ጎአመን እን ማዮና ባቲክ ጎርቱን
 ቁሉክ ካሌኖንያ እን ጎጎአምንኮ ዋ ኢን ቱሰራ፤ 29 ሃንሱን እን ኮኮሎማመረ
 ጎራታ፡ እንሄዳኖኒ ኤመየራ፤ ጎርታ፡ መዉን እሰን እን ኡምቲታን አዴሰን ዶታራ”
 አመ። 30 ቆርኖሎሳና ሃ አመ፤ “አሪ አፋርኮ ሆረን ሂካ ጎራታ አሪኮ ሳቲ ሳጋሊ
 ምንኬይ ሀማዬረ ዋ ኤባታ ግረ፤ ደራእና ካሀንቃሮ ሳርስ ካሳርሳተራ እባዶት
 ኮ እን ሆረ አሌጉረ፤ 31 ኢን ሃ አመ ‘ቆርኖሎሳ! ኤብካ ማልሳመራ፤ ዋዉን
 ካሰሳቶ ሻዳማኖን ዋ ቶስ ጌራ። 32 እባዶ ኡል ካኢዮጼ ቶስ ፋርጉደ ጴጢሮሳ
 ካአማመሮ ሰሞና ኬንሰስ፤ ኡሱና ላቡ ግርዲ ካግሮ ጋልባ ካሆቆቃሮ ካሰሞና
 ምኒ ማርትና ሀማዬራ።” 33 አንና ጎርሰዋ ሀንዳ ኦጌግሳሬን ኩ ቶስ ፋረ፤ አትና
 ኤመታኖይ ታኢዳን ፈልተታ። ጎርታ ኖ ዱባና ጎታ ኩ ካእጃጃሮ አት ኖን ጎሰጊተ
 ማልን ዋይ ሆረ ግና።” 34 ጴጢሮሳና ሃ አማ አዬሳኖ ሀጋአበ፤ “ዋ ማዮና
 ካኡሉልሶን ላኖ ሩምና እን አዴሰራ፤ 35 እየሱን ጎአመን ዋ ኡሱ ኦአብሳታራዉና
 ቁሉማ ኦፈላራን ዱባ ማኤት ኡናኮ ጎሌና አታታራ። 36 ካዱባ ጎታ ካሌሮ
 የሱሳ ክርሰቶሳ ኖንዳ ላላባ ሂካ ሃፋራ ይሰ ካእስራኤል ቶስ ፋረ። 37 ያንሳ
 ካላላበሮ ጥንቃታኮ አባባተረ ኡል ካጋልላኮ ሀጋአበረ ይሁዳ ዱባ ካሌሮ እሰን
 ካሳንዋ፤ 38 ዋ ካናዝረት የሱሳ እያና ቁሉክይና ሁና ሸግደ፤ ኡሱና ዋ ኡሱነ ዎታ
 ማንኮግረ ማራን ማንኮጌ ዱባ ታኢዳን ፈላ ካዱርሳ ኦዶናቲ ሃገሊ ኦግረን ዱባ
 ፋይሰ። 39 “ኡሱና ካእይሁድ ኡሊና ኢየሩሳሌም ካፈለሮን ኖ አቶና፤ አደና እባዶ
 ጋ ጉት ኡሱ ሱየ ላጋደ። 40 ዋ ጎአመን ታሴድ አሪ ጎይኮ ኡሱ ኬሰ፤ እባዶን
 ጎሳሙትሮና የለ፤ 41 ኡሱ ካኮሙተራና እባዶ ዱባን እንሌኖን ግራን ጎይኮ ኬ
 አባባተረ ኖ ኡሱነ ዎታ ኦአምነኖና ኦጣምነኖን፡ ዋና ጣየ ኦአሳባተሮ ኡሱን አቶ
 ኦሌነኖ ኖየንያ። 42 ጎሳዉን ጎሳላላብኖና አርዶኒዕና ኦጎየራን ጉት ጎሳፍርዲሮን
 ዋ ካሹመራ የሱሳ ላኖ ጎሳአቶትኖን ኡሱ ኖ እጃጃራ፤ 43 ኡሱ ካአማናራ ዱባ
 መገኬሳይ ጨቦኮክ ሻጋ ጎሳሃላሮን ካሃገሮል ዱባ ኡሱን አቶታራ።” 44
 ጴጢሮሳ ሂካ አዬሳ ግራን፡ ሃፋራኬሳ ኦማሌራን ዱባ ጉት እያና ቁሉክ ዳገ።

45 ጴጢሮሳን ዋታ ካኤመተረ፡ ካህማጺሳመሮ ኡናኮ ካሌረ አማኒል፥ እያና ቁሉክኮክ እላቦል አይዛብ ጉት ዳጋኖ ካኮደያረ ጎራታ ማመ። 46 አላንቲና ሄኢ ታኡሱቢ አይሳ ግራና ዋ ጋላታ ግራን ማንኮማሌን ማራንያ። ኡሱ ጎራታ ጴጢሮሳ ሃ አመ፤ 47 “ሂኒዕ አባዶጃ ኖ እን እያና ቁሉክ ማንኮአታቴራን ማራን ጎራታ በከ ጎጎጣማቃሞንኮ ካትራ አዮያ?” 48 ሃንሱን ካየሱሳ ክርስቶሳኮክ መገ ጎጎጣማቃሞናውን አጃጁ። ኤስኮ አባባተረን ኦጣማቃመረና ጴጢሮሳ አሪ ወጫር እሱን ዋታ ጎጎሀማጽሮን ኤባተን።

11 ኦፋራመራና ይሁዳይ ካግረ አማኒል፥ አይዛብ አደ ሃፋራ ካዋ አታታኖ ማለን። 2 ሃንሱን ጴጢሮሳ ኢየሩሳሌም ቶስ ካኮሴተሬ፥ ታሀማጽሳንተቶ ኡና ኦሌረን ኡሱ ቱፋተን፤ 3 “ሙን ካህማጺሳሞን ግሮ አባዶ ቶስ ታብተደ እሱን ዋታ አንተ አመን ኡሱ ዋቃሴን።” 4 ጴጢሮሳ አደ እሱን ሃ አመ አየሰ ራራዲ አዴሰሳኖ ሀጋአበ፤ 5 “እን ታኢዮጼ ካታማይ ኤባታ ግራን ሳላልሰረ ራጋ ዴ፤ ታንጂንት ሆጮ እን ካላራ ኮኮ ምና አፋርን ኢንሰ አባተረ ዳሩርኮ እን ታኮግሮ ባንኤን ዳጋ ግራን ዴ። 6 እን ትቕሰ ሂካ ማመሰ ካኮዴሮ ጎራታ ሉቃ. አፋር ካአባ፥ ሱላላ ካጋዶ፥ ኡሊ ታጊታማቶ መጣጆልና ካቡባሮ ክምብርጆል ዴ። 7 ሀሱ ጎራታ፥ ኢን ‘ጴጢሮሳ! ክንጉዴ ኤናኣ እም’ ታእማቶ ያየ እን ማለ። 8 “እንና፥ ‘ጎታኬ! ሂክ ሃ ሊን ላኮዳንዳሮ እን ባቲክ ጎርቱን ቁሉክ ካሌኖን ግሮ ኮኮ ኢጂ ህኢቲይ እን አበ ላካሶ’ አመ። 9 “ሀሴ ያየና ካላም፥ ‘ዋ ካሙጭሰሮ አት ባቲክ እን አሮቶትተ’ አማ ዳሩርኮ ኢን ማልሳንተ። 10 ህክና ሴድ ጋለ ኢን ሙተ፤ ኤስኮ ዱባና አደ ዳሩር ቶስ አታመ። 11 “ጎርሰዋ፥ አባዶጃ ሴዶ ቅሳርያኮ እን ቶስ ፋራሜን ኤመተንጉረን እን ካኮግሮ ምኒ ጎጫ አሌን፤ 12 እያና ቁሉክና ኮና ሀጋቶላ አንሌኖን እን እሱን ዋታ ጎጎሴሮ ሰገ። ህት አቢላል ሌዎ ኢን ዋታ ሴተ፤ ምን ካቆሮኖለዎሳና ታብነ። 13 ኡሱና ኤርግቻት ምንኬሳ ኦሮ አሌ ካሙተሮና ኡሱን ካአመሮ ኖን ሰገ፤ ‘ኡል ካኢዮጼ ቶስ አባዶ ፋርደ ጴጢሮሳ ካአማመሮ ሰሞና ኡምሰሰ፤ 14 ኡሱና አትና ምንካክ እባዶ ዱባ ካኮፋይታን ሃፋራ ኩን ሰግሮዋ’ ኡሱ ካአመሮ ኖን ሰገ። 15 “እንና ጋና አይሳኖ ሀጋአባ ግራን፥ እያና ቁሉክ፥ ሆራርጀ ኖ ጉት ጎጎዳገሬ እሶ ጉቲና ዳገ። 16 ኡሱ ጎራታ፥ ‘ያንሳ በከ ጣማቀ፤ እሰን አዴን እያና ቁሉክ ጣማቃንታዋ’ አመ ጎታ ካአይሰራ ሃፋራ ቃል አመ ኢን ሻዳመ። 17 ጎርታ ዋ ጎታ የሱሳ ክርስቶሳኮክ ጋራነ ኖ

አርአማነ ኖን ካሰሰሮ እላቦ እሶና ጎሰሰ፡ ሀያ፡ ዋ ኔባይን እን እዮያ?” **18** እሶና ሂካ ካኮማላረን ጎራታ ታእምራን ዋተሬነ፡ “ሂክ ሃ ጎሌ፡ አይዛብና ግር ቶሰ ጎሳኤማሮን፡ ዋ ጨቦኮ ጉላ ጋላኖ እሶን ሰሰራ አማኖኖላ” አማ ዋ ጋላተን። **19** እስጢፋኖሳ ኤኤሞ ኤጋመ ታኮጎዩሬ ካኬሮ ሆሮራማኖኮት አላንቲ ካዳርአመራ አማኒል ሃፋራ ካዋ አይሁድ ካላሉን ሰሰጋ ፍንቀኮና፡ ቆጶሮሳኮ ታ እንጾክያ ገራውን ሴተን። **20** ቆጶሮሰኮና፡ ቀሬናኮ እባዶ ኮኮ አደ እንጾክያ ቶሰ ሴተሬን ታግሪክ ሄኢ ካአዬሳረ እባዶነ አደረ ሃፋራ ካዋ ሰሰጋ ካጎታ የሱሳ ዋንጋላ እሶን ላላበን። **21** ሁና ካዋና እሶን ዋታ ግረ፤ ቶቶይና አሎ ኦንጂን ካሌረ እባዶ አማኔረ ጎታ ቶሰ ኤመተ። **22** ኦዱና ኢየሩሳሌም ካግሮ አማኒሉን ጌተ፤ አማኒልና ባርናባስ እንጾክያ ቶሰ ፋረ። **23** ባርናባስና ኤሰራ ጌረ ዋ ሰኖቴሳ ካፈለሮ ካኮደያረ ጎራታ ገጌላተ፤ ዱባና ዱዶት ዋዳና ጎታይ አታይ ጎጎግራውን እሶ ጎርሴ። **24** ኡሱና እያና ቁሉክና አማኖ ካእማጋመ ካእዳንክ እባዶትየ፤ ቶቶይ ካሞጋን ካሌረ ጎሳና ጎታ ቶሰ ኤመተ። **25** ኤሰኮ አባባተረ ባርናባስ፡ ሳዉላ ዶቲን ጠርሰሰ ቶሰ ሴተ፤ **26** ካኮሄላረ ጎራታ እንጾክያ ቶሰ አተ ኤመተ። እሶ ላማ ዱባና ኤሰ ካግሮ አማኒልነ ዋታ ሌነ ጌሰ ኮ ሙመ አሎ ካሞጋን ጎሳ አጋልሰሴን፤ የሱሳኮ ኦአጋልሳታረና ሆራርጀ እንጾክያይ “አማኒል” አማማን ኡማማን። **27** ኡሱ ጎራታ ኮኮ ካሄገሮል ኢየሩሳሌምኮ ታእንጾክያ ካታማ ቶሰ ዳጌን፤ **28** እሶኮና ኮ አጋቦሳ ካእማማረ ኬጉረ አላም ዱባ ጉት ካአቲ ኡኢ ካልናሮ እያና ቁሉክኮክ ከኬሳኖይ አዬሰ፤ ህክና ካሮም ዋኖ ቀላዉዶሳኮክ ጌሲ ጉዳተ። **29** አማኒል መተ መተክሶይ ሁናክሶክ ጅልባ ማራጋደ ቤሰረን ይሁዳይ ካግሮ አማኒል ጋርጋርን ህኢ ቶ ሌን፤ **30** ጋርጋርሳና ገነ ታባርናባስና ታሳዉላ ምን ካዋኮት ጃርሶለውን ፋራኖይ፡ ሂካዋ ፈለን።

12 ኡሱ ጌሲ ዋኖ ሄሮዶሳ ኮኮ ምን ካዋኮክ ማጋናል ሆሮራና ጫናቅሳ ግረ፤ **2** አቢ ካያንሳ ያይቆባ ሺፋይ ላጋድሰሰ። **3** ሂናኦ ፈሎኦቴሳና አይሁድ ገጌላይሳኖ ካኮድያረ ጎራታ፡ ጴጢሮሳ አደ አብሰሰ፤ ህክና ካኮሌራ አይሁድ ባቦ አማ ካካባጃረ ባላየ። **4** ጴጢሮሳ ምን ካሻኖ ካኮታብሳሬን ጎራታ ዋታዳራል አፋር አፋር ሊሬን ጎጎኦራውን ጅግ አፋሩን ካካመሮ ዋታዳራሉን ሰሰ፤ ሂካና ካኮንጎለራ ካፋሰካ ባላ ካኮሮራረ ጎራታ ጎሳ ሆረ ቤሰረ ሙርቴሲን ሄደረያ። **5** ጴጢሮሳና ኡሱማሌ ምን ካሻኖ ታበ፤ አማኒል አደ ኡሱ ማራን አሎ ዋ ቶሰ

ኤባታ ግረ። 6 ሄሮዶስ ጴጢሮስ ጎሳ ሆረ አሊስን ሄደ ግራን፣ ጴጢሮስ ኤስ ሄመን ሳንሳላታ ላማ ሻመረ ዋታዳራ ላማ ጠኤ ሁዱረ ግረ፤ ምን ካሻኖ ኦኦራራን ምንካሻኖክ ሳጫ አሌን ግረን። 7 ካጎታ ኤርግቻት ደራኣ እሱን ሙተ፣ ክፍሊ ኦሮና ኢፋ ሀንቃየ፤ ኤርግቻትና ታጴጢሮስ አራንጃ ድን ናባድሰረ፣ “ሳም ክ!” እመ፤ ኡሱ ጎራታ ሳንሳላታል ገነቴሳኮ ፋራመ እዬ። 8 ኤርግቻና፣ “ሳርሰካ ሳርሳ፤ ከፈሮኦታና ታብሳ” እመ። ጴጢሮስና ኡሱን ጎንሰጋመ የለ። ኤርግቻትና ሆረዴረ፣ “ሳርሰ ጉት ኮቲ ሳርሳደ እን ዴበ ሰሴ” እመ። 9 ጴጢሮስና ዴበ ሰሴታ ምን ካሻኖኮ ቤ፤ እየሱን ጎአመን ኡሱን ራጋ ካድያሮ ኣን ላረ ኳሬ ኤርግቻ ካፈላረ እየሰ ሩም ላኖ ላኮአዴሰረ። 10 ካሆሬና ካላም ምንካሻኖ ካኦራረ አባዶኮ ሮረረ ካታማ ቶሰ ካጌሳሮ ራድን ካግሮ ካማርጮ ኡፋ ቶሰ ጌ። ኡፋ እሲ እሱን ባናመ፤ እሱና ቤን ሴተን፤ ጡረክ ራ ኮኔ ጎሳሮረን ጎርሰዋ ኤርግቻ ኡሱኮ ካለ ቤ። 11 ጴጢሮስን ዋዳና ካኮአባባተ ጎራታ፣ “ጎታ ኤርግቻ ፋረጉረ ገነ ታሄሮዶሳኮና አይሁድ ኡሱ ጉት ካሄዴረን ዱባኮ እን ቤሳኖ ግዳ እን ሄዳታኖ ካላይ አዴሰራ” እመ። 12 ሂካ አዴስ አባባተረ፣ አባዶ ካሞጋን ኩኩአመረ ራቶ ዋ ማንኮኤባታሬ፣ ማርቆስ ካአማማረ ያንሳኮት እዬ ካማይራመ ምን ሴተ። 13 ኤስራና ጌጉረ ካሳረ ካራ ካኮባባሳረ ጎራታ፣ ሮዳ ታአማማተ ቶ ምኒ ታፈላተ ማዮዮ አዴሰን ኡፋ ቶሰ ሴተ። 14 ታጴጢሮስ ያየ ላኖ ካኮአዴሳተ ጎራታ፣ አሎ ገጌላታኖኮ ካከይ ኡፋ ሀባኖን ቲተ አባባተደ፣ “ጴጢሮስ ኡፋ ዶሌ ኣል ግራኖ ሰገተ።” 15 አባዶና፣ “ተ ቆላንተታ!” እመን፣ ኤስ አደ ሂካ አባብቴ አባብቴ ካኮሰጋተ ጎራታ፣ “ሳርታ ሂክ ኤርግቻኬሳያ” እመን። 16 ጴጢሮስ አደ ኡፋ ባባሳኖ ሆረዴ፣ እሱ አደን ኡፋ ባኔን ዴንጉሬን ማማን። 17 ኡሱና እሱ ጫልኢ ጎሳአምናዉን ገነ ማላታ ቱሰረ፣ ጎታና ኡሱ ምን ካሻኖኮ ምሲ ኡሱ ቤሰሮ እሱን ሰገ፣ “ካሌሮ አዬሰኮክ ጋራና ያይቆባና ካካለ አማኒሉን ሰጋ” እመ፤ ኤስኮና ባንኤ ታካለ ኢሰ ሴተ። 18 ታላም አሪ ባር ዋታዳራል፣ “ጴጢሮስ ሀጌ ታበ?” አማ ሂታራ ሀሴራ ቲታኖ ሀጋአበ። 19 ሄሮዶስና ጴጢሮስ ዶትሰ ካኮዋታረ ጎራታ ምን ካሻኖ ኦኦራኔን አሎ ቆቆረ አባባተረ እሱ ጎሳ ጎራዉን አጃጁ። ኤስኮና ሄሮዶስ ይሁዳኮ ቅሳርያ ቶሰ ዳገረ ኤስ ሀማጼ። 20 ሄሮዶስ ካጢሮስና ካሰዶና አባዶን ዋታ ኢንሰኢንጋመ ግረ፤ ኡልክሶና ባቦ ካኮሄላታሬን ቃላዳ ካዋኖኮ ማንኮሌ ማራን፣ ዋኖን ካሀንዳረ ካብላሰጦሳ ጋርጋርሳ ካኮሄላታሬን ጎራታ

ራቶ ሌረን ዋናን ዋታ ዋጋርን ሆሳተን። **21** ታቃጣሮ አሪ ሄሮዶስ ካዋኖ ሳርስ ሳርሳተ ኮርፍንጂ ጉት ሀማጼረ ጎሳን አዬሰ። **22** ጎሳና፡ “ህት ያየ ታሄዶታ ኳሬ ታአባዶ ላኩቶ!” አመ እኬ። **23** ሄሮዶስና ዋውን ካባጃ ሰሳና ማንኮዋተ ማራን ካጎታ ኤርግቻ ጎርሰዋ ሀውአም ካሜላን ኡሱን ሉጉደ፤ ሀሰኪና አማመ ጎዩ። **24** ሃፋራ ካዋ አደ ጂናታና ባልአታ ሴተ። **25** ባርናባስና ሳዉላ ሀንዳክሶ ጉሳቴሬን ኢየሩሳሌምኮ አባባታ ግራን ማርቆሳ ካአማማረ ያንሳ እሶነ ዋታ ኣተን ኤመተን።

13 እንጾክያይ ካግሮ ምን ካዋይ ኦሄገሮልና ኦአጋልሰሳረን ግረን፤ እሶና፡ ባርናባስ፡ ጋምባላክ አባዶት ካአማማረ ሰሞና፡ ካቂረና ሉክዋሳ፡ ሞት ካሌሮ ሄሮዶስን ዋታ ካጂናተረ ምናሄና ሳዉላ ግረን። **2** ህኒዕና ጎታ ሄዶይሳታና አጋቡዋ ግራን፡ እያና ቁሉክ፡ “ባርናባስና ሳዉላ እን ኦኮንኡመሮ ፈሎን እሶ እን ካለ ቤሳ” አመ። **3** እሶና አጋቡዩን ኤባተንጉሬን ገነትሶ እሶ ጉት ካዬን ኤባተን እሶ ፋረን። **4** ባርናባስና ሳዉላ እያና ቁሉክ ፋራሜን ሰለዉቅያ ዳጌን፤ ኤሰኮና ዋላቦ ታቆጺሮሳ ኦዶላ ቶሰ ሴተን። **5** ሰላምሰ ካታማ ቶሰ ካኮግያረን ጎራታ አይሁድኮክ ምን ካኤብ ሃፋራ ካዋና ላላበን፤ ያንሳና እሶነ ዋታ ሌረ ጋርጋራ ግረ። **6** ታቆጺሮሳ ኦዶላ ቃማኮ ታቃማ ጌራኑን ጎሰን ታጳፋ ካታማ ካኮግያረ ጎራታ፡ በርዮሱስ ካአማማረ አይሁድት ኮ ካሞራረና ካጣራ ሄገሮት ሄሌን፤ **7** ኡሱና ሰርግዮሳ ጳዉሎሳ ካአማማረ ዋዳናመና ኡል ካባሪሳረ ሞትነ ዋታ ግረ። ሂክ ኡል ካባሪሳረ ሞትትና፡ ሃፋራ ካዋ ማልን ዶተረ ባርናባስና ሳዉላ ኡምሰሰ። **8** ሄኢ ታግርኪ ኤልማሳ አማመ ካኡማማረ ሞሩት ባርዮሱስ አደ፡ ኡል ካባሪሳረ ሞትት ጎንአማኖንኮ ሀንዱዱፍሲን ማንኮዶተረ ማራን እሶ ኔባተ። **9** ጳዉሎሳ ካአማማረ ሳዉላ እያና ቁሉክ አማጋመረ፡ ትቕሰ አባዶት ዳጉረ ሃ አመ፤ **10** “እት ቁሉማ ዱባኮክ ዲና፡ ሞጌና ሜላን ዱባ ካኮአማጋንተታ ካዱርሳ ኤረ! ካጎታ ቱኩልክ ራ ዋጫጫናኮ ላኮአባባቶ? **11** ግዳና ታጎታ ገነ ኩ ባሰዋ፤ ጃማ ልናታ፤ ጎርታ ካአሪቲ ኢፋ ጎራታ ክጫሩን ሱረ እት ላኮድናቶ።” ጎርሰዋ ኢዮተና ሙጉድ ኡሱ ጉት ዳገ፤ ገነ አብ ካገገይሰሮ አባዶና ዶታታ ሂታራ ሀሴራ አማኖ ሀጋአበ። **12** ኡል ካባሪሳረ ሞትትና ካሌሮ አየሰ ካኮደያረ ጎራታ፡ አጋልሰሳና ካጎታ ሳዳ ዋ አማነ። **13** ጳዉሎሳ ሳትላልቴሳነ ዋታ ጳፋኮ ዋላቦይ ኬንጉረን፡ ጲንፍልያ ታግቶ ታጼርጌን ካታማ ቶሰ ሴተን፤ ማርቆሳ ካአማማረ ያንሳና እሶኮ ካለ ቤረ ኢየሩሳሌም ቶሰ አባባተ ሴተ። **14** እሶ

አደን ታጽርጌን ካታማኮ ኬንጉረን ጲሰድያ ኦሮ ታግቶ አንጽክያ ቶስ ሴተን፤ ታፎልሲ እርና አይሁድኮክ ምን ካኤብ ታቤረን ሀማጽን። **15** ካሴራና ካሄገሮል ማጻፋጆል ናባባመ ካኮአባባታረ ጎራታ፥ ካአይሁድ ምን ካኤብኮክ ወይቻል፥ “አቢላልቲ፤ ጎሳ ካኮጎርሰታን ሃፋራ ጎአብታን እዬሳ” አመን ጳውሎሳስ ቶስ ሀንዳ ፋረን። **16** ጳውሎሳና ኬጉረ ገን ማላታ ሃ አመ፤ “እሰን ካእስራኤል አባዶ፤ አደና እሰን ዋ ኦአብሳታን አይዛብ ዱባ ጫቃሳ። **17** ሂካ ካእስራኤል ጎሳኮክ ሄዶ ኦዶላልካን አሳበ፤ ካግብጽ ኡሊ ግራን ጎሳ ካአቲ የለ፤ ካአቲ ሁናኬሳና ኤስኮ እሶ ቤስ። **18** ጌስ አፋርታሙን ቃሉላቶክ ኡሊ እሶ ኦብሴ፤ **19** ኡል ካከነኣኒ ካግረ ኣኒል ቶዶባ ባሰረ፥ ኡልክሶ ጎሳኬሳውን ርቲ የለ እሶ ኤልሰ። **20** ሂክ ዱባና ካኮጉዳተራ ጌስ 450 ኦሮያ። “ኤስኮ አባባተረ ካሄገሮ ሳመላኮክ ጌስ ታ ጌሮ ኡል ታባሪሶ ዳኖሌ እሶን ሰሰ። **21** ኤስኮና ካእስራኤል ጎሳ ዋኖ እሶን ጎሳሰሳምሮን ሆሳተን፤ ዋና ታብናም ኡናኮ ካቂስ ኤረ ሳኦላ እሶን ሰሰ፤ ኡሱና ጌስ አፋርታም ባሪሰ። **22** ሳኦላ ዋኖናትኮ ዳግሰጉረ፥ ዳወተ እሶን ሬድሰ፤ ዋና ጋራኬሳ፥ “ዋዳናቴ ኣን ካሌሮና ኣን ካዶታታሮ ዱባ ኣን ካፈላሮ ካኢሰይ ኤረ ዳወተ ሄላየ አመ ጋራ ካዳወተ አቶቴ።” **23** “ዋ ኦታቤሮ አማቶክ ሃፋራ ማለ ሂካ አባዶትኮት ሳኒኮ ካፋይሳሮ የሱሳ ጎሳ ካእስራኤሊን ኬሰ። **24** የሱሳ ኤማታኖኮ ሆረን፥ ያንሳ ካእስራኤል ጎሳ ዱባ ጨቦኮ ጉላ ጋልረ ጎሳጣማቃምሮን ላላባ ግረ። **25** ያንሳ ፋሬንቴሳ ጉሳታ ግራን፥ ‘እሰን እን እየያ አንቴን ቆፓታን? አን ላኮኡሱዮ ፤ አየሱን ጎአመን ሉቃኦቴሳኒዕ ከፈሮኮክ ሻኖ እን ፋርን ካዳንዴኖን እንኮ ሃሬ ኤመይናራ’ አማ ግረ። **26** “እሰን አቢላልት፤ አብራመኮ ኦኡሙላንተታን፥ አዴን ዋ ኦአብሳታን ዱባ ሂክ ካፋይና ሀንዳ ካኮንፋራመራ ኖ ዱባንያ። **27** ኢየሩሳሌም ካግረ አባዶና ወይቻልክሶ የሱሳና፥ አይሁድን ታፎልሲ አሪ ካናባባማሮ ካሄገሮልኮክ ማጻፋ አዳሳና ማንኮዋተን ማራን ሙርትቲሶይ ሄገሮ ጎሳጉዳራውን የሌን። **28** ጎይን ታጌግሶ ኣላንቲ ጎሃላናዋቴና ጲላጦሳ የሱሳ ጎሳጋድሰሰሮን ኤባተን። **29** ጋራኬሳ ካጻፋመሮ ዱባ ጉድሌን አባባተረን ካኮሱዋመሮ ጋኮ ዳግሴረን ቃማሌን። **30** ዋ አደ ኡሱ ጎይኮ ኬሰ። **31** ጋሊላኮ ሀጋክበረ ታ ኢየሩሳሌም ጌሮን ኡሱኅ ዋታ ኦግሬወና ጎራታ ካዋጋን ሙተ፤ እሶና ግዳ ጎሳ ሆረ ኡሱን አቶያን። **32** “ኖና ዋ ኦዶላልካኑን አብዲ ካሰሰሮ ካገጌሎ ሃፋራ እሰኑን ላላባና። **33** ዋ የሱሳና

ጎይኮ ኬሰን እሱን ኦታቤሮ አማቶ ኖ ይሰክሶውን ፈለራ፤ ሂካና ካማዛሙር
 ማጻፋይ ፎልሲ ላማ፡ ‘እት ኤረኬታ፤ እን ህታር ኩ ኡሙለራ፤’ እማመ ጸፋመራ።
34 አደና፡ ኡሱ ካሻሞን ግሮና፡ ዋና ጎይኮ ኡሱ ኬሳኖ አዴሰሰን ሃ አመራ፤
 ‘ካቁሎየሮና ካአብዳመሮ፡ ካዳውት ኡሶ እሰኑን ሰሰናራ።’ **35** አደና ታካለ
 ባንኤ፡ “ቁሉክካና ሻሞ ጎሳሄሰሮን ላኮየላቶ’ አመ። **36** “ዳውት ገሰኬሳ
 ዱባይ ፈኢ ታዋ ሀንዳየ አባባተረ ጎየራ፤ ኦዶላልከሳነ ዎታ ቃማላመ፤ ማርኬሳና
 ሻመራ። **37** ጎታ ጎይኮ ካኬሰራ የሱሳ አደ ላኮሻመ። **38** “ጎርታ አቢላልቴ!
 ጨቦኮክ ሻጋ ካኮሄላማራ ጋራ ካየሱሳነ ላኖ እሰኑን ካላላባመሮ እዴሳ። ሃንሱን
 ኡሱ ካአማናራ ዱባ ሴራ ካሙሴይ ሄላይን ታዳንዴኖን ቁሉማ ሄላታራ። **40**
 ሃንሱን ካሄገሮል ሃ አመን ካእዬሰራን እሰን ጎሳጌኖንኮ እሰኡራዬን። **41** “እሰን
 ኦቃጭፋታን፡ ዲያ! ሳዳ! ሳዳ! ማዮና እሰኑን ጎእዬሰ እሰን ኦአብዳኖን ፈሎ እን
 ጌሰክሰኒ ፈልናራ።” **42** ጳውሎሳና ባርናባሰ ካእይሁድ ምን ካኤብኮ ብያ
 ግራንቲ፡ እባዶና ሂካ እየሰ ካኤማታሮ አልማ ጎሳሰግሮ ኤባየን። **43** ሃጋናና
 ካኮዳርእማተ ጎራታ፡ ካሞጋን እይሁድልና አማኖ ካይሁዳ ቶስ ታቤረን እየሰ
 ካእያና ኦአታቴራን እባዶጃ ጳውሎሳና ባርናባሰ ዴበ ሰሴተን፤ እሶና እዬሰሰረን
 ሰኖ ታዋይ አታይ ጎሳግራውን ጎርሴን። **44** ታኤማቶ ታፎልሲ አሪ ካካታማ
 ጎሳ፡ እባዶ ኡጫር ኦላል ጎሄሰራን ጎሳ ዱባ ሃፋራ ካዋ ማልን ኩኩሙ። **45**
 እይሁድና ጎሳ ካሞጋን ኩኩአማኖ ካኮደያረ ጎራታ፡ ቃናተ አማጋማን፤ እየሰ
 ካጳውሎሳ ኔባታ ኢንጋማኖ ሀጋእበን። **46** ጳውሎሳና ባርናባሰ ጃቡይ ሃ አመን፤
 “ሆራርጀ ሃፋራ ካዋ እሰኑን ሰጋሚን ዶትሳራ፡ እሰን እዴን ቱፋተን፤ ሂካኒና ጅሩ
 ጅሮማክ ግር እሰኑን ካዶትሶን እን እሰኦትሰኒ ጉት ማንኮሙርቴሰቴን ማራን ኖና
 እይዛብ ቶስ አባባይናና። (aiōnios g166) **47** ኡሱማለና ጎታ፡ ‘ፋይና ኡልኮት
 ጋቾ ጎሳጌግሶ እን ኩ እይዛብን ኢፋ የለራ’ አመ ጎታ ኖ አጃጃራ” አመን። **48**
 እይዛቢልና ሂካ ካኮማላረን ጎራታ ገጌላተን፡ ሃፋራ ካዋወና ካባጃ ሰሳ፤ ጅሩ
 ጅሮማክ ግሪውን ኦአሳባሜራን ዱባ አማኔን። (aiōnios g166) **49** ካጎታ ሃፋራና
 ጎባቢ ካግሮ ኡል ዱባ ጌ። **50** ታእይሁድ ጃርሶለ አደ ካእይሁድ አማኖ ካግሮ
 እባዶ ዱሬሳል ሄለልና ካካታማ ካጃንጅ እባዶ ካኬሴረን ጳውሎሳና ባርናባሰ
 ጉት ሆሮማኖ ጎሳኬሮ የሌን፤ ኡልክሶኮና እሶ ቤሰን። **51** ጳውሎሳና ባርናባሰ

እሱን ሴርሳኖ ጎሳሌሮን ሉቃስ ተሰጥቶ ጎራ ሁርጉፋተረን እቆንዮን ቶሰ ሴተን። 52

ዋ አእማናሬና ገጌሎይና እያና ቁሉክ እማጋሜን።

14 ካታማ ታኢቆንዮን ጳውሎስ ባርናባስን ዋታ አይሁድኮክ ምን ካኤብ ታቤን፤ ኤሴና ማዳሬን ማንኮአጋልሰሴን ማራን፤ አይሁድኮና ግሪክኮ አሎ ካሞጋን አባዶ ዋ አማን። **2** ሀእማኖኒ ካሄሰረ አይሁድ አደ አይዛብ ከኬሰረ አማኒል ጎሳድድራውን የለ። **3** ጳውሎስና ባርናባስ ጋራ ካጎታ ጃቡይ አዬሳ ታንጂን ኤሰ አዳላተን፤ ጎታና ካአዬሳራን ካሰኖ ሃፋራ ባሳክ ማላታልና ኦሳዳሞራን ፈሎ እሶ ጋርጋራ እሶ አዳሰሳ ግረ። **4** ካካታማ ጎሳና ካለካለ ቤ፤ ጋምሳ አይሁድን ዋታ፤ ጋምሳ አደ ኦፋራሜራን ዋታ ሌ። **5** ሀሱ ጎራታ አይዛብና አይሁድ ዋይቻልክሶን ዋታ ራቶ እስኣተረን ጳውሎስና ባርናባስና ኤለ ሄገል ጃራንጂርሰና ኤኤሞ ኤገን ዶተን። **6** እሶና አደን ሂካ ጎሳአዴሴኒ ልሰጢራና ደርቤ ካእማማሮ ካታማል ካልቃኦንያ ጎቦቢ ካግሮ ኡል ቶሰ ባቃተን፤ **7** ኤሴና ዋንጋላ ላላባኖ ሆረዴን። **8** ማማን ካልሰሰጢራይ፤ ሉቃ. ካኮናፋቴረን ታኮሙላመሮ አርኮ ሀጋአበረ ዱዶ ሉቃ. ሰሴይ ካካሶን አባዶት ኮ ሀማዬ ግረ። **9** ሂክ እባዶትና ጳውሎስ ካአዬሳሮ ማላ ግረ። ጳውሎስ ኡሱ ቶሰ ትቶሰ ዴጉረ ፋይሰን ካዳንዴራ አማኖ ኡሱን ግራኖ ካኮደያረ ጎራታ፤ **10** ያየ ታኦቲይ፤ “ቱኩል ኡም አሊ!” አመ፤ ሀሱ ጎራታ ፍርመ ኬጉረ ሰሴታኖ ሀጋአበ። **11** ጎሳና ጳውሎስ ካፈለሮ ካኮደያረ ጎራታ፤ ታልቃኦንያ ሄኢ፤ “ዋል አባዶ ኣን ሌ ኖ ቶሰ ዳገራ!” አመን ኦኬን። **12** ባርናባስና “ዲያ” አመን፤ ጳውሎስ ካአዬሳረ ማንኮሌ ማራን “ሄርሜን” አመን። **13** ካታማልኮ ሳሬ ካግረ፤ ቁሉክ ምን ካድያኮክ ቱቃሞት ኮርሞሌ ታኦራሬና ዳራራ ካካታማ ካራ ቶሰ ኬንጉረ ጎሳን ዋታ ራቶ ሌጉረ ጳውሎስና ባርናባስን ጃርሶ ሰሰን ሄደ። **14** ኦፋራመራን ባርናባስና ጳውሎስ ሂካ ካኮማላረን ጎራታ ጋዳይ ሳርሰክሶ ፊላተንጉሬን ጎሳ ኦሮ ትዬንጉሬን፤ እያ ሃ አመን። **15** “ኡሌ! ሂካ ሙን ፈላታን? ኖ አንዴ እሰን ኣን አባዶና፤ እሰን አዴን ሂካ ካማድኖን እየሰ ዱባኮ ፋክማዴን ዳሩርና ኡልና፤ በከና እሶ ኦሮ ካግሮ ዱባ ካመጠሮ አርዶክ ሄዶ ቶሰ ጎሳአባባታውን ዋንጋላ እሰኩን ላላቢንያ። **16** ዋ ታሮርተቶ አላታኩን፤ ጎሳ ዱባ ካጌላተ ራኬሳ ጎሳሰሴሮን ኢሳገ፤ **17** ሀሌዎ ኳሬ ዳሩርኮ ኢዳሞ ኡሱማለና ኢል ካኮሄላታን ጎራታጆል እሰኩን፤ ሰሳኖ አደና ዋዳናትሰን አሞና ገጌሎይ ባራርሳኖይና ታኢዳን ፈላኖይ እስኦቴሳ አቶ ካላይ ላኮእሰናሮ” አመን።

18 ሂካ ዱባ እሶ አዬሳ ግራን አደ፡ ጎሳ እሶን ጃርሶ ጎሳሰሶንኩ ካትርሰሴራን ራኮ ታሞጋንያ። 19 አይሁድ፡ ጎአመን አንጾክያኮና አቆንዮንኮ ኤመተረ፡ ጎሳ ሜላነ ካኬሴረን፡ ጳውሎሳና ኤኤሞ ኤጌን፤ ኤሰኮ አባባተረን ኡሱ ካጎየሮ ኣን ካኮላረ ጎራታ ታኮግሬን ካታማኮ ሳሪ ቤሰን። 20 ጎሌና አማኒልና ኡሱ ማራሙረን ካኮላረን ጎራታ ጳውሎሳ ኬጉረ ካታማ ታበ፤ ታላም አሪ ባርናባሰነ ዎታ ዳርቤ ሴተን። 21 ጳውሎሳና ባርናባሰ ዳርቤይ ዎንጋላ ላላበረን፡ አባዶ ካሞጋን ዎ ካኮአማናረ ጎራታ፡ ልሰጢራ፡ እቆንዮንና ጲሰድያይ ታግቶ አንጾክያ ቶሰ አባባተን ሴተን። 22 ኡሱ ኡሊና አማኒል አማኖክሶይ ጎሳአታራውን እሶን ጎርሳ ሰሳ “ዎኖናት ካዋ ቶሰ ታብን ራኮ ታሞጋን አታታኖ ዶትሰናራ” አማ አጋልሰሴን። 23 ኤሰኮና ካሞጋን ምን ካዋይ ጃርሶላ ሹሜን ካኮአባባተረን ጎራታ፡ አጋቡይና ኤብ እሶ ካአማናሬን ጎታውን ሀዳራ ሰሳቱን። 24 ጲሰድያን ሮረን ጲንፍልያ ቶሰ ኤመተን፤ 25 ጳርገንና ሃፋራ ካዋ ላላበን አባባተረን፡ አጣልያ ቶሰ ዳጌን። 26 ኤሰኮና እሶ ኦፈለራን ፈሎውን ሰኖ ታዋውን ሀዳራ ታኮሰሳንተቶ ታሶርያ ካታማይ ታግቶ አንጾክያ ቶሰ ዋላቦ ሴተን። 27 አንጾክያ ቶሰ ካኮገያረን ጎራታ፡ አማኒል ዱባ ራቶ ኩኩይሰሬን፡ ዋ ጋራክሶን ካፈለሮ ዱባ፡ አደና አይዛብን ምሲ ካአማኖ ራ እሶን ባነሮ ሰገን። 28 ኤሴና አማኒልን ዎታ ራቶ ታንጂን ሀማጼን።

15 ኮኮ አባዶ ይሁዳኮ አንጾክያ ቶሰ ዳገረ፡ “ካሙሴ ሴራክ ማለ ጎሀማጽሳሞን ፋይን ላኮዳንዳታን” አመረ አማኒል አጋልሰሳኖ ሀጋአበ። 2 ህክና ጳውሎሳና ባርናባሰና እሶን ዎታ ታኣቲ ኤንገና ዶጋማ ኦሮ ታብሰ። ሃንሱን ጳውሎሳና ባርናባሰ ካካለ አማኒልን ዎታ ኢየሩሳሌም ቶሰ ቤኔ ህታ ሃጃውን ኦፋራመራና ጃርሶላ ጎሳሆሳራኑን ሙርቴሳሙ። 3 ሃንሱን ምን ካዋ እሶ ፋረ፤ እሶና አደን ፈንቀነና ሳማርያ ቶንሴ ሮራ ግራና አይዛብ ዋ ቶሰ ኤሜታኖና አማኖክሶ ሰገን፤ ህት ኦዶና አማኒል ዱባ ገጌላይሰ። 4 ኢየሩሳሌም ካኮገያረን ጎራታ ምን ካዋክ አባዶና ኦፋራመራን ኡሱማለና ጃርሶላን ቆጶቱን፤ ሀንዳ ኦሴተረና ዋ እሶን ዎታ ሌረ ካፈለሮ ዱባ እሶን ሰገን። 5 ታፋራሳው ኡናኮ ካአማነራ እባዶ ኮኮ ኬጉረ፡ “አይዛብ ጎሳህማጽሳሞሮና ካሙሴ ሴራ ጎሳኦራሮን የላኖ ካዶትሳሮያ” አመን። 6 ኦፋራመራና ጃርሶላ ሂካ አየሰ ቁሌሲን ኩኩአመን። 7 ዶጋማ ታንጂንኮ አባባተረ ጴጢሮሳ ኬጉረ እሶን ሃ አመ፤ “አቢላልቲ፤ ዋ ጎራታ ክጫርኮ ሆረን እሰን ኦሮኮ እን አሳባተራ፤ አይዛብ ካዎንጋላ ሃፋራ ህኢቲኮ ማልረን

ጎሳማናዉን ካየልናሮ ካሳንዋ። 8 ዎዳና ታእባዶ ካካሳ ዋ ኖን ጎሳሰሰሮክ ማለ፡
 እሶና እያና ቁሉክ ሰሳኖይ እሶ ካእታተሮ ላኖ እሶን አቶቴ። 9 ዎዳናትሶ እማኖይ
 ማንኩሙጭሰሮ ማራን ኖና እሶ ጠኤ ካሌና ላኩካየ። 10 ጎርታ፡ ኦዶላልካንና
 ሌረ ኖ ሰድን ዳንዳና ካዋኔኖ ሀርቆታ ካእማኒል ሃን ጉት ካ ግዳ ሙን ዋ
 ጫፋታን? 11 ኖና ካፋይነና ልክ እሶ ኣን ጎታካን የሱሳኮት ሰኖ ላኖ እማናና።” 12
 ካኩኩእመረ ጎሳ ዱባ ጫልኢ እመረ ባርናባሰና ጳውሎሳ ዋ ጋራክሶን እይዛብ
 ኦሮ ካፈለሮ ባሳክ ማላታልና ካሳድሰሮ እየሰ ጎእዬሰሮ ማላ ግረ። 13 እሶና
 እዬሴን ካኩጉሳታሬን ጎራታ ያይቆባ ሃ እማ እዬሳኖ ሀጋእበ፤ “እቢላልቴ! ማላ፤
 14 ዋ ታእይዛብ ኡናኮ ኡሱን ካሌሮ ጎሳ ጣየ ምሲ ዴሮ ሰሞና ኖን ሰገራ።
 15 ሃ እማመ ካጸፋመራ ካሄገሮል ሃፋራ ሂካኔ ዎታ እሰእታራ። 16 “ሂታኮ
 ሆረንባን እን አባባይናራ ካዲጋመሮ ካዳዉተ ምን ማዳርናራ። ካቡቱተሮና
 አባብ አሊሰናራ፤ አባብ ማዳርናራ፤ 17 ሂክ ካሄሰራ አባዶና፡ ኡናቴ ካሌራ
 እይዛብ እን ዋ ጎሳዶትሮንያ፤ ሂካ ካፈለራ ጎታ ሃ እማራ፤” 18 እሶና ሆርኮሰኮ
 ሀጋእበሬን ኦእዴሳሜንያን። (aiōn g165) 19 “ሃንሱን ዋ ቶሰ ካእባባተሮ እይዛብ
 ኖ ጎሳጫናቅሶንኮ ሂክ ያዳኬያ። 20 እየሱን ጎእመን ቶልቻይ ካባቶየሮ እየሰኮ፡
 ካሻርሙጡማ ባቶዋኖኮ፡ ጨልኤን ካላጋዴራን ግድ እማኖኮና ኢግ ጣማኖኮ
 ፋክ ጎሳእምራኑን ኖ እሶን ጳፊን ዶትሳራ። 21 ሴራ ካሙሴና ሆርኮሰኮ ካየረ
 እይሁድን ታፎልሲ እሪ እይሁድኮክ ምን ካኤብ ናባባማና ካታማል ላላባማ
 አዳላተራ።” 22 ሀሱ ጎራታ ኦፋራመራና ጃርሶለ ካሞጋን ምን ካዋኔታ ራቶ
 ሌረን እሶ ኦሮኮ አባዶ አሳበሬን፡ ጳውሎሳና ባርናባሰን ዎታ እንጾክያ ቶሰ ፋርን
 ሙርቴሴን፤ እማኒል ኦሮና ኦእዴሳሜራን በርሳባሰ ካእማማሮ ይሁዳና ሰላሰ
 አሳቤን። 23 ታጸፋንተቶ ዳብዳቤ እሶ ጉት ፋረን፤ ዳብዳቤና ሃ ታእማቶተ፤
 ኖ ኦፋራምናና ጃርሶለ ኦሌንና አቢላልትሰን፡ ኡና ታእይዛብኮ እማንቴደን
 እንጾክያይ፡ ሶርያይና ክልቅያይ ኦግታኑን ኖግዳ ኖ ፋራማና። 24 ኮኮ እባዶ
 ፈኢታን ካላይ ኖ ኦሮኮ ቤረ እዬሰክሶይ ዎዳናትሰን ሀጋቶላ የላኖና ሻላጋኖ
 ኖ ማልነና። 25 ሃንሱን እባዶጃ ኡጫር አሳብነን ኖ ኦኔላታኖ ባርናባሰንና
 ጳውሎሳን ዎታ እሶ እሰን ቶሰ ፋርን ኖ ዱባ እሰእንተና፤ 26 ባርናባሰና ጳውሎሳ
 ጎታካን የሱሳ ክርሰቶሳኮክ መገ ማራን ኔፎትሶ ሮርሳተን ኦሰሳተራንያን። 27
 ሃንሱን ኖ ካጸፍንኖና ህኢ ሰጊ ጎሳእደሰሰራኑን፡ ህኒዕማ ይሁዳና ሰላሰ ኖ እሰን

ቶስ 4ርነና። 28 ሂካ ካዶትሳሮ አየሰ ኳሬ ታካለ ታጉጁማ ሰዳነ፤ ኖ እስኩን ጎሳስድሶንኩ፤ እያና ቁሉኪና ኖን ካእዳንክ ሌ ሙተራ፤ ሀክና፤ 29 ቶልቻን ካኤናመሮ ኮኩ፤ አግኮ፤ ጨላአመ ካጎየ ግድኮኒዕ ሶ ኡሱማለና ሻርሙጡማ ባቶዋኖኮ 4ክ ጎሳእንታኩንያ። ሂካ ኣንክክ እየሰኮ ጎፋክንቴን እስኩን ካእዳንያ፤ ኖጎዳ ግራ። 30 ሀንዳ ካፋራመረ እባዶና ኖጎዳ ግራ አመረን እንጾክያ ቶስ ዳገ፤ ኤሴና ካእማናሮ ጎሳ ራቶ ኩኩይሰሬን ዳብዳቤ እሶን ሰሰን። 31 ጎሳና ዳብዳቤ ናባብ አባባተረ ካእታይሳሮ እዬሲ ገጌላተ። 32 ይሁዳና ሰላሰ እሶ መተክሶውን ኦሄገርል ማንኮሌን ማራን አማኒል ካንጂን ሃፋራ ጎርሴን፤ አታይሰን። 33 ኤሴና አባራን አዳላተረን ታእማናቶ አብላልትሶኮ ኖጎዳ ሱሱካሜረን እሶ ካፋረሮ እባዶ ቶስ አባባተን ሴተን። [34 ሰላሰ አደ ኤሰ ሄሲን ጎሳተ።] 35 ጳውሎሳና ባርናባሰ ካካለ ካሞጋን እባዶነታ ሌረን ካጎታ ሃፋራ አጋልሰሳና ላላባ እንጾክያይ ሀማጽን። 36 ጳውሎሳ አሪ ትጫርኮ አባባተረ ባርናባሰን፤ “ክንጉዴ ካጎታ ሃፋራ ኖ ካኮላላብነኖ ካታማል ዱባ ሴኖ፤ ኤሰ ካግራ አማኒል ሞሰሞሲ ግሮ አዳሰን ሴይ ዴና” አመ። 37 ባርናባሰና ማርቆሳ ካእማመራ ያንሳ እሶን ዎታ ጎሳሴሮ ዶተ፤ 38 ጳውሎሳ አደ ኡሱ አት ሴይን ላኮዶተረ፤ ኣላንቲና፤ ሂታኮ ሆረን ማርቆሳ እሶኮ ካለ ቤረ ካጸንፍሊያ ኡሊ ማንኮሄሰረ ማራና እሶን ዎታ ፈሎን ሴታና ማንኮዋተረ ማራንየ። 39 ሂካ ኣንክክ እስኣታናዋት እሶ ኦሮ ማንኮመጣመ ማራን እስኮ ዳርአመን፤ ሃንሱን ባርናባሰ ማርቆሳ ኣተረ ዎላቦይ ካቆጲሮስ ኡል ሴተ። 40 ጳውሎሳ አደ ሰላሰ አሳባተ፤ አማኒልና ጳውሎሳ ሰኖ ታጎታውን ሀዳራ ሰሴንጉረን ኢሰን ጋለን። 41 ካሞጋን ሞን ካዋ አታይሳ ኡል ካሶርያንና ካክልቅያ ቶንሴ ሮረ።

16 ጳውሎሳ ዳርቤና ልስጢራ ቶስ ሴተ። ኤሴና ኣየቴሳ አይሁድት ዋ ታእማናተተ፤ ኦዶኬሳ ጎእመን ካእይዛብ እባዶ ካኮንሌረ ጢሞቶሳ ካእማማረ የሱሳኮ ካእጋልሳታረ ኮ ግረ። 2 ኡሱና ልስጢራይና እቆንዮይ ካግሮ አማኒል ዶሌ ካእዳን አቶ አባናየ። 3 ጳውሎሳና ሂክ እባዶት ኡሱን ዎታ ጎሳሴሮን ዶተ፤ ሃንሱን ኡሱ ጎቦቢ ካግረ አይሁድኮት ኣላንቲ ጎሳሀማጽሳሞሮን የለ፤ ሂካና ካኮንየለራ ካጢማቶሳ ኦዶኬሳ ካእይዛብ እባዶ ላኖ ማንኮካሳናዬን ማራን እሶን አመረያ። 4 ጳውሎሳሰ ካታማካታማልን ሮራ ግራን ኢየሩሳሌም ታግቶ ጂርሶለይና ኦፋራመራን ካሙርቴሳመሮ ዎጋ አማኒሉን እዳሰሳ ግረ፤ ፈሎ ጉት

ጎሳህይስራኤና ሻድሳ ግረ። **5** ካሞጋን ምን ካዋ አማኖይ አታተ፤ ቶቶኦትሶና አሪ
 አሪ አዳማ ሴታ ግረ። **6** ጳውሎስና ኡናቴሳና ሃፋራ ካዋ እስያይ ጎሳላላብኖንኮ
 እያና ቁሉክ እሶ ማንኮትረረ ማራን ኡል ካፍርግያና ካጋላትያን ሮረን ሴተን። **7**
 ካምሲያም ኡል ቶስ ካኮጋባላማሬን ጎራታ ካብታንያ ኡል ቶስ ሴይን ሄደን፤
 አየሱን ጎአመን ካየሱሳ እያና እሶ ጎሳሴራውን ፈኢ ላኮሰሰ። **8** ሃንሱን ምና
 ታምሲያን ጢሮአዳ ቶስ ዳጌን። **9** ጳውሎስና ሄመን ራጋይ ኮ ካመቀደንያ
 እባዶት አሌረ፡ “ካመቀደንያ ኡል ቶስ ናቅደ ኖ ጋርጋርና” አማ ኤባታ ግራን
 ዴ። **10** ጳውሎስ ሂካ ራጋ ካኮደያረ ጎራታ፡ ዋ ኖ ዋንጋላ ጎሳላላብኖን ኡመራ
 አምነኔ ማንኮሙርቴሳነኖ ማራን ጎርሰዋ መቀደንያ ቶስ ሴይን ደታን። **11** ኡል
 ካጢሮአዳኮ ማርካፋ ኬነጉነ ቱኩል ዱዳታ ኡል ካሳሙትራቀ ጌነ፤ ታላም አሪ
 ዱዳታ ናጹለ ሴነ፤ **12** ኤሰኮና ኬነኔ ሮም ሄገሊ ታባራተ ኡል ካመቀደንያኮክ
 ጎቦቢ ታግቴ መተት ታፍልጲሰዮሳ ካታማይ ቴቃነ፤ ኤሴና አሪ ትጫር ሀማጽኔ።
13 ታፎልሲ አሪ፡ ታኤብ ባንኤ ደታታ፡ ኤስ ካታማክ ካራኮ ቤነነ ላጋ ኮ ቶስ
 ዳይነ፤ ኤስ ኖ ሀማጲነጉኔ ኩኩመ ካግረ ሄለሉን ሃፋራ ካዋ ሰጋኖ ሀጋአብነ።
14 ማላ ካግረ ሄለል ኦሮኮ ሊድያ ታአማማተ ሄለልትቲ ቶ ግቴ፤ ኤሰና ዋ
 ታሄደይሳተና ታትያጢሮን ካታማኮ ታኤመተቶ ካጋሽ ኦጋ ታዳዳላተተ። ጎታና፡
 ጳውሎስ ካአዬሰሮ አየሰ ሻዳ ጎሳማልቶ ዋ ዋዳናትሴ ባነ። **15** ኤሰና ካምነ
 እባዶክሰ ካኮጣማቃማረ ጎራታ፡ “እን ጎታይ አማናኖኬ ኦግራን ጎአዴሴን”
 “ምንኬ ኤማይዴን አባራንቲ ሀማጸ” አማ አታይሰ ኤሰ ኖ ኤባተ። **16** አሪ ቶ ኖ
 ባንኤ ታኤብ ቶስ ሴታ ግራን፡ ካሞሩ እያናይ ሄገሮ ታአዬሳተ ድይት ሄለልትቲ ቶ
 ኖ ሄልተ፤ ኤሰና ሂናኦ ኦሞሩ ፈሎኦትሴይ ኤሰ ካባሪሳሮን ማራጋደ ካሞጋን
 ታታብሳተታ። **17** ህት ድይት ጳውሎስና ኖ ዴብ ሰሴታ፡ “ሂክ እባዶ ካፋይና ራ
 እስኩን ካሰጋሮና ዱባንኮ ጦቂ ካአመ ዋውን ኦሀንዳራንያን!” አማ ኦካ ግቴ።
18 ሂናና አሪ ታሞጋን አባብቴ አባብቴ አማ ግቴ፤ ጳውሎስ ጎአመን አማራተረ
 ካምባል አመ ሀሱ እያና፡ “ካጎታ የሱሳ ክርሰቶሳኮክ መገ አት ኤሰኮ ጎሳቤቶ እን
 ኩ አጀጃራ!” አመ፤ ኡሱ እያናና ጎርሰዋ ኤሰኮ ቤ። **19** ኤሰ ካባሪሳረና ማራጋደ
 ካኮሄላታሬን አብድ ባ ሴታኖ ካኮአዴሳሬን ጎራታ ጳውሎስና ሰላሰና አበን ጌታ
 ኦዶናት ኦአባን ማንኮግራን ሶንጎን ጌሰን። **20** ሞትጆል ሆረ ኣልሰሬነ፡ “ሂኒዕ
 እባዶጃ እይሁድ ሌን ግራን ካታማታን ሻላጌራን፤ **21** ኖ ታሮም ካታማክ እባዶ

አታይን ጎርቱን ፈልን ካዶትሶን ዋጋ ጎሳ ኦሮ አዬሳራን” አመን። **22** ጎሳና ራቶ
 እስከተረ ጳውሎስና ሰላሌ ጉት ኬ፤ ሞትጆልና ሳርስክሶ ቃርጉሬን ዳማይ
 ጎሳባጭራውን አጃጁን። **23** አካማሌ ቦጨን አባባተረን ምን ካሻኖ ታብሰን፤
 ምን ካሻኖ ካኦራረና አታይ ጎሳኦሮ አጃጁን። **24** ኡሱና ሂካ አንክክ አጃጃ አታተ
 አባባተረ፤ ምን ካሻኖ ታኦሮ ክፍሊ ታብሰረ ሉቃኦትሶ ጋነ ዋታ አታይሰ አበ ሸየ።
25 ሄመን ጠኤ ጳውሎስና ሰላሰ ኤባታና ዛማራ ዋ ጋላታ ግረን፤ አሻማረን
 ኩኒዕና አደን ጫቃሳ ግረን። **26** ደራኣ ምን ካሻኖክ ኡኩም ካእእሰሮ ካከቲ
 ኡልኮክ አኣኖ ሌ፤ ጎርሰዋ ምን ካሻኖኮክ ኡፋ ባናመ፤ ዱባኮክ ሻኖ ፋራመ። **27**
 ምን ካሻኖ ካኦራረ እባዶትና ሁዱሮኮ ናባደረ ምን ካሻኖኮክ ኡፋ ባናማኖ
 ካኮደያረ ጎራታ፤ ካሸያመራ እባዶ ኢሰ ካቤሮ ኣነ ኡሱን ሌረ እስኦቲሳ ላጋዳይን
 ሺፋ ምክተ። **28** ጳውሎስ አደ ያየ ጦቂሰረ፤ “ኖ ዱባ ህታኒ ግና፤ እስኦታ ጉት
 ታማላን አሮገግሳተ” አመ ኦኬን። **29** ምን ካሻኖ ካኦራረ እባዶትና ዱብ ኤባተ
 አታተረ ቲየ ኦሮዴ ታበ፤ ሀርኣ ኦጳውሎስና ኦሰላሰ ሉቃ ሄገሊ እዬ፤ **30** እሶ ሳር
 አተ ቤጉረ፤ “ጎቶሌቲ! አን ፋይን መ ፈላ?” አመ። **31** እሶና፤ “ጎታ የሱሳይ አማን፤
 አትና ካምን እባዶካና ፋይታንዋ” አመን። **32** ካጎታ ሃፋራ ኡሱና ምንኬሳ ካግሮ
 እባዶ ዱባውን ሰገን። **33** ምን ካሻኖ ካኦራረ እባዶትና ሄመን ኤሰ ሳቲዋ ገሰረ
 ሜጋትሶ ኣልሰ፤ ጎርሰዋ ኡሱና ምንኬሳክ እባዶና ጣማቃመ። **34** ምን ካሻኖ
 ካኦራረ እባዶትና ምንኬሳ አተ ሴተረ ባቦ ሆረ ካየ፤ ካምን እባዶኬሳነ ዋታ ዋ
 አማናኖይ ኣሎ ገጌላተ። **35** ኡል ካኮባራረ ጎራታ፤ ሞትጆልና፤ “ሁኡ እባዶጃ
 ፋር ጋፋር” አመረን ፎልሲጆል ፋረን። **36** ምን ካሻኖ ካኦራረና፤ “ሞትጆል እስን
 ጎሳፋራንታኩን አጃጃራን፤ ሃንሱን ብያዴነ ኖጎዳ ጋላ” አመ ጳውሎስን ሰገ። **37**
 ጳውሎስ አደ፤ “ኖ ካሮም ኡልኮክ እባዶ ሌነ ግራን፤ ጎሳ ሆረ ፍርዳ ካላይ
 ቦጨረን ምን ካሻኖ ኖ ታብሰን፤ ሀያ ግዳ ሰያምሰ ቤስን ዶታራን? ሂክ ሃ ሊን
 ላኮዳንዳሮ፤ እሶ እስ ኤሜይረን ኖ ሀቤሴን!” አመን። **38** ፎልሲጆልና ሂካ አየሰ
 ሞትጆል ሰገን፤ እሶና ጳውሎስና ሰላሰ ካሮም እባዶ ላኖ ካኮማላረን ጎራታ
 ኔን፤ **39** እሶ እስ ኤመተንጉረን ባንሰና አመንጉረን ምን ካሻኖኮ ቤስን፤ እሶና
 ኤሰ ካታማ ጋፋር ጎሳቤራውን ኤባተን። **40** ጳውሎስና ሰላሰ ምን ካሻኖኮ
 ቤንጉረን ምን ካሊዳ ሴተን፤ ኤሰና አማኒል ሄሌረን አታይሰሬን፤ ኤሰኮ አባባተን
 ሴተን።

17 ጳውሎስና ሰላስ እንፍጾልንና አጽሎንያን ሮረኔን ታተሰሎንቄ ካታማ ቶስ ሴተን፤ ኤሴና አይሁድኮክ ምን ካሌብ ግረ። **2** ጳውሎስ ጎሳካሳናየ አይሁድኮክ ምን ካሌብ ታበ፤ አይሁድን ካፎልሲ አልማ ሴድ ቁሉክ ማጻፋጃልኮ ባንኤ ቱሳ አጋልሰሳ ግረ፤ **3** ክርስቶሳ ራኮ አታዬና ጎይኮ ኪን ካዶትሳሮ ላኖ አዴሰስ አጋልሰሳ ግረ፤ “ሂክ እን እስኩን ካላላባራ ሃፋራ የሱሳ ኡሱ ክርስቶሳያ” አመ። **4** አይሁድኮክ ኮኮ አባዶ ካማለሮ ሃፋራ አታተረ ጳውሎስና ሰላስን ዎታ ኮ ሌን፤ ኡሱማለና ዋ ካሄደይሳታራ ኣሎ ካሞጋን ካግርክ እባዶና ካታማይ ካአዴሳመራ ሄለል ሃፋራ አታተረ እሱን ዎታ ኮ ሌ፤ **5** አይሁድ አደ ጋቤረ ፈሎ ካፈላኖን እባዶ ራ ራኮ ኩኩይሰሬን ከኬሴን። ካታማ ኦሮ ሻላጎ ጎሳኬሮን የሌን፤ ጳውሎስና ሰላስ ጎሳን ቤስ ሰስን ካኢያሶን ምንኮክ ኡፋ ኤብሴን ታቤን። **6** አየሱን ጎአመን እሶ ሄልን ዋቴንጉረን እያሶንና አማኒል ኮኮ ካታማይ ኦዶናት ኦአባወን ሮርስ ሰስን አበን ጊታ ኣተን ሴተን፤ ሃ አማ ኦካ ግረን፤ “ሂኒዕ እባዶጃ አላም ዱባ ኦሻላጋሬን ግዳ አደን ሂታራ ኤመቴራን፤ **7** እያሶንና ምንኬሳ እሶ ቆጶተራ፤ ሂኒዕ ዱባና ‘የሱሳ ካአማማራ ካካለ ዎኖ ግሮዋ’ አማ ካሮም ዎኖ ቁሳርኮክ አጃጃ ኦኔባታራንያን።” **8** ጎሳና ካታማይ ኦዶናት ኦአባናየን ሂካ ካኮማላረን ጎራታ ሻላጋሜን። **9** ኤስኮ እያሶንና ካካለ ኡሱን ዎታ ካግረ እባዶ ዋስ ኡምሰሴረን ጋፋሬን። **10** አማኒልና ባኔዋ ጳውሎስና ሰላስ ሄመን ጠኤ ኡል ካቤርያ እጃጃረ፤ እሶና ኤስራ ካኮገያረን ጎራታ፤ አይሁድኮክ ምን ካሌብ ቶስ ታቤን። **11** ቤርያይ ካግራ እባዶ ተሰሎንቄይ ካግሮ እባዶኮ ዎዳናመክ ማንኮሌን ማራን ሃፋራ ካአቲቲ ሀልቻይ አታቴን፤ ሃፋራና ሩም ላኖ አዴሰን አመረን አርጌቶ ቁሉክ ማጻፋል ቆቆራ ግረን። **12** ሃንሱን እሶ ኦሮኮ ካሞጋን አማን፤ ኡል ካግርኪ ዱሩማ ካአዴሳመረ ካሞጋን ሄለልና ባባርና አማን። **13** አየሱን ጎአመን ተሰሎንቄይ ካግራ አይሁድና፤ ጳውሎስ ቤርያይና ሃፋራ ካዋ ላላባኖ ካኮአዴሳሬን ጎራታ ኤስራ ሴተን ጎሳ ሻላጌን። **14** ኡሱ ጎራታ አማኒል ጳውሎስ ባኔዋ ላቡ ቶስ ፋረ፤ ሰላስና ጢሞቶሳ አደን ኤስ ሄሴን። **15** ጳውሎስ ኦሱሱካሬን እባዶጃ ኡል ካአቴና ገግሰን፤ ኤስኮ “ሰላስና ጢሞቶሳ ሀአዳላኖን ሳም እን ቶስ ሀኤመቴን” ካአማሮ እጃጃ አታቴረን ቤርያ ቶስ አባባተን ሴተን። **16** ጳውሎስ ታአቴና ካታማይ ሀማጼረ ሰላስና ጢሞቶሳ ኦራ ግራንቲ ካታማ ኦሮ ቶልቻል አማጋማኖ ዴጉረ አያናኬሳ ጫናቃመ። **17** ሃንሱን አይሁድኮክ ምን

ካሌብ አይሁድና ዋ ካሄዶይሳታሮ አይሁድን ዋታ ሶንጎኒ አርጌቶ ካሌሰላሮ
 እባዶን ዋታ ሆልቶታ ግረ። 18 ኤፕሮሶጃልና እስቶክጆል ኦኦማማሬን መጠን
 ኦኦዬሳሬና ኡሱ ቶስ ኤመተን ዶጋማ ግረን። ኮኮ እባዶ፡ “ሂክ ሄንተፈለት
 መ እምን ዶተራ?” ጎእምሮ፤ ካካለና አደ “ካሉሱብ ዋልኮክ ጋራ ካኦዬሳሮ
 ኣን ላራ” እማ ግረን፤ ሂካና ካኮንአማረን ኣላንቲ ጳዉሎሳ ካየሱሳ ጎይኮ
 ክያኖኮክ ጋራ ማንኮላላበረ ማራንዮ። 19 ሃንሱን ጳዉሎሳ እቤረን አርዮሰፋጎስ
 ታአማማቶ ባንኤ ኩኩ ካአማሮ ጎሳ ቶስ ኬንንጉረን ሃ አመን፤ “ሂክ አት
 ካአጋልሰሳታ ካሉሱብክ አጋልሰሰ መዮ እዳሰን ዳንዳና? 20 ኮኮ ካእዳሳሞን
 እየሰ ማልነና፤ ሃንሱን ሂክ እየሰ መዮ እዳሰን ዶታና።” 21 እሶ ሂካ ካኮንአማራን
 ካአቴና እባዶና ሳርኮ ኤመተረ ታአቴና ካታማይ ካሀማጼራ እባዶ ዱባ እየሰ
 ካሉሱብ ኦዬሳኖዬና ማላኖይ ጎራታ ሮርሳዬን ማንኮዶታታሬን ማራንያ። 22
 ሃንሱን ጳዉሎሳ አርዮሰፋጎስኮት ባንኤ ካኩኩአመሮ ጎሳ ሆረ እሌረ ሃ አመ፤
 “እሰን ካአቴና እባዶ! ምና ዱባነ ኣሎ ካሄዶይሳታን ላኖ እን አዳሰራ፤ 23
 ካታማትሰኒ እን ሀጋቶላ ሰሌታ ታኮሄዶይሳታን ባንኤጆል ጎዳሮ ‘ካእዳሳሞን
 ሄዶን’ እማንተ ታጻፋንተቶ ታፋላ ባንኤ ሄለ፤ ጎርታ እን እሰኩን ካሰጋራ ሂካ
 ሀእዳሶን እሰን ካሄዶይሳታን ሄዶ ማራንያ። 24 “ኡሱ አላምና አላም ኦሮ ካግሮ
 ዱባ ካመጠሮያ፤ ካዳሩረና ካኡሌ ጎታያ፤ ኡሱ ገነ ታእባዶይ ካማዳራመሮ ምኒ
 ላኮግራሮ፤ 25 ግርና ኔፎና፤ ካካለ እየሰ ዱባ እባዶን ካሰሳራ ኡሱ ማንኮሌ
 ማራን ኮና ኡሱን ላኮሀንቃታሮ፤ ጋርጋርሳ ካእባዶና ኡሱን ላኮዶትሳሮ። 26 ኡሱ
 ሳኒ ዱባ እባዶት ኮኮ መጠራ፤ ኡሊ ዱባ ጉቲና ጎሳግሮን የለ፤ ጋምሳን ጌሰጆልና
 ታኮግራን ባንኤ እሶን ካዮ። 27 ሂካና ኡሱ ካኮንየለራ እባዶ ሄዶ ጎሳዶታሮና
 ቆቆራታኖይና ኡሱ ዶታይ ሄላይን ጎሳዳንዳሮንያ፤ ጎሌና ኡሱ መተ መተ ኖኮ
 ፋክ ካእመያ እማኖ ላኮዮ። 28 ‘ኖ ግር ካኮሄላታናና ካኮአእና፤ ካኮግርናናና
 ኡሱያ፤’ ሀክና እየሱን ኦበቤራን ኦትሰን ‘ኖ ዱባ ይሰኬሳና፤’ ጎሳአማራንያ። 29
 “ጎርታ ኖ ይሰ ካዋ ጎሌነ፤ ዋ ቃሩማ ታእባዶይና ቆፋ ታእባዶይ ዋርቂኮ ጎርቱን
 ብርኮ ጎርቱን ኤኤሞኮ ካፈላመሮ ኣን ላራ እም ቆፒን ኖን ላኮዶትሳሮ። 30
 ጎርታ እባዶ ሆርኮ ማላባናዋቲ ካፈለሮ ዋ ኢሳገ ሮረራ፤ ግዳ ጎአመን ኡል
 ኡሊ ካግራ እባዶ ዱባ ጨቦኮ ጎሳጉላ ጋሎን እጃጃራ። 31 ኡሱ ካአሳባተሮ
 እባዶትኮክ ጋራን አላም ዱባ ጉት ሩሚ ታኮፍርድናሮ አሪ ሙርቲሳተራ፤ ሂካና

ዱባውን ካኮአዴሰሰራ ሀሱ ካአሳባተሮ እባዶት ጎይኮ ኬሳኖይያ።” **32** “ጎይኮ ከያኖ” ካአማሮ ሃፋራ ካኮማላረን ጎራታ ጋምሳ ቃጭፋተ፤ ካካለ አደ “ህታ ሃጃኮክ ጋራ አሪ ታካለ አት አዬሳ ግራን ኖ ማልናና” አመን። **33** ኤሰኮ ጳውሎሳ ጎሳ ኦሮኮ ቤ ሴተ፤ **34** እባዶ ኮኮ አደ ጋራ ካጳውሎሳ ቶሰ ሌረ አጋልሰሰኬሳ አማነ፤ ካአማኔሮ እባዶ ኦሮኮ ካአርዮፋጎሰ ሃጋናውን ኡና ኦሌረን ድዮናሰዮሰ ካአማመረ እባዶትና ደማረሰ ታአማንተቲ ሄለልትቲ ቶና፤ ካካለ እባዶ እሶነ ዋታ ግረ።

18 ኤሰኮ አባባተረ ጳውሎሳ አቴናኮ ኬረ ኡል ካቆሮንቶሳ ሴተ። **2** ኤሰ ኡል ካጸንጢዮሳክ ካሌረ አቅላ ካአማማረ ኮ ካአይሁድ እባዶት ሄለ፤ ካሮም ዋኖላልኮክ ዋኖ ቀላዉዶሳ አይሁድ ዱባ ሮምኮ ጎሳቤራኑን አጃጂ ማንኮግረ ማራን አቅላ ኦርቲሳ ጳርሰቂላነ ዋታ ኢጣልያኮ ጋና ኤሜታኖየ፤ ሃንሱን ጳውሎሳ እሶ ቶሰ ሴተጉረ እሶነ አሰአዴሰሳቴን፤ **3** ፈሎኦቴሳ እሶ እን ዱንካኒ ኢሪራኖ ማንኮሌ ማራን እሶነ ዋታ ሀማጼረ ራቶ ኢሪራ ግረ። **4** አይሁድን ታፎልሲ አሪ አይሁድኮክ ምን ካኤብ አዬሳ አይሁድና ግሪክ አማንቶሲን እጻማ ግረ። **5** ሰላሰና ጢሞቶሳ መቀዶንያኮ ካኮኤማተሬን ጎራታ ጳውሎሳ አታይሰ ላላባ “የሱሳ ኡሱ ክርሰቶሳያ” አማ አይሁድን አቶታ ግረ። **6** አየሱን ጎአመን አይሁድ ካኮኔባታሬና ካኮሀባራሬን ጎራታ እሶን ሴርሳኖ ጎሳሌሮን ሳርሰኮ ጎራ ሁርጉፋተረ “ጎርታ አሰን ጎፍርዳንቴና ባሰክሰኒያ! እን ኦዶናት ላኮአቡ፤ ጎርታ ሂታኮ ሆረንባን አይዛብ ቶሰ ሴይናራ!” አመ። **7** ሃንሱን እሶኮ ካለቤረ ቲቶሳ እዮሰጦሳ ካአማማረ እባዶትኮክ ምን ሴተ፤ ሂክ እባዶት ዋ ካሄዶይሳታረየ፤ ምንኬሳና አይሁድኮክ ምን ካኤብ ዶሌ ግረ፤ **8** ቀርሰጾሳ ካአማማረ ካአይሁድ ምን ካኤብኮክ ዋይቻት ካምነ እባዶኬሳነ ዋታ ጎታይ አማነ፤ ካሞጋን ካቆሮንቶሳ እባዶና ጳውሎሳ አዬሳ ግራን ማለረ አማነ ጣማቃመ። **9** ጎታና ጳውሎሳነ ሄመን ራጋይ ሃ አመ፤ “እሮአብሳተ፤ አየሰ፤ ጫልኢ እሮአንተ፤ **10** እን ኩኔ ዋታ ግራ፤ ህታ ካታማይ እን እባዶ ካሞጋን አባ፤ ኩ ጉት ሚራኦ ካጌግሰራ ማዮና ላኮግሮ።” **11** ሃንሱን ጳውሎሳ ሃፋራ ካዋ ጎሳ አጋልሰሳ ጌሰ ኮና ምናና እሶነ ዋታ ኤሰ አዳላተ። **12** ጋልዮሳ ኡል ካአካያኮክ ሞት ሌ ታኮሹማመሬ አይሁድ ራቶ ሌረ ጳውሎሳ ጉት ኬ፤ ታፍርዳ ሾንጎ ቶሰ ጌሰንጉረን፤ **13** “ሂክ እባዶት ሴራ ፈኢ ካኮሰሶን ራድ እባዶ ዋ ጎሳሄዶይሳሮ የላራ!” አመን። **14** ጳውሎሳ

አባብ ሰሰን ኤካሳተ ግራን ጋልዮሳ አይሁድነ ሃ አመ፤ “እሰን ታእይሁድ ኡና! ባስ ጎርቱን ካኦቲ ዋንጃላ እስኒ ጉት ካፈላመሮ ሊ ግረዋ ዋቶክሰን ኡብሲ እን ማላረዋ፤ **15** እየሱን ጎአመን ሃፋራ ካእባደ ማራን፤ መገጃል ማራና ሴራክሰኑን ካደጋማታን ጎሌ ሃጃትሰንታ፤ እን ሂካ እየሰ ጉት ፍርድን ላኮዶታሮ።” **16** ሃ አመረና ታፍርዳ ሾንጎኮ እሶ ቤሰ። **17** ሀሱ ጎራታ ዱባና አይሁድኮክ ዋይቻት ሶስተኔስ እቤንጉረን ሾንጎ ሆረ ቦጨን፤ ሂክ ዱባ ሃ ላ ግራንቲ ጋልዮሳ ሂካ እየሱን ክንትብ ላኮሰሰሮ። **18** ጳውሎሳ አማኒልነ ዋታ ታንጂን አሪ ቆሮንቶሳይ አዳላተረ እሶን ሮግዳ ግራ አመረ ኤስኮ ኬረ ሶርያ ቶስ ሴተ፤ ጲርሰቂላና አቅላ ኡሱን ዋታ ግረን፤ እየሱን ጎአመን ኡሱ ገፋ ማንኮአባናየ ማራን ሴታናኮ ሆረን ክንክርያ ታእማማቶ ባንኤ መተ ሆላተ። **19** ታኤፈሶን ካታማ ካኮገያረን ጎራታ ጲርሰቂላና አቅላ ኤስ ኢሰ፤ ኡሱ ጎአመን አይሁድኮክ ምን ካኤብ ታበረ አይሁድን እዬሳ ግረ። **20** ኡሱ እሶን ዋታ ታንጂን ጎአዳላሮን ጎኤባተና እሶን እን ላኮአመ። **21** እየሱን ጎአመን፡ “ፈኢ ታዋ ጎሌተ አሪ ታካለ እሰን ቶስ አባባይ ኤመይናራ” አመጉረ ኤፈሶንኮ ማርካፋ ኮራተረ ሴተ። **22** ቅሳርያ ቶስ ካኮገያረ ጎራታ ኤስኮ ኢየሩሳሌም ሴተረ ምን ካዋክ አባዶን ሮግዳ ኣተ አባባተ እንጾክያ ዳገ። **23** ኤሴና አባራን ጋጭመ፤ ኤስኮ አባባተረ ኡል ካጋላትያይና ካፍርግያይ ኡልኮ ኡል ቶስ ማራሙራ አማኒል አታይሰ። **24** አላታኑን ኡል ካእስክድራክ ካሌረ እጲሎሳ ካእማማረ አይሁድት ኮ ታኤፈሶን ካታማ ኤመተ፤ ኡሱ ቁሉክ ማጻፋል ማዳረ ካእጋልሳተሮና እየሰ ካካሶ እባዶትዮ። **25** ኡሱ ራ ካጎታ ካእጋልሳተሮና እያና አማጋመረ ጋራ ካየሱሳ ልክ ላላባና እጋልሰሳ ግረ፤ ሀሌዎ ኳሬ ኡሱ ካካሳናየ ካያንሳ ጥንቃታ ካላልዮ። **26** ኡሱ አይሁድኮክ ምን ካኤብ ጃቡይ እዬሳኖ ሀጋእበ፤ እየሱን ጎአመን ጲርሰቂላና አቅላ ካኮማላረን ጎራታ፡ ምንክሶ ጌሰንጉረን ራ ካዋ ካሆሬኮ ሮርሰን ልክ ፋሬን ኡሱን ሰገን። **27** እጲሎሳ ኡል ካእካያ ቶስ ሴይን ካኮሄዳታረ ጎራታ አማኒል ቆፋቴሳ ጋርጋሬን፤ አካያይ ካግራ አማኒል ጎኢዳን ኡሱ ጎቶጳሮ ዳብዳቤ ጻፈን። ኤስራ ካኮገያረ ጎራታ ሰኖ ታዋኮ ካከይ አማኒ ኦግሬኑን ጋርጋርሳ ካኦቲ ሌ። **28** የሱሳ ክርሰቶሳ ላኖ ቁሉክ ማጻፋልኮክ ሃፋራ እጋልሲሳ ዶጋማ ታኦቲት አይሁድ አዋዳ ግረ።

19 እጲሎሳ ቆሮንቶሳ ታኮግረ፡ ጳውሎሳ ኡል ካኤሌን ሮረረ ኡል ካኤፈሶን ጌ፤ ኤስ አማኒል ኮኮ ሄለጉረ፡ **2** “ዋ ካኮአማንቴተን ጎራታ እያና ቁሉክ አታቴተን?”

እመ። እሶና፡ “ላኮአታነኔ፤ ሱረዋ አያና ቁሉክ ግራኖዋ ኖ ላኮማልነኖ” እመን። **3**

ጳውሎሳና “ሀያ፡ መይ ጣማቃነቲታን?” እመ። እሶና “ካያንሳ ጥንቃታያ” እመን።

4 ጳውሎሳና፡ “ካያንሳ ጥንቃታ ጎአመን ጨቦኮ ጉላ ጋላኖኮክ ጥንቃታያ፤ ጎሳዉና ኡሱ ካእዬሰረ ‘እንኮ ሃሬ ካእዬማታሮ አማና’ አማ ግረ፤ ኡሱና የሱሳያ” እመ።

5 እሶና ሂካ ካኮማላረን ጎራታ መገ ካጎታ የሱሳ ጣማቃመን። **6**

ጳውሎሳና ገነቴሳ እሶ ጉት ካኮካረ ጎራታ፡ አያና ቁሉክ እሶ ጉት ዳገ፤ ሄኢ ታካለትና አዬሴን፤ ሄገሮ አዬሳኖና ሀጋእበን። **7** እባዶና ራቶ ቶሞንኮ ላማ ካሌሮ። **8** ጳውሎሳና አይሁድኮክ ምን ካእብ ቶሰ ታበረ ድግኒ ሴድ ዋኖናት ካዋኮክ ጋራ ዶጋማና ጎሳ ጃቡይ አጋልሰሳ ግረ። **9** ኮኮ ቶ ካየላተ ካጎታ ራ ጎሳ ሆረ ኢንጋማ ላኮአማንናኖ ካኮአማሬን ጎራታ እሶኮ ፋክመ፤ አማኒልና ካለ ቤሰረ ካጢራኖሰ አዳራሻ አርጌቶ አጋልሰሳ ግረ። **10** ጳውሎሳ ሂካ ካኮፈላግረ ጌሰ ላማዉን፤ ኡሱ ጎራታ እሰያይ ካግረ አይሁድና አይዛብ ዱባ ሃፋራ ካጎታ ማልን ዳንዴን። **11** ዋ ገነ ታጳውሎሳ ኣሎ ካሳዳምሮ ባሳ ፈላ ግረ፤ **12**

ሂካኮት ኣላንቲ ማር ካጳውሎሳ ታድንተ ሆጮ ሌተቴ ማራቢ ካሀዉአማሮ እባዶ ጎድናን ሀዉአምኮ ፋያ ግረ፤ ባቲክ አያናጃልና እሶኮ ብያ ግረ። **13** ዱርሳ እባዶኮ ቤሳ ባንኤ ዱባ ካማራሙራረ ኮኮ አይሁድ “ጳውሎሳ ካኮላላባሮ ጎታ የሱሳኮክ መገ ጎንቤታኑን ኖ እሰን አጃጃና” አማ ዱርሳ እባዶኮ ቤሰን እጻማ ግረን። **14** አይሁድን ቱቃሞኮክ ዋይቻት ካሌረ ይሰ ካእሰቀዋ ባባር ቶዶባና ኡሱማሌ የላታ ግረ። **15** እየሱን ጎአመን ባቲክ አያናጃል፡ “የሱሳ እን ካሶዋ ጋራ ካጳውሎሳና እን ካሶዋ፤ እየሱን ጎአመን እሰን እየሰታን?” እመ። **16** ባቲክ አያና ካኮግረ እባዶት ኮ ፍርመ ኬ እሶ አበ፤ እሶ ጉቲና አታተ፤ አዋደ፤ ሜጋተረን ሀዉአይ ምንኮ ባቃተን ቤን። **17** ህክና ኤፈሶን ካግሮ አይሁድና አይዛብ ዱባ ዶሌ ካኮአዳሳማረ ጎራታ፡ ዱባና አብሳተን፤ ሂካኒና ካጎታ የሱሳ መገ ካባጃመ።

18 ዋ ካአማኔሮ እባዶኮና ካሞጋን ፈሎ ኦሜላን ኦትሶ አዳሰሳተን ጨቦኮ ጉላ ጋለን፤ **19** ሞራ ኦግሬንኮና ኦሞጋን ማጻፋልክሶ ኩኩይሴን ኬንጉረን ጎሳ ሆረ ጉቤን፤ ማጻፋኮክ ዶክና ጎሄዳምሮ ጣጋራ ኩማ ኮንቶም ካሌሮ። **20** ሂካ ጋራይ ካጎታ ሃፋራ ኣሎ ሁና ጂናታና አዋዳታ ሴተ። **21** ሂክ ዱባ ካኮላረ ጎራታ ጳውሎሳ፡ ኡል ካመቀዶንያንና ካእካያን ሮር ኢየሩሳሌም ቶሰ ሴይን አያናይ ቆፔረ፡ “ኤሰራ ካኮጌ ጎራታ አድ ሮም ቶሰ ሴይን እን ዶትሳራ” እመ። **22**

ሃንሱን ኡሱ ካጋርጋራሮ እባዶኩ ላማ፡ ጠሞቶሳና ኤርሰጠሳ፡ መቀደንያ ቶሰ
 ፋረረ ኡሱ እደ ታእስያ አወራጃይ እሪ ትጫር አዳላተ። 23 ሀሱ ጎራታ፡ ራ
 ካጎታ ማራን ካእቲ ሻላጎ ኬ። 24 ድመጢሮሳ ካአማማረ ብር ታአማማቶ
 ማርጮ ካቱማረ ካእርጠምስ ምን ካቶልቻኮት ምስሊል ብር ታአማማቶ
 ማርጮኮ ፈላ ኦቱማናኑን ካንጂን ዋረኤ ሄላምሰሳ ግረ። 25 ሃንሱን ሂክ
 እባዶት ብር ታአማማቶ ማርጮ ኦቱማራና ፈሎኦትሶ እኒዕ ካእሶ ካካለ እባዶና
 ኩኩይሰሬን ሃ አመን፤ “ዋ እባዶ! ኖ ዱሩማ ካኮሄላታና ሂካ ራድ ላኖ እሰን
 ካሳንዋ። 26 ሂክ ጳወሎሳ ‘ገን ታእባዶቲ ካፈላመሮ ምስልጆል ዋል ላኮያን’
 አማ ኡል ካኤፈሶን ካላል አንሌኖን ግራን ኡል ጋምሳ ሄሳ ታእስያ አወራጃ ዱባ
 ካግሮ ጎሳ ካሞጋን ኤክ ግታክ ኮ የለሮና አማንቸሳሮ እሰን እሲ ካዴተታና
 ካማልቴታንያ። 27 ሂካ ጋራ ፈሎ ኦታኑን ቱፋማኖያ፤ ሂካ ካላል አንሌኖን ግራን
 እሰያይና አላም ዱባ እባዶ ታሄዶይሳታሮ ታንጂንት ሄዶ ካእርጠምስ ምን
 ካቶልቻ ላኦ ካላይክያ አም እባዶ ሄድናራ፤ ጂናንክሰና ኢግልሳምናራ።” 28
 እባዶና ሂካ ካኮማላረ ጎራታ አሎ አማራተረ፡ “ካኤፈሶን እባዶኮት እርጠምስ
 ታንጂንትታ!” አማ ኦኬን። 29 ጎርሰዋ ካታማ ዱባይ ሻላጎ ኬ፤ ጎሳና ራቶ ኬረ
 አላታኑን ካመቀደንያ እባዶ ካሌራና ጳወሎሳ ዋታ ሰሴታ ካግረ ሳትላልኬሳ፡
 ጋዮሳና እርሰጢሮኮሳ ኣተረነ ማዳር ታኮቱሳራን ባንኤ ራቶ ቲታ ታቤን። 30
 ጳወሎሳ ጎሳ ቶስ ብን ዶታተረ፤ አማኒል ጎአመን ኡሱ ጎንቤኖንኮ ትሬን። 31
 ታእስያ አወራጃይ ኦዶናት ኦአባንኮ ኮኮ ጳወሎሳ ኦጌላታሬን፡ ማዳር ታኮቱሳራን
 ባንኤ ቶስ ጃቡይ ኡሱ ጎንታቦንኮ እባዶ ፋሬንጉሬን ኡሱ ኤባተን። 32 ጎሳና
 ሻላጋመረ፡ ኮ እየሰ ኮ ጎአዬሰሮ ካካለ እደ ታካለ አዬሳ ኦካ ግረን፤ ጋማ ካሆር
 እባዶ መወን ኤሰራ ኩኩአመሮ ዱዶ ላኮካሳናዮ። 33 ኮኮ ታእይሁድ ኡና ካሌረ
 እሰክንድር ካአማማረ እባዶት ጎሳ ኦሮኮ ሻፌን ቤሰን ጎሳ ሆረ ካኮአልሳረን
 ጎራታ፤ ኮኮ እባዶ ኡሱ ማዳር ጎንደጋምሮን ጎርሴ፤ እሰክንድር እሶን ዋታ
 ዶጋምን ዶተረ ጎሳ ጫልኢ ጎንአምሮ ማላታ ቱሰ። 34 እየሰን ጎአመን ኡሱ
 እይሁድ ላኖ እባዶ ዱባ ካኮአዴሳረ ጎራታ፡ “ካኤፈሶን እባዶኮት እርጠምስ
 ታጅንትታ!” አማ ሳቲ ላማክ ግታ ያየ ቶይ ኦኬን። 35 ኤሰ ካታማትኮክ ዋና
 ጻፍት ጎሳ ጫልኢሰረ ሃ አመ፤ “እሰን ካኤፈሶን እባዶ! ካታማ ታኤፈሶንክ እባዶ
 ካንጂንክ ካእርጠምስ ምን ካቶልቻና ዳሩርኮ ታዳይደቶ ምስሊትሴ ካኦራታሮ

ላኖ ዱባ ዶሌ ካአዳሳመያ። 36 ሃንሱን፡ ሂካ ካካካታራ ማዮና ማንኮግኖ ማራን ጫልኢ ጎጎእነታኑና ጀጀራ እየሰ ካሜላን ፈላናኮ እስኦራታኖ ዶትሳራ። 37 ምን ካቶልቻና አንሳምን ኦግራና ሄዶካንና አንሀባሮን ኦግራን እባዶጃ ሂታራ ኣተን ኤመቲታን። 38 ጎርታ፡ ደመጢሮሳና ኡሱነ ዋታ ኦግራን ብር ታእማማቶ ማርጮ ኦቱማራን ካሞታራን እባዶ ጎግረ ምን ካፍርዳ ግራ፤ ኦዶናት ኦአባና ግራን፤ ኤሰ ሀታማጋቲን። 39 ሂካኮ ካካለ እስን ሆሳይን ካዶቲታን እየሰ ጎግረ፡ ታሴራ ሾንሳይ ድያምናራ። 40 ጎርቱን ሀታር ካሌሮ እየሱን፡ ‘ሻላጎ ከኬሰራን’ እማምን ጎጎሞታሞንኮ ኖ አብሰሳራ፤ ‘ሂክ ሻላጎ መኮት ኣላንቲ ኬራ’ እማም ጎሆሳምን ካሰንሶ አባብ ላኮአብኖ።” 41 ሂካ አዬሰ አባባተረ ጎሳ ጎጎዳርአምሮ የለ።

20 ሻላጎ ጫልኢ ካኮአማረ ጎራታ ጳዉሎሳ አማኒል ኡመጉረ ጎርሴ፤ ሱሱካመረ ኡል ካመቀዶንያ ቶሰ ሴይን ቤ። 2 ኡሱ ታሮራሮ ባንኤ ዱባ ሃፋራ ካሞጋኒ እባዶ ጎርሳ ኡል ካግሪክ ጌ፤ 3 ኤሴና ድግኒ ሴድ ሀማጼ። ኡል ካሶርያ ሴይን ኤካሳታ ግራና አይሁድ ዳባ ኡሱ ጉት ፈለ ማንኮግረ ማራን፡ ኡል ካመቀዶንያን አባባይን ጎሳተ። 4 ካጳይርሁሳ ኤረ ሶጳጢሮሳ ታቤርያ ካታማኮ፡ እስጢሮኮሰና ሰኮንዱሳ ታተሰሎንቄ ካታማኮ፡ ኡል ካደርቤኮክ ጋዮሳ፡ ትክቆሳና ጢሮፍሞሳ ጢሞቶሳ ታእስያ አዉራጃኮ ኡሱነ ዋታ ሴተን። 5 ሂኒዕ እባዶጃ ሆረ ሴቲረን ጢሮአዳይ ኖ ኦሬን። 6 ኖ ጎአመን ካባቦ ባላ ሮረ ግራን ካፍልጲስዮሳ ኡልኮ ማርካፋ ኬኔ ኦሪ ከን እሶ ታኮግራን ባንኤ ጢሮአዳ ቶሰ ጌኔ ኤሰ እሶ ዋታ ኤሰልንኔ ኦሪ ቶዶባ ሀማጲኔ። 7 አልማኮ ታሆራርጃ ኦሪ ባቦ ኣምን ራቶ ኩኩአምን ግራን፡ ጳዉሎሳ ታላም ኦሪ ሴይን ማንኮሄደረ ማራን፡ እሶነ ዋታ እዬሳ ግረ፤ እዬንሳ ሄመን ጠኤ ታጌሮ ኤራሰ። 8 ኖ ካኮኩኩአምንኔ ፎቂ ጉት ካሞጋን ኮሮንታ ግረ። 9 አዉጠኪሰ ካአማመረ ዋዳላት ኮ ማሰኮቲ ጉት ሀማጼ ግረ፤ ጳዉሎሳ እየሰ ካኮኤራሳረ ጎራታ ዱትሰጉረ ጋፋራተ ሁዱረ ኢሳገ፤ ፎቂ ካሴድኮ ሃገልዳ እዬ፤ ካኮኬሰራን ጎራታ ካጎየሮ ዳን። 10 እየሱን ጎአመን ጳዉሎሳና ዳገጉረ ኡኑ ቶሰ ሁሰ አመረ ካባላተ አባተጉረ፡ “ኤፎ ላኮቤተቶ አሮሻላጋንተን” አመ። 11 አባባተጉረ አደ ፎቂ ቶሰ ቤ፤ ባቦና ኤብሳተ አማኒልነ ዋታ አመ፤ ኡል ታባርሮ እባዶነ ዋታ ታጎጂን እዬሰ አባባተረ ኬ ሴተ። 12 እባዶና ሀሱ ዋዳላት ጎይኮ ካሄሰሮ ምን ጌሰ፤ ሂካኒና ኣሎ ጎጎእና ሄላቲን። 13 ኖ አንዴ ጳዉሎሳ ቆጳይን ጣይን ማርካፋ ቶሰ ሴን፤ ኤሰኮና ማርካፋ ታእሰሰ

ካታማ ቶስ ሴነ፤ ሂካ ኖ ካኮንየልነና ጳውሎሳ ባጋነ ታአሶን ካታማ ታጌሮ
 ሉኪ ሴይን ማንኮቆፔረ ማራንየ። **14** ታአሶስ ካታማ ኡሱነ ዋታ ካኮኤሰላነ
 ጎራታ ኡሱ አንተጉነ ዋታ ማርካፋይ ኡል ካምጢሊን ሴነ። **15** ታላም አሪ
 ኤሰኮ ኬነኔ ክዮስ ሆረ ታግቶ ኦዶላ አራንጃ አባኔ። ጌባር ኬነ ኡል ካሳሞስ
 ናቅነ፤ ታላም አሪ አንዴ ኡል ካምልጢን ጌነ። **16** ጳውሎሳ ታአሰያ አውራጃይ
 ጎራታ ጎሳባኖንኮ አመረ ታኤፈሶን ካታማ አንታቦን እስ ሮርን ዶተ፤ ኡሱ ሂካ
 ካኮንየለሪ ካጸነጠቆስጠ ባላ ኢየሩሳሌም ሙትን ማንኮቆፔረ ማራንየ። **17**
 ጳውሎሳ ካምሊጢ ኡልኮ ታኤፈሶን ካታማ ቶስ አባዶ ፋረረ ምን ካዋት ጃርሶለ
 ኡምሰስ፤ **18** እሶ ኡሱ ቶስ ካኮኤሚታሬን ጎራታ፡ “ታአሰያ አውራጃ አን ታኮታበ
 አርኮ ሀጋአበረ አርጌቶ አሰኔ ዋታ ምሲ አን ግረ እሰን ካሳንዋ፤ **19** ካአይሁድ
 ዳባኮ ካከይ ራኮ እን ጎጌተና፡ ታአማጋንተ ኦብሲና አሎ ኦታ ጎታውን ሀንዳ ግረ።
20 አጋሪ ሆረና ሌረ ምን ምንክሰኒ እሰን አጋልሰሳ ግራን ካማድሮ ዱባ አን
 እሰኑን ሰገረ ኳሬ፡ አየሰ ኮና ላኮሃሰሮ። **21** አይሁድና ሌረ ግሪክ ጨቦኮ ጉላ
 ጋል ዋ ቶስ ጎሳአባባናውና ጎታካን የሱሳ ጎሳአማናውን አን እሶ ሴረራ። **22** ግዳና
 ኤሰራ ጎጌ እን ካግናሮ ሀአዴሶኒ አያና ቁሉክ አጃጃመረ ኢን ኢየሩሳሌም ቶስ
 ሴታኖያ። **23** ሀሌዎ ኳሬ ታኮሴየ ካታማ ዱባ አያና ቁሉክ ኢነ ዋታ ሴታራ፤ ሻኖና
 ራኮ እን ካግናቶ ላኖ ኢን ሰገራ። **24** ሀሌዎ ኳሬ ካዋ ካሰኖ ዋንጋላ አጋልሰሰን
 ጎታ የሱሳኮ እን ካአታዬሮ ሀንዳ ጎጉሳየ ግርኬውን እን ላኮያድናሮ፤ ኔፎቴውና
 እን ላኮነኤይሳይናሮ” አመ። **25** “ግዳ ጊን እሰን ዱባ ኦሮ ማራሙራራ ዋኖናት
 ካዋ ላላባ ግረ፤ ጎርታ ሂታኮ ሆረንባን በቤድቴ ካዴኖን ላኖ እን አዴሳራ።
26 ሃንሱን እሰንኮ ኦዶ ኮ ጎባየና እን ኦዶናት ካአቦን ላኖ ሀታር እሰኑን እን
 አዴሰሳራ። **27** ቆፋ ታዋ ዱባ እን እሰኑን ሰገራ ኳሬ ኮና እን ካሃሰራ አየሰ
 ላኮግሮ። **28** አያና ቁሉክ እሰን ኤጲስ ቆጶስ የለ ሹመራ፤ ጎርታ እሰኑትሰኑና
 ማቴውን እሰኑራዬን፤ ዋ ኤረኬሳክ ኢግ ካዋዳተሮ አማኒል ፎፋ። **29** እን ኮኮሴየ
 ጎራታ ማቴውን ካነኤይሳኖን ሀዬይ ኣን ቦግካአቲ አባዶ እሰን ኦሮ ካታብናራን
 እን ካሶዋ። **30** ኡሱማሌ አባዶ ኮኮ እሰን ኦሮኮ ኪጉረ ካዋጫጫመ አጋልሰሰ
 አጋልሰሳኖይ አማኒል ካምጋን እስ ቶስ አትናራ። **31** ሃንሱን እሰን መተ መተ
 ጌስ ሴዱን አሪና ሄመና እን ኦታ ካጎርሴሮ ሻዳ እሰኑራዬን። **32** “ግዳና እሰን
 ጣቢሰና ቁሉለ ኦሮ ርቲ እሰኑን ሰሰን ካዳንዳሮ ዋውና ሰኖቴሳክ ሃፋራን እን

ሀዳራ ሰሳየራ። 33 እን ታማታዮት ብርና፣ ዋርቂ ሳርቱን ሳርስ ላኮሀልቺሮ። 34
 ገነቲይ ፈላይናራ፤ እስክቴና ሌረ ሳትላልቲ ጋርጋራ ግራኖ እስን መተክሰኑን
 ካሳንዋ። 35 ኣታታኖኮ ካሰሳራ ካሰማሳመያ ካእማሮ ካጎታ የሱሳ ሃፋራ ሻዳ፣
 ገነታን ፈላታ ካዋተ ጋርጋርን ካዶትሳሮ ራ ካዋጋን እን እስክን ቱሰራ።” 36
 ሂካ እመ አባባተረ ጳውሎሳ ዱባነ ዋታ ግልቢሰረ ዋ ኤባተ። 37 ዱባና ኦተረነ
 ጳውሎሳ ካባላቲን አባቲረን እንጋቲን። 38 ካካለኮና አሎ ካኮጋዴራን፣ “ሂታኮ
 ሆረንባን በቤድቱ ላኮድናታን” ማንኮአመረ ማራንየ፤ ማርካፋ ታኮግሮ ባንኤ
 ታገራንና ኡሱ ሱሱኬን።

21 ኖ እሱኮ ካለ ቤነ ማርካፋ ኮራኔ ቆስ ታእማማቶ ኦዶላ ቶስ አባኔ፤ ታላም
 አርና ታሩድ ኦዶላ ቶስ ገነ፤ ኤሰኮና ታጳጢራ ካታማ ቶስ ሴነ። 2 ኤሰ ኡል
 ካፍንቀ ካሴታሮ ማርካፋ ሄላነኔ ኡሱ ታብነ ሴቶ ሆረዴነ። 3 ታቆጸሮስ ኦዶላ
 ሞና ታበተ ሃንሰኔ ኡል ካሶርያ ዱዳነኔ ካጢሮስ ማርካፋ ታኮአላሮ ሴነ፤
 ማርካፋ ጫና ኤሰ ማንኮዳግሰናረ ማራንየ። 4 ኤሰ አማኒል ዶታን ሄላነኔ እሱን
 ዋታ አሪ ቶዶባ አዳላነ። እሱና አያና ቁሉክ ቃጄለረን ጳውሎሳን “ኢየሩሳሌም
 አርሴተ” አመረን ሰገን። 5 ኖ ኤሰ ካኮአዳላይናን ጎራታ ካኮጉዳታረ ጎራታ፣ እሱ
 ኢንሰነ ሴቶታን ሆረዴነ፤ ዱባና ኦርጂልክሶንና ይሳሰክሶን ዋታ ታ ካታማኮ ሳር
 ቤሰናና ኖ ሱሱኬን፤ ላቡግርዲና ግልቢንሰ ኤባነ፤ 6 ኖሳዳ ግራ አምነኔ ኖ
 ማርካፋ ታብነ፤ እሱና ሞንክሶ አባባተን። 7 ጢሮስኮ ኬነጉነ ጳጠለማይሰ
 ቶስ ገነ፤ ኤሰ አማኒልን ዋታ ኤሰልን ኖሳዳ አንተ አባባነን እሱን ዋታ አሪ ቶ
 ሀይነ። 8 ታላም አሪ ኤሰኮ ቤነን ቅሳርያ ገነ፤ ዳቆን ቶዶባኮ ኮ ካሌረ ዋንጋላው
 ጳልጳሳኮክ ሞኒ ታብነኔ ኡሱን ዋታ ሀማጽኔ። 9 ኡሱን ሄገሮ ካአዬሳረ ዴለሉማ
 ካአባናየ ዴለል አፋሮ ግረ። 10 ኤሴና አሪ ታሞጋን ካኮሀማጸነ ጎራታ አጋቦሳ
 ካአማማረ ካሄገሮ ካይሁዳ ኡልኮ ኤመተ። 11 ሂክ ካሄገሮት ኖ ቶስ ጋባላመ፤
 ካጳውሎሳ ሞዋኖ ኣተረ እሲ እስክቴሳ ገነኖና ሉቃና ሻተጉረ “አያና ቁሉክ ሂካ
 ሞዋኖኮክ ኦዶ ኢየሩሳሌም ካግራ አይሁድ ሂካማሌ ኡሱ ሺጉሬን አይዛብን
 ሮርስ ኡሱ ሰሰናራን አማራ” አመ። 12 ሂካ ካኮማላን ጎራታ ኖና ኤሰ ካግረ
 አባዶና ጳውሎሳ ኢየሩሳሌም ቶስ ጎንሴኖንኮ ኤባነ። 13 ጳውሎሳ ጎአመን፣
 “እስን ሃ ኦታ ዋዳናቲ ሙን ጨቡጨቡኢሳታን? እን ሻማኖ ኢሳዴነ ጎታ የሱሳኮክ
 መገን ኢየሩሳሌም ጎይና ካኤካሳየሮያ” አመ። 14 ጎርሳካካን እን ላኮአታይናሮ

ኡሱ ማንኩአመ ማራን፡ “ጎርታ ታጎታ ፈኢ ሀሌቶ” አምነኔ ኢሳይነ። 15 ኤስ አሪ ትጫር አዳላነኔ ሁካን ኤካሳነኔ ኢየሩሳሌም ቶስ ሴነ። 16 ቅሳርያይ ካግረ አማኒል ኮኮ ኖኔ ዋታ ኤመተ፤ እሶና ምን ካምናሶን ጎጎፎልሳኖን ኡሱ ቶስ ቃጃልሴን፤ ሂክ አባዶትና ጣየ ካአማነረ፤ አላታኑን ኡል ካቆጲሮስክየ። 17 ኢየሩሳሌም ካኮግያነ ጎራታ አማኒልና ገጌሎይ ኖ ቆጶተ። 18 ታላሚ አሪ ጳውሎሳና ኖኔ ዋታ ያይቆባ ቶስ ሴተ፤ ምን ካዋት ጃርሶለ ዱባና ኤስ ግቴ። 19 ጳውሎሳ ዱባና ኖጎዳ ኣተ አባባተረ፤ ዋ ጋራኬሳነ አይዛብ ኦሮ ካፈለሮ ዱባ ቶቶል እሶን ሰሰጌ። 20 እሶና ሂካ ካኮማላረን ጎራታ፤ ዋ ጋላተን፤ ጳውሎሳና ሃ አመን፤ “አብካን! ኩማ ካሞጋን ካቶታምራ አማኒል አይሁድ ኦሮ ኦግራን ዱባና ሴራን አወደታማራንያን። 21 አይዛብ ኦሮ ካግራ አይሁድ ዱባ ይሰክሰን አሮሀማጽሰን ጎርቱን ዋጋል አሮፈልቴን አንተ አት አጋልሰሳ ሴራ ካሙሴ ጎጎኢግልሰራኑን የላታ አማ ካአዬሳማሮ ማሌራን። 22 ጎርታ ምስ ጎየሌን ኢድራ? ኤሜቶታ እሶን ማላኖ ካሄሶንያ፤ 23 ሃንሱን ኖ ኩኔ ካአማኖ ፈል፤ ኖ ኦሮ ገፋ ካእባ አባዶ አፋሮ ግራ። 24 እሶ አት ሴዴ እሶን ዋታ ሌደ እስኦታ ሙጭሳ፤ መተክሶ ጎጎሆላራኑን ቁሉክ ምን ካዋወን ካሰሳማሮ ማራጋደኮ እሶን ሙር፤ ሂካ ጎፈልተ ኩ ጉት ካአዬሳመራ ዱባ ላኦ ካላይክ ላኖና አትና እስኦታ ሴራን ካአጃጃማቶ ላኖካ ዱባ እሶ ካሳንዋ። 25 ታአይዛብ ኡናኮ ኦአማኔራን አደን፤ ቶልቻን ጃርሳመጉረ ካባቶየሮ ባቦ አሮኣንቴን፤ ኢግና አሮኣንቴን፤ ጨላአመ ካጎየሮ ግድኮኒሶ ሶ አሮኣንቴን፤ ሻርሙጡማኮ ፋክማ፤ ታአማቶ ሙርት ታአብተቶ ዱብዳቤ ጻፍን እሶን ፋርነና።” 26 ኤስኮ አባባተረ ጳውሎሳ ታላም አሪ አባዶጃ ኣተ ሴተረ እሶን ዋታ እስኦቴሳ ሙጭሳተ፤ ካኩሙጭማራን አርጃል ማጎሬዮና መተመተክሶክ ጃርሶ ማጎሬ ሰሳምናሮ አዳሰሰን ቁሉክ ምን ካዋ ታቦ። 27 አሪ ቶዶባና ጉዳይን ካኮጋባላማተ ጎራታ፤ ታእሰያ አወራጃኮ ካኤመተረ ካአይሁድ አባዶ ጳውሎሳ ቁሉክ ምን ካዋይ ማንኮዴን ማራን፤ ጎሳ ዱባ ከኬሰንጉሬን ኡሱ አበን፤ 28 “አባዶ ካእሰራኤል ኖ ጋርጋራ! ጎሳካንና ሴራካን ኡሱማለና ህታ ባንኤ ኢንጋማ ማንኮሴተ ዱባ ካኤሰላሮ አባዶ ዱባ ካአጋልሰሳራ ሂካ አባዶትያ፤ ሂካኮና ካሮረ ግሪኪል ቁሉክ ምን ካዋ ታብሳ ህታ ቁሉት ባንኤ ካባቶይሳራ ኡሱያ” ሃ አማ ኦኬን። 29 ሂካ ካኮናአመራና ጣየ ካታማ ታኤፈሶንክ አባዶት ጢሮፍሞሳ ጳውሎሳን ዋታ ካታማይ ኦሮ ማንኮዴራን ማራን፤ ጳውሎሳ ኡሱና

ቁሉክ ምን ካዋ ኣተ ካታበሮ እን እሱን ማንኩሌ ማራንያ። **30** ካታማ ዱባና ሻላጋንተ፤ ጎሳና ምናምናኩ ቲታ ኤመተረ፤ ጳውሎሳ አበረ ናታ ቁሉክ ምን ካዋኩክ እዉድኩ ቤሰን፤ ቁሉክ ምን ካዋክ ኡፋልና ጎርሰዋ ጨፌን። **31** እሱ ጳውሎሳ ላጋዲን ካኮዶታረን ጎራታ “ታኢየሩሳሌም ካታማ ዱባ ሻላጋንተ” ካእማራ ሀንዳ ኡል ካሮምክ ዋታዳራ ካጀረነ ካእጃጃሮ አባዶት ጌ። **32** ሃንሱን ካእጃጃረክና ዋታዳራልና ካቦሎ ዋይቻል ዴበ አበረ ባኔዋ ትያ አባዶ ቶሰ ሴተ። አባዶና ካእጃጃረክና ዋታዳራል ካኮደያረ ጎራታ ጳውሎሳ ቦጫኖ ኢሰን። **33** ካእጃጃረክና ጋባላመ ጳውሎሳ አበረ ሳንሳላታ ላማ ጎሳሻምሮ አጃጃ፤ ኤሰኮ አባባተረ አዮ ላኖና ኡሱ መ ፈለሮ አዴሰን ዶተረ ሆሳተ። **34** ጎሳና ጋምሳ አየሰ ኮ ጎእዬሰሮ፤ ጋምሳ አደ ታካለ አዬሳረ፤ ካእጃጃረክና ጎሳ ኢያናኮ ካከይ ካቁሌሳመሮ አየሰ አዴሰን ማንኩዋተ ማራን ጳውሎሳ ካዋታዳራ ካምቢ ጎንጌሰራውን አጃጃ። **35** ጳውሎሳ ጋጋት ባንኤ ካኮገያረ ጎራታ ጎሳ ዱባ እማራ ታማላኒ ከኬንጉሬን ዳኖ ጌግሰን ማንኩዶተን ማራን ዋታዳራል ኡሱ ሰደ ሴተ። **36** ዴበ ካሰሰታረ ጎሳና፤ “ሀጎየ!” አማ ኦካ ግረ። **37** ካጀረነ ዋታዳራልኩክ ካምቢ ኡሱ ታብሰን ካኮጋባላመሬን ጎራታ ጳውሎሳ ጀሬኑን ካእጃጃረክና “አየሰ ኮ እን ኩን ጎሳሰግሮን ፈኢ ሰሳታ?” አመ። ካእጃጃረክና፤ “እት ታግሪክ ሄኢ ካሶ?” **38** “ሀያ፤ ግዳ ኤን ሻላኅ ኬሰሰጉረ ኩማ አፋር ኔፎ ካላጋደሮ አባዶ አተዴ ጋ ካባቃተተ እት ግብጽት ላኮተያ?” አመ። **39** ጳውሎሳና፤ “እን ጎእመን ክልቅያ ታግቶ ታኡዴሳንተ ታጠርሰሰ ካታማይ ካኡሙላመሮ አይሁድትያ፤ እን ጎሳን ጎንእዬሰሮ ማጋኔ ፈኢ ሰሰ” አመ። **40** ጎንእዬሰሮን ፈኢ ካኮሰሳረ ጎራታ ጳውሎሳ ጋጋት ባንኤ ጉት አሌረ ጎሳ ጫልኢ ጎንእምሮ ገነ ዋል ዋል ኢሰ፤ ጎሳና ጫልኢ ካኮአማረ ጎራታ ታኢብራይሰጢ ሄኢ ሃ አማ አዬሳኖ ሀጋእበ፡-

22 “አብላልና ኣቦላልኬ! ሂክማ እን ግዳ እሰጉኮ ትራታ እን እሰኑን ካእዬሳሮ አየሰ ማላ!” **2** እሱና ሄኢ ታኢብራይሰጢ ኡሱ አዬሳ ግራንቲ ካኮማላረን ጎራታ ኣሎ ጫልኢ አመን፤ ጳውሎሳና አየሰ ሆረድያ ሃ አመ፤ **3** “እን ክልቅያይ ታግቶ ታጠርሰሰ ካታማይ ካኡሙላመሮ አይሁድትያ፤ ታኮጂናየራ አደ ህታ ታኢየሩሳሌም ካታማይያ። እን ካእጋልሰሰራና ገማልያየ፤ ሴራ ካኦዶላል ማዳረ ካእጋልሳየሮና ህታር እሰን ጎንፈላታንክ ማለ ዋውን ሀኡሳየ ካህንዳረያ። **4** እን አማኒል ዱባ ታላጋድሮ ካሆሮራረ አባዶትየ፤ ባባርና ሄለል ሸያ ምን ካሻኖ

ጎጎታብራኑን የላ ግረ። 5 ሂክ ሩም ላኖ ቱቃዋኮክ ዋይቻትና ታጃርሶለ ሾንጎ
 ዱባ ኢን አቶታታ። ኡሱማለና ታደማስቆ ካታማይ ኦግራን ሂናኦ አባደጃ ሺረ
 ኢየሩሳሌም ቶስ ኬኒና ሙርሰን ካዳንደይሰሮ ደማስቆይ ታግቶ ኡናትሶ ቶስ
 ታጻፈራን ዱብዳቤ ካኮአተራ እሶኮያ። 6 “እን ሴየ ታደማስቆ ካታማ ቶስ
 ጋባላማ ግራን አሪ አሳሳ ደራኣ ካእቲ ኢፋ ዳሩርኮ እን ማራሙረ ሀንቃየ። 7
 ሀሱ ጎራታ እን ኡሊ እዬ፤ ‘ሳዉላ! ሳዉላ! እን ሙን ሆሮራታ?’ ታእማቶ ያየ
 ማለ። 8 “እንና፡ ‘ጎታ! አት እዮታ?’ አመ። “ኡሱና ‘አት ካሆሮራቶ እን ካናዝረት
 የሱሳያ’ አመ። 9 ኢን ዋታ ካግረ አባዶ ካኢፋ ሀንቃ ዴራን ኳሬ ኡሱ ኢን ዋታ
 እዬሳ ግራን ያየቴሳ ላኮማለራን። 10 “እንና፡ ‘ጎታ! እን መ ፈላ?’ አመ። ጎታና፡
 ‘ክንጉዴ ታደማስቆ ካታማ ሴ፤ አት ካፈልናቶ ኮኮ ዱባ ኤስ ኩን ጋቻሰጋምራ’
 አመ። 11 አፋ ካሀንቃየሮኮ ካከይ እን ድን ማንኮዋየረ ማራን ኢን ዋታ ካግረ
 አባዶ ገነቴ አበረ ገጌሳ ታደማስቆ ካታማ ቶስ ገግሰን። 12 “ኤሴና ሀናንያ
 ካአማማረ እባዶት ኮ ግረ፤ ሂክ እባዶትና ታደማስቆ ካታማይ ካግሮ አይሁድ
 ዱባ ኦሮ ካካባጃመ፤ ሴራ ካካባጃረና ካእያና እባዶትየ። 13 ኡሱ እን ቶስ
 ኤመተ ዶሌ አሌረ፡ ‘አቢክ ሳዉላ! እልኦ ኦታ ሀዴን!’ አመ፤ ጎርሰዋ ኢልኦት
 ዴን፤ እን ኡሱና ዴ። 14 “ኡሱና ኢን ሃ አመ፤ ‘አት ኦዶጃላልካንክ ሄዶኮት
 ፈኢ ጎጎአዴሶን ቁሉክና ጎጎዴቶና ያየቴሳና አት ጎጎማልቶን ጣየ ኩ አሳባተራ።
 15 ሂካና ካየለሮ አት ካዴተቶና ካማልተቶ ማራን አባዶ ዱባ ሆረ አት ኡሱን
 አቶኬሳ ጎጎሌቶንያ። 16 ሀያ፡ ግዳ አት መ ኦራታ? ክንጉዴ መገኬሳ ኡማ
 ጣማቃም፤ ጨቦካኮና አልሳም።’ 17 “ኤሰኮ አባባየ ኢየሩሳሌም ቶስ ሴዬረ
 ቁሉክ ምን ካዋይ ኤባታ ግራን እን ሳላልሰረ ራጋ ዴ። 18 ጎታና ኢን ሙተረ ‘አት
 እን ማራን ካአቶቲናቶ አቶ እሶ አታታና ማንኮዋይናራን ማራን ሀጋጭሞን ሳሜ
 ኢየሩሳሌምኮ ሴ’ አመ፤ 19 “እንና ሃ አመ፤ ‘ጎታ!’ እን አይሁድኮክ ምን ካኤብ
 ዱባ ሴዬረ ኩዬ ካአማኔሮ አባዶ ዱባ እን እሶ ካሸየሮና ካቦጩሮ ካሳንዋ። 20
 አቶካ ካሌረ እስጢፋኖሳ ካኮላጋዳሬን ጎራታ እን መተኬዉን ካላጋደሮ አባዶ
 ዶሌ አሌረ እዬሰክሶይ እስ ኦተ ግረ፤ እን ሳርሰክሶና ኦራ ግረ፤ 21 “ጎታና፡ ‘ኡል
 ካኤሪ ካግሮ አይዛብ ቶስ እን ኩ ማንኮፋርናሮ ማራን ክንጉዴ ሴ!’ አመ።”
 22 ህታ ታ ጌሮ ጎሳ ዱባ ካጸዉሎሳ እየሰ ጫቃሳ ግረ፤ “ሂካ እንክክ አባዶ
 ኡልኮ ሀባዋ! ሂካ እንክክ አባዶ ኔፎን ግርን ላኮዶትሳሮ!” አማ ኦኬን። 23 እሶና

ኦካና ሳርሰክሶ ቃሬን ሻፋ ጎራ ኤለዴሰን ዳርክ ግረን። 24 እሶ ካኦጃጃራ ሂካ ካኮደያረ ጎራታ ጳውሎሳ ካምቢ ካዎታዳራል ጎንጌስራውን አጃጃ፤ ጎሳና ኡሱ ጉት ሙን ሂካማሌ ኦካሮ አዴሰን አመረ ቦጫማ ጎሳቆቆራምሮ አጃጃ። 25 እየሱን ጎአመን ጊይ ሸሽዬረን ቦጪን እሶ ኤካሳታ ግራን ጳውሎሳ ኡሱ ዶሌ ካአሌረ ካቦሎ ወይቻትነ፡ “አላታኑን ኡል ካሮምክ ካሌሮ እባዶት ታሰሳንተቶ ሙርት ካላይ እስን ኡሱ ጎንቦጭታውን ፈኢ ሰሳንተታ?” አመ። 26 ካቦሎ ወይቻትና ሂካ ማለረ፡ እሶ ካኦጃጃረ ቶሰ ሴተረ “ምስ የልንያ?” “ሂክ እባዶት ላ ካሮም ኡልኮክ እባዶትዮላ!” አመ። 27 ካኦጃጃረና ጳውሎሳ ቶሰ ጋባላመረ “አላ ኢን ሰጊ፤ አት ኡል ካሮምክ እባዶትታ?” አመ፤ ኡሱና “እ ሃያ፤” አመ። 28 ካኦጃጃረክና፡ “እን ሂካ ኡል ካሮምክ እባዶት ላኖ ማራጋደ ካሞጋኒ አምናየራ” አመ፤ ጳውሎሳና “እን አደ ታሮም ሳኒኮ አላየራ” አመ። 29 ሃንሱን ኤስ ኡሱ ቆቆርን ኤካሳተ ካግረ እባዶ ጎርሰዋ ኡሱኮ ፋክመ፤ ካኦጃጃረክና አላታኑን ኡል ካሮምክ ካሌሮ እባዶት ሳንሳላታ ሻማኖ ካኮአዴሳረ ጎራታ አብሳተ። 30 አሪ ታላም ካኦጃጃረክና እይሁድ ጳውሎሳ ካኮሞተራ ታሩም አላንቲ መቶ አዴሰን ዶተ፤ ሃንሱን ካቱቃሞል ወይቻልና ታሾንጎ ኡና ዱባ ጎንኩኩይሰራኑን አጃጃ፤ ጳውሎሳና ምን ካሻኖኮ ቤስረ እሶ ሆረ ኣልሰ።

23 ጳውሎሳ ሾንጎይ ካግሮ እባዶ ትቹሰ ዴጉረ፡ “አቢላልቴ! እን ህታ አሪ ታጌሮ ወይ ሆረ ካኮግረ ሳሙ ታኢዳንትዮ” አመ። 2 ቱኡቃሞልኮክ ወይቻት ሀናንያ አደ ታጳውሎሳ ህኢ ጎንባሰናውን ኡሱ ዶሌ ካአሌሮ እባዶ አጃጃ። 3 ሀሱ ጎራታ ጳውሎሳ ሀናንያ፡ “አት ባርሳይ ታሽግዳንተ ጎዳ እን ካላታ! ዋ ኩ ባሰርዋ! ሴራክ ማለ ሃጃቴ ፍርድን ሀማጽተ ግራን ሴራ ካላይ እን ጎንባሰናውን አጃጃቶላ?” አመ። 4 ኤስ ካግረ እባዶ አደ ጳውሎሳ፡ “ካዋ ቱቃሞልኮክ ወይቻት ሀባራታ?” አመን። 5 ጳውሎሳና፡ “አቢላልቴ! ኡሱ ቱቃሞልኮክ ወይቻ ላኖ እን ላኮአዴሰር፤ አላንቲና ‘ካጎሳ ወይቻ ጉት ታሜላን አርአዬስ’ ካአማራ ካሴራ ማጻፋ ጻፋመራ” አመ። 6 ጳውሎሳ ኤስ ካግረ እባዶኮ ጋምሳ ሶዶቃዊል ጋምሳና አደ ፋራሳዊል ላኖ አዴሰረ፡ “አቢላልቴ፤ እን ፋራሳውልኮ ካአላየሮ ፋራሳውትያ፤ ሂክማ! ግዳ ፍርድ ሆረ ካኮንአሌራ ታሰሳንተቶ አብዲና ጎይኮ ክያኖኮክ አላንቲያ” አማ ያየተሳ ጦቂኢስረ ሾንጎይ ካኩኩመሮ እባዶ ኦሮ አዴሰ። 7 ጳውሎሳ ሂካ ካኮአዴሳረ ጎራታ፡ ፋራሳዊልና ሶዶቃውል ጠኤ

ኤንገ ኬተደ ሾንጎና ባንኤ ላማ ቤተ። 8 ሶዶቃውልና “ጎይኮ ክያኖ ላግሮ፤ ኤርግቻልና ላግሮ፤ እያናና ላግሮ” ጎአምራን ፋራሳዊል አደ “ሂክ ዱባ ግራ” አመን አማናራን። 9 ኡሱ ጎራታ ካአቲ ሻላጎ ኬ፤ ታፋራሳው ኡና ካሌረ ኮኮ ሴራ ካሙሴ ኦአጋልሰሳረን ኬንጉረን፤ “ኖ ሂካ እባዶት ጉት ኮና ባሰ ላኮሄልነኖ፤ እያና ጎርቱን ኤርግቻ ኡሱን እየሰ ግራ፤ ኖ መ ካንሳ?” አማ ዶጋማን። 10 ኤንገ እታታ ማንኮሴተ ማራን እባዶ ጳውሎሳ ጎጎታታርሽኖንኮ ካአጃጃረክ አብሳተረ ዋታዳራልኔ “ዳጋዴን ጳውሎሳ እባዶ ኦሮኮ ቤሳዴን ካዋታዳራል ካምቢ ቶስ እታኮዬን” አመ አጃጃ። 11 ታላም ሄመን ጎታ ጳውሎሳ ዶሌ አሌረ፤ “አላማንደ ኢየሩሳሌም ጋራኬ ጎጎአቶትተቶ፤ ኡሱማለና ታሮም ካታማይ ጋራኬ አቶቲን ዶትሳራ” አመ። 12 ኡል ካኮባረ ጎራታ አይሁድ ኩኩአመረ፤ ጳውሎሳ ኖ እንላጋዶን ግራን ካምና ላኮአምናኖ፤ በከና ላኮጣምናኖ፤ አመን አማቲን። 13 ሂካ ዳባ እስ ካአተረ እባዶ ቶቶይ አፋርታምኮ ካንጂንዮ። 14 እሶና ቱቃምኮክ ዋይቻል ቶንሳ ጃርሶለ ቶስ ሰተንጉረን ሃ አመን እሶን ሰገን፤ “ኖ ጳውሎሳ እንላጋዶን ግራን ካም ኢልኪ ላኮአብኖ አምን አታይንሰ አማንተና። 15 ሃንሱን እስን ሾንጎይ ካግሮ እባዶን ዋታ እስአተዴን አታይሰን ካቆቆራታን እየሰ ካግሮ እን ማሰሰሳ ጳውሎሳ እስኩን ጎጎኬኖን ካአጃጃረክ ሆሳዮን፤ ኖና ሂታራ ኡሱ ሀጌኖን ግራን ኡሱ ላጋዴን ኤካሳነና።” 16 እየሱን ጎአመን ታጳውሎሳ አባኮክ ኤረ ሂካ ዳባ ማንኮማለረ ማራን ካዋታዳራል ካምቢ ታበረ ጳውሎሳን ሰገ። 17 ጳውሎሳና ካቦሎ ዋይቻልኮ ኮ ኡመጉረ፤ “ሂክ ኡኑ ጀራኑን ካአጃጃረክን እን ካሰግናራ እየሰ ግራ ማንኮአማሮ ማራን ኡሱ ቶስ ጌሲ” አመ። 18 ካቦሎ ዋይቻትና ኡኑ ካአጃጃረክ ቶስ አተ ታበረ፤ “ካሸያመረ ጳውሎሳ እን ኡመረ ሂክ ኡኑ ኩን ካሰግናሮ እየሰ ማንኮአቦ ማራን እን ኩ ቶስ ጎጎጌሰሮን እን ኤባተ” አመ። 19 ካአጃጃረክና ታኡኑ ገነ አበ አተ ሴተረ፤ “እት ኢን ካሰግናታ እየሰ መያ?” አማ ኡሱ ካለ ቤስ ሆሳተ። 20 ኡኑና፤ “አይሁድ ካጳውሎሳ እየሰ ኣሎ ካቆቆሮ እን ልጉረ ጌባር ሾንጎ ቶስ ጎጎጌሰራውን ኩ ሆሳይን ህኢ ቶ ሌራ። 21 ሃንሱን እት እሶን እ አሮእንተ፤ ‘ኖ ኡሱ እንላጋዶን ግራን ባቦ ላኮአምናኖ፤ በከና ላኮጣምናኖ’ አመ ካአማተራ አፋርታምኮ ካሮራራ እባዶ ኡሱ ላጋዴን ሞዋተራ፤ ግዳ እሶ ካኡራታራን አባብካካ ካላልያ” አመ። 22 ካአጃጃረክና፤ “ሂክ እየሰ እት ኢን ሰጋኖ ማዮና አሮሰግተ” አመረ ኡኑ ጋፋረ። 23

ኤስኮ አባባተረ ጀሬኑን ካእጃጃረክ ካቦሎ ወይቻልኮ ላማ ኡመጉረ፡ “ሄመንኮ ሳቲ ሴድ ጎሌተ ታቅሳርያ ካታማ ቶስ ካሴሮ ላማ ቦሌ ወታዳራልና ፋራዴሊ ካኦላማሮ ቶዶባታም፡ ላማ ቦሌ ጀሬን ካሻፋሮ አባዶ ኤካሰን። 24 ጳውሎሳና ፋራድ ኤካሰንጉረን ካኡሌ ሞቲ ፍልኪስ ቶስ ኖጎዳ ጎጎጌሮን የላ” አመ። 25 ሃ ታኦማቶ ዳብዳቤና ጻፈ፡- 26 ቀላዉዶሳ ሉስዮሳኮ፤ ካካባጃንተ ካኡሌ ሞቲ ፍልኪስ! ኖጎዳ ኩን ሀሌቶ! 27 ሂካ አባዶት አይሁድ አብረ ላጋዲን ዶተረ፤ እን አደ ኡሱ ታሮም አላታን ላኖኬሳ ማንኮካሶ ማራን ወታዳራልኔ ወታ ጌረ ሃሰ። 28 እሶ ኡሱ ታኮምታራን አላንቲ መቶ አዴሰን ዶተረ ሾንጎትሶ ቶስ እን ፋረረ። 29 እሶ ካኮምተረና ሴራክሶኮክ ጋራን ላኖ እን አዴሰራ፤ አየሱን ጎአመን ጎይን ጎርቱን ሻኖን ኡሱ ካጌግሰራ አየሰ ኮና ላግሮ። 30 ሂካ አባዶት ላጋዲን ካፈላመሮ ዳባ ካኮማላረ ጎራታ እን ኡሱ ኩ ቶስ ፋረ፤ ኡሱ ኦምታሬና ኡሱ ጉት ካአባን ሞቶ ኩ ሆረ ጎጎአየሰራውን እሶን ሰገ። 31 ሃንሱን ወታዳራልና ጎጎአጃጃመራንክ ማለ ጳውሎሳ ሄመን ጠኤ አበን ታእንትጸጢረስ ካታማ ቶስ ጌሰን። 32 ታላም አሪ ወታዳራል ካፋራዴል አባዶ ጳውሎሳን ወታ ጎጎሴናውን የሌንጉሬን ካጀሬኔ ካምቢ አባባተን ሴተ። 33 ካፋራዴል አባዶና ታቅሳርያ ካታማ ቶስ ካኮገያረን ጎራታ ዳብዳቤ ካኡሌ ሞትውን ሰሴንጉሬን ጳውሎሳ ኡሱ ሆረ አልሴን። 34 ካኡሌ ሞትና ዳብዳቤ ናባበረ ጳውሎሳን አት ኤቲ አዉራጃኮትታ? አማ ሆሳተ፤ ካክለቅያ አባዶ ላኖ ካኮአዴሳረ ጎራታ፡ 35 “ኩ ኦምታራን ካኮኤመቱን ጎራታ ህታ ሃጃታ እን ማልናራ” አመ። ካሄሮዶሳ ምን ካዎኖ ኦሮ ኡሱ ጎጎአራምሮን አጃጃ።

24 ታከን አርኮ አባባተረ፡ ቱቃሞኮክ ወይቻት ሀናንያ ጃርሶለ ቶቶኮና ጠርጠሉስ ካአማማረ ዋቢ ወታ ታቅሳርያ ካታማ ቶስ ሴተ፤ እሶና ሞት ካኡሌ ፍልኪስ ቶስ ሴተሬን ጳውሎሳ ሞቱን። 2 ጳውሎሳ ኡማመ ካኮኤመተረ ጎራታ፡ ጠርጠሉስ ሃ አማ ሞቶ ሀጋአበ፤ “ካካባጃንተ ፍልኪስ! ጋራካን ኖጎዳ ታንጂን ኖ ሄለነና፤ ባሪሳኖካ ካእዳንክ ጎሳካኑን ኢግልሳማኖ ሄላመራ። 3 ኣሎ ካካባጃንተ ፍልኪስ፤ ሂናኣ ኦኢዳን ፈሎኦታ ባንኤ ዱባ ጎራታ ጎራታ ካኮኦታታና ጋላታ ካአቲቲያ። 4 ግዳ ጎአመን ጎራታካ ሀባሶኒ ግራን ጋባቢና እን ኩን ካሰጋሮ ኢዳን ኖ ጎጎማልቶን እን ኩ ኤባታራ። 5 “ሂክ አባዶት ኖን ዲኩባ ካሜላን ሌራ፡ አላም ካግሮ አይሁድ ዱባ ጉት ሻላጎ ኬሳራ፡ ናዝራው ካአማማሮ አባዶ

ካቃጃልሳርያ። 6 ቁሉክ ምን ካዋና ባቶይሰን ኡሱ ሄዳ ግራን ኖ አብነና፤
 [ሴራካን ማለ ኖ ኡሱ ፍርድን ሄንደኔ፤ 7 እየሱን ጎእመን ጀሬኑን ካእጃጃረክ
 ሉሰዮሳ ኤመተጉረ ሁና ካአቲቲ ገነታንኮ ቤሰ ኣተረ ኡሱ ኣሞታሬና ኩ ቶሰ
 ጎጎሴናዉን እጃጃ፤] 8 ሂካ ኖ ኡሱ ጉት ካሞትነኖ ሞቶ ዱባ ሩም ላኖ እት
 መተካዉን ኡሱ ቆቆርጉደ እዳሰን ዳንዳታ።” 9 አይሁድ “ሂክ እየሰ ዱባ
 ሩምያ” እመን ሞቶኬሳ እስኣተን። 10 ኡል ካባሪሳረ ፍልኪሰ ገነ ማላተረ
 ጳውሎሳ ጎጎእዬሰርን ፈኢ ሰሰ፤ ጳውሎሳና ሃ እመ አባበ፤ ጌሰ ካሞጋኑን እት
 ሂካ ጎሳን ካፍርዳቶ ላኖ እን ማንኮካሶ ማራን ካኮሞታመሮ ሞቶን አባብኬ ኩ
 ሆረ እን ጎሰሰር ኣሎ ገገላታያ፤ 11 ዋ ሄዶይሳዬን ታኢየሩሳለም ካታማ ቶሰ
 ጎሴየኮ አሪ ቶሞንኮ ላማኮ ሮር ዋት እት መተካዉን እዳሰን ዳንዳታ፤ 12
 ቁሉክ ምን ካዋይና ሌረ አይሁድኮክ ምን ካኤብ ጎርቱን ካታማ ኦሮ ማዮ
 ዎታና ዶጋማግራን ጎርቱን ጎሳ ሜላንን ከኬሳ ግራን እን ላኮሄሌራን፤ 13
 ግዳ እን ካኮሞቴረን ሞቶ ዱባን አቶ ኮና ኬኒን ላኮዳንዳራን። 14 እየሱን
 ጎእመን እን ሂካ ኩን እዳሰሰን ዶታራ፤ እሶ ራ ካጣራ ካእማራን እማኖኮት ሩም
 ካሌሮ ኦዶጃላልካንኮክ ሄዶ እን ሄዶይሳታራ፤ ካሄገሮልና ሴራኮክ ማጻፋጃሊ
 ካጻፋመሮ ዱባና እን እማናራ። 15 እሶና አብድ ጎጎየላታራንክ ማለ እንና ቁሎለና
 ጨባለሳል ጎይኮ ካክናራን ላኖ እን ዋይ አብድ የላታራ። 16 ሃንሱን ዋይና እባዶ
 ሆረ ታሙጭንተ ሳሙ እን ጎጎግርቶን አርጌቶ እን እጻማራ። 17 “ታኢየሩሳለም
 ካታማኮ ቤ ጌሰ ካሞጋኑን አባባየረ፤ ኡናቴዉን ካሌሮ ካጋርጋርሳ ማራጋደና
 ዋዉን ካሰሳማሮ ሜባ እን ኣተ ኤመየራ። 18 ቁሉክ ምን ካዋይና እሶ እን
 ካኮሄሌራን ሂካዋ ፈላ ግራንያ፤ ኡሱ ጎራታ ካሙጭማኖ ሴራ እን ጉሳየ ግረ፤
 ኢን ዎታ ጎሳ ካሞጋን ላኮግረ፤ ሻላጎና ላኮኬሮ። 19 እየሱን ጎእመን ኡል
 ካእሰያኮ ካኤመተራ አይሁድ ኤሰ ግረ፤ እሶ እን ታኮሞትራን ኣላንቲ ጎአባን
 ኩ ሆረ ኤሜይረን ሀእየሰን። 20 ጎርቱን ሾንጎ ቶሰ ታኮሰየሬ እን ካባሰራ ባሰ
 ጎግሮ ሂኒዕ ህታኒ ኦግራን እባዶጃ ሀእየሰን። 21 ኦግራን እሶ ኦሮ እን አሌረ፤
 “ጎይኮ ክያኖ ግሮዋ ማንኮአመ ማራን ህታር ፍርዳን እሰን ሆረ አሌራ’ እመረ
 ያየቲ ጦቂሰ እዬሰራ፤ ሂካ ኳሬ ካካለ እን ካፈለራ እየሰ ላግሮ።” 22 ፍልኪሰ
 አደ እማኖኮክ ጋራ ኣሎ ማንኮካሳናየ ማራን “ጀሬኑን ካእጃጃረክ ሉሰዮሳ
 ካኮኤማተ ጎራታ፤ ሃጃትሰኑን ሙርት እን ሰሰሮዋ” እመረ እሶ ጋፋረ። 23

ጳውሎስ ኦራ ካግረ ካቦሎ ወይቻትነ፡ “ኣሎና ባልቹማ ሀትሮን ማዳር ኦር፤ ኡሱ ኦጌላታራና ኡሱን ካዶትሳሮ ዱባ እት ካኮኤመቴን ጎራታ አሮትርተ” አመ።

24 አሪ ትጫርኮ አባባተረ፡ ፍልኪስ ዱርስላ ታአማማተ አይሁድት ኦርቴሳን ወታ ኤመተ፤ ኡሱ ጳውሎስና ኡምስሰጉረ የሱሳ ክርስቶስ አማናኖኮክ ጋራ ኡሱ አይሳ ግራን ማለ። **25** ጳውሎስ ጋራ ካቁሉማና እስአዎዳታኖኮክ ጋራ ኤመይን ካግሮ ፍርዳኮክ ጋራና ካኮአይሳረ ጎራታ ፍልኪስ አብሳተረ፡ “ግዳ ሴ፤ ኢን ታኤካተ አሪ እን ኩ ጋቾኡምስሰራ” አመ። **26** ፍልኪስ ጳውሎስ ኡሱን ገን ጎንአምባይሮን አብድ የላታ ግረ፤ ሃንሱን አርጌቶ ጳውሎስ ኡምስሰ አይሳ ግረ። **27** ጌስ ላማኮ ዳንበኔ ጸርቂዮሳ ፍስጦሳ ባንኤ ታፍልክሲ ታበ፤ ፍልኪስ አይሁድ ገጌላይስን ዶተረ ጳውሎስ ጎንሻማ ኢስ።

25 ፍስጦሳ አወራጃቴሳ ታኮታበረ አሪ ሰድኮ አባባተረ ቅሳርያኮ ኢየሩሳሌም ቶስ ቤ። **2** ኤሴና ካቱቃሞል ወይቻልና ኮኮ ታጅንጂን ኡና ታአይሁድ ጳውሎስ ሞትተ፤ ኤሰኮ አይሁድ ፍስጦሳን፡ **3** “ጳውሎስ ኢየሩሳሌም ቶስ ኬንስሰጉደ አየስ ካአዳን ኖን ፈል” አመን ኤባተን፤ ሂካና ካኮንአማረን ጳውሎስ ራድ ኦርጉረን ላጋዲን ማንኮዶተን ማራንየ። **4** ፍስጦሳ አደ “ጳውሎስ ካቅሳርያ ምን ካሻኖ ኦራማ ግራ፤ እንና ግዳ ሳማ. ኤሰራ አባባይ ሴይናራ፤ **5** እስን ኦባሪሳራን ኢን ወታ ቅሳርያ ቶስ ሀሴተን፤ ጳውሎስ ካባስራ ባስ ጎግረ ኤስ ሀሞቴን” አመ።

6 ፍስጦሳ አሪ ሰዴድ ጎርቱን አሪ ቶሞንኮ ካሮሮን ጎራታ እሶ ወታ አዳላተረ ቅሳርያ ቶስ ዳገ፤ ኤሰራ ካኮገያረ ጎራታ ታላም አሪ ካፍርዲ አርጃታ ሀማጼረ ጳውሎስ ጎንኬናዉን አጃጂ። **7** ጳውሎስ ካኮኤማተ ጎራታ፡ ኢየሩሳሌምኮ ካኤመተረ አይሁድ ማራሙረን አሌንጉረን እሶ አቶ የላዪን ካኮዳንደኖን ሞቶ ካአቲ ኡሱ ሞቴን፤ **8** ጳውሎስና፡ “እን ካአይሁድ ሴራ ጉቲና ሌረ ቁሉክ ምን ካወይ ጎርቱን ካሮም ካዎኖላል ወኖ ጉት እን ካጌግስራ ባስ ላኮግሮ” አማ አባብ ኡሱን ሰስ። **9** ፍስጦሳ አደ አይሁድ ገጌላይስን ዶተረ ጳውሎስን “እት ኢየሩሳሌም ቶስ ሴይደ ህታ ሃጃ ኤስ እን ሆረ ፍርዳምን ዶታታ?” አመ።

10 ጳውሎስ አደ ሃ አማ አባብ ኡሱን ሰስ፡ “ሂክማ! ፍርዳ ቱኩልክ ሄላይን ኢን ታኮዶትሳሮ ካሮም ወኖላልኮክ ወኖ ካፍርዲ አርጃታ ሆረ እን አሌራ፤ አትና ኣሎ ጎንካሶ እን አይሁድ ጉት ካፈላራ ባስ ኮና ላግሮ፤ **11** እን ካባስሮ ጎሌ ጎርቱን ጎይን ካጌግስሮ ባስ ፈል ጎግረ ጎይኮ ሄስናራ ላኮአማሮ፤ አየሱን

ጎአመን ሞቶክሶ ላኦ ካሊክ ጎሌ ማዮና እን እሶን ሮርስ ሰሰን ላኩዳንዳሮ፤ እን ካሮም ዋኖላልኮክ ዋኖ ቶስ አበት አመራ።” 12 ሀሱ ጎራታ ፍስጦሳ ኡሱን ማርካ ኦስሳራን ዋታ አይሰረ፤ “ካሮም ዋኖላልኮክ ዋኖ ቶስ አበት ጎአንተ ዋኖላልኮክ ዋኖ ቶስ ሴይናታ” አመ። 13 አሪ ትጫርኮ አባባተረ፤ ዋኖ አግርጸና በርኔቀ ፈስጦሳን ሀባለ ኖጎዳ ኤመተ አምን ቅሳርያ ቶስ ሴተን። 14 ኤስ አሪ ታሞጋን ማንኮሀማጼ ማራን ፍስጦሳ ታጻዉሎሳ ሃጃ ሃ አማ ዋኖ አግርጸና ሰገ፤ “ፍልኪስ ሽየ ካኢስረ አባዶት ኮ ህታኒ ግራ፤ 15 እን ኢየሩሳሌም ታኮግረ ካቱቃሞል ዋይቻልና ካአይሁድ ጃርሶላ ሂካ አባዶትኮት ሃጃ እን አበት አመን አባባተረን እን ኡሱ ጉት ጎጎፍርዲሮን እን ሆሳተን። 16 “እን ጎአመን ካሞታማራ ካሞታሮ ሆረ አልረ ካኮሞታማረ እየሱን አባብ እንሰሶን ግራን ካሞታማረክ ሮርስ ሰሳኖ ካሮም ዋጋ ላኮዮ” አመ እን እሶን አባብ ሰሰ። 17 ሃንሱን ኦሞታሬን ኩኩሜን ሂታራ ካኮሜታረን ጎራታ ሀአዳላኖን ታላም አሪ ካፍርዲ አርጃታይ እን ሀማጼጉረ ጻዉሎሳ እዬ ሆረ ጎጎአልሰራውን አጃጃ፤ 18 ኦሞታሬና አይሰን ኡሱ ዶሌ ካኮአልራን ጎራታ እን ኡሱ እየሰ ካሜላን ፈለራ አመ ጎጎሄደሬ ካሞትሰሮ እየሰ ኮና ላኮኬን። 19 እየሱን ጎአመን እሶ ኡሱን ዋታ ዶጋማ ካኮግሬን አማክሶኮክ ጋራና ካጎረ አባዶት ‘አርዶክያ’ አመ ጻዉሎሳ ካአይሰረ የሱሳኮክ ጋራይያ። 20 እንና ሂካ አንክክ እየሰ ቆቆርን እን ማንኮጢባሮ ማራን ጻዉሎሳን ‘ኢየሩሳሌም ቶስ ሴይደ ኤስ ሂካ እየሰ ፍርዳምን ዶታታ?’ አመ። 21 ኡሱ አደ ሃጃተሳ ካሮም ዋኖላልኮክ ዋኖ ጎጎድያንቶን ዶታታረ ዋኖላልኮክ ዋኖን አበት ኡሱ ማንኮአመረ ማራን ኤስራ ታፋሮን ምን ካሻኖይ ጎጎግሮን እን ኡሱ አጃጃ።” 22 አግርጸና ፍስጦሳን፤ “እንና ሂክ አባዶት አይሳ ግራን ማልን ዶታራ” አመ። ፍስጦሳና “ጌባር ማልቱና” አመ። 23 ሃንሱን ታላም አሪ አግርጸና በርኔቀ ካዋኖ ሳርሰክሶ ሳርሳቴንጉረን ታአቲ ካባጃይ ካጀሬኔ ዋይቻልና ካካታማ አባዶ ካጅንጂን ዋታ አበን ኤመተንጉረን ካፍርዲ ምን ቶስ ታቤን፤ ኤስኮ አባባተረ ፍስጦሳ ጻዉሎሳ ኡምሰሰ። 24 ሃና አመ፤ “ዋኖ አግርጸ! እሰን ኖ ዋታ ኦግታን አባዶ ዱባ ማላ! አይሁድ ‘ሂክ አባዶት ሂታኮ ሆረንባን ኔፎን ግርን ላኮዶትሳሮ’ አማ እያ ኢየሩሳሌምና፤ ህታኒ ኡሱ ጎጎፍርዳምሮን እን ካሆሳተሬን እሰን ካደያታን ሂካ አባዶትዮ። 25 እን ጎአመን ኡሱ ካኮጎሮ ባስ ኮና ላኮሄለሮ፤ ኡሱ ካሮም ካዋኖላልኮክ ዋኖ ቶስ አበት ማንኮአመረ ማራን ኤስራ

ፋርን እን ሙርተሳየ። 26 ሀሌዎ ኳሪ ጋራኬሳ ጎታኬ ቶስ እን ካጻፍሮ ካእዳሳመ እየስ ኮና ላኮእብ፤ ሃንሱን ጎቆቆረ ካጻፍሮ እየስ ሄሎዋ አመረ እስን ሆረ ሱረዋ ዋኖ አግርጸ! ሂክማ እን ኩ ሆረ አልሰራ። 27 ካሽያመሮ እባዶ ካጠቁመ ኦዶናት ካእቦ ቶስ ፋራ ግራን ኡሱ ታኮዋታመሮ አላንቲ ሰጋናዋት ኢን ጎዉማ እን ሌተ ሙታታ።”

26 አግርጸ ጳውሎሳነ፤ “እስኦታ ማራን ጎጎእዬሶን ኩን ፈኢ ሰሳንተታ” አመ፤ ጳውሎሳና ገነቴሳ ድሪርሳተረ ሃ አማ እስቲ ትራታ አባብ ሰሰ። 2 “አት ዋኖ አግርጸ! አይሁድ እን ካኮሞቴረን እየስ ዱባ ህታር ኩ ሆረ እስ ጉኮ ካትራታራን አባብ ጎስሰሮ እን ገቤላይሳራ። 3 ካካለኮና አት ካአይሁድ ዋጋና ዶጋማ ዱባ ማዳርተ ካሳ፤ ሃንሱን ኡብሲ ጎጎጫቃሶ እን ኩ ኤባታራ። 4 “እን ይሱማ ካየ ምሲ ግረ አይሁድ እን ካሶዋ፤ ሆራርጀኮ ኬሰረ ጎሳኬ ኦሮና ኢየሩሳሌም ካኮግረ ግርኬ ካሳንዋ። 5 አደና ጎራታ ካንጂንኮ ሀጋአበረ እን ማንኮካሳን ማራን አማኖካንኮክ ዋጋ ታአታይሳቶ ኡና ኦሮ ሌረ ፋራሳውልኮ ኮ እን ሊ ግራኖኬ አቶቲን ጎዶተን አቶቲን ዳንዳራን። 6 ግዳ ሞታመረ ፍርዲዉን ህታኒ ካኮንአሌራ ዋ ኦዶላልካንዉን ካስሰሮ ካአማቶ ሃፋራ አብድ የላታኖይያ። 7 ህታ አብድ ቶስ ጌግን ኣኒታታን ቶሞንኮ ላማ ዋ አርጌቶ ሄዶይሳታ ኦራታ ግረን፤ አት ዋኖ! እንና ካኮንሞታመረ ህታ አብድኮት አላቲያ። 8 ዋ ኦጎየራን ጎይኮ ካኬሰናሮ ላኖ እስን ዶሌ ሙን ካአብዳሞን ሌ ሙተ? 9 “እን መተኬዉን ካናዘረት የሱሳኮክ መገ ሄጋኬይ ኔባታኖ ዶትሳራ አመ ሄዳ ግረ። 10 ኢየሩሳሌም እን ካፈለራና ሂካዋያ፤ ካቱቃሞል ዋይቻልኮ ካአታዬራ ኦዶናት አማኒል ካሞጋን ምን ካሻኖ ጎጎታብሮን የለራ፤ እንና እሶ ኦላጋዳራኔ ዋታ እስኣተ ግረ። 11 ካሞጋን አይሁድኮክ ምን ካኤብ እን እሶ ሙሪሳ ጎታ ጎጎሀባራዉን እሶ ጉት ሁኖማ ግረ፤ እሶ ጉት ኣሎ አማራየረ ካካለ ሳሬ ካግሮ ካታማል ቶስ ቤረ እሶ ሆሮራ ግረ። 12 “ህታ ሃጃዉን ካቱቃሞል ዋይቻልኮ ኦዶናትና አጃጃ ዱባ አታየረ እን ደማሰቆ ሴታ ግረ፤ 13 አት ዋኖ! እን ራድ ግራን አሪ አሳሳ ካኮላረ ጎራታ ካአሪቲ ኢፋኮ ካሮራን ኢፋ እን ዴ፤ ሂክ ኢፋ እዬና ኢን ዋታ ካስሰታሮ እባዶ ዳሩርኮ ሀንቃየ። 14 ኖ ዱባ ኡሊ ኢን ግራን ታኢብራይሰጢ ሄኢ ‘ሳዉላ! ሳዉላ! ሙን እን ሆሮራታ? ታኤጋቶ ዱኩቶ ጉት ጎአልተ እስኦታ ሚራኣታ’ ታአማቶ ያየ እን ማለ። 15 “እንና፤ ‘ጎታ! አት አየታ?’ አመ። “ጎታና፤ እን አት ካሆሮራቶ የሱሳያ’ አመ። 16 “ግዳ

ጎአመን ክ አሊ፤ እን ኩን ካኩንሙተራ ግዳ እን ታኩዳተቶና ሆረንባና እን ኩን
 ካቱስናሮ ኮኮ ካሀንዳይናቶና አቶ እን ጎሳቤቶን እን ኩ ሹመራ። **17** ካእስራኤል
 ጎሳካኮና እን ኩ ካኮንፋራሮ ታአይዛብ ገነኮ እን ኩ ሃስሮዋ። **18** አት እልኦ
 ኦትሶ ጎሳባንቶና ሙጉድኮ ኢፋ ቶስ እሶ ጎሳቤሶን ቃላዳ ካጸላዬኮ ዋ ቶስ
 ጎሳአባብቶ የልናራ፤ እሶና እዬ አማናኖኮት አላንቲ ጨቦክሶኮ ሻጋ ሄላይናራን፤
 እአሳባሜራን ኦሮና ርቲ ሄላይናራን።” **19** “ሃንሱን አት ዎኖ አግርጸ! ዳሩርኮ እን
 ካስሳመሮ ራጋ እን ላኮዲደሮ። **20** አየሱን ጎአመን ጣይ ደማስቆይ ካግራ
 እባዶ፤ ደቤና ኢየሩሳሌምና ካይሁዳ ኡል ዱባይ ካግራ ኡሱማለና አይዛብነ
 አድረ ጨቦኮ ጉላ ጋልጉሬነ ዋ ቶስ ጎሳአባባራኑን እን አጋልስሰራ፤ ጨቦኮ
 ጉላ ጋላኖክሶ ኦቱሳራን ፈሎ ጎሳፈላውን አጋልስሰራ። **21** ሂካኮት አላንቲ
 አይሁድና ቁሉክ ምን ካዋይ ግራን አቤረን እን ላጋዲን ሄደን። **22** ህታር ጊን
 ጋርጋርሳ ካዋ እንኮ ላኮፋክመረ፤ ሃንሱን ክጫርክወና ካንጂንክወን አቶታ
 ህታኒ እን አሌራ፤ ካሄገሮልና ሙሴና ጣይ ሃ ልናራ ካአመራን እን አዬሰራ ኳሬ
 ካካለ ኮና እን ላኮአዬሰሮ። **23** እሶና ካአዬሰራን ‘ክርስቶሳ ራኮ አታይናራ፤
 ጎይኮ ከያኖይና ካሆራርጄ ሌ ካፋይና ኢፋ ካእስራኤል ጎሳና ካአይዛብ ጎሳን
 ቱስናራ’ አመረያ።” **24** ጳውሎሳ ሂካ አዬሳ ግራን ፍስጦሳ፤ “ጳውሎሳ! ግዳ
 ቆላንተታ፤” “ካሞጋን አጋልሳታኖ ቆላማኖ ቶስ ኩ ጌግሰራ!” አማ ኦኬ አዬሰ።
25 ጳውሎሳ አይ ሃ አመ አባብ “ካካባጃንተ ፍስጦሳ! ካሩሚና ጋራክ አዬሳራ
 ኳሬ እን ላኮቆላመሮ።” **26** አዴሰስ ኡሱ ሆረ እን ካኮን አዬሰራ ዎኖ ሂካ አየሰ
 ካሶዋ። ሂክ ሄቶ ካፈላመሮ ማንኮሌኖን ማራን ዎኖ ካአዴሰናሮ እን ካሶዋ። **27**
 ዎኖ አግርጸ! አት ካሄገሮል ላ አብዳቶላ? ካአብዳቶ እን ካሶዋ። **28** አግርጸና
 ጳውሎሳን፤ “አት ሂካ ካጋባባንክ ጎራታ ኦሮ እን አማኒ የልሲሰን ላቶ” አመ። **29**
 ጳውሎሳን፤ “ጎራታ ካጋባባና ሌረ ጎራታ ካኤሪ አት ካላ እንሌኖን ግራን ህታር
 አዬሰኬ ካማለራ ዱባ ሂካ ሻኖኬ ኳሬ እን እን ጎሳሌራውን እን ዋ ኤባታራ!”
 አመ። **30** ኤሰኮ አባባተረ ዎኖ፤ ሞትና በርንቀ፤ እሶን ዎታ ሀማጼ ካግረ እባዶ
 ዱባና ኬ። **31** ኤሰኮ ቤን ሴታ ግራን፤ “ሂካ እባዶት ጎይን ጎርቱን ሺሰሲን
 ካጌግሰሮ አየሰ ኮና ላኮፈለሮ” አመን። **32** አግርጸና ፍስጦሳን፤ “ሂክ እባዶት
 ዎኖላልኮክ ዎኖውን እበት እም ዋተዋ አዱ ካፋራምሃየያ” አመ።

27 ኖ እጣልያ ቶስ ጎሳሴኖን ካኮሙርተሳመረ ጎራታ ጳውሎሳና ካካለ ምን ካሻኖ ካግረ እባዶ ካእወግሰጦሳ ካጀሬኔ እባዶ ኦሮ ካግረ ዩልዮሳ ካእማማረ ካቦሎ ወይቻትዉን ሰሰን። **2** እስያይ ላቡ ግር እበ ኦባልነ ካሴታሮ ካእድራምጢዮን ማርካፋ ታብነኔ ዱዳነ፤ ተሰሎንቄ ካግረ ካመቀደንያ እባዶት አርሰጢሮኮስና ኖኔ ዋታ ግረ። **3** ታላም አሪ ሰዶና ቶስ ገነ፥ ዩልዮሳ ጳውሎሳን ካእዳንክ ማንኮሌረ ማራን ኡቡ ኦጌላታራን ቶስ ሴተረ ካዶትሳሮ ጋርጋርሳ ጎሳየላዉን እሶን ፈኢ ሰሰ። **4** ኤሰኮ ኬነኔ ኢርጋዶ ፎፎል ማንኮከያ ግረ ማራን ታቆጲሮስ ኦዶላ ኤሎ ታብነኔ ማርካፋ ዱዳታኖ ሆረደነ። **5** ክልቅያና ጲንፍልያ ኤነማርነ ዱዳነ ካኮሮራን ጎራታ ካለቅያ ኡሊ ታግቶ ሙራ ታእማማቶ ካታማ ቶስ ጌነ። **6** ኤስ ካቦሎ ወይቻት እጣልያ ካሴይናረ ካእስክንድራ ማርካፋ ሄለጉረ ኡቡ ማርካፋ ኖ ጎሳታብኖን የለ። **7** አሪ ታሞጋን ላላን ዱዳታ አቦሳ ካእቲቲ ቀንዶስ ታእማማቶ ካታማ ጌነ፤ ኢርጋዶ ኖ ሆርድ ጎሳሴኖንኮ ማንኮተረ ማራን ታስልሞና ካታማኮት ቦድ ኤነማርነ ሮርከ ታቀርጠሰ ኦዶላ ኤሎ የላነኔ ሴነ። **8** አቦሳ ካእቲቲ ግር ግር አብነነ ካኮሮራን ጎራታ ታላስያ ካታማ ዶሌ ታግቶ፥ “ታኢዳንት ኦባ” ታእማማቶ ባንኤ ጌነ። **9** ዱዳታ አሪ ታሞጋን ማንኮሮርተቶ ማራና ካእጋቡ ጎራታ ማንኮሮረ ማራን ሀቡ ጎራታ በከ ኦሮ ዱዳታኖ ካሜላን ማንኮሌ ማራን ጳውሎሳ እባዶ ሃ አማ ሴርሰ፤ **10** “እስን እባዶ! ሂታኮ ሆረንባን ዱዳታኖካን ዳኖ ካእቦ ላኖ ኢን ሙታራ፤ ሰዳኔ ጉቲና ማርካፋ ጉት ካላል አንሌኖን ግራን ኔፎ ታእባዶ ጉት ታእቲ ዳኖና ባይ ግናራ።” **11** ካቦሎ ወይቻት ጎእመ ጎርሳ ካጳውሎሳኮ ሱረ ማርካፋ ካእጃጃራና ኦዶ ማርካፋ ካእዬሳራን አየሰ ማላ ግረ። **12** ሀሴ ኦባ ባጤሳ ሮርሳዪን ማንኮ ኤካታናዋተ ማራን ጋማ ካሆር እባዶ “ሆርድ ዱዳይን ካዳንዴኖ ጎሌነ ምና ታኤሌ ኢያነና ምና ታሄገሌ ኢያነ ታግታ ኦባ ፍንቀ ታእማማቶ ታቀርጠሰ ኦባ ጌነኔ ባጤሳ ኤስ ሮርሳና” አመን ቆፋ ከነን። **13** አባራንቲ ታሎጎዶ አምባል ባሳ ግራን ካኮድያረን ጎራታ እሶ ጎሳሄዳተሬን ካሌሮ አን እሶን ሌረ ማርጮ ኬሴንጉሬን ዱዳይን ኬን፤ ማርካፋ ታኮአለሮኮ ኬንጉሬን ታቀርጠሰ ኦዶላ ቶንሴ ግር ግር አባተን ሮረን። **14** አየሱን ጎእመን ሀእዳላኖን፥ “እዩራኩሎን ካእማማረ ኢርጋዶ” ታእቲ አምባልነ ዋታ ኦዶላትኮ ኬጉረ በከ ኬስ ኤመተ። **15** ማርካፋና አምባል ፎፎል ሻፍ ሴይን ማንኮዋተ ማራን ጫልኢ አምነኔ አምባሊ ሻፋማ ሴነ። **16** ቀዳ ታእማማቶ

ትጫርት ኦዶላ ኤሎ የላነ ሴታ ግራን አቦሳ ካኦቲቲ ማርካፋነ ዋታ ታግቴ
 ዋላቦት አብነነ ሃሰን ዳንዴነ። 17 ማርካፋ ኦዶዳረን ዋላቦ ማርካፋ ቶሰ ጊቴን
 ኮርሴንጉረን ማርካፋ ዋዳሮ ማሬን፤ ማርካፋ ሱርትሰ ታአማማቶ ጨካማሰቶት
 ባንኤ ጎጎኦይኖንኮ አብሳተሬን ሻራ ዳግሴረን አምባሊ ሻፋማ ሴተን። 18 እርጋዶ
 አታታ ማንኮሴተ ማራን ታላም አሪ ማርካፋ ካጫናመሮ ሁ ኦሮኮ ኮኮ በከ
 ኦርዴሰን ሉጉዳኖ ሀጋአበን። 19 ታሴድ አሪ ሁ ካማርካፋ ገነትሶይ አተን በከ
 ኦሮ ሻሻፊን፤ 20 አሪ ታንጂን አሪትና ባራጃ ማንኮሙታናዋተን ማራን አምባልና
 አታታ ማንኮሴተ ማራን ጎርታ ሄሲን ኖ ላኮዳንዳኖ አምነኔ እጁባነ። 21 አባዶ ባቦ
 ኮና ሀአሞኒ ታንጂን አሪ አዳላተ፤ ሃንሱን ጳዉሎሳ እሶ ኦሮ አሌረ ሃ አመ፤ “እሰን
 አባዶ! አን አሰኑን ካአማረ እሰን ማልግቴንዋ ቀርጠሰኮ ከዋተንዋ ህት ሚራኣና
 ባይ ዱባ እሰን ላኮግሃረ። 22 ግዳና ማርካፋ ካላልያ ካሚራምናራ ኳሬ እሰንኮ
 ማዮ ጉቲና ሚራኣ ላኮጌቶ፤ ሃንሱን አላማንደ አሮአብሳቴን አመ አን እሰን
 ጎርሳራ። 23 አን ካኬሳ ካኮንሌራና አን ካሄደይሳታራ ሄዶ ካፋረራ ኤርግቻት
 ሄመንካ እዬ ዶሌ አሌረ፤ 24 ‘ጳዉሎሳ! አሮአብሳተ! ካሮም ዋኖላልኮክ ዋኖ
 ሆረ አት አልን ዶትሳራ! ሂክማ! ኩኔ ዋታ ካሰሴታሮ ዱባ ዋ ኩን አምረ እሶ
 ጎይኮ ሃሰሮዋ’ አመ አን ሰገራ። 25 ሃንሱን እሰን አባዶ አላማንደ! ዋ ሂካ ኢን
 ካሰገሮ ካፈልናሮ ላኖ አን አማናራ። 26 ጎሌና አምባል ኦዶላ ቶ ቶሰ ጌሲ ኖ
 ሻፍናታ።” 27 ሄመን ታቶምንኮ አፋሪ በከ ኦአድርያይ ግርዲ አምባሊ ሻፋማ
 ሴታ ግራን ሄመን ጠኤ ማርካፋ ኦዶዳታሬን ባጋ ካጌራን ኣን ሌ። 28 ሃንሱን
 ኤኤሞ ዋዳሮ ሸዬሬን በከ ሉጉድ ካኮደራን ጎራታ ህሰል ሰዶታም ሌ፤ አባራን
 ጋጭሜረን ዋዳሮ አባብ ካኮሉጉድራን ጎራታ ህሰል ሎታም ጉምቢ ላኖ ዴን።
 29 ማርካፋካን ባጋ ግሪ ካግሮ ኤኤሞ ጎጎባሳምንኮ አብሳተሬን ማርካፋኮ
 ሃሬ ማርካፋ ካኮአልሳራን ማርጮ አፋር በከ ኦሮ ሉጉደን፤ ኤሰኮ አባባተረን
 ኡል ጎጎባርሮ ኤባታኖ ሀጋአበን። 30 ማርካፋ ኦዶዳታሬን ማርካፋ ሉጉድ
 እሰ ብን ማንኮዶተሬን ማራን ማርካፋ ሞና ታሆሬን ማርጮ ካሉጉዳራን ኣን
 ሌረን ማርካፋ ጉት ታግቴ ዋላቦ በከ ኦሮ ሉጉደን። 31 ሀሱ ጎራታ ጳዉሎሳ
 ካቦሎ ዋይቻትነና ዋታዳራልኔ፡ “ሂክ አባዶ ማርካፋ ካዶዳታራ ማርካፋ ጉት
 አዳባይ ጎሀማጽኖን እሰን ሄሲን ላኮዳንዴታን” አመ። 32 ሃንሱን ዋታዳራል
 ዋላቦ ካአበሮ ዋዳሮ ጎሰረን ጎጎፈልቅቶ ኢሰን። 33 ኡል ባርን ካኮአባባታረ

ጎራታ ዱባ ባቦ ጎጎአምሮ ጳውሎስ ኤባተ፤ “እሱን ኮና ካም ኢልኪ ሀክቦን
 እርእዳላቴንኮ ህታር እሪ ታቶምንኮ እፋርታ። 34 ሃኑን ባቦ ጎጎአንታኑን እን
 ኤባታራ፤ ህክና እሱን ሁና ሰሰሮዋ፤ ኮና ሚራኣ እሱን ላኮጌቶ” እመ። 35 ሂካና
 እመ አባባተረ ባቦ ኬሰረ ዱባ ሆረ ዋ ጋላቴረ ኤብሳተ ኣማኖ ሀጋእበ። 36 ሀሱ
 ጎራታ ዱባና አታቴረን ባቦ እመን። 37 ማርካፋ ኦሮ ኦግነ ኖ ራቶ ላማ ቦለኔ
 ቶደባታምኮ ሌኔ። 38 ዱባና እመ ካኮባራራረ ጎራታ ታካንተተ ዳርጋማ በከ
 ኦሮ ሉጉዳሪን ማርካፋ ፋፋዳይሴን። 39 ኡል ካኮባራረ ጎራታ ታኮጌራን ባንኤ
 ላኮአዴሴራን፤ እየሱን ጎእመን ባጋ ግርዲ ጨካማሰቶት ኤሎ ግራኖ ዴን፤ እሱን
 ጎዳንዳመ ማርካፋ ኤሰነ ባጋ ቤሰን ሄደን። 40 ማርካፋ ታኮአልሳሬን ማርጮ
 በከ ኦሮ ፋሬን ጋፋሬን፤ ኡሱ ጎራታዋ ካሻንካላ ዋዳሮል ፋሬን፤ ሻራ ምና
 ታአምባሌ ቶስ ጦቂሰረን ባጋ ብን ሴተን። 41 እየሱን ጎእመን ማርካፋ ኤኤሞ
 ዋታ ባሳመረ ሙክ እመ ሆረኮ ሄገልዴ ቃማላመረ ካእኢኖን ሌ፤ ምና ታሃሬነ አደ
 ጋሽማሎኮ ካከይ ኤኤባኖ ሀጋእበ። 42 ኦሻሜራንኮ ኮና ግርሰ ብ ጎጎቤኖንኮ
 ዋታዳራል እሱ ዱባ ላጋዲን ሄደ። 43 ካቦሎ ዋይቻት ጎእመን ጳውሎስ ሃሰን
 ማንኮድተረ ማራን ቆፋትሶ ላኮአታተረ፤ ዱዶዋ ግርሶ ካካሳ ጣይ ማርካፋኮ
 በከ ኦሮ ኢኢጉረ ግርሰ ባጋ ጎጎቤኖን አጃጃ። 44 ኦሄሴሬን አደን ካኤኤበሮ
 ማርካፋ ጉት ሀማጽሬን ጎጎቤራውን አጃጃ፤ ሂካ ጋራይ ዱባና ኖጎዳ ባጋ ቤን።

28 ኖ ኖጎዳ ባጋ ካኮአባታነ ጎራታ ባጋ ታኮአባነን ኦዶላ ማልታ ታአማማቶ
 ላኖ አዴንሰ። 2 ኤሰ ኦዶላ ካግረ እባዶ ታሳዳንቶ ኢዳነ ኖን ፈለ፤ ሀሱ ጎራታ
 ኢዳሞ ኡባተረ አምባል ማንኮግቴ ማራን ኤለን በቤሰን ኖ ቆጳቴን፤ 3 ጳውሎስ
 ታኦሮ ሻርፍ ኩኩይሰረ ኤለኒ ካኮሉጉዳረ ጎራታ ሆኦ ካኤሌክ ካከይ ሀበሳ ኮ
 ቤረ ገነቴሳ ኢዳረ ጉት ሬረ፤ 4 ካማልታ እባዶ ሀበሳ ገነ ታጳውሎስ ኢዳረ
 ጉት ካሬረሮ ካኮድያረ ጎራታ “ኦግራን ሂክ እባዶት ኔፎ ካላጋደሮያ! ጋሽማሎኮ
 ኖጎዳ ጎቤና ፍርዳ ካዋኮ ፋላዳይ ሄሲን ላኮዳንዴሮ” እመን። 5 ጳውሎስ አደ
 ሀበሳ ኤለን ኦሮዴሰ ሁርጉፈ ሉጉደረ ዳኖ ቶና ኡሱ ሀጌኖን ሄሰ። 6 እባዶ አደ
 “ኡሱ ግዳ ማር ዱዱብረ፤ ጎርቱን ደራኣ ኡሊ እ ጎሮዋ” አማ ዋቻ ግረ። እየሱን
 ጎእመን እሱ ጎራታ ካሞጋን ጫቃሳ ግራን ዳኖ ቶና ኡሱ ሀጌኖን ታግቶ ካኮደያረን
 ጎራታ ቆፋትሶ ኢግልሳቴንጉረን “ሂክ ዋልኮ ኮያ!” እመን። 7 ኤሰ ኖ ታኮግነ
 ባንኤ ዶሌ ኤሰ ኦዶላትኮክ ሞት ፑፕልዮሳውን ኤረ ግቴ፤ ሂክ እባዶት ምንኬሳ

ኖ ቆጶላተረ እሪ ሴድ ኖ ጎኢዳን ማርትሰ። **8** ሀሱ ጎራታ ካፕፕልዮሳ ኦዶ ማር ጉባና ኤርጂታ ሀወአማ ሁዱረ ግረ፤ ጳውሎሳ ኡሱ ቶስ ታበረ ዋ ኤባተ፤ ገነ ኡሱ ጉት ካየረ ፋይሰ። **9** ሂክ ካኮላረ ጎራታ ኤስ ኦዶላ ካግረ ካካለ ዲኩባሌሳል ኤመተረ ፋይ። **10** አባዶና ኖን አላቦ ካሞጋን ከነን፤ ካባጃና ቱሴን፤ ማርካፋይ ታብነኔ ሴይን ካኮከያን ጎራታ ኖን ካዶትሳሮ ዱባ ማርካፋ ጉት ካዬን። **11** ድግኒ ሴድ ማልታይ አዳላነኔ ባጤሳ ኤስ ኦዶላቲ ካአዳላተረ ካእስክንድራ ማርካፋይ ታብነኔ ዱዳን ኬን፤ ኡሱ ማርካፋና ድዮስቆሮስ ካአማማረ ላኩ ዋል ካአቦ ማላታ አባናዮ። **12** ኖ ሰራኩሲ ታአማማቶ ካታማ ጌነኔ ኤስ እሪ ሴድ ሀይነ። **13** ኤስኮና ባድነ ማራሙርነ ረግዩ ታአማማቶ ካታማ ጌነ፤ ኤስ እሪ ቶ ሀይነኔ ሎገዶ ማንኮኬረ ማራን ታላም እሪ ታፑትዮሉስ ካታማ ሴነ። **14** ኤስ አማኒል ሄላና ኖ እሶነ ዋታ እሪ ቶዶባ ጎሳህማጺኖን ኤባተን፤ ኤስኮ አባባነነ ታሮም ካታማ ቶስ ሴነ። **15** ታሮም ካታማይ ካግረ አማኒል ጋራካን ካኮማላረን ጎራታ ታአፍዮስ ግያ ጎርቱን ሴድ ታባሪሳኖ ታአማማቶ ባንኤ ታ ገራኒ ኖ ቆጶይን ኤመተን፤ ጳውሎሳ እሶ ካኮደያረ ጎራታ ዋ ጋላተጉረ ጎሳእና ሄላተ። **16** ታሮም ካታማ ካኮታባነ ጎራታ ጳውሎሳ ኡሱ ኦራ ካግረ ዋታዳራነ ዋታ ካለካለ ኤስ ጎሳግሮን ፈኢ ሰሰን። **17** እሪ ሰድኮ አባባተረ ጳውሎሳ ታሮም ካታማይ ካግሮ ካጂንጂን ካአይሁድ አባዶ ኡምሰስ፤ ካኮኩኩአማረ ጎራታ፡ “አቢላልቴ! እን ካእስራኤል ጎሳና ካኦዶላል ሴራ ጉት እን ታጌግሰራ ሚራኦ ላግቶ፤ ሀሌዎ ኳሬ ኢየሩሳሌም ሻመጉረ ካሮም አባዶን ሮርሳመ ሰሳመ። **18** ካሮም አባዶ እን ቆቆሬን አባባተሬን ገይን ካጌግሰሮ ባስ ሄላና ማንኮዋቴን ማራን እን አዱ. ጋፋርን ሄደን። **19** አይሁድ አደ አዱ. ፋራማኖኬ ካኮኔባታረን ጎራታ እን አደ ዋኖላልኮክ ዋኖ ቶስ አበት አማኖ እን ካሄሶን ሌ፤ ጎሌና እን ጎሳኬ ካኮሞትራ አየስ ኢን ላግረ። **20** ግዳና እን እሰን ካኮኡምሰሰራ እሰን ዲና እሰኑን ሰግን አመረያ፤ እን ሂካ ሳንሳላታይ ካኮሻመራ ጎሳ ካእስራኤሊን ታሰሳንተቶ አብድኮት አላንቲያ” አመ። **21** እሶና፡ “ካይሁዳ ኡሊ ጋራካኮት ሃጃውን ታጻፋንተታ ዲብዳቤ ኖ ላኮጌተቶ፤ ሂታራ ካኤመተሮ አባዶኮ ኮና ጋራካ ታሜላን ኦዱ ካእዬሰራ ላግሮ። **22** ሂካ እት ካሄደይሳቶ አማኖካ ባንኤ ዱባይ አባዶ ካኔባታሮ ኖ ካንሶዋ፤ ሃንሱን ቆፋታ መቶ ኖ ማልን ዶታና” አመን። **23** ቃጣሮ አበን አባባተረን ራቶ ሌን ምንኬሳ ቶስ ኤመተን፤ ኡሱና ባርኮ ሀጋእበረ ታ ሄመን ጌሮ ዋኖናት ካዋ አቶታ

ቆፋቴሳ እሱን ሰገ፤ እሱ አማንቸሲን ካሙሴ ሴራኮና ካሄገሮል ማጻፋጃልኮ ቤስ ቱሳ ጋራ ካየሱሳ እሱ አጋልሰሰ። **24** ኮኮና ኡሱ ካእዬሰሮ ሃፋራ አማኔን፤ ኩክ አደ ላኮአማን። **25** እሱና እስእስኦሮ ህኢቶ አንሌኖን ዳርኣመን። ጎሌና እሱ ዳርአማናኮ ሆረን ጳዉሎሳ አዬሰኮት ዬፓ ጎሳ፥ “እያና ቁሉክ ካሄገሮ እስያሳኮክ ጋራነ ኦዶጃላልክሰኩን ካእዬሰረ ሩምየ! **26** “ኡሱ ካእዬሰረ ሃፋራና ሂካያ፥ ሂካ ጎሳ ቶስ ሴጉዴ እስን ማላኖ ማላታንዋ፥ ሀሌዎ ኳሬ ላኮሻዳታን፤ ድያኖና ዴታንዋ፥ ሀሌዎ ኳሬ ላኮኮካታን፥ አም እሱን ሰገ። **27** ሂካ እባዶኮት ዋዳና ድላፋተታ፤ ነበትሶና ዱደታ፥ ኢልኦ ኦትሶና ጠጺሜራን፥ ሂካማሌ ሊ ዋተዋ፥ እልኦ ኦትሶይ ዱጉረን፥ ነበትሶዪና ማልጉሬን፥ ዋዳናትሶይና ሻድጉሬን፥ እሱ እን ቶስ አባባይ ግሬንዋ እንና እሱ ፋይስ ግራረ” አመ። **28** “ጎርታ ፋይና ካዋኮክ ሀንዳ አይዛብን ካፋራመሮ ላኖ እስን ጎሳአዴሳኩን እን ዶታራ፤ እሱና ማልናራን” **29** ጳዉሎሳ ሂካ ካኮእዬሳረ ጎራታ አይሁድ አሎ ዶጋማ ኤሰኮ ቤን ሴተን። **30** ጳዉሎሳ ሳፎ ሙረ ካኮሀማዬረ ምኒ ጌስ ላማ ዱዶ ሀማዬ፤ ኡሱ ቶስ ካኤሜታሮ አባዶ ዱባና ቆጶታረ፤ **31** ዋኖናት ካዋ ላላባ ጋራ ካጎታ የሱሳ ክርስቶሳ ጃቡይና ባልቹማይ አጋልሰሳ ግረ።

ካሮም ቶስ

1 ካየሱሳ ክርስቶስ ድይና ካፋራመሮ ሊን ካኤማመሮኮና ዋንጋላ ካዋቱን ዋዩ ካሌሮ ጳውሎሳኮ ካፋራመሮ ሀንዳያ። **2** ሃንሱን ዋንጋላ ካሄገሮ ቶንሴ ቁሉክ ማጻፋይ ጣይተ ዋኮ አብድ ሰሳንተታ። **3** ሂክ ዋንጋላና ኤረ ማራን ሶይ ሳኒ ታዳዉተኮ ማንኮሌዉን። **4** ቁሉክ አያናኬሳይ አደ ጎይኮ ክያኖኮክ ካክቲ ሁናይ ኤረ ካዋ ሌ ማንኮሙተ ማራን ጎታካን የሱሳ ክርስቶስ ማራንያ። **5** ኡሱ ካክርስቶስ መገይ አይዛብ ዱባ ጎሳኦማኖና ጎሳኦጃሞሮን የልን ኡሱኮክ ጋራን ካፋራመሮ ታየልሰሶ ሰኖ ኖ አታኔና። **6** እሰን መተክሰኑን እየሱሳ ክርስቶስ ጎሳሌታዉን ዋ ኦኤመሮ ኦሮኮታን። **7** ዋይ ኦጌላንቲታና ቁሉላ ሊን ኦኤማንተታን ሮም ኦግታን ዱባን፣ ዋ አቦካን፣ ጎታ የሱሳ ክርስቶስ ሰኖና ኖጎዳ እሰኑን ሀሌቶ። **8** ዱባንኮ ጣየ፣ አማኖክሰን አላም ዱባ ማንኮማልሳመሮ ማራን እሰን ዱባን እን ዋ ሄዶኬ ካየሱሳ ክርስቶስ ጋራን ጋላታራ። **9** አርጌቶ ኤብኬይ እን እሰን ጎሳሻዳሮ፣ ካኤረ ዋንጋላ ላላባኖ ዋዳናኮ እን ካኮንሀንዳራ ዋ ኡሱ አቶኬያ። **10** አርጌቶ ኤብኬይ እን እሰን ሻዳራ፣ ግዳ አደ ፈኢ ታዋይ እን እሰን ቶስ ጎሳኤማሮን ራ እን ጎሳባናምሮ ኤባታራ። **11** ጎሳኦታታኑን እሰን ካየሎ አያናኮክ አላቦ በለኤስ ሰሰንና ድን ሃልቻራ። **12** ህክና እሰና አንና መተመተካን አማኖ እስእስኦሮ ጎሳኦታኖንያ። **13** አቢላልቲ! አይዛብ ኦሮ ዋ ካኦማናሮ እባዶ ጎሳሄላየሮ፣ እሰን ኦሮ ኡሱማሌ ዋ ካኦማናሮ እባዶ ሄላይን ዶተረ፣ እየሱን ጎአመን ካዋጋን ጎራታ እሰን ቶስ ኤመይን ቆፔ ግራን፣ ግዳግን ገጋናዋትኬ ጎሳኦዳሳኑን ዶታራ። **14** ካግርክ እባዶዉና ሌረ ኮና ካካሶቱን፣ ቃሮሌዉና ሌረ ኦሻዶቱን ዋንጋላ አጋልሰሰን እን አንዛ አባ። **15** ሮም ኦግታን እሰኑና ዋንጋላ ላላብን እን ካኮንሀልቻራ ሃንሱንያ። **16** እን ዋንጋላይ ላኮሙላሮ፤ ህክና ሆራርጀ አይሁድን ደቤና አይዛብን ካኦማናሮ ዱባን ሁና ካዋያ። **17** ዋንጋላይ ቁሉማ ታዋ ሙተታ፤ ቁሉክ አማኖ ግራራ አማመ ጎሳጻፋመሮያ፤ “ቁሉማና ሆራርጀኮ ታ ጋቾ ጌቶ ካኮሄላማታ አማኖ ካላልያ።” **18** ሜላነይ ሩም ቡቄን ኦክበራን፣ ዋ አብሰዋትትሶይና ሜላነትሶ ዱባ ጉት ኤንገ ታዋ ዳሩርኮ ኤመይናታ። **19** ጋራ ካዋ አዳሳኖ ካዳንዳማራ እሶ ዶሌ ካኦዳሳመያ፤ አላንቲና ዋ እሶን አዴሰሰራ። **20** አላም አሮመጣመኮ ሀጋአበጉረ ታሙቶን ያዳሊ ታዋ ህክና ጅሩ ጅሮማክ ሁናና ሄዶ ላናኬሳ ኡሱ ታመጠሮ መጣ ዱባ ጉት ሙታራ፤ ሃንሱን እባዶ

ካባሳር ባሱን ካኮአላሮ ላኮአቦ። (aīdios g126) 21 እሶ ዋ ጎማላቤና ዱዶ ሄዶ ላኖኬሳ ላኮካባጃን፤ ጋላታና ላኮሰሴን፤ እየሱን ጎአመን ያዳክሶ ኢል ካላይክና ታሻዶን ዋዳናትሶ ታዱደ ሌተ። 22 ቃሮና ጎአመና ጎዋሌ ሌን፤ 23 እርዶክ ዋኮት ካባጃ ካጎዋሮ እባዶና ክምብርጃል፤ ሱላለና ኡሊ ታግታማቶ መጣኮት ምዲ እን ካመጣመሮን ካባጃ ሰሰን። 24 ሃንሱን ዋ ጨቦ ታእማጋንተቶ ዋዳናትሶኮክ ሀልቻ እስ እስሮ ማርክሶ ጎጎባቶይሳራውን ቁሉማ ካላይት ኤሴላ ታሶየቱን ሮርስ ሰሰ። 25 ህክና ካኮንሌራ ሩም ታዋ ጣራ ማንኮኢግልሴን ማራን፤ ካመጠሮኮት ባንኤ ካመጣመሮ ማንኮሄዶይሳተን ማራና ማንኮሀንዳዬን ማራን፤ ካመጠራ ጅሩ ጅሮማን ካሶማሳመያ፤ ሀሚኒዕ። (aiōn g165) 26 ህታ ኣላንቲ ዋ እሶ ካሙሊስሮ ሀልቻክሶውን ሮርስ ሰሰ፤ ሄሌልክሶና እደ ያዳሊትሶውን ታዶትሳቶ ኤሴላ ያዳሊትሶ ታሌኖን ኤሴላን ኢግልሰን። 27 ኡሱማለና ባባር ያዳሊትሶውን ካዶትሳሮ ሄለልኔ ዋታ ኤሰላኖ ኢሴንጉሬን እስ እስሮ ሀልቻ ካሶየቲ ጉባተን፤ ባባር ባባርን ዋታ ሁዱረ፤ ኦሜላን ፈሎኦትሶውን ታዶትሳቶ ሙሮ መተክሶይ ጉት ኬናተን። 28 ሂካኮና ካሮረ ያዳክሶይ ዋ ማላባኖ ላኦ ላኮአቦ እማኖኮ ካከይ፤ ፈልን ካንዶትሶን ጎጎፈላውን ዋ ላኦ ካላይት ሳሙውን ሮርስ እሶ ሰሰ። 29 ሃንሱን ባሰ፤ ሜላን፤ ጋጺጋጳኖ፤ ምጌ፤ ጢቦ፤ ኔፎ ላጋዳኖ፤ ኤንጌ፤ ሶባኖ፤ ካሜላን ሀልቻ ዱባ ኦእማጋሜራን፤ ኡሱማለና ኦሀማታራንያን፤ 30 እባዶ መገ ኦባሳራን፤ ዋ ኦዲዳራን፤ ኦሀባራራን፤ ኮራሜሳና ኢፍሳዶለያን፤ ሜላን ካኮፈላራን ራ ኦዶታራን፤ ኦኡሙለራውን ኦእጃጃሞን፤ 31 ኦሻዶን፤ ታእመን ኦፋራራን፤ ጌላንጀ ካላይኒዕና ሻጋ ካላይኒዕያን፤ 32 ሂካ ኦፈላራን ዱባን ጎይ ዶትሳራ፤ ካእማሮ ልክኪ ካሌሮ ሴራ ካዋ ኦዴሳ ግራን ሂካ እየሰ ፈላኖ ካላል እንሌኖን ግራን ሂናኦ ኣኒዕኒዕ ፈሎ ካፈላሮ እባዶና አታይሳራን።

2 ሃንሱን ካካለ እባዶ ጉት ካፍርዳታ አት፤ ካኮአላቶ ላኮአብቶ፤ ካካለ እባዶ ጉት ፍርዳ እስኦታ ጉት ፍርዳታ፤ ሀሱ አት ካፍርዲተታ እባዶት ካፈለሮ አትና ማንኮፈላቶ ማራንያ። 2 ሂካማሌ ኦፈላራን ጉት ፍርዳ ካዋ ልክ ላኖ ካንሶዋ። 3 ጎርታ አት እባዶት ካካለ ጉት ፍርዳ፤ ኡሱዋ ካፈላቶ ጎሌተ ፍርዳ ካዋኮ ካሄሶ እን ላራ? 4 ሙ አንጀረ ታዋ ጨቦኮ ጉላ ጋላኖ ቶስ ታገጌሳቶ ላኖ እንዴሶን ኢዳነና ዳንዳኖና፤ ኦብሰኮት ዱሩማ ቱፋታ? 5 እየሱን ጎአመን ታዱዴና ጨቦኮ ጉላ ታሎን ዋዳናታኮት ኣላንቲ ልክኪ ፍርዳ ታኮኤመታሮ ታኤንጌ አሪ ታዋይ

እስከታይ ጉት ኤንገ ጎጎጂናቶ የላታ። **6** ዋ እባዶን መተመተ ፈሎኦቴሳክ ማለ ሰሰናራ። **7** ካኦዳን ካሌሮ አታይ ፈላኖ ካባጃና፤ ጋሻና ኦዶታታራውን ጅሩ ጅሮማክ ግር ዋ ሰሰናራ። (aiōnios g166) **8** አየሱን ጎአመን እስ ኦጌላታራን ሩም ኢሰን ሜላን ፈላ ኦሰሴታራን ጉት ፍርዳ ካዋና ኤንገ ግናታ። **9** ሜላን ካፈለሮ እባዶ ዱባ ጉት ጣይ አይሁድን ኤሰኮ አይዛብ ጉት ራኮና ጭንቁ ለታ። **10** አየሱን ጎአመን ታኢዳን ካፈለሮ እባዶ ዱባ ጉት ጣይ አይሁድን ኤሰኮ አይዛብን ጋላታ፤ ካባጃና ኖጎዳ ለታ። **11** ዋ ማዮና ላኮኡሉልሳሮ። **12** ሴራ ካሙሴ ካላይ ጨቦ ካፈለ ዱባ ሴራ ካላይ ባይናራ፤ ሴራ እሶን ግራን ጨቦ ኦፈላራን ሴራይ ፍርዳምናራን። **13** አላንቲና ዋይ ሆረ ቁሎለ እአማማራን ሴራን እአጃጃማራን ኳሬ ሴራ ኦማላራን ላኮያን። **14** ሴራ ካሙሴ ካላይክ አይዛብል ጎጎካሳናየኒ ሴራ ካሰጋሮ አየሰ ፈላራን ህታ አላንቲ ሴራ ጎዋታመና ካክሶ ካካሳናየን ሴራ ማንኮአባን ማራን ፈልን ካዶትሳሮ ካሳንዋ። **15** ህክና ያዳሊትሶይ ሴራ ካሙሴ ካሰጋሮ አየሰ ዱባ ዋዳናትሶይ ካጸፋመሮ ላኖ ቱሳራ፤ እደና ሳሙትሶ እሶን አቶ ላታ፤ ሳሙትሶ አሪ ቶቶ ዋቃሳታ፤ አርቶቶና ጋርጋራታ። **16** ህክና ካኮልናራ አን ካአጋልሰሰሮ ካዋንጋላ ሃፋራ ማለ ዋ የሱሳ ክርሰቶሳ ቶንሴ እባዶ ካፈለሮ ሰያመ ካግሮ አየሰ ጉት ታኮፍርድናሮ አሪ ካአዴሳመ ሌራ። **17** አት አን አይሁድያ ጎአንተ፤ ሴራ ካሙሴ ካአማናቶና ዋኔ ዋታ ታግቶ ኤሴላ ካኮራታ፤ **18** አት ፈኢ ታዋ አዴሳታ፤ ሴራ ማንኮአጋልሳቴቶ ማራን ታኢዳን ፈላኖ ካሶዋ። **19** አት ኢልኦ ኦደያኖቹን ሆረሃይተ ካገገሳቶ ጎሌተ፤ ሙጉድ ኦግራኑና ኢፋ ላኖካ እስከታይ ካአማናቶ ጎሌተ፤ **20** ሴራይ ታሄላቴቶ ቃሩማኮና ሩምኮ ካከይ ካካሶቹን ጎርሳ ሰሳ፤ ይሰ ካአጋልሰሳቶ ጎሌተ። **21** ጎርታ አት ካካለ ካአጋልሰሳታ እስከታ ላኮአጋልሰሳቶያ? አሮሄቴ አንተ ካሰጋታ አት መተካውን ሄታታ። **22** አት እባዶን ሻርሙጣኖ ላኮዶትሳሮ ካአማታ አትዋ ሻርሙጣታ፤ አት ቶልቻ ካዲዳታ ምን ካኤብ ሳማታ። **23** አት ሴራይ ካኮራታ ሴራ ባሳ ዋ የራሳታ። **24** ህክና፡ “አላንቲታትሰኒ መገ ካዋ አይዛብ ዶሌ ሀባራምናራ” እማመ ጎጎጸፋመሮያ። **25** አት ሴራ ካሙሴ ካኦራቶ ጎሌተ ሀማጽሳማኖ ላኦ አቦዋ፤ ሴራ ካሙሴ ካባሳቶ ጎሌተ አት አደ ካሀማጸሳሞን ግሮ አን ላታ። **26** እነሀማጸሳሞን ኦግራን ሴራ ካሙሴ ካአጃጃሮ ካኦራታራን ጎሌን፤ ካሀማጸሳመሮ አን ላኮቶታማራንያ? **27** አት፡ ካጸፋመራ ሴራ ካሙሴ

ግራና ካህማጺሳንቴቶ ሌተ ግራን ሴራ ጎባሴ ሶይ ካህማጺሳሞን ግሮ ሌተ ሴራ ታኑራታ ታእይዛብ ኡና ኩ ጉት ፍርድናታ። 28 እባዶት ኮ ኦጉተ ኦላል እን እይሁድ ሌራ ጎእመ እይሁድ ላኮላሮ፣ ካሩም ሀማጽሳማኖ ካሳረ ካሶየ ሴራ ላኮየ። 29 እየሱስ ጎእመን እባዶት ኮ እይሁድ ካኮላራ ካኦሮ እዮናት እይሁድ ሊ ጎሙተያ፤ ሀማጽሳማኖ ካሩም ሀማጽሳማኖ ካኮላራ ካጸፋመሮ ሴራ ካሙሴይ እንሌኖኒ ግራን እያናይ ዋዳናኮ ሀማጽሳማኖ ጎሌያ፣ ሂካ እንክክ እባዶኮ ጋላታ ካኮሄላታራ ዋኮያ ኳሬ እባዶኮ ላኮየ።

3 ሀያ እይሁድ ላኖኮት ላኦ መታ? ሀማጽሳማኖ መ ላኦ አባ? **2** ማምሰክ ራዲና እይሁድ ላኖ ላኦ ታሞጋንታ፣ ዱባንኮ ጣየ ሃፋራ ካዋ ሀዳራ ካኮንሰሳመራ እሶንያ። **3** እይሁድኮ ኮኮና አማኖ ጎዋይገሬን አማኖ ዋትክሶ አብዳማኖ ካዋ ላኦ ካላይክ የላራ? **4** ዱዶ ላኮየሎ! እባዶ ዱባ ጣራሜሳ ጎሌና፣ ዋ ጎእመን ካሩምያ፤ “ሃፋራካኮ ካከይ ካሩም ላታ፤ ዲናካና ፍርዳ እዋድናታ” አማመ ጎጎጸፋመሮያ። **5** ሜላነታን ቁሉማ ታዋ ኣሎ ታቱሳቶ ጎሌተ መ እምን ዳንዳና? ዋ ኖ ጉት ኤንገታቴሳ ኬናኖ ሩም ካፍርዳሮ ላኮየ አማኖያ? ያዳ ካእባዶ እን እዬሳራ አማኖያ። **6** ኦግራን ሃ ሊን ላኮዳንዳሮ፤ ሂካማሌ ሊ ግረዋ ዋ አላም ጉት ምሲ ፍርድን ዳንዳራ? **7** “እን ጣራሜሳ ላኖ ዋኮት ሩም ካቱሳሮና፣ ካባጃ ካአዳሮ ጎሌ፣ ጨባለሳ አማመ ግዳ ጊን ምሰ ፍርዳማራ?” **8** “እዳን ጎጎኤማቶን ሜላነ ፈልና አማራን አማ እባዶ ኮኮ ጎጎኤሳራያ፤” ሂናኦ እባዶጃ ጉት ካግራ ፍርዳ ልክያ። **9** ጎርታ መ እምናና ኖ እሶኮ ሮራና? ዱዶ ላኮሮራኖ፤ እይሁድና ሌረን እይዛብ፣ ጨቦ ኦሮ ግራኖ ጣይን አዳሰንሰ ሰግነና። **10** ሃ አማመ ጎጎጸፋመሮ፣ “ኮና ዱዶ ቁሉክ ላኮግሮ፤ **11** ካሻዳራ ላግሮ፣ ዋ ካዶታራ ኮና ላግሮ። **12** ዱባና ሽርመራን ራቶ ላኦ ካላይኒዕ ሌራን፣ ታኢዳን ካፈላራ ማኖና ዱዶ ላግሮ።” **13** ህኢትሶና ካሜላን እየሰ እዬሰን ካባናመ ጉምቢ ካቃማል እንትትታ፤ ኤፌብክሶና ሶባንጃ ጂናታራ፣ ህኢትሶኮ ካበያራ እየሰ ማርዚ ታሀበሳ እንክክያ፤ **14** ህኢትሶ ቃንጎና ካኦኮኮታሮ እየሰ ታእማጋንተታ፤ **15** ሉቃኦትሶ እባዶ ላጋዲን ኦጄራራንያን፤ **16** ካኮሴታራን ራክሶ ዱባ ባኖጤና ራኮጤን ኣላንቲያን። **17** ካኖጎዳ ራና ላኮካሳን። **18** “ዋ አብሳታኖ ሱረ እሶ ዶሌ ላኮሙታሮ።” **19** ካሴራ እጃጃ ካኮንዶትሳራ ሴራ ሄገሊ ኦባራራጤን ላኖ ካንሶዋ፤ ህታ ኣላንቲ እባዶ ካኣላሮ ዋተረ ጫልኢ አማራ፤ አላም ዱባ

ፍርድ ካዋይ ካባሰሮ ልናራ። 20 ሃንሱን ሴራ ካሙሴ ኦራታኖይ ማዮና ዋይ ሆረ ቁሉክያ እማሚን ላኮዳንዳሮ፤ ሴራ እባዶ ዱባ ጨባለሳ ላኖ ቱሳራ። 21 ግዳ ጎእመን ዋ እባዶ ካኮቁሎይሳራ ሴራ ካሙሴኮ ካለክ ራይ ላኖ ቱሳራ፤ ሂክ ሙሴይና ካሄገሮይ አቶታመራ። 22 ህት ታዋ ቁሉማ አሳብንጀ ካላይ የሱሳ ክርስቶሳ እማናኖይ ታሄላማቶ ቁሉማታ። 23 ኣላንቲና እባዶ ዱባ ጨቦ ፈለራ፤ እሶና ካባጃ ታዋ ዋተራን። 24 የሱሳ ክርስቶሳ ታሌተ ዋዶይ አዱ ሰኖቴሳይ ቁሎዬራን፤ 25 ዋ የሱሳ ክርስቶሳ ጃርሶ የለ ካኮንኬነራ ኡሱ ካእማናራ ዱባ፤ ኢግኬሳ ጨቦኮ ሀሄሶ እማማኖ ጎሃሄላሮንያ፤ ዋ ሂካ የላኖ ኡብስቴሳይ ካጣዋ ጨቦክሶ ካግኖን ኣን የለረ ካኬሳ ፍርድ ቱሰንያ። 26 ሂካ ጌሲ ዋ መተኬሳዊን ቁሉክ ላኖ ካቱሳራ የሱሳይ ካእማናሮ ዱባ ቁሎይሳኖይያ። 27 ሀያ ኖ ካኮዳዳና መያ ካግራ? ማመስና ላኮዳዳታኖ! ጎሃዳዳኖን ኣላንቲ መታ ታግታ? ሴራ ካሙሴ ማንኮኦራታኖ ማራንያ? ላኮዮ፤ እየሱን ጎእመን ኖና ካኮዳዳታና እማኖይያ። 28 ሃንሱን ዋ እባዶ ካኮቁሎይሳራ፤ እባዶ ሴራ ኦራታኖ እንሌኖን ግራን እማኖ ላኖ ካንሶዋ። 29 ዋ ካእይሁድ ሄዶ ካላልያ? ላ ካእይዛብ ሄዶኔዮላ? እ ኣይዛብዉና ሄዶያ። 30 ኣላንቲና ካሀማጺሳመና ካሀማጺሳሞን ግሮ እማኖ ካቁሎይሳራ ዋ ኮ ካላልያ። 31 ሀያ ሃ ጎሌ እማኖኮ ካከይ ሴራ ላኦ ካላይክ የልን ዳንዳና? እጂ ላኮዳንዳኖ፤ ሱረዋ ሴራ አታይሲን ኳራ።

4 ጎርታ ሶይ ካሆሬ ኦዶካን ካሌረ አብራመ ሂካ ጋራነ መ ሄላተ? 2 አብራመ ፈሎይ ካቁሎየ ሊ ግረዋ፤ ካኮዳዳራ ግረዋ፤ እየሱን ጎእመን ዋይ ሆረ ዳዳይን ላኮዳንዳሮ። 3 ማጸፋ ቁሉክ መ እማራ? “አብራመ ዋይ እማነ፤ ቁሉክ ሌ ቶታመ” እማራ። 4 እባዶት ኮ ፈሎ ጎፈላተ ካፈሎ ዳሞዛ አላቦ ኣን እንሌኖን ግራን ፈሎኦቴሳን ካዶትሳሮ ኣን ቶታማራ። 5 እባዶ ፈሎ ኦኢዳን ፈልን ጎዋተና ዱዶ፤ ጨባልዬል ካቁሎይሳሮ ዋ ጎእማን እማኖኬሳ ቁሉክ ሌ ቶታማራ። 6 ዳዉተና ቁሉማ ፈሎ ካላይ ካኮንቶታማታ እባዶት ካሶማሳመ ላኖ ቱሰን፤ 7 “ባስክሶ ሀሄሶ ካኮንእማመራና ጨቦክሶና ሀሄሶ ካኮንእማመራ እባዶ ካሶማሳመያ። 8 ጎታ ጨቦ፤ ዱዶ ካኮን ቶትኖን እባዶ ካሶማሳመያ!” አመ አዬሰራ። 9 ሂኒሪ ሶማ ኦሀማጺሳሜራን ኦላሉንያ ሙ ኦሀማጺሳሞቱኔያ? ካአብራመ እማኖ ቁሉክ ሌ ቶታመ አምነና። 10 ሀያ ሞሲ ቶታመ? ሀማጽሳማናኮ ዳንበኔያ ሙ ሀማጽሳማናኮ ሆረንያ? ኡሱን ካኮቶታመራ ሀማጽሳማናኮ ዳንበኔ

እንሌኖን ግራን ሀማጽሳማናኮ ሆረነያ። 11 አብራመ ጋና ሀማጽሳማናኮ ሆረነ
አማኖኬሳ ቁሉክ ሌ ጎጎቶታመሮ ማላታ ኡሱን ጎጎሌሮን ሀማጽሳመ፤ ሃንሱን
አብራመ፡ ሀሃማጽሳሞን ኦአማኔራኑና አማኖክሶ ቁሉክ ሌ ካኮንቶታማሮ
ዱባን ኦዶያ። 12 ኡሱ ኦሀማጸሳመራኑና ኦዶያ፤ ኦዶ ካኮንሌራና ሀማጽሳማኖ
ካላል እንሌኖን፡ ኣቦካን አብራመ ሀማጽሳማናኮ ጣዩ ካግረ አማኖኮክ ራድ
ኦሰሌታራወኔ አደረ ኦዶያ። 13 አብራመና ሳኒቲሳ አላሞ ጎጎኤልቶን ዋ አብድ
ካኮሰሰራ አማኖ ታሄላማቶ ቁሉማያ ኳሬ ሴራ ኦራታኖይ ላኮዩ። 14 ሴራ
ካሙሴ ኦግራን አብድ ኦኤላራን ጎሌን፡ አማኖ ላኦ ካላይክ፡ አብድና አዳት ሊ
ግራተ። 15 ሴራ ካሙሴ ኤንገ ታዋ ኬናራ፤ ሴራ ካሙሴ ግር ዋተዋ አድ ባሰ
ላኮግራረ፤ 16 ሃንሱን አብድ ካኮዳባተታ አማኖ ጉቲዩ፤ ህት አብድ ታአብራመ
ሳኒ ታሌተቶ ዱባን ዋኮ ሰኖይ ታሰሳንተቶ ላኖ ሂካኒ አዳሳመራ። ሂክ ሴራ
ካሙሴ ካሰሌታሮ አባዶ ዱባን እንሌኖን ግራን አብራመ ኣን ካአማኔሮ ዱባንያ፤
ሂካኒና አብራመ ካዱባ ኦዶያ። 17 ጋራ ካአብራመ፡ “ካሞጋን ጎሳን ኣን ኩ ኦዶ
የለራ” አማመ ጎጎጻፋመሮያ፤ ኡሱና ካጎዩሮ ጎይኮ ካኬሳሮ፡ ካግኖና ካግሮ ኣን
ካየላሮ፡ ካአማኔሮ ዋይ ሆረ ኡሱ ኦዶካንያ። 18 “ሳኒታና ሂካማሌ ልናታ”
አማመ ኡሱን ካሰጋመሮክ ማለ፡ ኮና አብድ ማንኮግኖት፡ አብራመ አማኔረ
ካሞጋን ጎሳን ኦዶ ሌ። 19 አብራመ ጌሰ ቦልክ ጃርሳ፡ ማርኬሳ ካዋተና፡
ታሳራ ገዳም ታኡሙሎን ላኖ አዳሳ ግራን አማኖኬሳ ላኮሀረ። 20 ጎሌና አማኖ
አታተረ ዋዉን ካባጃ ሰሰ ኳሬ ታዋ አብድ ላኮሄዳተረ። 21 ዋ ኡሱን ታሰሰሮ
አብድ ካፈልናሮ ላኖ ዋዳና ታአማጋንቴ አብዳታ ግረ። 22 ሃንሱን አማኖኬሳ
ቁሉክ ሌ ቶታመ። 23 “ቁሉክ ሌ ቶታመ” ካአማመራ ሃፋራ ካኮጻፋመረ ኡሱ
ካላሉን ላኮዮ። 24 እየሱን ጎአመን ዋ ቁሉክ የለ ኖ ካቶታሮን፡ ጎታካን የሱሳ
ጎይኮ ካኬሰሮይ ኡሱ ኦአማናኖ ኖዬነያ። 25 ኡሱ ጨቦካን ማራን ጎይን ሮረ
ካሰሳመሮና ኖና ቁሉኒዕ የልን ጎይኮ ኬ።

5 ጎርታ ኖ አማኖ ማንኮቁሎይን ማራን ጎታካን የሱሳ ክርሰቶሳ ቶንሴ ዋኔ ዎታ
ኖጎዳ አብና። 2 ኡሱ ቶንሴ ግዳ ታኮአልነኖ ህታ ሰኖ አማኖ ቶሰ ታብን ዳንዴነና፤
ካባጃ ታዋና አብድ የላታ ገቤላታና። 3 ሂካ ካላሊ እንሌኖን ግራን ራኮ አብሰ
ሄላሞሳኖ ማንኮካንሶ ማራን ራኮታን ኦሮ ግራና ዳዳታና። 4 ኡብሰኮና ጫፍቲ
አታታኖ፡ አታንኮና አብድ ሄላማታ። 5 ካሰሳመሮ እያና ቁሉክኮክ ጋራን ጌላንጀ

ታዋ ዋዳናታን ማንከአማጋንተ ማራን አብድቴሳ ላኮሙልሳቶ። **6** ጋና ላፋኒዕ ሌነ ግራን ክርስቶሳ ገሰኬሳ ካኮገያረ ጎራታ ጨባልየሉን ጎየራ። **7** ቁሉክ እባዶትኮት ባንኤ ካጎሮ ሄላኖ አሎ ካጢብሮያ፤ ኡሱማለና ካእዳንክ እባዶት ማራን ጎይን ካዶታራ ዋዳሳ ካሄላምሮ ሌራ። **8** እየሱን ጎእመን ኖ ጋና ጨባለይ ሌነ ግራን ክርስቶሳ ኖ ማራን ጎየራ፤ ህክና ዋ ኖን ታአቦ ጌላንጀቴሳ ቱሰራ። **9** ጎርታ ኖ ካኮቁሎይነና ካየሱሳ ክርስቶሳ ኢግ ጎሌ ዱዶና ኖ ኤንገ ታዋኮ ካኮሄሰናና ኡሱ ቶንሴያ! **10** ኖ ዋዉን ዲና ሌነ ግራን ኤረኬሳኮክ ጎይ ዋኔ ዎታ ዎጋርነና፤ ግዳ ዋኔታ ዎጋር ጎእባባነ ኤረኬሳክ ግር ቶንሴ ሱረ ፋይናና። **11** ሂካ ካላል ላኮኖ፤ ዋኔ ዎታ ዎጋርሰ ካኮሄላነኖ ጎታካን የሱሳ ክርስቶሳኮት ምናን ዋ ኖን ካፈለሮን ገጌላታና። **12** ሃንሱን ጨቦ እባዶት ኮኮት አላንቲ አላም ቶስ ታብ፤ ጨቦኮት አላንቲ ጎይ ኤመተ፤ ኡሱማለና እባዶ ዱባ ጨቦ ማንኮፈለሮ ማራን ጎይ እባዶ ዱባ ጉት ኤመተ። **13** ሴራ ካሙሴ ሰሳማኖኮ ሆረነ ጨቦ አላም ግረ፤ ሀሌዎ ኳሬ ሴራ ማንኮግኖት ጨቦ እሲ ጨቦ ኣን ላኮቶታማረ። **14** ሀሌዎ ኳሬ አዳመ ኣን ሴራ ካዋ ባስ ጨቦ እንፈሎን ኦግራን ጉት አደ ጎይ አዳመኮ ሀጋአበረ ታ ሙሴ ጌሮ እባዶ ዱባ ጉት ሬደ። ሂክ አዳመ ሆረንባን ካኤሜይናሮ ክርስቶሳን ማሱሳየ። **15** እየሱን ጎእመን ሰኖ ታዋኮክ እላቦ ጨቦ ካእባዶትኮክ ጀልባ ኣን ላኮየ፤ እባዶት ኮ ካፈለሮ ጨቦኮት አላንቲ ካሞጋን እባዶ ጎየ፤ ኡሱማሌ ሰኖ ታዋይና እባዶት ኮ የሱሳ ክርስቶሳኮት አላንቲ ካሄላመራ ካሰኖ እላቦ ካሞጋኑን አማጋመ ሮረ ሰሳመራ። **16** ኡሱማለና ዳናባክ እላቦ ካዋ ታኬነራ ሰኖኮት ላኦ፤ እባዶት ኮኮክ ጨቦ ታኬናሮ ላኦ ኣን ላኮየ። እባዶት ኮ ካፈለሮ ጨቦኮት አላንቲ ካሰሳመራ ፍርዳ ሙሮ ኬነ፤ ካሞጋን ጨቦኮክ አላንቲ ዳናባ ካሰሳመራ እላቦ ቁሉማ ኬነ። **17** እባዶት ኮ ካፈለሮ ጨቦኮት አላንቲ ጎይ እባዶ ዱባ ጉት ጎሬደ ታአማጋንተ ሰኖ ታዋና ዳናባክ እላቦ አታተረ ካቁሎየ ዱባ እባዶት ኮ የሱሳ ክርስቶሳኮክ ጋራነ ካእመን ዱባ አዋደ ኔፎነ ግራራ። **18** ጎርታ አዳመ ኮክ ጨቦ፤ ካሙሮ ፍርዳ እባዶ ዱባ ጉት ጎንኬነሮ፤ ኡሱማሌ ክርስቶሳ ኮ ኮኒዕ ቁሉኒዕ ፈሎ ካሞጋን እባዶ ሙሮኮ ባልቹማ ቤሰረን ግር ሰሳራን። **19** አዳመ እጃጃ ዲዳኖኮክ አላንቲ ካሞጋን እባዶ ጨባለሳ ጎንሌሮ ኡሱማለና ክርስቶሳ እጃጃማኖኮት አላንቲ ካሞጋን ቁሎዋራ። **20** ሴራ ካሙሴ ኤሜታኖኮ ካከይ ባስ ሞጋተ፤ እየሱን ጎእመን ጨቦ

ታኮጂናቱ፡ ሰኖ ታዋ ኖን ጂናተ። **21** ህክና ካኮንሌራ ጨቦኮት አላንቲ ጎይ ጎሳፊደሮ ማለ፡ የሱሳ ክርስቶሳኮክ ጋራን ጅሩ ጅሮማክ ግር ጎሳሄላምሮ ሰኖ ታዋ ቁሎይሳኖይ ፊድናታ። (aiōnios g166)

6 ጎርታ መ አምና? ሰኖ ታዋ ጎሳዋጋቶን ጨቦ ፈላ ግርኖ? **2** ላኮሃዮ! ኖ ጎነኔ ካለ ቤኔ ኦዋዩይነኖ ኣን ሌነ ግራን፡ ሞሲ ጨቦይ አታይ ግርናና? **3** ክርስቶሳነ ዋታ ኮ ጎሳሌኖን ኦጣማቃምነኖና፡ ጎይኬሳነ ዋታ ኮ ሊን ካጣማቃምነኖ ላኮካሳንያ? **4** ሃንሱን ክርስቶሳ ታኦዶ ካባጃ ጎይኮ ጎሳኬሮ ኖና ኡሱማሌ ካኡሱብክ ግር ጎሳግርኖንያ፤ ጎነኔ ኡሱነ ዋታ ቃማላምነና። **5** ጎይኬሳ ኡሱነ ዋታ ኮ ጎሌነ ክያኖኬሳና አድ ኦግራን ኡሱነ ዋታ ኮ ልናና። **6** ጨባለሳክ ማርካን ጎሳባርና ጨቦኮክ ድይል ላኖካን ጎሳሄሰሮን ታዶአን ያዳሊታን ክርስቶሳነ ዋታ ሱዋማኖ ካንሶዋ። **7** አላንቲና ካጎዩ አባዶ ጨቦኮ ባልቹማ ቤራ። **8** ኖ ክርስቶሳነ ዋታ ጎሳነ ኡሱነ ዋታ ካግርናኖ አማናታና። **9** ክርስቶሳ ጎይኮ ኬራ፤ ካላም ጎዋናዋት ጎይ ጎርታ ኡሱ ጉት ኦዶናት ዋታኖ ካንሶዋ። **10** ኡሱ ካኮጎዋረ ጎራታ፡ ጎይ ኮ ካላል ጨቦን ጎዩራ፤ አየሱን ጎአመን ኔፎን ጎግሮ ዋወን ግራራ። **11** ጎርታ እሰን ካጎተታን እን ጨቦኮ ፋክ ጎሳእንተታና ካየሱሳ ክርስቶሳ ጋራነ አደ ዋወን ኔፎን ጎሳግታን ሄዳ። **12** ሃንሱን ሀልቻ ካሜላን ፈልጉዴን ካጎዋሮ ማርክሰን ጉት ጨቦ ጎሳፊድሮን አሮየልቴን። **13** ማርክሰን ካሜላን ሁ የላይ ጨቦን አሮሰሴን፤ ሀሱኮና ጎይኮ ግር ቶስ ካናቀሮ አባዶ የላየንዴን እስኦትሰን ዋወን ሰሳ፤ ማርክሰና ቁሉክ ሁ የላዴን ዋወን ሰሳ። **14** ግዳ እሰን ካኮግታን ሰኖኮ ሄገሌ ኳራ ሴራኮ ሄገሌ ማንኮሌኖን ማራን ጨቦ እሰን እምንን ላኮዶትሳሮ። **15** ጎርታ መ አምና? ሴራ ካሙሴኮ ሄገሌ አንሌኖን ግራን ሰኖኮ ሄገሌ ማንኮግኖ ማራን ጨቦ ፈልኖ? ዱዶ ላኮዶትሳሮ። **16** አባዶት ኮወን ካሀንዳሮ ሊ አጃጃምን እስኦትሰን ጎሰሳታን ሀሱ ካኮአጃጃማታን አባዶትን ድይ ላኖክሰን ካሳንዋ፤ ኡሱማሌ ጨቦን ጎአጃጃንቴን ጎይ ካኬናሮ ጨቦን ድይል ላታን፤ ዋወን ጎአጃጃንቴን አድ ቁሉማ ሄላይናታን። **17** እሰን ጣይተን ካጨቦ ድይቴን፤ ግዳ አደ ካአታቴታን አጋልሰሲ ዋዳናኮ አጃጃማኖይ ዋወን ጋላታ ሀገዎ። **18** ጨቦኮ ባልቹማ ቤተደን ካቁሉማ ድይል ሌቴታን። **19** እን ሂካማሌ አባዶን ታታባቶ ሄኢ ካኮንአየሳራ ያዳክሶክ ላፋማኮ ካኬይያ። ጣዩ ካማሬ ምክታጆልክሰን ካባቲና ካሜላን ድይጆል የልቴዴን ጎሳኬንቴቴን ማለ

ኡሱማሌ ግዳ ካማሬ ምክታጆልክሰን ጎሳቁሎይሮ ቁሉክ ካህንዳሮ የላዴን ሰሳ። **20** ጨቦን ድይ ሌተን እሮግቴን ቁሉማኮ ሳሬ ግቴን። **21** ግዳ እሰን ካኮሙልተታን እየሰኮ ኤሰ አሪ መ ላኦ ሄላቴተን? ሀሱ እዩሰኮክ ዋረኤ ጎይያ።

22 ግዳ ጎአመን ጨቦኮ ባልቻ ቤተን ድይል ካዋ ሌቴታን፤ ሂካ ሀንዳኖይ ቁሉማ ሄላይናታን፤ ቁሉማኮት ጋቾ ጅሩ ጅሮማክ ግርያ። (aiōnios g166) **23** ካጨቦ ዳሞዛ ጎይያ፤ ካዋ አላቦ አደ ጎታካን የሱሳ ክርስቶሳ ካሄላማሮ ጅሩ ጅሮማክ ግርያ። (aiōnios g166)

7 አቢላልቴ! ሴራ ካካሶ አባዶን አዬሰናራ፤ ሴራ አባዶት ኮይ ጉት ኦዶናት ካኮአባ አባዶት ኔፎን ግራን ካላል ላኖ ላኮካሳንያ? **2** ታኬሳንቴታ ሄለልትቲ ቶ ኤንተርጎ ዋታ ሴራ ታሽያንተ ካኮላታ ኡሱ ኔፎን ግራን ካላልያ፤ ኤንተር ጎጎየ አደ ካኬሱኔ ሴራኮ ሳሪ ብያታ። **3** እየሱን ጎአመን ኤንተር ኔፎን ግራን ካካለ አባዶን ጎኬሳንተ ሻርሙጢተታ አማማታ ኤንተር ጎጎየ አደ ካካለ አባዶን ጎኬሳንተ ሀሱ ሴራኮ ታፋራንተ ላታ፤ ካካለ ባባሩን ጎኬሳንተ ሻርሙጣ ላኮአማማቶ። **4** ሃንሱን አቢላልቴ! እስና ኦክርስቶሳ ማንኮሌተን ማራን ጎየረ ካለካቤ እን ሴራኮ ፋክንቴታን፤ ሀክና ካካለቱን ጎይኮ ካኬሮ ኡሱ ሊዴን ዋውን ኢል ጎጎየላኖንያ።

5 ሀልቻ ካሶየት ታኮሰሰታኔ ሴራይ ካከኬሳረ ካሜላን ሀልቻ ታጎይ ኢል ጎጎየላኖ ማርካንኮክ ምክታል ኦሮ ፈላ ግረ። **6** ግዳ ጎአመን ጣየ ቅቂሰ ሸየ ካግሬን ጎነኔ ሴራኮ ባልቻ ቤነና። ሀክና ካኮንሌራ ካዶአንክ ካሌሮ ካጸፋመሮ ሴራ ካሙሴን አንሌኖን ግራን ካኡሱብክ ካአያና ራድ ጎሳህንዳይኖንያ። **7** ጎርታ መ አምና? ሴራ መተኬሳን ጨቦያ? ዱዶ ላኮጨቦየ! እየሱን ጎአመን ሴራ ቶንሴ ልዋተዋ፤ ጨቦ መዮ ላኮአዳሳረ፤ ሴራ “እሮሀልቺተ” አምዋተዋ፤ ሀልቻ መዮ ኦግራን እን ላኮማለበረ። **8** ጨቦ ሴራኮ ካኤመተሮ አጃጃ ህጣ ሄላተረ ሀልቻ ዱባ እዬ ኦሮ ጎጎከኬሮን የለ። ሴራ ጎዋታመ አደ ጨቦ ካጎየ አዬሰያ። **9** ሴራ አንግኖን እን ኔፎን ግረ፤ አጃጃ ጎኤመተኮ አባባተረ አደ ጨቦ አርዶክ ሌ፤ እን አደ ጎየ።

10 ግር ሰሰሮዋ አማመረ ካሰሳመረ ካሴራ አጃጃ እዬ ጉት ጎይ ኬነራ። **11** ጨቦ ካሴራ አጃጃ አላንቲ የላተረ እን ሶብራ፤ አጃጃኮክ ጋራንና እን ላጋደ። **12** ሃንሱን ሴራ መተኬሳን ቁሉያ፤ አጃጃና ቁሉክ ካሩሚና ካአዳንክያ። **13** ሀያ ሂክ ካአዳንክ ካሌረ እየሰ እን ጎይ ኬነራ አማኖያ? ዱዶ ላኮሃዮ፤ እየሱን ጎአመን ጨቦ ጨቦ ሊ ጎጎአዳሳምሮን ካአዳን ካሌሮ አዬሰኮክ ጋራን ጎይ ኬነ፤ ሀክና

ጨቦ አጃጃኮክ ጋራን አሎ ጨባለሳ ሌ። **14** ሴራ ካእያና ላኖ ካንሶዋ፤ እን ጎእመን ጨቦን ድይ እን ካዳዳመሮና ሶ ካሳርሳየሮ። **15** እን መተኬውን ካፈላሮ ላኮካሶ፤ እን ካድታማሮ እየሰ ፈላኖ ኢሰጉረ ካትራማሮ እየሰ ፈላራ። **16** እን ፈልን ካዶቶን ካፈላሮ ጎሌ ሴራ ካእዳንክ ላኖ አቶታራ። **17** ሃ ጎሌ ሂካ ካየላራ እን ኡሱን መተኬይ እንሌኖን ግራን እዬ ኦሮ ካግሮ ጨቦ። **18** እዬ ጎርቱን ጨባለሳ ታሌተቶ መጣ ኦሮ ኮና ካእዳንክ እየሰ ግራናዋት እን ካሶዋ፤ ካእዳን ካሌሮ ፈልን ሀልቻ አባ፤ እየሱን ጎእመን ፈልን ላኮዳንዳሮ። **19** እን ግዳ ፈላ ካግራ ፈልን ካዶትሳሮ ካእዳንክ እየሰ ላኮዋ፤ እየሱን ጎእመን እን ፈልን ካዶትሶን ካሜላን ፈላራ። **20** እን ፈልን ካዶትሶን እየሰ ካሜላን ካፈላሮ ጎሌ ሀሱ ካፈላራ እን መተኬይ እንሌኖን ግራን እዬ ኦሮ ካግሮ ጨቦ። **21** ሃንሱን እን ሂካ ሴራ ፈላ ካግሮ ላኖ አዳሳየራ፤ ህክና እን ካእዳን እየሰ ፈልን ዶታ ግራን ሜላን እዬ ኦሮ ግታ። **22** ኦሮኦተይ ሴራ ካዋይ ገጌላታራ። **23** እየሱን ጎእመን ማርኬይ ኦሮ ካፈላራ ካጨቦ ሴራ እን ካሽያመ የልሰሰ፤ ሳሙቴክ ሴራን ዋታ ጂረን ካሻፋታራ ካካለ ሴራ ማርኬይ ኦሮ ፈላ ግራን ድያራ። **24** እን ሞስክ ላፋክ እባዶትያ! ሂካ ጎይን ካሰሳመሮ ማርኬኮ እየያ እን ሃሰን ካዳንዳራ? **25** ጎታካን የሱሳ ክርሰቶሳኮት ሞናን ጋላታ ዋውን ሀጌዎ! ጎርታ እን ሳሙቴይ ሴራ ካዋውን ድይ ጎሌሮ ታሶየ ያዳሊቴይ ሴራ ካጨቦን ድይ ሌራ።

8 ሃንሱን የሱሳ ክርሰቶሳ ኦግራን ግዳ ቃንጎ ላኮአባን። **2** አላንቲና ግር ካሰሳሮ እያና ቁሉኮክ ሴራይ የሱሳ ክርሰቶሳ ጨቦኮና ካጎይ ሴራኮ ባልቹማ ቤሰራ። **3** ታእባዶ ጨባለሳት ያዳሊኮ ካከይ ሴራ ካሙሴ ፈልን ካዋተረ ዋ ፈለራ፤ ኤረኬሳ ጨባለሳ እባዶኮክ ማሱሳይ ጨቦኮት አላንቲ ፋረረ ሶኦቴሳ ጨቦ ፍርዴረ ባሰ። **4** ሂካና ካኮንየለራ ፈኢ ታሶየ እንሌኖን ግራን እያና ቁሉክ ኦስሴታኖ ኖዬን ሴራ ካሙሴኮክ አጃጃ ፈሎ ጎጎሀይሮ። **5** ሶ ካሳርሳተሮ እባዶ ኦሮ ታግቶ ፈኢ ታሜላን ማለ ኦግራን ዋዳናትሶ ሶኮክ ሀልቻ ጉት ካታራን፤ አደን እያና ቁሉክ ማለ ኦግራን ዋዳናትሶ እያና ቁሉክ ሀልቻ ጉት ካታራን። **6** ካሜላን ካሶየ ሀልቻ ቆፓኖ ጎይ ኬናራ፤ ካእያና እየሰ ቆፓኖ አደ ግርና ኖጎዳ ሰሳራ። **7** ጨቦ ታእምናማታ ሳሙ ዋኔ ዋታ ዲናታ፤ ሴራ ካዋቱና ላኮእምናቶ እምናሚና ላኮዳንዳቶ። **8** ካሜላን ሀልቻ ካሶየቲ ካእምናማራ ዋ ገጌላይሰን ላኮዳንዳሮ። **9** እሰን አዴን እያና ካዋ እሰን ኦሮ ካግሮ ጎሌ፤ ካሜላን ሀልቻ ካሶየቱን እንሌኖን

ግራን እያና ግታን። ማዮና ካክርሰቶሳ እያና ጎግኖን ኡሱ ካክርሰቶሳ ላኮዮ።

10 እየሱስ ጎእመን ክርሰቶሳ እሰን ኦሮ ጎግረ፤ ማርክስን ጨቦኮ ካከይ ካጎየ ጎሌና፤ እያናክስን እሰን ዋይ ቁሉክ ላኖኮ ካከይ አርዶክያ። **11** የሱሳ ጎይኮ ካኬሰራ እያናኬሳ እሰኒ ካግሮ ጎሌ፤ ክርሰቶሳ ጎይኮ ከኬሰረ እሰን ኦሮ ካግራ እያናኬሳ ካጎዋሮ ማርክስኑና ግር ሰሰናራ። **12** ሃንሱን አቢላልቴ! ኖ እንዛ አብና፤ ህት እንዛ ካሜላን ካሶየ ሀልቻኮት ፈኢ ማለ ግርን ላኮዮ። **13** ካሜላን ሀልቻ ካሶየኮት ፈኢ ካግታን ጎሌተን ጎይን ግታን፤ ኦሜላን ፈሎ ኦሶየ እያናይ ጎላጋዴን እድ ኔፎን ግርናታን። **14** እያና ካዋይ ኦሰሴታራን ዱባ ይሰ ካዋያን።

15 ሃንሱን፤ “አቦ! አቦካን” እም ካኮኡማኖ ካይሱማ እያና አታቲታን ኳሪ አብሲ ግርን እድን ካላም ካድይ እያና ላኮአታቲታን። **16** እያና ካዋ እያናካንን ዋታ ለረ ይሰ ካዋ ላኖካን ኖን አቶታራ። **17** ጎርታ ኖ ይሰ ካዋ ጎሌን እንዴ ኡሱ ኖን ካኬካሰሮ አታይናና፤ ክርሰቶሳን ዋታና አታይናና፤ ግዳ ክርሰቶሳን ዋታ ራኮ ኦአታታኖ ጎሌን አባባይን ካባጃቲሳኮ ኦአታታኖ ልናና። **18** ታግዳኔ ራኮ ሆረንባን ኖፎን ታሙትናቶ ካባጃን ዋታ ጎሄረግንሶ ማመንሰ ዋታና ቤላምሲን ካዳንዳሞን የለ ቶታራ። **19** መጣ ዱባ ይሰ ካዋኮት ሙታኖ ካኦቲ ሀልቻኖይ ኦራታታ። **20** መጣ ዱባ አዳት ጎጎሌቶን ፍርዳመራ፤ ህክና ፈኢቲሳ እንሌኖን ግራን፤ አብዱ ጎጎኦራኖን ካየለራ ፈኢ ታዋይያ። **21** አብድቴሳና መጣ እሲ ካባይ ድይናትኮ ባልቸማ ብደ ይሰ ካዋኔ ዋታ ባልቸማና ካባጃ ታሄዴዳማቶ ጎጎሌቶንያ። **22** ግዳ ጊን መጣ ዱባ ካኡሙላ ጎራታይ ካግሮ እቦሳ እን ሙዳማ ጉት ግራኖ ካንሶዋ። **23** እየሱስ ጎእመን ሙዳማ ጉት ታግታ መጣ ታላል ላኮቶ፤ ካሆራርጃ፤ እያና ቁሉክኮክ እላቦ ኦአታኔና ኖና ማርካንክ ዋዶ ካሌሮን ይሰ ካዋ ላኖኮት አብድ ኦራታ ካኦሮ ማርካን ሙዳም ጉት ግና። **24** ኖ ካፋይነና ህታ አብዱያ። እየሱስ ጎእመን ኖ አብድ ካየላታና ካሙታሮ እየሰ ጎሌ አብድ ላኮቶ፤ ካሙታሮና አብድ ካየላታራ እዮያ? **25** እየሱስ ጎእመን ጋና እንዴኖን ግራን አብድ ጎየላን እንዴ ኡብሲ ኦራታና። **26** ኡሱማለና ኖ ሞሲ ኤባይን ዶትሳሮ ማንኮካሶን ማራን እያና ቁሉክ ሀራኖካን ጋርጋራራ፤ ሃፋራይ ሙትን ካዳንዳሞን ሙዳማ ኖን ሆረሃየ ጋርጋራራ። **27** ዋዳና ታእባዶ ካቆቆራራ ዋ ካእያና ያዳ ካሶዋ፤ አላንቲና እያና ዋኮት ፈኢ ማለ ቁሉሌዉን ሆረሃየ ጋርጋራራ። **28** ዋ ኦጌላታራዉና ያዳኬሳክ ማለ ኦኡማመራኑን፤ እየሰ ዱባ ኢዳነን ካፈለመሮ

ላኖ ካንሰዋ። 29 ዋ ጣየ ኦክዴሰሮ ኤሪኬሳት ምዲ እን ጎሳሌራውን ጣየ ሙርቴስራ፤ ህክና እቢላል ታሞጋን ኦሮ ኡኑ ባርክ ጎሳሌሮንያ። 30 ኡሱ ጣየ ኦሙርቴስሮ ኡመራ፤ ኦክመሮና ዳቢሰራ፤ ኦዳቢሰሮና ካባጄራ። 31 ጎርታ ሂካ መእምና? ዋ ኖኔ ዋታ ጎግረ፤ እየያ ካኔባታራ? 32 ዋ ኮ ኤሪኬሳን ሀነኤይሳኖን፤ ኖ ዱባን ሮርስ ካስሰራ ምሲ ኤሪኬሳን ዋታ ካመን ዱባ ኖን እዱ ሰሳናዋታራ? 33 ዋ እእሳባተሮ ካሞታራ እየያ? ካቁሎይሳራ ዋያ። 34 ሀያ ካፍርዳራ እየያ? ካጎየራ፤ ኡሱማሌ ጎይኮ ካኬራ፤ መርጌ ታዋይ ካሀማጼራ ክርስቶሳ የሱሳ ኖ ማራን ሆረሃየ ጋርጋራ። 35 ታክርስቶሳ ጌላንጀኮ ኖ ትርን ካዳንደራ እየያ? ራኮታ ሙ እባሳ? ሆሮራማኖያ ሙ ኡኢያ? ሃወአይታ ሙ ዳኖታ? ሙ ጀሬንያ? 36 ሀክና፤ “ኩ ማራን፤ እሪ ዱባ ጎይን ዋታ ሞእባታና፤ ካኤናእምናሮ እዳድ፤ እን ቶታመ።” አማመ ጎጎጸፋመሮያ። 37 ጎርታ ኖ ካጌላተሮ ክርስቶሳ እእዋዳታራንኮ ኖ ሮራና። 38 እን ሂካ አዴሰራ፤ ጎይ ጎሌና፤ ግር ጎሌና፤ ኤርግቻ ጎሌና፤ ኦዳናት እእባን ጎሌና፤ ኤፎን ካግሮ ጎሌና፤ ካኤማታሮ ጎሌና፤ ሁናጀል ጎሌና፤ 39 ጦቂ ካእመ ጎሌና፤ ር ካእመ ጎሌና፤ ማምሰት መጣና ጎሌተ፤ ጎታካን የሱሳ ክርስቶሳ ታሄላነኖ ጌላንጀ ታዋኮ ኖ ትርን ካዳደራ እየሰ ኮና ግርዋት እን አዴሰራ።

9 እን ክርስቶሳ ለረ ሩም አዬሳራ፤ ጣራ ላኮአዬሰናሮ፤ እያና ቁሉክ ታስሴያታ ሳሙት እን ጣራ ካእዬሶን ላኖ አቶታታ። 2 ካንጂን ጋዳና ካእሶን ያዳ ዋዳናቴይ ግራ፤ 3 ሶይ ፋልኬ ኦሌራን ማራና ኡናቴውን አመረ እን ክርስቶሳኮ ካለ ብረ ቃንጎ ካዋ እን ጌዋ ጌላታረንዋ። 4 እሶና ጎሳ ካእሰራኤልያ፤ ዋ እሶ ይስኬሳ የላተራ፤ ካባጃቴሳ ቱስ፤ ካእማቶ ሃፋራ ታበ፤ ሴራና እሶን ሰሰ፤ ቁሉክ ምን ካዋኮክ ሴራ እሶን ቱስ፤ ካእብዲ ሃፋራ እሶን ሰሰ። 5 እሶና አላታንትሶይ ካጎሳ ኦዶላኮ ኦኤማተራንያን፤ ክርስቶሳና ሶ ሳርሳተ ካኤመተራ ሳኒታትሶኮያ፤ ኡሱ ዱባንኮ ካጉተያ፤ ጅሩ ጅሮማን ካሶማሳመ ዋ ሄዶያ! ሀሚኒዕ። (aiōn g165) 6 እየሱን ጎእመን ሃፋራ ካዋ ኢግልሳመራ አማኖ ላኮኖ፤ ታእሰራኤል ሳኒ ዱባ ካሩም እሰራኤል ላኮያን። 7 ኡሱማለና ታእብራመ ሳኒ ዱባ ይስ ካእብራመያ አማኖ ላኮኖ። ዋ አብራመነ፤ “ሳኒ ኩን ካኮብናታ ይሳቃያ” ማንኮእመ ማራንያ። 8 ሃንሱን ሶ ሳርሳተ ካእላተራ ዱባ ይስ ካዋ ላኮኖ፤ እየሱን ጎእመን ሳኒ ለረ ካቶታማራ ካእብዲ ሃፋራ ካኮንታበሮ ይስ ካላሉንያ። 9 ሂክ ዋ ካስሰራ ካእብዲ ሃፋራ፤ “ካኤማታሮ ጌሲ ሂካ ጎራታ እን ኤመይናራ፤ ሳራና ባባርትት

ኡሙልናታ” ካእማሮዮ። 10 ሂካ ካላል እንሌኖን ግራን፣ እርብቃ፣ ካጎሳ አቦካን ካሌሮ ይሳቃኑ ላኩ ይሰ ካኮቶተተ ጎራታ። 11 እሳባኖ ካዋ ፈሎይ እንሌኖን ግራን ኡምቲ ላኖ ቱሰን ይሰ ላማ ኡሙላማኖኮ ሆረነና ማላን ሌተቴ ኢዳነ ፈላኖኮ ሆረነ። 12 ዋ እርብቃኔ “ካንጂን ክጫሩን ካእጃጃምናሮ ሌራ” አመ። 13 ህክና “ያይቆባ ጌላየ፤ ኤሳዉ አደ ዲደ” አማመ ጎጎጸፋመሮያ። 14 ጎርታ መ አምና? ዋ ኡሉልሳራ እምን ዳንዳና? ዋ ኢጂ ላኮኡሉልሳሮ። 15 ዋ ሙሴነ “እን ሻጋ የልን ካኮዶታሮን ሻጋ የልናራ፤ እን ነኔኤይሳይን ካዶታሮን ነኔኤይሳይናራ” አመራ። 16 ሃንሱን እሳባኖ ካዋ ካኮሄላማራ ፈኢ ታእባዶይና ፈሎ ኦእባዶይ እንሌኖን ግራን ሻጋ ካዋይያ። 17 ህታ አላንቲ ቁሉክ ማጻፋ ካግብጽ ዋኖኮክ ጋራ “ኩዬ ሁናኬ ቱሲና መገክና አላም ዱባ ጉት ጎጎእዴሳምሮ የልን ኩ ሬድሰራ” ካእማራ ሃፋራ ጸፋመራ። 18 ሃንሱን ዋ ሻጋ የልን ካዶተን ሻጋ የላራ፤ ሀሎ አባይን ካዶቴና አደ ካሀሎ የላራ። 19 ሃንሱን፣ “ፈኢ ታዋ ኔባዪን ማዮና ላኮዳንዳሮ፤ ሀያ ዋ አባዶ አማላን ፈሎኦትሶዉን ሙን እሶ ዋቃሳራ?” አም እን ካሆሳቶ ለታ። 20 አት አባዶት! ዋኔ ዋታ ዶጋምን መ ፈኢ አብታ? ኤሬኮ ካፈላመራ ሁ ካፈሎሮን፣ “መዉን ሃ የልተ እን ፈልተታ?” አምን ዳንዳራ? 21 ኤሬኮ ሁ ካፈላራ ምዲ ቶት ካኤሬ ጫዉዶኮ ሁ ኮ ካባጃን፣ ካካለ ላፋኒዕ ፈሎን የል ፈልን ኦዶናት ላኮአቦያ? 22 ዋ ኤንገቴሳ ቱሲና፣ ሁናና አዴሰሳይን ዶተረ ባይን ኦኤካተራዉን ታንጂን ካኡብሴሮ ላኖ መ ካሳ? 23 ሂካና ካኮንየለራ ጣየ ካባጃን ኦኤካሰሮ፣ ሻጋ ኦኮንየልናሮ ካባጃኮክ ጂናን ቱሰንያ። 24 ኖ ካሻጋ ሁ አይሁድ ካላልኮ እንሌኖን ግራን አይዛብኮና ኖ አመራ። 25 ህክና ካሄገሮት ሆሴ፣ “ጎሳኬ ካሌኖን፣ ‘ጎሳኬ!’ አም ኡምናራ፤ ካዶታምን ግሮ ጎሳና፣ ‘ካዶታማሮ!’ አም ኡምናራ፤ 26 እሶ፣ ‘ጎሳኬ ላኮታን’ ታኮአማማን ባንኤ ‘አርዶክ ይሰ ካዋ’ አማም ኡምምናራን” አማመራ። 27 እስያሳና ጋራ ካእሰራኤል አዬሳ፣ “ይሰ ካእሰራኤልኮኒዕ ቶቶ ታላቡ ግርዴ ጨካለ እን ጎምጋተና እሶኮ ኦፋይናራን ኡጫርያን። 28 ጎታ አአዳላኖኒ ሳም አላም ጉት ፍርድናራ” አማ ያየ ጦቂሰ አዬሰራ። 29 አደና እስያሳ፣ “ካዱባ ሞት ጎታ ኖን ሳኒ ሃሰ ዋተዋ ታሶዶምና ታጎሞራ ካታማል ጎጎባየራን ኖና ባይ ግራነ” አማ ጣየ አዬሰራ። 30 ጎርታ መ አምናና? ቁሉማ ሄላይን ካዶታኖን አይዛብ ቁሉማ ሄላተ፤ ህት ቁሉማና አማኖኮ ታሄላማቶታ። 31 አየሱን ጎአመን ሴራኮ ታሄላማቶ ቁሉማ ሄላይን

ኦዳፋረራን እስራኤልጆል ሴራ ካሙሴ ኦራይን ዳንዳና ማንኮዋተን ማራን ቁሉማ ቶስ ላኮጌራን። **32** “መወን እሶ ቁሉማ ቶስ ግያናዋቱን?” ጎአማመ እሶ ቁሉማ ሄላይን ካዶታተራን አማኖይ እንሌኖን ግራን ፈሎይ ማንኮሌ ማራንየ፤ ሃንሱን ካሀንዱዱፍሮ ኤኤሞይ ሀንዱዱፋተን፤ **33** ሀክና፤ “ጎርታ፤ እባዶ ካሀንዱዱፍሳሮ ኤኤሞ ጽዮኒ እን ካይናራ፤ ሂክ ኤኤሞና እባዶ ሀንዱዱፍሰ ካሉጉዳሮ ኤኤሞያ፤ ኡሱ ካአማናራ አደ ላኮሙልሮ” አማመ ጎጎጻፋመሮያ።

10 አቢላልቲ! ዋዳናቲይ ካግራ ካንጂንክ ሀልቻና ዋ ቶስ እን ካኤባታራ እስራኤልጆል ጎጎፋይራኩንያ። **2** ልክኪ ማላባኖኮ ላናዋት ኳሬ እሶ ዋወን ታእባን ካኢዳነ ያዳ እሶን ግራኖ እን መተኬይ አቶታራ፤ **3** ዋ እባዶ ካኮቁሎይሳሮ ራ እሶ ማላባናዋቲ ቁሉማትሶክ ራ ሰሴተን ኳሬ ቁሉማ ታዋይ ላኮሰሴተን። **4** እባዶ ዱባ አማኖ ጎጎቁሎይሮ ሴራ ካሙሴ ክርሰቶሳ ጉዳተራ። **5** ሴራ ካሙሴ ኦራታኖይ ታሄላማቶ ቁሉማ ሙሴ ካጻፈራ፤ “ሴራ ካኦራታራ ዱባ ኔፎን ግራራ” ካአማሮያ። **6** ዋ እባዶ አማኖ ቁሎይሳኖኮክ ጋራ፤ ሃ አማመ ጻፋመራ፤ “ዋዳናታይ ዳሩር ቶስ እዮያ ካብናራ?” እሮእንተ፤ ሀክና ክርሰቶሳ ዳግሰንያ፤ **7** “ጎርቱን ዋዳናታይ ‘ቦዋ ቶስ እዮያ ካዳግናራ?’” እሮእንተ፤ ሀክና ክርሰቶሳ ጎይኮ ኬሰንያ። **(Abyssos g12)** **8** አደና፤ “ሃፋራ ካዋ ኩ ዶሌ ግራ፤ ሱረዋ ሀኢታይና ዋዳናታይ ግራ፤” ሂክ ሃፋራና ኖ ካላላባኖ ካአማኖ ሃፋራያ፤ አማመ ጻፋመራ። **9** “የሱሳ ጎታ ላኖ” ሀኢታይ ጎአቶተተ ዋ ጎይኮ ኬሳኖና ዋዳናታይ ጎአማንተ ፋይቶዋ። **10** እባዶ ዋዳናቲሳይ ጎአማኖ ቁሎዋራ፤ ሀኢቲሳይ ጎአቶቲሮ ፋያራ። **11** ቁሉክ ማጻፋ ጎጎአማሮ፤ “ኡሱ ካአማናራ ዱባ ላኮሙላሮ።” **12** ጎርታ ኮ ጎታ ካዱባ ጎታ ማንኮሌይ እይሁድና እይዛብ ኦሮ አሳብንጂ ቶና ላኮግቶ፤ ኡሱና ኡሱ ኦአማናራውን ዱባን ኡሶኬሳ ጂናሰ ሰሳራ። **13** “ካጎታ መገ ካኡማታራ ዱባ ፋያራ” አማመ ጻፋመራ። **14** እየሱን ጎአመን ሀአማኖን ግራን ሞሲ ኡማሞን ዳንዳራን? ጋራኬሳ እንማሎን ሞሲ አማናራን? ካላላባራ እንግኖን ሞሲ ማልን ዳንዳራን? **15** ካአጋልሰሰራ ጎፋራሞን ሞሲ ሃፋራ አጋልሰሰን ዳንዳራን? ሂክ “ዋንጋላ ካገጌሎ ኦኬናራንኮት ኤመቶ ሞሲ ኢዳታ!” አማመ ጎጎጻፋመሮያ። **16** እየሱን ጎአመን እሰያሳ፤ “ጎታ! ኖ ካእዬንሰኖ ሃፋራ እዮያ ካአታተ?” አመ ጎጎአዬሰሮ፤ ዱባና ካገጌሎ ሃፋራ ላኮአታቲራን። **17** ጎርታ አማኖ ካኮሄላማራ ካገጌሎ ሃፋራ ማላኖኮ ካኬይያ፤ ካገጌሎ ሃፋራና

ካኮሃላማራ ጋራ ካክርሰቶሳ ካእዬሳሮ ሃፋራ ካዋኮያ። **18** አላ ኩ ሆሳሮ፤ ሀያ ሃፋራ ላኮማላራን አማኖያ? ቁሉክ ማጻፋ፡ “ያየትሶ አላም ዱባ ማልሳንተ፤ ሃፋራክሶና ኡልኮት ጋሾ ጌ፤” ኦግራን ማሌራን አማመ ጎጎጻፋመሮያ። **19** አደና ሆሳታራ፡ እስራኤልጆል አንሻዶን ግራን አማኖያ? ጣየ ሙሴ ሃ አመራ፡ “ጎሳኬ ካሌኖን ጎሳኬ የልረ ጮልሰናራ፡ ካሻዶን ጎሳ ጎሳሻድሮን የልረ አማራይሰናራ” አመራ። **20** አሰያሳና፡ “እን ኦዶታኖቱን ሙተ፤ እሆሳኖቱን እስኦቴ ቱሳየ” አመ ጃቡይ አዬሰራ። **21** እስራኤልጆል ማራን ጎአመን “ካአጃጃሞና ካሜላን ጎሳ እን ቶስ ጎሳኤማሮን አሪ ዱባ ገነኖኦቴ ፋየ” አማራ።

11 ጎርታ ዋ ጎሳኬሳ ኢሰራ? አጂ ላኮኢሰሮ! አን መተኬውን ካእስራኤልያ፤ ታኡብራመ ሳኒ ካሌራ አን ታቢንያመ አኒኮያ። **2** ዋ ጣየ ካማላበሮ ጎሳ ላኮሻፈሮ። ኤላሳ እስራኤል ጉት ሞቶ ዋ ቶስ ሞሲ ጌግሰሮ፤ ማጻፋ ጋራኬሳ መ አማሮ ላኮካሳንያ? **3** ሀሱ ጎራታ፡ ኤላሳ፡ “ጎታ! ካሄገሮልካ ላጋዴራን፤ ባንኤ ታጃርሶና ዲጌን፤ እን ካላል ሄሰ፤ እና ላጋዲን ዶታራን” አመረ። **4** አየሱን ጎአመን ዋ ካሰሰረ አባብ መየ? “ባአል ካአማማሮ ቶልቻን ካሳጋዶን ኩማ ቶዶባ አባዶ ኡሱን ሃሳየራ” አመራ። **5** ጌሰ ካአርካኔቲ ሂካማሌ ሰኖ ታዋይ አሳባሜረን ኦሄሴራን ኡጫር እስራኤልጃ ግራንዋ። **6** ጎርታ አሳባማኖ ሰኖ ታዋይ ጎሌ፡ ፈሎይ ላኮየ፤ ፈሎይ ሊ ግረዋ ሰኖ ታዋ ላኦ ካላይት ሊ ግራተ። **7** ጎርታ ላኦ መታ? እስራኤልጆል ካዶታቲራን ላኮሃላቲራን፤ ኦአሳባሜረን አደን ካዶታተሬን ሄላቲንዋ፤ ኦሄሴራውና ዋዳናትሶ ዱድሰ። **8** ሀክና “ዋ ዋዳናትሶ ዱድሰ፤ ሃንሱን ህታር ታ ጌሮን እልኦ ኦትሶ ላኮድያራን ነበቦኦትሶ ላኮማላራን አማመ ጎጎጻፋመሮያ።” **9** ዳወተና፡ “ዱጉድትሶ ካአባሮ ዋጣማደ፤ ካሉጉዳሮ ጉምቢ ሊ ሀአቦሰሰ! እሶ ታፈለራን ሜላን እሶ ጉት ሀሃይቶ! **10** እልኦ ኦትሶ ጎሳዴኖንኮ ሙጉድ ሀሌዎ፤ ሞኦትሶ አርጌቶ ራኮይ ዙኡሮ ሀቤሴን” አመ። **11** አላ፡ ካላም ሆሳሮ፤ አይሁድኮክ ኢያኖ ካላም ታኮኬኖኒያ? ላኮየ! ባሰ ካአይሁድኮት ኣላንቲ አይዛብ ፋይና ሄላተ፤ ሂክ ካኮሌራ አይሁድ አይዛቢ ጉት ጎሳጋቢሮን የልንያ። **12** ካአይሁድ ባሰ አላምን ካሞጋን ኡሶ ሄላምሰሰራ፤ ኢያኖክሶና አይዛብውን ኡሶ ሌራ፤ አይሁድ ፋይ ግረዋ ኡሶ ሞሰ ሞሲ ጂናይ ግርናረ። **13** ግዳ እን እሰን አይዛብን አዬሳራ፤ አይዛብን ካፋራመ ላኖኬ ማለ ሀንዳኖኬ ካባጃታራ። **14** ሀክና ኡናት ጎሳህልቶን ከኬሰጉረ እሶኮ ኮኮ ፋይሰን አብድ የላታያ። **15** ዋ

አይሁድ ካኮሻፈረ ጎራታ ካካለ ካአላም ጎሳ ኡሱነ ዎታ ጎዎጋሮ እሶ ካኮቆጸታሮ
 ጎራታ ምስ ካልናሮ እነ ላራ? ሂክ ጎይኮ ካከያሮ እነያ! **16** ካም ካአባመራ ምናቶ
 ታቁሎይተ ጎሌተ ካም ዱባ ካቁሎየ ላራ፤ ኡሱማለና ጋኮክ ህዲድ ቁሉክ ጎሌ
 ባላል ዱባ ካቁሎየ ላራ። **17** ምራር ካግሮ ካኤጀርሳ ጋዉን ባላል ካሌራ
 አይሁድጃል ጎሳም ጎእዬን እሰን አዴን ካጋዶ ኤጀርሳኮክ ባላል ኦሌቴታን
 አይዛብ ባንኤትሶይ ሀማጽዴን ኡራዎ ኦትሶና ኡሶክሶ ካሄዴዳማታን ጎሌተን፤
18 ሀሱ ህዲድ ጉት አሮኮርተን፤ ጎኮርተን አድ ሂካ አዴሳ፤ ህዲድ እሰን ሰዳራ
 ኳሬ እሰን ህዲድ ላኮሰዳታን። **19** እየሱን ጎእመን “ባላል ኤኤበ ታኮእዬሮ
 ባንኤትሶይ እን ጎጎካሚሮያ” ካእነታን ሌታን። **20** ጋራያ፤ እሶ ካኮንበራን
 አማናናዋትኮ ካከይ ጎሌሮ እሰን አታቴን ካኮአልቴታን አማንቴደንያ፤ አብሳዬን
 ኳሬ ኮራማሳ አሮሌተን። **21** ዋ መጣ ባላል ኦሌራን አይሁድን ጎነኤይሳኖን
 እሰኹን ላኮነኤይሳኖ። **22** ጎርታ ታዋ ኢዳነና ቦግ አታንኬሳ ዲያ፤ ቦግ አታንኬሳ
 እእዬራን ጉት ጎሌሮ ኢዳነ ካኮቱሳራ አደ እሰኹንያ፤ ህክና ካልናራ ኡሱ አማናናይ
 አታይ ጎግሮቴንያ፤ ጎእታኖን አደ ጎሳምዴን አናታን። **23** አይሁድ አማናታናዋት
 ታትሶ ጎኢሴን ታጣዋ ባንኤትሶ አባባይናራን፤ ዋ እሶ አባብ ታብሰን ዳንዳራ።
24 እሰን አይዛብ አደን መጣይ ካጋዶ ኤጀርሳኮክ ባላል ሌተን ግራን ባንኤ
 ካላይ ካምራረ ካኤጀርሳ ጋ ጉት አባራንቴታን። ሃ ጎሌ ሂኒዕ መጣይ ኤጀርሳ
 ካምራረኮክ ባላል ኦሌራን አይሁድ ታባር ባንኤትሶ ቶስ አባባይ አባራምን ምሲ
 ዳንዳናዋታራን! **25** አቢላልቴ! “ኖ ኦካንሶና” አምዴን አሮኮርተን፤ እን ታሰግናሮ
 ሆል ቶ ግታ፤ ህክና እስራኤልጃልኮክ ዲዳኖ ኤርናን አሌኖን ግራን አይዛብ
 ዱባ ራቶ ዋ ቶስ ታ ኤማራኮንያ። **26** ጎርታ ሃያ፤ እስራኤልጃል ዱባ ፋይናራ።
 ሃንሱን “ካፋይሳራ ጽዮንኮ ኤመይናራ፤ ታያይቆባ ሳኒ ዱባኮ ማላነ ባሰናራ፤ **27**
 ጨቦክሶና ካኮባሰ ጎራታ እሶነ ዎታ እን ኦታብናራ አማቶ ኦኡሱብኮክ ሃፋራ
 ሂካያ” አማመ ጎጎጸፋመሮያ። **28** እስራኤልጃል ካዎንጋላ ሃፋራ አታታናዋቲ
 ላኦትሰን ታአይዛብ ማራን ዋኮክ ዲና ሌራን፤ እየሱን ጎእመን አሳባማኖኮክ
 ጋራን እን ታኦላልኮት ኣላንቲ ዋ ኦኤላታራንያን። **29** ዋ አሳብ ሰኖቴሳ ካኮሰሰ
 ጎራታ ኦፈለሮ ፈሎኦቴሳ ያዳኬሳ ላኮኢግልሳሮ። **30** እሰን አይዛብ ጣይቴን
 ዋዉን ኦኢጃጃምንቴን፤ ግዳ አደን አይሁድ ኦጃጃምዋትኮት ኣላንቲ እሰን ሻጋ
 ካዋ ሄላቴታን። **31** እሰን ሻጋ ጎጎሄላተታንክ ማለ እሶና ሻጋ ጎጎሄላራኮን እሶ ግዳ

ዋውን ኦላጃጃሞን ሌራን። **32** ዋ ሻጋኬሳ እባዶ ዱባን ቱሰን አመረ እባዶ ዱባ ዱዳዳይ ካሽያመሮ ጎሳሌሮን የለ። (eleēsē g1653) **33** ዋኮት ዱሩማ፥ ቃሩማና ማላባና ምሲ ኬልዶያ! ፍርዳኬሳ ካቆቆራሞንያ፤ ራኬሳና ካአዳሳሞንያ። **34** “ታጎታ ቆፋ ታዎዳና ካካሳ እዮያ? ኡሱን ጎርሳ ካሰሳራ እዮያ?” **35** “ዋ አባብ ጎሳሰሰሮን ዋውን ካአምአይሳራና ካአምአይሰሮ ካአታታራና እዮያ?” **36** እየሰ ዱባ ካኮሄላመራ ኡሱኮያ፤ ኡሱና ኡሱንያ፤ ጅሩ ጅሮማን ካባጃ ኡሱን ሀሌቶ! ሀማኒዕ። (aiōn g165)

12 ጎርታ አቢላልቴ! ማርክሰን ቁሉክና ዋ ካገጌላይሰሮ አርዶክ ጃርሶ የላይዴን ጎሳሰሳኩን ነኔኤይሳታኖ ካዋይ እን እሰን ኤባታራ፤ ህክና ዋውን እሰን ካሰሳታን ቱኩልክ ሄዶይሳታኖክሰንያ። **2** ካኢዳና ካገጌላይሰሮ ዱዶት ታሌተቶ ፈኢ ታዋ መቶ ጎሳማላብታኩን ሳሙትሰኒ ኡሱባታኖ ኢግልሳማ ኳሬ ሂካ አላምኮት ሜላን እን አርሌተን። (aiōn g165) **3** እደና ዋ እሰኩን መተመቴ ካሰሰሮ አማኖ ማለ ኢዳነ ሻዳ ኳሬ ካዶትሳርኮ ሮር እሰኩትሰኩን ኮራይ አርዳተን አመረ ኢን ታሰሳንተቶ ሰኖይ ሰጋራ። **4** ማርካን ካሞጋን ምክታጆል ግራ፤ መተመቴና ማርኮክ ምክታ ካለካለኒዕ ፈሎ አባ። **5** ኡሱማሌ ኖ ኡሞጋን ሌን ግራን ክርሰቶሳ ምክታ ኮና፤ ማር ኮ ኮኒዕ ምክታጆል ጎሳሌንኖ ማለ እሰ እሰኦሮ ቁራናምንና። **6** ሃንሱን ዋ ሰኖቴሳ ኖን ካሰሰሮ ካለካለክ እላቦ ፈሎይ ሀይንሶ፤ እላቦልካን ሄገሮ ኦዋ ሰጋኖ ጎሌ አማኖካንክ ጅልባ ሄገሮ ኦዋ ሰግና። **7** እላቦካን ካካለቱን ሀንዳኖ ጎሌ አታይ ሀንዳይና፤ እላቦልካን አጋልሰሳኖ ጎሌ ጎሳዶትሳሮ አጋልሰንሳ፤ **8** እላቦልካን ጎርሳኖ ጎሌ ጎርሳ ሰንሳ፤ እላቦልካን ሰሳኖ ጎሌ ዋዳናኮ ታሌተ ኢዳነ ሰንሳ፤ እላቦልካን ኦዶናቲ ባሪሳኖ ጎሌ አታይ ኦዶናቲ ባሪንሳ፤ እላቦልካን ነኔኤይሳታኖ ጎሌ ሂካዋ ገጌሎይ ፈልና። **9** እሰሳድሳታኖ ካላይት ታሩም ጌላንጀ እሰኩን ሀግርተ፤ እየሰ ካሜላን ዱዳ፤ እየሰ ካአዳን ጌላየን። **10** እሰ እሰሰኦሮ አቢላልኮት ጌላንጀ ጌላየን፤ እሰእሰኦሮ እሰእሰ ካባጅን ዶታዬን፤ **11** አሀሮን ዋዳናኮ ካሌ አያናክሰንክ ከከያኖይ ጎታውን ሀንዳ። **12** አብዱ ገጌላየን፤ ካራኮ ጎራታ ኡብሳ፤ አርጌቶ ኤባየን። **13** ዋይ ኦአማናራኩን ራኮትሶይ ካአብታንኮ ሰሳ ጋርጋራ፤ ማርትናይ ኦኤሜተራን ቆጶጶ። **14** እሰን ኦሆሮራራን ሶማሳየን፤ ኳሬ አርቃንግቴን። **15** ኦገጌላታራን ዋታ ገጌላየን፤ ካኦታሮን ዋታና ኦዬን። **16** እሰእሰኦሮ ያዳ ኮይ እሰኦታ ግራ፤

እስከትስን ጠቂሳታኖና ኮራኖ ኢሳጋዴን እስካየራሳታሮ እባዶነ ዋታ ራቶ ግራ፤
 እስከትስኒ ኖ እካንሶና እምዴን እሮኮርተን። 17 እባዶ ዱባ ሆረ ካእዳን ካሌሮ
 እየሰ ፈላ ኳሬ፥ እባዶ እየሰ ካሜላን እስን ጉት ጎጌግሰ፥ እስና አባብዴን እየሰ
 ካሜላን እሮጌግሰን። 18 እስኩን ጎዳንዳመ እባዶ ዱባነ ዋታ ኖጎዳ ግርን
 ምናትስን ካዶትሳሮ ዱባ ፈላ። 19 አቢላልቴ! ሀሎ ዋዉን ኢሳ ኳሬ እሲ ሀሎ
 እሮቤተን፤ “ሀሎ ካበያራና ሀሎኮት አማኣ ካሙርናራ እንያ አማራ ዋ ጎታ”
 አማመ ጸፋመራ። 20 ሃንሱን ሀሎ ብያኖኮ ሱረ ዲናካ ጎኡኤ እምስ ጎሱጉባተና
 ጣምስ፤ ሂካ ጎፈልተ ሙል ህኢ ጎጎአባሮ የላታ። 21 ሃንሱን እየሰ ካሜላን
 ኢዳነ አዋድን ኳሬ እየሰ ካሜላን እሮአዋዳንተ።

13 ማምስክ ኦዶናት ካኮሄላማራ ፈኢ ታዋኮ ማንኮሌ ማራን ግዳ ኦግራን
 ኦዶናት ኦአባን ካኮሹማማራን ዋይ ማንኮሌ ማራን፥ እባዶ ዱባ ኦዶናት ካአባን
 እጃጃማና ዶትሳራ። 2 ሃንሱን ኦዶናት ኦአባን ካኔባታራ ዱባ እጃጃ ካዋ
 ኔባታራ፤ ካእጃጃምን ዱባ እስኩቴሳ ጉት ካሙሮ ፍርዳ ኬናታራ። 3 ሞትጀል
 አብሰሲን ካኮዳንዳራን ፈሎ እሜላነ ኦፈላራን ኳሬ ኢዳነ ኦፈላራን ላኮዮ፤
 ኦዶናት ኦአባን አብሳታናዋት ዶታታ? ጎርታኑን እየሰ ካእዳን ፈል፤ ፈሎ ኦኢዳንኮ
 ጋላታ ሄላቶዋ። 4 ኦዶናት ካአባ ኩን ታኢዳን ጎጎፈሎን ካሹማመራ ዋዉን
 ካሀንዳሮያ፤ ኦዶናት ካአባ ሺፋ ካኮንሞዋተራ አዳ. ማንኮሌኖን ማራን አት
 ካሜላን ካፈላቶ ጎሌተ ኦዶናት ካአባ አብሳ፤ ኡሱ ሜላነ ኦፈላራን ሙርሳኖና
 ሀሎ ታዋ ቱሳ ዋዉን ሀንዳራ። 5 ሃንሱን ምን ካዋኖይ ኦዶናት ኦአባዉን
 እጃጃማና ዶትሳራ፤ ካኮንእጃጃማታና ሙሮ ኦዋ አብሳታኖ ካላል እንሌኖን
 ግራን፥ ሳሙትስን ማንኮዋቃሳቶ ማራን ላኖ ዶትሳራ። 6 ገራ ካኮሙራታና
 ሃንሱንያ፤ ኦዶናት ኦአባን ሂናኣ ፈሎ ፈላ ኦግራና ዋዉን ሀንዳይንያ። 7 ጎርታ
 ኦዶናት ኦአባዉን ፈልን ካዶትሳሮ ዱባ ፈላ፤ ገራ ካኮዶትሳሮን ገራ ሙራ፤
 ቃራጣ ካኮንዶትሳሮን ቃራጣ ሙራ፤ አብሳይን ካዶትሳሮ አብሳታኖ፥ ካባጃ
 ካኮዶትሳሮና ካባጃ ሰሳ። 8 ታማዮ እንዛና እስኩን እሮግኖ፤ ግርን ታዶትሳታ
 እንዛ እስከሲ ጌላታኖ ካላል ሀሌዎ፤ እባዶ ካጌላታራ ሴራ ኦራታራ። 9 “እሮ
 ሻርሙጢተ፥ እሮላጋደ፥ እሮሄቴ፥ እባዶ ካካለክ ካሌሮ ኮኮ እሮሀልቸተ”
 ካአማራ እጃጃልና ካካለና እጃጃል ዱባ “እባዶ እስኩታ ኣን የላ ጌላ” ካአማሮ
 እጃጃ ኮይ ኦሮ ግራ። 10 እባዶ ካጌላታራ ዱባ ካጌላታሮ እባዶ ጉት እየሰ

ካማላና ላኮፈላሮ፤ ሃንሱን እባዶ ካጌላታራ ሴራ ዱባ ኦራታራ አማኖ። **11**
 ጎርታ ሁዱሮኮ ካኮናባዳን ጎራታ ግዳ ግያኖ አዳሳ፤ ሆረ ካኮአማነኖ ጎራታኮ
 ሱረ ግዳ ኖ ካኮፋይና ጎራታ ኣሎ ኖ ቶስ ጋባላመራ። **12** ሄመን ሮራ ግታ፤
 እርና ጋባላንተታ፤ ሃንሱን ሙጉዲ ኦፈላማራን ፈሎ ኢንሳ፤ ካኢፋ ሁ ካጀረን
 ሳርሳና። **13** አሪ ጎሳሰሴታኖ ማራጌ ግርና፤ ዱዱሮይና ሰቲና፤ ሻርሙጣኖ፤
 ራራጋታኖይ፤ ዶጋማኖይና፤ ጋባኖይ አሮሌኖ። **14** እየሱስ ጎሳመን ጎታ የሱሳ ግራ
 ኳሬ ሶኦትሰንኮክ ሀልቻ ብን አሮሄዳን።

14 እስኪ ኦሮ አማኖ ላፋክ ካሌሮ እባዶ ካዶጋምሰሮ ያዳኬሳ ጉት ሀቱፋኖና
 ሀፍርድኖን አታዬን። **2** ማሱሳን እባዶት ኮ አማኖ ካእመን ዱባ አምን
 ካዳንደይሰሮ አማኖ ግሮዋ፤ አማኖ ካእታኖን ግራ ካካለ እባዶ ጎሳመን እካክልተ
 ካላል አማራ። **3** ሃንሱን ማመና ካእማራ እባዶ ካእሞን አሮቱፋኖ፤ ካእሞና
 ካእማሮ እባዶ ጉት አሮፍርድኖ፤ ዋ አማኖኬሳ አታተራ። **4** ሀያ፤ ካካለ ካሀንዳሮ
 ጉት ካፍርዳታ አት እየታ? ኡሱ ጎሳሌና ጎርቱን ጎሳየና ታጎታ ሃጀታ። ሱረዋ ዋ
 እሊሰን ማንኮዳንዳሮ ማራን አታተ ኣላራ። **5** ኡሱማለና አሪ ቶ ታካለ አርኮ
 ኣሎ ታካባጀንተታ አመ ካሄዳራ ግሮዋ፤ ካካለ አደ አሪ ዱባ አማለኮት ካባጃ
 አብታ ኳሬ አሪል ኦሮኮ ካሌና ላኮግቶ አመ ሄዳራ። ጎርታ ሂካ ኣንክክ እየሰ
 መተመቲ እባዶ ዋዳናቴሳ ካእማኔሮ ሀፈሎ። **6** አሪ ቶ ታካለኮ ካለ የለ ካሄዳራ
 እባዶት፤ ሃ ካኮንየላራ ጎታውን አመረያ፤ ሶ ካእማራና ጎታውን አመረ አማራ
 ዋወና ጋላታ ሰሳራ፤ ካእሞና ጎታውን አማ ላኮአማሮ ዋወን ጋላታ ሰሳራ። **7**
 ኖኮ ማኖና እስኦቴሳን ካግራራ፤ እስኦቴሳና ካጎዋራ ማኖና ላኮግሮ። **8** ጎግርነና
 ጎታውን ግርናና፤ ጎሳነና ጎታውን ጎዋና፤ ሃንሱን ጎግርነና ጎሳነና ኦጎታና። **9** ሃንሱን
 ክርስቶሳ ጎየረ ጎይኮ ካኮኬራ ኔፎን ኦግራውና ኦጎየራኑን ጎታ ሊንያ። **10** ሀያ፤
 አት አቢካይ ጉት ሙን ፍርዳታ? ጎርቱን አቢካ ሙን ቱፋታ? ኖ ዱባና ካፍርዳ
 እርጃታ ካዋ ሆረ አልናና። **11** ኣላንቲና፤ “እን እርዶክያ፤ አማራ ዋ፤ እባዶ ዱባ
 ግልብኬሳይ እን ሆረ ግልቢሰናራ፤ ህኢቲሳና እን ዋ ላኖ እን አቶትናራ” አማመ
 ጻፋራ። **12** ሃንሱን ኖ መተመተካን ፈሎኦታንኮክ ጋራ ዋይ ሆረ አልነ አባብ
 ሰሰናና። **13** ሃንሱን ኮ ካካለ ጉት አሮፍርድኖ፤ እየሱስ ጎሳመን ማምሰክ እባዶና
 እቢኬሳኮክ ራድ ሀንዱዱፎ ጎርቱን ካሀንዱዱፍሰሮ ላናኮ እስኦቴሳ ሀኦራተ።
14 እየሰ ኮ ባቲክያ አመ ካሄዳሮ እባዶን ሀሱ እየሰ ኡሱን ባቲክ ላራ ኳሬ

ማምሰክ እዩሰና መተኪሳይ ባቲክ ልዋት እን ጎታ የሱሳይ ማለበረ አዳሰሳራ።
15 እት ካእማቶ ባቦኮክ አላንቲ አቢካውን ሀንዱዱፎ ጎሌተ ጌላንጃይ ካግቶ
 ላኮቶ፤ ሃንሱን ክርስቶሳ ካኮንጎየሮ እባዶ፡ ካእማቶ ባቦኮክ አላንቲ ጎጎባሮን
 እሮየልቲ። **16** ጎርታ እሰን ዶሌ ካእዳንክ ካሌሮ እየሰ ካካለ ጎጎጢቃሮን
 እሮየልቲ። **17** ዋናናት ካዋ እያና ቁሉክ ታሄላማቶ ቁሉማ፡ ኖጎዳና ገገሎያን
 ኳሬ ታእመና ታጣዋ ሃጃ ላኮቶ። **18** ሂካኮክ ጋራ ክርስቶሳን ካሃንዳራ እባዶ ዋ
 ገጌላይሳራ፤ እባዶ ዶሌና ካጋላታመያ። **19** ሃንሱን ኖጎዳ ካኮሄላማቶና እስኦሮ
 እስ እስ ካኮዳቢሳኖ እየሰ ፈልና። **20** ባቦኮክ አላንቲ ፈሎ ኦዋ ላኮዲግኖ። ባቦ
 ዱባ ካሙጭመያ፤ እየሱን ጎእመን ካካለ እባዶ ካሀንዱዱፍሰሮ ባቦ እማኖ
 ላኮጋራዮ። **21** ሃንሱን አቢካ ጎጎሀንዱዱፍሶንኮ ሶ እማናዋት፡ ጣዋ ካዎይኒ
 ጣማናዋት፡ ጎርቱን ማምሰክና ካሀንዱዱፍሰሮ ኮኮ ፈላናዋት ካእዳንክያ። **22**
 ጎርታ ሂክ እማኖ ኩዬና ዋይ ጠኤ ሀሌዎ፤ ቱኩልክያ እመ ካእማናሮ እየሰ ጎፈለ
 ሳሙቴሳ ካዎቃስኖን እባዶት ካጋላታመያ። **23** ሄዳታ ካእማራ እባዶት አደ
 ፈሎኦቴሳ እማኖይ ጉት ዳባኖን ካግሮ ማንኮሌ ማራን ኡሱን ፍርዳምናራ፤
 እማኖይ ካፈላሞን እየሰ ዱባ ጨቦያ።

15 ኖ እማኖ ኦኦቲ ኦሌነና፡ እማኖይ ኦሀራራንኮክ ሀራኖ ሰዳኖ ዶትሳራ ኳሬ
 እስኦታን ኦላል ኦገጌላይሳታኖ ላኖ ላኮዶትሳሮ። **2** ኖ መተመተይ ካካለ እባዶ
 እማኖ ጎጎእታሮን ኡሱ ካጋርጋሮና ካገጌላይሰሮ እየሰ ፈልና። **3** ክርስቶሳ
 እስኦቴሳ ላኮገጌላይሳተረ፤ ሱረዋ፡ “እባዶ ኩ ካሀባረራ ሀባር እን ጉት ጌ”
 ካእማራ ቁሉክ ማጻፋኮክ ሃፋራ ኡሱ ጌ። **4** ቁሉክ ማጻፋኮ ኖ ታሄላታኖ
 ኡብሲና ጎጎኢናይ ኡብድ ጎጎግርቶን ጣየ ካጻፋመራ ዱባ ኖን አጋልሰሰ ጎጎሌሮን
 ጻፋመራ። **5** ኡብሲና ጎጎኢና ካሰሳራ ዋ ሄዶ እሰን እስእስኦሮ ታየሱሳ ክርስቶሳ
 ማሱሳ ዴብ ሰሴታ ኡሱን ዎታ ራቶ ካኮግታን ግር እስኩን ሀሰሶ። **6** ኡሱማለና
 ጎታካን ካየሱሳ ክርስቶሳ ኦዶ ካሌሮ ዋ ፡ ዎዳና ቶይና ሃፋራ ኮይ እሰን ኡሱ
 ጎጎካባጂታን ሀየሎ። **7** ክርስቶሳ ታዋ ካባጃውን እሰን ጎጎቆጳተሮ እሰን ዱባና
 ኮኮ እስኦሮ ገጌሎይ ቆጳዩን። **8** ሂካ እዬሳ ግራን ዋ ካጣዎ ኦዶላሉን ታሰሰራ
 ኡብድ ፈሎይ ጎጎሀይቶና ሩም ታዋ ጎጎእዴሳንቶን ክርስቶሳ አይሁድን ካሀንዳሮ
 ሌ እማኖያ። **9** ክርስቶሳ አይሁድን ካሀንዳሮ ካኮሌሬ ታካለ አላንቲ አይዛብ
 ጋራ ካሻጋ ዋ ጎጎጋላትሮንያ፤ ሀክና፡ “ሃንሱን እን ኩ አይዛብ ኦሮ ጋላቲናራ፤

መገካውን ማዛመራ ጋላታ ሰሰናራ” አማመ ጎጎጸፋመሮያ። **10** አደና፡ “እስን አይዛብ፤ ጎሳ ካዋኔ ዋታ ገጌላየን!” አማመ ጸፋመራ። **11** አደና፡ “አይዛብ ዱባ! ጎታ ጋላታ፤ ጎሳ ዱባ ዋ ጋላታ!” አማመ ጸፋመራ። **12** ኡሱማለና እስያሳ “ታኢሴይ ሳኒኮ ካኡሙላምናራ ኤመይናራ፤ አይዛብ ሆረሃይ ገጌሰን ክናራ፤ እሶና አብድትሶ ኡሱ ጉት ካታራን” አማራ። **13** አብድትሰን አያና ቁሉክ ሁና ጁናታ ጎጎሴቶን አብድ ካሰሳራ ሄዶ እስን ኡሱ ማንኮአብዳቲን ማራን ገጌሎና ኖጎዳና አሎ እስኑን ሀሰሶ። **14** አቢላልቲ! አዳኔ ኦአማጋንቲታን፡ ማላባኖ ኦዱሩማቲታና እስን መተመቲ ካካለ ጎርሲን ካዳንዴታን ላኖክሰን እን አዳሰራ። **15** አየሰ ኮኮ እን እስን ሻድሲን ዶተረ ሂካ ሀንዳ ዋ ኢን ታሰሰሮ ሰኖክ ማለ ጁቡይ እስኑን ጻፈራ። **16** ህት ሰኖና ኢን ካኮንሰሳንተታ ካገጌሎ ሃፋራ ካዋ አይዛብን ላላባ ቱቃዋ እን ሌረ የሱሳ ክርስቶሳን ሀንዳይንያ፤ ሃንሱን አይዛብ አያና ቁሉክ ካቁሎየና ዋ ካገጌላይሳሮ ጃርሶ ሊ ጎጎጋባላምራውን ሀንዳራ። **17** ህታ አላንቲ የሱሳ ክርስቶሳይ ዋውን ሀንዳይን ዳንዳኖከይ እን ጣዳታራ። **18** አይዛብ ካአጃጃማሮ ጎጎሌሮን የልን ክርስቶሳ ሃፋራኬይና ፈሎኦቲኮክ ጋራነ ካፈለሮ አየሰ ጎሌ ኳሬ አየሰ ኮና አዬሰን ላኮጃባይናሮ። **19** ኡሱማለና ካጅንጃን ባሳና ኦማምሰራን ፈሎይ፤ አያና ቁሉክኮክ ሁናና ኢየሩሳሌምኮና ኡሱ ጎቦብኮ ሀጋአበረ ካኢልዋርቆን ኡል ታ ጌሮን ካክርስቶሳ ዋንጋላ አጋልሰሰራ። **20** አርጌቶ ሀልቻክ አባዶ ካካለ ካዳቢሰሮ ሀጋአባኖ አንሌኖን ካክርስቶሳ መገ ታኮማልሳዋን ግሮ ባንኤ ዱባ ካእዳንክ ዋንጋላ ላላባኖያ። **21** ህክና፡ “ሂታኮ ሆረን ጋራኬሳ ኮና ካኮንሰጋዋን ግራ አባዶ ድናራ፤ ጋራኬሳ አማሎን ካግራና ሻድናራ” አማመ ጎጎጸፋመሮያ። **22** ግዳ ጊን እን እስን ቶሰ ኤመይን ካኮዋያራ ጣየ እስኑን ካእዬሰረ አዬሰኮክ አላንቲያ። **23** ግዳ አደ ሂካ ጎቦቢ ካግሮ ኡሊ ታኮፈላን ባንኤ ማንኮግኖን ማራን፤ ኡሱማለና ጌሰ ካሞጋንኮ ሀጋአበረ እስን ድን ሀልቻ ካአቲ ማንኮአቦ ማራን፤ **24** ኡል ካእሰፌን ቶሰ ኮኮሴየ ጎራታ ኡሱ ራኔ እስን ድን ሄደራ። ጎራታ ክጫሩን እስኔ ዋታ ገጌሎይ ካኮአዳላየ ጎራታ ሰሴታንቲ ሆረድ ሴይን ካዳንዴይሰሮ እስን እን ካጋርጋርናታን እን አብድ የላታራ። **25** ግዳ አደ ዋ ኦአማናራኑን ካሰሳምናሮ ማራጋደ አብረ ኡል ካኢየሩሳሌም ቶሰ ሴይናራ። **26** ህክና ኡል ካመቀዶንያይና ኡል ካአካያይ ካግራ አባዶ ካዋ ኢየሩሳሌም ካግሮ ሂዬሳሉን ማራጋደ ካጋርጋርሳ ፈኢትሶይ

ፋርን ማንኮደታቱን ማራንያ። 27 ሂክ ጋርጋርሳና ፈኢትሶይ ካኮንሰሴራን ካዶትሳሮ ማንኮሌ ማራንያ፤ እይዛብ እይሁድን ዋታ ሶማ ኦኦያና ኦሄዴዳማራን ጎሌ እሶና ሶማ ኦሶየት እይሁድ ጋርጋርን ማንኮደትሳሮ ማራንያ። 28 ሃንሱን ሂካ ካኩኩአመሮ ማራጋደ ኢየሩሳሌም ቶሰ ጌሰ ሰሰጉረ ፈሎኦቲ ካኮንሳየ ጎራታ ኡልክሰን ኤመይረ እሰን ዲረ ኡል ካእሰፌን ሴይናራ። 29 እሰን ቶሰ ካኮኤማየ ጎራታ ኡሶ ካክርሰቶሳ ምግ የል እት ኤማታኖኬ አዳሳራ። 30 አቢላልቲ! ጋራኬ ዋ ቶሰ ኤባታ፡ ፈሎኤ ዋታ ሞአባታኖኬይ እን ጎጎጋርጋርታኑን ጎታካን የሱሳ ክርሰቶሳና እያና ቁሉክኮት ጌላንጂ ኤባታራ። 31 እሰን እን ካኮንኤባይናታን ኡል ካይሁዳ ካግሮ ዋ ካአማኖን አባዶኮት ገነኮ እን ጎጎሄሰሮና ኢየሩሳሌም ኦግራን ፈሎኦት ዋ ኦአማናራን ዶሌ አታማኖ ጎጎግራውንያ። 32 ህክና ካኮሌ ጎራታ ፈኢ ታዋ ጎሌተ ገጌሎይ እሰን ቶሰ ሴይጉረ እሰኔ ዋታ ጎራታ ክጫሩን አዳላይን ዶታራ። 33 ካኖጎዳ ዋ ሄዶ እሰን ዱባን ዋታ ሀሌቶ! ሀሚኒዕ።

16 ፌቤን ታክንክራ ካታማይ ምን ካኤብ ታሀንዳቶ ታአብዳንተ አባታን ላኖ ጎጎአዳሳኩን ዶታራ። 2 ኤሰ እና ካካለ ካሞጋን አባዶ ታጋርጋርተቶ ማንኮሌተ ማራን አማኒሉን ማርት ቆጳታኖ ካዶትሳሮክ ማለ መገ ካጎታይ ቆጳይዴን ኤሰን ካዶትሳሮ ኮኮ ዱባ ጎጎጋርጋርታኑን እን ሀዳራ አማራ። 3 ፈሎ ኦየሱሳ ክርሰቶሳ ኢነ ዋታ ኦፈላራን ጳርሰቂላና ኤንተርክሴ አቅላን ኖጎዳ ገጊሳ 4 እሶና እን ማራን ጎይና ዱዶ ኦኤካሳቲረንያን፤ ሂካኩና አርጌቶ እሶ ጋላታራ፤ እን ካላል አንሌኖን ግራን እይዛብኮ አብድትሶ ቶሰ ካአባባተሮ አማኒልና ካሞጋን ምን ካኤብኔ ለረ ራቶ ጋላታራን። 5 ምንክሶይ ኤቢን ካኩኩማሮ አማኒሉን ኖጎዳ ገጊሳ። ካእሰያ ኡል ሆራርጀ ዋይ ካአማኔሮ እን ካጌላታሮ ኤጸነጦሲን ኖጎዳ ገጊሳ። 6 እሰኩን ታንጂን ታዳፋርተቶ ማርያማን ኖጎዳ ገጊሳ። 7 ኢነ ዋታ ሻማን ኦግሬወና ኦፋራመራን ኦሮ አዳሳመን ኦግረን እይሁድ ኦሌረን ፋልኬውን፡ አንድሮቆሳና ዩልያን ኖጎዳ ገጊሳ፤ እሶና ክርሰቶሳ አማናኖ እነኮ ጣናን። 8 መገ ካጎታይ እን ካጌላታሮ እንጸልያጦሰን ኖጎዳ ገጊሳ። 9 ፈሎ ኦክርሰቶሳ ኖኔ ዋታ ካፈላሮ ካሌሮ ኡርባኖሳና እን ካጌላታሮ እሰጣቂሳን ኖጎዳ ገጊሳ። 10 ክርሰቶሳ ግራኖ ጫፋመረ ካኮአቶታመሮ እጲልሲና፡ ኡሱማሌ አርሰጦቡሎሳኮክ ካምነ አባዶን ኖጎዳ ገጊሳ። 11 እይሁድት ፋልኬውን ሄሮድዮንና ካናርሰስ ካምነ አባዶን ጎታ ካአማኒሮን ኖጎዳ ገጊሳ። 12 ካጎታ ሀንዳውን ኦዳፋራራን አባጆላልካን

ትሩፋይናዊና ትሩፎሳን፡ ኡሱማለና አደ ካጎታ ሀንዳውን አሎ ታዳፋርተቶና መገ ካክርሰቶሳ እን ታጌላታሮ ፐርሰሰን ሮጎዳ ገጊሳ። **13** ጎታውን ሀንዳኖይ አሎ ካክዳሳመሮ ሩፎሲና አደ እን ኤሪክሴ እን ጌላታ ታግቼ ኣየቲሳና ሮጎዳ ገጊሳ።

14 አሰንክርቶሳና ፈለንጎን፡ ሄርመሲን፡ ፓትሮባሲና፡ ሄርማሲን፡ እሶነ ዎታ ታግቶ አቢላሉን ሮጎዳ ገጊሳ። **15** ፍለጎሳን፡ ዩልያ፡ ነርያና አባቲሳን ኡሱማለና ኡሉዎፓስና እሶነ ዎታ ኦግራን ዋ ኦኦማናራን ዱባን ሮጎዳ ገጊሳ። **16** ቁሉክ እስክንጋታኖይ ሮጎዳ አታ። ካክርሰቶሳ ካዋጋን ምን ካኤብ ዱባ ሮጎዳ እስኩን ፋራመራ። **17** አቢላልቲ! እሰን ካክጋልሳቲታን አጋልሰሰ ኔባታ እሰን ኦሮ ካለካለ ቤያኖና ራኮ ካኬናሮ እባዶኮ እስኦራዬን፤ እሶኮና ፋክማ! **18** ሂካ ኣንክክ እባዶ እስኦትሶ ኳሬ ጎታካን ክርሰቶሳን ላኮሀንዳራን። እየሰ ኦኖዎይሳ ፋያንካክ እባዶኮት ዎዳና ሶባራን። **19** ሀንዳኖክሰን ዱባ ማሌራን ሂካኒና እን አሎ ገጌላየራ፤ ጎሌና ካክዳን ካሌ እየሱን ቃሮሌ፡ ካሜላን ካሌውን ፋያንካኒዕ ጎጎሌታኩን ዶታራ። **20** ሂካ ጎፈልቲን ሮጎዳ ካሰሳራ ሄዶ ሳሜ. ጸላየ ሉቃኦትሰን ሄገሊ ጫንጫናራ፡ ታጎታ የሱሳኮት ሰኖ እስኔ ዎታ ሀሌቶ። **21** እኔ ዎታ ካፈላራ ጢዋቶሳ ኡሱማለና አደ አይሁድ ፋልኬ ኦሌራን ሉቅዮሳ፡ ኢዮሶንና ሶስጸጢሮሳ ሮጎዳ ፋራማራን። **22** ሂካ ሀንዳ ካጸፈራ እን ጠርጢዮስና መገ ካጎታይ ሮጎዳ ፋራማራ። **23** እና ህታኒ ካግሮ ምን ካኤብ ዱባ ካማርቲሳራ ጋዮሳ፡ ኡሱማለና፡ አደ ካታማኮክ ኦዶናት ካአባናየ ኤራሰጦስ፡ አብካን ቁዋርጦስ ሮጎዳ ፋራማራን። **24** [ጎታካን የሱሳ ክርሰቶሳኮት ሰኖ እሰን ዱባን ዎታ ሀሌቶ! ሀሚኒዕ።] **25** እን ካላላባሮ ካገጌሎ ሃፋራ ጋራ ካየሱሳ ክርሰቶሳ ካሰጋማሮ ሀንዳይና ጌስ ካጣዎኮ ሀጋአበረ ሰያመ ካአዳላተሮ፡ ግዳ አደ ካሙተሮ ታሩም ሆልኮት ጋራን ዋ አማኖክሰኒ ጎጎአልታኩን እሰን የልን ዳንዳራ። (aiōnios g166)

26 ግዳ አደ ህት ሩም ሙተታ፤ ጅሩ ጅሮማክ ሄዶኮክ አጃጃ ዱባ አማንረ ጎጎአጃጃምሮን ካሄገሮል ማጸፋኮክ ጋራን ጎሳ ዱባ ጎጎአዴሰሮን ሌራ። (aiōnios g166) **27** ኡሱ ካላል ቃሩማ ካአቦ ሄዶ ኮ፡ የሱሳ ክርሰቶሳኮክ ጋራን ጅሩ ጅሮማን ጋላታ ሀጌዎ! ሀሚኒዕ። (aiōn g165)

1 ቆሮንቶሳ

1 ፈኢ ታዋይ የሱሳ ክርስቶስን ካህንዳሮ ጎሳሌሮን ካኡማመሮ ጳውሎስኮና፡
አብካን ሶስንተነሰኩ፡ **2** ታቆሮንቶሳ ካታማይ ካግራ ካዋ ምን ካኤብ ክርስቶሳ
የሱሳይ ኦቁሎየራውና ካክሶና ካካን ጎታ ካሌሮ ጎታካን የሱሳኮክ መገይ
ባንኤ ባንኤይ ሌጉረ ካኡማሮ ዱባነ ዋታ ቁሎለ ሊን ኦኡማመራውን፡ **3** ዋ
አቦካንኮና፡ ጎታካን፡ የሱሳ ክርስቶሳኮ ሰኖና ኖጎዳ እስኩን ሀሌቶ፡፡ **4** የሱሳ
ክርስቶሳይ ታስሳንተቶ ሰኖ እርጌቶ እስን ማራን እን ዋ ጋላታራ፡፡ **5** ኣላንቲና
ማምስክ እየስ ህክና ካእዬሳማሮ ዱባን ቃሩማ ዱባ ኡሱይ ዱሩማቴታን፡፡ **6**
ክርስቶሳ ማራን ካእቶቲነኔና እስን ዶሌ ዳባተራ፤ **7** ሃኑን ጎታካን የሱሳ ክርስቶሳ
ሙታኖ ሀልቻይ እስን ኦራታ ግራን ማምስክና ካእያና እላቦ እስንኮ ላኮህንቃሮ፡፡
8 ጎታካን የሱሳ ክርስቶሳኮት ኤመቶ ቱፍ ካላይ ጎሳሙታኑን ኡሱ ታ ጋቾ ጌሮ
እስን እታይስ ኦራራ፡፡ **9** ኤረኬሳ ጎታካን የሱሳ ክርስቶሳኮክ ራቶ ላኖ ቶስ እስን
ካኡመራ ዋ ካኡብዳመያ፡፡ **10** አቢላልቴ! እስን ጠኤ ካለካለ ብያኖ ጎሳግኖንኮ
ዋዳና ቶ፡ ያዳ ኮ እስኩን ጎሳግሮውን እስእሲ ኦሮና እስኣት ህኢ ቶ ጎሳሌታውን
ጎታካን የሱሳ ክርስቶሳኮክ መገይ እን እስን ኤባታራ፡፡ **11** አቢላልቴ! እስን ኦሮ
ዶጋማ ግራኖ ካቀሎኤ ካምን አባዶኮ እን ማለራ፡፡ **12** አዬስና ሃያ፡ እስንኮ ኮ
“እን ካጳውሎሳያ” ጎአምሮ፡ ካካለ “እን ካእጲሎሳያ” አማራ፡ አደና ኮ “እን
ካከፋያ” አማራ፡ ካካለ እደ “እን ካክርስቶሳያ” አማታን፡፡ **13** ሀያ ክርስቶሳ ኤካ
በልኤራ? ጳውሎሳ እስኩን ሱዋመራ? ጎርቱን ካጳውሎሳ መገይ ጣማቃንቴታን?
14 ቀርስጳሳና ጋዮሳ ኳሬ እስንኮ እን ማዮና ማንኮጣማቂኖ ግሮ ማራን እን ዋ
ጋላታራ፡፡ **15** ሃኑን መገኬ ካጳውሎሳይ ጣማቃመራ አመ ካእዬሳራ ማዮና
ላግሮ፡፡ **16** ኦግራን ካእስጢፋኖሳ ካምን አባዶ እን ጣማቂራ፡ ህናኣኮ ካካለ
ጎአመን ጣማቃኖኬ እን ላኮሻዳሮ፡፡ **17** ክርስቶሳ እን ካኮንፋረራ ዋንጋላ
ጎሳላላብሮን ኳሬ ጎሳጣማቅሮን ላኮዮ፡ ታክርስቶሳ ማስቃሊ ታማድኖን
ጎሳሌኖንኮ እባዶኮ ታሄላንተቶ አዬስኮት ቃሩማ እን ላኮላላባሮ፡፡ **18** ካማስቃሊ
ሃፋራ ካባሮውን ጎወማታ፡ ኖ ኦፋይናኖን ጎአመን ሁና ካዋያ፡፡ **19** “ቃሮሌኮት
ቃሩማ ባሰናራ፡ ኦካሳንኮክ ማላባኖ ላኦ ካላይክ የልናራ” አማመ ጸፋመራ፡፡
20 ቃሮክ ሀጌ ግራ? ካካሳ ሀጌ ግራ? ሴራ ካካሳ ሀጌ ግራ? ሂካ አላም
ካቆቆራራ ሀጌ ግራ? ዋ ታአላም ቃሩማ ጎወማ ላኮየለያ? (aiōn g165) **21**

ቃሩም ታዋኮ ካከይ አላም እስክቲሳኮት ቃሩማይ ዋ ማላባና ማንኮዋተ ማራን፤
 ላላባኮት ጎወማይ ዋ ኡሱ ኦአማናራን ፋይሰን ታኢዳን ፈኢ ታዋ ሌተ። **22**
 ማጎሬና አይሁድ ባሳክ ማላታ ዶታራን፤ ካግርክ አባዶና ቃሩማ ዶታራን። **23**
 ኖ ጎአመን ካሱዋመሮ ክርስቶሳ ላላቢናና። ህክና አይሁድን ሀንዱዱፎ፤
 አይዛብን አደ ጎወማታ። **24** ዋ ካኡማተሮን አደ አይሁድና ሌረ ግርክጃሉን
 ክርስቶሳ ካዋ ሁናና ታዋ ቃሩማያ። **25** ኣላንቲና ታአባዶ ቃሩማኮ ሱረ ታዋ
 ጎወማ ጂናታ፤ አታን ካእባዶኮ ሱረ ሀራኖ ካዋያ ካአታታራ። **26** አቢላልቴ!
 ካኮኡማንቲተን ጎራታ እሰን ምስክ አባዶተን አላ ሻዳ፤ ሄዶ ኦአባዶት እሰንኮ
 ኦሞጋን ኦካሳን ላኮቴን፤ ኦሞጋን እሰና ኦአቲ ላኮቴን፤ ኦሞጋን እሰና ምን ካአቲኮ
 ላኮኡሙላንተቴን፤ **27** እየሱን ጎአመን ዋ ቃሮሌ ሙሊሰን አመጉረ ካአላም
 ጎዋክ እየሰ አሳባራ፤ ዋ ኦአቲ ሙሊሰን አመረ ካአላም ላፋክ እየሰ አሳባተ፤ **28**
 ዋ ሂካ አላም ካካባጃመሮ እየሰ ካካባጃሞን ግሮ እን የልን ሂካ አላምን ሁሰ
 ካአመሮና ካቱፋመሮ ባንኤና ካኮሰሳሞን እየሰ አሳባተ፤ **29** ህክና ማምስክ
 አባዶና ኡሱ ሆረ ጎጎዳዳኖንኮያ። **30** ካክርስቶሳ የሱሳ ላኖ ኡሱኮ ካኬይያ።
 ኡሱ ዋ ዶለኮ ቃሩማታን፤ ቁሉማታን፤ ቃጂላካን ዋዶካን ሌራ። **31** ጎርታኑ
 ማጻፋይ ሃ አማመ ጎጎጻፋመሮይ “ካዳዳታራ ዱባ ዋይ ሀዳዳቶ።”

2 አቢላልቴ! እን እሰን ቶሰ ታኮኤመየሬ ሆል ታዋ እየሰ ኦኖሞይሰ አዬሳኖና
 ካሳኖ ጎርቱን ታሮርተ ቃሩማይ ላላብን ላኮኤማየሮ። **2** እሰን ኦሮ ግራን የሱሳ
 ክርስቶሳ ሀሱና ካሱዋመሮ ኡሱ ካላል ኳሬ እን ጎጎአዴሶንኮ እን ሙርቲሳየ
 ግረ። **3** እሰን ቶሰ ካኮንኤማየራ ሀራኖይና አብሲ፤ ኡሱማለና ካአቲ ሀርአኖይየ።
4 ሃፋራክና ላላባኖክ ካአያና ሁናይ ቱሳኖይ ኳሬ ካሶሶብሮ ካቃሩማ ሃፋራ
 ላኮየ። **5** ህክና አማኖክሰኒ ሁና ካዋይ ኳሬ ታአባዶ ቃሩማ ጉት ጎጎጣባኖንኮያ።
6 አያናይ ካዱባመ እባዶ ኦሮ ጎአመን ቃሩማ አዬሰናና፤ ሀሌዎ ኳሬ ሂካ
 አላምኮት ቃሩማ ጎርቱን ታባይናቶ ሂካ ካአላም ሞትጃልኮት ቃሩማ ላኮየ።
(aiōn g165) **7** እየሱን ጎአመን ሰያንተ ታግቴ ሆል ታዋ ቃሩማታ። ህት ቃሩማ
 ካሞጋን ጌሰጃልኮ ሆረን ካባጃታንዉን ጣይተ ታሙርተሳንተቶተ። **(aiōn g165)**
8 ሂካ አላም ካግሮ ሞትጃል ኦሮኮ ኮና ህታ ቃሩማ ላኮማላቤራን፤ ማላብ
 ግሬንዋ ካካባጃ ጎታ ላኮሱዋሬን። **(aiōn g165)** **9** ሀሌዎ ኳሬ ማጻፋይ፤ “እል
 ካዴኖን ግቶ፤ ነበ ታአባዶ ካማሎን ግቶ፤ ዋዳና ታአባዶ ካሻዶን፤ ዋ ኦኬላታሮን

ኤካሰራ” አማመ ጸፋመራ። **10** ዋ አደ ሂካ አያናኬሳክ ጋራነ ኖን ሙትሰራ፥ አያና ካዋ ሰያንተ ታግቶ ሆል ታዋ አሃሶን ዱባ ቆቆራራ። **11** አባዶ ኦሮ ካግሮ ካአዴሳራ አያና ካአባዶ ካራ ያዳ ካአባዶ ካማላብራ አዮያ ካግራ? ኡሱማለና አያና ካዋ ካራ ታዋ ካአዴሰራ ኮና ላኮግሮ። **12** ዋኮ ካሌሮ አያና ካራ ካአላም አያና ላኮአታነኖ። ህክና ዋ ኖን ዳናባ ካሰሰሮ ጎጎማላብኖንያ። **13** ኖ ካአዬሰናና ሂካያ፥ አባዶኮ ካአጋልሳነኖ ቃሩማኮክ ሃፋራይ ሀሌኖን አያናኮ ካአጋልሳነኖ ሃፋራ አዬሰናና፥ ታአያና ሩም ካኮአዴሰሰናና ካአያና ሃፋራኮያ። **14** ካአያና ካሌኖን አባዶት አያና ካዋኮ ላኮሌሮ አዬሰጃል አታይን ላኮዳንዳሮ፤ አላንቲና ሂካማሌክ አየሰ ኡሱን ጎዉማታ፥ አያናይ ካቆቆራማሮ ማንኮሌሮ ማራን አዴሰን ላኮዳንዳሮ። **15** ካአያና አባዶ አደ አየሰ ዱባና ማራማራራ፥ ኡሱ አደ ማዮይና ላኮቆቆራማሮ። **16** “ጎጎአጋልሰሰሮን፥ ታጎታ ዋዳና አዮያ ካአዴሰራ፥ ኡሱ ጎርሲን ካዳንዴራ አዮያ?” አማመ ጎጎጸፋመሮያ። ኖ አንዴ ታክርሰቶሳ ዋዳና አብና።

3 አቢላልቲ! ክርሰቶሳይ ጋና ይሰ ጎጎሌተታን ፈኢ ታሶየክ ማለ ካራ ፈኢ ታአያና ማለ አዬሰን አን ላኮዳንዳሮ። **2** ጋና ሀአታኖን ማንኮግታን ማራን ኤኖ ካራ ካአቲ ባቦ አን አሰን ላኮአምሰናሮ፥ ግዳና ጎአመን ጋናታን። **3** ግዳና ኦሶየታን፥ አሰን ጠኤ ምጌና ዶጋማ ግታ፥ ሀያ ኦሶየ ላኖክሰን ላኮዮያ? አሰን ኦፈላታን ፈሎ ማዮና ኦፈላሮ ፈሎ አን ላኮያንያ? **4** አላንቲና ኮ “አን ካጳዉሎሳያ” ካካለ አደ፥ “አን ካአጲሎሳያ” ጎአምሮ መጣ ታአባዶ ታላል አን ላኮዮያ? **5** ጎሌና አጲሎሳ መያ? ጳዉሎሳና መያ? ጎታ አሶን መተመቲ ኦሰሰሮ ፈሎኮክ ጅልባ ማለ ኦሀንዳራንያን፥ አሰና አማኖ ቶሰ ካኮኤማተታን ጋራክሶንያ። **6** አን አባረራ፥ አጲሎሳ በከ ጣምሰራ፥ ካጂናሰራ አደ ዋያ። **7** ሃንሱን ካጂናሳራ ዋ ካራ ካአባረሮና ሌረ በከ ካጣምሰራ ኮና ላኮዮ። **8** ካአባረሮና ሌረ በከ ካጣምሰራና ኮያን፥ መተመቲይና ፈሎኦቲሳክ ጅልባ ማለ ባራኣራክሶ አታይናራን። **9** ኖ ራቶ ዋዉን ኦፈላኖ ኦዋና፥ አሰና ካዋ ኢራታን፤ ምን ካዋክ ግንበታን። **10** ዋኮ ታሰሳንተቶ ሰኖኮት ጅልባይ ምን ካግንባሮ ቃሮክ አባዶት አን ኡኩም ጣቢሰ። ካካለና ጉት ማዳረራ፥ አየሱን ጎአመን መተመተይ ምሰምሲ ማዳራይናሮ አሰኦራታኖ ዶትሳራ። **11** አላንቲና ኮይክ ካጣቢሳመሮ ኡኩም ካካለ ኡኩምን ካዳንዳራ ማዮና ላኮግሮ፥ ሂክ ኡኩምና የሱሳ ክርሰቶሳያ። **12** ማዮና

ሂካ ኡኩሚ ጉት ዋርቁኮ ጎርቱን ብርኮ ካካባጀመ ኤኤሞኮ፡ ጎርቱን ጋ፡ ኤስኮ ጎርቱን አጋዳኮ፡ ጎዳቢስ፡ **13** ፈሎ እለባዶ መተመተይ ታኮአዳሳምራን አሪ ኤመይናታ ኤስ አሪ ቱሰናታ፡ ኣላንቲና ኤስ አሪ እባዶኮኒዕ ፈሎ ምሰኒዕያን ኤለኒ ማንኩጫፋምናራን ማራን ኤለን ቱሰናታ፡ **14** ማዮና ኦፈላተሮ ፈሎይ ጎአታተ ባርኣራ አታታራ፡ **15** ፈሎ ኤለኒ ካኮጉባተራን ጎአመን ባርኣራ ሄሳራ፤ ኡሱ ኡሱን አደ ፋይናራ፡ ሀሌዎ ኳሬ ካኮፋይናራ ኤለን ኦሮ ማረ ጫፋመረ ካርራሮ አንያ፡ **16** እስን መተክሰኑን ቁሉክ ምን ካዋ ላኖክሰና አያና ካዋ እስኒ ኦሮ ግራኖ ላኮካሳንያ? **17** ሃንሱን ማዮና ቁሉክ ምን ካዋ ጎዲገ ዋና ኡሱ ዲግናራ፡ ምን ካዋ ቁሉክያ፡ ሀሱና ቁሉክ ምን ካዋ እስንታን፡ **18** ማዮና እስኦቴሳ አሮሶባኖ፡ እስንኮ ማዮና ሂካ አላም ቃሮ ኣን ጎሌ ቃሮ ሊን እስኦቴሳ ጎዋ ኣን ሀቶታቶ፡ (aiḥon g165) **19** ሂካ አላምኮት ቃራማ ዋይ ሆረ ጎዉማታ፡ ሀክና “ዋ ቃሮሌል ምጌትሶኔ ዋታ አብናራ” አማመ ጎጎጸፋመሮይያ፡ **20** ባንኤ ታካለይ አደ “ጎታ ቃሮሌልኮት ቆፋ ላኦ ካላይክ ላኖ ካሶዋ” አማመ ጸፋመራ፡ **21** ጎርታኑ ማዮና እባዶይ አሮዳዳኖ፡ ካመን ዱባ ካክሰንያ፡ **22** ጳዉሎሳና ሌረ እጲሎሳ ጎርቱን ከፋ፡ አላምና ሌረ ግር ጎርቱን ጎይ፡ ግዳ ካግሮና ሌረ ሆረንባን ካኤማይናራ ዱባ ካክሰንያ፡ **23** እስን ኦክርሰቶሳታን ክርሰቶሳና ኤረ ካዋያ፡

4 ጎርታኑ እባዶ ዱባ ኖ ክርሰቶሳን ኦሀንዳኖ አንና ሆል ታዋ ቱሳኖኮት ሀዳራ ኦአታኖ ኣን ኖ ሀቶቴን፡ **2** ሃ ጎሌ ሀዳራ ኦአታቴራና ኦአብዳማራን ሊ ግራኖ ዶትሳራ፡ **3** እስኩና ሌረ እባዶይ ታፍርዳ ሾንጎይ ጎጎፍርድቶን አን ጋራኬነ ራኮ ላኮአቦ፡ እን ሱረ እስኦቴይ ጉት ላኮፍርዳይናሮ፡ **4** ሳሙት ቁሉታ፡ ሂክ ጎአመን ባስ ካላይክ ላኖኬ ላኮአዳሰሳሮ፡ እን ጉት ካፍርዳራ ጎታያ፡ **5** ሃኑን ጎራታ ሀጌኖን ማምሰክ እየሰ ጉት አሮፍርድቱን፡ ጎታ ታኤማሮይ ኦራ፡ ኡሱ ሙጉድ ኦሮ ካሰያመሮ ኢፋ ቶስ ቤሰናራ፡ ዋዳና ታእባዶይ ኦሮ ሰያመ ካግሮ ያዳ ሙትሰናራ፡ ሀሱ ጎራታ እባዶ መተመተኬሳይ ካዶትሳሮ ጋላታ ዋ ዶለኮ አታይናራ፡ **6** ጎርታኑ አባላልቲ! ላኦትሰኑን አመጉረ ህታ ሃጂይ እስኦቴና እጲሎሳ ማሱሌ ኬነራ፡ ሂካና ካኮንየለራ “ካጸፋመሮኮ አሮሮርተ” ካአማመሮ ኖኮ ጎጎአጋልሳታዉንያ፡ ሃኑን እባዶት ኮይ ዲዳታ ካካለ አሮቱፋቴን፡ **7** ጎሌና አት ካካለኮ ጎጎሮርቶ ካየለራ አዮያ? ካካ ካሌሮ እየሰኮ አት ሀአታኖን ካግታ መያ ካግራ? ሀያ አታተ ግራን ሀአታኖን ካግሮ ኣን ሙን ዲዳታ? **8** ግዳ

ካዶትሳር ዱባ ሄላቲታን? ዱሬሳና ሌቲታን? ኖኮና ካለቤተዳን ሬዴታን? ኦግራን
 እስን ሬድ ግቴንዋ ኖና እስኔ ዋታ ሬድ ግራን። **9** ኣላንቲና ዋ ኖ ኦፋራምንኖ
 ጎይን ካፍርዳመር እባዶ ታኮላጋድራን ባንኤ ቶስ ጌስን እባዶ ዱባኮ ሀርጫ
 ካኣልሰራን እባዶ ኣን ኢን ላራ። አላም ዱባ ኤርግቻና እባዶን ድራማ ኣን
 ደያምናና። **10** ኖ ክርስቶሳ ማራን ጎዋሌና፤ እስን ጎእመን ክርስቶሳይ ቃሮሌታን፤
 ኖ ላፋና፤ እስን ጎእመን ኦኣቲታን፤ እስን ኦካባጃንተታን፤ ኖ ጎእመን ኦየራንና።
11 ታ ህታ ሳቲ ጌኖን ኡአና፤ ሱጉባታና፤ ሀወኣይ ላና፤ ቦጫምናና፤ ምን ዋንኔ
 ካፋፋና፤ **12** ገነታን ፈላታ ሀራና፤ ጎቃንግናን ሶማሳታና፤ ጎሆሮራን ኡብሳና፤ **13**
 መገካን ጎባሰራን ታኢዳን አባባና፤ ታ ግዳ ጌኖ ካአላም ቡቡልና ካኡሌ ሻካር
 ሌነና። **14** ሂካ ካኮንጸፈራ ኦጌላንቲታን ይሰኬ የላየ ማካርሳዪን ኳሬ ሙሊሰን
 አመ ላኮኖ። **15** ኮና ሱረ ኩማ ቶሞኑን ካቶታምሮ ኦጂናሴራን ክርስቶሳይ
 እስኩን ጎግሬና ካሞጋን ኦዶላል አደን ላኮአብታን፤ ጋራ ካዋንጋላን ክርስቶሳ
 የሱሳይ እስን ኡሙለራ። **16** ሃኑን እስን እን ኣን ጎሳሌታውን ኤባታራ። **17** ጎርታኑ
 ካጌላታመራና ካአብዳመራ ጎታይ ኤረኬ ካሌሮ ጢሞቶሳ ካኮፋረራ ሂካኮት
 ኣላንቲያ፤ ኡሱና ባንኤ ባንኤይ ካሞጋን ምን ካኡብ ዱባይ ኣን ጎሳኦጋልሰሳር
 ክርስቶሳ የሱሳ ኮ ላኖይ ካሄላየሮ ካኡሱብ ግርኮክ ራ እስን ሻድሳራ። **18**
 እስንኮ ኮኮ እን እስን ቶስ ካኤማኖን ኣን ሌረ ኮራማሳ ለራን። **19** ሀሌዋ ኳሬ
 ፈኢ ታጎታ ጎሌተ እን እስን ቶስ ሳሜ. ኤማሮዋ፤ ኤሰኮና ሂኒዕ ኮራማሳል
 ካአዬሳራን ካላሊ አሌኖን ግራን ኤግታክ ሁና አባን ድን ዶታራ፤ **20** ኣላንቲና
 ዋኖናት ካዋ አዬሲ አሌኖን ግራን ሁና ካዋይያ። **21** ጎሌና እስን ካዶታታን
 ኤክያ? ዳማ አባይ ኤማዉ? ሙ ጌላንጂይና ካኢዳን አያናይ ጎሳኤማሮ ዶታታን?

5 እስን ኦር ኦሙልሰራን ኦሻርሙጡማ ፈሎ ግራኖ ኦግራን አዬሳማራ፤
 ሂካማሌኒዕ ባቲኒዕ ፈሎ ዋ ካአማኖን አባዶ ዶሌ ዱዶ ሙት ካካሶንያ፤
 ኦራቦቴሳ ኦር ካየላተራ አባዶ ግራ። **2** አደን እስን ኮርቲታን፤ ሀሱኮ ሂካ
 አዬሲ ጋድጉዳን ሂካ ኣንክክ እባዶ እስን ኦሮኮ ቤሰን ላኮዶትሳረያ? **3**
 ማምሲና ሱረ እን ሶይ እስኔ ዋታ ጎግራናዋየና አያናይ አደ እስኔ ዋታ ግራ፤ እስኔ
 ዋታ ካግሮ ኣን ሌረ ሂካ ካፈለሮ አባዶት ጉት ግዳዋ ኣን ፍርዴራ። **4** እስን
 ካኮኩኩአማታን ጎራታ አንና አያናይ እስኔ ዋታ ማንኮግሮ ማራን ጎታካን ካየሱሳ
 መገይና እስን ጠኤ ካሙታሮ ጎታካን የሱሳኮክ ሁናይ፤ **5** ሶ ባይጉረን አያና

ታገታ አሪ ጎሳደሮ፡ ሂካ አንክክ ጸላዬን ሀሰሳሞ። **6** ዲዳታኖክሰን ካእዳን ላኮዮ፡ ሁጫር ኢርሾ ካሙላመሮ ካም ካንጂን ካኬሳሮ ላኮካሳንያ? **7** ግዳ ሜላነ ካላይ ጎጎግታን ካኡሱብ ካሙላመሮ ካም ጎጎሌታውን ታደክን ኢርሾ ባሳ። ካፋሰካ ኢዳዶካን ካሌራ ክርሰቶሳ ኤናአመራ። **8** ሃኑን ምጌና ሜላነ ታኮአማጋንተቶ ታደክን ኢርሾይ ሀሌኖን ግራን፡ ኢርሾ ካልክ ካባቦ ባላካን ኢዳነና ሩሚ ካባጅኖ። **9** ካሻርሙጡማ አራዳ ኦአባነ ዎታ እሰን ጎጎሌኖንኮ ሀንዳኬ እን እሰኑን ጸፈረ። **10** ሂካ ሃ እሰኑን እን ጎአምሮ ዋ ኦአማኖን ኦግራን ኦሻርሙጣራን ጎርቱን ኦጋጺጋጸራና ኦሳማራን፡ ጎርቱን ምን ካሞሩ ሴተሬን ኦኤባታራን ዎታ አርሌተን አማኖ ላኮዮ፡ ሃ ጎሌ ሂካ አላምኮ ዱዶ ካለ ብያኖ ካዶትሳሮ ሊ ግራረ። **11** እየሱን ጎአመን ግዳ እን ካኮንጸፈራ “አማኒልና” አማ ኦሻርሙጣራን፡ ጎርቱን ኦጋጺጋጸራን፡ ጎርቱን ምን ካሞሩ ሴተ ኦሳጋዳራን፡ ጎርቱን ኦሰታራን፡ ጎርቱን ኦሳማራን ዎታ ጎጎለላዳሞንኮያ። ሂካ አንክክ አባዶን ዎታ ባቦ ሱረ አሮኣንቴን። **12** ምን ካዋኮ ሳሬ ካግሮ አባዶ ጉት ፍርድን እን መያ ካታብሰ? ምን ካዋይ ኦሮ ካግሮ አባዶ ጉት እሰን ላኮፍርዳታንያ? **13** ምን ካዋኮ ሳሬ ኦግራን ጉት ካፍርዳራ አደ ዋያ፡ ጎርታኑ ቁሉክ ማጸፋ ጎጎአማሮ፡ “ካሜላን አባዶ እሰን ኦሮኮ ቤሳ።”

6 እሰን ኦሮኮ አባዶት ኮ ካካለ ዋ ካአማንሮን ዎታ ዶጋማ ጎግርተ፡ ሃጀተሳ ቁሉለ ሆረ ፍርዳምን ዶትሳ ግራን ዋ ካአማኖን አባዶ ሆረ ምሲ ፍርዳ ሰጋዬን ጀባታራ? **2** ቁሉሌል አላም ጉት ካፍርድናራን እሰን ላኮካሳንያ? አላም ጉት ካፍርዳታን ጎሌተን ጎርታ እየሰ ክጫር ጉት ፍርድን ላኮዳንዳታንያ? **3** ግር ካኡሌኮት ሃጃ ኢሳጋዴን ሱረ ኖ ኤርግቻል ጉት ካፍርድኖ ላኮካሳንያ? **4** ጎርታኑ እሰን እሰአሰ ኦሮ ኢንሰ ጎኢንጋቱን ዋ ካአማኖ መግራኮ ሳሬ ካግሮና ካቱፋመሮ አባዶን ሃጀትሰን ሙን ሰጋታን? **5** ሂካና እን ካኮንአመራ እሰን ሙሊሰንያ። ጎሌና እሰን ኦሮ ዋ ካአማኖ ጃርሳ ሊ ዎጋርሲን ካሻዳራ አባዶ ላኮግሮያ? **6** እየሱን ጎአመን ዋ ካአማኖ ካአማኖ ሞትን ምን ካፍርዱ ሴታራ፤ ሀክና ዋ ካአማኖን አባዶ ሆረ! **7** ጎርታኑ እሰሮ እሰ ሞታኖ ኢያኖክሰን ቱሳራ፡ ጎሚራንተን ላ ኢዳሮላ? ጎሶብቴን ላ ኢዳሮላ? **8** እሰን አዳን እሰኦትሰን ሚራኣታን፡ ሶባታን፡ ሀኩኡና ኦአማናራን። **9** ኦሜላን ዎኖናት ካዋ ኤላናዋት ላኮካሳንያ? ሂካ አዬሲ አሮሶባንቴን፡ ኦላይማራን፡ ቶልቻ ኦሄዶይሳታራን፡

አሻርሙጣራን፡ ባባሩማ አዋተራን፡ ባባር ባባርን ዋታ ኦሁዱራራን፡ **10**
 ሄቶጆል፡ ማራጋደ ኦጌላታራን፡ ኦሰታራን፡ ኦኢንጋማራና ኦሳማራን ዋናናት ካዋ
 ላኮኤላራን፡ **11** እስንኮና ኮኮ ሂካማሌ ግቴን፡ ግዳ ጎአመን ጎታ የሱሳ
 ክርስቶሳኮክ መገይና ሄዶካንኮክ እያናይ ጨቦኮ አልሳንተታን፡ ሙጭእንተታን፡
 ቁሎይቲታን፡ **12** “ካአመን ዱባን ኢን ፈኢ ሰሳንተታ” ሀሌዎ ኳሬ እየሰ
 ዱባና ላኦ ላኮአቦ፡ “እየሰ ዱባን ኢን ፈኢ ሰሳንተታ” ሀሌዎ ኳሬ ማመሱና
 ላኮአምናምናሮ፡ **13** እደና “ባቦ ቦጉንያ፡ ቦግና ባቦንያ” ዋ ጎአመን ላማ ዱባና
 ባሳራ፡ ማር ጎታውንያ ኳሬ ሻርሙጣኖን ላኮዮ፡ ጎታና ማሩንያ፡ **14** ዋ ጎታ
 ጎይኮ ጎጎኬሰሮይ ኖና አደ ሁናኬሳይ ጎይኮ ኬሰናራ፡ **15** ማርክሰን ካክርስቶሳ
 ምክታል ካሌሮ ላኮካሳንያ? ሀያ ካክርስቶሳ ምክታል አተጉረ ሻርሙጣኖይ
 ካባሬሮ ምክታልን ዋታ ኮ የሉ? ሱረ ላኮዶትሳሮ፡ **16** ጎርቱን ሻርሙጡማ
 ካባሬሮን ዋታ ካላራ እባዶት ኤሰ ዋታ ማር ኮ ላኖ ላኮካሳንያ? “እሶ ላማ
 ማር ኮ ላራን እማመ ጸፋመራ፡” **17** እየሱን ጎአመን ጎታን ዋታ ካላራ ኡሱን
 ዋታ እያናይ ኮ ላራ፡ **18** ሻርሙጡማኮ ባቃዬን፡ እባዶ ካፈላራ ጨቦ ዱባ
 ማርኬሳኮ ጎረያ፡ ሻርሙጡማ ካፈላራ ጎአመን ማርኬሳ ጉት ጨቦ ፈላራ፡ **19**
 ጎሌና ማርክሰን እሰን ዋኮ ካአታቲታና እሰኒ ኦሮ ካግሮ እያና ቁሉክኮክ ምን
 ካዋ ላኖ ላኮካሳንያ? ሂክ እያናና ዋኮ ካአታቲታንያ፡ እሰና አዋታን ኳሬ ኦትሰን
 ላኮታን፡ **20** እሰን ማራጋዴይ እምናንቲታን፡ ሃኑን ማርክሰን ዋ ካባጃ፡

7 እሰን እን ታጸፍተታንኮት ሃጀውን እባዶ ሄለልኔ ዋታ ሁዱራናዋተዋ
 ካእዳንክያ፡ **2** እየሱን ጎአመን ሻርሙጡማኮ እስኦራዬን መተመቲ ባባሩን ኦር
 ሀግርተ፡ ሄለልትቲውና መተመቲ ኤንተር ሀግረ፡ **3** ኤንተር ኦርቲሳን ካዶትሳሮ
 ታኦርና ታኤንተሬ ኤሴላ አሮትራኖ፤ ኦርና ኡሱማሌ ኤንተርክሴውን ታዶትሳቶ
 ኤሴላ አሮትራኖ፡ **4** ማር ካኦሪ ካክሴ ካላል ላኮዮ፡ ካኤንተሬንያ፡ ኡሱማሌ
 ማር ካኤንተሬና ካኬሳ ካላል ላኮዮ ካኦርንያ፡ **5** ኤቢ አታይን እስአታጉዴን
 ጎራታ ክጫሩን ጎሌ ኳሬ ኢንሰ ኤሴላ አሮዲዴን፡ እሰ አዋዳታናዋትኮ ካከይ
 ጸላየ ጎጎጫፎንኮ ግዳና ዋታ ላ፡ **6** ሂካ እን ካኮንአመራ አጃጃ ሰሳኖ እንሌኖን
 ግራን እሰኑን ማርካ ሰሳኖያ፡ **7** እባዶ ዱባ እን ኣን ሌዋ ካእዳንየ፡ እየሱን ጎአመን
 እባዶ መተመተይ ዋኮ ካአታተሮ ካኬሳ ካሌ አላቦ አባ፡ ኮውን ምዲ ኮክ አላቦ
 ጎግሮ፡ ካካለቱን አደ ምዲ ታካለክ ካሰኖ አላቦ አባ፡ **8** ኦኬሳሞን ግራውንና

ኤንተርክሶ ኦኮንጎሮ ሄለሉን እን ሃ አማራ፡ ኤንተሪ ሀኬሳሞና ኦር ሀአታኖን እን
 እን ግሬንዋ እሶን ካእዳንያ። **9** እየሱን ጎአመን እስኦትሶ አዋዳታና ጎዋቴን
 ሀአታተን፡ ሀልቻይ ጉባታናኮ አታታኖና ኬሳማኖ ካእዳንክያ። **10** አአታቴራውና
 ኦኬሳማራውን እን ሂካ አጀጃ ሰሳራ፡ ሂክ አጀጃና ካጎታያ ኳሬ ካኬ ላኮዩ፡ ኦር
 ኤንተርክሶኮ አርቤኖ። **11** ኤንተርኮ ጎቤተና አደ ሀኬሳሞን ሀግርተ፡ ጎርቱን
 ኤንተርክሶኮ ዋታ ሀዋጋርተ፡ ኤንተርና ኦርቴሳ ኬልክሞ አርቤሶ። **12** ኦካለቱን
 አደ ሃ አማራ፡ ሂካና አንያ ካአማራ ኳሬ ላኮጎታዮ፡ ዋ ሀአማኖን ታግቶ ኦር ካአባ
 ዋ ካአማናራ እባዶት ኮ ግረ፡ ኦርቴሳ ኡሱን ዋታ ግርን ታዶታቶ ጎሌተ፡ ከልክ
 አም ቤሰን ላኮዶትሳሮ። **13** ዋ ሀአማኖን ካግሮ ኤንተር ታአብታ ዋ ታአማናታ
 ሄለልትቲ ጎግቴ ኡሱና ኤሰን ዋታ ግርን ካዶታታሮ ጎሌ ኤንተርክሶ ጋፋር ብን
 ላኮዶትሳሮ። **14** ዋ ሀአማኖን ካግራ ኤንተር ዋ ታአማንተቶ ኦርቴሳኮክ ኣላንቲ
 ኡና ታዋ ላራ፡ ዋ ሀአማኖን ታግታ ኦርና ካአማኔር ኤንተርክሶይ ኡና ታዋ
 ላታ፡ ጎርቱን ይሰክሶ ባቶሌ ልናራን፤ ግዳ ጎአመን ኡና ታዋ ሌራን፤ **15** እየሱን
 ጎአመን ዋ ሀአማኖን ታግታ ኡና ካለ ብን ጎዶታተ ሀቤቶ፡ ዋ ካአማነራ እባዶት
 ኮና ሄለልትቲ ቶ ጎርቱን ሂካ ጋራይ ኦሻማራን ላኮያን፡ ዋ ኖ ኮኮንኡመራ
 ኖጎዳ ጎጎግርኖንያ። **16** አት ዋ ታአማንተታ ሄለልትቲ ኤንተርካ ካፋይሳይናቶ
 ላኖ መ ካሳ? ጎርቱን አት ዋ ካአማንተታ ባባርትት ኦርታ ካፋይሳይናቶ ላኖ
 ካሶ? **17** ጎርታኑን ጎታ እባዶን ካሰሰሮ እላቦና መተመቲ ዋ ጎጎኡመሮ ኤሰ
 ሀግሮ፤ ካሞጋን ሞን ካኤብ ዱባይና እን ካሰሰራ ዋጋ ሂካያ። **18** እባዶት ኮ
 ሀማጽሳመ ግራን ካኡማመ ጎሌ፡ ሀሃማጽሳሞን ካግሮ እባዶት እን አርቆፒኖ፡
 ሀሃማጽሳሞን ግራን ካኡማመ ጎሌ አርሀማጽሳሞ። **19** ሀማጽሳማኖና ሌረ
 ሀማጽሳናዋት ላኦ ላኮአቦ፡ መተክ እየሰ አጀጃ ካዋ ኦራታኖያ። **20** እባዶ
 መተመተይ ጎጎኡማመሮክ ማለ አታይ ሀግረ። **21** ዋ ኩ ካኮኡመረ ጎራታ አት
 ድይተ? ሀሱ አርያደ፡ ባልቹማታ ሄላታኖ ጎዳንደተ አደ ባልቹማታ አታ። **22**
 ኣላንቲና ድይ ሌ ግራን ጎታይ ካኡማመራ ካጎታ ባልቻክ እባዶትያ፡ ኡሱማለና
 ባልቻክ ሌ ካኡማመራ እባዶት ካክርሰቶሳ ድይያ። **23** ዋ እሰን ኤረኬሳክ
 አግ እምናተራ፡ ሃኑን ካእባዶ ድይ አርሌተን። **24** ኣላንቲና አቢላልቲ! እባዶ
 መተመተይ ካኮኡማመሮ ዋኔ ዋታ አታይ ሀግረ። **25** ሀአታኖንና ሀኬሳሞን
 ካግሮ እባዶኮክ ጋራ እን ጎታኮ ካአታዬራ አጀጃ ላግሮ፡ ሀሌዋ ኳሬ ካጎታ ሻጋኮ

ካከይ ካክብዳመ እባዶ ኣነ ማርካቴ ሰሳራ። 26 ግዳ ታግቶ ራኮኮ ካከይ ታኮግታን ግቴንዋ ካእዳን ኣነ ላራ። 27 ኦር ካእታተቶ ጎሌተ ኬልክምን አሮዶተ። ሀእታኖን ካግቶ ጎሌተና ኦር አታይን አሮዶተ። 28 አት ባባርትትና ኦር ጎእታተ አደ ጨቦ ላኮፈልተቶ። ዴሌልትትና ጎኬሳንተ ጨቦ ላኮፈልተቶ። እየሱን ጎእመን ካእታተሮና ካኬሳመሮ እባዶን ሂካ አላም ጉት ራኮ ታሞጋን ግያታ። አንና ሂክ እሰን ጎጎጌኖንኮ ዶታራ። 29 አቢላልቴ! ያዳክ ሃያ። ጌስ ካጋባባንያ። ጎርታ ኦር ኦእታቴራና ኦር ካላይክ ኣነ ሀግሬን። 30 ኦእታራና ኦእኖን አን። ኦገገላታራና ኦገገላኖን ኣነ ሀሌን። ሁ ኦእምናቴራና ካእምናተራን ሁ ካክሶ ካሌኖን ኣነ ሀቶታቴን። 31 ሂካ አላም ላኦ ካሰሳራ ኮኮ ላኦ ቶና ካሰሶን ኣነ ሀሌዎ። ሂካ አላምኮት ምዲ ታሮርቶታ። 32 አንና እሰን ሀያዶን ጎጎግርታኩን ዶታራ። ኦር ሀእታኖን ካግራ እባዶ ጎታ ገጌላይሰን ማንኮዶታሮ ማራን ካጎታ እየሰ ሻዳራ። 33 ኦር ካእታተራ እባዶ ጎእመን ኦርቴሳ ገጌላይሰን ሂካ አላምኮክ እየሰ ሻዳራ። 34 ሂካኒ ዋዳናቴሳና ቆፋ ላማ ሌተ ሀኬሳምን ታግታ ሄለልትቲ ጎርቱን ዴለልትቲ ጋራ ካጎታክ እየሰ ሻዳታ። ፈሎኦትሰና ሶይና እያናክሴይ ጎታውን ቁሎዋኖያ። ታኬሳንተታ ሄለልትቲ አደ ኤንተርክሴ ገጌላይሰን ማንኮዶታቶ ማራን ሂካ አላምኮክ እየሰ ሻዳታ። 35 አን ሂካ ካኮንአማራ እሰኩን ካኤካሮ እየሰ ሻዳኖይያ ኳሬ እሰን ያድሰን ላኮዮ። ፈሎኦት ዋዳናትሰን ላማ ሀበልኤኖን ጎታይ አታይ ማራጌ ጎጎግርታኩያ። 36 እባዶት ኮ ታኤራተሮ ዴለልትቲ ማራጌይ ጎእባኖን ጌሰክሰ ጂናታ ጎሴተ። አታይን ጎዶታተ ታጌላተ ሀየለ። ጨቦ ላኮአቦ ሀእታተ። 37 እየሱን ጎእመን ሀታ ሃጃይ ዋዳናቴሳ አዳቦይሳይረ ሀሻላጋምን እሰ አዋዳይረ ዴለልትቲ አታታኖኮ እሰኦቴሳ ካሙርቴሳተራ እባዶት ታኢዳን ፈለራ። 38 ሃኩን ዴለልትቲ ካእታተራ ታኢዳን ፈለራ። ሀእታኖን ካግራና ታሮርተ ታኢዳን ፈለራ። 39 ሄለልትቲ ቶ ኤንተርክሰ ኔፎን ግራን ኡሱነ ዋታ ታሻንተታ። ኤንተርክሰ ጎጎየ አደ ካጌላተ እባዶትን ኬሳሚን ባልቹማ አብታ። እባዶት ጎእመን ጎታይ ካእማኔሮ ላኖ ዶትሳራ። 40 ቆፋተይ ጎሌ አደ ሀኬሳምን ሂካማሌ ግቴና ሮር ካገገላተ ልናተ። አንና አደ እያና ካዋ አን ጉት ካግሮ ኣነ ላራ።

8 ቶልቻን ኦኤናአመራን ሶኮክ ጋራ አን ሃ አማራ። “ኖ ዱባና ማላባኖ” ማላባኖ ኮራሜሳ የላራ። ጌላንጀ አደ ቁሎይሳታ። 2 አን ካሶዋ ካእማራ እባዶ ማላቢን ካዶትሳሮ ግታክ ጋና ላኮማላበሮ። 3 ዋ ካጌላታራ እባዶ አደ ዋይ ዶሌ

ካእዴሳመያ። 4 ጎርታኑን ቆልቻን ኦኤናኣመራን ሶ አማኖኮክ ጋራ እን ሃ አማራ፤ ሂካ አላሞ ቆልቻ ካማድኖን ላኖና ዋ ኮ ኳሬ ካካለ ሄዶ ግርዋት ካንሶዋ። 5 ማጎሬና ካሞጋን ሄዶል ሀሌኖን ግራን ዋልና ካሞጋን ጎታጆል ሀሌኖን ግራን፤ ጎታጆል አማማን ኦኤማማራን ግራን፤ ዳሩርና ኡሊና ሀሱሰ እንክክ ሄዶል ጎግረና። 6 ኖን አደ ካመን ዱባ ኡሱኮ ኦኮንሌራ፤ ኖና ኦቴሳ ኦሌንና ዋ ኦዶ ኮ አብና፤ አደና ካመን ዱባ ጋራኬሳን ካኮሌራ፤ ኖና ጋራኬሳን ኦሌንና ጎታ ኮ የሱሳ ክርስቶሳ አብና። 7 እየሱን ጎአመን ሂካ እባዶ ዱባ ላኮካሶ፤ እባዶ ኮኮ ህታር ጊን ቆልቻ ሄዶይሳታ ማንኮግሮ ማራን ሂካማሌኒዕ ሶ ጎአሞራን ኦግራን ቆልቻን ኦኤናኣመራን እን ቆጋራ፤ ሳሙትሶና ላፋ ማንኮሌተቶ ማራን ባቶዋራን። 8 እየሱን ጎአመን ባቦ ዋ ቶሰ ኖ ላኮጋባላሮ፤ ጎአማናዋኔና ካህንቃታራ እየሰ ኮና ላግሮ፤ ጎአሞናና ዋረኤ ካሄላታና እየሰ ኮና ላግሮ። 9 እየሱን ጎአመን ባልቹማትሰንኮ ካከይ እሰን ካፈላታን አማኖ አታኖን ኦግራውን ሀንዱዱፎ ጎሳሌኖንኮ እሰኦትሰን ኦራዬን። 10 አት ሂካ እንክክ ማላባኖ አባ ግራን፤ ላፋት ሳሙ ካአባተራ እባዶት ምን ካቆልቻይ አማ ግራን ኩ ጎዴ ቆልቻን ኦኤናኣመራን ሶ ጎሳአሞሮ ሳሙቴሳ ኡሱ ላኮከኬሳቶያ? 11 ሃኑን ክርስቶሳ ካኮንጎየራ ሂካ አማኖ ካላፈሮ ዋ ካአማኔሮ አቢካ ማላባኖካኮት ኣላንቲ ባየራ አማኖና። 12 ሂካ ራድ አቢላልትሰን ሚራኣና ላፋት ሳሙትሶ ሜጋይሳ ክርስቶሳ ጉት ጨቦ ፈላታን። 13 ሃኑን እን ኦአማራ ሶ አቢኬ ኦህንዱዱፍሳራን ጎሌን አቢኬ ሀንዱዱፍሳናኮ አመረ ዱዶ ሶ ላኮአሞናሮ። (aiōn g165)

9 እን ባልቻክ እባዶት ላኮዮያ? አደ ካፋራመሮ ላኮዮያ? ጎታካን የሱሳ እን ላኮዴሮያ? እሰን አዴን ጎታይ ፈሎኦተኮኒዕ ኢል ላኮታንያ? 2 ካካለቱን ካፋራመሮ ጎላናዋየና ዱዶ እሰኑን አደ ኦግራን ካፋራመሮያ፤ ኣላንቲና ጎታኮ ፋራማኖኬውን ማታማ እሰንታን። 3 አት ካፋራንተቶ ላኮቶ አመን እን ኦቆቆራውን እን ካሰሳራ አባብ ሂካያ፤ 4 ኖ አማኖኮትና ጣማኖኮት ፈኢ ላኮአብኖያ? 5 ኦካለ ኦፋራመራን ኣን፤ ታጎታ አቢላል ኣንና፤ ከፋ ኣን፤ ዱባ ታአማናቶ ኦር አባይ ሰሴይን ፈኢ ላኮአብኖያ? 6 ሙ ዳፋር ፎጎሎይ ፈላይ ግርን ኦኮንዶትሳራ እንና ባርናባሰ ኦላልና? 7 ጎሌና ማራጋይ ካከሳይዋ ዋታዳራ ሌ ካሃንዳራ እዮያ? ካዋይኒ ጋ አባራተጉረ ታዱባንተቶ ኢል ካአሞን እዮያ? ግድኬሳ ፎፋታ ግራን ግድኮ ኤኖ ካጣሞን እዮያ? 8 ሂካ እን ካኮንአዬሰራ ቆፋ ታእባዶ ማሌያ? ሴራ ካሙሴ ሂካ

ላ እማ ግሮላ? **9** ሴራ ካሙሴይ፡ “እራ ካኦታሮ ኣር ፋና ኣሮሺቲን” እማመ
 ጻፋመራ። ሀያ ዋ ታእዬሰሰታ ታእራሬ ሃጃታ? **10** ዋ ሂካ ካኮንእዬሰራ ኦግራን
 ጋራ ካካን ላኮዮያ? ካኮንጻፋመራና ኦግራን ኖ ማራንያ። እራ ኦታተ ካባራረና
 ካኦታራ ኣርና ካኦታተሮ ወጣኮ ሄዴዶ ካእቦ ላኖ አብድ የላታራ። **11** ኖ እሰን
 ኦሮ ካእያና ወጣ ካወጣኖን ጎሌ፡ ሶዉን ካሌሮ ኮኮ ጎኦታነ ካኦቲ እዬሰያ? **12**
 ኦካለ ሀታ ፈኢ እሰንኮ ሄላታኖ ጎዳንዴን፡ ኖ ሮርሳይ ሄላይን ላኮዳንዳኖያ? ኖ
 ጎኦመን ሀታ ፈኢ ላኦ ላኮሀይሳነኖ። ሀሱኮና ካክርሰቶሳ ዋንጋላን ሀንዱዱፎ
 ጎጎሌኖንኮ ካመን ዱባና ኦብሳና። **13** ቁሉክ ምን ካዋይ ኦሀንዳራን ባቦክሶ
 ቁሉክ ምን ካዋኮ ኦሄላታራን፡ ባንኤ ታፋላ ጉት ኦሀንዳራን ጃርሶኮ ሄዴዳመን
 ካእማራን ላኮካሳንያ? **14** ሂካማሌና ዋንጋላ ኦላላባራን ግርክሶዉን ካዶትሳሮ
 ዋንጋላኮ ጎጎኦታናዉን ጎታ አጃጃራ። **15** አን ጎኦመን ሀታ ፈኢኮ ቶይና ሱረ
 ላኦ ላኮኦታየሮ፤ ግዳና ሂካ ካኮንጻፋራ ሂካ ኣንክክ እየሰ ፈልታንዋ ታእምሮ
 አብዲ ላኮዮ፡ ማዮና ዲዳታኖክኬ ላኦ ካላይክ ካየላሮኮ ኢን ጎይ ሆረክ። **16**
 ዋንጋላ ላላባኖክ ላኮጣድሳሮ፡ ካኮንላላባራ ካሄሶን ማንኮሌዉንያ። ዋንጋላ
 ጎላላባናዋየ ኣኔ ኢን! **17** ፈኢቲኮ ኪጉረ ዋንጋላ ጎላላባ ዳሞዛ አባ፡ ፈኢቲኮ
 ጎሌኖን አደ ኦፈላራ ፈሎ ታሰሳንተቶ ሀዳራ ጉድሳኖ ካላል ላራ። **18** ሀያ
 ዳሞዛክ መያ? ዳሞዛ አደ ዋንጋላ ጎላላብሮ ፈኢቲኮት ላኦ ሀኦታኖን ዋንጋላ
 ዳሞዛ ካላይ ላላባኖያ። **19** አን ባልቻክ እባዶትያ፡ ማዮና ድይ ላኮዮ፡ እየሱን
 ጎኦመን ካሞጋን ዋ ቶሰ አባብን እሰኦተ እባዶ ዱባን ድይ ሌራ። **20** አይሁድ
 አባብን አመረ አይሁድን ዋታ ካአይሁድ እባዶ ኣን ሌ። አን መተኬዉን ሴራኮ
 ሄገሌ ሀሌኖን ሴራኮ ሄገሌ ኦግራን አባብን አመረ ሴራኮ ሄገሌ ካግሮ ኣን ሌ።
21 አን መተኬዉን ሴራ ካዋኮ ባልቹማ ካሌኖና ሴራ ካክርሰቶሳይ ካእምናማሮ
 ጎሌና ሴራ ካላይክ እባዶ አባብን ሴራ ካላይክ እባዶት ኣን ሌ። **22** ላፋኒዕ
 ፋይሰን አመረ ላፋኒዕን ዋታ ላፋክ ኣን ሌ፤ ኢን ካዳንዳመ ግታክ ጀልባ ኮኮ
 ፋይሰን አመረ ዱባን ዋታ እየሰ ዱባ ፈለራ። **23** ሂካ ዱባ ካኮንፈላራ ዋንጋላኮ
 ሶማ አታይን አመረ ዋንጋላ ማራንያ። **24** ትያኖኮክ ለላማኖይ ካትያራ ካሞጋን
 ጎሌሮ አላቦ ካኦታታራ አደ ኮ ካላል ላኖ ላኮካሳንያ? ሃኑን አላቦ ካኦታይናሮ
 እባዶት ኣን ትያ። **25** ለላሚን እሰ ካኤካሳታራ እባዶት እየሰ ዱባ እሰኦቲሳ
 ኤካሳታራ፡ እሶ ሂካማሌ ካኮሀራናን ካሮራሮንና ካባሮ ካላቻ ሄላይን ሀራራን፡ ኖ

ጎአመን ጅሩ ጅሮማክ ካባኖን ካላቻ ሄላይን ሀራና። 26 ሃኑን እን ላኦ ካላይክ እባዶት ኣን ኣዱ. ላኮቲናሮ፣ እደና እምባል ቶንቶም ካባሳሮ እባዶ ኣን ኣዱ. ላኮምእባይናሮ። 27 እየሱን ጎአመን ካካለውን ላላብ አባባይረ እን መተከውን ካኢየ ሊ ጎጎሄሶንኮ እስኦቲ ሀድሳታራ።

10 አቢላልቲ! ኦዶላልታን ዱባ ዱማንቻኮ ሄገሌ ግራኖና በክ ኦሮማሬን ካናቀራን ጎጎአዴሳኑን ዶታራ። 2 እሶ ዱባ ሙሴነ ዎታ ሌንጉረን ዱማንቻይና በክይ ጣማቃመን። 3 ዱባና ካኢያና ባቦ ኮ አመን፣ 4 ዱባና ካኢያና ጣሞ ኮ ጣማን። እሶ ዴበ ሰሴታ ካኮግረ ካኢያና ኤኤሞኮ ጣማራን፣ ሀሱ ኤኤሞና ክርስቶሳዮ። 5 ሀሌዎ ኳሬ ዋ ካሞጋኒ ማንኮገጌላታናዋተ ማራን ቃሉላቶክ ኡሊ እዬን ሄሴን። 6 እሶ ካማላን ጎጎሀልቼረን ኖና እድ ጎጎሀልቸኖንኮ ሂክ እየሰ ኖን ማሱሳ ሌራ። 7 “ጎሳና አምና ጣምን ሀማጼ፤ ዱዱሪና ኬ” አማመ ጎጎጻፋመሮይ፣ እሶኮ ኮኮ ጎጎየለራን ቶልቻ ጎጎሄዶይሳታራን እስና አሮሄዶይሳቲን። 8 እሶኮ ኮኮ ሻርሙጠንጉረን አሪ ቶይ ኩማ ላማታንኮ ሴዶ እባዶ ጎጎ ጎየሮይ ኖና ላኮሻርሙጢኖ። 9 እሶኮ ኮኮ ጎታ ጎጎጫፈራንና ሀበሳይ ኢዳማን ጎጎባየራንክ ማለ ኖና ጎታ ላኮጫፍኖ። 10 እሶኮ ኮኮ ጉምጉመጉረ ካባሳሮ ኤርግቻይ ጎጎባየራን እን እስና አሮጉንጉምተን። 11 ሂክ ዱባ ማሱሳ ጎጎሌሮ እሶ ጉት ጌ፣ ጌስጆልኮክ ጉዳታኖይ ካጌሮ ኖ ሀድሰን ጻፋመ። (aiōn g165) 12 ሃኑን አታየ አሌራ ካእማራ ጎግረ ጎጎኢኖንኮ እስኦቲሳ ሀኦራተ። 13 እባዶ ዱባ ጉት ታገያቶኮ ታካለ ጫፍት እስን ላኮጌተቶ፣ ዋ ካኢብዳመያ፣ ሃኑን እስን ካዳንዳታንኮ ካሮረ ጎጎጫፋንታኑን ኡሱ እስን ላኮእስሮ፣ እየሱን ጎአመን ካኮጫፋማታን ጎራታ ካኮኡብሰታን ሁና ሰሰረ ጫፍትኮ ካኮቤታን ራ ኡሱ እስኑን ኤካሰሮዋ። 14 ሃኑን እን ኦጌላታሮኦቲ! ቶልቻ ሄዶይሳታናኮ ባቃዬን። 15 እን ሂካ ካኮንአዬሰራ ካሻዳሮ እባዶንያ። ሂካ እን ካአዬሰሮ አዬሰኮክ ጋራ እስንዋ እሲ ፍርዳ። 16 ኖ ካኮሶማሳምናና ታሶማ ጡጋ ካክርስቶሳ ኢግኔ ዎታ ራቶናት ካኢቦ ላኮዮያ? ኖ ካአማና ባቦ ካዋ ሶ ኦክርስቶሳነ ዎታ ኤሴላ ካኢቦ ላኮዮያ? 17 ባቦ ካዋ ኮ ጎጎሌሮክ ማለ ኖና አሞጋን ሌነ ግራን ማር ኮና፣ ኖ ዱባ ባቦ ኮ ሄዴዳምናና። 18 አላ ካእሰራኤል ጎሳ ቆፓ፣ ካሰሳማሮ ጃርሶ አእማራን ባንኤ ታፋላነ ዎታ ራቶ ኮ ላኮያንያ? 19 ሀያ ቶልቻን ካኤናአመሮ ኮኮና ሌረ ቶልቻ መተከሳውን ላኦ ካኢቦያ አማኖያ? 20 ላኮዮ! አይዛብ ካኮፋላታራ

ዋወን ሀሌኖን ዱርሳወንያ፡ ዱርሳነ ዋታ ኮ ጎሳሌታወን እን ላኮዶታሮ። 21 ታጎታ ጡጋና ታዱርሳል ጡጋና ራቶ ጣምን ላኮዳንዳታን፤ ታጎታ ዱጉድኮ ባቦ አምጉደን ታዱርሳ ዱጉድኮ ኣምን ላኮዳንዳታን። 22 ኖ ሂካ ፈላኖይ ጎታ ሀልቸንሶ? አታንካን ጎታኮ ሮራና? 23 “ካመን ዱባን ፈኢ ሰሳንተታ” እየሱን ጎአመን ካመን ዱባ ላኦ ላኮአቦ፡ “ካመን ዱባን ፈኢ ሰሳንተታ” እየሱን ጎአመን ካመን ዱባ ላኮዳቢሳሮ። 24 አባዶ መተመተይ ኦላቴሳት ላኦ ኳሬ ላኦቴሳ ታላል አሮዶታኖ። 25 ሳሙትሰን አሄዳኖኒ ግያይ ኦዳዳላማራን ሶ ዱባ አማ፤ 26 “ኡልና ኡሊ ጉት ካአማጋመራ ዱባ ካጎታያ።” 27 ዋ ካአማኖን አባዶት ኮ ኩ ማርትና አምሰን ጎኡማተ አምን ሆረ ካሮረሮ ባቦ ዱባ ሳሙትሰኒ አሄዳኖን አማ። 28 እየሱን ጎአመን አባዶት ኮ “ሂኒዕ ሶ ቶልቻን ኦኤናአመራንያን” አም ጎሰጌ፡ ሂካ ካሰገሮ አባዶት ማራና ሳሙትሰኑን አምጉዴን አሮኣንቴን። 29 ሂካ ካኮንአማራ ሂካ አባዶትኮት ሳሙ ማራን ኳሬ ሳሙታ ማራን ላኮዮ፡ ባልቹማት ካካለኮት ሳሙይ ሙን ሄሬጋማታ? 30 አን ዋ ጋላቴረ ባቦ ካአማሮ ጎሌ፡ ዋ ካኮሶማሳየሮ እየሱን ሙን ሀባራማራ? 31 ጎርታኑ አማና ሌረ ጣማ ጎርቱን ማምሰክ እየሰ ፈላ ግራን ካመን ዱባ ካባጃ ታዋወን ፈላ። 32 አይሁድና ሌረ አይዛብን ጎርቱን ምን ካዋወን ሀንዱዱፎ አሮሌተን። 33 አን አባዶ ዱባ ማምሰክ እየሰ ገገላይሰና ጎጎአጸማሮይ እሰና ሂካማሌ የላ፡ ካምጋና ጎጎፋይሮ ኳሬ ኢን ላኦ ካሰሰሮ አሌኖን ግራን አሶን ላኦ ካሰሰሮ ዶታራ።

11 አን ክርስቶስ ኣን ጎሳላሮ እሰና እን ኣን ላ። 2 አርጌቶ እን ማንኮሻዳታን ማራና እንኮ ካአታቲታን ዋጋ አታይሳቴን ማንኮአባቴታን ማራን እን እሰን ጋላታራ። 3 እየሱን ጎአመን ሂካ ጎጎአዴሳኑን ዶታራ፡ ባባር ዱባወን መተ ክርስቶሳያ፡ ሄሌሉና መተ ባባርያ፡ ክርስቶሳወና መተ ዋያ። 4 እስኦቴሳ ሆጎጋተረ ካኤባታራ ጎርቱን ሄገሮ ካአዬሳራ ማምሰክ ባባርትት እስኦቴሳ የራሳታራ። 5 እስኦትሴ ሀሆጎጋኖን ታኤባታ ጎርቱን ሄገሮ ታአዬሳታ ማምሰት ሄለልትቲና መተክሴ የራሳታ፤ መተክሴ ካሆላተቶ ኣን ቶታማታ። 6 ሄለልትቲ መተክሴ ታጎልሳኖን ጎሌተ፡ መተክሴ ሀጎሳተ፡ መተክሴ ጎሳታኖ ጎርቱን ሆላታኖ ካሙልሳሮ ኣን ሊ ኤሰን ጎሙተ አድ እስኦትሴ ሀጎልሳተ። 7 ባባርትት ምዲ ታዋና ካባጃ ታዋ ካኮንሙታቶ ማንኮሌተ ማራን እስኦቴሳ ሆጎግሳዬን ላኮዶትሳሮ፡ ሄለልትቲ ጎአመን ታባባርትቲ ካባጃታ። 8 ኣላንቲና ሄለልትቲ

ባባርተትኮ ሄላንተታ ኳሬ ባባርተት ሄለልትቲኮ ላኮሄላመሮ። **9** አደና ሄለልትቲ ባባርተትዉን መጣንተታ ኳሬ ባባርተት ሄለልትቲን ላኮመጣመሮ። **10** ህታ አላንቲና ኤርግቻኮት አላንቲ፥ ሄለልትቲ ኦዶናትኮ ሄገሌ ግራኖ ካቱሰሮ ማላታ ካሌሮ ሆጎግ መተክሴ ጉት ሀካተ። **11** ጎታ ዶሌ ካአብኖ ግርዉን ሄለልትቲ ባባርተት ካሊ ላኮግራቶ፤ ባባርተትና ሄለልትቲ ካሊ ላኮግራሮ። **12** ሄለልትቲ ባባርተትኮ ጎጎሄላንተቶ፥ ባባርተትና ሄለልትቲኮ ኡሙላማራ፤ እየሱን ጎአመን ዱባዉን ሄላማኖ ዋያ። **13** አላ እሰንዋ ፍርዳ፥ ሄለልትቲ እሰኦትሴ ሀጎልሳኖን ዋ ቶስ ኤባታኖ ዶትሳራ? **14** ባባርተት መተክሳ ጎኤራሳተ ህሎ ካላሮ መጣ ጡማ ላኮአጋልሰሳቶያ? **15** ሄለልትቲ መተክሴ ጎኤራሳተ ላ ካባጃትሴቶላ? መተ ካኤር ካኮንሰሳመራ ካባጃትሴዉን ሆጎግ ጎጎሌሮንያ። **16** ጎርታ ማዮና ህታ ሃጃ ጉት ዶጋምን ጎዶታተ፥ ኖና ሌነኔ ካሞጋን ምን ካዋ ሂካኮ ካለክ ዋጋ ላኮአብኖ። **17** እየሱን ጎአመን ካኮኩኩንታን ጎራታ ካፈላታን ሜላነ ኳሬ ካአዳንክ እየሰ ማንኮላናዋተ ማራን ሂካ ግዳ እን እሰኩን ካሰሰናሮ እጃጃዉን እን እሰን ላኮሶማሳይናሮ። **18** ዱባንኮ ጣየ ምን ካዋይ ካኮኩኩንታን ጎራታ እሰን ኦሮ ካለካለ ብያኖ ካግሮ ማለራ፤ ሂክ እን ካማለሮኮ ጋምሳ ሩም ላኖ አማናራ። [**19** እሰን ኦሮኮ ካሩም ካለ ብረ ጎጎአዳሳምሮ፥ ሂክ ካለካለ ብ ግራኖ እሰን ኦሮ ካሄሶንያ።] **20** ራቶ ካኮኩኩንታን ጎራታ እሰን ካአማታን ባቦ ካዋ ላኮኖ። **21** አማ ግራን ኮ ካካለ ሀኦሮን ካከሳካኬሳ አማራ፤ ሂካኮክ ጋራይ ኮ ጎኡኢሮ ካካለ አደ ባራሪ ሰታራ። **22** አፎ ካኮአንታና ካኮጣንታን ምን ላኮአብታን? ሙ ምን ካዋ ቱፋታን? ሙ ኮና ካልክ ራካታ ሙልሳታን? ጎርታ እን እሰኔ መ አምራ? ሂካ እየሱን እሰን ሶማሳዉ? ዱዶ ላኮሶማሳይናሮ! **23** እን ጎታኮ ካአታዬራ እሰኩን ሮርሰ ካሰሰራ ዋጋ ሂካያ፥ ጎታ የሱሳ ሮር ታኮሰሳምናሮ ሄመኒ፥ ባቦ ኬሰጉረ፥ **24** ሶማሳተረ ኤካኤብሰረ፥ “ሂኒዕ እሰን ማራን ኦልናራን ሶኦቴያን፤ እን ካኮሻዳን የላየነ” አመ። **25** ኡሱማለና ክታኮ አባባተረ ጡጋ ኬሰጉረ፥ “ህት ጡጋ ኢግኬይ ኦሌራን አማቶ ኦኡሱብያን፤ ሃንሱን ጡጋኮ ካኮጣንቱን ጎራታ ሂካ እን ካኮሻዳን የላዬነ” አመ። **26** ሂካ ባቦ ካዋ ካኮአንቱን ጎራታና፥ ህታ ጡጋኮ ካኮጣንቱን ጎራታ ጎታ ታ ኤሜሮ ጊን ጎይኬሳ አዬሰናታን። **27** ጎርታ ማዮና ካዶትሶን ራድ፥ ሂካ ካጎታ ባቦ ጎአመ ጎርቱን ጡጋኮ ጎጣመ፥ ሶ ኦጎታዉና ኢግ ካጎታዉን እንዛ አባ። **28** እባዶ ማዮና ሂካ ባቦ አማናኮና

ህታ ጡጋ ጣማናኮ ሆረነ፥ እስክቲሳ ሀቆቆራተ። **29** አላንቲና ማዮና ኦጎታ ሶ መያን አእዳሶኒ ጎአመና ጡጋኮ ጎጣመ ፍድ መተኬሳውን ካኬነሰሳሮ አማራ፤ ጣማራ። **30** እሰን ኦሮኮ ኦሞጋን ካኮንሀረናን፥ ካኮንሀወአመራና ካኮንጎዩራን ህታ አላንቲያ። **31** እስክታን ደያነዋ አድ ላኮፍርዳማነ። **32** እየሱን ጎአመን ጎታ ኖ ጉት ካኮፍርድሮ ጎራታ ሙርሳምናና፤ ህክና አላም ዋታ ራቶ ጎጎባኖንኮያ። **33** ሃንሱን አቢላልቲ፥ ካጎታ ባቦ አምን ካኮኩኩንታን ጎራታ ዱባ ታኤሜሮ ኦራዬን። **34** ካኮኩኩንታን ጎራታ ፍርዳ እሰኑን ጎጎሌኖንኮ ማዮና ካኡኤራ ጎግረ ምንኬሳይ ሀአሞ። ካሄሰሮ እየሰ አድ እን ካኮኤሜየ ጎራታ አዳሰሰናራ።

12 አቢላልቲ፥ ግዳ አዳነ ጋራ ካአያናኮክ አላቦል ጎጎአዳሳኑን ዶታራ። **2** አማኖ ካልኒዕ ሌተን ታኮግቲን ሀሴራና ህታራና ዋዳማ ህኢ ካዱደ ካአዬሶን ቶልቻል እን ጎጎአታንቲታን ካሶዋ። **3** ሃንሱን ማዮና አያና ካዋይ ካአዬሳራ፥ “የሱሳ ካቃንጋመያ” ካአማራ ላኮግሮ፤ ኡሱማለና አያና ቁሉክ ጎሌኖን ማዮና “የሱሳ ጎታያ” ካአማራ ግራናዋት እን ሰጋራ። **4** አላቦል ካለካለክ ጎሌሮ፥ አያና ጎአመን ኮያ፥ **5** ሀንዳኖና ካለካለክ ካሌሮ ጎታ ጎአመን ኮያ፥ **6** ፈሎና ካለካለኒዕ ጎሌን፥ ዱባና ዱባይ ካፈላራ አደ ኡሱ ኮ ዋያ። **7** እየሱን ጎአመን አያና ቁሉክኮት ሙተን መተመቲ ካኮንሰሳማራ ራቶት ላኦንያ። **8** አያና ቁሉክ ኮዉን ቃሩማ አዬሳኖ ሰሳራ፤ ካካለቲን ሀሱ አያና ማላብ አዬሳኖ ሰሳራ። **9** ኮዉን ሀሱ አያናዋ አማኖ ሰሰናራ፥ ካካለዉን አደ ኤሰነዋ ካፋይሳሮ አያናኮክ አላቦጆል ሰሰናራ። **10** ኮዉን ባሳ ፈላኖ፥ ካካለቲን ሄገሮ አዬሳኖ፥ ካካለቲን አደ አያናጆል አሳባኖ፥ ኮዉን ካለካለት ታኡሱብት ሄኢ አዬሳኖ፥ ካካለቲን አደ ካለካለት ታኡሱብት ሄኢ ካአዬሳመሮ ፋራኖኮክ አላቦ ሰሳራ። **11** ሂኒዕ ዱባ ሀሱ አያና ኮ ኮኒዕ አላቦጆል ጎሌራን፥ መተመቲ እባዶን ኡሱ እሲ ጎጎፈኤ ሰሳራ። **12** ማሪ ምክታ ካሞጋን ጎግረና ማር ኮያ፤ እየሱን ጎአመን ምክታጆል ካሞጋን ጎሌና ማር ኮያ። ክርሰቶሳና ኡሱማሌዋያ። **13** አይሁድ ጎርቱን ካግርክ እባዶ ጎሌን፥ ድይ ጎርቱን ባልቻክ እባዶ ጎሌን፥ ኖ ዱባ ማር ኮ ጎጎሌኖ አያና ኮይ ጣማቃምነና፥ ኖ ዱባና አያና ኮኮ ጎጎጣምኖ ሰሳመራ። **14** ማር ኮ ካኮመጣመራ ምክታ ካሞጋንኮ ኳሬ ምክታ ኮኮ ላኮዮ። **15** ሉክ “እን ገነ ማንኮሌኖን ማራን ካማሬ ምክታ ላኮዮ” እየሱን ጎአመን ሂካ አማኖይ ካማሬ ምክታ ላኖ ሄሳራ? **16** ነበና፥ “እን ኢል ማንኮሌኖ ማራን ካማሬ ምክታ ላኮዮ” ጎአንተ ሃ አማኖይ ካማሬ ምክታ ላኖ

ሄሳራ? 17 ማር ዱባ ኢል ሊ ግረዋ፡ ማላኖ ሀየኮ ሄላምናረ? ማር ዱባ ነበ ሊ ግረዋ፡ ኡርሳታኖ ሀየኮ ሄላምናረ? 18 እየሱን ጎአመን ዋ ጎጎጌላታሮ መተመተይ ባንኤ ዱባ ካየራ። 19 ምክታ ዱባና ኮ ሊ ግረዋ ማር ሀየኮ ሄላምናረ? 20 ጎርታ ምክታል ካዋጋንያ፡ ማር ጎአመን ኮያ። 21 እል ገነኔ፡ “እት እን ላኮዶትሳቶ” አሚና ላኮዶንዳቶ፡ መተና ሉክነ፡ “እት እን ላኮዶትሳቶ” አምን ላኮዶንዳሮ። 22 ዱዶዋ ላፋክ እን ካላራ ካዋጋን ካማሬ ምክታጆል አሎ ኦዶትሳራንያን። 23 ካቱፋመ እን ካላሮ ምክታሉን አሎ ካባጃ ሰሳና፡ እንደና ኦኮንሙላኖ ምክታል አሎ ኮኮባታና፤ 24 ካኮንሙሊኖን ምክታልካን አደ ሂክ ላኮዶትሳሮ። ዋ ጎአመን ካማሬ ምክታል ራቶ ኢንሰ ኤሰልሰ ካባጃ ኦኮንሀንቃተቶ ታሮርተ ካባጃ ሰሰራ። 25 ሂካና ካኮንየለራ ካማሬ ምክታል ኦሮኮ ካለካለ ላኖ አግኖን፡ እሰእሰ ኦሮ ኮኮዉን ጎጎቫድናዉንያ። 26 ምክታ ኮ ጎአቦሳምሮ ምክታጆል ዱባ ራቶ አቦሳማራ፡ ምክታ ኮ ጎካባጃምሮ ካካለ ምክታልና ራቶ ገጌላታራ። 27 ጎርታ እሰና ካክርሰቶሳ ማርታን፡ መተመተክሰኒ ማርኬሳክ ምክታልታን። 28 ሃንሱን ዋ መተመቲ አባዶን ምን ካኤብ ኦሮ ካለካለክ ሀንዳ ጎጎግሮ የለራ፡ ሂካ ጋራይ ሆራሮጀ ኦፋራመራን፡ ካላም ኦሄገሮል፡ ካሴድ ኦአጋልሰሳራን ሹመራ። ደቤና ባሳ ኦፋላራን፡ ደቤና አዱ አዳክ ፋይሳኖኮክ አላቦ ኦአባን፡ አባዶ ጋርጋራኖኮክ አላቦ ኦአባን፡ ኦዶናቲ ካባሪሳሮና ካለካለት ሄኢ ካአዬሳሮ አባዶ ካየራ። 29 ዱባና ኦፋራሜራንያን? ዱባና አደን ኦሄገሮያን? ዱባና አደን ኦአጋልሰሳራንያን? ዱባና አደን ባሳ ፈላራን? 30 ዱባና አደን ካኮፋይሳራን አላቦል አባኔ? ዱባና አደን ካለካለት ሄኢ አዬሳራን? ዱባና አደን ፋራናን? 31 እየሱን ጎአመን ዱባኮ ካሮራሮ አላቦ አታኒ ዶታዬን። ግዳ አድ ዱባኮ ካሮራሮ ራ እን እሰኩን ቱሰናራ።

13 አባዶይና ታኤርግቻ ሄኢ ጎአዬሰ፡ ጌላንጀ አድ ጎዋታንቴ ታኢያቶ ማርጮ እን ጎርቱን ቅልጩቅልጩ ካአማሮ ብልቢላያ። 2 ሄገሮኮክ አላቦ ግረዋ፡ ሆል ማላኖ ዱባና እን አዳሰዋ፡ ዎዳም ባንኤኮ ካታክራ አማኖ ኢን ጎግረ፡ ጌላንጀ አድ ጎዋታንተ ላኦ ካሊክያ። 3 እን ካአቦ ዱባ ሀየሳን ጎሰሰ፡ ማርኬ ኤለኒ ጎጉባየና ፡ ጌላንጀ አድ ጎዋታንተ ኮና ላኦ ላኮአቦ። 4 ጌላንጀ ታኦብሳቶታ፡ አደና ፋያንካትታ፡ ጌላንጀ ላኮጋባቶ፡ እሰኦትሴይ ላኮዳዳቶ፡ ላኮኮራቶ። 5 ካዶትሶን እየሰ ላኮፈላቶ፡ እሰ ታጌላታቶ ላኮቶ፡ ላኮህፋቶ፡ ባሰ ላኮቶታቶ። 6 ጌላንጀ ራምን ዎታ ኳሬ ሜላነን ዎታ ላኮገጌላቶ። 7 ጌላንጀ ካአመን ዱባ ኦብሳታ፡

ካለመን ዱባ አብዳታ፡ ካለመን ዱባ አብድ የላታ፡ ካለመን ዱባ አታቴ አላታ።
8 ጌላንጀ ዱዶ ላኮኢያቶ፡ እየሱን ጎለመን ሄገሮ ጎሌና ኢግልሳማናን፡ ሄኢ
 ታኡሱብ ጎሌተና ሄሰናታ፡ ማላባኖ ጎሌና ኢግልሳማና። **9** ኣላንቲና ካማላባናና
 ጋምሳያ፤ ሄገሮ ካእዬሳናና ጋምሳያ። **10** እየሱን ጎለመን ልክ ካሌራ ጎሌመተ
 ልክ አሌኖን ካግረ ሄሰራ። **11** ይሱማ ግራን ይሰ ኣን እዬሳረ፤ ይሰ ኣን ሻዳረ፤
 ይሰ ኣንና ሄሬጋረ። ዋዳላ ካኮላረ ጎራታ ካይሱማ እየሰ ሉጉደ ኢሰራ። **12**
 ግዳ ካደያና ዳወኢቲ ኦሮ ካሙታሮ ኣን ድም ካለመያ፤ ሀሱ ጎራታ እደ ኢልታን
 ዲዳ ቤሰ ድናና። ግዳ እን ካካሳ ጋምሳያ፤ ሀሱ ጎራታ እደ ዋ እን ካካሶ ግታክ
 ማላባኖ ዱባ ኢን ግርናራ። **13** ጎርታ እማኖን፡ አብድን፡ ጌላንጀን፡ ሂኒዕ ሴዶ
 አታቴን ግራናን፤ ሀናኣኮና ታሮራታ ጌላንጀታ።

14 ጌላንጀ ዴብ ሰሴዬን፤ እያናኮክ አላቦል፡ ካካለኮና ሄገሮ እዬሳኖኮክ አላቦ
 አታኒ ዶታዬን። **2** ካለካለት ሄኢ ካእዬሳራና ዋውን ኳሬ አባዶን ላኮእዬሳሮ፤
 ሆል ካሌሮ እየሰ እያናይ ማንኮእዬሳሮ ማራን ካእዬሳራ ላግሮ። **3** ሄገሮ
 ካእዬሳራ እደ ዳቢሰን፡ አታይሲና ጎጎእሰን አባዶን እዬሳራ። **4** ሄኢ ካለካለት
 ካእዬሳራ እስኦቴሳ ኦላል ዳቢሳራ፡ ሄገሮ ካእዬሳራ እደ ምን ካዋ ዳቢሳራ። **5**
 እሰን ዱባና ካለካለት ሄኢ እየሴንዋ ጌላታረንዋ፡ ሂካኮ አድ ሮር ሄገሮ እየሴንዋ
 ጌላታረንዋ፡ ምን ካዋ ጎጎዳቢሰሮ ካለካለት ሄኢ ካእዬሰሮ አባዶ ጎፋሮን፡
 ካለካለት ሄኢ ካእዬሳሮኮ ሄገሮ ካእዬሳራ ሮራራ። **6** ጎርታ አቢላልቲ! እሰን ቶሰ
 ካኮኤማየ ጎራታ፡ ሆል ታዋ ቱሳኖይ ማላባኖ ጎርቱን ሄገሮ እዬሳኖይ ጎርቱን
 አጋልሰሲ እሰኑን ጎሰግኖን ካለካለት ሄኢ ጎእዬሰ መ እሰኑን ላኦ አባ? **7** ሱሱሌ
 ኣንና ክራን ኣን ኦግራን ኔፎ ካላይኒዕና እደን ያየትሶ እዳሳማና ጎዋተ ማዳርክሶ
 ምሲ እዳሰን ዳንዳራን? **8** እደ ማላካታ ልክ ታሌኖን ታኡምት ያየ ጎማልሰሰ፡
 ጀሬኑን እዮያ ካእዬሳራ? **9** እሰና ኡሱማሌዋታን፡ ሀኢትሰንኮ ፋሬን ካእባ
 ሃፋራ ጎቤኖን፡ ካእዬሰታና እዮያ ሻዲን ካዳንዳራ? አምባሉን ካእዬሳታን ኣን
 ሌታን። **10** አላም ጉት ካሞጋን ሄኢጀል ግራ፡ ፋሬን ካሊት ሄኢና ላግቶ። **11**
 ጎርታ አባዶት ኮ ታእዬሰሮ ሄኢ ፋሬን እን ካእዬሶን ጎሌ፡ ካእዬሰሮ አባዶትን
 እን ማርት ላራ፡ ኡሱና እዬን ማርት ላራ። **12** እሰና ኡሱማሌታን፡ እያናኮክ
 አላቦል ሄላይን ኦዶታታን ማንኮሌቴን ማራን፡ ምን ካዋ ካኮዳባሮ አላቦል
 ሄላይን ኣሎ ዶታዬን። **13** ሃንሱን ካለካለት ሄኢ ካእዬሳራ አባዶ ካእዬሰሮ

ፋርን ጎጎዳንዳር ሀኔባተ። **14** ካለካለት ሄኢ ጎሌባዩ አያናክ ኤባታራ፡ ሳሙት አደ ኢል ካላይትታ። **15** ሀያ መ የልን ዶትሳራ? አያናይ ኤባይናራ፡ ሳሙቴይና ኤባታራ፡ አያናይና ዛማራራ፡ ሳሙቴይና አደ ዛማራራ። **16** ሃ ጎሌኖን አያናይ ዋ ካኮሶማሳቶ ጎራታ፡ አየሱን ማርት ካሌ አባዶት አት ካአዬሳቶ ጎአዴሶን፡ ምሲ ካሶማ ኤብካዉን፡ “ሀሚኒዕ” አምን ዳንዳራ? **17** አት ጎጎዳታቶ ካሶማሳቶ ለታ፡ ካካለ አባዶ ጎአመን ላኮዳቢሳሮ። **18** እን እሰን ዱባንኮ ታርርተ ካለካለት ሄኢ ማንኮአዬሳሮ ማራን ዋ ጋላታራ። **19** አየሱን ጎአመን ምን ካዋይ ኦሮ ካካለ አጋልሰሰን፡ ኩማ ቶሞን ሃፋራ ካለካለት ሄኢ ካአዬሳሮኮ ሱረ ሃፋራ ከን ሳሙቴኮ ጎአዬሰ ኢድራ። **20** አቢላልቴ፡ አየሰ ካሜላኑን ይሰ ላ ኳሬ ቆፋትሰኒ ይሰ አሮሌጉን፤ ቆፋትሰኒ ኦዱባንቴን ላ። **21** “ሄኢ ካለካለት ካአዬሳሮ አባዶና ካአላጋ አባዶኮት ሄኢ ሂካ ጎሳዉን አዬሰናራ፡ ሀክና ሌ ግራን እን ላኮማላራን” ሃ አማራ ዋ። አማመ ሴራ ጻፋመራ። **22** ሃንሱን ካለካለት ሄኢ አዬሳኖ ዋ ካአማኖቱን ማላታ ጎሳሌርን ኳሬ ካአማነርን ላኮኖ። **23** ጎርታ ምን ካዋክ አባዶ ራቶ ኩኩ ታኮአማሮ፡ ዱባና ካለካለት ሄኢ አዬሳ ግራን፡ ማርት ጎርቱን ካአማኖን አባዶ ጎሳ ቶሰ ጎታብሮ፡ ሂክ አባዶ ቆላመራ ላኮአማሮያ? **24** አየሱን ጎአመን ዱባና ሄገሮ አዬሳኖ ጉት ግራን፡ ማርት ጎርቱን ካአማኖን ጎርቱን ካካሶን አባዶት ጎታብ፡ ካማላሮ ሃፋራ ዱባ ዋቃሳማራ፡ ጨባለሳ ላኖኬሳ ኦማላራን ዱባ ዶሌ ፍርዳማራ። **25** ዋዳናቴሳይ ካሰያመራ አየሰ ሙትናራ፡ ኡሱማለና “ዋ ኦግራን እሰን ኦሮ ግራ” አማ በቤዲ ሆረሆረ ኢየረ ዋዉን ሳጋዳራ። **26** አቢላልቴ፡ ጎርታ መ አምና? ካኮኩኩንታን ጎራታ እሰንኮ ኮ ካማዛመር አላቦ አባ፡ ካካለ አጋልሰሳኖኮክ አላቦ አባ፡ ኮ ካጎላተሮ አየሰ ቱሳኖኮክ አላቦ አባ፡ ኮ ካለካለት ሄኢ አዬሳኖኮክ አላቦ አባ፡ ካካለ ፋራኖኮክ አላቦ አባ፡ ሀያ፡ ሂክ ዱባ አላቦ ዋ ካአማናሮ አባዶ ካዳቢሳሮ ላኖ ዶትሳራ። **27** ካለካለት ሄኢ ኦአዬሳራን ጎግሬን ላማ ጎርቱን ጎጂናተ ሴድ ሊጉሬን ጅግ ጅጊ ሀአየሰን፡ አሶ ካአዬሳራና ካካለ አባዶ ሀፋረ። **28** ካፋራ አባዶ ጎዋታመ አድ ካለካለት ሄኢ ካአዬሳራ ሀጋና ኦሮ ጫልኢ አምረ እሰኦቴሳዉና ዋዉን ሀአዬሶ። **29** ሄገር ኦአዬሳራን ላማ ጎርቱን ሴድ ሊጉሬን ሀአየሰን፡ ኦካለ አድ ካአዬሳመሮ ጫቃሰጉሬን እሰኦራይሬን ሀቆቆሬን። **30** ኦሀማዬራን ኦሮኮ አባዶት ኮ ራጋ ኡሱን ጎሙተ ሆራርጀ ካአዬሳረ ጫልኢ ሀአመ። **31** እሰን መተ መተክሰኑን ጎጎአጋልሳታኑና ጎጎአታታኑን፡

ዱባና ጅግ ጅጊ ሄገር አዬሰን ዳንዳታን። **32** ካሄገርልክ አያናል ካሄገረሉን እምናማራ። **33** ዋ ካኖገዳ ሄዶ ኳሬ ካሊያ ሄዶ ላኮዮ። ቁሎለኮክ ምን ካኤብ ዱባና ኡሱማሌዋያ። **34** ሄለል ምን ካዋ ኦሮ ጫልኢ ሀኣሞ፤ ሴራ ጎጎአማሮ ጎጎአጃጃምሮን ኳሬ ጎጎአዬሰሮ ፈኢ ላኮሰሳንተቶ። **35** ሄለል አዳሰን ካዶትሳራ ኮኮ እየሰ ጎግረ፤ ኤንተርጃልክሶ ምኒ ሀሆሳተ፤ አላንቲና ሄለልትቲ ምን ካዋ ኦሮ ጎአዬሰ ካሙልሰሮያ። **36** ሃፋራ ካዋ ካኮቤራ እሰንኮያ? ሙ ካጌራ እሰን ቶሰ ካላልያ? **37** ማዮና እን ካሄገሮያ ካአማራ ጎግረ፤ ሂካ ካኮንጻፈራ ካጎታ አጃጃ ላኖ ሀማላቡ። **38** ሂካ ካአዳሶን ጎግረ እድ ኡሱና ላኮአዳሳማሮ። **39** ሃንሱን አቢላልቲ፤ ሄገር አዬሰን አታኒ ዶታዬን፤ ካለካለት ሄኢ አዬሳኖና አሮትርቲን። **40** እየሱን ጎአመን ዱባና ጎጎዶትሳሮ ሴራና ዎጋ ሀሌዎ።

15 ግዳና አቢላልቲ፤ እን እሰን ካላላበሮና ካአታቴታና አታቴን ካኮአልቲታን ካዎንጋላ ሃፋራ ሻድሲን ዶታራ። **2** እን ካላላበሮ ሃፋራ አታይሳይ ጎአባቲን፤ ሂካ ዎንጋላይ ፋይናታን፤ ጎርቱን ካአማንቲታን አዳያ። **3** እን ካአታዬሮና ዱባንኮ ካጉተ ካሌሮ እሰኑን ሮርሰራ፤ ቁሉክ ማጻፋል ጎጎአማሮ ክርሰቶሳ ጨቦካን ማራን ጎየ፤ **4** ቃማላመ፤ ቁሉክ ማጻፋሊ ጎጎጻፋመሮ ታሴድ አሪ ጎይኮ ኬ። **5** ኤሰኮ ካፋን ሙተ፤ ደቤና ኦፋራመራን ቶሞንኮ ላማን ሙተ። **6** ኤሰኮ አባባተረ ከን ቦሌኮ ጉንተ ኦሌራን አቢላሉን ዱባዉን ኮክ ሙተ፤ እሶኮና ኦዎጋን ኔፎን ግራን፤ ኮኮና አደን ጎዬራን። **7** ኤሰኮና ያይቆባን ሙተ፤ አባባተረና ኦፋራመራን ዱባን ሙተ፤ **8** ዳንበኔ አደ ሳልኤሳ ኣን ካቶታማሮ እና አደ ሙተ። **9** እን ኦፋራመራን ዱባኮ ካየራታሮያ፤ ካፋራመሮ እማሞ ኡማሞን ዱዶ ኢን ካዶትሶን አጣፋታ ካሌኖንያ፤ አላንቲና ምን ካዋ ሆሮረራ። **10** እየሱን ጎአመን እን ግዳ ታሌሮ ሌረ ካኮግራ ሰኖ ታዋይያ፤ እዬን ታሰሳንቲታ ሰኖ ኢል ካሊ ላኮሄሰቶ፤ ሱረዋ ዱባኮና ሮረ ፈሎ ሀርጋጨራ፤ እየሱን ጎአመን ሂካና ታየልተታ ኢነታ ታግቶ ሰኖ ታዋታ ኳሬ ላኮአንዮ። **11** ጎርታ እንና ሌረ እሶና ካአጋልሰሳና ሂካያ፤ እሰና ካአማንቲታን ሂካዋያ። **12** እየሱን ጎአመን ክርሰቶሳ ጎይኮ ጎጎኬሮ ካአጋልሰሳና ጎሌን እሰንኮ ኮኮ ጎይኮ ከያኖ ላግሮ ምሲ እማራ? **13** ካጎየራ ጎይኮ ካኬኖን ጎሌ፤ ክርሰቶሳ ጎይኮ ላኮኬሮ እማኖያ፤ **14** ክርሰቶሳ ጎይኮ ጎኬኖን ላላባኖካን ላኦ ካላይክያ፤ እማኖክሰና ካማድኖንያ። **15** አደ ዋ ክርሰቶሳ ጎይኮ ኬሰራ እምነ አጋልሰሳኖካን ዋ ጉት ካጣራ አቶጆል ሌንና

አማኖት፡ ጎርታ ካገየራ እባዶ ጎይኮ ካኬኖን ዋ ክርስቶስና ጎይኮ ላኮኬሰሮ
አማኖት፡ **16** ካገየራ እባዶ ጎይኮ ካኬኖን ጎሌ ክርስቶስና ጎይኮ ላኮኬሰሮ
አማኖት፡ **17** ክርስቶስ ጎይኮ ካኬኖንግሮ ጎሌ አማኖክሰን ካማድኖንያ፡ ግዳ
ጊን ጨቦክሰን ዎታ ግታን አማኖት፡ **18** ክርስቶስ አማኔንጉሬን ኦገየራና ባየራን
አማኖት፡ **19** ክርስቶስ አብድ ካኮንየላታና ሂካ አላምኮክ ግር ካላሉን ጎሌ
እባዶ ዱባኮ ሮርን እባዶ ዱባ ኦኮንኤይሳታሮና፡ **20** እየሱን ጎአመን ክርስቶስ
ካገየሮ እባዶ ዱባን ባርክ ሌ ኦግራን ጎይኮ ኬራ፡፡ **21** ጎይ ካኮኤመተራ
እባዶት ኮ አዳመኮት አላንቲ ጎላሌሮ ጎይኮ ከያኖና ኮኮኤመተራ እባዶት ኮ
ክርስቶስቶት አላንቲያ፡፡ **22** አዳመኮት አላንቲ እባዶ ዱባ ጎሳ ጎዋሮ ኡሱማለና
ክርስቶስቶት አላንቲ እባዶ ዱባ ኔፎ ሄላታራ፡፡ **23** ህክና ካኮልናራ መተ መተ
ጅግ ጅግኬሳያ፤ ክርስቶስ ጎይኮ ከያኖ ካሆራርጄ ማሱሳያ፤ አባባይረ ክርስቶስ
ታኮኤመታሮ ኦቴሳ ኦሌራን ጎይኮ ክናራ፡፡ **24** ደቤና ኡሱ ቃላዳና ኦዶናት ሁና
ዱባ ባሰረ ዋኖናት ዋ ኦዶዉን ካኮሼጣሮ ጎራታ አላምኮክ ጉዳታኖ ልናራ፡፡ **25**
ዋ ዲናጃል ዱባ ኦዶናትኬሳኮ ሄገሌ ኡሱን ታካይሮ ክርስቶስ ሬዲን ዶትሳራ፡፡
26 አዋዳምረ ካባይናራ ካጋቾ ዲና ጎይያ፡፡ **27** “ዋ ካአመን ዱባ ኦዶናትኬሳ
ሄገሊ ካየራ” ካአማራ ጸፋመራ፤ እየሱን ጎአመን “ካአመን ዱባ ኦዶናትኬሳ
ሄገሊ ካየራ” ጎአማሮ ካአመን ዱባ ክርስቶስ ኦዶናትኬሳ ሄገሊ ካካየሮ ዋ
ኦዶ ላኮአዳሮ፡፡ **28** ካአመን ዱባ ኦዶናት ካክርስቶስ ሄገሊ ካኮሌ ጎራታ፡፡
ዋ ኦዶ ዱባና ዱባ ጎሳሌሮ ኤረ መተኬሳ ካአመን ዱባ ኦዶናትኬሳኮ ሄገሌ
ኡሱን ካካየሮ ዋ ኦዶኮክ ኦዶናት ሄገሊ ግርናራ፡፡ **29** ጎርታ፡ ካገየራ እባዶ
ጎይኮ ካኬኖን ጎሌ፡ ካገየሮ እባዶን አመረ ካጣማቃመሮ እባዶን ዋረኤ መያ?
ካገየራ እባዶ ዱዶ ጎይኮ ካኬኖን ጎሌ፡ እባዶ ባንኤትሶይ ሙን ጣማቃማራ?
30 ኖና እንዴ ሳት ሳቲ ባይን እስኦታን ሮርሳነ ሰሳታ ካኮንግራና መዉንያ? **31**
አቢላልቲ! አርጌቶ ጎይ ኢን ኤሰላራ፤ ሂካና እስኦን ካኮንሰጋራ ጎታካን የሱሳ
ክርስቶስቶክ ምናን እሰን ጉት እን ካአባ ዲዳታኖ ካአዴሳመ ማንኮሌ ማራንያ፡፡
32 ያዳ ካአባዶ ማለ እን ታኤፈሶን ካታማይ ሱላለን ዎታ ሞአባታኖኮት ላኦት
መታ? ካገየራ ጎይኮ ካኬኖን ጎሌ፡ “ጌባር ማንኮጎይናኖ ማራን ኮዬን አምና፡፡
ጣምና” ጎሳአማመሮ ላኖያ፡፡ **33** አሮሶባንቴን፤ “ሳትንቴ ታሜላን ታኢዳንት
ያዳሊ ባሳታ፡፡” **34** ታኢዳቦቴ ዋዳናትሰን ቶሰ አባባዬን፤ ጨቦና አሮፈልቴን፤

እስን ኦሮ ኮኮ ዋ ካካሶን እባዶ ግራ። ሂካና እን ካኮንአማራ ጎሳውልታኑን
 እመረያ። 35 እየሱን ጎአመን፤ እባዶት ኮ፥ “ካጎየራ እባዶ ጎይኮ ካኮክያራ
 ምሲያ? ጎይኮ ከያ ግራን ካግርናራ ማር ምስክያ?” አም ካሆሳሮ ሌራ፤ 36
 እት ጎዋ! እት ካወጣታ ወጣ ጎጎኖን አላይ ብን ላኮዳንዳሮ። 37 እት ወጣታ
 ግራን ታዳርጋማ አል ጎርቱን ካካለ ካምኮት ትጫርት አል ቶ ታላል ወጣታ
 ኳሬ ዳንበኔ ካአላተሮ እካክልተ ላኮዮ። 38 እየሱን ጎአመን ዋ አደ ወጣን
 ጎጎዶቱ ማር ሰሳራ፤ መተመቱ ወጣን ካለካለክ ማር ሰሳራ። 39 ሶ ዱባ አማለ
 ኮ ላኮያን፤ ሶ ኦአባዶ ኮያን፤ ሶ ኦሱላለና ኦግድና ካለካለያን፤ ሶ ኦክምብር
 ካለያን፤ ሶ ኦኩኩኩቤ ካለያን። 40 ኡሱማለና ካዳሩረ ማር ግራ፤ ካኡሌ ማር
 ግራ፤ እየሱን ጎአመን ታዳሩረ ማርኮት ካባጃ አማለ ኮታ፤ ካኡሌ ማርኮት
 ካባጃ ምዲ ካለታ። 41 ካአሪቲ አፋ ምዲ ቶታ፤ ካድግኒ አፋ ምዲ ካለታ፤
 ታባራጃና አደ ካለታ፤ ባራጃ ኮ ባራጃ ካካለኮ አፋ ካለክ አባ። 42 ጎይኮ
 ካከያራ እባዶ ሂካ እን ላራ፤ ካሻማሮ ማር ሌ ካወጣመራ ካሻሞን አርዶክ ማር
 ሌ ከያራ። 43 የራን ካወጣመራ ካባጃ ክናራ፤ ሀርጋጫ ወጣማራ፤ ሁናይ
 ክናራ። 44 ካሶየ ማር ሌ ካወጣመራ ካእያና ማር ሌ ክናራ፤ ካሶየ ማር
 ጎግረ ካእያና ማር ግራ። 45 ሃንሱን፤ “ካሆራርጃ አዳመ አርዶክ መጣ ሌ”
 አማመ ጸፋመራ፤ ካዳንቤ አዳመ ክርስቶሳ አደ ግር ካሰሳሮ እያና ሌ። 46
 እየሱን ጎአመን ሆራርጃ ካኤመተረ አዳመ ካሶየየ ኳሬ ካእያና ላኮየ፤ ካእያና
 ሌ ካኤመተረ ካሶየኮ ዳንበኔየ። 47 ካሆራርጃ እባዶት አዳመ ካኮመጣመረ
 ኤሬኮ ማንኮሌ ማራን ካኤሬየ፤ ካላም እባዶት ካኤመተራ ዳሩርኮያ። 48 ኤሬኮ
 ካሌራ ኤሬኮ ካመጣሮ አዳመ እንያን፤ ዳሩርኮ ካሌራ አደ ዳሩርኮ ካኤመተሮ
 ክርስቶሳ እንያን። 49 ሀሱ ታኡሌ ምዲ እን ጎሳሌንኖ ታዳሩረ እባዶትኮት ምዲ
 እን ላና። 50 እየሱን ጎአመን አቢላልቴ፤ እን ካሰጋራ ሂካያ፤ “ሶና ኢግና ዋኖናት
 ካዋ ላኮኤላራን፤ ኡሱማለና ካባራ ማር ካንባኖን አርዶክ ማር ላኮኤላሮ።” 51
 ሂክማ፤ ሆል ቶ እን እስኩን ሰግናራ። ኖ ዱባና ላኮጎይናኖ፤ እየሱን ጎአመን ኖ
 ዱባና ኢግልሳምናና። 52 ካኮኢግልሳምናና ካጋቾ ማላካታ ካኮኡፋፋሮ ጎራታ
 ጉምባር ጢጲመረ ጎጎባናማሮ እን ኮይክያ። ማላካታ ኡፋፋምናራ፤ ካጎየራ
 እባዶና ካሻሞን ሊ ክናራ፤ ኖና ኢግልሳምናና። 53 ሂክ ካሻማራ ካሻሞን
 ካጎዋራና ካጎኖን ሳርሳይን ዶትሳራ። 54 ሂክ ካሻማራ ካሻሞን ካጎዋራና ካጎኖን

ካኮሳርሳር ጎራታ፡ “ጎይ አዋዳመ” አማመ ካጻፋመራ ሃፋራ ጉዳይናራ። 55

ኡሱማለና፡ “ዎ ጎይ! አዋድ ክያኖካ ሀጌ ግራ? ዎ ጎይ! እት አባዶ ካኮሚራታ

ሁና ሀጌ ግራ?” አማመራ። (Hadēs 986) 56 ጎይ ካኮኤጋራን ሁና ጨቦያ፤

ካጨቦ ሁናና ሴራያ። 57 እየሱን ጎአመን ጎታካን የሱሳ ክርስቶሳኮክ ጋራን

አዋዳኖ ኖን ካሰሳር ዋዉን ጋላታ ሀጌዎ። 58 ሃንሱን ካጌላንቲታን አቢላልቲ፡

አታዬን አላ፡ ማምሰክ እየሱና አሮሻላጋንተን፤ ፈሎ ኦዋዉን አርጌቶ ኦአታቲን

ላ፤ አላንትና ጎታዉን ካኮንዳፋራታን ካማድኖን ላናዋት ካሳንዋ።

16 ጎርታ ዋ ካአማናሮ አባዶን ካበያሮ ማራጋደ ታጋላትያ አዉራጃይ ካሞጋን

ምን ካኤቢን እን ካሰሰሮ አጃጃክ ማለ እስና ኡሱማሌ ፈላ። 2 እን ካኮኤሜየ

ጎራታ ማራጋደ ቤሳኖ ጎጎግኖንኮ አልማ አልማ አሪ ታዎጋ እስንኮ መተ መተ

ካሄላታሮኮ ጅልባከሳክ ማለ ቤሳታ ካለ ቤስ ሀካየ። 3 እን እስን ቶስ

ካኮኤሜታሮ ጎራታ እስን ኦአሳብቲታን አባዶጃ እስን ካቤሰታን ማራጋደ አትረ

አየሩሳለም ጎጎሴራዉን ታሱሱካኖ ዳብዳቤነታ እን እሶ ፋርናራ። 4 ሴቶት

ታዶትሳቶ ጎሌተ፡ እሶ እን ዎታ ሴይናራን። 5 መቀዶንያ ቶንሴ ሴይን ማንኮሄደሮ

ማራን ኤስነ ታኮሮራሮ ሉኪ እስን ቶስ ኤመይናራ። 6 ማንኮሴታሮ ማኤት ባንኤና

ሰሴታንቲዉን ካሌሮ ጋርጋርሳ እን ጎጎየልታኑን ዎዳሳ እስን ዶሌ ካአዳላሮ ሌራ፡

ዎዳሳ ባጤሳ እስኔ ዎታ ካሮርሳሮ ሌራ። 7 ግዳ ታኮሮራሮ ሉክ ሮራ ግራን

ድን ላኮዶታሮ፡ ፈኢ ታጎታ ጎሌተ ጎራታ ካኤር እስን ዶሌ አዳላይን አብድ

የላታራ። 8 እየሱን ጎአመን ካጼንጠቆስጠ ባላ ታ ጌሮ ታኤፈሶን ካታማይ

አዳላይናራ። 9 ፈሎ ኦዋጋን ካአባ ካባላእን ኡፋ ኢን ባናመራ፡ ኦኤባታራን

አደ ኦዋጋንያን። 10 ጢሞቶሳ እስን ቶስ ካኮኤሜተ ጎራታ አብስ ካሊ እስነታ

ጎጎሀማጽሮን የላ፤ ኡሱና እን እን ፈሎ ኦዋ ፈላራ። 11 ሃንሱን ማዮና ኡሱ

አሮቱፋኖ፤ ኡሱ አቢላልነ ዎታ እን ቶስ ጎጎኤሜሮ እን ማንኮሆሳየሮ ማራን እን

ቶስ ኖጎዳ አባባይ ጎጎኤሜሮ ሰሴታንቲሳዉን ካዶትሳሮ ጋርጋራ። 12 አብካን

አጲሎሳ አቢላል ታካለነ ዎታ እስን ጎጎዴሮ አታይስ ኤባየረ፤ ኡሱ ጎአመን ግዳ

እስን ቶስ ኤመይን ላኮዶታሮ፡ ኡሱን ጎኤካተ አድ ኤሜሮዋ። 13 ናባዳ፡ አማኖ

አታዬን አላ፡ ካአቲ አባዶ ላ፡ ጃባየን። 14 ካፈላታን ዱባ ጌላንጄ ፈላዬን። 15

አቢላልቲ፤ ካአሰጢፋኖሳ ካምነ አባዶ ኡል ካአካያይ ሆራርጀ ዋ ካአማነሮና

አማኒሉን ሀንዳይን እስኦትሶ ሮርሳተን ጎጎሰሳተራን ካሳንዋ። 16 ሂካማለክ

እባዶና እሱን ዎታ ፈሎይ ኦዳፋራራን ዱባን ጎጎአጃጃንታኑን አታይሰ ሻድሳራ።
17 እስጢፋኖስኔ ፈርዶናጢስኔ አካይቆስነ ኤሜቶትሶ እን ገገላይሰታ፥ እሰን እን
 ጎግርዋተና እሶ አደን ባንኤትሰኒ እን ካህንቃተሮ አማገራን። **18** እሶ አያና ካኬና
 አያና ካክሰና ፎልሲሴራን፥ ሃንሱን ሂካ ኣንክክ እባዶ አዴሰን ዶትሳራ። **19**
 ኡል ካእሰያይ ካግራ ካዋጋን ሞን ካኤብ ኖጎዳ እሰኑን ፋራሜራን። አቅላና
 ጲርሰቂላ፥ ምንክሶይ ካኩኩማራ ዋ ካእማናራ እባዶ ዱባ ዎዳናኮ መገ ካጎታይ
 ኖጎዳ ፋራማራን። **20** ህታኒ ኦግራን ዋ ኦእማናራን ዱባ ኖጎዳ ፋራማራን፥ ቁሉክ
 እሰእንጋታኖይ ኖጎዳ አታ። **21** አን ጳዉሎሳ ህታ ኖጎዳ እሲ ገነቴይ ጸፈራ። **22**
 ጎታ ካጌላኖን ጎግረ ካቃንጋመ ሀሌዎ! ጎታካን፥ ኮያ! **23** ጎታ የሱሳ ክርሰቶሳኮት
 ሰኖ እሰኔ ዎታ ሀሌቶ። **24** ጌላንጀት የሱሳ ክርሰቶሳይ እሰን ዱባን ዎታ ሀሌቶ፤
 ሀማኒዕ።

2 ቆሮንቶሳ

1 ፈኢ ታዋይ ካየሱሳ ክርስቶስ ካፋራመሮ ካሌሮ ጳውሎሳኮና አብካን ጢሞቶሳኮ፡ ታቆሮንቶሳ ካታማይ ካግሮ ምን ካዋና ኡሱማሌ ታእካያ አወራጃይ ካግሮ ዋ ካአማናሮ ጎሳ ዱባን፡ **2** ዋ አቦካንኮና፡ ጎታካን የሱሳ ክርስቶሳኮ ሰናና ኖጎዳ እስኩን ሀሌቶ፡ **3** ካሻጋ ኦዶና ጎጎእና ዱባ ካሰሳሮ ኡሱማሌ ጎታካን ካየሱሳ ክርስቶሳ ኦዶ ዋዉን ጋላታ ሀጌዎ፡ **4** ኖ እስኦታኩን ዋኮ ካእታነኖ ጎጎእና፡ ራኮይ ኦሮ ኦግራን ጎጎእስን ጎጎዳንዴኖን፡ ዋ ራኮታን ዱባ ኖ ጎጎኢሳራ፡ **5** ታክርስቶሳ ራኮ ኖ ግቲ ካጂናተቶ ግታክ ጎጎኢናካን ክርስቶሳኮክ ጋራን ኖን ጂናታራ፡ **6** ኖ ራኮ ጎእታኖ እስን አዴን ጎጎኢናና ፋይናና ሄላይናታ፤ ኖ ጎጎኢኖ አደ እስና ኖ ታእታታኖ ራኮ ኣንተት ኦብሲ እታይዴ፤ ጎጎኢናታን፡ **7** እስን ጉት ታእብና አብድ፡ ታእቲታ፡ ኣላንቲና ራኮታን ጎጎሄዴዳማታንክ ማለ ጎጎኢና ካንና ካሄዴዳምናታን ካንሶዋ፡ **8** አቢላልቲ! ኡል ካእስያይ ታኮግኔ ኖ ታጌተቶ ራኮ ጎጎኢዳሳኩን ዶታና፤ ኔሮ ግራኖኮክ ዱዶ አብድ ታኮጎሳኖ ጊን ሁናካንኮ ታርርተ ታእቲ ራኮ ኖ ጌተተ፡ **9** ኡሱማሊና ጎይን ካፍርዳምንኖ ኣን ሌ ኖን ማልሳመረ፡ ህክና ካኮንሌራ ካጎየሮ ካኬሳሮ ዋይ ጎጎኢብዳኖን ኳራ፡ እስኦታን ጎጎኢብዳኖንኮያ፡ **10** ኡሱ ሂካማሌት ታጎይ ዳኖኮ ሃሰራ፡ ፋይሰናራ፡ ሆረንባቱና ካፋይሰናሮ አብድታን ኡሱ ጉት ሉጉዳነና፡ **11** እስና ኡብክስኒ ኖ ጋርጋራ፡ ኦሞጋን ካኤባታራ ኤቢ ኖን ካሰሳመሮ አላቦ ካሞጋኑን አባዶ ኖ ማራን ዋ ጋላታራ፡ **12** ጎርታ ዳዳታኖካን ሂካያ፡ ሂካ አላም ካካለኮና እስን ዎታ ታእብኖ ኤሴላ፡ ዋኮ ታሌተ ቁሉማና ሩም ጎጎግርቶ ሳሙታን አቶታታ፡ ህክና ቃሩማ ታእባዶይ ሀሌኖን ግራን፡ ሰኖ ታዋይያ፡ **13** ናባብን ጎርቱን አዴስን እስን ካዳንዴኖን እየስ ላኮጻፍናኖ፡ ዱባና አዴሳኖክስን አብድ የላታራ፡ **14** እስን ኖይ ጎጎዳዳታንክ ማለ ኖና እስኒ ጎጎዳዳታኖን ግዳ እስን ካአዴሰታን ጋምሳ ጎሌና፡ ጎታ የሱሳ ታኮኤመይናሮ አሪ ዱባ አዴሰናታን፡ **15** ሂካ እየስ እን አዴሰ ማንኮግረ ማራን ላማ ጋል ላኦ ጎጎሄላታን አመረ ሆራርጀ እስን ድን ሄዳ ግረ፡ **16** እስን ድን ካኮሄደረና መቀዶንያ ቶስ ሴታ ግራና ሀሴኮ አባባታ ግራንየ፤ ሂካ ጋራይ ኡል ካይሁዳ ታሰሴይናሮ ሰሴታንቴይ ጋርጋርታንዋ አመ ሄደረ፡ **17** ሂካ ካኮሀልቼረ ጎራታ እን ካፈላሮ ሀአዴሶን ሀጋቶላ ካአዴሳሮ ኣን እስኩን ላራ? ሙ ሂካ ሀልቻኖኬይ ኮይክ “እና ላና” አማ ሀጋቶላ አዬሳ ቆፋ ታእባዶቲ

ካየለሮ እን ላራ? **18** ዋ ካአብዳመ ማንኮሌ ማራን ኖና እስኑን ካሰጋና “እ ጎርቱን ላ” ካአማሮ ሀጋቶላክ ሃፋራ ላኮዮ። **19** ኤነ ሰላሰኔ፤ ጢሞቶሳኔ ኤረ ካዋ የሱሳ ክርስቶሳ እስኑን ካላላቢነና እርጌቶ “እ” ካአማሮ ሃፋራ ካላሊ ኳሬ፤ “እ ጎርቱን ላ” ካአማሮ ሀጋቶላክ ሃፋራ ላኮዮ። **20** ዋ ኖን ታሰሰራ አብድ ዱባ “እ” አማኖ ካኮሄላማራ ክርስቶሳ፤ ሃንሱንያ ካባጃ ታዋውን “ሀሚኒዕ” ካኮንአማና። **21** ኖና እስኔ ዋታ ክርስቶሳ ጎጎዳባኖን ካየለራ ዋያ፤ ፈሎን ኖ ዋዩ ካየለራና ኡሱያ፤ **22** ኦቴሳ ላኖካን አቶ ካሌሮ ማታማ ኖ ጉት ካኬሮና ሆረንባን ኖን ታሰሰሮና ዱሩማ ዋዳናታን እያና ቁሉክ ቃብዶ እን የለ ኖን ካሰሰራ ኡሱያ። **23** እን ቆሮንቶሳ ቶሰ አባባይ ካኮንኤመኖን ኢሳገራ እስን ቁቃምሳናኮ እስኑን ነኔኤይሳታኖንያ፤ ሂካኑና ዋ አቶኬያ። **24** እስን አማኖክሰኒ ኦአታቴን ማንኮሊተን ማራን እስን ጎጎገቤላታኑን እስኔ ዋታ ራቶ ፈልናና ኳሬ አማኖክሰኒ ላኮአጃጅናኖ።

2 ጎርታ እስን ቁቃምሰን ማንኮዶቶን ማራን ካላም እስን ቶሰ ኤሜታናኮ ሙርቴሳዮ። **2** ማምሲና እን እስን ጎቁቃምሰ ኦቁቃምሰሮ እስን ኳሬ እን ካገቤላይሳራ እዮያ? **3** ሀሱማሌ እስኑን ካኮንጸፈራ እስን ቶሰ ካኮኤሜየ ጎራታ እን ገቤላይሰን ካዶትሳራ እባዶ እን ጎጎቁቃምሶንኮ አመረያ፤ ገቤሎ ኦት እስን ዱባኒዕ ገቤሎ ላኖ አብዳታራ። **4** ካአቲ ቁቃማኖና ዋዳናኮክ ያዳ፤ ታንጂን ኢልሚ ኦሮ ግራን ካኮንጸፈራ ኣሎ እስን ካጌላታሮ ላኖኬ ጎጎአዴሳኑን አመረያ ኳሬ እስን ቁቃምሰን ላኮዮ። **5** እባዶ ካቁቃምሰራ ማኖና ጎግረ ኡሱ ካቁቃምሰራ እን ካላል አንሌኖን ግራን ባስኬሳ ኤለአባኖ አሮሌኖ ኳሬ ራ ካካለኔ እስን ኦሮ ኦሞጋን ሚረኤራ። **6** ሂካ አንክክ እባዶን እስንኮ ካሞጋን ታሙርተሰራን ሙሮ ሌተታ። **7** ሃንሱን ሂክ እባዶት ኣሎ ቁቃማኖኮ ካከይ አብድ ጎጎ ጎሳኖንኮ እስን ኡሱን ሱረ ሻጋ ጎጎየልታኑና ኡሱ ጎጎ ጎጎኢሳኑን ዶትሳራ። **8** ኡሱማለና ኡሱ ኦጌላታን ላኖክሰን አድ ጎጎአዴሰሳኑን እን እስን ኤባታራ። **9** ሀሱ ሀንዳ እን እስኑን ካኮንጸፈራ ጫፋምዴን ካመን ዱባይ ኦአጃጃማታን ላኖክሰን አዴሰን አመረያ። **10** እስን ሻጋ ካኮንየላታን እባዶን አንና ሻጋ የልናራ፤ እን ኡሱን ሀሄሶ ካአምናራ ባሰ ጎግረ እን ክርስቶሳ ሆረ ሻጋ ካኮንየልናራ እስን ማራን አመረያ። **11** ሂካና እን ካኮንየለራ ኦጸላየ ኦሚጌ ፈሎ ማንኮካንሶ ማራን ጸላየ ኖ ጎጎሶቦንኮ አመረያ። **12** ሂካኮ እባባየረ ካክርስቶሳ ዋንጋላ አጋልሰሰን

ኡል ካጢሮአዳ ቶስ ካኮሴየረ ጎራታ ካባላኣን ካፈሎ ራ እን ባነረ። **13** እየሱን ጎእመን እን እቢኬ ቲቶ ማንኮደያናዋየ ማራን እያናክ ላኮፎልሳተረ፤ ሃንሱን ኤስ ኦግራን ዋ ካእማናሮ እባዶነ ዎታ ኖጎዳ ኣተረ ካመቀዶንያ ኡል ሴየ። **14** እየሱን ጎእመን ኖ እርጌቶ ክርስቶሳኮክ እዎዳናይ ኖ ሆረ ሀየ ካገገይሳሮና ታኢዳን ኡርት ታኡብቶ ሸቶ ኣን ጋራ ካክርስቶሳን ካእብኖ ማላባኖ ባንኤ ዱባ ጎጎጌግንሶ ካየላሮ ሄዶን ጋላታ ሀጌዎ! **15** ኖ ኦፋይናና ሌረ ኮባራን ኦሮ ታኢዳን ኡርት ካእቦ ኢጣና ኣን ክርስቶሳይ ዋውን ኦጋባላምነኖና። **16** ኖ ኦባይናራውን ጎይ ቶስ ታጌሳቶ ታጎይ ኡርትና፤ ኦፋይናራውን እንዴ ግር ታሰሳቶ ታግር ኡርትና፤ ሀያ፡ ሂካ ሀንዳውን ኤካተ ካግራ እየያ? **17** ኖ ሃፋራ ካዋ ካዶክ ሁ ለሌደ ካዳዳላሮ ካካለ ካዋጋን እባዶ ኣን ኦለሌዳኖ ላኮኖ፤ እየሱን ጎእመን ዋኮ ካፋራመሮ ሀንዳ ካገገሳሮ ካእዳንክ እባዶ ኣን ክርስቶሳይ ግርጉነ ዋይ ሆረ እዬሰናና።

3 ኖ እንዴ እስኦታኑን ጋላቲን ሀጋኡብና? ሙ ኮኮ እባዶ ጎጎየላሮ እን እስኩን ጎርቱን እስንኮ ታጋርጋራሳ ዳብዳቤ ኖን ካዶትሳሮ ሌወና? **2** እባዶ ዱባ ካካሳና ካናባባራ ዎዳናታን ኦጻፋንቴታን ታጋርጋራ ዳብዳቤታን እስንታን። **3** ሀንዳኖካን ኦኤማተታን እስን ካክርስቶሳ ሀንዳ ላኖ ካሙታሮያ። ሂክ ሀንዳ ካኮጻፋመራ እርዶክ ካዋ እያናይ ኳሬ ቃላምዪ ላኮኖ፤ ኡሱማለና ዎዳና ታእባዶ ጉት ካጻፋመሮ ጽላት ኳሬ ኤኤሞ ጉት ካጻፋመሮ ጽላት ላኮኖ። **4** ኖ ሂካና ካኮንእማና ክርስቶሳኮክ ጋራን ዋይ ጉት እማኖ ማንኮኡብኖ ማራንያ። **5** ፈሎኦታን ኖ ጎጎፈላኖን ኦኣቲ ካየላራ ዋያ ኳሬ ኖ እሲ እስኦታኑ ኮና ፈልን ኦኣቲ ላኮኖ። **6** እማቶ ኦኡሱቡን ኦሀንዳኖ ጎጎሌኖን ኦታን ካሰሰራ ኡሱያ፤ ሀክና ፍዳሌል ካጻፋመሮ ሴራይ እንሌኖን ግራን ቁሉክ እያናኮክ ጋርጋርሳይያ፤ ፍዳሌል ካጻፋመራ ሴራ ጎይ ኬናራ፤ እያና ቁሉክ እደ ግር ሰሳራ። **7** ሴራ ካኮጻፋመረ ካኤኤሞ ጽላት ፍዳሌልያ፤ ሴራ ካኮሰሳማረ ጎራታ ካግረ ኢፋ ባ ካሴተሮ ጎሌና ካእሰራኤል እባዶ በቤድ ታሙሴ ትቕሰ ድን ላኮዳንዴ፤ ጎርታ ጎይ ካኬነራ ሴራ ሂካማሌት ካባጃይ ጎሙተ። **8** ሀያ እያና ቁሉኮክ ጋራን ካሄላማራ ሀንዳኖ ሂታኮ ታሮርተ ካባጃ ላኮኣቦያ? **9** እባዶ ካኮቃንጋመራ ሀንዳ ህታ ግታት ካባጃ ካእቦ ጎሌ፤ እባዶ ካኮቁሎዋራ ሀንዳኖ እደ ሂታኮ ኦሎ ታሮርተ ካባጃ ሞሲ ግራናዋታ? **10** ታዳንቤ ካባጃ ኦሎ ታሮርተ ላኖኮ ካከይ ታሆሬ ካባጃ ቶና ታግኖን ኣን ቶታማታ። **11** ሀሱ ባ ካግረ እየስ ህታ

ግታት ካባጃ ካእቦ ጎሌ፤ ጅሩ ጅሮማን አታተ ካግራራ እየሰ ሞሲ ሂታኮ አሎ ታሮርተ ካባጃ ዋታራ! **12** ህታ አንትት አብድ ኖ ማንኮአብኖ ማራን ጃቡይ እዬሰናና። **13** ሙሴ ባ ታሰያቶ በቤድተሳክ ሀንቃ ታ ባሮኒ ካእሰራኤል እባዶ ኡሱ ጎጎዴኖንኮ በቤድቴሳ ጎልሳታ ግረ፤ ኖ እንዴ ኡሱ ኣን ላኮኖ። **14** ዋዳናትሶና ኦግራን ዶቶይተታ፤ ህታር ታ ገራኒ ኦሆርኮ አማቶ ጎናባብራን ዋዳናትሶ ኡሱ ሆጎግ ጎጎሆጎጋቴ ግታ። ህክና ካኮልናራ ሀሱ ሆጎግ ካኮትራምናራ ክርስቶሳ ካላሊ ማንኮሌ ማራንያ። **15** ህታር ጎሌና ዱዶ ሴራ ካሙሴኮክ ማጻፋ ታኮናባብና ቶቶይ ዋዳናትሶ ሆጎግ ሆጎግሳማታ። **16** እየሱን ጎእመን እባዶ ጎታ ቶስ ጎአባባሮ፡ “ሀሱ ሆጎግ ቃራምናራ።” **17** ጎታ አያናያ፤ ካጎታ አያና ማንኮግሮ ባልቹማ ግታ። **18** ኖ ዱባ ታሆጎግሳምን ግቶ በቤድ ሆረ እልጉነ ማስቶቲ ካሙታሮ ኣን ታጎታ ካባጃ ሀንቃይሳይናና፤ ኖ አያና ኦሌነና ታጎታ ሞዲ ኣን ሊን ካባጃኮ ካባጃ ቶስ ኢግልሳምናና።

4 ዋ ሻጋኬሳይ ሂካ ሀንዳኖ ኖን ማንኮሰሰሮ ማራን አብድ ላኮጎሳኖ። **2** ካጎላተሮና ካሙሊሰሮ ካሌሮ እየሰ ኖ እስኦታንኮ ኬንሰና፤ ሞጌይና ላኮፈልኖ፡ ሃፋራ ካዋና ላኮኢግልንሶ፤ ሀሱኮ ሩም ዱዳ ቤስ ቱሰናና፤ እስኦታን እባዶ ዱባኮት ሳሙ ዋይ ሆረ ዱዳ ቤስ ቱሰናና። **3** ኖ ካኢጋልሰንሰና ካዋንጋላ ሃፋራ ዋዳሳ ካጎላተሮ ጎሌና ካጎላተራና ኦባይናራውንያ። **4** ሂካ አላምኮክ ሞት ታሌተታ ጸላየ ዋ ካአማኖን እባዶኮት ዋዳና ዱድሰታ፤ ሂካኒና ሞዲ ታዋይ ካሙተሮ ካክርስቶሳ ካካባጃ ዋንጋላ ካሀንቃይሳሮ ኢፋ ጎጎዴኖንኮ የለ። (aiōn g165) **5** ኖ ካኢጋልሰሳና የሱሳ ክርስቶሳ ጎታ ላኖና ኖና እስኦታን የሱሳ ማራን ኖ እስኩን ኦሀንዳኖ ላኖይያ ኳሬ እስኦታንኮክ ጋራ ላኮላላባታኖ። **6** “እፋ ሙጉዲ ኦሮ ሀሃንቃየ!” አመ ካእዬሰራ ዋ ታክርስቶሳ ሞዲ ታሀንቃይሳቶ ካባጃ ታዋ ካኮኢዴንሶ ኢፋ ኖን ጎጎሰሰሮ ኢፋኬሳ ዋዳናታን ኦሮ ጎጎሀንቃይሮ የለ። **7** እየሱን ጎእመን ሂክ ዱባንኮ ካሮራራ ሁና ካዋያ ኳሬ ካካን ላናዋት ጎጎኢዳሳምሮ ሂክ ካባጃክ እየሰ ኤሬኮ ካመጣመሮ ሁ ሌነ አብነና። **8** ምናምናኮ ራኮ ኖ ጌተታ፤ ጎሌና ኖ ላኮአዋዳማኖ፤ ጎራታ ካሞጋን ኖ ግርድ አማና፤ እንዴ አብድ ላኮዋታኖ፤ **9** ዱናካን ኖ ሆሮራራ፤ ጎሌና ኖ ኦጌላታራን ዋኔ ላካንሶ፤ ባሳምን ኢያና፤ ጎሌነና ላኮጎዋኖ፤ **10** ግር ካየሱሳ ማርካን ኦሮ ጎጎሙትሮ የሱሳ ጉት ካጌሮ ጎይ ማርካን ጉት ኦርጌቶ ሰዳነ ሰሴታና። **11** ካየሱሳ ግር ካጎዋሮ ማርካን

ጎሳውትሮ ኖ አርድኒዕ የሱሳ ማራን አርጌቶ ጎይን ሮርን ሰሳማና። **12** ሃንሱን ጎይ ኖ ጉት ጎፈሎ ግር አደ እስን ጉት ፈላራ። **13** ሀሌዎ ኳሬ፥ “እን እማነራ ሃንሱን አይሰራ” እማመ ጎጎጸፋመሮ፥ ኖና ሀሱ ኮ ካእማኖ እያና ማንኮአብኖ ማራን አብዳታና፤ ሃንሱን ኖ አይሳና። **14** ጎታ የሱሳ ጎይኮ ካኬሳራ ሄዶ ኖና የሱሳን ዎታ ጎይኮ ካኬሰናሮና እስኔ ዎታ ኡሱ ሆረ ካእሊሰናሮ ካንሶዋ። **15** ህት ዱባ እስኩን ላኦ ታሌተታ ሰኖ ጫባጫባእንተ ካዋጋን አባዶን ካኮጌተቶኮክ ጅልባ ዋወን ካባጃ ካሌራ ጋላታ ጎጎጂናሮንያ። **16** ሃንሱን ኖ አብድ ላኮሳሳኖ፤ ማምሲና ካሳረ ማርካን ዱዶ ጎባየና ካኦሮ ማርካን አርጌቶ ኡሱባታራ። **17** ህት ታፋፋድና ግዳትቲዉን ታሌተቶ ራኮታን ሜሳ ካላይት ኣሎ ታኦቲ ታሌተቶ ጅሩ ጅሮማት ካባጃ ኖን ሄላምሳታ። (aiōnios g166) **18** ኖ ካኦራታና አሊ ካሙቶን እየሰ ኳሬ ኢልኦ ካሙታሮ ላኮኖ፤ ካሙታራ እየሰ ግዳትዉንያ፤ ካሙቶን እየሰ አደ ጅሩ ጅሮማክያ። (aiōnios g166)

5 ግር ታሌተታ ታኡሌ ዱንካኒ ጎዳርእንተና፥ ገነ ታእባዶቲ ካፈላዋን ግር እየሱን ጎአመን ዋኮ ካማዳራመራ አርድክ ምን ዳሩሪ ግራኖ ኖ ካንሶዋ። (aiōnios g166) **2** ኤሰ ታጌኖ አንዴ ካዳሩረ ማርካን ሳርሳይን እጸማና፥ **3** እየሱን ጎአመን ኡሱ ጎሳርሳነ ሀዉአይ ሊ ላኮሙትናኖ። **4** ህታ ዱንካኒ ታኮግኖ እስላታ ግራን እጸማና፥ ኣላንቲና ካጎዋራ ግሪ ጎጎኢግልሳምሮን ካዳሩረ ግርካን ሳርሳይን ኳሬ ቃራሚን ላኮዶታታኖ። **5** ሃንሱን ሂካ እየሱን ኖ ካኤካሰራ ዋያ፥ ኤመይን ካግሮን ዋቢ ጎጎሌሮን እያናኬሳ ቃብዶ የለረ ካሰሰራ ኡሱያ። **6** ኖ ኦጎዋራን ሶኦታን ታኮግኖ ግታክ ጎታኮ ፋክም ግራኖካን ጎአዴንሰና ሱረ አርጌቶ ኡሱ አብዳታና። **7** ኣላንቲና ኖ ካኮግና እማኖያ ኳሬ ድያኖ ላኮኖ። **8** ኖ ኦጎዋራን ሶኦታንኮ ካለቢጉነ ጎታነ ዎታ ግራኖ ካእሳባታኖ ላኖ አዴንሰነ አይሳና። **9** ሃንሱን ሶይ ጎግርካና ጎርቱን ጎጎነና ሀልቻካን ኡሱ ገጌላይሳኖያ። **10** ኖ ዱባና ካክርስቶሳ ካፍርዱ ባርጩማ ሆረ አልናና፥ መተመተ አባዶ ሶኦቴሳይ ኦፈለሮ ፈሎ ኦኢዳኑና ጎርቱን ፈሎ ኦሜላኑን ታዶትሳቶ ሙራ አታይናራ። **11** ጎርታ ዋ አብሳታኖ መ እማኖኖ ኖ ማንኮካንሶ ማራን፥ ኖ ካእይሳኖ አባዶ ጎጎአታሮን የልን እጸማና። አኖናትካን ዋ ሆረ ካሙታሮያ፤ አደና ሳሙትሰን ኦሮ ካአዴሳመያ አመረ አብድ የላታራ። **12** ህክና ካኮንአማራ እስኦታን እስን ሆረ አድ ጋላታዬን እንሌኖን ግራን፥ ኖዬን ጎጎጂዳታኑን ኢድሊ ሰሲንያ፤ ህክና ሳሬ

ካሙታሮን ኦዲዳታራን ኳሬ ዋዳናይ ኦሮ ካግሮ እየሰ ኦዲዳኖቹን አባብ ሰሰን ጎጎዳንዴታውንያ። **13** ቆላማ ጎሌነና ዋውን እምነነያ፤ ሳሙ ኦኦብኖ ጎሌነና እስኩን እምነነያ። **14** ክርስቶስ ኮይክ እባዶ ዱባውን ማንኩጎየሮ ማራን ዱባና ኦጎየራን ላኖ ማንኩእዳሰ ማራን ታክርስቶስ ጌላንጀ ፈሎን ኖ አብተ። **15** ኔፎን ኦግራን ካጎየሮና ጎይኮ ካኬሮውን ኳሬ ጎርታ እስኦትሶውን ጎጎግሮንኮ ክርስቶስ ዱባውን ጎየ። **16** ሃንሱን ሂታኮ ሆረንባን ማዮና ድያኖ ካሶዬቲ ላኮሄረግንሶ፤ ሂታኮ ሆረን ክርስቶስ ሂካማሌ ሄረግንሰነ፤ ሂታኮ ሆረንባን ሂካማሌ ላኮየልናኖ። **17** ሃንሱን ማዮና ክርስቶስ ጎግረ መጣ ታኡሱብያ፤ ካዶአንክ እየሰ ሮረራ፥ ሂክማ ካኡሱብክ ሌራ። **18** ሂክ ዱባ ዋኮያ፥ ኡሱና ጋራ ካክርስቶስን እስኦቲሳን ዋታ ዋጋርሰ፥ ካዋጋርሲ ሀንዳኖ ኖን ሰሰ፤ **19** ዋ አደ ክርስቶስይ ጎሳ ካአላም እስኦቲሳን ዋታ ዋጋርሳ ግረ ጨቦ ካእባዶ ላኮቶታረ፤ ኖን አደ ካዋጋርሲ ሃፋራ ሰሰ። **20** ሃንሱን ኖ ካክርስቶስ ሀንዳ ኦጌግሳኖና፤ ዋ ጋራካንነ ኡምት ኬናራ፤ ኖና ዋኔ ዋታ ዋጋራ እምነኔ መገ ካክርስቶስ ኤባታና። **21** ኖ ክርስቶስ ሌነኔ ቁሉማ ታዋ ኦሄላታኖ ጎጎሌኖ ጨቦ ካላይክ ክርስቶስ ጨቦካን ማራን ሮርሰ ሰሰ።

6 ዋኔ ዋታ ራቶ ኦፈላኖ ላኖካንክ ማለ እሰን ታአታቲታን ሰኖ ታዋ ላኦ ካላይክ ጎጎየሎንኮ ኖ እስኩን ሀዳራ እማና። **2** ዋ፡- “ልክኪ ጎራታይ እን ኩ ማለ! ታፋይና አሪ እን ኩ ጋርጋሬ!” ማንኩእማሮ ማራን፥ ሂክማ ካኤካተ ጎራታ ሂካያ፤ ታፋይና አሪ ግዳታ። **3** ሀንዳኖካን ጎጎቱፋሞንኮ ማዮና ሀንዱዱፎ ላኮሌኖ። **4** ሀሌዋ ኳሬ ኦፈላኖ ፈሎ ዱባ እስኦታን ዋውን ኦሀንዳኖ እን ሰሳታና፤ ኦብሰ ታሞጋን፥ ራኮይ፥ ቃራይ፥ ያዳይ፥ **5** ቦጫማኖይ፥ ሻማኖይ፥ ኦኮይ፥ ፈሎ ጂናኒ፥ ሁዱሮ ዋቲ፥ ኡአኖዬ፥ **6** ሙጭአማኖይ፥ ማላባኖይ፥ ኦብሲ፥ ኢዳነ፥ አያና ቁሉክ፥ ጌላንጀ ታሩምት፥ **7** ሃፋራ ካሩምቲ፥ ሁና ካዋይ፥ ገነ ታመርግይና ገነ ታበቲይ ቁሉክ ሁ ካጀረነ አባይኔ፥ **8** ካባጃዬና ጎርቱን የራን፥ ሶማሳማኖይና ሀባራማኖይ፥ ግርነና፥ እንዴ ኦሩሚ ሌነ ግራን ጣራሜሳ እማምነና። **9** ኦአዳሳምነ ሌነ ግራን ካአዳሳምነግሮ እን ሌነና፥ ጎዬራን አማ ግራን አደ ኔፎን ግና፥ ጎቦጫምነና ላኮጎነኖ፥ **10** ኖ ኦጋዳኖ ሌነ ግራን አርጌቶ ኦገጌላታኖና፤ ሀየሳ ሌነ ግራን ኦሞጋን ዱረሳ የላና፤ ኮና ካላይክ ሌነ ግራን ዱባና ካካንያ። **11** እሰን ካቆሮንቶስ እባዶ፥ ዱባ እስኩን አዳሰንሰ ሰግነና፤ ዋዳናታን ባላእሳን እስኩን ባናና። **12** ጌላንጀትሰን ኦትራቲታን እሰንታን ኳሬ ኖ ጌላንጀታን ላኮትራነኖ። **13** ይሰኬ

ማንኮሌተን ማራን ሂክ እን እሰን ሻድሳራ፤ እሰና ኖ ዋዳናታን ጎሳባናኖ ማለ ዋዳናትሰን ባላአሳዬን ባናዬን። **14** ዋ ካእማኖን እባዶን ዋታ ካዶትሶን ራድ አርቁራናንተን፤ ቁሉማ ማላን ዋታ መ ኤሴላ አብታ? እፋ ሙጉድን ዋታ መ ኤሴላ አባ? **15** ክርሰቶሳ ዱርሳን ዋታ መ ኤሴላ አባ? ካእማናራ ካእማኖን ዋታ መ ኤሴላ አባ? **16** ምን ካዋ ምን ካቶልቻ ዋታ መ ኤሴላ አባ? ኖ አርዶክ ቁሉክ ምን ካዋና፤ ዋ ሃ አመ አዬሰራ፤ “አሶን ዋታ ግርናራ፤ አሶ ኦሮ ሰሴይናራ፤ ዋክሶ ልናራ፤ እሶና ጎሳኬ ልናራ።” **17** “ሃንሱን እሶ ኦሮኮ ብያ እዬን ዋዩ ላ፤ አማራ ጎታ ባቲክ እየሰ አርድንቴን፤ “አንና እሶ አታይናራ፤ **18** እን ኦዶክሶ ልናራ፤ እሰና ባባርና ዴሌልና ይሰኬ ልናታን። አማራ ዱባ ካዳንዳራ ሄድ።”

7 ጎርታ እን ኦጌላታርኦቴ! ህት አብድ ዱባ ካኮንሰሳንተታ ኖዬን ማንኮሌ ማራን ሶና እያናና ካባቶይሳሮ እየሰ ዱባኮ እስኦታን ሙጭሳና፤ ዋ አብሳታኖይ ቁሉማታን ልኪት የልና። **2** ዋዳናኮ ኖ አታዬን፤ ኖ ማዮና ላኮቁቃምንሰኖ፤ ማዮና ላኮምርነኖ፤ ኖ ማዮና ላኮሶብነኖ። **3** ሂካና ካኮንአማራ እሰን ጉት ሙርቲሰን ላኮዮ። ሂታኮ ሆረን እን እሰኩን ጎሳሰገሮ እሰን ዋዳናታታን ኦሮ ግታን፤ ሃኩን ጎይና ግሪና እሰንኮ ላኮአሳባምና። **4** እሰኒ ጉት እን ካእባ አማኖ ካንጅንያ፤ እሰኒ ጉት እን ካእባ ዳዳታኖ ካንጂንክያ፤ እሰን ጉቲና እን ጎሳኒናራ፤ ራኮታን ዱባ አሎ ገጌላታራ። **5** መቀዶንያ ካኮጌንኔ ጎራታና ምና ታሞጋን ራኮ ኖ ጌተ ኳሬ ፎልሲ ቶና ላኮሄላነኖ፤ ሳሬ ኤንገ፤ ኦሮና አብሰ ኖን ግቲ። **6** እየሱን ጎአመን ኦየራተራን ካጎጎኢሳራ ሄዶ ኤመቶ ታቲቶ ኖ ጎጎኢሰራ። **7** ካኮ ጎጎኢነና ኤመቶቴሳ ታላል አንሌኖን ግራን እሰና ኡሱ ካጎጎኢሰታን ላኖ ማንኮማልናኖ ማራንያ። እን ካእብታን ሀልቻና ጋዳና ያደ ኖን ካኮሰጋረ ጎራታ አሎ እን ገጌላይሰ። **8** ሂታኮ ሆረን እን እሰኩን ካጻፈረ ሀንዳ እሰን ካቁቃምሰሮ ጎሌና አደ ሀንዳ ጻፋኖይ ላኮጋቢናሮ፤ ጎጋቢግረና ካኮንጋቤራ ሀንዳክና ጎራታ ክጫሩን እሰን ማንኮቁቃምሰ ማራንያ። **9** ግዳ ጎአመን እን ገጌላየራ፤ ካኮንገገላየራ አላንቲና እሰን ማንኮቁቃምሰ ማራን እንሌኖን ግራን ጋዳክሰንኮክ አላንቲ ጨቦኮ ጉላ ጋልተዳን ማንኮኢግልሳንቴን ማራንያ፤ ጎርታ ጋዳክሰን ፈኢ ታዋክ ማለ ማንኮሌ ማራን ኖ እሰን ኮና ላኮምርነኖ አማኖ። **10** ፈኢ ታዋክ ማለ ካኤመተራ ጋዳ ፋይና ቶሰ ካጌግሳሮ ጨቦኮ ጉላ ጋላኖ ካኮሄላማሮ ኢግልሰ ማንኮኬናሮ ማራን ጋቢ ላኮኬንሰሳሮ፤ ጋዳ ካአላም አደ ጎይ ኬናራ። **11** ሂክ ጋዳካክሰና

ፈኢ ታዋክ ማለ ግራኖ ምስክ እስጉኮ ካኮትራቶ አባብ ሰሳኖ፡ ምስክ ሳም
 ኢኦታኖ፡ ምስት አብሰቶ፡ ምስክ ሀልቻ፡ ምስክ ካእዳንክ ሀወኢሳታኖ፡
 ምስከሰ ሙሮ፡ ኬነሮ ዋዳና ኮካዬን ሻዳ፡ እሰን አዲ ካመን ዱባን ሃጃኮ ባልቻ
 ላኖክሰን እሰን አቶትሴታን፡፡ 12 ሃንሱን ማምሲና እን እሰኑን ጎጻፈ ኖን ካአብታን
 አታን ዋይ ሆረ እሰኑን ጎጎአዳሳምሮ አመረያ ኳሬ እን ባሰ ማንኮፈለሮና ጎርቱን
 አባዶ ካፈለሮ ባሱን አመረ ላኮ፡፡ 13 ጎጎኢና ካንኮና ቲቶ ሉሄላተሮ ገጌሎይ
 አሎ ገገላነና፤ ካኮንገገላነናና እሰን ዱባና ቲቶ ማንኮ ጎጎኢሴን ማራና አያናኬሳ
 ማንኮፎልሲሴን ማራንያ፡፡ 14 እን እሰን ጉት ዳዳታኖኬ ቲቶን ሰገረ፤ እሰና እን
 ላኮሙልሴን፤ አርጌቶ ሩም ሰጋ ግኔ፤ ህክና ካክሰን ጋራ ቲቶን ካሰግነኔ ዳዳታኖ
 ሩም ላኖ አዳሳመራ፡፡ 15 እሰን ዱባና እኦጃጃማቲና አብሲና አራኖ ጎጎቆጳቲታን
 ቲቶ ጎሻድሮ ኡሱ እሰኑን ታኦባ ጌላንጀ አሎ ታኦቲ ሌተታ፡፡ 16 እንና ራ ዱባይ እን
 እሰኒ አማናይን ማንኮዳንዴ ማራን አሎ እን ገጌላይሳራ፡፡

8 አቢላልቲ! መቀዶንያይ ካግሮ አባዶን ዋ ታሰሰሮ ሰኖ ጎጎአዳሳኑን ዶታራ፡፡ 2
 እሶ ራኮ ታሞጋን ጫፋመራን፤ ሀሌዎ ኳሬ ገገሎኦትሶ ኦንጂንዬን፤ አሎ ህየሳ
 ጎሌና ሰሳኖ ካንጂን ሰሴራን፡፡ 3 እሶ ካዳንዳራና ካዳዳሞን ሁናክሶኮ ካሮረ
 ፈኢትሶይ ካሰሴራን እን እሶን አቶትናራ፤ 4 እሶና ኡል ካይሁዳ ካግሮ ዋ
 ካአማናሮ ታኮጋርጋራናን ኢድሊ ጎጎትራሞንኮ አታይሰን ኖ ኤባተን፤ 5 እሶ
 ካፈሌራና ኖ ካኦራነኮ ካሮረያ፤ ሆራርጀ እሰኦትሶ ዋወን ሰሳተራን፤ ደቤና ፈኢ
 ታዋት እሰኦትሶ ኖን ሰሳተራን፡፡ 6 ሂናኦ ፈሎ ጣየ ካሀጋአበራ ቲቶ ማንኮሌ
 ማራን ግዳና ሂናኦ ኦሰሳኖ ፈሎኦትሰን ታ ጉዳራኒ ኡሱዋ ኤባነና፡፡ 7 እሰን
 አማኖ፤ አዬሲ፤ ማላባኖይ፤ አታኒ፤ ኖና ታአብታን ጌላንጀ ካመን ዱባ ሮራታን፤
 ሂናኦ ኦሰሳኖ ፈሎይ ካሮርቱን ላ፡፡ 8 እን ሂካ ካኮንአማራ እሰን አጃጃ ላኮ፡፡
 አየሱን ጎአመን ካካለ ካሰሳሮን ዎታ እሰን ዎታ ኤካ የላ ጌላንጀትሰን ታሩም
 ላኖ አዳሰን አመረያ፤ 9 እሰን ጎታካን የሱሳ ክርሰቶሳኮት ሰኖ ካሳንዋ፤ ኡሱ
 ማምሲ ዱረሳ ጎሌና ህየሳ ላኖካኬሳ እሰን ዱረሳ ጎጎሌታወን ኡሱ እሰኑን
 አመረ ህየሳ ሌ፡፡ 10 ህታ ሃጃይ እሰኑን ካእዳን ሌ ኢን ካሙተሮ ጎርሳ እን
 እሰኑን ሰሰናራ፤ ጌሲ ካሮረሮ ሰሰን ካላል እንሌኖን ግራን ሂካ ፈልን ሆራርጀ
 ኦዶተቲን እሰንቲን፡፡ 11 ሃንሱን ሰሳኖኮክ ካጌላንጃ ያዳ ፈሎ ጉት ሀይረ
 ጎጎጉዳሮ ካአብታን ጀልባ ሀሱ ካሻዴታን ግዳ ሰሳ፡፡ 12 ሰሰን ታኢዳን ፈኢ

ጎግቴ እባዶኮክ ሰሳኖ አታማኖ ካኮሄላታራ ካእቦ ጅልባ ጎሰሰሮያ ኳሬ ካግኖን ጎሰሰሮ ላኮኖ። 13 ሂካና እን ካኮንአማራ እስን ዱባ ኤካ ጎሰሌታኑን ኳሬ እስን ሰሳኖ ራካታ ግራን ካካለ ጎሰፎልሳሮ እመረ ላኮኖ። 14 እስን ካኮራካቴን ጎራታ ኡራዎኦትሶ ራኮትሰኑን ጎሰሀይራውን ግዳ ኡራዎኦትሰን ራኮትሶውን ሀሃዬን፤ ሂካ ጋራይ እስን ዱባ ኤካ ላታን። 15 ሀክና፡ “ካሞጋን ካኩኩይሳተውን ላኮፋላየ፡ ኡጫር ካኩኩይሳተሬና ላኮሀንቃተ፡” እማመ ጎሰጸፋመሮያ። 16 እን እስኑን ጎሰሻዳሮ ቲቶና እስኑን ዎዳናኮ ጎሰሻድሮ ካየለራ ሄዶ ሀጋላታሞ። 17 ቲቶ እስን ቶሰ ካኮኤማታራ ፈኢቴሳ ገጌሎይ ኬጉረያ ኳሬ ኖ ማንኮኤባኒ ካላሉን ላኮኖ። 18 ዎንጋላኮክ ላላባኖይ ካሞጋን ሞን ካዋ ዱባይ ካጋላታመሮ እቢ ቲቶን ዎታ ፋርናና። 19 ሂካኮና ካሮረ ሂክ እቢ ኖ ሂናኦ ኦኢዳኒዕ ፈሎ ታጎታ ካባጃውን ኖ ፈላ ግራና ሀንዳይን ሀሴ ታኢዳንት ፈኢ ጎቱንሶ ኖኔ ዎታ ሴታ ፈሎኦታን ዎታ ጎሰፈሎን ካሞጋን ሞን ካዋኮ ካእሳባመሮያ። 20 ሂካ ጌላንጃ ካሰሳመሮ ማራጋይ ኦዶናቲ ባሪሳ ግራን ቱፍ ቶና ኖ ጎሰጌኖንኮ እስኦራታና። 21 ኦላንቲና ሀልቻካን ጎታ ሆረ ካላሊ እንሌኖን ግራን እባዶ ሆረና ካእዳንክ ካሌሮ እየሰ ፈላኖያ። 22 እደና ካንጂን ካሞጋን ራኔ ጫፋመረ ካእቲ ሌ ካሙተሮ አብካን ቲቶንሰ ዎታ ካኮፋርናና ሀታ ኦላንቲያ፤ ኡሱ እስን ጉት ካእባ እማኖ ካእቲ ማንኮሌ ማራን ግዳ ሂናኦ ፈሎይ ጋርጋርን ኡሱ ካእባ አታን ማጎሬና ካሮረያ። 23 ቲቶ አዳሰን ጎዶትሰ እስን ጋርጋርን እን ዎታ ካፈላሮ ካፈሎ ሳትኬያ፡ ኡሱን ዎታ ኦኤማይናራን እቢላልኮክ ጋራ ጎሌ እሶ ካሞጋን ሞን ካዋይ ኦካመራን ካባጃ ታክርሰቶሳ ኦኤሌራንያን። 24 ሃኑን ጌላንጀታትሰን እሶን ቱሳ፡ ሂካ ራድ ጌላንጀታንና ኖ እስን ጉት ካእብና ዳዳታኖ ላኦ ካላይት ላናዋት ዋ ካእማናሮ እባዶ ዱባን ቱሰናታን።

9 ይሁዳ ካግሮ እባዶን ካበያሮ ማራጋዴን እን እስኑን ጸፊን ላኮዶትሳሮ። 2 “ካእካያ እባዶ ጌሰ ካሮረሮኮ ሀጋእበረ ጋርጋርን ኤካሳቴን ግራን” እመረ እባዶ ካመቀዶንያ ዶሌ እስኒ ካኮንዳዳታረ አታንክሰን ማንኮካሶ ማራንየ፡ አታንክሰን ካካለና ከኬሰራ። 3 ጎርታ ሂካ እየሰ እስን ጉት ኖን ካእብኖ ዳዳታኖ ላኦ ካልክ ሊ ጎሰሄሶንኮ ሀታ እቢላል ፋርናራ፡ እስና ልክ ሂታኮ ሆረን እን ጎሰአመሬ ኤካሳየን ኦራ። 4 እደና ካመቀዶንያ እባዶ እን ዎታ እስን ቶሰ ኤመይረ ሀኤካሳኖን ግራኖ ጎዴን ኖ እስኒ ኦዳዳታን ሙልናና፡ እስን አዴን ኦሎ ሙልናታን። 5 ሃኑን ሰሰን

ካእድናቲታን ካታብቲታን ካጌላንጃ እላቦጀል ጣይ ጎጎኤካሳውን ጎጎሻድሰራኑን እመረ ህት እቢላል እንኮ ጣይ እሰን ቶስ ጎጎሴናውን የላኖ ካዶትሳሮ ሌ ኢን ሙተራ፡ ሂካማሌ እን ካኮኤማየ ጎራታ ጌላንጃ ካሰሰናታን እላቦክሰን ካኤካተ ላራ፡ እሰና ካሰሳታን ሁና እሌኖን ግራን ፈኢትሰኒ ላኖ ቱሳራ። **6** “ወጣ ኡጫር ካወጣተ ኡጫር ኩኩይሳታራ፡ ወጣ ኦንጂን ካወጣተ ኦንጂን ኩኩይሳታራ” ካእማሮ እየሰ ሻዳ። **7** ሃንሱን ዋ ካጌላታራ ገጌሎይ ካሰሳሮ እባዶ ማንኮሌ ማራን መተመቱ ሰሰን ካዶተሮ ዋዳናቴሳ ፈኢ ገጌሎይ ሀሰሶ ኳሬ ሰሱ ሙ ኢሳጉ እማ ሁና አሮሰሶ። **8** እርጌቶ ካእመን ዱባን እሰኦትሰን ዳንዳዴን ፈሎ ኦኢዳኒ ጎጎሀይሳታኑን ዋ ኡሶኬሳ ጂናሰ እሰኩን ሰሰን ዳንዳራ። **9** ህክና፡ “ሀየሳሉን አዱ ጌላንጃ ሰሰ፤ ቁሉማቴሳና ጅሩ ጅሮማን ግራታ” እማመ ጎጎጻፋመሮያ። (aiōn g165) **10** ካወጣታሮን ወጣ፡ ኣምን ባቦ ካሰሳራ ዋ ሄዶ ካወጣታን ወጣ ኡሶይሰ እሰኩን ሰሰሮዋ፤ ሰሳኖክሰንኮት ኢል እሰኩን ሞጋሰ ጂናሰሮዋ። **11** ሰሳኖክሰን ጋራካንን ካኮንገያራ እባዶ ዱባ ዋ ጎጎጋላትሮን እርጌቶ ጎጎሰሳኩን ዋ ካእመን ዱባይ ሀዱሩምሶ። **12** ሂክ እሰን ካሰሳታን ሰሳኖኮክ ሀንዳ ታእማኒል ራኮ ትራኖ ካላል እንሌኖን ግራን እባዶ ዋውን ጋላታ ካሞጋን ጎጎሰሰሮን የልሰሳራ። **13** ሂክ ሰሳኖክሰንኮክ ሀንዳ እሰን ካክርሰቶሳ ዋንጋላ አታቴዴን ኦኡብዳማታን ላኖክሰና እሶና ኦካለቱን ሰሳኖክሰን ካቱሳሮ ማንኮሌ ማራን ዱባና ዋ ጋላታራን። **14** እሶና ዋ እሰኩን ካሰሰሮ ታሮርተ ኣላንቲ ማንኮጌላታሮ ማራን እሶ እሰኩን ኤባራንዋ። **15** ህኢ ታእባዶቲ ሰጋሚን ካዳንዳምን እላቦኬሳን ዋ ካጋላታመ ሀሌዎ።

10 እን ጳውሎሳ፡ እሰን ሆረ ግራንቲ ዱሳክ እማመረ፤ እሰንኮ ፋክ ካኮእምሮ ጎራታ አደ እሰን ጉት ጃቡ ካቱሳታሮ እማመ፤ ታክርሰቶሳ አሽከናቲና ኢዳነይ እን እሰን ኤባታራ። **2** እን እሰንኮ ካኤባታሮ እሰን ቶስ ካኮኤማየ ጎራታ ጃቡይ ጎጎእዬሰሮ ጎጎየሎንኮያ፤ ሶኮክ ሀልቻ ካሰሴታኖ እን የለረ ኖ ካሄዳሮ እባዶ ኮኮ ሆረ አደ ጃቡይ አዬሰን እን ዶታራ። **3** ማምሲ አላም ኦሮ ጎግርንና ካሻፋይናና ጀሬን ካአላም ላኮኖ። **4** ሁ ካጀሬነክሶክ ቂቀ ዲጊን ካዳንደይሰሮ ካዳሩረ ሁና ኦኡባንያን ኳሬ አላምኮክ ሁ ካጀረነ ላኮኖ። **5** ዋ አዳሳኖ ጉት ሀንዱዱፎ ሌረን ኦክያራን ዶጋማኖና ባራር እዬሳኖክሶ ባሰናና፤ ቆፋ ታእባዶ ዱባ ቦጅነነ ክርሰቶሳን ጎጎእጃጃምሮን የላና። **6** አጃጃማኖክሰን ካአዳሳመ

ጎሌ ካለጀጀሞን ማምሰክና ሙርሰን ኦኤካኔ ልናና። 7 እሰን ካደያታን ሳሬ ካሙታሮ እየሰ ካላልያ፤ ማዮና እን ካክርሰቶሳያ እም እስጎእብዳተ ካላም ሀቆፌ፤ ኖና ኡሱ እን ኦክርሰቶሳ ላኖ ሀእዴሰ። 8 ጎታ ኖየን ካሰሰሮ ኦዶናትኮክ ጋራይ እን ኣሎ ጎዳዳየና ላኮሙልሮ፤ ሂክ ኦዶናት ኖን ካኮሰሳሙራ እሰን ጣቢሰንያ ኳሬ ዳርእን ላኮዮ። 9 ሀንዳልኬይ እሰን ካእብሰሳሮ እን ኦሮሌኖ። 10 ዋዳሳ፡ ኮኮ እባዶ፡ “ካፓወሎሳ ሀንዳል ካእቲና ካእሰልያ፤ ኡሱ ሙተኬሳይ ኖኡነ ዋታ ጎግሮ አደ ላፋክያ፤ አዬሰኬሳና ካቱፋመያ” ካእምራን ሌራ። 11 ሂካ ካእማራ እባዶ ኖ ኤባ ግራን ሀንዳካን ካኮንጸፍንና ኤነ እሰኔ ዋታ ሌኔ ታኮፈላኖ ኖ ኦሮ ኮና ኣሳብንጀ ግራናዋት ሀእዴሰን። 12 ሀሌዋ ኳሬ እስኦትሶ ካጋላታታሮ እባዶን ዋታ እስኦታን ለዳዩን ጎርቱን ኤካ የላዩን ላኮጀባኖ፤ እሶ አደን እስኦትሶ እስኦትሶን ዋታ ሄረግሳኖይና እስኦትሶና እስኦትሶ ዋታ ለላምሳታኖይ ዋዳናመ ላኮያን። 13 ኖ አንዴ እሰን ቶንሳ ታ ጌኖን ዋ ኦሰሰሮ ፈሎ ኦሮ ዳዳታና ኳሬ ጀልባኮ ሮርን ኦዳዳታኖ ላኮኖ። 14 እሰና ካኮግታን ፈሎኦታንኮክ ሜሳ ኦሮ ማንኮሌ ማራን ካክርሰቶሳ ዋንጋላ አጋልሰሰን እሰን ቶሰ ካኮኤመነኔ ጎራታ ኡሱ ሜሳኮ ላኮሮርን። 15 ሃንሱን ዋ ኖን ካኤካሰሮ ሜሳኮ ሮርን ፈሎ ኦካለቲ አላኮ ሮርን ላኮዳዳታኖ፤ ሀሱኮ እማኖካን ጎጎጂናሮና ፈሎኦታንና ዋ ኖን ካኤካሰሮ ሜሳ እሰን ኦሮ ኣሎ ጎጎባልእሮ አብድ የላታና። 16 ጎርታ ካካለ እባዶኮኒዕ ፈሎ ኦሮ ታብን ጣየ ኦፈላማራን ፈሎይ አንዳዳኖን ግራን እሰንኮ ቶላን ካግሮ ኡሊ ዋንጋላ ላላብን ዳንዳና። 17 እየሱን ጎእመን፡ “ካዳዳታራ ጎታይ ሀዳዳቶ።” 18 እባዶ ጋላታምን ካኮዳንዳራ ጎታ ጎጋላትሮ ኳሬ እስኦቲሳ እሲ ጎጋላታሮ ላኮዮ።

11 ትጫርት ጎወማቴ ካእብሰናታን ላኖ እን አብድ የላታራ ማጋኔ ኦብሳ። 2 ሙመት ዴለልትቲ ቶ ቁሉማትሴይ ኤንተር ኮዉን ጎጎኤራማቶ አንና እሰን ክርሰቶሳን ማንኮኤርሰሮ ማራን እሰን ሀኡሳታኖ ካእያና ሀኡሳታራ። 3 ሀበሳ ሄዋን ምጌቲሳይ ጎጎሶበሮ ዋዳሳ ቆፋትሰና ጋራባይደ ክርሰቶሳን ታኡብታን ታኢዳንትና ሙጭ ካእመ ቁሉክ አብዳማኖ ኢሳንዋ አመረ አብሳታራ። 4 ኣላንቲና እባዶት ኮ እሰን ቶሰ ኤሜይጉረ ኖ ካላላብነኖ አሌኖን ግራን ካካለ የሱሳ ጎላላበ ጎርቱን እሰን ካእታቲታን እያና አሌኖን ግራን ካካለ እያና ጎእታቲን፤ ጎርቱን ካእታቲታን ዋንጋላ አሌኖን ግራን ካካለ ዋንጋላ ጎእታቲን፤ ጫልኢ እንቲን ድያታን አማኖያ። 5 አን አደ “ኦፋራመራን ኦጅንጅንኮ” ማመሱና ካየራታሮ

እን ኢን ላኮላሮ። 6 እየሱን ካበቤ ጎላናዋየና ማላባኖ አደ አቦዋ፤ ሂካ ዱባና ራ
 ካሞጋን አዴሰሰ አጋልሰንሰና። 7 እሰን ጦቂ ጎጎአንታውን እሰኦተ የራሳየረ
 ዋንጋላ ካዋ ዳዋዛ ካላይ እሰኦን ላላባኖ ኢን ጨቦ እን ቶታሙና? 8 እን እሰኦን
 ሀንዳይን እመረ ካካለ ካሞጋን ምን ካኤብ ጋርጋርሳ እሶኮ አታየራ፤ ህክና እሶ
 ሳማኖ እን ሄዳሚን ዳንዳራ። 9 እን እሰን ዋታ ግራን ራኮ እን ካኮጌተተ ጎራታ
 ታመቀደንያ አወራጃኮ ታኤመተታ አበላል ኢን ካዶትሳሮ ማንኮሰሴን ማራን
 ማዮና ሰዳን ላኮላሮ፤ እሰን ጉት እየሰ ኮና ሰዳን ላናኮ እሰኦራየራ፤ ሆረንባና
 እሰኦራይናራ። 10 ታክርሰቶሳ ሩም እን ኦሮ ታኮግቶ ግታክ ታአካያ አወራጃይ
 ሂካ አጋልሰሰኬ ማዮና ትርን ላኮዳንዳሮ። 11 ሂካ ካኮናኣማራና መወንያ?
 እን እሰን ማንኮጌላኖን ማራንያ? ጌላታኖኬ ዋ ካሶዋ። 12 ኖኔ ዋታ ኤካ ሊን
 ፈሎኦትሶይ ካኮዳታና ኣላንቲ ትርን ግዳ ካፈላሮ ሆረንባቱና ፈልናራ። 13 ሂካ
 ኣንክክ አባዶ ክርሰቶሳኮ ኦፋራመራን እን ሊን እሰኦትሶ ኦኢግልሳታራን፤ ኦጣራ
 ኦፋራመራና ሶባንጄ ኦፈላራንያን። 14 ህክና ካሳድሰሮ እየሰ ላኮዮ ኣላንቲና
 ዳላዬና መተኬይ ካኢፋ ኤርግቻ እን ሊን እሰኦትሶ ኢኢግልሳታ። 15 ጎርታ
 ኡሱን ኦሀንዳራን ቁሉማን ኦሀንዳራን እን ሊን ኢኦትሶ ጎኢግልሳተን ካማምሰሮ
 ላኮዮ፤ ጋቾትሶ ፈሎኦትሶ እን ልናታ። 16 አደ ሂካና አማራ፤ ማዮና እን ጎዋ
 እን አርቶትኖ፤ እሰና ኡሱማሌ እን ካቶታታን ጎሌ እንና ኡጫር ጎጎዳዳሮን እን
 ጎዋ እን ቶታ። 17 ሂካማሌ ዋዳና ቶክ ሌ እን ካኮንአዬሰራ ጎዋ እን ኳሬ ፈኢ
 ታጎታክ ማለ ላኮዮ። 18 ኦሞጋን ካኤሌ እየሰ ማንኮዳታና ማራን እንና አደ
 ዳዳታራ። 19 እሰና ቃሮሌ ማንኮሌተን ማራን ጎዋሌ ገጌሎይ ኦብሰናታን። 20
 ማዮና ኪጉረ እሰን ድይ ጎየለ ጎባራባረ ላኦቲሳን አምረ እሰን ቶሰ ጎጋባላመ፤
 ጎሀንጡርሳተ በቤድትሰን ባላባንጃ ጎባሰ ኦብሰናታን። 21 ኖ እንዴ ሀሱን ኣሎ
 ላፋኒሶ ላኖካን እን ሙላ አዬሳራ። ማዮና ጃቡይ ካኮዳታሮ እየሰ እንና ጃቡይ
 ዳዳይን ካዳንዳሮ ላኖ ጎዋ እን አዬሳራ። 22 እሶና አብራዊልያን? እንና ሃያ፤
 እሶ እሰራኤልያን? እንና ሃያ፤ ሳኒ ታአብራመያን? እንና ሃያ። 23 ክርሰቶሳን
 ኦሀንዳታንታን? እንና ካቆላመ አባዶ እን አዬሰናራ፤ እን እሶኮ ሮራራ፤ አደና ጎራታ
 ካንጂን ፈሎይ ሀረራ፤ ጎራታ ካንጂን ሻመራ፤ ጎራታ ካንጂና ቦጫመራ፤ ጎራታ
 ካንጂን ጎይን ጋባላመራ። 24 አይሁድ ጦርቃየ ሶንዶምኮ ሳጋሊ ከን ጋለን
 እን ቦጨራን። 25 ሴድ ጋለ ዱላይ ኡዱላመራ፤ ኮይ ኤኤሞ ኤጋመራ፤ ሴድ

ጋልተ ዳኖ ታማራካፋ እን ጌተታ፤ ሄመን ቶና አሪ ቶ በከ ኦሮ ባሬራ፤ **26** ጎራታ ካሞጋን ሰስታን ካፋፈራ፤ አደና ላጋ አማጋማኖት ዳኖይ፤ ሽታኮት ዳኖይ፤ አይሁድኮት ዳኖይ፤ ታኦይዛብ ዳኖይ፤ ታካታማ ዳኖይ፤ ታቃማ ዳኖይ፤ ታበከ ዳኖይ፤ ኡሱማለና ታጣራ አቢላልኮት ዳኖይ ሮረ ሰሳመረ። **27** ታንጂን እጻመራ፤ ታንጂን ሀረራ፤ ጎራታ ካሞጋን ሁዱሮ ዋየራ፤ ኡኤራ፤ ሱጉባየራ፤ ጎራታ ካሞጋን ባቦን ሀኤሰሎን አዳላየራ፤ አምባልና ሀዉአይ ላኖ እን ጌራ። **28** ካካለ እየሰ ዱባ ሀቶትኖን ግራን አርጌቶ እን ካያድሳራ ካሞጋን ምን ካኤብኮት ቆፋታ። **29** ላፋክ አዮያ? አንና ዎታ ላኮሀረሮያ? ጨቦ ካህንዱዱፋታራ አዮያ? አንና ላኮአማራታሮያ? **30** ዳዳይን ጎዶትሰ ላፋማቴ ካቱሳሮ አዬሲ ዳዳይናራ። **31** ጅሩ ጅሮማን ካጋላታመራ ጎታ የሱሳ ክርስቶሳኮክ ሄዶና ኦዶ እን ካሶቦን ላኖ ካሶዋ። (aiōn g165) **32** እን ታደማስቆ ካታማይ ታኮግረ ዋኖ አርሰጦስዮስ ሄገሊ ካግረ ዋት እን አብሰሲን ዶተረ ካደማስቆ አባዶኮት ካታማ ዎታዳራሊ ኦርሰሳ ግረ። **33** እየሱን ጎአመን ታግምቤ ማስኮትነ ዳቾይ ካኮዳግሳሬን ጎራታ ገነቴሳኮ ፋላዳዮ።

12 ማምሲና ዳዳታኖ ላኦ ጎዋታንተና፤ ዳዳታኖ ጎዶትሰ ጎታኮ ካአታዬሮ ራጋና ሙቴኑን ዳዳይናራ። **2** ጌሲ ቶሞንኮ አፋርኮ ሆረን ዳሩሪ ታሴድ ታ ጌሮን ካአታመሮ አባዶት ኮ ክርስቶሳ ካሶዋ፤ ካአታመራና ሶነ ዎታ ሌረ ሶ ካሊ ሌረ እን ላካሶ፤ ዋ አደ ካሶዋ። **3** ሂክ እባዶት ሶነ ዎታ ሌረ ሶ ካሊ ሌረ እን ላካሶ፤ ዋ አደ ካሶዋ፤ **4** ኡሱ ጋናተ ቶስ አታማኖ፤ ሃፋራ ካአባዶይ ሙቲና አባዶ አዬሰን ካዳንዴኖን እየሰ ማለ። **5** ሂካ ኣንክክ እባዶትን ዳዳታራ፤ እስኦቴዉን አደ ላፋማቴዉን ኳሬ ላኮዳዳታሮ። **6** ሀያ፤ እን ሩም ማንኮአዬሳሮ ማራን ዳዳይን ጎዶትሰ ጎዋ ላኮልናሮ፤ እየሱን ጎአመን ማዮና እን ጉት ካደያሮኮና እንኮ ካማላሮ ሄዳኖኮ ካሮረ ጎሳሰሳሞኮ አመረ ዳዳታናኮ እስ ቁሳታራ። **7** ሂካ እን ካሙተሮ እየሰ ካጂንኮ ካከይ ጎሳኮርኖኮ ሶኦቴ ኤኤን ኣን ካኤግራ አቦሳ እን ሰሳመ። **8** ሂክ እን ካአቦሰሳራ እየሰ እንኮ ጎሳቡይሮ ጎታ ሴድ ጋለ ኤባዮ። **9** እየሱን ጎአመን ኡሱ “ሁናክ ካአዳሳመ ሊ ካኮሙትናራ ላፋማታይ ማንኮሌ ማራን ሰኖት ኩን ሌተታ” አመ፤ ሃንሱን ሁና ካክርስቶሳ እዬ ጉት ጎሳሌሮ ማመኮና ሮርሳየ ላፋማቴይ ገጌላታ ዳዳታራ። **10** ሁና እን ካኮሄላታራ ላፋ ካኮላሮ ጎራታ ማንኮሌ ማራን ክርስቶሳ ማራን ጎሀሮ፤ ጎሀባራምሮ፤

ጎራካሮ፣ ጎሆሮራምሮ፣ ጎያድሮ እን ገጌላይሳራ። **11** ጎዋ እን አዬሰ! ሀያ፣ ሃ ጎጎአዬሰሮ ካየልቲታን እስንታን፤ እን ጋላቲን ኦዶትሳተን እስንቴን፤ እን እዮናትክ ካአዴሳዋን እባዶት ጎሌና አደ ካጂንጂ ኦአማማራን ኦፋራማራንኮ ማመሰና እን ላኮየራታሮ። **12** እን ካሩም ካፋራመሮ ላኖ ካአጋልሰሳራ እየሰ እን እስን ኦሮ ግራን ኦብሲ ኦፈላሬንያን፤ ህክንሳ ማላታልና ካሳድሰሮ እየሰ ባሳጆልያን። **13** እስኩን ጉት ሰዳነ ሀሌኖን ሄሳኖ ኳሬ ካካለ ካሞጋን ምን ካዋይ ካካለኮ እስን እን ካኮየራሰራ መይያ? ህክና ባሰ እን ጎቶታመ ሻጋ የላ። **14** እስኪ ቶሰ ኤመይን ጎኤካሳየኮ ሂክ ካሴድያ፤ እን ሰዳነ እስኩን ሊን ላኮዶታሮ፤ እን ካዶታራ እስን ኳሬ ማራጋደክሰን ላኮዮ። ይሰክሰኩን ዱሩማ ኩኩይሳይን ካዶትሳራ ኦኡሙለራንያን ኳሬ ይሰ ኦኡሙለራውን ላኮኩኩይሳሮ። **15** እን አደ እስን ማራን ማራጋደኬ እስኩቴና ሮርሳይ ጎሰሳየ ኣሎ እን ገጌላታራ፤ ሀያ፣ እን ሂካማሌ ኣሎ እስን ገጌላሮ እስን እን ካኮጌላታን ሂካማሌ አባራንቲያ? **16** ሀሌዎ ኳሬ እን እስኩን ሰዳነ ላኮሌሮ፤ እየሰን ጎአመን እን እስን ምጌይና ሶባኖይ ካአበሮ እን ላራ። **17** እን እስኩን ካፋረሮ አባዶኮ ኮይና እን ላኦ ቤራ? **18** ቲቶ እስን ቶሰ ጎጎአማሮን እን ኤባየራ፤ ሀሱ ኦብካን ኡሱነ ዎታ ፋረራ፤ ሀያ፣ ቲቶ እሶ ላኦ ቤረ? እንና ኡሱና እስኩን ካሀንዳይነ አያና ኮይ ላኮየያ? ሰሴታንታን ቶ ላኮተያ? **19** እስን ዱባና ግዳግን ካቆፓታን ኖ እስን ሆረ እስኩን እስኩን ካትራታኖ እን የልቲዳንያ? ኖ ክርስቶሳይ ሌነኔ ካአዬሳና ዋይ ሆሬያ፤ እን ኦጌላታሮኦቲ! ኖ ሂካ ካኮንአዬሳና እስን ዳቢሰን አምነነያ። **20** እን ሀሴራ ካኮአማየ ጎራታ ዎዳሳ እስን ሊን ካዶትሳሮ እን ሀሌኖን ግራን፣ እንና እስን ጎጎዶታታን እን ሀሌኖን ግራን ካኤሰልኖ ሌወና አመረ አብሳታራ፤ ኡሱማሌ እስን ዶሌ ኤንገ፣ ቃናተ፣ ኢኦ፣ እስ ጌላታኖ፣ መገ ካአባዶ ባሳኖ፣ ህማታኖ፣ ኮራኖና ሻላጎ ግሮዋ አመረ አብሳታራ። **21** አባባይ እስን ቶሰ ጎኤማየ ሄዶክ ዎዳሳ እስን ሆረ እን የራሰሮዋ አመረ አብሳታራ፤ ሂታኮ ሆረን ካሞጋን ጨቦ ፈለረ፤ ሂካ ካፈሌራን ባትናት፣ ሻርሙጡማ፣ ላኦ ግራኖ፣ ጉላ ጋሎን ካግሮ አባዶ ጋዳ ኢሮዋ አመረ እን አብሳታራ።

13 ጎርታ እን እስን ቶሰ አሮአማየኮ ሂክ አዬን ካሴድያ፣ “ማጎሬና እየሰ ዱባ ካኮአዴሳማራ አቶ ላማይ ጎርቱን አቶ ሴድያ።” **2** ካላም ደያኖኬይ እስኬ ዎታ ታኮግረ ሴርሳኖይ አዬሰረ፤ ግዳና አደ ኤባ ግራን ሂታኮ ሆረን ጨቦ ኦፈለራና

ካካለና ሴርሳ አዩሰናራ፤ ግዳ እስን ቶስ አባባየ ካኮኤማታሮ ጎራታ ማዮና
 ላኮነኤይሳይናሮ፤ **3** እስን አዬ ኦሮ ባሬጉረ ካእዬሳራ ክርሰቶሳ ላኖ አዳሰን
 ዶታታን፤ እስን ዶሌ ካሙታራ ካኬሳ ሁናያ ኳሬ ሀራኖኬሳ ላኮዮ። **4** ኡሱ
 ማሰቃሊ ጉት ሱዋመራ ካጎየራ ሀራኖ ጎሌና ግዳ ሁና ካዋይ ኔፎን ግርናራ፤
 ኖና ኡሱነ ዋታ ላፋኒዕ ሌነና፤ እስኔ ዋታ ታክብኖ ኤሴላ አንዴ ኡሱነ ዋታ ሁና
 ካዋይ ግርናና። **5** አማኖክሰኒ ኦኦታቲታን ላኖ አዳሰን አሰኦትሰን ቆቆራዬን፤
 አሰኦትሰን ጫፋዬን የሱሳ ክርሰቶሳ እስን ኦሮ ግራኖ ላኮአዳሰታንያ? ጎርቱን
 ጫፍቲ ኢቲታን አማኖያ። **6** ኖ ጫፍቲ ኢያናዋትካን ካአዳሰናታን አብድ የላታና።
7 አየሰ ካማላን እስን ጎጎፈሎንኮ ኖ ዋ ቶስ ኤባይናና፤ ካኮነኤባይናና ማምሲና
 ኖ አንዴ ኦአዳሳምነ ሊ ሀሙቶን ጎሄንሰ እስን አርጌቶ ካአዳንክ ካሌሮ አየሰ
 ጎጎፈልታኑን ኳሬ አታንካን ቱሳይን ላኮዮ። **8** ኖ ሩም ማራን ፈላና ኳሬ ሩምኮ
 ካለካለ አየሰ ኮና ላኮፈልናኖ። **9** ኖ ላፋኒዕ ሌነ ግራን እስን አዳን ኦኦቲ
 ጎሌታን ኖ ገጌላታና፤ ኤብካካን እስን ልክኒዕ ጎጎሌታኑንያ። **10** ሂካ ሀንዳ እን
 እስንኮ ፋክመ ግራን እን እስኑን ካኮንጻፈራ ህታ አላንቲያ፤ ሂካማሌ እን እስን
 ቶስ ካኮኤማታሮ ጎራታ ጎታና ኢን ካሰሰሮ ኦዶናቲ እን እስን ላኮያድሰናሮ፤
 ጎታ ኦዶናት ኢን ካኮንሰሰራ እስን ዳብሰንያ ኳሬ እስን ዳርኢን ላኮዮ። **11**
 ጎርታ አቢላልቱ ኖጎዳ ግራ! ግርክሰን ኤካሳየን፤ ጎርሳኬይ ግራ፤ እስእስኦሮ
 እስኦታ፤ ኖጎድዳ ግራ፤ ካጌላንጄና ካኖጎዳ ሄዶ እስን ዋታ ሊናራ። **12** ቁሉክ
 እስእንጋታኖይ እስእስ አንጋታ ኖጎዳ አታ። **13** ዋ ካአማናራ እባዶ ዱባ ኖጎዳ
 እስኑን ፋራማራ። **14** ታጎታ ታየሱሳ ክርሰቶሳ ሰኖ፤ ጌላንጀ ታዋ፤ አያና ቁሉኮክ
 ራቶናት እስን ዱባነ ዋታ ሀሌዋ።

ጋላትያ

1 እባዶኮ ጎርቱን ጋራ ካለባዶነ ካፋራመሮ እንሌኖን ግራን የሱሳ ክርስቶሳና ጎይኮ ካኬሰሮ ዋ ኦዶይ ካፋራመሮ እን ጸዉሎሳኩ። **2** እን ዋታ ታግቶ አባላል ዱባኮ ጋላትያ ካግሮ ዋ ታእማናቶ አቢላል ዱባን። **3** ኣቦካን ዋኮ፡ ጎታ የሱሳ ክርስቶሳኮ ሰኖና ኖጎዳ እስኩን ሀሌተ። **4** ዋ ሄዶ ካንና ኣቦካንት ፈኢ፡ ሂካ ካሜላን አላምኮ ኖ ሃሰን ጨቦካን ማራን እስኦቲሳ ሰሳተ። (aiōn g165) **5** ጅሩ ጅሮማኮ ታ ጅሩ ጅሮማ ጌሮን ዋዉን ካባጃ ሀሌቶ! ሀሚኒዕ። (aiōn g165) **6** ታክርስቶሳ ሰኖ እሰን ካኡመሮ ዋ ሄዶ ኢስዴነ፡ ካካለ ዋንጋላ ቶስ ሂካማሌ ጃርቱን አባባታኖክሰን እን ሳድሳራ። **7** ሩም ማለ ጎሌ ካካለ ዋንጋላ ላግሮ። እሰን ካሶሶይሳራና ካክርስቶሳ ዋንጋላ ዋጫጨን ካዶታራ ኮኮ እባዶ ግራ። **8** እየሱን ጎአመን ኖ ጎሌነና ጎርቱን ካዳሩረ ኤርግቻ ኖ ካላላብነኖ ዋንጋላኮ ካካለ ዋንጋላ እስኩን ካላላበ ኡሱ ጅሩ ጅሮማን ካቃንጋመ ሀሌዎ። **9** ጣይነ ኖ ጎጎእምነኖ ግዳና አደ እን አማራ፡ ማዮና ካእታቲታንኮ ካካለ ካለክ ዋንጋላ ካላላበ ኡሱ ጅሩ ጅሮማን ካቃንጋመ ሀሌዎ። **10** ግዳ እን ካእዳንክ አማሚን ካዶትሳራ እባዶ ዶሌያ ሙ ዋ ዶሌያ? ሙ እባዶ ገጌላይሰን ዶታታራ? እባዶ ገጌላይሰን ካዶታታሮ ሌዋ ክርስቶሳን ካሀንዳሮ ላኮላረ። **11** እቢላልቲ፡ እን እስኩን ካላላበራ ዋንጋላ እባዶ ካመጠሮ ልዋት ጎጎእዴሳዉን ዶታራ። **12** ማምስክ እባዶኮና ላኮእታየሮ፤ ማዮኮና ላኮእጋልሳየሮ፤ ሂካና የሱሳ ክርስቶሳኮ አታየራ ካቲሰራና ኡሱያ። **13** እን ጣየ ካእይሁድ አማኖይ ምስምሲ ግረ፡ ዋ ካእማናሮ እባዶ ምሲ ኣሎ ሆሮራረ ባሰን ምስምሲ ዶተረ ማልቲታን። **14** ካእይሁድ አማኖ ኦራታኖይ ጌስኬይ ሀርያቲ ሌ ካግረ ካሞጋን እይሁድ ዱባኮ ሮራረ፤ ዋጋ ካእዶላልና ኣሎ ሀዉኢሳታ ግረ። **15** እየሱን ጎአመን፤ ኣየቲት ገዴምኮ ሀጋአበረ ካእሳበራ ሰኖቲሳ ካኡመራ ዋ፡ **16** እይዛብ ጠኤ ጋራኬሳ ጎጎላላብሮን ዋ ኤረኬሳ ኢን ቱሰን ካኮዶተረ ጎራታ፤ ማምስክ እባዶን ዋታና ላኮማካረሮ። **17** እንኮ ሆረነ ኦፋራመራን ኦሌረን ቶስ ታኢየሩሳለም ካታማይ ኦግራን ዋታ ኤሰልን ላኮቤረ፤ እየሱን ጎአመን ጎርስዋ ኡል ካእራብ ቶስ ሴየ፤ አደና ደማስቆ ቶስ አባባየ። **18** ኤሰኮና ጌስ ሰድኮ አባባተረ ጴጢሮሳን ዋታ ኤሰል እዬሰን ታኢየሩሳለም ካታማ ቶስ ሴየ፤ ኡሱ ዋታና አሪ ቶሞንኮ ኬን አዳላየ። **19** እየሱን ጎአመን ካጎታ የሱሳ አቢ ያይቆባ ኳሬ፤ ኦፋራሜራንኮ ማዮና

ላኮዴ። 20 እስኩን እን ካጸፋሮ እየሰ ዋ ሆረ ጣራ አዬሰዋት አዳሰሰ ሰጋራ።
 21 ኤስኮ አባባየረ፤ ኡል ካሶርያ ቶንሳ ካክልቅያ ቶስ ሴዮ። 22 ክርስቶሳይ
 ካአማናረ አይሁድኮክ ምን ካኤብ እባዶ ካሞጋን እን ዴ ላኮካሶ። 23 እሶ
 ጎአመን፤ “ጣየ ኖ ሆሮራ ካግረ አባዶት፤ ሂታኮ ሆረን ባሰን ዶታ ካግረ አማኖ
 ግዳ ላላባ ግራ” ታአማቶ ኦዱ ታላል ማለን ግረን፤ 24 አላንቲቴይ ዋ ጋላታረ።

2 ጌስ ቶሞንኮ አፋርኮ አባባየረ፤ እን ካላም እየሩሳለም ካታማ ቶስ ቤ፡ ኡሱ
 ጎራታ ባርናባሰ እን ዋታ ግረ፤ ቲቶና እን ዋታ አተ ሴዬረ። 2 እን ካኮሴየራ ዋ
 ጎጎቱስክ ማሌያ፤ ሂታኮ ሆረን ካፈለሮና ሌረ ግዳ ካፈላራ አዳክ ሊ ጎጎሄሶንኮ
 አመረ አይዛብን ካላላባሮ ዋንጋላ ኦጂንጂን ኦሌራን ሆረሃዬን ኦፈላራውን
 እን መተኬውን እሶ አዳሰሰራ። 3 እነታ ካግረ ቲቶ ካግርክ እባዶ ጎሌና
 ጎጎሀማጽሳምሮን እን ኡሱ ጉት ላኮሁኖመ። 4 ሂክ እየሰ ካኮንኬራ ቶቶ
 ታጣራ አቢላል ክርስቶሳ የሱሳ ኖ ታሄላነኖ ባልቹማ ባሰ እት ድዩማ ቶስ
 አባብን ሁሉቄን ታቤን። 5 ሂካ እባዶን ኮኪና ዱዶ ላኮአምናምነኖ፤ ሃንሱን
 ህክና ታዋንጋላ ሩም እስኔ ዋታ አታይ ጎጎግርቶንያ። 6 ሆረሃየ ካገጌሳሮ እን
 ሌ ካሙታሮ አባዶኮክ አዮናቲን እን ላኮጢባሮ፤ ዋ በቤድ ታአባዶ ዴጉረ
 ላኮፍርዳሮ፤ ሂክ እባዶና ሀንዳኬውን ካአደራ እየሰ ላግሮ። 7 እየሱን ጎአመን
 ጴጢሮሳ አይሁድን ዋንጋላ ጎጎላላብሮን ሀዳራ ኡሱን ጎጎሰሳንተቶክ ማሌና
 አይዛብን ዋንጋላ ጎጎላላብሮን ሀዳራ ሰሳማኖ አዳሰን፤ 8 ጴጢሮሳ አይሁድን
 ካፋራመሮ ሊ ጎጎሀንዳይሮን ካየለራ ዋ ሄዶ፤ እና አይዛብን ካፋራመሮ ሊ
 ጎጎሀንዳይሮ እን የለራ። 9 መተ ሌን ኦሙታራን ያይቆባ፤ ጴጢሮሳና ያንሳ
 ኢን ታሰሳንተቶ ሰኖ ካኮአዳሳሬን ጎራታ፤ እና ባርናባሰ ጋርጋርን ህኢ ቶ ሌን
 ኬን፤ ኤስኮና ኖ አይዛብ ቶሰ፤ እሶ አደን አይሁድ ቶስ ሴይን ህኢ ቶ ሌን። 10
 አታይሰን ሀዳራ ካአመራን ህየሳ ጋርጋራኖ ጎጎኢሶንኮ ካላልያ፤ እንና ሂካዋ
 ፈልን ሀልቻ አባናየ። 11 ጴጢሮሳ እንጽክያ ቶስ ካኮኤማተረ ጎራታ፤ አዳሳመ
 ሸርመ ማንኮግረ ማራን ኡሱ ሆረ ሀድሰ። 12 ኮኮ እባዶ ያይቆባ ካፋረራ
 ኡል ካእንጽክያኮ ኤማታኖኮ ሆረን፤ አይዛብን ዋታ አማ ግረ፤ እሶ ካኮኤመቴን
 ጎራታ አደ ታሀማጽሳንተቶ ኡና አብሳተረ አይዛብኮ እስኦቴሳ ካለ የላተረ
 ሃርጋላኖ ሀጋአበ፤ 13 ኮኮ ታአይሁድ ኡና ካሌረ ዋ ካአማናራ እባዶና ካጸትሮሳ
 ኢፍሳዳናት ኡሱን ዋታ ሌ፤ ባርናባሰና ሀሄሶን ኢፍሳዳናትክሶይ ታበ ግረ።

14 ሆነዳኛክሶ ታዋንጋላ ሩም ኣን ልዋት ካኮአዴሰ ጎራታ፡ ኣን ኣንጽክያይ ዋ ካእማናሮ እባዶ ዱባ ሆረ ጴጢሮሳን ሃ እመ፤ “ኣት እይሁድ ላ ግራን፡ ሴራ ካእይዛብ ኳሪ ሴራ ካእይሁድ ላኮግራቶ፤ ሀያ እይዛብ ሴራ ካእይሁዲ ጎንሰሴራውን ምሲ እሶ ሁኖማታ? **15** “ኖ እላታኑን እይሁድ ኳሪ፡ ‘ጨባለይ ኣሌራን እይዛብ ኣን ላኮኖ፡’ **16** እባዶ የሱሳ ክርስቶሳ እማናኖይ ቁሎዋራ ኳሪ፡ ሴራ ካሙሴ ኦራታኖይ ቁሎይዋት ካንሶዋ፡ ሃንሱን ሴራ ካሙሴ ኦራታኖይ ሀሌኖን፡ ክርስቶሳ እማናኖይ ጎንቁሎይኖ ኖና ኣንዴ የሱሳ ክርስቶሳ እማና፤ ሴራ ካሙሴ ኦራታኖይ ማኖና ዋ ሆረ ላኮቁሎዋሮ፡ **17** “ክርስቶሳ እማኒልን ቁሎዴን ጎዶታኖን፡ ኖ እስኦታኒ ጨባለሳ ሌን ሙታና፤ ሀያ ክርስቶሳ ጨቦ ጎንባልኦሮን የላራ? እጂ ላኮየላሮ! **18** ኣን ካዲገሮ ካሴራ ዋጋ እባብ ካፈላሮ ጎሌ፡ ኣን ሙተኬውንዋ ሴራ ካባሳሮ ላኖ ኣዴሰሳራ፡ **19** ዋውን ግርን፡ ጋራ ካሴራን ጎየ ካእሳባመሮ ኣን ሴራኮ ካለቤራ፡ **20** ኣን ክርስቶሳን ዋታ ካሱዋመሮክ ማለ ጎየራ፡ ጎርታ ኣን እስኦቲውን ላኮግርናሮ፤ እየሱን ጎእመን ክርስቶሳ ኣን ኦሮ ግርናራ፡ ግዳና ሶይ ካግርናራ ግር ኣን ካጌላተሮና ኣን ማራን እስኦቲሳ ሮርሳተ ካስሳተሮ ኤረ ካዋ ጉት ካእቦ እማኖና፡ **21** ኣን ሰኖ ታዋ ላኮየራሰናሮ፤ ቁሎማ ጋራ ካሴራን ታሄላማቶ ጎሌተ፡ ክርስቶሳ ኣዱ ካማድኖቱን ጎየ እማኖያ!”

3 እስን ኦቫዶን ኡል ካጋላትያ እባዶ! እየሱን ጎእመን እየያ እስን ካጎያተ? የሱሳ ክርስቶሳ ካሶዋመ ማለ ሆረትሰን ኣዴሳመ ምስሊ ኣን ሙታ ግረ፡ **2** ኣን እስን ዶለኮ እየሰ ኮ ካላል ኣዴሰን ዶታራ፤ እያና ካእታቴታን ሴራ ካሙሴ ኦራታኖያ ሙ ዋንጋላ ካላላባመሮ እማናኖይያ? **3** ሂካማሌ እስን ኦቫዶንታን? እያና ሀጋኣብተዴን ቆፋ ታእባዶይ ጉድሰን ዶታታን? **4** ዋንጋላ ማራን ታእታቴታን ራኮ ኦግራን ታማድኖን ጎሌተ፡ ህታ ግታት ራኮ ካእታታታን ኣዴያ? **5** ዋ እያናኬሳ ካኮሰሰራ፡ እስን ኦሮ ባሳ ካፈላራ ሴራ ካሙሴ ማንኮኦራተውንያ ሙ ካማልተን ማንኮእማናቴውንያ? **6** ኣላ ኣብራመ ሄዳ፤ “ኡሱ ዋ እማነ፤ ቁሉክ ሌ ቶታመ፡” **7** ጎርታ ሂኒዕ ኦእማናራን ይሰ ካእብራሀመ ላኖ ኣዴሳ፡ **8** ዋ እይዛብ የሱሳ እማናኖ ካቁሎይሰናሮ ቁሉክ ማጻፋ ጣየ ዴጉረ፡ “እይዛብ ዱባ ኩዬ ሶማሳምናራ” እማ ዋንጋላ ጣየ ኣብራመን ኣዴሰሰ፡ **9** ሃንሱን ዋ ካእማናራ እባዶ ዱባ ዋ ካእማኔሮ ኣብራመን ዋታ ካሶማሳመያ፡ **10** ሴራ ካሙሴ ኦራታኖ ኣእብዳታራን ዱባ ቃንጎ ኦሮ ግራን፤ ኣላንቲና “ካሴራ ማጻፋ ካሙሴ ካጻፋመሮ

ዱባ ካፈሎን ካቃነጋመያ” አማመ ጻፋመራ። **11** “ቁሉክ አማኖ ኔፎ ግራራ” ማንከአማመሮን፤ ማዮና ዋ ሆረ ሴራ ቁሎይዋት ካእዳሳመያ። **12** ሴራ አማኖ ጉት ካኡኩማመሮ ላኮዮ፤ እየሱን ጎአመን፡ “እባዶ ሴራ ግርን ካዳንዳራ አጃጃ ካሴራ ዱባ ጎጉድሰሮያ” አማመ ጻፋመራ። **13** “ጋ ጉት ካሱዋማራ ዱባ ካቃነጋመያ” አማመ ማንከጻፋመሮ ማራን፤ ክርስቶሳ ኖ ማራን ካቃነጋመ ሌረ ካሴራ ቃንጎኮና ዋዶ ሌ ቤሰራ። **14** አብራመን እስሳሜራን ሶማ፤ ጋራ የሱሳ ክርስቶሳን እይዛብን ጎጎጌራውና ዋዶ ሌ ቤሰራ፤ ህክና ዋ ሰሳራ ካአመሮ እያና ቁሉክ አማኖ ጎጎአታኖንያ። **15** አቢላልቲ፤ ካእር እሪ ካእባዶ ግሪ ካእዳሳመሮ ማሱሳ የል እን እስኩን ሰጊሮ፤ ኦእባዶ አማቶ ኮይክ ጎአባቲን አባባይ ማዮና እግልሰን ጎርቱን ኡሱ ጉት አድን ካዳንዳሞንክ ማለ፤ ህታ ሃጃይ ጎሌና ኡሱማሌዋያ። **16** ካአብዱ ሃፋራ ካሰጋመራ አብራመና ሳኒቴሳውንየ፤ ቁሉክ ማጻፋ፤ እባዶ ካዋጋኑን ጎጎሰጋማሮን፤ “ሳኒቴሳን” ላኮአማሮ፤ እየሱን ጎአመን እባዶ ኮውን ጎጎሰጋማሮ፤ “ሳንታውን” አማራ፤ ኡሱና ክርስቶሳያ። **17** ጎርታ እን ካአመራ ሂካያ፤ ጌስ እፋር ቦለና ሶንዶምኮ ሃር አባባተረ ካሰሳመራ ሴራ፤ ጣየ ዋይ ኦአታቴራን አማቶ ባሰረ ካአብዱ ሃፋራ ላኮእግልሳሮ። **18** ርቲ ኤላኖ ሴራይ ለግረዋ፤ ካአብዱ ሃፋራ ላኮሄላማረ፤ ዋ አደ ሰኖቴሳ ካአብዱ ሃፋራን ዋታ አብራመን ሰሰራ። **19** ሀያ ሴራ ካኮንሰሳመራ ኣላንቲ መታ? ሴራ ካኮአዳመራ አብራመን አብዱ ታሰሳንተታ ሳኒ ታኤሜቶ ጊንያ፤ ፈሎ ኦሜላን ቱሰንያ፤ ሴራና ካኮኤሜተራ ዋይና እባዶ ጠኤ ካግሮ እባዶትን ጋራ ካኤርግቻን ሰጋመረያ። **20** ሀሌዎ ኳሬ ጣየ ካዋጋርሳራ ኡና ቶ ታላል ላኮዮ፤ ዋ አደ ኮያ። **21** ሀያ ሴራ ካዋ ካአብዱ ሃፋራ ካዲዳሮያ? አጂ ላኮዮ፤ ሴራ ካኮንሰሳመራ ኔፎ ሄላምሰሲን ለግረዋ፤ ኦግራን ቁሉማ ጋራ ካሴራን ሄላም ግራተዋ። **22** ቁሉክ ማጻፋ አደ አላም ዱባ ጨቦ ካሽያመ ላኖ አዋጃራ፤ ህክና የሱሳ ክርስቶሳ ታሄላማታ አብድ ኦአማናራን ዱባን ጎጎሰሳንቶያ። **23** ሂክ አማኖ ኤሜታኖኮ ሆረን ሴራ ቶንሴ ኦሽያምንኖ ሌን፤ አማኖ ታ አዳሳምሮን ጊን ኖን ጨፋመ ግረ። **24** ሃንሱን አማኖ ጎጎቁሉይኖ ሴራ ክርስቶሳ ቶሰ ካጌግሳሮ ራ ሌ። **25** ግዳ አደ ሀሱ አማኖ ማንኮኤሜተ ማራን ጎርታኑን ታሴራ ራኮ ሄገሊ ላኮኖ። **26** ዱባና የሱሳ ክርስቶሳ አማናኖይ ይሰ ካዋታን፤ **27** ክርስቶሳን ዋታ ኮ ጎጎሌታኑን ኦጣማቃንተታን ዱባና ክርስቶሳ ሳርሳቴታን። **28** አይሁድና ግሪክ፤ ድይና

ባልቻክ እባዶ፡ ባባርና ሄለልትቲ ጠኤ አሳብንጀ ላግቶ፤ ዱባና ክርስቶስ የሱሳ ኮታን። 29 ካክርስቶስ ጎሌተን፤ እሰን ታክብራመ ሳንታን፤ ካክብዲ ሃፋራክ ማለ ኦኤልናታንታን።

4 ግዳና እን ካእማራ ሂካያ፤ ካኤልናራ ይትት ታሌርት፤ ዱርማ ዱባ ታቴሳ ጎሌተና፤ ድይኮ ካለካለ ላኮዮ። 2 አቦኬሳ ካሙርቴስራ ጎራታ ታ ጌሮን ኦኦራራና ኦጂናሳራን ሄገሊያ። 3 ኖና ኡሱማሌ እያናይ ጋና ይሰ ሌነ ታኮግኔ አላምኮክ አጋልሰሰ ሄገሊ ሌነኔ ድይናት ኢምናምነ ግኔ። 4 እየሱን ጎአመን ዋ ካሙርቴስራ ጌሰ ካኮጌ ጎራታ፤ ዋ ሄለልትቲኮ ካኡሙላመሮና፤ ሴራ ካሙሴን ካእጃጀመሮ ኤረኬሳ ፋረ። 5 ህክና ካሌራ ሴራ ካሙሴ እጃጀማ ኦግራን ዋዶ ሊና ኖና ይሰ ካዋ ጎሳሌኖን የልንያ። 6 አላንቲና ይሰኬሳ ማንኮሌውን ዋ፤ “አቦ አቦኬ” እም ካኮኢይኖ ኤረኬሳክ እያና ዋዳናታን ቶሰ ፋረ። 7 ሃንሱን ሂታኮ ሆረንባን ኤረታ ኳሬ ድይ ላኮቶ፤ ኤረ ማንኮሌተ ማራን፤ ዋ ኩ ካኤልናቶ የለራ። 8 ዋ አዳሳኖኮ ሆረን፤ ያዳሊ ትሶይ ሄዶል ኦሌኖቱን ድይጀል ሌተን ግቴን። 9 ግዳ ጎአመን ዋ እዮዮ አዳሰታን፤ ሱረዋ አደ ዋይ አዳሳንተታን። ሀያ ካላም ላፋክና ካማድኖን ሄዶል ቶሰ ምሲ አባባታን? አባባይና ኡሱን ድይ ሊን ዶታታን? 10 ካለኒዕ ኦሌራን አርጀል፤ ድግንጀል፤ አልማጀልና ጌሰጀል ካባጃታን። 11 እሰን ማራን ፈሎይ አዱ ካሀረሮ እን ሌረ እን አብሳታራ። 12 አቢላልት፤ እን እሰን ኤባታራ፤ እን እሰን እን ጎሳሌሮ እሰና እን እን ላ። እሰን ኮና እን ላኮሚርቴታን። 13 እሰን ጎሳካሳኒ ሆራርጀ እሰኑን ዋንጋላ ካላላበራ፤ ሀዉአምኮክ አላንቲዮ። 14 ሀዉአምክ እሰኑን ጫፍቲ ሌ ግራንቱና ዱዶ ላኮህፋቴታን፤ ጎርቱን ላኮጢቃተታን፤ እየሱን ጎአመን ኤርግቻ ካዋ እን፤ ሱረና ኡሱ የሱሳ ክርስቶስ እን የላቴን ቆጶቴታን። 15 እየሱን ጎአመን ሀኑኤ ገጌሎኦትሰን ሀጌ ሴተን? ዳንዳመዋ ኢልኦ ኦትሰን ጎሌና ሱረ ቤሰ ኦሰሳን እን ሊ ግራኖክሰን እን መተኬይዋ አቶትናራ። 16 እን ሩም እሰኑን ማንኮሰጌሮ ማራን ዲናክሰን እን ሌ ሙተ? 17 አክ እባዶ እሰን እሰኦትሶ ቶሰ አትን እጸማራን፤ ላኮኢዳንንዮ፤ እሰን ካኮንዶታራን ኖኮ ካለ ጎሳቤታኑና እሶን አታይ ጎሳያዉንያ። 18 እዳኔን ታሌርት ካዉድታማሮ ላኖ ካእዳንክያ፤ ሀክና ሊን ካዶትሳራ አርጌቶ ኳሬ እን እሰኔ ዋታ ግራንቱን ካላል ላኮዮ። 19 እን ካጌላታሮ ይሰኬ፤ ክርስቶስ እሰን ኦሮ ታሙትሮን ጊን እሰን ማራን አደና

ታኡሙላ ጭንቁ ኦሮ ግራ፤ **20** እሰን ማራን ግርድ አመረ ጫናቃመራ፤ ግዳ እስኒ ኦሮ ሙትረ ካለት ሄኢ እዬሰን ምሲ ጌላየረ! **21** እሰን ካኦርት ሴራኮ ሄገሌ ግርን ካሀልቻታን አላ ሰጋ፤ ሴራ መ አማሮ ላኮማልተታንያ? **22** አብራመ ይሰ ላማ አባናየ፤ ኮ ድይትኮ ካካለ አደ ባልቻት ሄለልትቲኮ ኡሙላማኖ ማጻፋ ቁሉክ ጻፋመራ። **23** ኡሱን ታሀንዳቶ ታሌተቴ ሄለልትቲኮ ካኡሙላመረ ኤረ ባባርትት፡ ፈኢ ታአባዶ ማሌየ፤ ባልቻት ሄለልትቲኮ ካኡሙላመራ አደ አብድ ታዋክ ሃፋራ ማሌየ። **24** ሂኒሶ ሄለልጃ አማቶ ላማ ማንኩቱሳናን ማራን፡ ሂክ እየሰ ማሱሳ እን ካድያማሮያ። አማቶ ኦሆራርጄ ታሲና ዋዳምኮ ጎሌና፡ ድዩማን ካሌሮ ይሰ ታኡሙላቶታ፤ ኤሰና አጋርታ። **25** ጎራታ አጋር ካአራብ ኡሊ ታግቶ ታሲና ዋዳሚ ማሱሳማታ፡ ግዳ ታግቶ ኢየሩሳሌም እን ላታ፤ ይሰክሴነታ ድዩማ ግታ። **26** ኤሊታ ታሌተታ ኢየሩሳሌም አደ ባልቹማ ግራታ፤ ኤሰና አየታንታ። **27** “አት ይሰ ታኡሙሎን ማሴና፤ ገጌላ! አት ኡሙላ አባም ታካሶን፡ ‘እልሊ’ አም ኢዬ፡ ኤንተር ታአብቶ ሄለልትቲኮ ሮርት፡ ኤንተርካሊት ሄለልትቲ ይሰ ካሞጋን አብታ” አማመ ጻፋመራ። **28** ጎራታ አቢላልት፤ እሰና ይሳቃ እን ካአብዲ ሃፋራኮክ ይሰታን። **29** ኡሱ ጎራታ ፈኢ ታአባዶ ማለ ካኡሙላመራ ኤረ ባባርትት፡ ሁና ካዋኮክ አያና ካኡሙላመሮ ሆሮረ፤ ግዳና ኡሱማሌዋያ። **30** እየሱን ጎአመን ቁሉክ ማጻፋ መማራ? “ድይት ኤረክሴ ዋታ ቤሰና፤ ኤረ ካድይቲ ካባልቻት ኤሬነ ዋታ ላኮኤላሮ” አማራ። **31** ሃንሱን አቢላልት፤ ኖ ባልቻኒሶ ኳሬ ካድይት ይሰ ላኮኖ።

5 ክርስቶሳ ኖ ባልቹማ ካቤሰራ ባልቹማ ጎጎግርኖንያ። ሃንሱን ታሄላቴታን ባልቹማ አታዬን ግራ፤ ካላም ካድዩማ ሀርቆታ አርአባንቴን። **2** እን ጳጳሎሳ እስኩን ካአማራ ሂካያ፤ እሰን “ሀማጽሳምን ዶትሳራ” አምዴን ጎሀማጺሳንተን ክርስቶሳ እስኩን ኢጂ እስኩን ላኦ ላኮአቦ። **3** “ሀማጽሳማኖ ኢን ዶትሳራ” አመረ ካሀማጺሳማራ ዱባ “ሴራ ካሙሴ ዱባ ጉድሳኖ ካሄሶን ላኖ” አደና ካላም አዴሰሰ እን ሰጋራ። **4** እሰን ሴራ ካሙሴይ ቁሉዬን ኦዶታታን፡ ክርስቶሳኮ ካለቤተታን፤ ሰኖ ታዋኮና ፋክንቴታን። **5** ኖ ጎአመን ካዋ አያና ታቁሉማ አብድ አማኖይ ኦራይናና። **6** ክርስቶሳ የሱሳ አብዳይ ጎግርን፡ ሀማጽሳማኖ ጎርቱን ሀማጽሳማኖ ዋት ላኦ ላኮአቦ፤ ላኦ ካአባ ጌላንጄ ካቱሳማሮ አማኖ ካላልያ። **7** ሂታኮ ሆረን ክርስቶሳ ዋታ ካግቴን ግርክሰን ካእዳንክየ፤ ሀያ ግዳ እሰን

ካህንዲዲፍሰ፡ ሩምወና ጎሳህንዲዲኖንኮ ካትረ እየያ? **8** ሂካ ኣንክክ ሶሶባኖ
 እስን ካኡመሮ ዋኮ ካኤመተሮ ላኮዮ፤ **9** “እርሾ ኡጫር ካሙላመሮ ካም
 ዱባ ኬሳታ።” **10** ጎታይ ካኡብታን ኮናትኮ ካካለ ያዳ እስኩን ግርዋት እን
 አብዳታራ። እስን ግርድ ካኢሳራ ማዮና ጎሌ፡ ማዮ ፍርዳ አታይናራ። **11**
 አቢላልት፤ ህታር ጊን ጋራ ካህማጸሳማኖ ካላላባሮ ጎሌ፡ ህያ ግዳ ጊን አይሁድ
 እን መወን ሆሮራናን? ኡሱማሌ ሊ ግረዋ፡ ታክርስቶሳ ማስቃሊ ህንዲዲፍ
 ላኖ ሄሰ ግራተዋ። **12** እስን ካግርድሳራ እባዶ ካክሶ ህማጽሳማኖ ካላ
 ሀሌኖን ግራን እስኦትሶ ሀሳንጎምሳቲን! **13** አቢላልት፤ ባልቻኒዕ ጎሳሊታወን
 ኡማንቲታን፤ ባልቹማትሰን አደ ካሶዩ ሀልቻክሰን ካኮብያታን አሮየላቲን፤
 ኡሱኮ ኮ ካካለቲን ጌላንጂ ሀሃንዳዎ። **14** ሴራ ካሙሴ ዱባ ሃፋራ ኮይ
 ራቶ አባመራ፤ ህክና፡ “እባዶ ዱባ እስኦታ ኣን ጌላ” ካአማሮያ። **15** አየሱን
 ጎአመን እስ እስሮ እስ ኦድቫታና እስኦሮ እስእስ ኦሚራኣታን ጎሌተን፡ ጎሳባኖንኮ
 እስኦራዬን። **16** ጎርታ አያና ቁሉክ ግራ አማራ፤ ሀልቻ ካሶየና አሮፈልቲን። **17**
 ኣላንቲና፡ ሀልቻ ካእባዶ አያና ቁሉክ ካዶታኖን፡ አያና ቁሉክና ሀልቻ ካእባዶ
 ካዶታኖን ሀልቻራ፤ ሂኒዕ እስእስኦሮ ማንኮዲዳራን ማራን፡ ካዶታታን ፈልን
 ላኮዳንዳታን። **18** አያና ጎሰሴተን አደ፡ ሴራ ካሙሴኮ ሄገሌ ላኮታን። **19**
 ሀልቻ ካእባዶ ካአዴሳመያ፤ እሶና ሻርሙጡማ፡ ባትናት፡ ራራጋታኖ፡ **20**
 ቶልቻ ሄዶይሳታኖ፡ ሞሩ፡ እስዲዳና፡ ኤንገ፡ ጢቤ፡ አማራንጀ፡ እስ ጌላታኖ፡
 ካለካለቤያኖ፡ አዱማ፤ **21** ጋቢ፡ ሰታኖ፡ ጨቦ ቶስ ኦጌሳራን ዱዱራኖ፡ አደና
 ሂካ ኣንክክ ካሌያ። ጣየ እን ጎሳሰጌሮ፡ ግዳና አደ ሴርሳራ፤ ሂካ ኦፈላራን ዱባ
 ዋኖናት ካዋ ላኮኤልናራን። **22** አያና ቁሉክኮት ኢል አደ ጌላንጀ፡ ገጌሎ፡
 ኖጎዳ፡ ኦብሰ፡ አንጀረ፡ ኢዳን፡ አብድ፡ **23** እባዶን ነያኖ፡ እስኦራታኖያ። ሂካ
 ኣንክክ ካትራ ሴራ ላግሮ። **24** ክርስቶሳ የሱሳ ኦግራን ሀልቻ ካእባዶ ካሜላን
 ሀልቻና ዶትኬሳ ዋታ ሱዋተራን። **25** አያና ቁሉክ ኦግራኖ ጎሌን፡ አያና ቁሉክ
 ጎሳገጌሳሮ ሰሴና። **26** እስእስሮ ናናታታና ጋባ አዲ ካማድኖን ላኮዲዳኖ።

6 አቢላልት፤ አባዶት ኮ ጨቦ ኦሮ ታብ ጎሙተ፡ አያና ቁሉክ ኦሰሰያታን እስን
 አንጀሬ አባብን ዶትሳራ። አየሱን ጎአመን አትና ጎሳጫፋሞንኮ እስኦታ ኦራ። **2** ኮ
 ካካለኮት ሰዳን ሀሰደ፤ ሂካኒና ካክርስቶሳ ሴራ ፈሎይ ሀይሳታን። **3** አባዶት ኮ
 ኮና ካላይ “እን ካካለኮ ሮራ” አም ጎሄደ፡ እስኦቲሳ ሶባታራ። **4** እባዶ መተመቲ

ፈሎኦቴሳ ሀቆቆራቶ፤ ኤስኮ ሆረንባን፤ እባዶ ካካለ ዎታ እስኦቴሳ ሀሄረጋኖን፤
 እስኦቴሳን ካጣዳሮ ሄላታራ። 5 አላንቲና መተመቼ እባዶ ሰዳነቴሳ ሰዳይን
 ዶትሳራ። 6 ማዮና ሃፋራ ካዋ ካከጋልሳታራ፤ ካእዳንክ ካሌሮ እየሰ ዱባ
 ካከጋልሰሳሮን ዎታ ሀሄዴዳመ። 7 እስኦትሰን እሮሶባቴን፤ ዋ ላኮቃጭፋማሮ።
 እባዶ ካወጣተሮ ኡሱዋ ታጋታራ። 8 ሀልቻ ካእባዶይ ካወጣታራ፤ ሀልቻ
 ካእባዶኮክ ጎይ ግናራ፤ እያና ቁሉክ ገጌላይሰን ካወጣታራ እደ እያና ቁሉክኮ
 ጅሩ ጅሮማክ ግር ሄላይናራ። (aiōnios g166) 9 ሃንሱን ካእዳንክ ኮኮ ፈላናኮ
 ላኮሀራኖ፤ እብድ ጎጎሳኖን ልክኪ ጎራታ ጎጌ ወጣ ኩኩይሳይናና። 10 ሃንሱን
 ኢድሊ ጎሄላነ እባዶ ዱባን እደና ዋ ካእማናሮ እባዶን ምን ኦሌራውን ኮኮ
 ካእዳን ፈልና። 11 ካጂንጂን ፍዳሌል እን ምስምሲ ገነቲይ ጎጎጻፈሮ ዲያ። 12
 ካሳረ ካሌሮ እየሰ ሙትን ካዶታታራ እባዶ ጎጎሀማጽሳንታኑን ሁኖምን ዶታራን፤
 ሂናና ካኮንየላራን ማስቃሊ ጉት ካጎየሮ ክርስቶሳ ማራን ጎጎሆሮሞንኮያ።
 13 እሶ ሶኦትሰኒ ሀማጽሳኖይ ዳዳይን አማ ጎጎሀማጽሳንታኑን ዶታራን ኳራ፤
 እሀማጸሳሜራን እሶና ዱዶ ሴራ ኦኦራታራን ላኮያን። 14 እየሱን ጎእመን እን
 ካካለ ካኮዳዳታሮ ላኮእቦ፤ ጎታካን ታየሱሳ ክርስቶሳ ማስቃሊ ኳራ ካካለት
 ዳዳታኖ እንኮ ሀፋክመ፤ ህታ ማስቃሊ አላም ካጎየ እን እንኮ ካለቤራ አንና
 ካማላን አላምኮ ካለቤራ። 15 ሀማጽሳማናና ሌረ ሀማጽሳማናዋት ላኦ
 ላኮእቦ፤ ላኦ ካእባ የሱሳ ክርስቶሳ መጣ ታኡሱብ ላኖያ። 16 ህታ ፋረን
 ዴብ ካሰሰታሮ ዱባ፤ ጎሳ ካዋ ካሌሮ እስራኤል ጉት ኖጎዳና ሻጋ ሀሌዎ። 17
 እየሰ ጉድሳና፤ እን የሱሳ ክርስቶሳ ማራን ካእታዬሮ ካራኮ ማታማ ሶኦቴይ
 ሰዳየራ፤ ሂታኮ ሆረንባን ማዮና እን ላኮራክሰሮ። 18 አቢላልቴ፤ ጎታካንት
 ታየሱሳ ክርስቶሳ ሰኖ እሰን ዎታ ሀሌቶ፤ ሀሚኒዕ።

ኤፌሶን

1 ፈኢ ታዋይ የሱሳ ክርስቶስ ያፋራመሮ ጳውሎስ፡ የሱሳ ክርስቶስ ኦክብዳሜራን፡ ታኤፊሶን ካታማይ ኦግራን ቁሎሌዉን፡ **2** ዋ አቦካን ጎታ የሱሳ ክርስቶስ ሰኖና ሮጎዳ እስኩን ሀሌቶ። **3** ዳሩሪ ኦግራን ሶማ ኦኢያና ዱባ ክርስቶስ ኖ ካሶማሳተራ ጎታካንክ የሱሳ ክርስቶስክ ሄደና ኦዶ ካሌራ ዋ ሀጋላታዎ። **4** ቁሌኒዕና ቱፍ ካላይኒዕ ልኔ ጌላንጃ ኡሱ ሆረ ጎጎሙንቶ አላም ሀመጣዎን ግራን ሆራርጀ ክርስቶስ ኖ አሳበ። **5** ፈኢ ታዋ ታኢዳን ሌተደ የሱሳ ክርስቶስን ይስ ጎጎሌኖን ጣየ ሙርተሴ። **6** ህክና ካጌላመሮ ኤረኬሳክ ጋራነ ዳናባ ኖን ታስሰሮ ታካባጃንተቶ ሰኖ ጎጎሶማሳንቶያ። **7** ሰኖ ታዋኮክ አማጋማኖኮ ካከይ ኤረኬሳክ ኢግ ዎዶ ሌኔ፤ ጨቦካንኮና ሀሄሶ አማማኖ ሄላ። **8** ሰኖቴሳ ቃሩማና ማላባኖ ዱባ ጂናስ ኖን ሰሰ። **9** ዋ አንጅረተሳ ክርስቶስክ ጋራነ ጣየ ጎጎሀልፔሮክ ማለ ፈኢቴሳት ሆል ጎጎኤንሶ የለ። **10** ጎራታ ጎጌ ዋ ፈሎ ጉት ካሃይሰናራ ሀልቻ ዳሩርና ኡሊ ታግታ መጣ ዱባ ራቶ ኮ ካክርስቶስ ኦዶናት ሄገሊ ጎጎግርቶንያ። **11** እየሰ ዱባና ፈኢቴሳ ካፈላራ ዋ ጣየ ጎጎሄደሮ ማለ ካክርስቶስክ ጋራነ ኡናቴሳ ጎጎሌኖን ኖ አሳበራ። **12** ህክና ካኮንሌራ ክርስቶስ አብድ የላታ ኦሆሬ ኦሌንና ካባጃ ታዋ ጋላታኖይ ጎጎቱንሶንያ። **13** እስና ፋይናክስንኮት ኦዱ ታኢዳን ካሌሮ ሃፋራ ካሩም ካኮማልቴን ጎራታ ክርስቶስ አማንቴታን፡ አደና፡ ኡሱ እስኩን ሰሰን አብድ ጎጎሰሰሮ እያና ቁሉክ አታማንቴታን። **14** ህክና እያና ካባጃተሳዉን ጋላታ ጎጎጌሮን ዋ ኦቴሳ ኦሌራን ዱባን ታ ዎዶ ሌሮ ሄላይን ታግኖ ርትታንዉን ቃብደታንያ። **15** ሃንሱን ጎታ የሱሳ እስን ካአብታን አማኖና ቁሎሊ ዱባዉና ታአብታን ጌላንጃ ታኮማለ አርኮ ሀጋአበረ። **16** እን እስን ኤቢ ሻዳ እስን ማራን ዋዉን ጋላታ ሰሳኖ ላኮኢሰሮ። **17** ካባጃ ካኮንዶትሳሮ ጎታካን ካየሱሳ ክርስቶስክ ሄዶ ካሌሮ ዋ ኦሎ ጎጎኤዳሳኩን እያና ካዋኮ ታሌተቶ ቃሩማና ሙተን እስኩን ጎጎሰሰሮ እን ኤባታራ። **18** እስን ምስት አብዲ ኡማንቴታና ቁሎሌል ታኤልናራ ታካባጃ ርቲ ኤግታት ታዋጋንቶ እስን ጎጎኤዳሳኩን ዎዳናትሰንኮኒዕ ኢልኦ ጎጎዴንደናዉን እን ኤባታራ። **19** ኖ ዋ ኦአማናኖን ዱባንኮ ካአቲ ካሌሮ ሁናከሳ ጎጎማላብታኩን እን ኤባታራ፡ ሂክ ሁናና ኡሱ እን ካአቲ አታንኬሳክ ፈሎይ፡ **20** ክርስቶስ ጎይኮ ኬሰረ ታዳሩረ ባንኤ ምና ታመርጌ ሀማጽሳ ሙተራ። **21** ዋ ኦዶ ክርስቶስ ዳሩሪ መርገቴሳይ

ካህማጺሰራ ማምሰክ ቃላዳኮና ኦዶናት ሁናኮና ጎታናትኮ ኡሱማለና ሂካ ካግዳኔ ጌሰ ካላል እንሌኖን ካኤሜይናሮ ጌሲ ጎሌና መገ ዱባኮ ካሮራሮ ካካባጃመ መገ ሰሳኖይያ። (aiōn g165) 22 ዋ አየሰ ዱባ ኦዶናትኬሳ ሃገሊ ባሪስ፡ ምን ካኤብና ዱባንኮ ካሮራሮ ጎሳሌሮ መተ የለ ሹመ። 23 ምን ካኤብ ካክርሰቶሳ ማርያ፡ ክርሰቶሳና ምን ካኤቢና ባንኤ ዱባ ካመን ዱባ ካእማጋሮ እማጋማኖኬሳያ።

2 እሰን ባሰክሰንና ጨቦክሰንኮት አላንቲ ጎቴን ግቴን። 2 ኡሱ ጎራታ ሂካ አላምኮክ ራ ካሜላን ሰሴታ ግቴን፡ ኡሱማለና አምባል ጉት ኦግራን እያናጃል ካሜላንኮክ ሁናጃል ካባሪሳሮን እጃጃማ ግቴን፡ ኡሱና ካእጃጃማን እባዶ ጉት ካፈላሮ ባቲክ እያናያ። (aiōn g165) 3 ኖ ዱባና ሂታኮ ሆረን እሶ ጠኤ ፈኢ ታሶየትና ሳሙታንኮክ ያዳ ዴበ ሰሴታ ሀልቻካን ካሶየት ግኔ፡ ኖና ካካለ ኣን መጣታኒ ኤንገ ታዋ ሃገሊ ግኔ። 4 አየሱን ጎአመን ሻጋከሳ ዱረሳ ካሌራ ዋ ኖን ታኦ ታኦቲ ጌላንጀኮ ካከይ፡ 5 ባሰካኒ ኦጎነ ሌን ግራን፡ ዋ ክርሰቶሳ አርዶኒዕ የለ፤ እሰን ካኮፋይቲታን ሰኖቴሳይያ። 6 ዋ ክርሰቶሳን ዋታ ኖ ጎይኮ ኬሰራ፤ ክርሰቶሳ የሱሳ ባንኤ ታዳሩረት ኖ ኡሱነታ ሀማጺሰራ። 7 ህክና ካኤሜታሮ ጌሲ ክርሰቶሳ የሱሳ ኖን ታቱሰሮ ሜሳ ካላይት ሰኖኮት ዱሩማ ቱሰንያ። (aiōn g165) 8 እሰን ካኮፋይቲታን ካእማኖ ጋራን ሰኖይያ፡ ህክና አላቦ ካዋያ ኳሬ እሰንኮ ላኮኖ። 9 ማዮና ጎሳጣዳኖንኮ ታፋይና ሰኖ ካኮሄላንተታ ፈሎይ ላኮኖ፤ 10 አላንቲና፡ ዋ ጣየ ኖን ኦኤካሰሮ ፈሎ ኦኢዳን ጎሳፈልኖ ክርሰቶሳ የሱሳ እመጣምንና መጣ ታዋና። 11 ሃንሱን እሰን ጣይተን አላታኒ አይዛብ ኦሌቲታን፡ አይሁድ ገን ታእባዶይ ሀማጺሳማኖ ጳዳታ እሰን አሀማጺሳሞንግታን አማ እሰን ሀባራ ካግሬን ሻዳ። 12 ኡሱ ጌሲ ክርሰቶሳኮ ካለቤተዳን፡ እሰራኤልን ዋታ ኡናላናኮ ፋክንቴዳን ታእማቶ አብዲን አላግጋቴን፤ አላም ጉት አብድ ካላይና ዋ ካላይ ጎሳግቴን ሻዳ። 13 ግዳ ጎአመን እሰን ሂታኮ ሆረን ፋክንቴን ኦግቴን የሱሳ ክርሰቶሳ ሌተዳን ኢግኬሳ ጋባላንቲታን። 14 አይሁድና አይዛብና ኮ ካየላራ፡ ካለካለ የልተ ታግቴ ታኤንጌ ግሞ ካዲገራ ኖጎዳካን ኡሱያ። 15 አጃጃ ካሴራ ዋጋን ዋታ ሶኦቴሳ ትረ። ያዳኬሳና ጎሳ ላማኮ ኮ ካኡሱብክ እባዶት እሲ መጣረ ኖጎዳ ካዪንያ። 16 ማሰቃሊ ጉት ጎዋኖይና ዲናናት ትረ፡ ላማ ዱባና ማር ኮ የለረ ዋኔታ ዋጋርሰ። 17 ኤመተጉረ ፋክንቴን ኦግቴን እሰኑና፡ ጋባላመ ካግረ

አይሁድን ካኖኅዳ ዋንጋላ ላላበ። **18** ኖ ዱባና ጋራኬስስ አያናኮይ ኦዶ ቶስ ጋባላሚን ዳንዴና። **19** ሂካኮ ካከይ እስን ቁሎላ ዋታ ኡል ኮክ አባዶታን፤ ዋዉን ካምን አባዶታን ኳሬ፤ ጎርታ ሂታኮ ዳንቤባን ኡል ካአባዶኮክ አባዶና ማርት ላኮታን። **20** ኦፋራሜራኒና ካሄገርልኮክ ኡኩሚ ዳባተታን። ምና አፋሩን ልበ ካሌራ ክርስቶሳ የሱሳያ። **21** ልበና ምን ዱባ ራቶ ኢንስአባይረ ካጎታ ቁሉክ ምን ካዋ ሊን ጂናታራ። **22** እስን አዴን ዋ አያናኬሳይ ካኮባራሮ ምን ሊን ራቶ ክርስቶሳ ግምባማታን።

3 ህታ አላንቲ እን ጳውሎሳ የሱሳ ክርስቶሳን ካሸያመ ካኮንሌራ እስን አይዛብን ማራንያ። **2** ላኦ ታትስን ማራን ኢን ታስሳንተቶ ሰኖ ታዋ ሀንዳኖኬ ኦግራን ማልቲታን። **3** ጣየ ጋባቢና እን ጎጎጻፈሮ፤ ዋ ሆልቲሳ አዴስሰ ራጋይ ኢን ቱስራ። **4** ጎርታ እስን ሂካ ናባባ ግራን፤ ታክርስቶሳ ሆል እን ምስምሲ ሻዳሮ አዴስን ዳንዳታን። **5** ህት ሆል ቁሎላ ኦፋራሜራዉና ካሄገርሉን ግዳ ካሙተሮ ግታክ ካሆርኮ አባዶን ላኮሙተረ። **6** ህት ሆል፤ አይዛብ ጋራ ካዋንጋላን እስራኤልን ዋታ ራቶ ኦኤልናራን፤ ማር ኮክ ምክታል ሊሬን ኡሱማለና የሱሳ ክርስቶሳ ታሌተቶ አብዲ ራቶ ኦሄዴዳማራን ላኖይያ። **7** ዋ ሁናኬሳኒዕ ፈሎይ ኢን ካስሰሮ ካሰኖ አላቦ አንና ሂካ ዋንጋላን ካሀንዳሮ ሌራ። **8** ማምሲና እን አደ ቁሎሌል ዱባኮ ካየራታሮ ጎሌና፤ ታቆቆራሞን ዱሩማ ታክርስቶሳ አይዛብን ጎጎላላብሮን ህት ሰኖ ኢን ሰሳንተ። **9** ኡሱማለና ዱባ ካመጠሮ ዋይ ካሮረሮ ጌስጆል ስያሜን ኦግራን ሂናኦ ፈሎ ኮኒዕ ሆል ዱባን ጎጎቱስሮ ኢን ሰሳመ። (aiōn g165) **10** ያዳኬሳና ጌስ ካእርካኔቲ ምን ካዋኮክ ጋራን ምዲ ታሞጋን ታኦብቶ ቃሩማ ታዋ ባንኤ ታዳሩረት ኦግራን ዋይቻሉና ኦዶናት ኦአባዉን ጎጎአዳሳንቶንያ። **11** ህክና የሱሳ ክርስቶሳ ጎታካን ካፈለሮ ጅሩ ጅሮማክ ሀልቻ ማሌያ። (aiōn g165) **12** ኡሱና ኡሱ ጉት ካግሮ አማኖኮክ ጋራን፤ ባልቹማና ጃቡ ታኦብቶ ዋዳና ዋ ቶስ ጋባላሚን ዳንዳና። **13** ሃንሱን ካባጃትስን ካሌሮ እስን ማራን እን ታጌተቶ ራኮይ አብድ ጎጎ ጎሳኖንኮ ሀዳራ አማራ። **14** ጎርታ እን ዋ ኦዶ ሆረ ግልብኬይ ግልቢስረ ካኮንኤባታራ ህታ አላንቲንያ። **15** ዳሩርና ኡሊ ካግራ ምን ኮክ አባዶ መተመቲ ዋኮ መገ ሄላይናራ። **16** ማር ካኦሮ ካክስኒ ጎጎአታታኑ፤ አያናኬሳኮክ ጋራን ካባጃትሳት ዱሩማና ሁና እስኑን ጎጎስሰሮ ኤባታራ። **17** ህክና አማኖ ክርስቶሳ ዋዳናትስኒ ጎጎባርሮያ። አደና ህዲድ

ዳግሰዳነ ጌላንጄ ዳባይዳነ፡ 18 ታክርስቶሳ ጌላንጄ ባላእና፡ ኤራና፡ ጦቂማኖና ቦላና ኤግታክዮ ቁሎላ ዱባነ ዎታ ካኮአዳሳንኮክ ሁና ጎጎሄላታውንያ፡፡ 19 ሂካ ማላባኖ ካአባዶኮ ታርርተቶ ጌላንጄ ታክርስቶሳ ጎጎአዳሳውን አማጋማኖ ካዎይ አማጋሚን ጎጎኤካታውን አን ኤባታራ፡፡ 20 ጎርታ ኖ ኦሮ ጎጎፈላሮ ሁናኬሳኮክ ጅልባ ማለ ካኤባታኖኮ ጎርቱን ካሄዳታኖ ዱባኮ አሎ ሮርስ ፈልን ካዳንዳሮ፡፡ 21 ምን ካዎ ኦሮ ኡሱማለና የሱሳ ክርስቶሳይ፡፡ ጌስጆል ዱባ ጅሩ ጅሮማኮ ታ ጅሩ ጅሮማ ጌሮን ካባጃ ኡሱን ሀሌቶ ሀማኒዕ፡፡ (aiōn g165)

4 ጎርታ ጎታውን ሀንዳኖይ ካሸያመ ካሌራ አን፡ እስን ታኮሚንቴታን ኡምቲ ካዶትሳሮ ግር ጎጎግርታኑን አን እስን ኤባታራ፡፡ 2 ጌላንጄ እስእስኦሮ ኡብሳ አርጌቶ ፋያንካኒዕና እኢዳን ላ፤ ጌላንጄ እስእስኦሮ ዳንዳኖ ግራ፡፡ 3 ካኖጎዳ ሸያማኖ አያናኮክ ራቶናት ኦራይን አታዬን፡፡ 4 ካኮሚንቴተን ጎራታ አብድ ቶውን ጎጎሚንቴታን ማለ ማር ኮና አያና ኮያ ካግራ፡፡ 5 ኡሱማሌ ጎታ ኮ፡ አማኖ ኮና ጥንቃታ ኮያ ካግራ፡፡ 6 አደና ዱባንኮ ካሮራራ፡ ዱባ ጉት ካፈላራ፡ ዱባ ጉት ካግራ፡ ዱባን ኦዶ ካሌራ፡ ሄዶ ኮያ ካግራ፡፡ 7 አየሱን ጎአመን ክርስቶሳ ሰስን ጎጎሙርተሰሮኮክ ጅልባ መተመቲ ሰኖ ኖን ሰሳንተታ፡፡ 8 ሃንሱን፡ “ኤለዴ ካኮቤረ ጎራታ፡ አቦጃሜራን ቦጃ፡ አባዶውና እላቦ ሰስ” ጎጎአማመሮያ፡፡ 9 ሀያ ሂክ፡ “ኤለዴ ቤራ” አማኖ አደ ኡል ቶስ ሄገልዴ ዳገራ አማኖ ጎሌ ኳሬ ካካለ መ አማኖያ? 10 ሄገልዴ ካዳገራ፡ መጣ ዱባ አላም ጎጎአማጋንቶ ኤለ ዳሩርኮ ካኤመተራ ኡሱ ኡሱዋያ፡፡ 11 ኡሱና ኮኮ ኦፋራመራን፡ ኮኮ ሄገሮል፡ ኮኮና ዋንጋላ ኦላላባራን፡ ካካለ አደ አባዶ ካዎ ኦፎፋራና ኦአጋልሰሳራን ጎጎሌራውን እላቦል ካስሰራ ኡሱያ፡፡ 12 ሀክና ካክርስቶሳ ኡና ካሌረ ምን ካዎ ጎጎዳባሮ፡ እባዶ ካዎ ሀንዳ ካዋቱን ኤካሰንያ፡፡ 13 ሀክና ካኮንልናራ፡ ኖ ዱባና ኤረ ካዎ አማናኖና ማላባኖን ካሄላማሮ ራቶናት ቶስ ኤሜታኖና ካንጅንክ እባዶ ላኖ፡ ክርስቶሳ ካሄላማሮ አማጋማኖ ቶስ ታጌኖንያ፡፡ 14 ጎርታ ታአባዶ ሚጌይ ሸርሳኖና ሶባንጃ ካኤካተሮ ካሸርሳሮ አጋልሰሰሲ አምባል ኢርጋዶይ ሀሴራ ሂታራ ሻፋመረ ካኢያሮ ይስ አን ላኮሌኖ፡፡ 15 ሃ ካላሮኮ ሩም ጌላንጄይ አዬሳ ካአመን ዱባን መተ ካሌሮ ክርስቶሳ ቶስ ጂናይናና፡፡ 16 ካለካለክ ካማሬ ምክታጆል ካኮኤሰላራ ክርስቶሳያ፤ ማር ዱባ ካኮአባመራ ምክታልኬሳይያ፤ ሃንሱን መተመቲ ካማሬ ምክታ ኡሱን ኦስሳሜራን ፈሎ ጎፈሎ ማር ዱባ

ጂናታራ፤ ጌላንጄና ዳባታራ። 17 ጎርታ ያዳክሶ አዳክ ካሌሮ አይዛብ እን
 እሮግርቱን አመ መገ ካጎታይ ሴራራ፤ 18 ሳሙትሶ ዱደታ፤ ማላባኖዋትና
 ጢበትሶት ኣላንቲ ዋ ካሰሳሮ ግርኮ ፋክመራን። 19 እሶ ሙላ ማንኮዋትን
 ማራን ባቲክ እየሰ ዱባ ፈልን እስኦትሶ ሀልቻ ካሶየቱን ሮርሳትን ሰሳቲን። 20
 እስን ጎአመን ክርሰቶሳ ካኮአዴሴታን ሂካ ኣንክክ ራድ ላኮዮ። 21 ኦግራን
 ጋራኬሳ ማልቲታን፤ የሱሳ ታግቶ ሩምና ኡሱኮ አጋልሳተታን። 22 ሃንሱን ሶበረ
 ጨቦ ቶስ ካጌሳሮ ሀልቻ ካሜላን ጣይተን ካኮግቴን፤ ታዶእንት መጣኮት
 ያዳሊ ትራ። 23 ሳሙትሰና ዋዳናትሰን ሀኡሱባቶ። 24 ካሩም ሙጭአማኖና
 ቁሉማ ማሱሳ ካዋይ ካመጣመሮ ካኡሱብክ ማር ሳርሳዬን። 25 ሃንሱን
 ጣራ እሮአዬሴን፤ ኖ ዱባና ማርኮክ ምክታል ማንኮሌረን ማራን እስእስኦሮ
 ሩም አዬንሳ። 26 ሀድሳ! እየሱን ጎአመን፤ “ጨቦ እሮፈልቲን” ጎሳአማመሮ፤
 እስን ኢኦቲን ግራን አርት አሮኢኖ። 27 ዱርሳ ካኮታብሮ ባንኤ እሮሰሴን።
 28 ሄታ ካግረ ሂታኮ ሆረንባን አሮሄቶ፤ ሃ ካላሮኮ ካራካተዉን ሰስን ማራጋደ
 ጎሳዋታምንኮ ገነቲሳ ካአዳንክ እየሰ ሀፈለ። 29 ሀኢትሰንኮ ካሜላን እየሰ
 ዱዶ አሮቤኖ፤ እየሱን ጎአመን ኦማላራዉን ካገገላይሰሮና ሙጭሰን ካጋርጋሮ
 እባዶዉና ካዶትሳሮ ሃፋራ አዬሳ። 30 ዋዶ ታኮበያታን አሪ አቶ እስኩን ጎሳሌሮ
 ካኮአታማንቲታን አያና ካዋ አሮቁቃምሴን። 31 ኦኮኮንጂ፤ አማራን፤ ኢኦ፤
 አያ፤ ሀባርና፤ ማምሰት ሜላንና ዱባ እስንኮ ፋክ ሀእንቶ። 32 ሃ ካላሮኮ
 እስን እስሰኦሮ ኦኢዳኒዕና ሹጎኒዕ ኦነኤኤይሳታን ላ፤ ዋ ክርሰቶሳ ሀሄሶ እስን
 ጎሳአምሮ እስና እስእስኦሮ ሀሄሶ አማ።

5 ጎርታ ካጌላመሮ ይሰ እን እስና ማሱሳ ካዋይ ሰሴን። 2 ክርሰቶሳ ኖ
 ጎሳሌላተሮ ዋ ካገገላይሰሮ ታኢዳንት ኡርት ካአቦ ሜባና ጃርሶ የለ ግርኬሳ ኖ
 ማራን ሮርሳተ ጎሳሰሳተሮ እስና ጌላንጄ ግራ። 3 ሂካ ኣንክክ እየሰ ቁሎሌዉን
 ማንኮዶትሶን ማራን ሻርሙጡማ ጎርቱን ማምሰክ ካባቶየ ኮኮና ጎርቱን
 ጋጺጋጳኖ ዱዶ እስን ዶሌ እሮማልሳሞ። 4 ሃ ካላታንኮ ዋዉን ጋላታ ሰሳ ኳሬ
 ካቁቃምሰሮና ካጎዉማ እየሰ፤ ጎርቱን ካቆሰ እየሰ አዬሳኖ ላኮዶትሳሮ፤ ሂካ
 ኣንክክ እየሰ እስኩን ላኮዶትሳሮ። 5 ሻርሙጡማ ጎሌተና፤ ማምሰክ ባቲክ
 እየሰ ካፈለሮ ጎሌ፤ ጎርቱን ቶልቻ ሄዶይሳታኖና ጋጺጋጳኖ ጎሌ፤ ክርሰቶሳና
 ዋናናት ካዋይ ርቲ ካሄላኖን ላኖ አዳሳ። 6 ሂካ አዬሰኮት ኣላንቲ ካአጃጃሞን

እባዶ ጉት ኤንገ ታዋ ማንኮኤሜይናቶ ማራን ማዮና ካማድኖን አዬሲ እሰን
 አሮሶቦ። 7 ሃንሱን ሂካ ካእጃጃሞን እባዶን ዎታ እሮ ሌተን። 8 ጣይተን እሰን
 ሙጉዲ ግቴን፤ ግዳ ጎአመን ኦጎታ ማንኮሌተን ማራን ኢፋታን፤ ሃንሱን ኢፋ
 ካግሮ እባዶ እን ሰሴየን። 9 ታኢፋ ኢል ኢዳን፤ ቁሉማና ሩሚ ዱባ ዶሌ ግታ።
 10 ሃንሱን ጎታ ካገገላይሰራ እየሰ መዮ ቆቆራ። 11 እፋ ቶሰ ቤሳዴን ቱሳ ኳሬ
 ኢል ካላይኒዕ እሙጉድ ፈሎኔ ዎታ ማምሰት ኤሰላና አሮግና። 12 ሙጉዲ
 ካግራ እባዶ ሰያመ ካፈላሮ እየሰ እዬሰን ሙላራ። 13 ካአመን ዱባ ኢፋ
 ቶሰ ጎቤሮ ታሩም ምዲ ዲዳ ቤ ሙታታ። 14 አላንትና እየሰ ዱባ ጎጎሙትሮ
 ካየላራ ኢፋያ፤ ሃንሱን፡ “እት ካሁዱራታ ናባድና! ጎይኮ ክ ክርሰቶሳ ኩን
 ሃንቃይሰናራ” አማመራ። 15 ጎርታ ምሲ ግርናታን እስኦራዬን ሻዳ፤ ቃሩማ
 ካአቦ እን ኳሬ ጎዋሌ እን አሮግርተን። 16 ሂክ ጌሰ ካሜላንክ ማንኮሌ
 ማራን ማጎሬና ታኤሰላቶ ኤሴላ ላኦ ብያ። 17 ሃንሱን ፈኢ ታዋ መቶ ሻዳ
 ኳሬ ጎዋሌ አሮሌተን። 18 አያና አማጋማ ኳሬ ጣሞ ካዋይኒት አሮሰትቴን፤
 ሀክና ዳርአታኖያ። 19 ማዛሙርና ሄዶይሳታኖ፤ ካአያና ያየ እሰ እስኦሮ አዬሳ፤
 ዋዳናትሰኒ ጎታ ጋላታ። 20 ጎታካን የሱሳ ክርሰቶሳኮክ መገ ካአመን ዱባዉን
 ዋ ኦዶ አርጌቶ ሶማሳዬን። 21 ታክርሰቶሳ ካባጃን አማዴን እስእስ ኦሮ ኮ
 ካካለቱን አጃጃማ። 22 እሰን ኦርጆል! ጎታ የሱሳን ጎጎአጃጃማታን ማለ
 ኤንተርጆልክሰኑ አጃጃማ። 23 ክርሰቶሳ ምን ካዋ መተ ጎጎሌሮ ኤንተርና
 ኦርዉን መተያ፤ አደና ክርሰቶሳን ማር ካኮሌሮን ምን ካዋኮክ ፋይናያ። 24 ምን
 ካዋ ክርሰቶሳን ጎጎአጃጃማሮ ኡሱማሌ ኦርጆል ካአመን ዱባ ኤንተርጆሉን
 ሀአጃጃመ። 25 እሰን ኤንተርጆልና! ክርሰቶሳ ምን ካዋ ጎጎጌላተሮና እስኦቴሳ
 ሮርሳተ ጎጎሰሳተሮ እስና ኦርጆልክሰን ጌላየን። 26 ክርሰቶሳ ሂካ ካኮንየለራ
 ምን ካዋ ሙጭሰን ዶተረያ፤ ካኮሙጭሰራና ጋራ ካሃፋራን በከይ አልሰረያ።
 27 ሂካ ጋራይ ምን ካዋ ጦርቀ ጎርቱን ሆረ ሜልልሳኖ ጎርቱን ሂካ አንክክ
 ካካለ ካሜላን እየሰ ሀሙቶን ቁሉት፡ ኮና እየሰ ካላይትና ታኢዳንት የላተ
 እስ ቶሰ ጋባላታራ። 28 ኡሱማላና ኤንተርጆል እስኦትሶ ጎጎጌላታራንክ ማለ
 ኦርጆልክሶ ጌላታኖ ዶትሳራ፤ ኦርቴሳ ካጌላታራ እስኦቴሳ ጌላታራ። 29 ማርኬሳ
 ካዲዳራ ማዮና ላግሮ፤ ዱዶዋ ክርሰቶሳ ምን ካዋቱን ጎጎየላሮክ ማለ እስኦቴሳ
 አምሳታራ፤ ካርካራታራ። 30 ኖና ካክርሰቶሳ ማርኮክ ምክታጆልና። 31 ሃንሱን

እባዶ አቦኬሳና አየቲሳና ኢሰረ፡ ኦርነ ዎታ ቁራናማራን፤ ላማ ዱባና ማር ኮ ላራን። **32** ሀት ሆል ታእቲ ሆልታ፤ ሂካና ካእማራ ክርስቶሳ ማራና ምን ካኤብ ማራን ማሱሳ የለረያ። **33** አየሱን ጎአመን ሂክ እየሰ እስና ፋካታራ፤ ሃንሱን ኤንተር ኦር እስኦቲሳ ኣን የላይረ ሆኔላቶ፤ ኦርና ኤንተርክሴ ሀካባጂቶ።

6 ይሶ! እስን ኦኡሙለራውን ጎታይ አጃጃማ፤ ሂክ ካዶትሳርያ። **2** “አቦካና አየታና ካባጂና” ካእማራ አጃጃ ካእብዲ ሃፋራ ካኮግራ ካሆራርጄ አጃጃያ። **3** ሂካ ካእብዲ ሃፋራና፡ “ካእመን ዱባ ኤካሮዋ፤ ሂካ ኡሊና ጌሰካካ ኤራሮዋ” ካእማሮያ። **4** ኦኡሙልቲታና! እስና ጎታ የሱሳ ዎጋ አጋልሰሳናይ፡ ቱኩል ኡምሳና ሀድሳ ጂናሳ ኳሬ ይሰክሰን ኢኦይ አሮማራርሴን። **5** እስን ድይጃል! ክርስቶሳን ጎጎአጃጃማታን ኡሊ ጎቶሌ ኦሌራኑን ካባጂይና አብሲ፡ ዎዳና ቱኩልቲ አጃጃማ። **6** እስቱሳይና እሶ ዶሌ ሳዳሚን አሌኖን ግራን ካክርስቶሳ ድይጃል እን ፈኢ ታዋ ዎዳናኮ ፈልን አጃጃማ። **7** እባዶ አንሌኖን ግራን ጎታውን ካሀንዳታን ላኖ አዴሳዴን ፈኢትሰኒ ዎዳናኮ ሀንዳ፤ **8** ኣላንትና፡ ድይና ሌረ ባልቻክ እባዶ ካፈላሮ ካእዳንክ እየሰ ዱባ ባርኣራ ጎታኮ ካእታይናሮ ላኖ ካሳንዋ። **9** እስን ጎቶሌ! እባዶ ሆረ ካኡሉልሶን ካክሰና ካክሶ ጎታ ዳሩሪ ካግሮ ሻዳ፤ አብሲሳኖ ኢሳዴን ድይልክሰኑን ኢዳን ፈላ። **10** ጎርታ ካጎታ ካእቲ ሁና አታዬን። **11** ኦዱርሳ ፈሎ ኦሚጌ ኔባይን ጎጎዳንዴታውን ካዋ ሁ ካጀረን ዱባ ሳርሳዬን። **12** ኖ ጀሬን ካንሻፋይናና እባዶን ዎታ አንሌኖን ግራን ሂካ ካሙጉድ ጌሲ ኦፈላራን ሞትጆልኔ፡ ኦዶናት ኦአባናና ሂካ አላምኮክ ሁናጆልን ጎርቱን ሂካ አማኖ ዳሩሪ ኦግራን ባቲክ እያናጆልን ዎታያ። (aiōn g165) **13** ሃንሱን ታሜላን አሪ ሁና ካዲና አዎዳዪን ጎጎዳንዴታኑና ካእመን ዱባና ጉድሰዴን አታይ ኦልን ጎጎዳንዴታኑን ካዋ ሁ ካጀረን ዱባ አባዬን። **14** ጎርታ ሩም ዝናራ ኣን ሞኦትሰን ሞዋዬዴን፡ ቁሉማ ላላ እን ሳርሳየንዴን፡ **15** ካኖጎዳ ዎንጋላ ከፈሮ እን ሉቃኦትሰኒ ታብሳዬንዴን ኤካሳየን አላ። **16** ሂካ ዱባኮና ኤለን ኣን ባልዳባልዳ ታእማቶ ታዱርሳ ዱኩቶ ዱባ ባሰን ካኮዳንደታን አማኖ ዎንተ እን ቄንፋዬን። **17** ፋይና ታመተ ጉሌ ኣን መተክሰኒ ካየን፤ ኡሱማለና እያና ቁሉክኮ ካሄላማሮ ሺፋ ኡሱና ሃፋራ ካዋ አባዬን። **18** አርጌቶ እያና ቁሉክ ቃጃላ ኤብና ጋላታ ሰሳ። ሂካ ጋራይና ዋ ካቁሎይሰሮ እባዶ ማራን ናባዳዴና አታዬንዴን ኤባየን። **19** ሆል ታዎንጋላ አብሰ ካላይ ጎጎፋሮ፡ ካኮኤሳሮ ጎራታና

ካደታማራ ሃፋራ ጎሰሰሰምሮ እና ኤባየን። **20** ግዳና ሳንሳላታ ሸያመረ እን ሂካ
 ካዋንጋላ ሀንዳ ካገገይሳሮያ። ሃንሱን እን ጎሰዶትሳሮ አብሰ ካላይ ጎሰኤሰሮ
 እን ኤባየን። **21** መይ ኦሮ ግሮና መ እን ፈላሮ ጎሰኤዳሳውን ካገላመራ አብካንና
 ጎታይ ካአብዳመራ ካሀንዳሮ ካሌራ ትክቆሳ ካአመን ዱባ እሰኑን ሰግሮዋ። **22**
 ሃንሱን ኖ ሞሲ ግኖ ጎሰማላብታኑና እሰና ጎሰኤታይሰሮን አመረ ኡሱ እሰን ቶሰ
 እን ፋረራ። **23** ዋ ኦዶኮና ጎታ የሱሳ ክርስቶሳኮ ሮጎዳና፣ ጌላንጀ፣ አማኖን ዋታ
 አቢላሉን ሀሌቶ። **24** ታንባኖን ጌላንጃ ጎታካን የሱሳ ክርስቶሳ ኦጌላታራውን
 ዱባን ሰኖ እሰን ሀሌቶ።

ፍልጲስዮሳ

1 የሱሳ ክርስቶስን ድይጆል ኦሌራን ጳውሎሳኮና ጢሞቶሳኮ፤ ምን ካዋክ ጃርሶለና ዳቆን ዋታ ታፍልጲስዮሳ ካታማይ ኦግራን የሱሳ ክርስቶሳይ ቁሉኒዕ ኦሌራን ዱባን፤ **2** ዋ አቦካንኮ፤ ጎታካን የሱሳ ክርስቶሳኮ ሰኖና ሮጎዳ አሰኑን ሀሌቶ። **3** እስን ታኮሻድሮ ቶቶ ዋኬ ጋላታራ። **4** አርጌቶ እስን ዱባ ማራን ጎሌባሮ፤ ገጌሎይ ኤባታራ፤ **5** ታሆራርጄ አርኮ ሀጋአብተዴን ታ ግዳ ጌታኒ ዋንጋላ ሀንዳይን ኢነ ዋታ ፈልቴታን። **6** እስኒ ፈሎ ኦኢዳኒዕ ካሀጋአበራ ኡሱ ክርስቶሳ የሱሳ ታኤማታሮ አሪ ታ ጌሮን ፈል ካጉድሰናሮ እን አዳሳራ። **7** ዋዳናቴይ ማንኩግታን ማራን፤ እስን ዱባን ሃ ቆፓኖ እን ጋራያ፤ ሻማኖኬይና ሌረ ታዋንጋላ ሩሚን ጀሬን ሻፋታናይና አታይሳኖይ ዱባና ኢነ ዋታ ሰኖ ታዋ ኦአታቴታን ሌቴታን። **8** ካክርስቶሳ የሱሳ ነኔኤይሳኖ እን እስን ዱባን ኤግታክ ሀልቻ አቦ ዋ ኢን አቶኬያ። **9** ጌላንጀትስን ቃሩማ ታአቲይና ሻዳኖ ዱባ ጂናይ ጎጎባላአቶን ኢነ ኤባታራ፤ **10** ሀክና ዱባንኮ ካሮራሮ አሳብ ጎጎአዴሳዉን፤ ክርስቶሳ ታኮኤመታሮ አሪ ጊን ሙጭ ኦአንቴና ቱፍ ካላይኒዕ ጎጎሌታዉንያ። **11** ዋዉን ካባጃና ጋላታ የሱሳ ክርስቶሳኮክ ጋራን ታሄላማቶ ታቁሉማ አሊ ጎጎአማጋንታዉንያ። **12** አቢላልቴ! እን ጉት ካጌራ እየስ ዋንጋላ ኣሎ ጎጎባልአሮን ጋርጋራኖ ጎጎአዴሳዉን እን ዶታራ። **13** ሂካኮ ካከይ ሻማኖክ ክርስቶሳ ማራን ላኖ፤ ምን ካዋኖ ካኦራሮይና ካካለ ዱባ ዶሌ አዴሳመራ። **14** ሻማኖኬኮት ኣላንቲ ጎታይ ታግቶ አቢላልኮ ታሞጋን ሃፋራ ታዋ አብስካላይ፤ ጃቡይ አዬስን አታን ሄላታታ። **15** ኮኮ ቤላማኖኮ ካከይ ኦካለ አደን ፈኢ ታኢዳንኮ ካከይ ክርስቶሳ ላላባናን። **16** ሂኒዕ ፈኢ ታኢዳኒ ክርስቶሳ ኦላላባራን፤ እን ዋንጋላን ሞአባይን ምን ካሻኖ ግራኖ ማንኮካሳን ማራን፤ ጌላንጄ ሂካ ፈላራን፤ **17** ኣኒዕ ቤላማኖኮ ላላማኖኮ ካከይ ዋንጋላ ኦላላባራን አደን እን ሻመ ግራን ራኮ እን ጉት አታይሲን ቆፔሬን ኢዳነይ አሌኖን ግራን ሀልቻ ካክሶ ማራን ክርስቶሳ ላላባና። **18** ሀያ ቃራ መያ? መተክ እየስ ኢዳነይ ሌረ ፋኬሳኖይ ማኤክ ራዲና ክርስቶሳ ላላባናያ። ሂካኒና እን ገጌላታራ፤ እን ካገገላይሳራና፤ **19** እን ጉት ካጌራ እየስ፤ ኤብክስን ማራንና ካየሱሳ ክርስቶሳ አያናኮ ታሰሳንተቶ ጋርጋሩማና ፋይናኬዉን ላኖ እን ካሶዋ። **20** ማምስክ ራዲና ሙል ጎጎሙቶንኮ ካአቲ ሀልቻና አብድ አባ፤ እየሱን ጎአመን ካሆርኮ እን ህታር ግሪና ሌረ ጎይ ክርስቶሳ

ሶኦቴይ ጎሳካባጃምሮ ታኦቲ ጃቡ አባ። **21** ሃንሱን ኢን ግር አማኖ ክርስቶስ ግራኖያ፤ ጎይ አማኖና ዋረኤ ካኮሃላማሮ እዬሰያ። **22** ሀሌዎ ኳሬ አንጎኖን ጎአዳላየ፤ ታመታታ ኢል ግርናታ፤ እየሱን ጎአመን ኤክ አሳባይናሮ አን ላካሶ። **23** ሂናኣ ላማ ጫናቃማራ፤ ሴይረ ክርስቶስን ዋታ ግርን ሀልቻራ፤ ሂክ ኣሎ ካእዳንክያ። **24** እየሱን ጎአመን አንጎኖን ግራኖክ እሰኑን ኣሎ ካእዳንክያ። **25** ሂካ ሻዳ አማኖ ጎጎጂናታወና ጎጎገገላታወን እሰን ዱባ ዶሌ እን ካእዳላይናሮና ካግርናሮ አዳሰራ። **26** አድና ኤመይረ እሰን ዶሌ ካኮግርናሮ ጎራታይ ኣላንቲቲይ ክርስቶስ የሱሳ ኦኣብታን ገጌሎኦትሰን ጂናይናራን። **27** ካክርስቶስ ዋንጋላ ካላሉን ጎጎዶትሳሮ ግራ፤ ሂክ ጎሌ ኤሜይ እን እሰን ጎዳና ጎርቱን ፋክመ ግራን ጋራክሰን ጎማለ፤ ካዋንጋላ አማኖይ አባዶ ኮ ኣን ሊዴን ጀሬን ሻፋታ እያና ኮይ አታይ ኣላኖክሰን ካሶዋ። **28** ማምሰክ ራዲና እሰን ኦድዳራን አሮሻላጋንተን፤ ሂክ እሶ ካኮባይናራና፤ እሰን አድ ካኮፋይናታን ዋኮ ካሰሳመሮ ማላታያ። **29** ክርስቶስ ጎጎአማንታወን ካላ አንሌኖን ግራን ኡሱ ማራን ራኮ ጎጎአታታወን ህት ሰኖ እሰኑን ሰሳንተታ፤ **30** ሃንሱን ግዳ ኢን ዋታ ራኮ ኦአታቲታን ሌቲታን። ህት ራኮና ሂታኮ ሆረን እን ግያኖ ካዳተታና ግዳና እን ግያ ግራኖ ካማላታንያ።

2 ክርስቶስን ዋታ ካኣብታን ኮ ላኖኮ ካከይ ማምሰክ አታታኖ፤ ጌላንጀኮ ካሌ ጎጎኢሳኖ፤ እያና ኮ ላኖ፤ ሻጋና አንጀረ እሰኑን ጎግሬን፤ **2** ያዳ ኮይ፤ ጌላንጀ ቶይ፤ እያና ኮይና ሀልቻ ኮ ላኖይ፤ ገገሎኦቲ አዳሰሳ። **3** አንጀሬ አማጋማዴን ካካለ አባዶ እሰንኮ ካሮራሮ ኣን ቶታ ኳሬ፤ እሰ ጌላታኖ ጎርቱን፤ “እንኮ ካካለ አዮያ ካግራ” አማ ላኦ ካላይክ ጋላታ ሄላይን ኮና አሮፈልቲን። **4** መተመተክሰኒ ካካለቲን ላኦ ካሰሰሮ ሻዳ ኳሬ፤ እሰኦትሰን ኦላሉን ላኦ ካሰሰሮ አሮዳተን። **5** ክርስቶስ የሱሳ ታግቲ ሀሴ ቆፋ፤ እሰን ዶሌና ሀግርተ። **6** ኡሱ ያዳሊተሳ ዋ ላ ግራን፤ ዋ ላኖኬሳ ኡሱኮ ካሳማመሮ ኣን የላተ ላኮቶታተሮ፤ **7** እየሱን ጎአመን ድይ ኣን ሌረ፤ ምዲ ታአባዶ ማለ አላተረ፤ እሰኦቲሳ ሀላል የላተ። **8** አባዶ ሌ ኤመተረ፤ እሰኦቲሳ ሁሰሳተ፤ ታ ጎሮን፤ ሀሱዋና ማሰቃሊ ጉት ታ ጎሮን ካእጃጃመ ሌ። **9** ሃንሱን ዋ ኣሎ ጦቂሰ፤ መገ ዱባኮ ካሮረ መገ ኡሱን ሰሰ። **10** ህክና ዳሩርና ኡል፤ ኡልኮና ሃገሌ፤ ግልብ ዱባ መገ ካየሱሳን ጎጎግልቢሰሮንያ፤ **11** ኤሬብ ዱባ ዋ ኦዶን ካባጃ ሰሰን፤ የሱሳ ክርስቶስ ጎታ ላኖ ጎጎአቶትሮንያ። **12** ሃንሱን፤ ኦጌላታሮ ኦቲ! አርጌቶ ኦእጃጃማታን

ጎሳሌታን ማለ፡ ግዳና እን እስን ዶሌ ግራን ካላ እንሌኖን ግራን፡ ሱረዋ ግዳ
 እን ካኮግኖን ጎራታ አብሲና ሀርአኖይ ፋይናክሰኑን ፈላዬን፤ **13** ታኢዳን ፈኢቲሳ
 ማራን ዋ አጃጃማኖ እስኑን ሰሳ፡ ሀልቻኬሳ ፈሎ ሀይሲን እስን ኦሮ ፈላራ። **14**
 ማምሰክ ኮኮና ሀጉምጉምኖና ሀደጋሞን ፈላ፤ **15** ህትና ታዋጫጫንተ ታሜላን
 አላታን ኦሮ ሙላና ቱፍ ካላይኒዕ፡ ኦሙጭንቴን ይሰ ካዋ ሊዴን፡ ባራጃ እን
 አላም ዱባን ጎሳህንቃይታወንያ። **16** ህክና ካኮንሊናራ ግር ካኮሄላማሮ ሃፋራ
 ሀኢሶን አታይሳይ አባታኖያ፤ ሂካማሌ ትያኖኬ ሌሪ ፈሎኦት ላኦ ካላይኒዕ
 ሊ ጎሳህንኮ ክርስቶሳ አባባተ ታኮኤመታሮ አሪ እን ካኮዲዳራ አላንቲ እን
 ግቶዋ አማኖያ። **17** ዋወን አማኖይ ካሰሳታን ጃርሶና ሀንዳኖ ጉት ግርክ
 ካአዳማራ ጃርሶ ሊ ጎሰሳመና እን ገቤላይሳራ፤ እሰና ኢን ዎታ ኦገገላታን
 ሌታን። **18** ኡሱማሌ እሰና ገገላይደን እና እሰኔ ዎታ ገገሎኦትሰኒ ካገገላታሮ
 የልናታን። **19** ጋራክሰንክ እየሰ ማልረ ገቤላይን፡ ጢሞቶሳ እሰን ቶሰ ሳም
 ፋርን ጎታ የሱሳ አብድ የላታራ። **20** ዎዳናኮ እሰን ካሻድራ ጢሞቶሳ ኣንክክ
 ካካለ አባዶ እን ላኮአቦ። **21** ዱባና ካየሱሳ ክርስቶሳ ሀልቻ እንሌኖን ግራን
 ፈኢትሶክ ሀልቻ አማጋዬን ኦትታራንያን። **22** እየሱን ጎአመን ጎሳካሳኒ ጢሞቶሳ
 እሰኦቲሳ አቶትሳተራ፤ ኤረ ኦዶን ዎታ ጎሳህንዳሮክ ማለ፡ ኢን ዎታ ፈሎ ኦዎንጋላ
 ሀንዳየራ። **23** ጎርታ ሆረንባን ካልናሮ ጎቁሌሳየ ጢሞቶሳ እሰን ቶሰ ፋርን
 አብድ የላታራ። **24** እን መተኬወን ሳም እሰን ቶሰ ኤመይን ጎታይ አብዳታራ።
25 ኡሱማሌና አቢኬ፡ ካፈሎ ሳትኬና ኢን ዎታ ዎታዳራ ካሌሮ ሊን ካዶትሳሮ
 ዱባ ጎሳጋርጋሮን እሰን ኢን ካፋርተታን እሰኑን ካህንዳረክሰን አፍሮድጡ አባብ
 ጎሳፋርን ካዶትሳሮ ሌ ኢን ሙተራ። **26** ኡሱ እሰን ዱባ ሀልቻራ፤ ሀወአማኖኬሳ
 እሰን ማንኮማልተታን ማራን ያዳራ። **27** ሩምና ኡሱ ሀወአመረ ጎይን ጋባላመረ፤
 ዋ አደ ሻጋ የለራ፤ ጋዳ ጋዳ ጉት ጎሳአዳሞንኮ፡ እዬኔ ኳሬ እሰን ኦላሉን ላኮኖ።
28 ሃንሱን ኡሱ ካላም ጎዴተን ጎሳገገላታወና ያዳክና ኢን ጎሳፋዳሮን ፋርን
 አሎ ሀልቼራ። **29** ገቤሎ ኦኢዳኒ ካጎታ መገ አታዬን፤ ኡሱ ኣንክክ እባዶና
 ካባጃ። **30** ኡሱና፡ እሰን ሰሰን ካዳንዴኖን ሀንዳ አማገን አማ ኔፎቲሳና
 ሀሃኡሳኖን፡ ፈሎ ኦክርስቶሳን ጎይ ህኢ ጋባላመ ግራ።

3 ጎርታ አቢላልቲ! ጎታይ ገቤላየን፤ ኡሱዋ አባብ ጎዳፈ እን ላኮህፋቺሳሮ፤
 እሰኑና ላኦ ሰሰሮዋ። **2** ሀሱ ከሮርኮ እሰኦራዬን፤ ሜላን ካፈላሮኮና ካጣራ

ሀማጽሳማኖ ኦክጋልሰሳራንኮ እስኦራዬን። 3 ኖና፡ አያና ካዋይ ኦሄደይሳታኖና ሳሬ ካሙታሮ ሴራ አሌኖን ግራን የሱሳ ክርስቶሳ ካላል ኦዳዳታኖ ማንኮሌን ማራን ሩሚ ሀማጽሳምነና። 4 ጎዶትስ አንና ሶይ ካኮጣዳሮ አባ፤ ማዮና ሶይ ካኮጣዳሮ እየስ ካአቦ እን ጎሌና፡ እን አደ ሮራራ። 5 እን አላየረ እሪ ታስዴድ ሀማጽሳመራ፡ አላታኒ አደ ታቢንያመ ኣኒኮ ካኡሙላመሮ ካእስራኤል እባዶያ። ሂካኮ ካከይ እን ካአዴሳመ ካኢብራዊ እባዶትያ። ካአይሁድ ሴራ ኦራታኖኮክ ጋራይ አደ ካፋራሳው እባዶያ። 6 ጋራ ካቃናቴይ ጎሌ፡ እባዶ ካዋ ካሆሮራረየ፤ ሴራ ኦራታኖይ ታሄላማቶ ሩሚን ጎአመን እን ቱፍ ካላይ ግረ። 7 እየሱን ጎአመን ኢን ላኦ ካስሳረ ዱባ ግዳ ክርስቶሳ ማራን ላኦ ካላይክ ኣን ቶቴራ። 8 ሂካኮና ሮርስ ኡሱን አመረ እየስ ዱባ ካኮንኢስሮ ካነአብራን ካኮግኖን ጎታኬ ክርስቶሳ የሱሳ ማላባኖኮክ ጁናን ዋታ ጎሄረግስሮ፡ እየስ ዱባ ላኦ ካላይክ ኣን ቶቴራ፤ ኡሱ ማራን አመረ ዱባ ዋየራ፤ ክርስቶሳ የላይን አመረ ዱባ ካማድኖን ሻካር ኣን ቶቴራ። 9 ኢን ሴራ ኦራታኖይ ታሄላማታ ቁሉማ ግርተደ አሌኖን ግራን፡ ክርስቶሳ አማናኖይ ሂካ ዋኮ ካኤሜታሮ፡ አማኖኮ ታሄላማቶ ሩም ኡሱ ዶለኮ ጎሃሄላንቶንያ። 10 ክርስቶሳና ጎይኮ ክያኖኬሳኮክ ሁና ጎሃማላብሮን፡ አቦሳኬሳ ካሄዴዳማሮ ሊን፡ ጎዋኖዬና ኡሱ ኣን ሊን ሀልቻራ፤ 11 ጎይኮ ከያኖ ቶስ ጊን ሀልቻራ። 12 እን ሂካ ዱባ ሄላየራ ጎርቱን ልክኪ ሌራ አማኖ ላኮኖ፤ እየሱን ጎአመን ክርስቶሳ የሱሳ እን ካኬሳ ካኮየለሮ፡ አንና ካኬ የላይን አታይናራ። 13 አቢላልቱ፡ እን ጋና ካአባየሮ እን የላየረ እስኦቴ ላኮቶታታሮ፤ እየሱን ጎአመን እየስ ኮ ፈልናራ፤ ካሃረ ኢሎታ ሆረን ካግሮ አብን አታይናራ። 14 ዋ ክርስቶሳ የሱሳ እን ኤልዴስ ማንኮኡመሮን፡ ባርኣራ ማንኮሄላይናሮ ጊን ሆርዶፍናራ። 15 ጎርታ ግር ካአያና ኦኦታኔና ኖ እየስ ዱባ ሂካማሌ ድያኖ ዶትሳራ፤ እየስ ኮኮይ ካለካለክ ያዳ ጎግረ፡ ዋ ኡሱ አዬንሳ እስኩን ቱስሮዋ። 16 ጎሌና ግዳ ካኮጌንኖ ኡሱይ ግርና። 17 አቢላልቱ! ማሱሳኬይ ግርን ኢን ዋታ ላ፤ ኖ ካቱንሰኖ ማሱሳ ማለ ኦግራና ሻዳ። 18 ኣላንቲና ሂታኮ ሆረን አደ አደ ጎሃሰጌሮ፡ ግዳና አደራ ሱረዋ ኦታ ሰጋራ፤ ኦዋጋን ታክርስቶሳ ማስቃሊውን ዲና ሌን ሰሴታራን። 19 ጋቾትሶና ባይያ፤ ቦግክሶና ሄዶክሶያ፤ ካባጃትሶና የራንክሶታ፤ ዋዳናትሶ ካኮንግታ እየስ ካኤሌቱንያ። 20 ኖዬን አደ ኡልካን ዳሩርያ፤ ኤስኮ ካኤሜታሮና ካፋይሳሮ፡ ጎታ

የሱሳ ክርስቶስ ሀልቻ ኦራታና። 21 ኡሱና ዱባ ኡሱን ካኮአምንሰሰሮ ሁና ካባጃሚን ሶኦቲሳ እን ጎሳራውን ኦባራታን ሶኦታን ኢግልሰናራ።

4 ሃንሱን እን ኦጌላታሮና ኦሀልቻሮ አቢላልቲ! ገገሎኦተና ካላቻኬ ኦሌተታን፤ ኡሱማለና ኦጌላታሮኦቲ! ሂካማሌ ጎታይ አታዬን አላ። 2 ኤዎድያናና ሰንጠክ አስአስኦሮ መገ ካጎታይ ቆፋ ቶይ አስአት ጎሳራውን እን አሶ ኤባታራ። 3 እ፥ አት ካአብዳንተ ፈሎን ኡና ካሌተታ፤ ዋንጋላ ገጌሳኖኮክ ጋራይ ኢና ቀልምጦሰን ዎታ፥ ኡሱማለና መገክሶ ካግር ማጻፋ ኦጻፋመራንኮ ኦካለ ኦፈሎ ኡናቲን ዎታ ኦዳፋረራን ሂናኦ ሄለልጂ ጎሳጋርጋርታውን ኤባታራ። 4 አርጌቶ ጎታይ ገጌላየን፤ አደና አማራ ገጌላየን። 5 አዳነትሰን አባዶ ዱባ ዶሌ ታኦዳሳንተ ሀሌተ፤ ጎታ ኤነያ። 6 አየሰ ዱባ ኤብና፥ ኮ ካካለቲን ኤባታ ጋላታን ዎታ ሆሲንትሰን ዋውን ሰሳ ኳሬ ማምሰክ አየሱና አሮጫናቃንቲን። 7 ማላባኖ ካአባዶኮ ታሮራቶ ሞሳ ታዋ፥ ዋዳናትሰኒና ቆፋትሰን ክርስቶስ የሱሳ ኦራራ። 8 ጎርታ አቢላልቲ! ሩም ካሌሮ ዱባ፥ ካባጃ ካሌሮ ዱባ፥ ልክኪ ካሌሮ ዱባ፥ ካሙጭመ ዱባ፥ ካገጌላይሳሮ ካሌሮ ዱባ፥ ካአዳንክ ካሌሮ ዱባ፥ ኢዳነ ጎሌተና ጎርቱን ጋላታ፥ ሂካ ኣንክክ አየሰ ዱባ ሻዳ። 9 እንኮ ካአጋልሳተታን ጎርቱን ካአታቲታን ዎጋ፥ ካማልቲታን ጎርቱን ካዳተታን ማምሰክ አዬንሳ ፈላ፤ ካኖጎዳ ሄዶ እስኔ ዎታ ልናራ። 10 ጎራታ ካምጋንኮ አባባተደን አደን እሰን ጋራኬ ሻዳኖ ማንኮሀጋአብቲን ማራን፥ እን ጎታይ አሎ ገጌላይሳራ፤ ኦግራን ፈሎይ ቱሰን ኢድሊ ላኮአባናይተን ኳሬ ሻዳኖ ሻዳ ግቲን። 11 ሂካ ካኮንአማራ ማንኮራካየ ማራን ላኮዮ፤ ኣላንቲና ማምሰክ አየሰ ኦሮና ኢን ካግራ ሌራ አማኖ አጋልሳየራ። 12 ሄላታኖና ሌረ ዋቲና እን ካሶዋ፥ ጎባራረና ሌረ ጎኡኤና፥ ጎሄላየና ሌረ ጎዋየ ማኤት ባንኤና ሌረ ማኤክ ጎራታና ኢን ካግራ ሌራ አማኖኮት ሆል አጋልሳየራ። 13 ሁና ኢን ካሰሳሮ ኡሱ ዱባ ፈልን ዳንዳራ። 14 ጎሌና ራኮተ ኦሄዳዳማታን ማንኮሌተን ማራን ታኢዳን ፈልቲታን። 15 ሂካኮና ካሮረ፥ እሰን ታፍልጲሰዮሳ ካታማኮክ አማኒል እሰን ጎሳካሳኒ፥ ሆራርጀዋ ዋንጋላ ካኮአታተቲን ጎራታ መቀዶንያኮ እን ካኮክያረ ጎራታ፥ እሰንኮ ኳሬ ሰሳኖይና አታታኖይ ካካለ ምን ካኤብና ኮና ላኮሰሰ። 16 ታተሰሎንቄይ ካታማይ ካኮግሬ ዱዶ፥ ራኮተይ ግዳግዳ እን ጋርጋርሳ ፋራቲታን። 17 ህክና ላኦ እሰኑን አዳማ ጎሳሴቶን ኳሬ አላቦ ሀልቺረ ላኮዮ። 18 ካዶትሳሮ ዱባ፥ ካዶትሳሮኮና ሮርሳየ

አታዩራ፤ ካፋርተታን እላቦና ገነ ታአፍሮድጡኮ አታዩ ኢን አማጋመራ፤ ህክና
 ኡርት ታኢዳኒ ካአማጋመሮ፤ ዋይ ዶሌ አታማኖ ካአቦና ካገጌላይሰሮ ጃርሶዖ።
19 ሄዶክና ታንጂንት ዱርማቴሳክ ጅልባ እሰኑን ካዶትሳሮ ዱባ ክርሰቶሳ የሱሳ
 ሰሰሮዋ። **20** ሄዶካኑና አቦካኑን ጅሮማኮ ታ ጅሮማ ጌሮን ካባጃ ኡሱን ሀሌቶ፤
 ሀማኒዕ። (**aiōn g165**) **21** ቁሎለ ዱባን ክርሰቶሳ የሱሳ ኖሳዳቴ ገጊሳ። ኢነ
 ዋታ ኦግራን አብላልና ኖሳዳ ፋራማራን። **22** ቁሎለ ዱባ ካካለኮና ካሮም
 ዋኖላሉን ዋኖ ካለረኮክ ካምነ እባዶ ኖሳዳ እሰኑን ፋራማራን። **23** ታጎታ የሱሳ
 ክርሰቶሳ ሰኖ እሰኔ ዋታ ሀሌቶ፤ ሀማኒዕ።

ቆላስያሳ

1 ፈኢ ታዋይ የሱሳ ክርስቶስ ካፋራመሮ ጳውሎስና አብካን ጠሞቶሳኩ፤
2 ቆላስያስ ኦግራን፤ ክርስቶስ ዌሎላና ታክብዳንቴ አቢላሉን ዋ ኣቦካንኮ ሰኖና ኖጎዳ እስኩን ሀሌቶ። **3** ኖ እስን ማራን ዋ ካኮኤባታኖ ጎራታ ጎታካን የሱሳ ክርስቶስካ ዋ ኦዶ አርጌቶ ጋላታና። **4** ኣላንቲና የሱሳ ክርስቶስ እስን ካክብታን አማኖና ዌሎላ ዱባን ታክብታን ጌላንጀ ማልኔና። **5** ህክና ካኮንሌራ ዳሩሪ እስኩን ኤካቴ ታግቶ አብድኮ ካኬይያ፤ ሃንሱን አማኖ ካሩም ዋንጋላኮክ ሃፋራይ ጣይተን ማልቲታን። **6** ህክና እስን ቶስ ጌራ። ሂካ ዋንጋላና ካኮማልቲተንኮና ሰኖ ታዋ ሩሚ ታኮኤዳስተን አርኮ ሀጋአበረ አላም ዱባ ማራሙረ ፈላ ጎጎግሮ ማለ እስን ዶሌና ኢል የላታና ጂናታ ግራ። **7** ሂካና ኖ ማራን ክርስቶስን አብዲ ካሀንዳሮ ካሌራ፤ ኖኔ ዋታ ፈሎይ ካግራ እባዶ ዱባ ካጌላታራ ኤጳፍራ እስን አጋልሰሰራ። **8** አደና እስን እያና ካዋይ ታክብታን ጌላንጀ ኡሱ ኖን ሰገራ። **9** ሂካኮ ካከይ ኖ አንዴ ሂካ ታኮማልኖ አርኮ ሀጋአበኤ ዋ ፈኢቲሳክ ማላባኖ ታእያና ቃሩማና አዳሳኖ ዱባ እስኩን ጎጎአማግሮን እስን ማራን ኤብና ካካላቱን ኤባታኖ ላኮኢንሰኖ። **10** ካኮንኤባታናና ጎታውን ጎጎዶትሳሮ ሊ ጎጎግሮታውና ዱባይ ኡሱ ጎጎጌላይሳውንያ። ህክና ፈሎኦኢዳን ዱባይ ኢል የላታ ዋ ማላባኖይ ጂናታ፤ **11** ካኦቲ አታንና ኡብስ ጎጎግሮቶን፤ ካካባጃመ ሁናኬሳኮክ ጀልባ ሁና ዱባይ አታታ፤ ገጌላታ፤ **12** ታቁሎሌ ርቲ ኢፋይ ኦአታታኖ ጎጎሌኖን ካየለሮ ኦዶ ጎጎጋላትታውንያ። **13** ኡሱ ካሙጉድ ሞቲኮ ቤስረ፤ ኡሱ ካጌላታሮ ኤረኬሳኮክ ዋኖናት ቶስ ኖ ታብሰ። **14** ዋዶ ላኖኬሳኮክ ኢግ ጨቦካንውን ሻጋ ሄላኔ። **15** ክርስቶስ ካሙቶን ዋውን ካሩም ማሱሳያ፤ ኡሱ መጣ ዱባኮ ጦቂ ካአመ ካኦቲና ባርክያ። **16** ካመን ዱባ ኡሱይ መጣመራ፤ ዳሩርና ኡል ካግራ፤ ካሙታራና ካሙቶን፤ ኮርፍንጀ ጎሌና ጎርቱን ሁናል፤ ሞትጆል ጎሌና ጎርቱን ኦዶናት ኦባሪሳራን፤ ካመን ዱባ ኡሱኮና ኡሱንዋ መጣመራ። **17** ኡሱ ካመን ዱባኮ ካሆሬያ፤ ካመን ዱባ ራቶ እስአባተ ካኮጣባተራ ኡሱይያ። **18** ኡሱ ማርኬሳ ካሌሮ ምን ካዋውን መተያ፤ ካአመን ዱባን ካሆሬ ጎጎሌኖን ጎይኮ ከያኖን ባርክያ። **19** ዋ ካመን ዱባ ኡሱይ ጎጎሌኖን ጌላተራ። **20** ማስቃሊ ጉት ካኡባተሮ ኢግኬሳ ኖጎዳ ሰሳኖይ ኡልና ሌሪ ዳሩሪ ካግሮ ዱባ ጋራኬሳን እስኦቴሳን ዋታ ዋጋርስ። **21** ታማላን

ቆፋትሰንኮ ካከይ ጣይተን ዋኮ ፋክ እንቴን ፈኢትሰኒ ዲና ሌተን ግቴን። 22 ግዳ ጎአመን ሙላና ቱፍ ካላይኒዕ ቁሎላ የል እሰን እሰቶሰ ጋባሊን አመረ ጎይ ካክርሰቶሳኮክ ጋራነ እሰን ዋጋርሰ። 23 ህክና ካኮልናራ እሰን አማኖክሰኒ ጣባይዴና ኤካይደን አላኖይ ታማልተታን ታዋንጋላ አብድኮ እንሻላጋሞን አታይ ጎግርቴንያ። እሰን ካማልቴታና ዳሩርኮ ሄገሌ ታግቶ መጣ ዱባን ካላላባመሮ ዋንጋላ ሂካያ፤ እን ጳዉሎሳና ሂካ ዋንጋላን ካህንዳሮ ሌራ። 24 እሰን ማራን ታአታየሮ ራኮውን ግዳና እን ገጌላታራ፥ ክርሰቶሳ ማርከሳ ካሌሮ ምን ካዋ ማራን ታአታተሮ ራኮኮ እን ታህንቃተቶ እሰአተይ አማግናራ። 25 እን ሃፋራ ካዋ እሰኩን አሎ ጎጎሰግሮን ዋኮ እን ታሰሳንተቶ ሀዳራይ ምን ካዋውን ካህንዳሮ ሌራ። 26 ሂክ ሃፋራና ካሮረሮ ጌሰጃልና አላታን ታአባዶኮ ሰያመ ሆል ሌ አዳላተ ግረ፥ ግዳ ጎአመን ቁሎሌውን ሙተራ። (ai፡on g165) 27 እሰን ዋ ህታ ሆልኮት ካባጃና ዱሩማ አይዛብ ኦሮ ኤግታትቶ እዳሰሰን አሳበ፥ ታካባጃ አብድ ካሌራ እሰን ኦሮ ካግራ ኡሱ ክርሰቶሳያ። 28 ኖና እባዶ መተመተይ ክርሰቶሳ ቁሉክ የል ኬኒን ጎጎዳንዴኖን፤ እባዶ ዱባን ቃሩማ ዱባ ማርካሰሳና አጋልሰሳ ጋራ ካክርሰቶሳ ላላባና። 29 አንና አታኒ እዬ ኦሮ ካፈላሮ ሁናኬሳይ ሞአባታ ሂካ ሀልቻን አጸማራ።

2 እሰን ማራና ሎዶቅያይ ካግሮ እባዶ ማራን ኡሱማለና በቤድቴ ዲ ካካሶን እባዶ ዱባን ኤክ ግታክ ዳፋራሮ እሰን ጎጎአዴሳውን ዶታራ። 2 እን ካኮንዳፋራራና ዋዳናትሶ ጎጎአሰና ጌላንጃይ እሰአትሬን፥ ታኢዳን ሻዳኖ ዱባይ ዋረኤ ሄላታኖይ ሆል ታዋ ካሌሮ ክርሰቶሳ ጎጎማላብናውንያ። 3 ጎላተ ታግታ ታቃሩማና ታማላባኖ ዱሩማ ካኮሄላማታ ክርሰቶሳይያ። 4 ሂካና እን ካኮንአማራ ማዮና ካሶሶይሳሮ ካማላን እየሰ እሰን ጎጎሶቦንኮ አመረያ። 5 ሶይ እሰንኮ ጎፋክአመና ሱረ አያናይ እን እሰኔ ዋታ ግራ፤ ዋጋ ካኢዳኒ ግራኖክሰና ክርሰቶሳ ካአብታን ካጣባተ አማኖ ኦአብታን እሰን ካኮደያረ ጎራታ እን ገጌላየራ። 6 ጎታ የሱሳ ክርሰቶሳ ጎጎአታቴታኒ ኡሱ ግራ። 7 ኡሱ ጣባይዴና ሙጭማዴን ጎጎአጋልሳተታን ማለ አማኖክሰኒ አታዬን ግራ። አማጋም ካሮሮ ጋላታ ዋውን ሰሳ። 8 ክርሰቶሳ ጉት ካጣባተሮ አሌኖን እባዶ ካካየሮ ዋጋና ሂካ አላም ካማድኖን ሴራ ጉት ካጣባተሮ ካመጣና አዳክ እዬሲ ማዮና እሰን ቦጅ ጎጎአቶንኮ እሰኡራዬን። 9 ሄዶ ላኖኬሳኮክ አማጋማኖ እባዶ ሌ አዴሳመ ካኮግራራ ክርሰቶሳይያ።

10 እስን ካለማጋመ ግር ካኮሄላቴታን፥ መጣ ዱባ፥ ሞትና ኦዶናት ኦኦባን ዱባን ጉት መተ ካሌሮ የሱሳይያ። 11 እስን ኡሱ አማናኖ ሀማጺሳንተታን፤ ሂክ ሀማጺሳማኖክስን ጨባልየኮት ታሶዩ ያዳሊ ባስን ክርስቶሳይ ካፈላመሮያ ኳሬ ገነ ታአባዶይ ካፈላመሮ ላኮዮ። 12 ካኮጣማቃንቴን ጎራታ እስን የሱሳነ ዎታ ቃማላንቴደን ኡሱነ ዎታ ጎይኮ ከቴታን። ጎይኮ ካኮከቴታና ክርስቶሳ ጎይኮ ካኬሰሮ ሁና ካዋይ አማናኖይያ። 13 እስን ጨቦ ፈላኖዬና ጨባለይ ሶኦትስን ሀማጺሳታናዋትኮት ኣላንቲ ጎተን ግቴን፤ ግዳ ጎአመን ዋ እስን ክርስቶሳነ ዎታ አርዶኒዕ የለራ፤ ጨቦክስን ዱባና ሀሄሶ አመራ። 14 ኡሱ ሀሴ ኖ ሞታና ኔባታ ሴራይ ታግቴ ታአንዛ ጹፊ ባስ፤ ማስቃሊ ጉት ምስማረ ኦዋመረ ኖኮ ባስ። 15 ኦኦቴና ኦዶናት ኦባሪሳራን ማስቃልይ አዋደረ ሙዋኖክሶ ፋርስስ አባባተረ ኦቦጃማራን ሊ ዱዱብ ጎጎሙትናውን የለ። 16 ጎርታ አሞይ ጎርቱን ጣሞይ፥ ባላ ጎርቱን ካድግኒ ዎጋ፥ ጎርቱን ታፎልሲ አሪ ካባጃኖኮት ኣላንቲ ማዮና እስን አሮፍርድና። 17 ሂክ ዱባ ሆረንባን ኤመይን ካግሮ አየሱን ሆስያ፤ ሩም ካኮሄላማታ አደ ክርስቶሳይያ። 18 አካማሌት ኢዳነይና ኤርግቻል ሄዶይሳታኖይ ካዳዳታራ ማምሰክ አባዶና እስን ላኦ ካላይ ጎጎሃሶንኮ እስኦራዬን። ሂካ ኣንክክ አባዶ ካደያሮ ራጋይ አስቁሎይሳታ ላኦ ካላይክና ታሶዩ ቆፋይ ኮራራ። 19 ሂካ ኣንክክ አባዶ መተ ካሌሮ ክርስቶሳነ ዎታ ኤሴላ ቶና ላኮአቦ፤ ማር ዱባ ምክታሊ ኢንስ ኤስልሰረ ካአምሳሮ መተያ። ዋ ማር ዱባን ጂናን ካስሳራ ሂካማሌያ። 20 ክርስቶሳነ ዎታ ጎተደን ሂካ አላምኮክ ካማድኖን ዎጋልኮ ዱዶ ፋክ ኦኦንቴን ጎሌተን፥ ሀያ ግዳ አላምኮ ካፋክሞንግታን ኣን ሌተዴን ሙን ሂካ ኣንክክ አጃጃሉን ኢምናማታን? 21 ሂክ አጃጃልና፥ “አሮኡብተ፥ አሮቃማሰተ፥ አሮድንተ” ካአማሮያ። 22 ሂክ ዱባ ሀኢ ታአባዶ አጃጃልና አጋልሰስ ጉት ካጣባተሮ ማንኮሌ ማራን ፈሎ ጉት ሀይ ካኮአባባተ ጎራታ ባይን ኦኤካተራንያን። 23 ሂክ አጃጃል ፈኢቴሳኮ ካከይ ሄዶይሳታኖና አካማሌት ኢዳነ ማርኬሳ ኑጉላይሳታኖ ክንትቢ ማንኮአባታራን ማራን ቃሩማ ኦኦባን ኣን እሶን ላራ። አየሱን ጎአመን ካሶዩ አማላክሶ አዋዳታኖኮክ ጋራይ ላኦ ካላይኒዕያን።

3 ጎርታ ክርስቶሳነ ዎታ ጎይኮ ጎከቴን ክርስቶሳ መርጌ ታዋይ ሀማጺ ታኮግሮ ኤለ ዳሩሪ ካግሮ አየሰ ዶታዬን። 2 አርጌቶ ኤለ ዳሩሪ ካግሮ አዬሰኮክ ቆጋ ኳሬ ኡሊ ካግሮ አየሰ አሮቆፕቴን። 3 እስን ጎተታን፤ ግርክስና ክርስቶሳነ

ዋታ ዋይ ኦሮ ጎላተራ። 4 ግርክስን ካሌራ ክርስቶስ አባባይ ካኮኤማተ ጎራታ እስና ኡሱን ዋታ ካባጃ ሙትናታን። 5 ሃንሱን እስኒ ካግሮ ካኡሌ ሀልቻ ላጋዳ፤ እሱና “ሻርሙጡማ፣ ባቶዋኖ፣ ዮራኖ፣ ሀልቻ ካሜላን፣ ቶልቻ ሄዶይሳታኖ ካሌሮ ሀልቻኖ”። 6 ሂካ እዬስጆልኮት አላንቲ ካእጃጃሞን አባዶ ጉት ኤንገ ታዋ ኤመይናታ። 7 እስን መተክስንዋ ሂታኮ ሆረነ ካእጃጃሞን አባዶ ኦሮ ታኮግቲኒ ኡሱ አባዶ ማለ ግቲን። 8 ግዳ ጎአመን ኤንገ፣ አማራንጀ፣ ምጌ፣ መገ ባሳኖ ኦሮኦትስንኮ ትራዬን፤ ካሙሊስራ አዬንሳ ህኢትስንኮ አሮቤኖ። 9 ታዶኢን ያዳሊትስን ቃርቲን ማንኮሻፍተታን ማራን እስእሲ ኦሮ ጣራ አሮአዬሴን። 10 ካመጠርኮት ምዲ ካኡሱባተሮ ማላባኖ ታኢግልሳንተቶ ያዳሊ ሳርሳዬን። 11 ሂካ ጋራይ ግሪኪና አይሁድ፣ ካህማጺሳመሮና ካህማጺሳሞን ግሮ፣ ካእጋልሳተሮ አይዛብና ካእጋልሳኖንግሮ አይዛብ፣ ባልቶክና ድይክ አባዶ ኦሮ ካሌና ላግቶ፤ ክርስቶስ ዱባያ፤ ዱባ ኦሮ ግራ። 12 ጎርታ ዋይ ኦአሳባንቲታና ቁሎለ፣ ኦጌላንቲታን ማንኮሌተን ማራን አንጅሬ፣ ኢዳን፣ እስ የራሳታኖይ፣ ነኤይሳታኖ፣ ኦብስ ሳርሳዬን። 13 እስኦሮ እስእሲ ኦብሳ፤ እስንኮ ኮ ካካለ ጉት ቁጠ ካአባ ጎግረ ሀሄሶ አማ፤ ክርስቶስ እስኩን ሀሄሶ ጎጎአመሮ እስና ሀሄሶ አማ። 14 ካመን ዱባኮ ሮርተ ዱባ ሀንቂና ካሊ ራቶ የልተ ኩኩይስ ሺተ ታአብተቶ ጌላንጀ ሳርሳዬን። 15 እስን ማር ኮክ ምክታል ለተዴን ካኮኤማንቲታን ህታ ኖጎዳን ማንኮሌ ማራን ታክርስቶስ ኖጎዳ ዋዳናትስኒ ሀሬዶ፤ ዋ ኦጋላታታን ላ። 16 ካክርስቶስ ሃፋራ አማጋመ ዋዳናትስኒ ኦሮ ሀግረ፤ ቃሩማ ዱባይ እስእስኦሮ ኦጋልሳዬን፣ ሆልቶዬን፣ ማዛሙርና ሳድሳ፣ ታአያና ያዬይ ዋዳናኮ ዋ ጋላታ ዛማራ። 17 ጋራ ካየሱሳነ ዋ ኦዶ ጋላታ ሄኢና ሌረ ፈሎይ ካፈላታን ዱባ ካጎታ የሱሳኮክ መገይ ፈላ፤ ኡሱና ዋ ኦዶ ጋላታ። 18 እስን ኦርጆል! ጎታይ ዶሌ ካዶትሳሮ ማንኮሌ ማራን ኤንተርጆልክስኩን አጃጃማ። 19 እስን ኤንተርጆል! ኦርጆልክስን ጌላየን፤ ኦኦኮኮዋታን አሮሌተን። 20 ይሶ! ሂክ ጎታ ካገጌላይሳሮ ማንኮሌ ማራን ካመን ዱባን እስን ኦኡሙለራውን አጃጃማ። 21 ይስ ኦኡሙልተታን እስን! ይስክስን አብድ ጎጎ ጎሳኖንኮ ኤንጌይ አሮአማራይስን። 22 ድዩማኮክ ሴራይ ኦግታን እስን! ካኡሌ ጎቶሌትስኩን ካመን ዱባውን አጃጃማ፤ ካኮንአጃጃማታና እሶ እስን ማንኮደያራን ማራና አባዶ ማንኮገጌላይሳታን ማራን፣ አባዶን ሙትን አንሌኖን ግራን ጎታ አብሳታኖይና

ታሊዲንት ዋዳናይ ሀሌዎ። 23 ካፈላታን ዱባ እባዶን ካፈላታን ኣን እንሌኖን ግራን ጎታ የሱሳን ካፈላታን እን ዋዳናኮ ፈላ። 24 ሂካኑና ጎታ ታዳሩረ ርቲ እስኩን ባርአራ የል ካስሰናሮ ካሳንዋ፤ እስን ካኮንሀንዳታና ጎታ ክርስቶሳንያ። 25 ጎታ ዶሌ ኡሉልሳኖ ማንኮግኖ ማራን ታሜላን ካፈላራ እሜላን ፈሎኦቴሳ ማራን ሙሮ አታይናራ።

4 እስን ጎቶሌ! እስና ዳሩሪ ጎታ ካአብታን አዳሳዴን እስኩን ካሀንዳሮ እባዶ አዳነይና ኢልቶይ ዲያ ባሪሳ። 2 ዋ ጋላታ ሀኢሶን አታዬን ኤባየን፤ 3 ሂካኔ ዋታ ዋ ሃፋራኬሳን ኖን ኡፋ ጎሳባኖና እን ኡሱ ማራን ሻመረ ታኮግሮ ታክርስቶሳ ሆል አታይሲን ኖ ጎሳዳንዴኖን ኖዬን ኤባየን። 4 እንና ጎሳዶትሳሮ ሃፋራኬሳ አዳሰሰ ጎሳእዬሰሮን ኤባየን። 5 ማምሰት ኤሰላና ላኦ ሄላታ ካአማኖን እባዶን ዋታ ቃሩማ ግራ። 6 እባዶ ዱባን መተ መተ ታዶትሳቶ አባብ ሰሰን ጎሳአዳሳኩን አርጌቶ እዬሰክሰን ኤሰሶ ካኮክባንተቶ ባቦ ኣን ኦኖሞንጀ ካአቦ ሀሌዎ። 7 ትክቆሳ ጋራኬት ሃጃ እየሰ ዱባ እስኩን ሰጊሮዋ፤ ኡሱ ካጌላመ አቢ፤ ሀንዳዉን ካአብዳመና ኦሳታ ፈሎ ኢነ ዋታ ካፈላረ ካፈሎ ሳትኬያ። 8 ኡሱና እን እስን ቶሰ ታኮፋረራ ኣላንቲ ኖ ታኮግኖ እስኩን ጎሳሰግሮና እስን ጎሳ ጎሳእስሮንያ። 9 ኡሱነ ዋታ ኡናትሰን ካሌሮ ካአብዳመና ካጌላመ አቢ እናሰሞሳ እስን ቶሰ ኤመይናራ፤ እሶና ህታ ባንኤ ካግሮ እዬሰኮክ ጋራ ዱባ እስን አጋልሰሰሮዋ። 10 ኢነ ዋታ ካሽያመረ እርሰጢሮኮሳና እስኩን ኖሳዳ ፋራማራን፤ አርቶ “እስን ቶሰ ካኮኤማተ ጎራታ ጎሳቆጳታኩን” አመረ እስን ሻድሳ ካግረ ካባርናባሰ ኤረ ካአና ማርቆሳ እስኩን ኖሳዳ ፋራማራ። 11 እየሰጠሳ አማመ ካአማማራ እያሱ ኖሳዳ ፋራማራ። ኦህማጺሳማራን ኦሮኮ ዋናናት ካዋ ኢነ ዋታ ኦፈላራን ሂናኣ ኦላልያን፤ እሶና እን ጎሳእስራን። 12 ኡናትሰንኮ ካሌራ የሱሳ ክርስቶሳን ካዳንዳራ ኤጳፍራ ኖሳዳ እስኩን ፋራማራ፤ እስን ግር ካአያና ጂናታ አታይ ጎሳእልታኩና ፈኢ ታዋ ዱባ ጎሳፈልታኩን ኡሱ እስን ማራን አርጌቶ ኤብኬሳይ ኤባታራ። 13 እስን ማራን ሎዶቅያዬና ታህራፎል ካታማል ካግሮ እባዶን ኣሎ ካዳፋራራ እን መተኬዉን ኡሱን አቶታራ። 14 ካጌላመ አከም ሉቃሳና ዴማስ ኖሳዳ ፋራማራን። 15 ሎዶቅያይ ታግቶ አቢላሉን ልንፋናና ምንክሴይ ካግሮ ምን ካዋቱን ኖሳዳ ገጊሳ። 16 ሂካ ሀንዳ እስን ጎናባብተን ኤሰኮ ሎዶቅያይ ካግሮ ምን ካዋይና አድ ጎናባባምሮ የላ፤ እስና አዳ. ሎዶቅያኮ እስኩን ካፋራማሮ ሀንዳ ናባባ። 17

እርክጳሰውና “ካጎታ ሀንዳውን ኩን ኦሰሳሜራን ፈሎ ማራጌ ጎሳፈላቸን ኡሱ ሃ
እማራ እማ ሰጋ።” 18 ህታ ኖጎዳ ገነቲይ ካጻፈራ እን ጳውሎሳያ። ሻማኖኬና
ሻዳ። ሰኖ ታዋ እስኔ ዎታ ሀሌቶ።

1 ተሰሎንቄ

1 ጳውሎስ፡ ስላስኮና ጢሞጥሳስ፤ ካዋ ኦዶይና ጎታ የሱሳ ክርስቶስ ኦግራውና ካተሰሎንቄ ካታማይ ካግሮ ምን ካዋውን፤ ዋ ኦዶካን ታጎታ የሱሳ ክርስቶስ ስኖና ኖጎዳ እስኩን ሀሌቶ። **2** ኤብካን እስን ሻዳ እርጌቶ እስን ዱባ ማራን ዋ ጋላታና። **3** እማኖኮ ኦሌራን ፈሎኦትስን፤ ጌላንጀኮ ካኬሮ ዳፋርክስን ጎታካን የሱሳ ክርስቶስ ካክብታን እማኖ ካሄላመሮ እታንክስን ሄዶካንና ኣቦካን ኖ እርጌቶ ሻዳና። **4** ዋይ ኦጌላንቲታን አቢላልቲ፤ ኡሱ እስን አሳባኖ ካንሶዋ፤ **5** ኣላንቲና ዋንጋላካን እስን ቶስ ካኤመተራ ሁናይና እያና ቁሉክ ካሞጋን ማላባኖይ ኳሪ ሃፋራ ካላሊ ላኮኖ። አደ እስን ማራን አምነኔ እስን ኦሮ ኖ ምሲ ግኔ ካሳንዋ። **6** እስን ኖ ኣንና ጎታ ኣን ሌቲታን፤ ማምሲና ታኦቲ ራኮ ጎጌተና ሃፋራ ካዋ እያና ቁሉክ ገጌሎይ አታቲታን። **7** ሂካኮና ካከይ ታመቀዶንያይና ታኦካያ አውራጃይ ካግሮ እማኒሉን ታኢዳንት ማሱሳ ሌቲታን። **8** ካጎታ ሃፋራ እስንኮ ቤሪ ታመቀዶንያይና ታኦካያ አውራጃይ ማላሳማኖ ካላ አንሌኖን ግራን እስን ዋይ ካክብታን እማኖ ባንኤ ዱባ አዳሳመራ፤ ሃንሱን ኖ ህታ ሃጃ ጉት ኮና አዬስን ላኮዶትሳር፤ **9** ምስክ እታታኖይ አታቲታን አርዶክና ካሩም ካሌሮ ሄዶን ሀንዳይን ቶልቻልኮ ዋ ቶስ ምሲ አባባቲታን እሶ መተክሶውን አዬሳራን፤ **10** አደና ዋ ጎይኮ ካኬስሮና ዳሩርኮ ካኤማይናሮ ኤሪኬሳ፤ ታኤማቶ ኤንገኮ ካሃስናሮ የሱሳ እስን ምሲ ኦራይናታን እሶ አዬሳራን።

2 አቢላልቲ! ኖ እስን ቶስ ካኮንኤማኒና ላኦ ካላይክ ላናዋት እስን መተክሰኦዋ ካሳንዋ። **2** ጎጎካሳኒ ሂታኮ ሆረኒ ታፍልጺስኖሳ ካታማይ ራኮ እታን ማዳራምኔ፤ አየሱን ጎአመን ካኦቲ ዱዳኖ ኖ ጎጌና ሱረ ዋንጋላ ካዋ እስኩን ሰግን ዋ ሄዶካንኮ ጃቡ ሄላንና። **3** ኖ ካኤባታና ኤብ ሸርማናኮ ጎርቱን ካማላን ያዳኮ ጎርቱን እስን ሶቢን ዶታኖኮ ካከይ ላኮኖ። **4** አየሱን ጎአመን ዋንጋላ ሀዳራይ አታይን ዋ ካዶትሳር የለ ካቶተሮ እባዶ ኣን አዬሳና። ሂካና ካኮንፈላና ዋዳናታን ካቆቆራሮ ዋ ኳሪ እባዶ ገጌላይስን አምነኔ ላኮኖ። **5** ካሶሶይሰሮ ሃፋራ ሱረ አዬስዋት ጎርቱን ጋጺጋጸኖካን ጎልሳዬን አምነኔ ካማሱሳኖ ልዋት ካሳንዋ፤ ሂካኑና ዋ አቶካንያ። **6** እስንኮና ሌረ ካካለ ማምስክ እባዶኮና ታሄላማቶ ካባጃ ላኮዶታንኖ። **7** ክርስቶስ ኦፋራምነኖ ጎጎሌነኖ ማለ እስኩን ሰዳን ሊ ግራን፤ አየሱን ጎአመን ኣዋ ኤረክሴ ጎጎድያቶ ማለ ኖና እስን ኦሮ አንጅሬ

ሰሴት። 8 ኡሱማለና ኣሎ ኖ እሰን ማንኩጌላታኖ ማራ ዋንጋላ ካዋ እሰኑን ሰጋኖ
 ካላል እንሌኖን ግራን ኔፎታንኔ እሰን ማራን ሰሰን ኦኤካኔኖን። 9 አቢላልቲ!
 ፈሎኦታንና ሀራኖካን ካሳንዋ፤ ማዮ ጉቲና ሰዳነ ጎንሌኖንኮ እሪና ሄመና ፈላታ
 ዋንጋላ ላላብነ። 10 እሰን እማኒል ኦሮ ግራን ኖ ሞሲ ቁሉማና ሙጭማኖይ
 አደና ቱፍካላይ ጎንግኔ እሰና ዋና አቶታን። 11 ኦዶ ይሰኬሳን ጎንላሮ ኖና
 እሰኑን ጎንሌኖ እሰን ካሳንዋ፤ 12 ዋናናትኬሳ ቶሰና ካባጃቲሳ ቶሰ ካኡመሮ
 ዋወን ጎንዶትሳሮ ጎንግርታኑን እሰን አታይንሴና፤ ጎንኢንሴና፤ ኣሎና እሰኑን
 ኤባነና። 13 ኖኮ ካማልቲታን ሃፋራ ካዋ ካኮአታቲን ጎራታ፤ እሰን እማኒል
 ዶሌ ኦግራን ካፈላሮ ሃፋራ ካዋ ኣን ኳሬ ሃፋራ ካአባዶ ኣን የላቲን ሀአታኖኒ
 ማንኮግታን ማራን ጎሰ ሀኢሶን ዋ ጋላታና። 14 አቢላልቲ! ክርሰቶሳ የሱሳ
 ኦግራን ይሁዳ ካግሮ ካሞጋን ሞን ካዋ ኣን ሌቲታን፤ እሶ አይሁድኮክ ኡሊ ራኮ
 ጎንአታቲራ፤ እሰና ፋልክሰንኮ ራኮ አታቲታን። 15 እሶ ጎታ የሱሳና ካሄገሮልና
 ላጋዴን፤ ኖና ሆሮረን፤ ዋና ላኮገጌላይሴን፤ እባዶ ዱባወን ዲና ሌን። 16 ህክና
 አይዛብ ጎንፋይሮን ኖ ጎንአዬሶንኮ ትርንያ፤ ሂካማሌ ጨቦክሶ እርጌቶ እሰኦትሶ
 ጉት ታጋቾ አሪ ታጌቶን ጨቦ እሰ ጉት ጂናሳታ ሴታራን፤ ሃኑን ኤንገ ታዋ እሶ
 ጉት ኤመተ። 17 አየሱን ጎአመን አቢላልቲ! ኖ ፈኢታን እንሌኖን ግራን ሶይ
 ጎራታ ክጫሩን እሰንኮ ጎፋክምና፤ እሰኑን ካአብኖ ካንጅንክ ሀልቻኮ ካከይ
 በቤድታትሰን ድን ታንጅን ዳፋርነኔ። 18 እሰን ቶሰ ኤመይን ዶንቲኔ፤ አደና አን
 ጳዉሎሳ ጎራታ ካሞጋን ሄደ ዋየራ፤ አየሱን ጎአመን ጳላየ ኖ አዳላይሰታ። 19
 ጎታካን የሱሳ ጎኤመተ ኡሱ ሆረ አብድታን ጎርቱን ገጌሎኦታን ጎርቱን ካላቻካን
 አዮያ? ላኮእሰንታንያ? 20 ኦግራን እሰን ኖዬን ካባጃታንና ገገሎኦታንታን።

3 ሃንሱን ጎራታ ክጫሩን ኡብሳና ማንኮዋኔን ታኦቲና ካታማይ ካለ ሄሳኖካን
 ካእዳንክ ኣን ሌ ኖን ሙተ። 2 አማኖክሰኒ ጎንዲቢሰሮና ጎንአታይሰሮን ኡብካንና
 ካክርሰቶሳ ዋንጋላኮኒዕ ፈሎይ ኖኔ ዋታ ዋወን ካሀንዳሮ ጠሞቶሳ ፋርነና፤ 3
 ህክና ህታ ጫፍቲ ማዮና ጎንሻላጋሞንኮያ። ኖና ሂካ አየሱን ኦኤካኔኖ ላኖ እሰን
 መተክሰኑን ካሳንዋ። 4 ኦግራን እሰኔ ዋታ ታኮግኔ ራኮ ግያኖ ጎራታ ጎራታይ
 ሰጋ ግኔ፤ ጎንካሳኒና ኡሱማሌዋ አደ ሌራ። 5 ሃንሱን ኮና ኡብሳና ካኮዋየ
 ጎራታ አማኖኮክ ጋራ አዳሰን ፋረ፤ ሂካና ካኮንየለራ ዋዳሳ ካጫፋራ እሰን
 ጫፍረ ሀራኖካን ዱባ አዳክ ሌራ አመ ማንኮአብሳየሮ ማራንያ። 6 ግዳ አደ

ጢሞቶሳ እስን ደለኮ ኖ ቶስ ኤመተረ አማኖኮክ ጋራና ጌላንጀትሰንክ ጋራ ኦዱ ታኢዳን እን ማልሰሰራ። አደ ኖና አርጌቶ ታኢዳን ሻዳኖክሰና ኖ እስን ድን ካህልቻኖ ግታክ እስና ኖ ድን ካህልቻታን ኡሱ ኢን ሰገራ። 7 ሃንሱን አቢላልቴ፤ ጫናቃማኖካንና ራኮታን ዱባ አማኖክሰንኮት አላንቲ እስኒ ጎጎኢነና። 8 እስን ዋይ አታቴን ማንኮአልተን ማራን ኦግራን ግዳ ኖ ኔፎን ግና። 9 አላንቲ ትሰኒ ሄዶካን ሆረ ኦሄላነኖ ገጌሎ ዱባን ዋውን ኤግታክ ጋላታ ሰሰን ዳንዳና? 10 አድና ኖ እስን ዱና አማኖክሰኒ ካህንቃተሮ አማገን አሪና ሄመን አሎ አታይ ኤባይናና። 11 ግዳና ኡሱ ሄዶካንና አቦካን፤ ጎታካን የሱሳ ክርሰቶሳ ኖ እስን ቶስ ጎጎኤማኖን ራካን ኡሱ ኖን ሀቃጀልሶ። 12 ኖ እስኑን ጌላንጀ ጎጎኡብኖ እስን ዱባ እስእስኦሮ ታኡብታን ጌላንጃና ካካለቱን ታኡብታን ጌላንጀ ጎታ ሀጂናሶ፤ ሀባላአሶ። 13 ጎታካን የሱሳ ክርሰቶሳ ቁሎለ ዱባን ዋታ ካኮኤማታሮ ጎራታ ሄዶካንና አቦካን ሆረ ቱፍ ካላይኒዕና ቁሎኒዕ ሊ ጎጎሙታኑን ዋዳናትሰን ሀአታይሶ።

4 ጎርታ አቢላልቴ! ዋ ገጌላይሰን ምሲ ግራኖ ዶትሳሮ ኖ እስን አጋልሰንሰና፤ ኦግራን እስን ኡሱማሌዋ ግታን። ጎሌና ጎታ የሱሳ ካኤባታናና ማርካ ካሰሳና ሂካኮ ካሮረ ሂካኒ ጎጎሆረዴታኑንያ። 2 ካጎታ የሱሳ ኦዶናቲ ምስክ እጃጃ ኖ እስኑን ሰንሰኖ እስን ካሳንዋ። 3 ፈኢ ታዋ እስን ሻርሙጡማኮ ፋክምዴን ጎጎቁሎይታውንያ፤ 4 አደና መተ መተ እባዶ ማርኬሳ ቁሎማና ካባጃ አባይን ካዶትሳሮ ላኖ ጎጎኤዳሰሮንያ፤ 5 ህክና ዋ ካካሶን አይዛብ እን ዮራኖና ሀልቻ ካሶየ እን አሮሌኖ። 6 ሂካ እየሰ ማዮና ባሰረ አቢኬሳ አሮሶቦ፤ አላንትና ሂታኮ ሆረን ኖ እስኑን ጎጎሰግነኖና ጎጎሀድንሰኖ ጎታ ሂካ ኣንክክ ጩቦ ካፈላሮ ዱባ ሀሎ ቤሮዋ፤ 7 ዋ ኖ ቁሎማ ጎጎሰሴኖን ኳሬ ጎጎባቶይኖን ላኮኤመሮ። 8 ጎርታ ህታ ማርካ ቱፋይረ ካእታኖን አባዶ፤ ቁሎክ አያናካኬሳ እሶን ካሰሰሮ ዋ ቱፋተራ ኳሬ አባዶ ላኮዮ። 9 አቢላልኮት ጌላንጀ ማዮና ጎጎጻፍሮን ላኮዶትሳሮ፤ አላንቲና እስእስኦሮ እስ ጎጎጌላታውን እስን መተክሰኑን ዋኮ አጋልሳተታን። 10 ታመቆዶንያ አዉራጃ ዱባይ ታግቶ አቢላል ዱባ ጌላታኖክሰን ካእዴሳመያ፤ እየሱን ጎእመን አቢላልቴ፤ ሂካኮ ካሮሬ ጎጎሆረዴታውን ጎርሳራ። 11 ሂታኮ ሆረን እስን ጎጎኢጃጂነኖ ገነትሰኒ ፈላዬን፤ ጫልኢ አማ ግራ፤ ሃጃ ታትሰን ታላል ድያዬን። 12 ህክና አርአሪ ባርሳኖኦትሰን ሳሬ ኦግራን ዶሌ ጎጎካባጅሰሮና

ማየ ጉቲና ሰዳነ ጎሳሌኖንኮያ። **13** አቢላልቴ፤ ጎየ ካግሮ እባዶኮክ ጋራ ሀእዴሶን ጎሳሃሳውን ኖ ላኮዶታኖ፤ አደና አብድ ካላይኒዕ ካካለ እባዶ እን እሰን ጎሳያዳውን ኖ ላኮዶታኖ። **14** የሱሳ ጎዋኖና ጎይኮ ክያኖኬሳ ጎአማናኔ፤ የሱሳ ግሬነን ኦጎየራን ዋ የሱሳን ዋታ ሂካማሌ ኬሰናራ። **15** ካጎታ ሃፋራይ ኖ እሰኑን ካአማና ሂካያ፤ ኔፎነ ኦግና ኖና ጎታ ታ ኤሜሮን ጊን ኦጎየራንኮ ላኮጣይናኖ፤ **16** ጎታ ኡሱ እጃጃ ካአቲቲ፤ ታኤርግቻ ወይቻኮት ያየና ማላካታ ካዋኮት ያየ ዳሩርኮ ዳግናራ። ክርሰቶሳ ኦጎየራና ጣይ ክናራን። **17** ኤሰኮ አባባይረ ኦሄንሰና ኖ፤ ኔፎነ ኦግና ጎታ ሰሰሊ ቆጳይን እሰን ዋታ ዱማንቻይ አታምናና፤ ሂካማሌና ጅሩ ጅሮማን ጎታን ዋታ ግርናና። **18** ሃንሱን ሂካ ሃፋራ እሰእሰኦሮ እሰእሰ ጎሳእሳዬን።

5 አቢላልቴ፤ ጌሰኮክ ጋራና ድግንኮክ ጋራ ጻፋኖ እሰኑን ላኮዶትሳሮ። **2** አላንቲና ሄቶ ሄመን ጎሳኤማቶ ማለ ታጎታ አርና ኡሱማሌ ኤመታኖ እሰን መተክሰኑን ማዳርቴን ካሳን። **3** አባዶ፤ “ኖጎዳና ኢዳነታ” አማ ግራን፤ ኡሙላ ታፋቶ ሄለልተቲ ጎሳአባናኒ ኡሱማሌ ባይ ደራኣ ኤመይናራ፤ ኢጂ ላኮምልቅራን። **4** እሰን ጎአመን፤ አቢላልቴ፤ ህት አሪ ሄቶ እን እሰን ኔይሰን እሰን ላኮሙጉድ ኦሮ ግታን፤ **5** እሰን ዱባና ይሰ ካኢፋ፤ ይሰ ካአርታን፤ ኖ ሄመንኮ ጎርቱን ታሙጉድ ኡናኮ ላኮኖ። **6** ጎርታ ኖ ናባንዶ፤ እሰኦታንና ኦራና ኳሬ ካሁዱራሮ ካካለ እን ላኮሌኖ። **7** ካሁዱራራ እባዶና ሄመን ሁዱራራ፤ ካሴታራና ሄመን ሴታራ። **8** ኖ እንዴ ኦአሪ ማንኮሌነኖ ማራን፤ አማኖና ጌላንጀ ላላ እን አባይኔ፤ ታፋይና አብድ መተ ታካማቶ ጉሌ እን ካይነ እሰኦታን ኦራታ ግርና፤ **9** ጎታካን የሱሳ ክርሰቶሳኮክ ጋራን ዋ ኖ ካኮንኤመራ ፋይና ጎሳሃላኖንያ ኳሬ ኤንጌን ሙርቴሰረ ላኮኖ። **10** ጎግነና ጎጎነና ኡሱን ዋታ ኔፎነ ጎጎግርኖን ኡሱ ኖ ማራን ጎየራ። **11** ሃንሱን ኦግራን ግዳ ጎጎየላታን እሰእሰኦሮ ጎሳእሳዬን፤ ኮ ካካለ ሀአታይሶ። **12** ጎርታ አቢላልቴ፤ እሰን ኦሮ አታቲን ኦፈላራን፤ ራ ካጎታ ኦቱሳራና እሰን ኦጎርሳራን ጎጎካባጅታኑን ኤባታና፤ **13** ፈሎኦትሶ ማራን ጌላንጀ ኣሎ ካባጃ። እሰእሰሮና ኖጎዳ ግራ። **14** አቢላልቴ፤ ሂካ እሰኑን ጎርሳና፤ ፈሎ ካፈላኖን ሀድሳ፤ ኦአብሳታራን አታይሳ፤ ላፋኒዕ ጋርጋራ፤ እባዶ ዱባ ኡብሳ። **15** ማየና ሜላን ሜላን ጎሳአባቦንኮ እሰኦራዬን፤ አየሱን ጎአመን እሰእሰሮና ሌረ እባዶ ካካለቱን አርጌቶ ካኢዳንክ ካሌሮ አየሰ ፈልን ዶታ። **16** አርጌቶ ገጌላየን፤ **17**

ሀኢሶን ኤባየን፤ **18** ማምሰክ አዩሰና ዋ ጋላታ፤ ክርስቶስ የሱሳ ካኦብታን
 ግሪውን ፈኢ ታዋ እስኩን ህታታ። **19** እያና ቁሉክኮኒዕ ፈሎ አሮባሰን፤ **20**
 ሄገሮኮክ እላቦ አሮቱፋቴን። **21** አየሰ ዱባ ቆቆራ፤ ካእዳን አባዬን፤ **22** አየሰ
 ካሜላንኮ ፋክማ። **23** ካኖጎዳ ሄዶ ኡሱዋ እስኦትሰን ሀቁሎይሰ፤ እያናክሰን፤
 ኔፎትሰና ማርክሰን ጎታካን የሱሳ ክርስቶስ ካኮኤሜታሮ ጎራታ ቱፍ ካላይ
 ኦራም ሀግሬን። **24** እስን ካኡማራ ካኦብዳመያ፤ ኡሱና ፈልናራ። **25** አቢላልት፤
 ኖ ማራና ኤባየን። **26** አቢላል ዱባ ቁሉክ እስከነጋታኖይ ኖጎዳ አታ። **27** ሂክ
 ሀንዳ አማኒል ዱባን ጎናናባባምሮን መገ ካጎታይ እን እስኩን ሀዳራ አማራ። **28**
 ጎታካን የሱሳ ክርስቶሳኮት ሰኖ እስኔ ዎታ ሀሌቶ።

2 ተሰሎንቄ

1 ዋ አቦካንኮና ጎታካን ካየሱሳ ክርስቶስ ካሌሮ ታተሰሎንቄ ካታማይ ካግሮ ምን ካዋኮክ አማኒሉን ጳውሎሳኮ፡ ስላሰኮና ጢሞቶሳኮ ካፋራመሮ ሀንዳ፤ **2** ዋ ኦዶኮና፡ ጎታ የሱሳ ክርስቶሳኮ ሰኖና ኖጎዳ እስኩን ሀሌቶ። **3** አቢላልቴ፤ አማኖክሰን አርአሪ ጂናታ ማንኮሴታሮ ማራን እስእስኦሮት ጌላንጀ አዳማ ኤመታኖይ እስን ማራን ዋ አርጌቶ ኣሎ ኖ ጋላቲን ዶትሳራ። **4** ሃንሱን እስን ካጌሮ ባቃታኖይና ራኮ ዱባ አታታኖይ፡ ኖ መተካኩን ኦብስትሰንክ ጋራና አማኖክሰንክ ጋራ ካዋጋን ምን ካዋ ዱባ ኦሮ እስኒ ዳዳታና። **5** ሂክ ዱባ ፍርዳ ካዋ ቱኩልክ ላኖ ካቱሳርያ፤ ሂካኮና ካከይ ራኮ ካኮንአታታን ዎኖናት ካዋዉን ኦኤካቲን ል ቶታምናታን። **6** ዋ ቱኩል ካፍርዳሮ ላኖይ ራኮ ካኮንኬናሮን ራኮ ሙራራ። **7** ራኮ ኦአታቲታን እስኩና ሌረ ኖዬን አደ ፎልሲ ሰሳራ። ህክና ካኮንላራ ጎታ የሱሳ ባልዳባልዳ ታእማቶ ኤለኒ ካአቲ ኤርግቻልን ዎታ ዳሩርኮ ካኮዳገ ጎራታያ። **8** ኡሱ ጎራታ ዋ ኦካሶና ጎታካንክ ካየሱሳ ዎንጋላን ኦአጃጃሞቱን ሀሎ ብናራ። **9** እሶና ጎታ ሆረኮና ካባጃቲሳክ ሁናኮ ትራምሬን ጅሩ ጅሮማክ ባይ ሙርሳምናራን፤ (aiōnios g166) **10** ኦሙርሳምናራና ቁሎለ ዶሌ ካባጃምና ኦአማናራን ዱባ ዶሌ ሳዳሚን ታኮኤማታሮ ኤስ አሪ ልናራ፤ እስና አቶታኖካን ማንኮአታቲን ማራን ካአማናሮ ኦሮኮታን። **11** ሂካ ሻዳ ሄዶካንኮት ኡምቱን ኦኤካተን የል ጎጎቶትሮን፡ ታኢዳን ፈልን ካአብታን ሀልቻና አማኖኮ ኦሌራን ፈሎኦትሰን ዱባ ሁናኬሳ ጎጎፈሎ አርጌቶ እስን ማራን ኖ ዋ ኤባታና። **12** አደና ሄዶካን እንና ጎታ የሱሳኮት ሰኖኮት ጅልባ ጎታካንክ ካየሱሳ መገ እስን ዶሌ ጎጎካባጃምሮና እስና ኡሱ ዶሌ ጎጎካባጃንታዉን ኖ ኤባታና።

2 አቢላልቴ፤ ጋራ ጎታካን የሱሳ ክርስቶሳኮት ኤማቶና ኖ ኡሱ ቶስ ኩኩማኖኮክ ጋራ እስን ኤባታና፤ **2** አያናኮ ታሌተቶ ሙተን እን ጎርቱን ሃፋራይ ጎርቱን ኖኮ ካፋራመሮ ሀንዳ እን ታጎታ አሪ ጌተታ እምዴን ሳም ሳሙትሰኒ አሮሻላጋንተን፤ አሮነይቲን። **3** ማዮና ማኤክ ራዲና እስን አሮሶቦ፤ ጣይ ካካታኖ ሀኤመኖኒ፡ ባይን ካኤካተራ ካማላን አባዶት ሀኤመኖን ግራን ሀሴ አሪ ላኮኤማይናቶ። **4** ኡሱ ሄዶ ካአማመሮኮና ካሄዶይሳማሮ አየሰ ዱባኮ ጉንተ እስኦቲሳ ካጦቂ ጦቂሳታሮና ካኔባታሮናያ፤ ኡሱና ቁሎክ ምን ካዋይ ሀማጺረ፡ “እን ሄዶያ” አማ አዋጂ አዋጅሰናራ። **5** እን እስኔ ዎታ ታኮግረ ሂካ አየሰ እን እስኩን ሰጋኖ

ላኮሻዳታንያ? **6** ጎራታኬሳይ ታሙትሮን ግዳ ኡሱ መ ትራሮ ካሳንዋ። **7**
 ታሜላን ሆል ግዳ ጊን ፈላ ግታ፤ እየሱን ጎአመን ሂክ ካኮልናራ ካትራራ ራኮ ታ
 ትራምሮንያ። **8** ኤስኮ አባባይረ ጎታ የሱሳ ህኢቴሳ ካትርናራና ኤሜቶተሳት
 ካባጃ ዱዶ ካባሰናራ ካሜላን ኤመይናራ። **9** ካሜላንኮት ኤመቶ ፈሎ ኦጻላየይ
 ካዳባተ ጎሌሮ፤ ህክና ካጣራ ባሳና፤ ማላታልና ካማምሰራ እየሰ ዱባ ልናራ፤
10 ኡሱማለና ካባሮ አባዶ ኦሶባራን ማምሰክና ካሜላን ኮኮ ፈላኖዪያ። ሂክ
 እባዶ ኦባራን ሄሲን ካኮዳንደራን ሩም ጌላተን ማንኮአታታናዋተራን ማራንያ።
11 ህታ ኣላንቲ እሶ ጣራይ ጎጎአማናውን ኦሶሶይሰራን ፈሎ ኦሜላን ዋ እሶን
 ፋርናራ፤ **12** ህክና ካኮንልናራ ሩም ኦአማና፤ እየሱን ጎአመን ሜላን ገጌላታ
 ካግረ ዱባ ጎጎፍርዳምሮንያ። **13** ጎታይ ኦጌላንተታን አቢላልቴ፤ ኖ እንዴ አርጌቶ
 እሰን ማራን ዋ ጋላታዮ ዶትሳራ። ኣላንቲና ዋ እሰን ሆራርጀኮ ሀጋአበረ አያና
 ቁሎይዴና ሩሚ አማንዴን ጎጎፋይታኑን እሰን አሳበራ። **14** ጎታካንት ታየሱሳ
 ክርሰቶሳ ካባጃ ኦአታይናታን ጎጎሌታውን ጋራ ካዋንጋላን እሰን ኡመራ። **15**
 ጎርታ አቢላልቴ፤ አታዬን አላ፤ ህኢታንና ሌረ ሀንዳካን ኖ እሰኑን ካሮርንሰኖ
 አጋልሰሰ አታይሳዬን አባዬን። **16** ኡሱ ጎታ የሱሳ ክርሰቶሳ አደና ኖ ካጌላተራና
 ሰኖቴሳ አርዶክ ጎጎኢሳኖና አብድ ታኢዳንት ኖን ካሰሰራ ዋ ኣቦካን፤ (aiōnios
 g166) **17** ዋዳናትሰን ሀአታይሰ፤ ፈሎ ኦኢዳኒዕና ሃፋራ ዱባ ሀአታይሰ።

3 ጎርታ አቢላልቴ፤ እሰን ዶሌ ጎጎፈላመሮ ሃፋራ ካጎታ ሳም ጎጎጌሮና
 ጎጎካባጃምሮን ኖን ኤባየን። **2** አደና አባዶ ዱባ አማኖ ካላይክ ማንኮሌውን
 ኦሜላንኮና ምጌ ካአቦ አባዶኮ ኖ ጎጎሄንሶን ኤባየን። **3** ጎታ ጎአመን
 ካአብዳመያ፤ ኡሱና እሰን አታይሰሮዋ፤ ካሜላንኮና እሰን ኦራራ። **4** ኖ
 ካአጃጅኑኖ ግዳ ፈልቲታን፤ ሆረንባና ፈላኖክሰኑን ጎታይ እሰኒ አብዳታና። **5** ጎታ
 ዋዳናትሰን ጌላንጀ ታዋ ቶንሳ ክርሰቶሳኮክ አታን ቶሰ ሀጌግሶ። **6** አቢላልቴ፤
 ፈሎ ካላይክ አባዶኮና ኖኮ ካአታቲታን አጋልሰሰ ማለ ካግኖን አማኒልኮ
 ጎጎፋክንታኑን አጃጃና። **7** ማሱሳካኒ ምሲ ግርን ዶትሳሮ እሰን መተክሰኑን
 ካሳንዋ። እሰን ዋታ ካኮግኔ ፈሎ ካላይኒዕ ላኮሌኒኔ፤ **8** አደና ካማካዮ ባቦና
 አዱ ላኮአምነኖ፤ እየሱን ጎአመን ኖ እሰን ጉት ማዮና ሰዳን ላኖኮ አሪና ሄመና
 ፈላታ ዳፋራ ግኔ። **9** ሂክ ኖ ካኮንየልና ማሱሳካኒ እሰን ጎጎግርታውን አምነነያ
 ኳሬ እሰንኮ ካዶትሳሮ ጋርጋሳ እሰንኮ አታይን ኦዶናት ዋነኔ ላኮዮ። **10** እሰን

ዎታ ታኮግኔ፡ “ፈልን ካዶታኖን አሮአዎ” አዎን ሂካ አጃጅነኔ። **11** እስንኮ እባዶ ኮኮ ፈሎ ካላይክ ላኖ ኖ ማልነና፤ እሶና ፈሎካላይ ማራሙራ ሃጃ ታእባዶቲ ጠኤ ኦታባራንያን። **12** ሂካ አንክክ እባዶ አታይ ፈሎኦትሶ ጎጎፈላራዉና ባቦክሶ ጎጎእምናዉን ጎታ የሱሳኮክ መገ እጃጃና፤ ጎርሳና። **13** እስን አድ አቢላልቴ፤ ፈሎ ኦኢዳኒዕ ፈላኖኮ ኢጂ ሃር አርጋልቴን። **14** ሂካ ሀንዳ ጉት ካግሮ ሃፋራን ጎርሳ ካእታኖን ማዮና ጎግረ፡ ሂካ አንክክ እባዶ ማዳራ ዲያ፤ ኡሱ ፈሎኦቴሳ ጎጎሙልሮን ኡሱነ ዎታ አርሌተን። **15** ጎሌና አቢ አን ሀድሳ ኳሬ ዲና አን አርቶትቴን። **16** ካኖጎዳ ጎታ ኡሱዋ እየሰ ዱባ አርጌቶ ኖጎዳ ሀሰሶ፤ ጎታ እስን ዱባነ ዎታ ሀሌዎ። **17** ህታ ኖጎዳ ገነቴይ ካጻፈራ እን ጳዉሎሳያ፤ ሀንዳክ ሂካኒ አዴሳማራ፤ ጳፋኖክና ሂካማሌያ። **18** ጎታካን የሱሳ ክርሰቶሳኮት ሰኖ ዱባነ ዎታ ሀሌቶ።

1 ጢሞጥሳ

1 ካፋይሳሮ ዋካካን፡ አብድታታን ካሌሮ የሱሳ ክርስቶስኮክ እጃጃ የሱሳ ክርስቶስ ካፋራመሮ ካጸዉሎሳ ሀንዳ። **2** አማኖ ካሩም ካሌሮ ኤረኬ ጢሞጥሳን፡ ዋ አቦካንኮና፡ ጎታካካን የሱሳ ክርስቶስኮ ሰኖና ሻጋ፡ ሮጎዳ ኩን ሀሌቶ። **3** መቀድንያ ቶስ ታኮሰየሬ ሀዳራ ጎጎአመሬ፡ ኮኮ እባዶ እየሰ ካጣራ ጎጎአጋልሰሶንኮ ትርን ኤስ ታኤፈሶን ካታማይ ሀማጺ። **4** አደና ማማና ጋቾ ካሊት አላታንኮት ጅርት ቶቶ ኦርድ ጎጎታቦንኮ እሶ እጃጃ። ሂክ እየሰ አማኖ ኦሌራን ፈሎ ኦዋኮ ሮረን ዶጋማ ኬሳራን። **5** ሂካ እጃጃኮክ ሀልቻ አደ ታሙጭንተ ዋዳናኮ፡ ታኢዳን ሳሙኮ ኡሱማለና ካሩም አማኖኮ ታሄላማቶ ጌላንጀታ። **6** አባዶ ኮኮ ሂካ እየሰኮ ፋክመረ ላኦ ካላይክ እየሰ ቶስ አባባተራ። **7** ሂካ ካኮንየላራን ሴራ ካሙሴ ካአጋልሰሳሮ ኣን ሊን ዶተሬንያ፤ ሀሌዎ ኳሬ ካአዬሰራን ላኮካሳን ጎርቱን ኖ ልክና አመረን ካአዬሳራን እየሰ ላኮሻዳራን። **8** እየሱን ጎአመን እባዶ ጎጎዶትሳሮ ጎላኦ ቤ፡ ሴራ ካሙሴ ካአዳንክ ላኖ ካንሶዋ። **9** አደና ሴራ ካሙሴ ካኮንሰሳመራ ቁሎሌዉን ሀሌኖን ግራን፡ ሴራ ኦባሳራዉና ኦሜላኦን፡ ታዋ አብሰ ካላይኒዕዉና ጨባለይጆል፡ ቁሎማ ካላይኒዕና ዋ ኦቱፋታራን፡ ኦዶና ኣና ኦላጋዳራና፡ ኔፎ ኦላጋዳራን። **10** ኡሱማለና ኦሻርሙጣራኦን፡ ባባር ባባርን ዋታ ካሁዱራሮን፡ እባዶ ኦዳዳላራዉና ኦአምናራኦን፡ ኦጣራዉን፡ ጣራይ ኦአማታራን፡ ካአዳንክ ካሌሮ አጋልሰሰ ኦዲዳራን ዱባንያ፤ **11** ሂክ ካአዳንክ አጋልሰሰ ካሶማሳመ፡ ዋ እዬን ሀዳራይ ካሰሰራ ዋንጋላ ካባጃን ዋታ ካአሰአታሮያ። **12** ሀንዳኬሳይ እን ሹመረ ካአብዳመ የለ ማንኮቶተ ማራን፡ አታን ኢን ካሰሰሮ ጎታካን ክርስቶስ የሱሳ እን ጋላታራ። **13** ሂታኮ ሆረን ማምሲና ካኢንጋማሮ፡ ካሆሮራሮና ካሜላንክ ሊ ጎግረና፡ ማላባናዋትና አማናናዋቲ ካፈለሮዉን ኡሱ ኢን ሻጋ የለራ። **14** የሱሳ ክርስቶስ ካሌሮ አማኖና ጌላንጀን ዋታ ጎታካንት ሰኖ አማጋንተ ኢን ሰሳንተ። **15** “የሱሳ ክርስቶስ ጨባልዬል ፋይሰን አላም ቶስ ኤመተራ” ካአማራ ሃፋራ ካሩሚና አባዶ ዱባ አታይን ካዶትሳሮያ፤ ጨባለሳልኮና ዋና አንያ። **16** እየሱን ጎአመን የሱሳ ክርስቶስ ኡሱ ኦአማናራና ጅሩ ጅሮማክ ግር ኦአታታራዉን ሜሳ ካልት ኦብሰቴሳና ጨባልዬልኮ ዋና ካሌሮ እዬ ማሱሳ የል ቱሰን ሻጋ ሄላየ። (aiōnios g166) **17** ጎርታ አርዶክ ካሌሮ፡ ካጎኖን፡ ካሙቶና ካለ ዋ ሄዶ ካሌሮ

ዋና ጅሩ ጅሮማኮ ታ ጅሩ ጅሮማ ጌሮን ካባጃና ጋላታ ኡሱ ሀጌዎ፤ ሀሚኒዕ።

(aiōn g165) **18** ኡኑኬ ጢሞቶሳ! ጣየ ኩ ማራን ኦስጋመራን ሄገሮ ማለ ሂካ አጃጃ እን ኩን ሰሰናራ። እሶ ሄገሮ ዳበ ሰሴታ ፈሎ ኦኢዳነቱን ሞአባታኖያ። **19** አማኖና ሳሙ ታኢዳን ኩን ሀግርቶ፤ ኮኮ አባዶ ሳምኡትሶ ጋፋርተደ በከ ኦሮ ራኮ ጌተደ ካባሮ ማርካፋ እን አማኖክሶ ባሳተራን። **20** እሶ ኦሮኮ ሄመኖሰና እስክንድራ ግራን፤ እሶ ዋ ሀባራናኮ እስኦትሶ ጎንሀሳሳራውና ጎንአጋልሳራውን ጸላዬን እን ሮርሰ ሰሰራ።

2 ጎርታ ዱባንኮ ጣይ ኤብ፣ ኮ ካካለቱን ኤባታኖና ጋላታ አባዶ ዱባውን፣ ዋኖላሉና ኦዶናት ካአቦን ዱባን ጎንሌሮን ሻድሳራ፤ **2** ህክና ካሩም አያናኮክ ግርና ቁሉማ ዱባይ፣ ኖጎዳና ጫልኢትይ ጎንግርኖንያ። **3** ሂክ ካፋይሳሮ ዋካን ሆረ ካገጌላይሰሮያ። **4** ኡሱ አባዶ ዱባ ጎንፋይሮና ሩም ማላባኖ ቶስ ጎንጌናውን ዶታራ። **5** ዋ ኮ ካግራ፤ አደና ዋይና አባዶ ጠኤ ካዎጋርሳራ ኮ ግራ፤ ኡሱና አባዶ ካሌሮ የሱሳ ክርሰቶሳያ። **6** እስኦቲሳ አባዶ ዱባን ዋዶ የላተ ሰሳተ፤ ህክና ልክኪ ጎራታ ጎጌ ፋይና ካዋኮኒዕ ፈሎ ካቱሳሮ አቶናትያ። **7** አንና ሂካ አየሱን ካገጌላይሰሮ ሰግረ ካፋራመሮ ኡሱማሌ አይዛብውን ሩምና አማኖ ካአጋልሰሳሮ ሌ ሹማመ፤ ሩም አዬሰናራ ኳሬ፤ ጣራ ላኮአዬሰናሮ። **8** ጎርታ ባባር ባንኤ ዱባ ኤንገና ዶጋማ ካሊ ኦቁሎየን ገነኖኦትሶ ኤለ ጦቂሳይረን ጎንኤባናውን ዶታራ። **9** ኡሱማሌ ሄለል እስኦትሶ ሁሰሳይ ካዶትሳሮ ሳርሰ ሀሳርሳተ ኳሬ መተ ሀራኣይደ ጎርቱን ዋርቂ ጎርቱን ዶክ አወኣሎ ካሌሮ ሳርሰጆሊ አሮኢሳዶ፤ **10** አየሱን ጎአመን ኖ ዋ ሄዶይሳታና ካአማራ ሄለል ፈልን ኦዶትሳራን ፈሎ ኦኢዳኒዕ እስኦቲሳ ሀኢሳድሳተ። **11** ሄለልትቲ ጫልኢ አማኖይና እስ የራሳታኖ ሀአጋልሳቶ። **12** ሄለልትቲ ታአሰላተ ጎንሌቶን ኳሬ ጎንአጋልሰሶን ጎርቱን ባባርትት ጉት ኦዶናት ጎንግሮን ፈኢ ላኮሰሰናሮ። **13** ኣላንቲና አዳመ ጣየ መጣመራ፤ ኤስኮና ሄዋን መጣንተ። **14** አደና ካሶባመራ አዳመ ላኮዮ፤ ታሶባንተታና ጨባለቲ ታሌተታ ሄለልትቲታ፤ **15** ሀሌዎ ኳሬ ሄለልትቲ አማኖና ጌላንጀ፣ ቁሉማይና እስኦትሌ ሁሰሳይደ ጎአታተ ይስ ኡሙላኖይ ፋይናታ።

3 “ማኖና ምን ካዋይ ሆረሃየ ካባሪሳሮ ሊ ጎዶታተ፣ ፈሎ ኦኢዳን ሀልቻራ” ካአማራ ሃፋራ ካአብዳመያ። **2** ጎርታ ምን ካዋውን ሆረሃየ ካፈላራ ካቱፋሞን፣ ኦር ቶኮክ ኤንተር፣ ኤካክ፣ እስካአባታሮ፣ ሴራይ ካባራሮ፣ ማርት ካቆጳታሮ፣

አጋልሰሰን ካዳንዴ፡ 3 ካሴትኖን፡ ካእንሰእንጋሞን ዱሳክ ካሌ፡ ካደጋሞን፡ ማራጋይ ካጌላኖን ሊን ዶትሳራ፡ 4 ይስኬሳ ካህንዳሮና ካካባጅሮ የል ጂናሳኖይ ካምን እባደክሳ ማራጌ ካባሪሳታሮ ሊን ዶትሳራ፡ 5 እባዶት ኮ ምንካኬሳ ማላባይ ካባሪሳኖን ጎሌ፡ ምን ካዋ ምሲ ባሪሰን ዳንዳራ? 6 ኮራይ እማጋሞረ ዱርሳ ካኮኢየሮ ፍርዳ ጎጎኢኖንኮ ኤነ ዋ ካአማኔሮ አሮሌኖ፡ 7 አደና መገኬሳ ጎጎቱፋሞንኮና ዱርሳኮት ሜል ኦሮ ታብረ ጎጎኢኖንኮ፡ ሳሬ ኦግራን ዶሌ ካአዳን አቶ ካአቦ ሊን ዶትሳራ፡ 8 ዳቆኒልና ኡሱማሌ ኦካባጃሜን፡ እየሰ ኦኢግልሶን፡ ካሞጋን ጣሞ ካዋይኒ ኦሀልቸኖን፡ ማራጋይን ካጋጺጋጺኖን እባዶ ላኖ ዶትሳራ፤ 9 አማኖኮት ሆል ቁሉት ሳሙይ ኦራታኖ ዶትሳራ፡ 10 እሶና ጣይ ሀጫፋሜን፤ ኤሰኮና፡ ኮና ቱፍ ካልኒዕ ሊ ጎሙቴን ምን ካዋይ ዳቆን ሊ ሀሃንዳዬን፡ 11 ኡሱማሊና ኦርጃልክሶ ካካባጃሙ፡ ሀም ካላይኒዕ እየሱን ጎአመን ልክኪና ካአመን ዱባን ኦአብዳሜን ሊን ዶትሳራ፡ 12 ዳቆን ኦር ቶክ ኤንተር ሊን ዶትሳራ፤ አደና ይስክሶና ካምን እባደክሶ ማራጌ ኦባሪሳታራን ሊን ዶትሳራ፡ 13 ጎጎዶትሳሮ ሀንዳ መተክሶውን ታንጂን ካባጃ፡ የሱሳ ክርሰቶሳና ካአባን አማኖይ ታንጂን ጃቡ ሄላታራን፡ 14 ኤነ እን ኩ ቶሰ ኤመይን አብድ የላየረ ሂካ እጃጃ ኩን ጸፋራ፤ ሂካ ኩን ካኮንጸፋራ ካአዳላየ ጎሌና እባዶ ምን ካዋይ ምሲ ግርን ዶትሳሮ ጎጎአዴሶንያ፤ ምና ካእርዶ ካዋኮክ ምን ካዋ ህክና ካሩም ልበና ኡኩምናያ፡ 16 ዋ ሄዶይሳታኖኮት ሆል ሄዳታኖ ካላይ ታአትታ፤ ኡሱ እባዶ ሌ ሙተ፤ አያናይ ዳባተ፤ ኤርግቻይ ሙተ፤ ጎሳ ዱባውን ላላባመ፤ አላም ካግሮ እባዶ አብዳመ፤ ካባጃይ ዳሩር ቤ፡፡

4 አያና ቁሉክ አደ አዴሰሰ ሃ አማራ፤ “ካኤሜታሮ ጌሰጃሊ እባዶ ኮኮ ካሶሶይሳሮ አያናና አጋልሰሰ ካዱርሳ አታይረ ዋ አማናኖክሶ ካካይናራን፡” 2 ሂካ አንክክ አጋልሰሰ ካኮኤሜታራ ሳሙትሶ ኤሊኒ ሄላባተ ታጉባተቶ ማርጮ እን ካኮንዶቶይተቶ ጣራመሳልኮያ፡ 3 ሂካ አንክክ እባዶ አታታኖና ኬሳማኖ ትራራ፤ ዋ ካአማናራና ሩም ካካሳ እባዶ ኡሱ ጋላታ ጎጎአምሮን ዋ ካመጠሮ ባቦ “አሮእንተ” አማ ትራራን፤ 4 ዋ ካመጠራ ማምሰክ አዬንሳ ካአዳንክያ፤ ጋላታይ ካአታቴራንኮ ኮና ካቫፋምራ ላኮግሮ፡ 5 ሃፋራ ካዋይና ኤቢ ካቁሎየ ላራ፡ 6 ሂካ እጃጃ አቢላሉን አጋልሰሰዋ፡ ካአማኖ ሃፋራይና አት ካአታተቶ ካአዳንክ አጋልሰሰ አታይደ ካክርሰቶሳ የሱሳ አዱ ካህንዳሮ ልናታ፡ 7 ዋ ታካባጅኖን ላኦ

ካላይት ጀርትኮና ካጀርቲልኮክ ማማልኮ ፋክሞ፤ ሀሱኮ ካሩሞ አያናኮክ ግርና አስኦታ አጋልሰሳ። **8** ማር ፋፋራታኖ አየሰ ክጫሩን ጋርጋራራ፤ ካሩሞ አያናኮክ ግር እስ አጋልሰሳታኖ ጎአመን ግዳኑና ሌረ ካኤሜታሮ ግሪ አብድ ማንኮግቶ ማራን ላማ ዱባወና ላኦ ሰሳራ። **9** ሂክ ሃፋራ ካአብዳመና እባዶ ዱባ አታይን ካዶትሳሮያ፤ **10** ሂካኑን አምነኔ አጸማ ሀራና፤ ህክና እባዶ ዱባወን ካካለኮና ዋ እአማናራወን ካፋይሳሮ አርዶክ ዋይ አብድ ማንኮየላታኖ ማራንያ። **11** ሂካ አየሰ አጃጂ፤ አጋልሰሰ። **12** ዋዳሉማታ ማዮና አሮቱፋኖ፤ አየሱን ጎአመን እማኒሉን አዬሲና ባሪሳኖይ፤ ጌላንጄ፤ አማኖይና ሙጭማኖይ ካአዳን ማሱሳ ሌ። **13** እን ታ ኤሜሮን ቁሉክ ማጻፋጃል ናባብን፤ ማርካ ሰሲንና አጋልሰሰን አታ። **14** ምን ካዋት ጃርሶለ ገነትሶ ኩ ጉት ጎካይተ ሃገሮይ ኩን ካሰሳመሮ ካሰኖ እላቦ አሮዲድ። **15** እባዶ ዱባ ጂናንካ ጎሳዴሮን ሂካ አየሰ ጉት ክንትቢና አታኒ ፈል። **16** ግርካወና አጋልሰሰካወን አሰኦራ፤ ህናኣኒና አታ፤ ሂካ ጎየልተ አስኦታና ታታ አማላራን ፋይሶዋ።

5 ካጀሮመ አባዶት አቦካ ኣን ቶቲደ ጎርሳ ሰሰ ኳሬ ጅብዳም አሮአዬሰ። ዋዳላ ባባር አብላልታ ኣን ቆጶ፤ **2** ኡሱማለና ጃርትል ኣጮልካ ኣን፤ ዴሌል አድ አባላልታ ማለ ታሙጭንተ ዋዳናይ ዲያ። **3** ኦግራን ኦራካታራን ጋልታንተጃል ካባጃ። **4** ጋልታንቴ ቶ ይሰክሴ ጎርቱን ይሰክሴኮክ ይሰ ጎአባናዪተ፤ ሂክ ይሳሰ ካምነ አባዶክሶ ጋርጋራኖና ኦኡሙለራኑን ገነትሶ አባባኖይ ዱባንኮ ሆረነ አማኖክሶ ፈሎይ ቱሰን አጋልሳይን ዶትሳራ፤ ሂክ ዋ ካገጌላይሰሮያ። **5** ኦግራን ጋልታንቴ ታሌተታ፤ ካላካለ ታግታ አብድትሴ ዋይ ጉት ካታ፤ ኤቢወና ጋርጋርሳ ካዋ ኤባታ አሪነ ሄመኔ አታታተ። **6** ገጌሎ ኦኡሌ ታዶታታ ጋልታንቴ ጎአመን ኔፎ ግራን ታጎተታ። **7** ማምሰክ አባዶና ቱፊ ካላይ ጎሳግሮን፤ ሂካ ዋጋ ጎሳወን ሰገ። **8** አባዶት ኮ ፋልኬሳ፤ ካካለኮና ካምነ እባዶ ካጋርጋሮን ጎሌ አማኖኬሳ ካካካተ፤ ዋይ ካአማኖን አባዶኮ ሮረ ካሜላንያ። **9** ጌሰ ሎታምኮ ሄገልባንት ጋልታንቴ ማዘጋባ አሮታቦ፤ አደና ኤንተር ኮት ኦር ላኖ ዶትሳራ፤ **10** ይሰ ጂናሳታኖይ፤ ማርት ቆጶታኖይ፤ ቁሎሌኮኒዕ ሉቃ. አልሳኖይ፤ ኦራካታራን ጋርጋራኖና ያዳሊ ታኢዳን ዱባን አሰኦትሴ ሰሳታኖይ ፈሎ ኦኢዳነቱና ታአቶታንተቶ ላኖ ዶትሳራ። **11** ይሱማ ካአቦ ጋልታንተጃል ጎአመን ሂካማለክ ማዘጋባ አሮጻፍቱን፤ ኣላንቲና ካሶየ ሀልቻክሶይ ታክርሰቶሳ ጌላንጀ ጎሀንቃቶ ኤንተሪ ኬሳሚን ዶታታራን። **12**

ሂካኒና ፍርዳ እስከትሶ ጉት ኬናታናን፤ ሆራርጀ ኦታቤራን አማቶ ዲጌራን። **13** እደ ፈሎ ፋራታኖና ምንኮ ምን ማራሙራኖ አጋልሳታራን፤ ፈሎ ፋራታኖ ካላል እንሌኖን ግራን፡ ካዶትሶን አዬሳ ኦሀማታራና ሃጃ ታእባዶይ ጠኤ ኦታባራን ላራን። **14** ሃንሱን ኤንተር ካኮንጎየራ ይሱማ ካእባ ሄለል ጎንኬሳምሮን፡ ይሰ ጎንኤሙላኑና ምንክሶ ጎንባርሳናኑን፡ ዲናና እሶ ካኮቱፋሮ እየሰ ጎንሄሎንኮ እን እሶ ጎርሳራ። **15** ሂታኮ ሆረን ጋልታንቴል ኮኮ ጸላዬ ዴበ ሰሴታ ካሩም ራኮ ቤራን። **16** ዋ ታእማናቶ ታሌተታ ማምሰት ሄለልትቲና ምንካክሰክ እባዶ ኦሮ ጋልታንተጃል ካግሮ ጎሌ፡ ምን ካዋ ካሩም ጋልታንተጃል ካላል ጋርጋርን ጎንዳንደቶ ኤሰዋ ሀጋርጋርቶ ኳሬ ምን ካዋቱን ሰዳን ጎንሌናውን አሮኢሶ። **17** ምን ካዋ ጎንዶትሳሮ ካባሪሳሮ፡ ሂካኮና ላላባኖዬና አጋልሰሳኖ ኦኦታታራን ጃርሶለጃውን ካዶትሳራ እየሰ አምባ እሶን ሀሰሳሞ። **18** ቁሉክ ማጻፋና፡ “ኦታ ካግሮ ኣር ሙንጀ አሮሽቲ፤” እደና፡ “ካፈላሮን ዳሞዛ ዶትሳራ” አማራ። **19** አቶ ላማ ጎርቱን ሴድ ጎኦቶታመ ኳሬ ጃርሶለ ጉት ካኤማታሮ ሞቶ አሮኦተ። **20** ካካለ ዲጉረን ጎንእስ ኦራናውን ጨቦ ካፈላሮ ጎሳ ሆረ ሀድሰ። **21** ዋይና ክርሰቶሳ የሱሳ፡ ካሹማመሮ ኤርግቻ ሆረ ሂካ አጃጃ በቤድ በቤዲ እንሌኖን ግራን ጎንኦራቶና እየሰ ኮና ኮኮኮ ሮርሳኖይ ጎንፈሎንኮ ሀዳራ አማራ። **22** ማዮ ጉቲና ገነታ ካይን አሮጃርተ፤ ካካለኔ ዋታ ጨቦ ፈልን ዋታ አሮሌተ፤ እስኦታ ቁሉማ ኦራ። **23** ቦጉና ሃር ጋለ ጋለ ኩን ካከያሮ ካሞጋን ሀውእምውን፡ ኡጫር ጣሞ ካዋይኒ ጣሞና ኳሬ ጎርታ በከ ኦላል አሮጣንተ። **24** እባዶ ኮኮክ ጨቦ ካሙታሮ ማንኮሌ ማራን ጣየ ፍርዳ ግራኖ ቱሳራ፤ ካካለ እባዶኮክ ጨቦ እደ አዳላተ ግያራ። **25** ፈሎ ኦኢዳን ኡሱማሌ ኦሙታራንያን፤ ካሙቶን ግሮ ጎሌና ዱዶ ሰያም ላኮሄሰናሮ።

6 መገ ካዋና አጋልሰሰኬሳ ጎንሀባራሞንኮ፡ ድዩማ ኦግራን ዱባ፡ ጎታጃልክሶ ካባጃምን ካዶትሳሮ ላኖ የላይሬን ሀቶታቴን። **2** ዋ ኦእማናራን ጎታል ኦእባን ድይጃል፡ አቢላል ማንኮሌን ማራን አሮቱፋና፤ ሂካኮ ሀንዳክሶይ ላኦ ኦሄላታራን ዋ ኦእማናራና እሶ ኦኤላታራን ማንኮሌ ማራን ሂካኮ ካሮረ እሶ ሀንዳይን ዶትሳራ። ሂካ እየሰ አጋልሰሰ፤ ጎርሲ። **3** ማዮና ካጣራ አጋልሰሰ ጎኦጋልሰሰ፡ ጎታካን የሱሳ ክርሰቶሳኮ ካኢዳንክ ሃፋራና ካሩም ዋ ላኖ ካኦታይሰሮ አጋልሰሰን ዋታ ካእስአቶን ጎሌ፡ **4** ሀሱ እባዶት ኮራይ አማጋማራ፤ ኮና ላኮሻዳሮ።

ሃፋራጃልኮክ ጋራ ደጋማኖና ኢንሰኢንጋምን ሀልቻ ካሜላን አባ፤ ህኒዕና ጋቢ፥
 ኢኦ፥ ሀባራኖ፥ ሄዳታኖ ካሜላን፥ **5** ኡሱማለና ሳሙትሶ ታባቶይተቶና ሩም
 ካኮንባተቶ እባዶ ካመጣራን ታእልኖን ደጋማ ኬናራ፤ ሂካ ኣንክክ እባዶ ዋ
 ሄዳይሳታኖ ኡራዎ ካኮሄላታራን ራ ኣን ሌ ሙታራ። **6** እየሱን ጎእመን “ኢን
 ካግራ ሌራ” ካእማሮ እባዶትን ዋ ሄዳይሳታኖ ካንጅንክ ዋረኤያ። **7** ሂካ ኡል
 ቶስ ኖ እንተ ካኤሜነና ኮኮ ኮና ላግሮ፤ ሂታኮ ኮና ኖ እት ካሴይናና ላግሮ። **8**
 እየሱን ጎእመን ባቦና ሳርሰና ጎግረ ኖን ሌራ። **9** ዱረሳ ሊን ኦዶታታራን አደ
 ታጫፍቲ ሜል ቶስ ኡሱማለና እባዶ ዳርአኖና ባስ ቶስ ኦጌሳራን ካሞጋን
 አዳክ ካሜላን ሀልቻ እያራን። **10** ኣላንቲና ማራጋደኮት ጌላንጀ ሜላን ዱባኮት
 ህዲድታ። ኮኮ ዱረሳ ሊን ካእባን ሀልቻልኮ ካከይ ራ ካእማኖኮ ሸርሜን
 ሰተራን፤ እስኦትሶና ካሞጋን አቦሳ ታብሳቴራን። **11** እት እባዶ ካዋ! እት ጎእመን
 ሂካ ዱባኮ ፋክም፤ ቁሉማ፥ ካሩም እያናኮክ ግር፥ እማኖ፥ ጌላንጀ፥ ኡብሲና
 ኢዳነ ዶታ። **12** ካእማኖ ጀሬን ሻፋታኖ ካእዳን ሻፋ፤ እት ኡሱ ቶስ ካኮኤማንተ
 ጎራታ እቶ ካሞጋን ሆረ ልክኪ አቶናት ካኮንሰስቶ ጅሩ ጅሮማክ ግር አባ።
(aiōnios g166) **13** ዱባዉን ግር ካሰሳሮ ዋይ ዶሌ ኡሱማሌ ጸንጢኖሳት
 ጲላጦሳ ሆረ ሩም ካእቶቴሮ ክርሰቶሳ የሱሳ ሆረ ኩን ሀዳራ እን ካእማራ፥ **14**
 ጎታካን የሱሳ ክርሰቶሳ ታሙትሮን ጊን፥ ሂካ አጃጃ ሸሬና ካላይና ቱፍ ካሊ
 ግርደ ጎጎኦራቶንያ። **15** ካክርሰቶሳ ሙታኖና፥ ካሶማሳመና ካለካለ ሞት ካሌሮ
 ዋኖላልኮክ ዋኖ፥ ጎታጃልኮክና ጎታ ዋ ጎራታኬሳይ ካቱሰናሮያ። **16** ኡሱ ካላል
 ካጎኖንያ፤ ማኖና ጋባላሚን ካዳንዴኖን ኢፋ ኦሮ ግራ፤ ኡሱ ካዳራ ማኖና ላግሮ፤
 ዲና ካዳንደራ ላግሮ፤ ኡሱን ካባጃና ሁናና ጅሩ ጅሮማዉን ሀሌዎ፤ ሀሚኒዕ።
(aiōnios g166) **17** ሂካ አላም ዱሬሳል ካሌራ ጎጎኮርኖኮ፥ ኖ ጎጎገገላኖን
 ካመን ዱባ ጫባጫባኢስ ካሰሳሮ ዋይ ኳሬ አብዳማኖ ካላይክ ኡራዎ ጉት
 አብድ ጎጎየላኖንኮ እሶን አጃጂ። **(aiōn g165)** **18** አዳነ ጎጎፈላዉን፥ ሹጎኒዕና
 ካካለቱን ሰስን ኦኤካቴን ጎጎሌራዉን እሶ አጃጂ። **19** ሂካ ጋራይ ካሩም ግር
 ጎጎሄላራዉን፥ ካኤሜታሮ ጌሱን ካእቲ ኡኩም ኦሌራን ኡራዎ እስኦትሶዉን
 ኩኩይሳታራን። **20** ጢሞቶሳ! ሀዳራ ካእታተቶ ዱባ ኦራ። ዋ ካካባጅሶን
 አዳክ ኢያኖና ዱዳኖን ማላባኖ እንሌኖን ግራን፥ “ማላባኖ” እን ካላሮ መጣመ

ካእዬሳማሮ እየሰኮ ፋክም። **21** ሂካ እንክክ ማላባኖ እብና አማ ኦግረን ኮኮ
ሂካ የላኖይ ካእማኖ ራኮ ሸርሜን ሰተራን። ሰኖ ታዋ ኩኔ ዎታ ሀሌቶ።

2 ጢሞጥሳ

1 የሱሳ ክርስቶስ ታሄላነተቶ ታግር አብድክ ማለ ፈኢ ታዋይ የሱሳ ክርስቶስን ካፋራመር ጳውሎስኮ ካፋራመር ሀንዳ። **2** እን ካጌላታሮ ኤሪኬ፥ ጢሞጥሳ፤ ሰኖ ሻጋና ኖሳዳ ዋ ኦዶኮ፥ ጎታካን የሱሳ ክርስቶስኮ ኩን ሀሌቶ። **3** እርጌቶ አሪኔ ሄመኔ ኤቢ ኩ ጎሻድሮ፥ ኦዶላል ካሆሬ አቦጃላልካን ጎሳየለናንክ ማለ ቁሉት ሳሙይ ካኮንሀንዳሮ ዋኬ ጋላታራ። **4** እን ኢልምታ ሻዳ ኣሎ ገጌላይን ኩ ድን ሀልቻራ። **5** አፍሳዳ ካልክ አማኖ ሻዳራ፤ ሂክ አማኖ አኮታ ሎይድና አየታ ኤወኒቄ ዶሌ ግረ፤ አደ ኩና ግራኖ አዴሰራ። **6** ሃንሱን ገነኖኦቴ ኩ ጉት ካኮካየ ጎራታ አት ካአታተቶ ኩ ኦሮ ካግሮ አላቦ ካዋ ጎሳከኬሶን እን ኩ ሻድሳራ። **7** ዋ ካሁናና ካጌላንጃ፥ አሰኦታ ካኮአዋዳቶ እያና ኳሬ ካአብሲ እያና ላኮኖ። **8** ጎርታ፥ ጎታካንኮት አቶቲን አሮሙልተ፤ ኡሱ ማራን ካሸያመር እዬ አሮሙልተ፤ እየሱን ጎአመን ሁና ካዋይ ዋንጋላ ማራን ኢን ዋታ ራኮ አታ። **9** ኡሱ ኖ ኦፈልነኖ ፈሎ ኦኢዳኒ እንሌኖን ግራን ፈኢቴሳኮና ሰኖቴሳኮ ካከይ ኡሱ ኖ ፋይሰ፤ ቁሉማወና ኖ ኡመራ፤ ህት ሰኖና ጌሰ ካሞጋንኮ ሆረን የሱሳ ክርስቶስሳይ ኖን ሰሳንተታ። (aiōnios g166) **10** ጋራ ካዋንጋላን ኔፎና ጎይ ካላይክ ካግር ኢፋ ቶስ ካቤስሮ ዶብካን ጎይ ካአዋዳተሮ የሱሳ ክርስቶስኮክ ጋራን ህት ሰኖ ኖን ሙተታ። **11** እንና ሂካ ዋንጋላ ካገጌሎ ካላላባሮና ካፋራመር፥ ካአጋልሰሳሮ ሌ ሹማመራ። **12** እን ህታ ራኮ ካኮንአታታራና ሃኑንያ፤ ጎሌና እን ካኮአማነሮ ኡሱ ማንኮካሶ ማራን ላኮሙልናሮ፤ እን ኡሱን ታሰሳየሮ ሀዳራና ኤሰ አሪ ታጌቶ ካኦርናሮ ላኖ እን አዴሰራ። **13** እንኮ ካማልተቶ ክርስቶስ የሱሳ ካግሮ አማኖ ጌላንጃ፥ አጋልሰሰ ካአዳንክ ማሱሳ የላደ ኦራ። **14** ኖ ኦሮ ካግሮ ቁሉክ እያናኮክ ጋራን ኩን ታሰሳንተቶ ታኢዳንት ሀዳራ ኦራ። **15** ታአሰያ አወራጃይ ኦግራን ዱባ እን ሉጉደን ካኢሰራን ካሶዋ፤ እሶ ኦሮኮ ፈገሉሰና ህረሞገነሰ ግራን። **16** ጎታ ካኦነሰፎር አባዶ ካምኔቱን ኢዳን ሀየሎ። ኣላንቲና ካሞጋን ጎራታ ጎሳኢሰራን፤ ሻማኖኬይና እን ላኮሙሌሮ። **17** ኡሱማለና ኡል ካሮም ቶስ ካኮኤመዬረ ጎራታ ኣሎ ዶተን እን ሄሌራን። **18** ታጋቾ አሪ ጎታ ሻጋ ሀሰሶ፤ ታኤፈሶን ካታማይ ታኮግረ ኤግታክ እዬን ሀንዳየሮ አት ኣሎ ካሳ።

2 ጎርታ ኡኑኬ! አት የሱሳ ክርስቶስ ታግቶ ሰኖይ አታ። **2** ካሞጋን አቶ ሆረ እንኮ ካማልተቶ፥ ካካለ አጋልሰሰን ካዳንደሮ ካአብዳመ አባዶን ሀዳራ ሰሰ። **3**

አትና ካየሱሳ ክርስቶስ ካእዳንክ ዋታዳራ እን ሮጌ ዋታ ራኮ እታ። **4** ዋታዳራ ሌ ካፈላራ አባዶት ካጀረነ ዋይቻ ገጌላይሰን እጸማራ ኳሬ ፈሎ ኦካለቲ ጎራታ ላኮባሳታሮ። **5** ኡሱማሌ ትያኖ ለላሚን ካታባራ እባዶት፡ ሴራ ካለላማኖ ኦራዬ ጎለላማናዋተ እዋዳኖኮክ ካላቻ ላኮሄላታሮ። **6** አራ አታተ ኦታተ ካባራረና ፈሎኦቴሳክ ዳፋርኮ ካሄላማሮ ወጣ ሆራርጀ ሄላይን ዶትሳራ። **7** እን ካእማሮ ዋዳና አባ፤ ጎታ ዱባዉን ሻዳኖ ኩን ሰሰሮዋ። **8** ጎይኮ ካኬሮ፡ ሳኒ ታዳወተኮ ካሌሮ የሱሳ ክርስቶስ ሻድ፤ እን ካላላባራ ዋንጋላክና ሂካዋያ። **9** ሂካ ዋንጋላ ማራና ፈሎ ኦሜላን ካፈለሮ እባዶ እን ሳንሳላታ ሻመረ ራኮ አታታ ግራ፤ ሃፋራ ካዋ አደ ላኮሻማሮ። **10** ሃኑን የሱሳ ክርስቶስ ካግሮ ፋይና ጅሩ ጅሮማት ካባጃ ዋታ እሶና ጎንሃላራኑን፡ ዋዉን ኦእሳባሜራኑን እመረ ዱባና ኦብሲ እታይናራ።

(aiōnios g166) **11** ሃ ካእማራ ሃፋራ ካአብዳመያ፤ ኡሱነ ዋታ ጎንኑ፡ ኡሱነ ዋታ እድ ኔፎ ግርናና። **12** ኦብሲ ጎአታን፤ ኡሱነ ዋታ እድ ሬድናና። ኖ ኡሱ ጎካካን፤ ኡሱ እድ ኖ ካካይናራ፤ **13** ኖ ኦአብዳምነ ሊ ጎሙቶን፤ ኡሱ እስኦቴሳ ካካዬን ማንኮዳንዴኖን ማራን ካአብዳመ ሌ ግራራ። **14** ሂካ እየሰ ሻድሰ፤ ህኢኮ ካበያሮ ሃፋራ ኮኮይ ጎንዶጋሞንኮ ዋይ ሆረ ሴሪና፤ ሂክ ላኦ ካላይክ፡ ኦማላራና ካባሳሮያ። **15** ካሩም ሃፋራ ልክ ካእጋልሰሳሮና ፈሎኦቴሳይና ሀሙልኖን ካኮንአቶታመ ካፈላታሮ ሌደ እስኦታ ዋይ ሆረ ሰሳይን አታ። **16** አላምኮ ካሌሮ ሄንተፈለክ እየሰኮ ፋክም፤ ሂካ እዬሲ ካእባመራ እባዶ ዋኮ ፋክማ ሴታራ። **17** እዬሰክሶ ታፋይኖን ሜጋ እን አማራ፤ እሶ ኦሮኮ ሄመናሰነ ፍልጦሳኔ ግራን፤ **18** ሂክ እባዶ ሩምኮ ፋክመረ፡ “ጎይኮ ክያኖ ሂታኮ ሆረነ ሌራ፤” እማ እባዶ ኮኮክ እማኖ ሶሶይሳራን። **19** ሀሌዋ ኳሬ፡ “ጎታ ካኬሳ ካሌሮ ካሶዋ፤” አደ፡ “መገ ካጎታ ካኡማታራ ዱባ ሜላንኮ ሀፋክመ” ካእማሮ ማታማ ካእባ ካእኢኖን ኡኩም ካዋ አታተ ግራራ። **20** ምን ካንጂንክ ኦሮ ዋርቁኮና ብርኮ ካፈላመ ሁ ካላል እንሌኖን ግራን፤ ጋኮና ኤሬኮና ካፈላመራ ሁና ግራራ፤ ሂካሰኮና ኮኮ ካባጃዉን ካካለና ካባጃ ካላይኒዕ ፈሎዉን ሃራ። **21** ጎርታ ማዮና እስኦቴሳ ሂካ ካሰጋመሮ እየሰኮ ጎሙጭመ ካካባጃ ሀንዳዉን ካሌሮ፡ ካቁሎየ፡ ጎታኬሳዉን ላኦ ካሰሳሮና፡ ፈሎ ኦኢዳንቱና ካኤካተ ሁ ልናራ። **22** ካዋዳሉማ ሀልቻ ካሜላንኮ ፋክም፤ ሙጭ ታአንተ ዋዳና ጎታ ኦኡማታራን ዋታ ቁሉማ፤ እማኖ፡ ጌላንጃና ኖጎዳ ዶታ። **23** ካማድኖን ፋሬን ካሊክ ዶጋማኖኮ ፋክም፤ አላንቲና

ሂክ ኤንገ ካኬናሮ ላኖ ካሶዋ። 24 ዋውን ካሃንዳራ ኢንሰኢንጋምን ላኮዶትሳሮ፤
 ሀሱኮ እባዶ ዱባን ካእዳንክ፤ አጋልሰሰን ካዳንደሮ፤ ካኦብሳሮ ልን ዶትሳራ፤
 25 ሩም ማላባኖ ቶሰ ጎጎጌራኑን፤ ዋ ጨቦኮ ጉላ ጋላኖ እሶን ካሰሰናሮ አብድ
 የላታ ኡሱ ኦኔባታራን ኢዳነ ቱኩል ካኡምሳሮ ላኖ ዶትሳራ። 26 ህክና ሳሙትሶ
 ቶሰ አባባራንዋ፤ ፈኢቴሳ ጉድሰን ኦቦጃማን የለ ካአበሮ ግቴ ካዱርሳኮ ፋላዳይ
 ሄሰራንዋ አማያ።

3 አየሱን ጎአመን ጌሲ ካጉዳታሮ ካጫናቅሰራ ጎራታ ኤመታኖ አዳሰ። 2
 እባዶ እስኦቴሳ ካጌላታሮ ልናራ፤ ማራጋዴ ካዮራሮ፤ እስኦቴሳ ካዳዳታሮ፤
 ኮራማሳል፤ እባዶ ካሀባራሮ፤ ኦኡሙለራውን ካእጃጃሞን፤ ጋላታ ካላይኒዕ፤
 ቁሉማ ካላይኒዕ፤ 3 ጌላንጀ ካላይኒዕ፤ ዋጋርሰ ኦጌላኖን፤ ኦሀማታራን፤
 እስካአዋዳኖን፤ ቦግካእቲ፤ ካእዳንክ ካሌ ካጌላኖን፤ 4 ኦካካታራን፤ ኦጀጀራራን፤
 አዱ ኮራይ ኦአማጋማራን፤ ዋኮ ሮርሳተን ግር ካእዳን ኦጌላታራን ልናራ። 5 ዋ
 ኦሄዶይሳታራን ኣን ላራን፤ ዋ ሄዶይሳታኖኮክ ሁና አደን ካካቴራን። ሂካሰኮ
 ፋክም። 6 ሂኒዕ እባዶጃ ምንጃላል ሉቄን ታቤን ጨቦ ካንጂን ካኮንግሮና
 ካሞጋን ሀልቻ ካማላኒ ኦሮ ታቤን እያና ካሀረሮ ሄለል ኦሶሶይሳራንያን፤ 7
 ሂካማሌክ ሄለል አርጌቶ አጋልሳታራን፤ አየሱን ጎአመን ሩም ማላባኖ ቶሰ ጌግን
 ዱዶ ላኮዳንዳሮ። 8 እያነሰና እያንበሬሰ ሙሴ ጎጎዲደረኒ ህኒዕና ሳሙትሶ
 ካኮንባተና አማኖኮ ካእደራ እባዶ አደ ሩም ኔባታራ። 9 ሀሌዎ ኳሬ ታኢያነሰና
 ታኢያነበሬሰ ጎዉማ ጎጎሙተቶ፤ ሂካ እባዶኮትና ዱባውን ሙቶዋ። 10 እት
 ጎአመን አጋልሰሳኖኬ፤ ግርኬ፤ ሀልቻኬ፤ አማኖኬ፤ ኦብሰቴ፤ ጌላንጀቴና፤
 አታንኬ ዱባ ካሶዋ፤ 11 ሆሮራማኖና ራኮቴይ፤ እንጾክያይ እቆንዮንና፤
 ልሰጢራይ ኢን ካጌሮ ሆሮራማኖና ኦብሰቴ ዱባ ካሶዋ፤ ጎታ ጎአመን ሂካ ዱባኮ
 እን ሃሰ። 12 ኦግራን የሱሳ ክርሰቶሳ ካሩም እያናኮክ ግር ግርን ኦዶታታራን
 ዱባ ሆሮራማኖን። 13 ኦማላና ኦሶባራን ጎአመን ኡሱን ሸርማና ሸርሳ፤ ሜላነ
 ጉት ሜላነ አዱ ሴታራን። 14 እት ጎአመን ካአጋልሳተታ አዮኮዮ ማንኮካሶ
 ማራን ካአጋልሳተቶና ሩም ካኮአዴሰቶ አታ። 15 ይሱማኮ ሀጋአብተደ፤ የሱሳ
 ክርሰቶሳ አማኖይ ፋይና ካኮሄላማሮ ቃሩማ ኩን ሰሰን ኦዳንዴራን ቁሉክ
 ማጻፋል አዴሰታ። 16 ቁሉክ ማጻፋጃል ዱባ ሀኢ ታዋኮ ካቤሮ ሃፋራ ካዋያ፤

አጋልሰሰን፡ ሴርን፡ ቱኩል ኡምሰን፡ ካሩም ራድ ጎርሲን ጋርጋራራ። 17 ህክና አባዶ ካዋ፡ ፈሎ ኦኢዳን ዱባን ካኤካሳተና ካኦቲ ሊ ጎሳሙትሮንያ።

4 ዋይ ሆረና፡ ዋናናት ካኮኤማታሮ ጎራታ ካጎየሮና ኔፎ ካግሮ ጉት ፍርድን ካግሮ የሱሳ ክርስቶሳ ሆረ እን ኩን ሀዳራ አማራ። 2 ሃፋራኬሳ ላላቢ፤ ጎራታ ኩን ጎኤካተና ጎኤካታናዋተና ካኤካሳተ ሌን። ኦብሰ ታኦቲትና አጋልሰሳኖይና ቱኩል ኡምሰ፤ ሀድሳኖና፡ አታይሰ። 3 አላንቲና እባዶ ልክ ካሌሮ አጋልሰሰ ካኮኦታኖን ጎራታ ኤመይናራ፤ ሂካኮ ሀልቻክሶውን እሰካኦትሮ፡ ነበትሶይ ማልን ካኢዳሮ ካዶታታራን ጎሳግራኩን ኦአጋልሰሳራን እሶ ማራሙረን ኩኩአማራን። 4 ሩም ማላናኮ ነበትሶ ጨፋታራን፡ ማማ ማልን አባባታራን። 5 አት ጎአመን ካመን ዱባውን ካእሰል ሌን፤ ራኮይ ኦብሲ፤ ኦዱ ታኢዳን ላላባኖኮኒዕ ፈሎ ፈል፤ ሀንዳካ ዱባ ፈል ጉድሰ። 6 እን ጃርሶ ሊ ጎይ ሂካ አላምኮ ካለሊ ካኮቤራ ጎራታ ጌራ። 7 እን ሞአባታኖ ካኢዳን አባየራ፤ ትያኖና ጉድሰራ፤ አማኖና ኦራዬራ። 8 ጎርታ ቁሉክ ካላቻ ኢን ኤካተራ፤ ሂካና ቁሉክ ካፍርዳሮ ካሌራ ጎታ ሀሴ አሪ እዬን ሰሰናራ፤ አደ እን ካላሉን አሌኖን ግራን፡ ኤመቶቴሳ ኦሀልቻራን ዱባውንያ። 9 ሳም እን ቶስ ኤመይን ኩን ካዳንዳመ ዱባ ፈል። 10 ዳማሰ ሂካ አላም ጌላተረ እን ኢሰረ ኡል ካተሰሎንቄ ቶስ ሴተራ። ቀርቅሰ ኡል ካጋላትያ ቶስ፡ ቲቶና ኡል ካድልማጢያ ሰተራን። (aiōn g165) 11 ኢን ዋታ ካግራ ሉቃሳ ካላልያ። ማርቆሳ ሀንዳኖኬይ እን ማንኩጋርጋራሮ ማራን ኤመታ ዋታ አት ኮያ። 12 ትክቆሳ ኡል ካኤፈሶን ፋረራ። 13 ኤመታ ግራን ኡል ካጢሮአዳ ካርፑሳ ዶሌ ታሉጉዳየሮ ካባ፡ ካዱባመ ካጋልባ ማጻፋ ካካለኮና ጋልባ ጉት ካጻፋመሮ ማጻፋና አት ኮይ። 14 ካናሰ ማርጮ ካቱማራ እሰክንድራ ታንጂን ሚራኣ እን ጌግሰ፤ ዋ ፈሎ ኦቴሳክ ማለ ኡሱን ሰሰሮዋ። 15 ኡሱ ሀንዳካን አሎ ማንኮዲደሮ ማራን፡ አትና ኡሱኮ እሰኦታ ኦራ። 16 እን ካኮን ሞታመረ አየሰ ካሆራርጄ አባብ ሰሰን ካኮሴየረ ጎራታ ማዮና እን ካጋርጋረ ኮና ላኮግሮ፤ አየሱን ጎአመን ዱባ እን ኢሰን ሴተን። ሂካና እሶን አሮቶትና። 17 አየሱን ጎአመን ሀንዳ ሞናቴን እንሀቃኖን አማጋመ ጎሳላላባምሮና አይዛብ ዱባ ጎሳማሎ ጎታ እን ዶሌ አሌረ አታይሰ፤ ህኢ ታሉባንኮና ሃሰ። 18 ጎታ ካሜላን አየሰ ዱባኮ እን ሃሰናራ፤ ዋናናት ካዳሩረ ቶስ ኖጎዳ እን ጌግሰናራ፤ ኡሱን ጅሩ ጅሮማኮ ታ ጅሩ ጅሮማን ጌሮ ካባጃ ሀሌቶ፤ ሀሚኒዕ። (aiōn g165) 19 ጲርስቂላና አቅላን፡

ካኦነስፎርም ካምነ እባዶን ኖጎዳ ጌግሰ። 20 ኤርሰጦሳ ኡል ካቆሮንቶሲ
ሄሰራ፤ ጢሮፍሞሳና ማንኮሀዉአመ ማራን ኡል ካምልጢኒ ኢሳገራ። 21
ባጠሳኮ ሆረነ ሂታራ ኤመይን ኩን ካዳንዳመ ፈል። ኤዉቡሉስ፣ ጵዴስ፣ ልኖስ፣
ቅላዉድያና አማኒል ዱባ ኩን ኖጎዳ ፋራሜራን። 22 ጎታ ኩኔ ዋታ ሀሌዎ። ሰኖ
ታዋ እስን ዋታ ሀሌቶ።

ቲቶ

1 ዋ እስላሞች አማኝና ካሩም ግር ካእያና ቶስ ካቃጃልሰሮ ካሩም ማላባኖ ጂናሲን፡ ድይ ካዋና የሱሳ ክርስቶሳን ካፋራመሮ ጳውሎሳኮ፡ **2** አማኝኬሳና ማላባኖኬሳ ካኮዳባተራ ካሶቦን ሄዶ ጌሰጃልኮ ሆረነ ታታበሮ ጅሩ ጅሮማት ታግር አብድ ጉቲያ፡፡ (aiōnios g166) **3** ኡሱ ካኮሙርቴሴሮ ጎራታ ኖ ካፋይሳሮ ዋካንክ እጃጃ እዬን ሀዳራ ካኮሰሳመሮ ካላላባኖ ጋራን ሃፋራ ኢን ቱሰ፡፡ **4** ራቶክ ካሌሮ ካሩም አማኝ ኤሪኬ ካሌሮ ቲቶን ዋ ኦዶኮ፡ ኖ ካፋይሳሮ ክርስቶሳ የሱሳኮ ሰኖና ኖግዳ ኩን ሀሌቶ፡፡ **5** ኩ ታቀርጠሰ ኦዶላ ካኮንኢሴራ ጋና ካኤካኖን ግር እየሰ ጎጎኤካሶና እን እጃጃ ጎጎሰሰሮ ማለ ካታማ ዱባ ጃርሶለ ጎጎሹምቶንያ፡፡ **6** ምን ካዋክ ጃርሳ ካቱፋሞን፡ ኦር ቶ ካእቦ፡ ይሰኬሳና ዋ ካእማናሮ ራራጋታኖይ ጎርቱን እጃጃ አታታኖዋቲ መገክሶ ካኤማሞን ሀሌዎ፡፡ **7** ኤጲስ ቆጶስ ሌ (ሆረሃየ ካፈላራ) ፈሎ ኦዋኮት ሀዳራ ጎጎእቦ ማለ ካቱፋሞን ላኖ ዶትሳራ፡፡ ህክና ኢፍሳዳ፡ ሳመ ካእማራታሮና፡ ካሴታሮ፡ ካዶጋማሮ፡ ራ ካሊ ታሄላማቶ ላእን ካትያሮ ላኖ ላኮዶትሳሮ፡፡ **8** ሂካኮ ሱረ ማርት ካቆጶታሮ፡ ካእዳንክ ካሌሮ ካጌላታሮ፡ እሰካእዎዳታሮ፡ ቱኩልክ፡ ቁሉክና እሰካኦራተ ላኖ ዶትሳራ፡፡ **9** ካካለ ካሩም ካሌሮ አጋልሰሰ ጎጎእታይሰሮና ሂካ አጋልሰሰ ኦድዳራን ጎጎዎቃሰሮን ጎጎእጋልሳተሮ ካእብዳመ ሃፋራ ካእታታሮ ላኖ ዶትሳራ፡፡ **10** ካዲዳራ፡ ካላፍላፋራ ካሶባራ ካሞጋን እባዶ ግራ፡ ሱረዋ ሂክ ካሀማጲሳመራ ታእይሁድ ኡናኮያ፡፡ **11** ሂናኣ ጫልኢ ኢሳኖ ካዶትሳሮያ፡ ኣላንቲና ልክኪ ካሌኖን ራንደ ላኦ ሄላይን አማ አጋልሰሰን ካዶትሶን እየሰ አጋልሰሳኖይ ካምን እባዶ ዱባ ሻላጋራን፡፡ **12** ካክሶ ካሄገሮልኮ ኮ ጋራክሶ እዬሳ ግራን፡ “ካቀርጠሰ እባዶ እርጌቶ ጣራ ኦላልኒዕ፡ ካሜላን ሱላለና ላፋኒዕ ጋንቸኒዕያን” አመራ፡፡ **13** ሂክ አቶናት ሩምያ፡ ሃንሱን ኣሎ ቆዲና፡ ህክና ልክኪ አማኖ ጎጎግርቶና፡ **14** ታእይሁድ ማማ ጎርቱን ሩምኮ ኦፋክመራን እባዶኮት እጃጃ ጎጎጫቃሶንኮያ፡፡ **15** ካሙጭመዉን ካመን ዱባ ካሙጭመያ፡ ባቲክና ዋ ካእማኖቱን እደ ካሙጭመራ ኮኮ ኮና ላግሮ፤ ሱረዋ ሳሙትሶና ሻዳኖክሶ ካባቶየያ፡፡ **16** ዋ ካንሶዋ አማራን፡ እየሱን ጎእመን ፈሎኦትሶይ ካካታራን፡ ኦሜላን፡ ኦእጃጃሞና ፈሎ ኦኢዳኑን ኦሌኖንያን፡፡

2 አት አደ ልክኪ አጋልሰሰን ዋታ ካእሰአታሮ አጋልሰሰ። **2** ካጃሮመ ባባር እስሰል ኦካባጃሜን፤ እሰኦትሶ ኦኦራታራን አማኖ ጌላንጀና ኦብሳኖይ ፋያሌሳኒዕ ጎሳሌራውን ጎርሲ። **3** ኡሱማለና ጃርትልና ግርክሶይ ኦካባጃሜን ጎሳሌራውን፤ ካእዳን ካሌሮ እየሰ ጎሳአጋልሰሰራውን ኳሬ መገ ካእባዶ ኦባሳራን ጎርቱን ካሴቲሳሮ ጣሞኮክ አራዳ ኦኦባሜን ጎሳሌኖንኮ አጋልሰሰ። **4** ሃ ጎሌን እሶ ካኢማክ ሄለል ኤንተርክሶና ይሰክሶ ጎሳሌራውን አጋልሰሰን ዳንዳራን። **5** ሃፋራ ካዋ ማኖ ዶሌና ጎሳኢንጋማሞንኮ እሰኦትሶ ኦኦራታራና ኦሙጭሜን፤ ሞን ኦሮ ፈሎይ ኦኦዳሳሜን፤ ኦኢዳኒዕ፤ ኤንተርክሶውና ኦኦጃጃማራን ጎሳሌናውን አጋልሰሰ። **6** ኡሱማለና ካኢማክ ባባርና እሰኦትሶ ጎሳኦራናውን ጎርሲን። **7** ማምሰክ እዬሰና ካእዳን እየሰ የላኖይ እሰኦታ ማሱሳ የላ ቱሳ፤ ካአጋልሰሳቶ አጋልሰሳኖይና ካእሰል ላኖና፤ ካኡብዳመ፤ **8** ካቱፋሞን ካእዳንክ እየሰ ቱሰና፤ ሂካና ካዲዳራ ጋራካን ታእምእዬሰሮ ካሜላን እየሰ ዋይረ ጎሳሙልሮንያ። **9** ድይጆል ጎታክሶውን ማምሰክ እዬሰና ጎሳኦጃጃማራውን ጎሳገገላይሰናውን ሃፋራ ካሜላን ጎሳኦባባንኮ አጋልሰሰ። **10** አሮሄቶ፤ ህክና ራ ዱባኒ ካፋይሳሮ አጋልሰሰ ካዋይ ጎሳሌላሮን ዱዶ ኦኦማናሜን ላኖክሶ ጎሳኦቶትሰራውንያ። **11** ፋይና ታኮሄላማራ ሰኖ ታዋ እባዶ ዱባን ሙተታ። **12** ህት ሰኖና ጨቦ ግራኖና አላምኮክ ሀልቻ ካካይነ፤ ሂካ ጌሲ እሰኦታን ኦራታና ቁሉማ፤ ካሩም ግር ካእያና ጎሳግርኖን ኖ አጋልሰሳራ። (aiōn g165) **13** ሂክ ካሶማሳመ አብድታን ካሌሮ ካንጅንክ ሄዶካንና ታፋይሳቶ ታየሱሳ ክርሰቶሳ ካባጃኮት ሙተን ኦራታና። **14** ኡሱና ሜላነኮ ቤሰን ካእዳንክ ካሌሮ ፈልን ካአታታሮ ካኬሳ ካሌሮ ጎሳ ኡሱን ሙጭሰን እሰኦቱሳ ኖ ማራን ሮርሳተ ሰሳተራ። **15** ጎርታ አጋልሰሰን ካዶትሳራ ሂካያ፤ ኦዶናት ዱዶክ ጎርሲን፤ ሀድሲን፤ ማኖና አሮቱፋኖ።

3 እባዶ ሞትጆሉና ኦዶናት ኦኦባውን ጎሳኦጃጃማሮን፤ አጃጃ ጎሳኦታራውን ካእዳን ካሌሮ ዱባ ፈልን ኦኤካቱን ጎሳሌራውን ሻድሰ። **2** ኡሱማለና ማኖ ጉቲና ታሜላን ጎሳኦዬሶንኮ፤ ኦኖጎዳ ጎሳሌራውን፤ እባዶ ዱባና ዋዳናኮ ታሌተ አንጅረ ጎሳቱሰራውን አዳሰሰ። **3** ሂታኮ ሆረኒ ኖ መተካኑን ሻዳኖ ካኮንሀንቃተሮ፤ ኦኦጃጃሞን፤ ኦሶባምነኖ፤ ካለካለክ ሀልቻይና ኤካታኖን ድይ ሌን ኦኦምናምነኖ፤ ኢንሰኢንጋማና እሰአሰ ዱዳ ሜላነና ቃናቴ ግኤ። **4** እየሱን ጎአመን ካፋይሳሮካንት አንጅረ ታዋና ጌላንጀ ካኮሙተ ጎራታ፤ **5** ኦፈልነኖ

ቁሉኒዕ ፈሎውን እንሌኖን፡ ሻጋኬሳኮ ካከይ ፋይሰራ፤ ካፋይሰራና ካላም
 ኡሙላማኖ ካሌሮ አላኖና ኢያና ቁሉክ ኡሱባታኖያ። **6** ሂካ እያና ካፋይሳሮ
 ዋካን የሱሳ ክርሰቶሳ ጋራነ ኖን ጫባጫባይሰ ሰሰራ። **7** ህክና ሰኖይ ቁሎይነ
 ጅሩ ጅሮማክ ግር አብድ አባይኔ ኦኤላኖ ጎጎሌኖንያ። (aiōnios g166) **8** ህክና
 ካአብዳመ ሃፋራያ። ዋይ ኦአማናራን ካአዳንክ እየሰ ፈልን እሰኦትሶ ሮርሳይ
 ጎጎሰሳራውን ሂካ እየሰ አዴሰሰ እት ጎጎአዬሶን እን ዶታራ። ሂክ ካአዳንክና
 ማምሰክ እባዶና ካማድሮያ። **9** አየሱን ጎአመን ካማድኖን ዶጋማኖና አላታንኮክ
 ህዲድ ቶታኖ ዶጋማኖኮና ጋራ ካሴራ ታክያቶ ኤንገኮ ፋክም፡ ሂክ ላኦ ካላይክና
 ካማድኖንያ። **10** ካለካለ ላኖ ካኬናሮ እባዶ ሆራርጀ ጎርሲ፡ ካላም ሀዲሰ፡
 ኤሰኮ ጎርረ ኡሱነ ዋታ ኩን ኤሴላ ቶና አሮግኖ። **11** ሂካ አንክክ እባዶ
 ካሽርመና ጨባለሳያ፡ እሰኦቴሳ ጉት ካፍርዳታሮ ላኖ አዴሰ። **12** አርጢሞሰ
 ጎርቱን ትክቆሳ ኩ ቶሰ ጎጎፋረሮ እን ማንኮግሮ ቶሰ ንቆጶልዮን ቶሰ ኤመይን
 ኩን ካዳንዳመ ዱባ ፈል፤ ባጤሳ ኤሰ ሮርሰን ጎሳየራ። **13** ሴራ ኦካሳን
 ዜማሳና እጲሎሳ ሰሴታንትሶይ ጋርጋርን ኩን ካዳንዳመ ዱባ ፈል፤ እሶን
 ካዶትሳሮ ዱባና አማግ። **14** ኡናታንኮ ኦሌራውን አሪ ታህታርቴውን ካዶትሳሮ
 ጎጎሄላራውና ባርሳኖኦትሶይና ኢል ካላይኒዕ ጎጎሌኖንኮ ፈሎ ኦኢዳኑን አታታኖ
 ጎጎአጋልሳናውን ዶትሳራ። **15** ኢነ ዋታ ኦግራን ዱባ ኩን ኖጎዳ ፋራማራን።
 አማኖኮ ካከይ ኖ ኦጌላታራውን ኖጎዳ ገጊሳ። ሰኖ ታዋ እሰን ዱባነ ዋታ ሀሌቶ።

ፍልሞና

1 የሱሳ ክርስቶስ ማራን ካሸያመሮ ጳውሎስና አብካን ጠሞቶሳኩ፡ እሎ ኖ ካጌላታኖና ኖኔ ዋታ ካፈላሮ ፍልሞናን። **2** አባታን አፍብያን፡ ኖኔ ዋታ ዋታዳራ ካሌሮን እርክጸን ምንካይ ካኩኩማሮ አማኒሉን። **3** ዋ አቦካንኮና፡ ጎታ የሱሳ ክርስቶሳኩ ሰኖና ኖጎዳ እስኩን ሀሌቶ። **4** ኩ ኤብኬይ ሻዳ አርጌቶ ሄዶኬ ጋላታራ። **5** አላንቲና ጎታ የሱሳን ካአብቶ አማኖና ቁሎለ ዱባን ታአብቶ ጌላንጀ ማለራ። **6** ክርስቶሳ ማንኩግኖ ማራን እየሰ ካእዳን ዱባ አሎ ጎጎአዴሶን፡ አማኖካ ካካለቱን ገጊሳ ጎጎአታቶን ኤባታራ። **7** አቢኬ! ቁሎለኮት ዋዳና ማንኩፎልሲሲውን ጌላንጀታኮ ገጌሎ ኦኦቲና ጎጎአና ሄላየራ። **8** ሃንሱን ፈልን ካዶትሳሮ እት ጎጎፈልቶን ኩ አጃጅን ክርስቶሳይ ጃቡ ኢን ጎግርተና። **9** ጎርታ ጃርሳና ግዳ አደ ክርስቶሳ የሱሳን ካሸያመራ እን ጳውሎሳ ጌላንጃ ኩ ኤባታራ። **10** ምን ካሻኖ ግራን ካኡሙለሮ ኤረኬ እናሰሞሳ ማራን ኤባታራ። **11** ጣየ ኩን ላኦ ካላይክየ፤ ግዳ አደ ኩና ሌረ እዬን ላኦ ካአቦ ሌራ። **12** ዋዳናቴ ማለ ካሌሮ ኡሱ አባበ ኩ ቶሰ ፋረራ። **13** ዋንጋላ ማራን እን ታኮሻመሬ ባንኤታይ ሌረ ኢን ጎጎሀንዳይሮን ሃሳይን ዶተረ። **14** እየሱን ጎአመን እት ካፈላቶ ካአዳንክ እየሰ ዱባ ጌላንጃ ኳሬ ሁና ጎጎሌኖንኩ ኩኔ ሀማካሮን ኮና ፈልን ላኮዶታሮ። **15** ዋዳሳን እናሰሞሳ ጎራታ ክጫሩን ኩኩ ካኮንካለቤራ፡ ኡሱ ቆጳይደ ኤርናውን ኩ ዶሌ ጎጎአዳላይሶንያ። (aiōnios g166) **16** ሂታኮ ሆረንባን አደ ድይ እን ሀሌኖን ግራን ድይኮ ካሮራሮ አወአሎክ አብያ፤ ኢን ካጌላመያ፡ ሀሌዋ ኳሬ ሶይ ኡሱ ሀንዳኖኬሳ ኩ ማንኩማድናሮ ማራን እያና አደ ክርስቶሳ አቢ ኩን ማንኮሌ ማራን ኩዬን አደ አሎ ካጌላመያ። **17** ጎርታ እን ሳቲ እን ጎቶትተ እን ጎጎቆጳቶ ማለ የላ ኡሱ አታ። **18** ኡሱ ኩ ካኮሚረራ እየሰ ጎግረ ጎርቱን አምአታታ ኡሱ ጉት ጎግቲ እን ጉት ቶቲ። **19** እን ጳውሎሳ ሂካ ገነቴይ ጳፈራ፡ ኡሱ ታአቦ እንዛ እን ሙርናራ። እት መተካውን ካኬ ማንኮሌተውን ኮና ላኮአዬሰናሮ። **20** አቢክ ጎታይ እን ጎጎማድቶን ዶታራ፡ ክርስቶሳ ዋዳናቴ ፎልሲሰ። **21** ኢን ካአጃጃማቶ ላኖ አብዳታ፡ እን ካሆሳታሮኮና ሮርስ ካፈልናቶ አዴሰረ ጳፋራ። **22** ሂካኮና ካካለ፡ ኤብክስን አባብ ሄላይረ እን እስን ቶሰ ኤመይን አብድ ማንኮየላታሮ ማራን ታኮፎልሳሮ ባንኤ ኢን ኤካሳ። **23** እን ዋታ ክርስቶሳ የሱሳ ካሸያመራ ኤጳፍራ ኖጎዳ ፋራማራ። **24** ኡሱማለና ኢን ዋታ

ኦፊላራንኮ ማርቆስ፡ አርሰጢሮኮስ፡ ዴማሳና ሉቃስና ኖጎዳ ፋራማራን። 25

ታጎታ የሱሳ ክርስቶስ ሰኖ እስን ዋታ ሀሌቶ።

እብራዊ

1 ሆርኮስኮ ካየረ ዋራ ካዋጋንና ጎራታ ካዋጋኒ ጋራ ካሄገሮልኒ ኦዶጃልካኑን አዬሰረ፤ **2** ግዳ ጎእመን ካጋቾ ጌሲ ካመን ዱባ ጎጎኤሎን ካየለሮ ኤረኬሳኮክ ጋራን ኖን አዬሰረ፤ እላም ዱባ ካኮመጠራ ኡሱያ። (aiōn g165) **3** ኡሱ ካባጃ ታዋ ሀንቃይስ ካቱሳርያ፤ ያዳሊቴሳና ዋኔ ዋታ ታኤካቶታ፡ ሃፋራኮክ ሁናይ እላም ዱባ እስክስ አበራ፡ እባዶ ጨቦኮ ቁሎይስ አባባተረ ዳሩሪ ካእቲ ዋኮት መርጌ ሀማጾ። **4** ኡሱን ካቤራ መገ ካኤርግቻ መገኮ ካሮራሮ ማንኮሌ ማራን፡ ኤረ ካዋ ኤርግቻኮ ኣሎ ካሮራሮያ። **5** ዋ ዱዶ ኤርግቻል ኦሮ፡ “እት ኤረኬታ፡ እን ኩ ህታር ኡመላራ” ጎርቱን “እን ኦዶ ሌሮዋ፡ ኡሱና ኤረኬ ልናራ” ካኮንአመረ ማዮና ላግረ። **6** ዋ ባርክ ኤረኬሳ እላም ቶስ ካኮፋራረ ጎራታ፡ “ኤርግቻ ካዋ ዱባ ኡሱን ሀሳጋደ” አመራ። **7** ኤርግቻኮክ ጋራ፡ “ኤርግቻልና እምባል ኣን፡ ኦህንዳራና ላጫ ካኤሌኔ ኣን የልናራ” አማራ። **8** ኤረኬሳኮክ ጋራ አደ፤ “ሄዶ! ኮርፍንጀካ ጅሩ ጅሮማኮ ታ ጅሩጅሮማ ጌሮን ግርናራ፤ ዋናናትካና ሩሚ ባሪሳታ፤ (aiōn g165) **9** እት ቁሉማ ጌላታ፤ ሜላነና ዲዳታ፤ ሂካኮት ኣላንቲ ዋ ሄዶካ ኩ አሳባተ፤ ሳትላልታኮ ሮርስ ገጌሎ ታሰሳቶ ዛይት ኩን ሸግደ” አማራ። **10** ኡሱማለና፡ ጎታኬ! “እት ሆራርጀ ኡል መጢተ፤ ዳሩርጃልና ገነታይ መጢተ፤ **11** እሶ ዱባ ባይናራን፤ እት አደ ግርናታ፤ እሶ ዱባ ሳርስ ኣን ዶአይናራን። **12** ጋሽ እንና እት ዱብናታ፤ እሶና ሳርስ ካዶአን ሳርስ ካኡሱቢ ጎጎእግልሳማሮ ማለ ኢግልሳምናራን። እት አርጌቶ እትታ፡ ጌሰካውን ጋቾ ላግቶ” አማራ። **13** ዋ ኤርግቻል ኦሮ፤ “ዲናካ ኦዶናትካ ሄገሊ ታ የሎይ መርገቲይ ሀማጺ” ካኮንአመራ ማዮና ላግሮ። **14** ኤርግቻል ዱባ ዋ አማን ካፋይናሮ እባዶን ሀንዳይን ኦፋራማራን ዋውን ኦህንዳራን አያናልያን።

2 ሃኑን ካማልነኖ እየሰኮ ፋላዳይን ጎጎእኖንኮ ካማልነኖ እየሰን ኣሎ እስኦራታኖ ዶትሳራ። **2** ኤርግቻልኮክ ጋራን ካሰጋመራ ሃፋራ ሩም ሌራ፤ ሂካ ሃፋራኮ ካሽርማራና ሂካ ሃፋራን ካእጃጃሞን ታዶትሳቶ ሙሮ አታታራ። **3** ሀያ ኖ ሂካ ካእቲ ፋይናን ዶና ኦላኖ ጎሌን፡ ምሲ ሄሲን ዳንዳና? ሂካ ፋይና ኖን ካሰሰራ ጎታ እሲያ፤ ኡሱኮና ካማለራ እባዶ ሂካዋ አዳሰሰራ። **4** ዋ እሶን አደ ማላታል፡ ካሳድሰሮ እየሰ፡ ካዋጋን ባሳ ፈላኖዬና ፈኢቴሳክ ማለ ኦዳናባመራን አያና ቁሉክ እላቦልኮክ ጋራን አቶታኖክሶ አታይሰራ። **5** ዋ ሆረንባን ካኤሜይናሮን፡ ሂካ

ግዳ ኖ ካኮአዬሳኖ አላም ኤርግቻ ኦዶናት ጎጎባርሰሮ ላኮየለሮ። **6** ኡሱማለና ቁሉክ ማጻፋጆል ባንኤ ቶይ ሃ አማራ፤ “እት ጎጎቆፍቶን እባዶ መያ? እት ኡሱን ጎጎማራርቶ ኤረ ካእባዶ መያ? **7** አባራን ኤርግቻልኮ የራሰ፡ ካካባጃና ካሶማ ካላቻ ኡሱ ጉት ካይተ፤ ገነታ ኦፈልተቶ ፈሎ ጉት ሹሚተ፤ **8** ዱባና ኦዶናትኬሳ ሄገሊ ካይተ።” ካመን ዱባ ኦዶናትኬሳኮ ሄገሊ ካኮካይተ ጎራታ፡ ኦዶናትኬሳኮ ሄገሊ እንካይናን እት ካሃሴታ እየሰ ኮና ላግሮ። እየሱን ጎእመን ግዳ ጎጎግሮይ ካመን ዱባ ኦዶናትኬሳ ሄገሊ ካግሮ ጋና ላኮዴነ። **9** ግዳ አዴ ኤርግቻልኮ ጎራታ ክጫሩን ሁሰንተ ታግቲ፡ ታገይ ራኮ እታታኖኮት አላንቲ ካካባጃና ካሶማ ካላቻ ካካተሮ የሱሳ ድናና፤ ኡሱና ሰኖ ታዋይ ኖ ማራን ጎየራ። **10** ካመን ዱባ ኡሱይና ኡሱን ካመጣመራ ዋ ይሰ ካሞጋን ካባጃ ቶሰ ኬኒን ፋይናክሶክ ሶረሳ ካሌሮ የሱሳ ራኮ ኦሮማርሰ ሮርሳኖይ ዱዶክ ጎጎሌሮን ሂክ እየሰ ካዶትሳሮ ማንኮሌ ማራን ዋ ፈለራ። **11** አባዶ ዋዉን ካቁሎይሳራና ጋራኬሳነ የሱሳ ኦቁሎዋራን ኦዶ ኮክ ይሰያን፤ ሂካኮት አላንቲ ኡሱ እሶ፡ “አቢላልቲ” አም ኡምን ላኮሙላሮ። **12** ሃኑን ቁሉክ ማጻፋጆል “መገካ አብላልቲዉን ሰጊናራ፡ ጎሳ ካዋ ኦሮ ህእቲይ ጋላትናራ” አማራ፡ **13** ኡሱማለና፡ “አብድቲና ኡሱ ጉት ካይናራ” አማራ፡ አደና፡ “ሂክማ አንና ዋ ኢን ካሰሰራ ይንሳ ህታኒ ግና” አማራ። **14** ሃንሱን ይሰኬሳ ሶና ኢግ ካአቦ እባዶ ማንኮሌራን ማራን የሱሳና እሶ እን እባዶ ሌ፡ ሂካ ካኮንየለራ ጎይኮክ ጋራን ጎይ ጉት ኦዶናት ካአቦ ዱርሳ ባሰንያ፤ **15** ኡሱማለና ጎይ አብሳታኖኮት አላንቲ ኡሊ ካኮግራን ጌሰ ዱባይ ድዩማ አምናማን ኦግሬኑን ዋዶ ሊንያ። **16** ኦግራን የሱሳ ካኮንኤመተራ ኤርግቻ ጋርጋርን እንሌኖን ግራን ታአብራመ ሳኒ ጋርጋርንያ፤ **17** ሃኑን ካመን ዱባይ አቢላል እን ላኖ ማንኮዶትሳሮ ማራን አቢላል እን ሌ፤ ሂካ ካኮንየለራ ጨቦ ካእባዶ ሀሄሶ አምን አመረ ዋዉን ሀንዳይን ካአብዳመና ካነኔኤይሳታሮ ቱቃሞልኮክ ዋይቻ ሌ። **18** ኡሱ እሲ ጫፋመረ ራኮ ማንኮአታተሮ ማራን ኦጫፋማራን ጋርጋርን ዳንዳራ።

3 ሃኑን እሰና አዴን ኡምት ታዋይ ኦኡማንተታን ቁሉኒዕ አማኒል! አማኖካኑን ካፋራመሮና ቱቃሞልኮክ ዋይቻ የሱሳ ሻዳ። **2** ሙሴ ምን ካዋ ዱባን ካአብዳመ ጎጎሌረክ ማለ የሱሳና ኡሱ ካሹመሮ ዋዉን ካአብዳመየ። **3** ምን ካማዳራራ ምንኮ ታሮርቲ ካባጃ ጎጎአቦ ማለ የሱሳና ሙሴኮ ታሮርተ ታአቲ ካባጃ ማንኮዶትሳሮ ማራን ካባጃመ። **4** ኦግራን ምን ዱባ መተመተይ

ካማዳራር እባዶ አባ፤ ካመን ዱባ ካፈለራ አደ ዋያ። **5** ሆረንባውን አማሚን ካደትሳሮ እየሰ ዱባን አቶታ ሙሴ ምን ካዋ ዱባይ ካህንዳሮ እን ካአብዳመዋ።

6 ክርስቶስ አደ ምን ካዋይ ካአብዳመ ካኮሌራ ኤሪ እን ሌጉረዮ። ምንኬሳና ኖና፤ ምንኬሳ ካኮንሊናና ካኮአብዳታኖ እዬሰና ታኮዳዳታኖ አብድ አታይሳይ ጎአባነያ። **7** ሃኑን እያና ቁሉክ ጎአማሮ፤ “ህታር ያየቴሳ ጎማልቴን፤ **8** ቃሉላቶክ ኡሊ ኦዶላልክሰን እን ጎአጫፈራንክ ማሌና ሜላን እን ጉት ጎአኬራንክ ማለ እሰና ዋዳናትሰን ታአጃጃሞን አሮየላቴን፤ ኤሰ እሶ እን ጫፌን፤ ኢን ዋታ ታማጋተን፤ ጌሰ አፋርታሙን እን ካፈለሮና ዴን” አማራ ዋ። **10** ሃኑን እን ሀሴ አላታኒ አማራየጉረ፤ “ዋዳናትሶ አርጌቶ ሸርማታ፤ ራኬና ላኮአዴሴራን አመ።”

11 አደና “እን ታሰሰናሮ ታፎልሲ ባንኤቴ ቶሰ ላኮታብናራን!” አመ አማራንቴይ እን አማተራ።” **12** አቢላልቴ! እሰን ኦሮኮ ማዮና አርዶክ ዋኮ ታፋክሶ ታሜላና ታአማኖን ዋዳና እሰኑን ጎአግላኖንኮ እሰኑራዬን። **13** እየሱን ጎአመን እሰንኮ ጨቦይ ሶባምሪ ዋዳናቴሳ ታአጃጃሞን ጎአየላኖንኮ፤ “ህታር” አማመ ካኡማማራ ጎራታ ግራን አርጌቶ እሰአሰአታይሳየን። **14** ሆራሮጀ ካአባነኖ አማኖካን ታጋቾ አሪ ታ ጌኖን አታይሳይ ጎአባነ ክርስቶሳን ዋታ ኦኤልናኖ ልናና። **15** ህክና፤ “ህታር ያየቴሳ ካኮማልታን ጎራታ አብጃላልክሰን ሜላን ካኮከኬሰረን ጎራታ ጎአየለራን ማለ ዋዳናትሰን ታአጃጃሞን አሮየላቴን” አማመ ጎአጸፋመሮያ። **16** ጎሌና ሀኑኡ ያየቴሳ ማለን አባባተረን ኦሜልለረን እየሰዬን? እሶ ላ ሙሴ ሆረ ሀየ ቃጃልሳ ኡል ካግብጽኮ ኦቤሬንየና? **17** ጌሰ አፋርታም ዱባ ዋ አማራይሳ ኦግረን እየሰዬን? ላሀኑኡ ጨቦ ኦፈለራና እሶ ጎየሬን ሬሰክሶ ቃሉላቶክ ኡል እዬ ኦኮንሄሰሮየና? **18** አደና ሀኑኡ አጃጃማኖ ኦዲዴረን ኳሬ፤ “እሰን ታፎልሲ ባንኤቴ ቶሰ ላኮታብናታን” አመ ኡሱ ካኮንማተራ እየሰዬን? **19** ጎርታኑን እሶ ታብን ካኮዋተራን አማናናዋትኮት ኣላንቲ ላኖ አዴሳና።

4 ሃንሱን ዋ ታሰሰናሮ ታፎልሲ ባንኤ ቶሰ ታብን ኖ ታአታነኖ አብድ ጋና ታጣባተቶ ማንኮሌተ ማራን እሰንኮ ማዮና ህታ ታፎልሲ ባንኤ ቶሰ ታኮታብሮ ኢድሊ እንሄላኖን ጎአሄሶንኮ ኖ ዱባና እሰኑራና። **2** ዋንጋላ እሶን ጎአላላባመሮ ኖና ላላባመራ፤ እየሱን ጎአመን እሶን ካላላባመሮ ሃፋራ አማኖይ አታታና ማንኮዋቴን ማራን እሶን ላኦ ላኮሰሰ። **3** ፈሎኦቴሳ አላም ታኮመጣመሮኮ ሀጋአበረ ኦጉዳቴራን ጎሌና፤ “እን ታሰሳሮ ታፎልሲ ባንኤ ቶሰ ላኮታብራን

አመ አማራጭ አማተራ” ጎሳአመሮ ግዳና ኖ ካአማናና ኤሰራ ዋ ኖን ታሰሰሮ ታፎልሲ ባንኤ ቶስ ታብናና፤ **4** ታቶዶብ እርኮት ጋራ ማጻፋ ቁሉክ ባንኤ ቶይ፤ “ዋ ፈሎኦቴሳኮ ታቶዶብ አሪ ፎልሳተ” አማመ ጻፋመራ። **5** ኡሱማለና ህታ ባንኤ አደ “እን እሶን ታሰሰናሮ ታፎልሲ ባንኤ ቶስ ሱረ እሶ ላኮታብናራን” አማራ። **6** ሂካ ዋንጋላ ሆራርጀ ኦማሌራን አጃጃማና ዋትኮ ካከይ ዋ ታሰሰናሮ ታፎልሲ ባንኤ ቶስ ላኮታቤራን፤ ጎሌና ኤሰራ ጎንታብራውን ፈኢ ካኮንሰሳንተታ እባዶ ኮኮ ግሮዋ። **7** ህክና ጣዩ ጎሳአማመሮ “ህታር ያየቴሳ ጎማልቴን፤ ዋዳናትሰኒ ታአጃጃዋን እርየላቴን።” አማ ዋ ጌስ ካዋጋንኮ እባባተረ ጋራ ካዳውተን ካእዬሰሮ ሃፋራ አሪ “ህታር” አማዋ ጎሳአማንቶ አዳሰሰራ። **8** እያሱ ጎሳን ፎልሲ እሶን ካሰሰ ሊ ግረዋ ዋ አድ፤ “ህታር” አማ አሪ ታካለኮክ ጋራ ላኮእዬሳረ። **9** ጎርታኑን ጎሳ ካዋውን ታአይሁድ ታፎልሲ አሪ ኣንትት ፎልሲ ጋና ግታ። **10** ዋ ፈሎኮ ጎሳፎልሳተሮ ኡሱማሌ ዋ ታሰሰናሮ ፎልሲ ቶስ ካታባራ ፈሎኮ ፎልሳታራ። **11** ሃኑን ሀሱ እባዶ አጃጃማና ዋትኮ ካከይ ጎሳአየራንክ ማለ ማዮና ዴቦ ሴይረ ጎሳአኖንኮ ታዋ ታፎልሲ ባንኤ ቶስ ታብን አታና። **12** ሃፋራ ካዋ አርዶክና ካፈላሮያ፤ ምና ላማነ ኤነናን ካአቦ ማምሰክ ሺፋኮና ሮረ ካኤነናትያ፤ ኔፎና እያና፤ ምክታልና ለፋል ካለካለ ታ ቤሰሮ ካጎሳሳሮያ፤ ዋዳና ኦሮ ታግቶ ቆፋና ሀልቻ ቆቆረ ካፍርዳሮያ። **13** ሆረ ታዋኮ ታጎላተታ መጣ ቶና ላግቶ፤ ኢልቴሳ ሆረ ካመን ዱባ ዱዳ ቤ ሀወአይ ሌ ካሙታሮያ፤ ኖና አባብ ሰሰን ካኮዳንዳና ኡሱ ሆሬያ። **14** ጎርታ ዳራርጃል ኦሮማረ ኤልዴ ካቤሮ ካአቲ ካቱቃዋል ዋይቻ ማንኮአብኖ ማራን ህኢታኒ ካአቶቲነኖ አማኖካን አታይሳይ አባና፤ ካቱቃዋል ዋይቻና ኤረ ካዋ የሱሳያ። **15** ኖ ካአብና ካቱቃዋል ዋይቻ ሀራኖካን ነኔኤይሳይን ካዳንዴኖን ላኮዮ፤ የሱሳ ጨቦ ላኮፈለሮ ኳሬ ካመን ዱባይ ኖ ኣን ጫፋመራ። **16** ጎርታ ኖ ሻጋ ሄላይና ጋርጋርሳ ኖን ካኮዶትሰ ጎራታ ሰኖ ጎሳሄላኖን ሰኖ ካኮሄላኖ ካዋ ኮርፍንጀ ሆረ አብሰ ካላይ ጋባላሚና።

5 ካቱቃዋል ዋይቻ ዱባ እባዶ ኦሮኮ አሳባመረ ዋኔ ዋታ ታኤሰልሳቶ ሃጃይ ባንኤ ታአባዶይ ሜባና ጃርሶ ዋውን ሰሰን ሹማማራን። **2** ሀሱ ቱቃዋ ዋይቻት መተኬሳውን ሀራኖ ካአቦ ማንኮሌሮ ማራን ኮና ኦካሶና ኦሽርአማራን ነኔኤይሳይ እሶ ድን ዳንዳራ። **3** ኡሱ መተኬሳውን ሀራኖኮክ ኣላንቲ ጨቦኮ ሀሄሶ አማማኖ ካሄላምሰሳሮ ጃርሶ ሰሰን ካዶትሳራ ጎሳ ካላሉን እንሌኖን ግራን እስኦቴሳነ

አደረጋ። 4 እሮን አን ዋይ ካኡማመሮ እባዶ ጎሌ ኳሬ ማዮና ህታ ካባጃ እሲ መተኬሳይ ላኮሄላታሮ። 5 ኡሱማለና ክርስቶስ ካቱቃሞል ዋይቻ ላኖኮት ካባጃ እሲ መተኬሳይ ላኮአታተሮ፤ እየሱን ጎአመን ካቱቃሞል ዋይቻ ላኖኮት ካባጃ ካኮሄላተሮ፤ “እት ኤረኬታ፤ እን ኩ ህታር ኡሙለራ” ካአመሮ ዋኮያ። 6 ቁሉክ ማጻፋ ባንኤ ታካለቲ ዋ፤ “ካመልከጸደቅ ቱቃሞልኮክ ሹማታ አን እት ጅሩ ጅሮማን ዋይቻታ” አማራ። (aiōn g165) 7 የሱሳ እባዶ ሌ ሂካ ኡሊ ካኮግረ ጎራታ ጎይኮ ሃሰን ካዳንዳሮ ዋ ቶስ ካአቲ ኢያኖይና ታንጂን ኢልሚ ኡባ ኤብ ኤባተ፤ እስ የራሳታኖይና ካአጃጃመ ማንኮሌ ማራን ዋ ኤብኬሳ ማለ። 8 ኡሱ ማምሲ ኤረ ካዋ ጎሌና ታአታተሮ ራኮይ አጃጃማኖ አጋልሳተ። 9 ዱዶክ ሌ ካኮሙታረ ጎራታ ኡሱን ካአጃጃማሮ ዱባን ጅሩ ጅሮማኮክ ፋይናን እሱን አላንቲ ሌ። (aiōnios g166) 10 ኡሱና ዋ ካመልከጸደቅ ሹማታ አን ቱቃሞልኮክ ዋይቻ የለ ሹመ። 11 ህታ ሃጀኮክ ጋራ ኖ ካአዬሰናና ካሞጋን አየሰ ግራ፤ አየሱን ጎአመን ቦግ ማላባ ግራን ዉደታማና ማንኮዋተ ማራን እሰን አጋልሰሳኖ ጥባራ። 12 ግዳ ጊን ካኮግቲን ጎራታይ እሰን ካአጋልሰሳኖ ሊ ግራቲን፤ ግዳ ጎአመን ሃፋራ ካዋ ካሆራርጄ አጋልሰሰ እባዶ ካካለ እሰን ካላም ጎአአጋልሰሰሮን ዶትሳራ፤ ህታ አላንቲ እሰኑን ኦዶትሳራን ኤኖያን ኳሬ ካአቲ ባቦ ላኮኖ። 13 ኤኖ ኦላል ካጣማራ ዱባ ይሰ ማንኮሌ ማራን ቁሉማኮክ ጋራ ጋና ላኮአጋልሳተሮ። 14 ካአቲ ባቦ ካኮንዶትሳራ አደ ካኢዳና ካሜላና ካለ ቤሰ አዴሰን ካአጻማሮ ካጂንጂን እባዶያ።

6 ጎርታ ክርስቶስ ማራን ካሰሳመሮ ካሆራርጄ አጋልሰሰ አባብ አባብ ኬሳኖ እሰጉክ አጋልሰሰ ዱባማኖ፤ ጎይ ቶስ ኦጌሳራን ፈሎ፤ ጨቦኮ ጉላ ጋላኖኮክና ዋ አማናኖኮክ ጋራ አባብ አባብ አጋልሰሳ ካሆራርጄ ኡኩም ላኮጣቢንሶ። 2 ኡሱማለና ጥንቃታ፤ ገነ ጉት ካኖ፤ ጎይኮ ክያኖ፤ ካጅሩ ጅሮማ ፍርዳኮክ አጋልሰሰ አድ ላኮጣቢንሶ። (aiōnios g166) 3 ዋ ኖን ፈኢ ጎሰሰ ሆረንባን አጋልሰሲ ዱባማኖ ቶስ ጂናይናና። 4 አማኖክሶ ካካተሮ እባዶ ጨቦኮ ጉላ ጋላኖ ቶስ አባብን ላኮዳንዳማሮ። ሂካ እባዶን ሂታኮ ሆረን ኢፋ እሱን ሀንቃየ ግረ፤ ካዳሩረ እላቦና ቃማሰሬን፤ እያና ቁሉክኮ ቆባ ኦአታቲረን። 5 ካእዳንክ ሃፋራ ካዋና ኤመይን ካግሮ ጅሩ ጅሮማክ ቃላዳ ካዋኮክ ሁና ኦቃማሰሬን፤ (aiōn g165) 6 ሂካ ዱባኮ አባባይ አማኖክሶ ጎካካቲን እሶ መተክሶዉን

ኤረ ካዋ አባበን ማንኩሱዋራን ማራና ዲዳ ቤስን ማንኩሳራናን ማራን
 እሶ ጨቦኮ ጉላ ጋልሰን ላኮዳንዳማሮ። 7 እርጌቶ ኡሱ ጉት ካኡባታሮ
 ኢዳሞ ካጣማራ አካክልተ ካአባራተሮ እባዶትን ላኦ ታሰሳታ ኤረ ዋኮ ኡሶ
 ሄላታ፤ 8 ኤኤንና ቂንጮና ጎአልሰ አደ ላኦ ካላይት ላታ፤ ኤነ ቃንጋምናታ፤
 ኤሰኮ ኤለኒ ጉባምናታ። 9 እን ኦጌላታሮ ኦቴ! ኖ እሰኑን ሂካ ጎአኤንሰና ሱረ
 ፋይናክሰኑን ካሌሮ ካአዳንክ እየሰ ጉት ግራኖክሰን ኖ አብዳታና። 10 ዋ
 ታኢዳን ካፍርዳሮያ፤ ሃኑን ፈሎኦትሰን ጣየና ሌረ ግዳና መገኬሳ ማራን አማኒል
 ጋርጋርን እሰን ታቱሴታን ጌላንጀ ላኮኢሎሮ። 11 እሰን ዱባ አብዲ ካኦራታን
 እየሰ ታ ገነ ጌግሳታኒ አታንክሰን ታ ጋቾ ጌታኒ ጎጎቱሳውን ኖ ሀልቻና። 12 ኖ
 ካኮንሀልቻናና አማኖይና ኦብሲ አታይጉን ዋ አብዲ ካሰሰሮ እየሰ ካኤልናሮ
 እባዶ እን ጎጎሌታኑን ኳሬ ላፋኒሶ ጎጎሌታኑን ላኮኖ። 13 ዋ አብራመን አብድ
 ካኮሰሳረ ጎራታ ኡሱ ካኮአማትራ ኡሱኮ ካሮራራ ካካለ ማዮና ማንኮግኖን
 ማራን ሃ አማ ኡሱ እሲ አማተ። 14 “ኦግራን እን ኩ ሶማሳይናራ፤ ሳኒታና
 ሞጋሰናራ አመ ዋ አዬሰ።” 15 አብራመ ኦብሴ ኦራተጉረ ዋ አብዲ ኡሱን
 ካታበሮ እየሰ ሄላተ። 16 እባዶ አማቶ ጎታብሮ መተኬሳኮ ካሮረ መገይ አማታራ፤
 እዬሰክሶና አማቶይ አታይሳ እሶ ጠኤ ታግቶ ዶጋማ ዱባ ባሳራን። 17 ሂካማሌ
 ሙርት ታዋ ታኢግልሳሞን ላኖ ኣሎ አዳሰሰን ዶተጉረ አብዲ ኤልን አብድ
 አማቶይ እሶን አታይሰራ። 18 ሂካማሌና ዋ ኦኢግልሳሞና ካጣራ ካሌኖን እየሰ
 ላማ፤ ህክና አብድና አማቶ ኖን ሰሰራ፤ ሂካ እየሰ ላማኮክ ጋራን ኖ ሆረ ታግቶ
 አብድ አታይሳይ አባይን ጎጎዳንዴኖን ካኮአሰካኖ ሄላይን ኡሱ ቶሰ ኦኤሜንና ኖ
 ካኦቲ ጎጎኢና ሄላነና፤ 19 ሀት አብድ ግርካንዉን ካአኢኖን ካአብዳመ ማርካፋ
 ባዲ ታኢሊሳቶ ማርጮ ኣንትትታ፤ የሱሳ ታኢብና አብድ ጎጎሎኮ ሮርተ ቁሉክ
 ምን ቶሰ ታባታ። 20 ሂካ ቁሉክ ምን ቶሰ የሱሳ ካመልከጸደቅ ቱቃሞኮክ
 ሹማታ እን ጅሩ ጅሮማን ካቱቃሞል ወይቻ ሌ ኖ ማራን ጣየ ታብ። (aiōn g165)

7 መልከጸደቅ ካሳለም ካታማኮክ ዋኖና ዱባንኮ ጦቂ ካአመ ቱቃሞ ካዋየ፤
 ሂክ መልከጸደቅና፤ አብራመ ዋኖላል አዋደ አባባታ ግራን ራድ ኤሰለረ ሶማሳተ።
2 አብራመ ካአቦ ዱባኮ ኡሱን ሆራ ሰሰ፤ መልከጸደቅኮት ፋሬን ታሆሬ፤
 “ካቁሉማ ዋኖ” ካካለ አደ፤ “ታሳለም ካታማኮክ ዋኖ” ሃ አማኖ “ካኖጎዳ
 ዋኖ” አማኖያ። **3** መልከጸደቅ ካአዳሳመ ኦዶና እና ጎርቱን አላታንኮክ ህዲድ

ላኮአቦ፤ ጌስኬሳውን ሆራርጀ፤ ግርኬሳውና ጋቾ ላኮአቦ፤ ሂክ መልከጸደቅ ኤረ
 ካዋ እን ማሱሳ ልጉረ ጅሩ ጅሮማን ቱቃሞ ሊ ግርናራ። **4** ሂክ እባዶት ምስክ
 ካክቲዮ ዲያ፤ እኒ ታእስራኤልን ኦዶ ካሌራ አብራመ ቦጄ ካክተሮኮ ሆራ ቤስ
 ኡሱን ሰሰ። **5** ኣኒዕ ቱቃሞልኮኒዕ ፈሎ ኦሮ ኦካሜራን ታዋዮለ ሳኒ ጎሳኮና
 ታኣብራመ ሳኒኮ ህክና አብላልትሶኮ ሆራ ጎጎኣትራውን ሴራይ አጃጄራ። **6** ሀሱ
 መልከጸደቅ ታዋዮለ ሳኒ ላና ጎዋተና እደ አብራመኮ ሆራ ኣተ፤ ካኣብዲ ሃፋራ
 ካኮንስሳመረ አብራመ ሶማሳተ። **7** ክጫርክ ካንጂንክኮ ሶማ ካኣታይናሮ ላኖ
 ሄዳታኖ ላግሮ። **8** ምና ቶነ ሆራ ኦኣታራን ኦጎይናራንያን፤ ምና ታካለን እደ ሆራ
 ካኣታራ አርዶክ ሊ ግርናራ አማመ ካኮኣቶታመራ መልከጸደቅያ። **9** ጎርታኑ
 መልከጸደቅ አብራመን ዋታ ካኮኤስላረ ጎራታ ዋዩት ኣቦኬሳ አብራመኮ ጋና
 ሀኣላኖን ማንኮግረ ማራን ሆራ ኣትን ካዶትሳራ ዋዩት መተኬሳውን አብራመኮክ
 ጋራን ሆራ ሙረራ አማናያ። **11** ጎርታኑን ጎሳን ሴራ ካኮስሳመራ ካዋዩ ቱቃሞ
 ላኖክ ማሌያ፤ ሂክ ካዋዩል ቱቃሞ ልክ ላኖ ካሄላማሮ ሌና ካኣሮን ቱቃሞ
 ላኖኮክ ሹማታ አሌኖን መልከጸደቅ ቱቃሞ ላኖኮክ ሹማታ ኣንክክ ካእቦ ካካለ
 ቱቃሞ ኤመታኖ ካዶትሶን ሊ ግራረ። **12** ፈሎ ኦቱቃሞል ጎኢግልሳምራን
 ሴራና ዋታ ኢግልሳማኖ ዶትሳራ። **13** ሂክ ዱባ ካኮንስጋመራ ቱቃሞት እኒ
 ታካለኮያ። ህታ እኒኮ ማዮና ሁ ካፋላ ቶስ ጋባላመ ካህንዳየራ ላግሮ። **14**
 ጎታካን ታይሁዳ እኒኮ ላኖ ካኣዴሳመያ፤ ጎሌና ሙሴ ቱቃሞልኮክ ጋራ እዬሳ
 ግራን ታይሁዳ እኒኮክ ጋራ ካኣዬሰራ እየሰ ኮና ላግሮ። **15** ሂክ እየሰ ኣሎ ሙት
 ካኮኣዴሳምራ መልከጸደቅ ኣንክክ ካካለ ቱቃሞ ካኮኬ ጎራታያ፤ **16** ክርስቶሳ
 ቱቃሞ ላኖኮክ ሹማታ ካኮኣታተራ ግርኬሳ ሜሳ ካላይክ ማንኮሌ ማራንያ
 ኳሬ ሳኒ ታኣባዶኮ ካኤመተሮ ዋጋና ሴራይ ላኮዮ። **17** “ኣት ካመልከጸደቅ
 ቱቃሞ ላኖኮክ ሹማታ ኣን ጅሩ ጅሮማን ቱቃሞታ” አማመ ቁሉክ ማጸፋል
 አቶታመራ። (aiōn g165) **18** ኡሱማለና ካጣዎ አጃጃ ላፋና ላኦ ካላይክ
 ማንኮሌ ማራን ሄሰራ፤ **19** ሴራ ካሙሴይ ኮና ልክኪ ሊን ላኮዳንዴ፤ ግዳ
 ጎኣመን ኖ ዋ ቶስ ታኮጋባላምና ታካለኮ ታሮርተ አብድ ኖን ሰሳንተታ። **20**
 ሂታኮ ሆረን ቱቃሞ ኦሌረን አማቶ ካላይ ቱቃሞ ሌራን፤ “ዋ እደ የሱሳነ አት
 ካመልከጸደቅ ሹማታ ‘ኣት ጅሩ ጅሮማን ቱቃሞታ’ አመ አማተ፤ ላኮጋቢሮ፤
 አማመ ኡሱን ኦስጋመራን አማቶን ዋታ ቱቃሞ ሌራ፤” (aiōn g165) **22** ሂናኣ

አማቶኮት አላንቲ የሱሳ ኦሊዲን ኦሃፋራ አማቶውን ኖን ዋቢ ሌራ። **23** ቱቃሞል ማንኩጎዋሮ ማራን ቱቃሞ ኮ ሀኢግልሳሞን ፈሎ ጉት ጅሩ ጅሮማን ግርን ማንኩዳንዳኖን ማራን ኦሆሬ ቱቃሞልኮኒዕ ቶቶኦትሶ ኦንጂየን፤ **24** የሱሳ አደ ጅሩ ጅሮማን ካግራሮ ማንኩሌ ማራን ቱቃሞ ላኖኬሳ ካኢግልሳሞንያ። (aiōn g165) **25** ሃኑን ኦቲሳ ኦሌራውን ካካለ ማራን ሆረ ሀይ አዬሳኖ ጅሩ ጅሮማን አርዶክ ሌ ማንኩግራሮ ማራን ጋራኬሳነ ዋ ቶሰ ካኤሜታሮ አባዶ ዱባ ዱዶ ፋይሰን ዳንዳራ። **26** ሂካ ኦንክክ ቁሉ፣ ካቱፋሞን፣ ካሙጭሙ፣ ጨባለሳልኮ ዋዩ ካሌ፣ ዳሩርኮ ጦቂ ካአመ ካቱቃሞል ዋይቻ ኖን ዶትሳራ። **27** ኡሱ ካካለ ካቱቃሞል ዋይቻል ኦን ሆራርጀ ጨቦኬሳ ማራን፣ አባባይ ጨቦ ካጎሳ ማራን አርጌቶ ጃርሶ ሰሰን ላኮዶትሳሮ፤ አሰኦቲሳ ጃርሶ የላተ ካኮሰሳተረ ጎራታ ሂክ አየሰ ካላሞ ታኮአዳሞት የለ ጉድሰራ። **28** ሴራ ካቱቃሞል ዋይቻ የለ ካሹማራ ቱፋማኖ ካአቦ አባዶያ፤ ሴራኮ አባባተረ ካኤመታራ ካአማቶ ሃፋራ አደ ጅሩ ጅሮማን ቱፍ ካላይክ ካሌሮ ኤረ ካዋ ሹመራ። (aiōn g165)

8 ጎርታ ኖ ካአዬሰናኖ እየሰኮ ካሆሬ እየሰ ሂካያ፤ ዳሩሪ ካአቲ ካዋኮክ ኮርፍንጃይ ምና ታመርጌ ካሀማጼሮ ሂካ ኦንክክ ካቱቃሞል ዋይቻ ኖ አብና። **2** ኡሱ ካኮሀንዳራ ታሩሞ ዱንካኒ ታሌተቶ ቁሉክ ምን ካዋይያ፤ ሂካ ምንኮክ ማዳራማኖ ገነ ታአባዶይ አሌኖን ግራን ጎታይያ። **3** መተመተይ ቱቃሞልኮክ ዋይቻ ካኮሹማማራ መባና ጃርሶ ዋውን ሰሲንያ፤ ሃኑን ሂክ ቱቃሞ ካሰሰናራ ኮኮ ኮ ግርን ዶትሳራ። **4** ሴራኮክ ማለ ሜባ ካሰሳራ ቱቃሞል ማንኩግሮ ማራን ኡሱ ኡሊ ካግሮ ሊ ግረዋ ቱቃሞ ሊ ላኮግራረ፤ **5** ሂክ ቱቃሞል ታኮሀንዳራን ዱንካኒ ዳሩሪ ታግቶውን ማሱሳና ሆሰ ታላልታ፤ ህክና ካኮንሌራ ዋ ሙሴነ አት ምን ካኮማዳራቶ ጎራታ፣ “ዋዳሚ ጉት አን ኩን ጎንቱሰሮክ ማለ ካመን ዱባ እሰኦራ ፈል” አመ ጎንአጃጃሮክ ማሌያ። **6** ግዳ አደ የሱሳ ዋይና አባዶና ጠኤ ታቦ ህኢ ቶ ካየለሮ ካአማቶ ሃፋራ ኦዶአን አማቶኮ ታርርተቶና ታኢዳንት አብድ ጉት ካጣባተሮ ማንኩሌሮ ማራን ኡሱማለና ኡሱን ኦሰሳሜራን ፈሎ ዱባንኮ ኦሮራራንያን። **7** ኦሆሬ አማቶ ኦሃፋራ ኦቱፋሞን ሊ ግሬንዋ ካላሞ ካአማቶ ሃፋራ ላኮዶትሳረ። **8** ዋ ጎሳ ጉት ኦቱፋሞራን ፈሎ ግራኖ ቱሰን አመረ ሃ አማራ፣ “አን ካአሰራኤል ጎሳና ካይሁዳ ጎሳነ ዋታ አማቶ ኦኡሱብኮክ ሃፋራ ካኮታብናራ ጎራታ ኤመይናራ አማራ ጎታ።” **9** ሂኒዕ አማቶ አን እሶ ካግብጽ

ኡልኮ ገነትሶ አበረ ካኮቤሳረ ጎራታ ኦዶጆላልክሶን ዋታ ኦታበረ አማቶ ኣኒዕ ላኮያን፤ እሶና ሂናኣ አማቶ ኦሃፋራይ አታታና ማንኮዋቴን ማራን እንና እሶኮ ባጋጎለ፡ አማራ ጎታ። **10** “ጎርታ እን ሂታኮ አባባይረ ካእሰራኤል ጎሳን ዋታ እን ኦታብናራ ኦሃፋራ አማቶ ሀናኣያን አማራ ጎታ፤ እን ሴራኬ ሳሙትሰን ካይናራ፤ ዋዳናትሶይና ጸፍናራ፤ ዋክሶና ልናራ፡ እሶና ጎሳኬ ልናራን አመ። **11** “ጎታ አዴሰ’ እም ኦላቴሳና ሌረ አቢኬሳ ማዮና ካእጋልሰሰሮ ላኮዶትሳሮ። ክጫርኮ ሀጋአበረ ታ እባዶ ካጂንጂን ጌሮ ዱባና እን አዴሰሮዋ፤ **12** ባሰክሶና ሀሄሶ አምናራ፤ ጨቦክሶና ሂታኮ ሆረንባን ላኮሻድናሮ።” **13** ጎርታኑን “ኡሱብኒዕ አማቶ ኦሃፋራ” ጎአምሮ ኦሃፋራ አማቶ ኦሆሬ ላኦ ኦሰሶን የለራ አማኖያ፤ ሃኑን ፈላ ካግረና ካዶእን ኮኮ ዱባ ካኮባይናራ ጎራታ ጋባላመራ።

9 ኦሆሬ አማቶ ኦሃፋራ ዋ ሄዶይሳታኖኮክ ሴራና ካኡሌ ቁሉክ ምን ካዋ አባናየ፤ **2** ክፍሊ ላማ ካእባ ምን ግረ። ቦላንሶና ጣራጴዛ፤ ዋዉን ካሰሳማራ ባቦ ታኮግረ ታሆራርጄ ክፍሊ “ቁልቲ” አማማተ። **3** ካላም ጎሳሎኮ ኦሮሀይተ ታግታ ታኦሮ ክፍሊ “ኣሎ ቁልቻት” አማማተ። **4** ህታ ክፍሊ ኦሮ ዋርቂኮ ካፈላመሮ ኢጣና ካኮኢዮሳራን ኤሰ ባንኤ ግረ፤ ዋርቂ ካኮሳርሰሳመራ አማቶ ኦሃፋራኮክ ሳጢን ኤሰ ኦሮ ግረ፤ ሂካ አማቶ ኦሃፋራኮክ ሳጢን ኦሮ ማና ታኮግረ ታዋርቂ ኡላ፡ ሁርሰ ታግቴ ታኦሮን ዳማ፡ አጃጃ ቶሞኖ ካኮጸፋመረ ጣልጳክ ኤኤም ግረ። **5** ሃፋራ ካአማቶኮክ ካታቦታ ሳጢን ጉት ካግሮ ጨቦ ሀሄሶ ካኮአማማሮ ኡብ ባላሎኦትሶይ ጎልሴን ኦአባራን ኦካባጃሜን ክሩቤል ኦአማማራን መጣጆልየን፤ እየሱን ጎአመን ሂካ እየሰ ዱባኮክ ጋራ ግዳ ባላኣሰ አዬሰን ላኮዳንዳና። **6** ካመን ዱባ ሂካማሌ ካኮኤካሮ ጎራታ ቱቃሞል ዋዉን ሀንዳይን አርጌቶ ምንኮ ታሆራርጄ ክፍሊ ቶሰ ታባራን። **7** ታላም ታኦሮ ክፍሊ ቶሰ ካታባራ አደ ቱቃሞልኮክ ዋይቻ ካላልያ፤ ካታባራና ጌሰኮ አሪ ቶ ታላልያ፤ ኡሱና ጨቦኬሳዉና ጎሳ ሀአዴሶን ካፈለሮ ጨቦን ካሰሳማሮ ኢግ ሀአቦን ላኮታባሮ። **8** ዱንካኒ ታሆሬ ካኮግቶ ግታክ ቁሉ ኣሎ ቁሉት ታአማማቶ ቶሰ ካታብሳራ ራ ጋና ሀሙቶን ካግሮ ላኖ እያና ቁሉክ ሂካማሌ ቱሳራ። **9** ህክና ሂካ ጎራታዉን ማሱሳያ፤ ሂካማሌ ካሰሳማራ ሜባና ጃርሶ ካሰሳሮ እባዶትኮት ሳሙይ ካማልሳማሮ ባሰኮ ሱረ ቁሉይሰን ላኮዳንዳና። **10** ሂክ ካሞጋን እየሰ ካኮኡሱባይናራ ጎራታ ታ ኤሜሮ ፈሎይ ጉት ካግራ ካሳረ ካሙታሮ

ዋጋልያ፤ እሶና አማኖና ጣማኖኮክ ጋራና ካለካለክ ካሙጭሳሮ ዋጋኮክ ጋራ ካላሉን ካፈላመሮያ። **11** እየሱን ጎአመን ክርስቶስ ኤመታ ካግሮ ካአዳን እየሱን ካቱቃሞል ዋይቻ ሌ ሙተራ፤ ኡሱ ታኮታበራ ዱንካኒ ታጅንትና ዱዶትታ፤ ህት ዱንካኒ ገነ ታአባደይ ታፈላሞንግቶና ሂካ አላም ኮት መጣ ላኮቶ። **12** ኡሱ አሎ ቁሉት ታአማማቶ ባንኤ ቶስ ኮይክ ካላም ታኮአዳሞይ እግኬሳ አበረ ታበራ ኳሬ ካኦሬነና ካኮርጂሌ እግ አበ ላኮታበሮ፤ ሂካማሌ ጅሩ ጅሮማን ኖን ዋዶ ሌ። (aiōnios g166) **13** ካኦሬነና ካኮርጂሌ እግ ጃርሶን ታጉባንተቶ ዳባሎኮክ ቡሉሎ ካባቶየሮ አባዶ ጉት ጎአራጭራን ባትናት ካሶየኮ ሙጭማን ኦቁሎዋራን ጎሌ፤ **14** ጅሩ ጅሮማክ አያናኮክ ጋራን እስኦቴሳ ሙላ ካላይክ ጃርሶ የላተ ዋወን ካስሳተራ ካክርስቶስ እግ አርዶክ ዋወን ኖ ጎህህንዳይኖን ሳሙታን ጎይ ቶስ ኦጌሳራን ፈሎኮ አሎ ኖ ሙጭሰን ላኮዳንዳሮያ? (aiōnios g166) **15** ኦአማማራን ሀኡዎ ዋ ታሰሰሮ አብድ ጅሩ ጅሮማን ርቲ ጎህአታናወን ክርስቶስ አማቶ ኦኡሱብኮክ እግ ኖ ሀኢ ቶ ካየሎ ሌ፤ ህክና ካኮንሌራ ኡሱ ሆራርጀ አማቶ ኦሃፋራኮ ሄገሌ ሌረ አባዶ ህዲድኮ ኬስ ጨቦኮ ፋይሰን ማንኮጎየ ማራንያ። (aiōnios g166) **16** ባዛ ጎግረ ካባዛተሮኮክ ጎይ አዳሳኖ ዶትሳራ፤ **17** ካባዛ እየስ ፈሎ ካኮሃራ ካባዛተራ ካኮጎየ ጎራታያ፤ ካባዛተራ ኔፎን ግራን ካባዛ እየስ ላኦ ላኮአቦ። **18** ሂካኮት አላንቲ ኦሆራርጂ አማቶ ኦሃፋራ ሱረ እግ ካላይ ኦአታቴራን ላኮያን። **19** ሆራርጀ ሙሴ ካሴራ አጃጃ ዱባ ጎሳ ዱባን ሰገ፤ ሂካኮ አባባተረ እግ ካኦሬነና ካኮርጂሌ በከነ ዋታ ለደረ ካሴራ ማጻፋና ጎሳ ዱባ ሀሶጺ ኦአማማራን ባላሎይና ኦጎሮ ኦአዳድኮ ካፈላመሮ ክሪ አራጨ፤ **20** ካኮንአራጨራና፡ “ዋ እስኩን ካአጃጃራ አማቶ ኦሃፋራኮክ እግ ሂካያ” አመረያ። **21** ኡሱማለና ዱንካኒ ኦሮና ካኮፈላታራን ሁ ዱባ ጉት እግ አራጨ። **22** ኦግራን ሴራ ካሙሴ ማለ እየስ ክጫር ኳሬ ካመን ዱባ እግ ሙጭማራ፤ እግ ጎኡባኖን ጨቦ ሀሄሶ አማማኖ ላኮሄላማሮ። **23** ጎርታኑን ሂክ ካዳሩረ እየስ ማሱሳ ካኮንሌራ ሂካ ኣንክክ ዋጋ ሙጭማኖ ዶትሳረ፤ ዳሩርኮ ካሌራ እየስ አደ ሂካኮ ካሮረ ጃርሶይ ሙጭማኖ ዶትሳራ። **24** ክርስቶስ ካሩሞ ቁሉክ ምን ካዋወን ማሱሳ ታሌተቶና ገነ ታአባደይ ታፈላንተቶ አሎ ቁሉት ባንኤ ቶስ ላኮታበሮ፤ ግዳ ኡሱ ኖ ማራን ዋይ ሆረ ሙትን ዳሩር ቶስ ቤ ታበ። **25** ካአይሁድ ቱቃሞልኮክ ዋይቻ ካኬሳ ካሌኖን እግ አበረ ጌስ ጌሲ አሎ

ቁሉት ባንኤ ቶስ ታበ ግረ፤ ክርስቶስ አደ እስክቱሳ ጃርሶ የላይ ሰሳይን ጎራታ ካሞጋን ላኮታበሮ። **26** ሃ ካሌሮ ሊ ግረዋ አላም ታኮመጣመሮኮ ሀጋአብረ ጎራታ ካሞጋን ራኮ አታይን ካዶትሳሮ ሊ ግራረ፤ ግዳ ጎአመን ጌሰጃልኮት ጋቾይ ጨቦ ኖኮ ባሰን እስክቱሳ ጃርሶ የላተ ኮክ ካላም ታኮአዳሞይ ሙተራ።

(aiōn g165) **27** እባዶን ጎይ ኮያ፤ ጎይኮ አባባተረና ፍርዳ ግራ። **28** ኡሱማለና ክርስቶስ ካሞጋንኮክ ጨቦ ባሰን ጎይ ኮ ጎየራ፤ አደና ጨቦ ሰዳይን አሌኖን ግራን ኡሱ ኦኦራታራን ፋይሰን ካላም አድ ኤመይናራ።

10 ሴራ ካሙሴ ሆረንባን ካኤሜይናሮ ካአዳን እየሱን ማሱሳ ጎርቱን ሆሰያ ኳሬ ታራም ምዲ ላኮአባናየ፤ ሃኑን ጌሰ ጌሲ አርጌቶ ካሰሳማሮ ጃርሶጃል አባቲረን ዋ ቶስ ካኤሜታሮ አባዶ ዱዶክ የልን ሱረ ላኮዳንዳሮ። **2** ሴራ ካሙሴ እሶ ዱዶኒዕ የልን ካዳንዳሮ ሌዋ ዋ ሄዶይሳይን ካኤሜታሮ አባዶ ካላም ታኮአዳሞን ጨቦኮ ማንኮሙጭመራውና ጨቦ ካላይኒዕ አን ሳሙትሶይ ባሰ ማንኮማላሳማሮ ማራን ጃርሶ ሰሳኖ እሰ ግራኔን። **3** ሀሱ ጃርሶጃል አደ ጌሰ ጌሲ እሶ ጨቦ ካቫድሳሮያ። **4** አላንቲና ካኮርጃልና ካኦሬን ኢግ ጨቦ ባሰን ላኮዳንዳሮ። **5** ሃኑን ክርስቶስ አላም ቶስ ታኮኤመተሬ ሃ አመ፤ “ጃርሶና ሜባ አት እንኮ ላኮዶተቶ፤ ማርካ ጎአመን እን ኤካሰታ፤ **6** ካጉባታሮ ጃርሶና ካጨቦ ሀሄሶ አማኖኮኪን ካኤናኣማሮ ጃርሶይ አት ላኮገጌላተቶ፤ **7** ሀሱ ጎራታ እን ‘ሄዶኬ! ማጻፋ ቁሉክ ጋራኬ ጎጎጻፋመሮ ፈኢታ ጉድሰን እን ኤመየራ” አመ። **8** ሀኑኡ ሴራ ካአጃጃሮ ጎሌና፤ “ጃርሶና ሜባ፤ ካጉባታሮ ጃርሶና ጨቦኮ ሀሄሶ አማማኖ ካኤናኣማሮ ጃርሶ አት እንኮ ላኮዶተቶ፤ እሶና አደ አት ላኮገጌላተቶ” አመ፤ **9** ደቤና፤ “ሂክማ፤ እን ፈኢታ ፌልን ኤመየራ” አመ፤ ሂካማሌና ካላምክ ጃርሶኮት ባንኤ ጣቢሰን ካሆሬ ጃርሶ ኢግልሰራ። **10** ሂካኒና “ፈኢ” ካአማሮ ሃፋራኮክ ማለ የሱሳ ክርስቶስ ሶይ ኮኪ ካላም ታኮአዳሞት ጃርሶ ሌ እሰ ሰሳታኖኮት አላንቲ ኖ ቁሎይንና። **11** ቱቃሞ መተመተይ ጨቦ ባሰን ካዳንዳኖን ኣኒዕ ጃርሶጃል አርጌቶ ሰሳ አሪ አሪ አሌ ሀንዳራን። **12** ክርስቶስ አደ አርጌቶ ካሌሮ ጃርሶ ኮ ሰሰ አባባተረ ዋ ኦዶኮት መርጌይ ሀማጼራ። **13** ሂታኮ ሆረንባን ዲናኬሳ ኦዶናትኬሳ ሃገሊ ታ ባርናኒ ኦራራ፤ **14** ሀክና ካኮንሌራ ሀኑኡ ኦቁሎየራን ጃርሶ ኮኮክ ጋራን ጅሩ ጅሮማን ዱዶኒዕ ማንኮየለሮ ማራንያ። **15** አያና ቁሉክ አደ ሂካ እየሰ ኖን አቶታራ፤ ሆራርጀ። **16**

“ሁኑኡ አርጃልኮ አባባይረ እሱን ዋታ እን ኦታብናራ አማቶ ኦሃፋራ ህናኢያን
 አማራ ጎታ፤ ሴራኬ ዋዳናትሶይ ካይናራ፤ ሳሙትሶይና ጸፍናራ።” 17 እደና
 “ጨቦክሶና ኦሜላን ፈሎኦትሶ ሂታኮ ሆረንባን እን ላኮሻድናሮ” አማራ። 18
 ሃኑን ጨቦ ዱባ ሀሄሶ ካኮአማመ ጎራታ ጨቦ ሀሄሶ አማኖኮክ ጋራን ካሰሳማራ
 ጃርሶ ሂታኮ ሆረንባን ላግሮ። 19 ጎርታኑ አቢላልቲ! ኢግ ካየሱሳኮክ ጋራን አሎ
 ቁሉት ባንኤ ቶስ ታብን ካኮዳንደኖ ካአብድሰሮ ሄላነና። 20 ኖ ካኮታብናና
 ጎሳሎኬሳይያ፤ ሃ አማኖና ሶኦቴሳኮክ ጋራን ኖን ካባነሮ ካኡሱብኪና አርዶክ
 ካሌሮ ራዲያ። 21 ዳሩሪ ካግሮ ምን ካዋይ ጉት ኦዶናት ካአቦ ካንጂንክ
 ቱቃሞ አብና። 22 ሃኑን ሳሙ ኦሮ ካማልሳማሮ ባስ ካሜላንኮ ጎሳሙጭሞኖን
 ዋዳናታን ሙጭሳይን፤ ማርካን በከ ኦሙጭሜኒ እልጉ፤ ቱኩልት ዋዳናና
 ካሩም አማኖ አባይጉን ዋ ቶስ ጋባላምኖ። 23 ካአብዲ ሃፋራ ኖን ካሰሰራ
 ካአብዳመ ማንኮሌ ማራን ግዳ አማንኔ ካአቶቲናኖ አብዲ ሀጋቶላ እንሌኖኒ
 አታይሳይ አባና። 24 ጌላንጃይና ፈሎ ኦኢዳኒ አታይጉን ጎሳግርኖን ኮ ካካለ
 ሀአታይሶ፤ 25 አርጌቶ ራቶ ኢንሰ ኤሴላ እሰእስኦሮ እሰእስ አታይሳና ኳሬ ኮኮ
 ኩኩአማኖ ጎሳኢሰራን ማለ ኖ አድ ኩኩአማኖካን ላኮኢንሶ፤ ሃ ላናኮ ጎታ
 ካኮኤሜይናራ አሪ ጋባላማኖ ሻዳ ሂካ እየሰ አሎ ፈላ። 26 ሩም አደንሰ ግራን
 አባባይን ቦግ ማላባ ግራን ጨቦ ጎፈልነ ሂታኮ ሆረንባን ጨቦ ማራን ካሰሳማራ
 ጃርሶ ኮና ላግሮ። 27 ጎርታ ኖ ካኦታራ አደ ሆረንባን ካሊናራ ካአብሰሳሮ
 ፍርዳና፤ ካኔባታራ ታጉባቶ ታአብሰሶ ኤሌንታ። 28 ሴራ ካሙሴ ካባስ ጉት
 እባዶ ላማ ጎርቱን ሴዶ ጎአቶቴ ሻጋ ካላይ ጎይን ሙርተሳማራ። 29 ሀያ፤
 ኤረ ካዋ ካቱፋተ፤ ካኮቁሎየሮ ካአማቶ ሃፋራኮክ ኢግ ካፋንቸይሳራና፤ ካሰኖ
 እያና ካሀባራራ፤ ምስት ሂታኮ ታሮርተ ሙሮ አታይን ካዶትሳሮ ኣን ላራ! 30
 “ሀሎ ብያኖ ካኬያ፤ እን ታዶትሳቶ ሙራ ሙርናራ” ካአመራ ማዮኖ ኖ ካንሶዋ፤
 ኡሱማለና፤ “ዋ ጎሳኬሳ ጉት ፍርድናራ” አማራ ጎታ። 31 ሃኑን አርዶክ ዋኮት
 ገን ኢያኖ ኣሎ ካአብሰሳሮያ። 32 እፋ እሰኑን ካኮሀንቃረ ጎራታ ራኮ ታሞጋን
 አታቴንዴን ታኮብሰተቴን ሀሴ ታጣዋ አሪ ሻዳ። 33 አሪ ቶቶ እባዶ ሆረ
 ሀባራንቴታን፤ አቦሳንቴታን፤ ቶቶ ጎአንታን እሰን ሂካ ኣንክክ አቦሳ ካኮጌሮ
 እባዶን ዋታ ሳትላል ማንኮሌተታን ማራን ራኮ አታቴታን። 34 እሰን ታኢዳንትና
 ታጉዳኖን ዱሩማ ዳሩሪ ግራኖ ማንኮካሳን ማራን ኦሻሜራውን ኮኮ ሰሳ፤

ኡራዎኦትሰና እሰንኮ ካኮአታመሬን ጎራታ ኦብሲተዳን ገጤሎይ አታቴን። 35 ጎርታ፡ ካኦቲ ባርአራ ካኮሄላይናታን ካኮአብዳታን እሮሻፋቴን። 36 ፈኢ ታዋ ጉድሳዳን ዋ እሰኑን ሰሰን ካአማቶ ሃፋራይ ካታበሮ ኮኮ አታይን ኦብሲ ኦራታኖ ዶትሳራ። 37 ኣላንትና ሃ አማመ ጸፋመራ፤ “ኤመይን ካግራ ኡሱ ጎራታ ክጫርኮ አባባይረ ኤመይናራ፤ ላኮአዳላይናሮ፤ 38 ካኬ ካሌራ ቁሉክ እባዶት እደ አማኖይ ግር ሄላይናራ፤ ሃር ጎጋለ እን ኡሱ ላኮገጤላይናሮ።” 39 ኖ ጎአመን አማኔረ ካፋያሮን ዎታ ኡናና ኳሬ ሃር ጋለጉረ ካባሮ እባዶኮት ኡና ላኮኖ።

11 አማኖ አማኖ አብዲ ካኡራማሮ ኮኮ፡ “እ ሩምና ሌሮዋ” አም አታታኖያ፤ ኢልኦ ካሙቶን ኮኮ ካሙታሮ ኣን የል አታታኖያ። 2 ዋ ካሆርኮ እባዶን ካኮአቶቴራ አማኖኮክ ኣላንቲያ። 3 አላም ሃፋራ ካዋይ መጣማኖ ካኮአዴሳና አማኖያ። ሃኑን ካሙታራ ኮኮ ዱባ ካሙቶንኮ ካፈላመሮ ላኖ ካንሶዋ። (aiōn g165) 4 ኣቤላ ካቃዬል ጀርሶኮ ካሮረ ጀርሶ ዋውን ካሰሰራ አማኖያ፤ ዋ ካኣቤል ጀርሶ ገጤሎይ ካኮአታታረ ጎራታ ኣቤላ አማኖኬሳ ቁሉክ ላኖ አቶታመ። ኣቤላ ጎጎየና አማኖኬሳኮክ ጋራን ግዳና እዬሳማራ። 5 ሄኖካ ጎይ ኡሱ ጎጎጤኖንኮ ዳሩር ቶሰ ካኮአታመራ አማኖይያ፤ ዋ ማንኮአታተሮ ማራን ላኮሙተ፤ አታማኖኮ ጣየ እደ ዋ ገገላይሳኖኬሳ አቶታመራ። 6 አማኖ ካላይ ዋ ገጤላይሰን ላኮዳንዳማሮ፤ ዋ ቶሰ ካጋባላማራ እባዶ ዋ ግራኖና ኡሱ ኦዶታታራውን እላቦ ካሰሳሮ ላኖ አማናታኖ ዶትሳራ። 7 ኖሄ ጋና ኢልኦ ካሙቶን እየሱን ዋ ካኮሰርሰረ ጎራታ ኖሄ ዋ አብሳታ ካምን እባዶኬሳ ሃሳይን ማርካፋ ካኮፈለራ አማኖየ፤ ኖሄና አማኖይ አላም ዱባ ጨባለሳ ላኖ ቱስ፤ ኖሄና አማናኖይ ታሄላማቶ ቁሉማ ኤለ። 8 አብራመ ብጉረ ርቲ የላይ ታአታይናሮ ባንኤ ጎጎሴሮን ካኮአማመረ ጎራታ ኤትራ ሴይናሮ ኮና ሱረ ጎአዴሰዋተና ሴይን ካኮአጃጃመራ አማኖያ። 9 ኡሱን ዎታ ካአብዲ ሃፋራ ኦኤሌራን ይሳቃነና ያይቆባን ዎታ ካአብዲ ኡል ማርት ሌ ዱንካኒ ካኮሀማጼረ አማኖይያ። 10 ሂካና ኡሱ ካኮየለራ ካጣባመ ኡኩም ታአብቶ፡ ዋ ታኤካሰሮና ታማዳረሮ ካታማ ኦራታ ማንኮግረ ማራንያ። 11 ሳራና ኤሰን አብድ ካሰሰራ ዋ ካአብዳመ ላኖ ማንኮአዴሰተ ማራን ጀሮማኖኮ ካከይ ሱረ ኡሙልን ታዳንዴኖን ጎሌተና ፋቶ ካኮቶታቶ ሁና ካኮሄላቴታ አማኖያ። 12 ሃኑን ካጎየሮ እባዶ እን ካቶታመረ አብራመ ኮኮ ካዳሩረ ባራጃ እን ካሞጋተረና ታላቡ ግርዳ ጨካለ እን ታቶታሞን ሳኒ ሄላንቴ። 13 ሂኒዕ ዱባ አማኖይ

ጎሳገሬን ጎዬን፤ ዋ እሱን ሰሰን አማቶ ካታበረ እየሰ ላኮአታቴን፤ እየሱን ጎአመን
 ኤባ ዴንጉሬን ካአታቴሬን ኣን የላቴን ገጌሎይ አታቴን። ኡሊ ጉት ማርትና
 ኡሱ ኡልክ እባዶ ላናዋትክሶ ማላባቴን። **14** ሂካማሌ ካአዬሳራ እባዶ ካክሶ
 ካሌሮ ኡል ካኡራታናን ላኖ አዴሰሰ ቱሳራ። **15** ሀሱ እሶ ኢሰን ካቤራን ኡል
 ካሻደራን ሌና ኤሰራ አባባይን ዳንዳረንዋ። **16** ግዳ ጎአመን ሂካኮ ካሮረ ዳሩሪ
 ካግሮ ኡል ሀልቻራን፤ ሃኑን ዋ እሱን ካታማ ማንኮኤካሰሮ ማራን፤ “ሄደክሶ”
 አማም ኡማምን እሶ ላኮሙላሮ። **17** አብራመ ካኮጫፋመረ ጎራታ ይሳቃ
 ጃርሶ የለ ዋወን ካኮሰሰራ አማኖያ፤ ሀሱ ካአብዲ ሃፋራ ካአታተራ አብራመ
 ኤረኬሳ ኮ ጃርሶ የልንዮ። **18** ሀያ ዋ፡ “ሳኒታ ይሳቃይ ኡማምናታ” አመ ኡሱን
 ሰገረ። **19** ዋ ጎይኮ ኬሰን ካዳንዳሮ ላኖ አብራመ አማኖይ ጎይኮ ካኬሮ
 ኣን ይሳቃ ካላም ሄላተ። **20** ይሳቃ ሆረንባን ካሊናሮ እየሰ ሄደጉረ ያይቆባና
 ኤሳዉ ካኮሶማሳተራ አማኖያ። **21** ያይቆባ ካኮጎይናራ ጎራታ ካኮጋባላማረ
 ጎራታ ካዮሰፍ ይሰ መተመተይ እሶ ካኮሶማሳተራና ዳማኮት ብርጠ እስካተረ
 ካኮጎጋደረ አማኖያ። **22** ዮሴፋ ካኮጎይናራ ጎራታ ጋባላማ ካኮኤሜታረ ጎራታ
 ካእሰራኤል እባዶ ግብጽኮ ጎሳብናራን ኡሱ ካአዬሰረ እሶ ለፋል ምስ የልን
 ዶትሳራን እጃጃ ካኮሰሰራ አማኖይያ። **23** ሙሴ ኦኡሙለራን ሙሴ ካኮአላታረ
 ጎራታ ምዲ ካአዳን ላኖ ማንኮአዴሰረን ማራን እጃጃ ካዋኖ ሀአብሳኖን ድግኒ
 ሴድ ካኮሰያምሴረን አማኖያ። **24** ሙሴና ካኮጂናታረ ጎራታ፡ “ኤረ ታፈርኦንኮክ
 ኤረ” አማም ኡማምን ፈኢ ሰሳና ካኮዋተራ አማኖያ። **25** ሃኑን ኡሱ ጨቦይ
 ኦሄላማራን ኦግዳኔ ገገሎኮ ሱረ ጎሳ ካዋኔ ዋታ ራኮ አታይን ዶታተ። **26** ኡሱ
 ሆረንባን ታአታይናሮ ሙራ ማንኮዴሮ ማራን ኡራዋ ኦግብጽኮ ሱረ ክርሰቶሳ
 ማራን የራታኖ ካሮራሮ ላኖ ኣሎ ቆፔ። **27** ኡሱና ኤንገ ታዋኖ ሀአብሳኖን
 ግብጽኮ ካኮቤራ አማኖያ፤ ኢልኦ ካሙቶን ሄዶና ካዴሮ ኣን ሌ ሀልቻኬሳይ
 ጣባተ። **28** ይሰ ባርክ ላጋዲን ካእጃጃመረ ኤርግቻ ካእሰራኤል ይሰ ባርክ
 ጎሳ ጎኖንኮ አማ ሙሴ ካፋሰካ ባላና ኢግ አራጫማኖኮክ ዋጋ ካኮፈለራ
 አማኖያ። **29** ካእሰራኤል እባዶ ኡል ካእንጋጌ ካሰሴተራን ኣን ሄላኒዕ በከኮ
 ጋማ ካኮናቄራን አማኖያ፤ ካግብጽ እባዶ አደ ሂካማሌ ሊን ካኮዶታረን ጎራታ እሶ
 ዱባ በከይ ኤንጋሜን። **30** ካእሰራኤል እባዶ ታኢያርኮ ኣል ታግምበ አሪ ቶዶባ
 ማራሙረንጉሬን ካኢያርኮ ግምበ ካኮኤኤብሴራን አማኖያ። **31** ታሻርሙጣተ

ረከብ ካሳላላር እባዶ ኖገዳ ማንከቆጸተቶ ማራን እከጃጃሞን ዋታ ጎዋኖኮ
 ካኮሄሰታ አማኖይያ። 32 ጎርታ ካካለ እን መ አምራ? ጌዶናኮት፡ ባራቅኮት፡
 ሳምሶናኮት፡ ዮፍታሄኮት፡ ዳዉተኮት፡ ሳሜላኮትና ካሄገርልኮት ማማኪን ጎራታ
 እን የራታራ። 33 እሶ አማኖ ዋኖላል አዋዴራን፤ ፍርዳ ካራምቲ ጎሳ ባሪሴን፤
 እሶን ታሰሳንተቱ አብድ ሄላቴን፤ ታሉባን ህኢ ጨፊን፤ 34 ካኤሌኔ ሁና ባሰን፤
 ካኤላንን ሺፋኮ ሄሴን፤ ላፋማትሶኮ እታን ቶሰ ኢግልሳሜን፤ ጀሬን ሻፋይን እከቲ
 ሌራን፤ እሶን ዋታ ጀሬን ካሻፋታረ ዲናኮክ ዋታዳራል ሆርረናን፤ 35 ሄሌልጆል
 ካጎየር ፋልክሶ ጎይኮ ኬ ግራን ዴ። ኩክና ሂካኮ ካርረ ጎይኮ ክያኖ ሄላይን
 ሄዴንጉሬን ራኮ ታሞጋንክ እቦሳ አታቴን፤ ሂካ ኣንክክ ሻኖኮ ባልቹማ ብን
 ላኮዶታቴን። 36 ኮኮ ካካለቱን ቃጭፋማኖ ሌን ቦጫሜን፡ ኩኒዕ አደን ታሉኬ
 ማርጮ ሸሻሚን ጉሬን ሞን ካሻኖ ታቤን። 37 ኤኤሞ ኤጋሜን፡ ማጋዚና ኤካ
 በልኤን፤ ሺፋይ ጎዬን፤ ታእዳድና ታኦሬን ጫላ ሳርሳቴንጉረን ካፋፊን፤ ህየሳልና
 ኡል ካእባዶ እባዶ ሌን አቦሳሜን፤ 38 ጋዲ፡ ዋዳሚ፡ ኡሊ ካግሮ ላጋጆልና
 ማዳል ማራሙረን። ሂካ ጋራይ አላሞ እሶን ካዶትሳሮ ላኮዮ። 39 ሂክ ዱባ
 አማኖክሶኮክ ጋራ ዋ ካአቶቴር ጎሌና እሶን ታሰሳንቴቶ አብድ ጋና ላኮሄላቴራን።
 40 ዋ ኖን ካአዳን ኮኮ ሀልቼራ፡ ሃኑን እሶ ኖኔ ዋታ ኳሬ ካለ ዱዶኒዕ ሊን
 ላኮዳንዳራን።

12 ዱማንቻ ኣን ኖ ማራሙረ ካአበሮ ሂካ ዱባ አቶጆል ኖ ማንኮአብኖ ማራን
 ሰዳነ ኣን ኖን ካሌሮ እየሰ ዱባ ኖ ጉት ካቁራናመሮ ጨቦ ባሰጉነ ኖኮ ሆረነ
 ካግሮ ትያኖኮክ ለላማኖ ኡብሲ ቲኖ። 2 ኖ ካኮንትያናና አማኖካን ካሀጋእበሮና
 ካጉድሰር የሱሳ ድያኖይያ፤ ኡሱ ሆረቴሳ ኦግራን ገገሎኮት ኣላንቲ ማሰቃሊ
 ጉት ጎዋኖኮክ የራን ኮና እን ሀቶትኖኒ ታማሰቃሊ ራኮና ጎይ ኡብሴ፤ መርጌ
 ታዋይና ኮርፍንጀ ሀማጼ። 3 ጎርታኑ አሀፋኖንና አብድ አንጎሳኖን ሂካ ዱባ ኡሱ
 ኦኔባታሬን ጨባለሳል ኡሱ ኔባታ ግራን እሶ ካኡብሴሮ የሱሳ ዲያ። 4 እሰን
 ጨቦ ዲዳኖይ እባዶ እሰን ታላጋድሮ ጊን ላኮኔባቴተን። 5 ዋ እሰን ይሰኬሳ
 እን ሃ አማ ካጎርሳተረ ኢሎቴታን፤ “ኤረኬ! ሀድሳኖ ካጎታ አርየራሰ፤ ኡሱ ኩ
 ካኮሙርሰ ጎራታና አብድ አርሳተ፤ 6 ጎታ ካጌላታሮኬሳ ሀድሳታራ፤ ኤረኬሳ
 እን የላተ ካድያታሮ ሙርሳታራ።” 7 ዋ እሰን ይሰኬሳ እን ማንኮቶታታሮ ማራን
 ሙርኦቴሳ ኡብሳ፤ ኦዶ ካሙርሳኖን ኤረ አዮያ? 8 ይሰ ካሌራ ዱባ ታኦታታሮ

ሙሮ እስና ጎአታኝን ኮስቻታን ኳሬ ይሰኬ ላኮታን። **9** ሂካኮ ካካለ ኖ ዱባ ካሙርሳሮ ካኡሙለሮ ኦዶላል አብና፤ ኖና እሶ ካባጃ ግኔ፤ ሀያ፤ ኔፎ ግርን ካኢያና ኦዶካኑን ምሲ አሎ አጃጃማና ዋታና! **10** እሶ ኢዳነ ኣነ ሌን እስኦትሶውን ጎሳሙቴ ጎራታ ክጫሩን ኖ ሙርሰራን፤ ዋ አደ ቁሉማቴሳ ኦሄዴዳማኖ ጎሳሌኖን ላኦታኑን ኖ ሙርሳራ። **11** ሙሮ ዱባ ካኮሙርሳማኖ አልማ ኦጋድሰራንያን ኳሬ ኦገገላይሳራን ኣነ ላኮላራን፤ ሃር አባባተረ አደ ሙሮ ካኢጋልሰሰራን አባዶን ኖጎዳ ታኮአማጋንተቶ ታቁሉማ ኢል ሄላምሰሳራን። **12** ሃኑን ኦሀርጋጨራን ገነኖኦትሰና ኦሀረራን ግልቦኦትሰን አታይሳዬን። **13** ካኤሳራ ጎጎፋይሮን ኳሬ ምክታኮ ጎጎሽርሞንኮ ሉቃኦትሰኑን ራ ካኢዳን ኤካሳየን። **14** ቁሉማ ካላይ ማዮና ጎታ ድን ማንኮዳንዴኖን ማራን አባዶ ዱባን ዋታ ኖጎዳ ግርን ካዳንደተን ዱባ ፈላ፤ ቁሉማቴሳና ግርን አታዬን፤ **15** እሰንኮ ማዮና ሰኖ ታዋ ጎሳህንቃኖንኮ እስኦራዬን፤ ኡሱማለና ኮና ታኦኮካቶ ኢል ካዱባምሰራ አካክልተ እሰን ኦሮ ጎሳአላኖንኮና እሰን ጎሳጢቦንኮ ካሞጋና እሰን ጎሳባቶይሶንኮ እስኦራዬን። **16** ካሻርሙጣሮ ጎርቱን ኮይክ ካአምናሮ ባቦን አመረ ባርክንተቴሳ ካዳዳለሮ ኤሳዉ ኣነ ዋ ካአብሳኖን አባዶ እሰን ኦርሮ ጎሳግኖንኮ እስኦራዬን። **17** ሃር አባባተረ ኤሳዉ ሶማ አታይን ካኮዶታሮ ጎራታ ሂኒዕ ሶማ ኡሱኮ ኦትራሜራን ካሳንዋ፤ ኦታ ሀኑኡ ሶማ አታይ ጎዶታተና ሱረ አታይን ላኮዳንዴ። ጨቦኮ ጉላ ጋልን ኢድሊ ሱረ ላኮሄላተ። **18** እሰን ገነ ካድናማሮ ጎርቱን ኤለኒ ታጉባቶ ታሲና ዋዳም ቶስ ላኮጌተታን፤ ኢዮቴ ቶስ፤ ሙጉድ ቶስ፤ ሁፎ ቶስና፤ **19** ታጠሩንባ ያየ ጎርቱን ካሰጋማራ ሃፋራ ታኮማልሳማሮ ቶስ ላኮጌተታን፤ ሀሱ ሃፋራ ካማለራ አባዶ፤ “ሂታኮ ሆረንባን ካካለ ሃፋራ ኖን አሮሰጋሞ” አማ ታ ኤባራኒ ጌራን። **20** ኣላንቲና “ግድና ሱረ ዋዳም ጎዳዳረ ኤኤሞይ ኤጋምረ ሀሳየ” ካአማራ አጃጃ እሶን ማንኮእሰላተ ማራን ኦራይን ላኮዳንዴን። **21** ኤሰ ካዴሮ አየሰኮ ካከይ ሙሴ ሱረ “እን አብሳየራ፤ ሀረኤሞ” አመ። **22** እሰን ጎአመን ታጽዮን ዋዳም ቶስ ጋባላንቲታን። ኤሰና አርዶት ታዋ ካታማ ታሌተቶ ታዳሩረ ኢየሩሳሌምታ፤ ገጌሎይ ካኩኩመሮ ካሞጋን ኩማይ ካቶታምሮ ኤርግቻል ቶስ ጋባላንቲታን። **23** መገክሶ ዳሩሪ ካኮንጸፋመሮ፤ ምን ካዋውን ባርክ ኦሌራን አማኒልኮት ሀጋና፤ ዱባ ጉት ካፍርዳሮ ሄዶና ዱዶኒዕ ኦሌራን ቁሉሌኮት ኔፎል ቶስ ጋባላንቲታን። **24** አማቶ ኦኡሱቡን ጠኤ አሌ ካዋጋርሳሮ ካሌሮ የሱሳ

ቶስ፡ ካኣቤላ ኢግኮ ካርረ ካአዬሳሮና ካአራጫመሮ ኢግ ቶስ ጋባላንቲታን። 25
 ሀሱ ካአዬሳሮ ኖ ላኮአታይናኖ ጎጎአሞንኮ እስከትስን ኦራዬን፤ ሀኑኡ ዋ ጋራ
 እባዶን ኡሉን ጎአዬሰሮ ላኮማልናኖ ኦአመራን እሶ ጎሄሳናዋቲን፤ ሀያ ኖ ዳሩርኮ
 ካአዬሳሮ ጎአታታናዋኔ ሞሲ ሄሲን ዳንዳና? 26 ሀሱ ጎራታ ያየቲሳ ኡል አእስቲ፤
 ግዳ ጎአመን፡ “ኡል ካላል አሌኖን ግራን ኮይክ ዳሩርና እድረ አእስናራ” አመ
 አብድ ሰሰራ። 27 ሂክ፡ “ኮይክ እድረ” ካአማራ ሃፋራ ካቲሳራ ካአኢኖን ኮኮ
 ጣባይ ጎጎግሮን ካአአራ ጎርቱን ካመጣመራ ኮኮ ባኖያ። 28 ጎርታ ኖ ካአኢኖን
 ዋኖናት ማንኮኤልናኖ ማራን ዋ ጋላቲና፤ ኡሱ ታኮገገላይሶ ካባጃይና አብሲ
 ሀንዳይና። 29 ኣላንቲና ሄዶካን ታጉባቶ ኤለን አንያ።

13 አርጌቶ እስእስኦሮ ታአብላል ጌላንጀ እስኩን ሀግቲ፤ 2 ማርት ቆጶይዴን
 ማርትሳኖ አርኢሎቲን፤ ሂካማሌ ማርት ቆጶታ እባዶ ኮኮ ሀአዴሶኒ ኤርግቻ
 ቆጶቲንጉራን ማርትሴራን። 3 እሶን ዋታ ካሻንተታን ኣን ላዴን ሞን ካሻኖይ
 አሻማራን ሻዳ፤ እስና እሶ ኣን ራኮ ካአታታን ኣን ላዴን ራኮ ኣአታታራን ሻዳ። 4
 እስከታታኖ እባዶ ዱባ ዶሌ ካካባጃመ ሀሌዎ፤ ኦላይማራና ኦሻርሙጣራን
 ዋ ማንኮፍርድናሮ ማራን ኦርና ኤንተርና እስእሲ አብዳታና ዋትኮ ካከይ
 እስከታታኖክስን አርባቶይሳቲን። 5 ታማራጋይ ጌላንጀኮ ፋክማ፤ እስን
 ካአብታንዋ እስኩን ሀሌዎ፤ ዋ “ኣን ኩ ሱረ ላኮሻፍሮ፤ ዱዶ ኩ ላኮእስሮ”
 አመራ። 6 ሃኑን አብዱ፡ “ጎታ ካጋርጋራሮያ እን ላኮአብሳታሮ፤ እባዶ እን መ የልን
 ዳንዳራ?” አማና። 7 ሃፋራ ካዋ ሆራርጀ እስኩን ኦሰጌራን ሞን ካዋይ ሆረሃዬን
 ኦገጌሳራን አርኢሎቲን፤ ግርክሶና ፈሎኦትሶኮት ላኦ ሻዳ አማኖክሶ አባዬን።
 8 የሱሳ ክርስቶሳ ከለና ሀታር ጅሩ ጅሮማን ኡሱ ኡሱያ፤ ላኮኢግልሳማሮ።

(aiōn g165) 9 ካአዴሳሞን ካሞጋን ማርት ካላሮ አጋልስስ አርቦጃንተን፤
 ዋዳናታን ካአሞ ዋጋ ኦራታኖ ሀሌኖን ግራን ሰኖይ አታታኖ ካአዳንክያ፤ ሂካ
 ካባቦ ዋጋይ ዴበ ካሰሴታራ እባዶ ላኦ ቶና ላኮአታተሮ። 10 ኖ ባንኤ ታፋላ
 አብና፤ ጎሌና ዱንካኒ ኦሮ ኦሀንዳራን ቱቃሞል ሀታ ባንኤ ታፋላ ካግሮ ባቦ ኣት
 ኣምን እሶን ፈኢ ላኮሰሳማቶ። 11 አይሁድኮክ ካቱቃሞል ዎይቻ ጨቦኮ ሀሄሶ
 አማማኖ ካሄላሞሳሮ ካግድ ኢግ እበንጉረን ኣሎ ቁሉት ባንኤ ቶስ ታባራ፤ ኡሱ
 ግድኮኒዕ ሶ አደን ዱንካኒ ታታንኮ ሳር ቤሰረን ኤለኒ ጉባራን፤ 12 ኡሱማለና
 የሱሳ ኢግኬሳይ ጎሳ ቁሎይሲን ካካታማ ካራኮ ሳሬ ራኮ አታተ ጎዩ። 13 ኖና

ዲንካኒ ታታንኮ ሳር ብጉነ ኡሱ ቶስ ሴኖ፤ የራንኬሳና አካታታኖ ሌና። **14** ኖ ጋና ታኤሜይናቶ ካታማ ኦራታና ኳሬ አታይ ታግርናታ ካታማ ሂካ ኡሊ ኖን ላኮግቶ።

15 ጎርታኑ የሱሳ ክርስቶሳኮክ ጋራ ካሶማ ጃርሶ አርጌቶ ዋወን ሰንሶ፤ ህክና መገኬሳ ማራን ኡሱን ታአቶታቶ ህኢ ካሰሳማሮ ካሶማ ጃርሶ። **16** እየሰ ካእዳን ፈላኖና ካኡብታንኮ ካካለቱን ሰሳኖ አርኢሎቴን፤ ዋ ካገጌላይሳራ ሂካ አንክክ ጃርሶ። **17** እስኩን ሆረሃዬን ኦፈላራውን እጃጃማ፤ ኦዶናትክሶይ ሄገሊ ግራ፤ እሶ ካኮሆሳማራን ኦዶናት ማንኮአባን ማራን ግርክሰን ማራን አታታራን፤ እሰን እሶን ጎአጃጃንቴን እሶና ፈሎኦትሶ ገጌሎይ ፈልናራን፤ ጎርቱን እሶ ፈሎኦትሶ ቁቃማ ፈላራን፤ ህክና እስኩን ላኦ ካሰሰሮ ላኮኖ። **18** ኖን ኤባየን፤ ታሙጭንተ ባስ ታኮማልሳሞን ሳሙ ኖን ግራኖ አዳሳታና፤ ራ ዱባይ ታኢዳንት ያዳሊይ ግርን ሀልቻና፤ **19** ሀሱኮና እሰን አታይ ጎጎኤባታኩን እን እሰን አታይሰ ካኤባታራ እን እሰን ቶስ ሳም ጎጎአባባርን። **20** ካኦቲ እዳድ ካፎፋሮ ጎታካን የሱሳ ጅሩ ጅሮማኮክ ካእማቶ ሃፋራኮክ አገ ጎይኮ ካኬሰራ ካኖጎዳ ሄዶ፤ (aiōnios g166) **21** ፈኢቴሳ ፈሎ ሀይሲን ጎጎዳንዳታውን እየሰ ካእዳንክ ዱባ ኡሱ እሰን ሀሙይሶ፤ ኖ ካገጌላይሰሮ ጋራ ካየሱሳ ክርስቶሳኒ ኖ ጉት ሀፈሎ፤ የሱሳ ክርስቶሳኒ ጅሩ ጅሮማኮ ታ ጅሩ ጅሮማ ጌርን ካባጃ ሀሌቶ፤ ሀሚኒዕ። (aiōn g165) **22** አቢላልቴ! ሂክ እን እስኩን ካጻፈራ ሀንዳ ካጋባባን ማንኮሌሮ ማራን ሂካ ካጎርሳ ሃፋራ ኡብሲ ጎጎአታታውን አታይሰ ኤባታራ። **23** ኡብካን ጢሞቶሳ ምን ካሻኖኮ ብያኖ እሰን ጎጎአዳሳውን ዶታራ፤ ኡሱ ሳም ሂታራ ካኮኤሜተ ጎራታ እን ኡሱን ዋታ ኤመይረ እሰን ድናራ። **24** ሆረሃዬን እሰን ኦባሪሳራውና ቁሎለ ዱባን ኖጎዳ ሰጋ፤ ካኢጣልያ ኡልኮ ኤመተን ህታኒ ኦግራን አማኒል ኖጎዳ እስኩን ፋራማራን። **25** ሰኖ እሰን ዱባን ዋታ ሀሌቶ፤ ሀሚኒዕ።

ያይቆባ

1 ዋወና ጎታ የሱሳ ክርስቶስን ካሃንዳራ፡ ያይቆባ፡ አላም ዳርእንቴን ኦግታን ኣኒ ቶዋንኮ ላማወን፡- ኖሳዳ እስኩን ሀሌቶ። **2** አቢላልቴ፡ ካለካለት ራኮ እስን ጎጌተ ኦኦቲ ገጌሎ ኣን ቶታ፤ **3** ኣላንቲና አማኖክስንኮክ ጫፋማኖ ኦብስ ሰሳኖ ካሳንዋ። **4** ኮና ካኮንሀንቃኖን ቁሉኒዕና ካመን ዱባ ልኪኒዕና ኦአማጋንቴን ጎሳታኩን ኦብስ ፈሎኦትሴ ሀፈልቶ። **5** እስንኮ ማዮና ቃሩማ ጎሀንቅካተ፡ ሀቱፋኖን ዱባን አዱ ካሰሳሮ ዋ ሀኤባቶ፤ ኡሱና ሰሳምሮዋ። **6** አየሱን ጎአመን ሀሄዳኖን አማኖ ሀኤባቶ፤ ኣላንቲና ካሄዳታራ አባዶ አንባል ካአኢሳቶና ካከያሮ ጋሽማሎ ካበከ አንያ። **7** ሀሱ ኣንክክ እባዶት፡ ጎታኮ ኮኮ ኮ ሄላይናራ አም አሮሄዳኖ። **8** ኡሱ ቆፋ ላማ ካአባመና ራከሳ ዱባ ሀጋቶላ ካላልአማሮያ። **9** ባሪሳኖይ ካኮንየራተራን አቢ ዋ ጦቂ ማንኮኢሳሮ ማራን ሀገጌላቶ። **10** ዱሩማ ታእባዶ ዳራራ ታኤስ ኣን ማንኮኡባቶ ማራን ባሪሳኖይ ጦቂ ካአመ አቢ ዋ ባሪሳኖይ ጎየራስና ሀገጌላተ። **11** አርት ጉባኖኮ ካከይ ፋርሳይ ኤስ አንጋግሳታ፤ ዳራራና ኡባታ፤ ምዲና ባታ፤ ኡሱማለና ዱረሳክ አባዶት ፈሎኦቴሳ ሀጋቶላ ራንካ ባራ። **12** ጫፍቲ ኦሮ ካአታታራ እባዶት ካሶማሳመያ፤ ኣላንትና ጫፍቲ ካኮዳንዴ ጎራታ ዋ ኦጌላታሮን ታሰሰሮ አብዱ፡ ካግር ካላቻ ሄላይናራ። **13** ማዮና ጎጫፋመ፡ “ዋ እን ጫፌ” አሮኣሞ፤ ኣላንትና ዋ ማላነይ ላኮጫፋማሮ፤ ኡሱ አደ ማዮና ላኮጫፋሮ። **14** አየሱን ጎአመን መተመተይ አባዶ ካኮጫፋማራ ካማላነ ሀልቻኬሳ ጎቦጃምሮና ጎሶባምሮያ። **15** ሀልቻና ካኮጂናሮ ጎራታ ጩቦ ኡሙላራ፡ ጩቦና ካኮጂናተ ጎራታ ጎይ ኡሙላራ። **16** ኦጌላንቴን አቢላልቴ፡ አሮሶባንቴን። **17** ካአዳን አላቦና ዱዶኒዕ ሶማ ዱባ ዋኮያን፤ ህክና ካኤመታራ ሆሰንደ ኣን ማራሙራ ጎርቱን ኢግልሳማ ካኮግኖን ካኢፋ ኦዶ ዋኮያ። **18** ዋ ኖ መጣ ዱባኮ ኦሆሬ ጎሳሌኖን ፈኢቴሳ ካሩም ሃፋራ ኖ ኡሙላ። **19** ኦጌላንቴን አቢላልቴ! ሂካ ሻዳ፤ አባዶ ዱባ ማልን ካጀጀሬ፡ አዬስን ካአሰላተ፡ ኢኦኮና ካኡብሴ ሀሌዎ። **20** እኦ ኦአባዶ ቁሉማ ታዋ ላኮኬናራን። **21** ሃንሱን ባቶዋኖና ማላነኮክ ጂናን ትራየንዴን ኔፎትስን ፋይስን ካዳንዳሮ፡ ዋዳናታትስን ካዳባተሮ ሃፋራ ኢዳነ አታዬን። **22** ሃፋራኬሳ ካአማሮ ፈላ ኳሬ ካማላሮ ካላ ልዴን አሰኦትስን አሮሶባቴን። **23** ሃፋራኬሳ ካማላራ፡ አየሱን ጎአመን ካአማሮ ካኦራኖን አባዶት በቤድቴሳ ዳዉኢቲ ካድያታሮ አባዶ አንያ። **24**

እስከቴሳና ድያተ ሴታራ፡ ጎርሰዋ መ ኣን ላሮ ኢሎታራ። **25** እየሱን ጎእመን ባልቐማ ካቤሳሮ ልክኪ ሴራ ዳረ ካእታታራ፡ ካማለሮ ካፈላራና ካኢሎኖ እባዶ ፈሎኦቴሳ ካሶማሳመ ላራ። **26** ህኢቴሳ ሀኦራኖን፡ ዋዳናቴሳ ሽርሳታ እማኖ እባ ካእማራ እባዶት፡ እስከቴሳ ሶባታራ፡ እማኖኬሳኮኒዕ ፈሎና ላኦ ካላይኒዕያን። **27** ዋ ኦዶይ ሆረ ካሙጭመና ማላነ ካላይክ እማኖ ሂካያ፤ ኦዶና ኣና ኦኮንጎየራን ይንሳ ኤንተርጃል ካኮንጎየሮ ሄለል ራኮትሶይ ጋርጋራናና ኣለምኮክ ባትናትኮ እስ ኦራታኖያ።

2 አቢላልቴ፡ ካባጃ ካሌሮ ጎታካን የሱሳ ክርስቶሳ ኦእማናታን ማንኮሌተን ማራን ኦሮኡሉልሰ። **2** ታዋርቂ ፍራንታ ካካተረና ካእዳንክ ሳርሰ ካሳርሳተረ እባዶት ታእማኒል ሀጋና ቶሰ ካኮታበ ጎራታ ኡሱማለና ጦርቀ ካኣተ ሳርሰ ካሳርሳተራ ህየሳክ እባዶ ጎታበ፡ **3** ካእዳንክ ሳርሰ ካሳርሳቴን ካለት ካባጃ ቱሳ፡ “ኩዬን ካዶትሳራ ካእዳንክ ባርጨማ ሂክማ” ጎእንቴን ህየሳትነ ኢድ፡ “ኣት ሀሴ ኣሊ” ጎርቱን ሉክቴ ሄገሊ “ሀማጺ” ጎእንቴን፡ **4** እሰን ኦሮ ኡሉልሳኖ ላኮዮያ? ኢደና ቆፋ ታማላን ኦእባንቴታና ኦፍርዳታን ላኖ ላኮዮያ? **5** ኦጌላንቴታን አቢላልቴ፡ ማላ፡ ዋ እማኖ ዱረሳ ጎሳሌናዉና ኡሱ ኦጌላታራዉን አብዱ ካሰሳመሮ ዋናናት ጎሳኤላዉን ሂካ ኣለምክ ህየሳል ላኮኣሳበሮያ? **6** እሰን ኣዴን ህየሳል የራሴን፤ እሰን ኦጫናቅሳራን ዱሬሳል ላኮዬንያ? ሞን ካፍርዱ ቶሰ እሰን ኦጌሳራን ላ አሶያና? **7** እሰኒ ካኡማመሮ ካባጃ ካሌሮ መገ ኦኢንጋማራን ላኮኢሶያንያ? **8** ማጻፋይ ቁሉክ፡ “ኦላታ እስኦታ ማለ የላ ጌላ” እማመ ካጻፋመሮ ሴራ ካዋ ጎኦራቴን ታኢዳን ፈላግታን። **9** ጎኡሉልሴን ኢድ ጨቦ ፈላግታን፡ ሴራ ሆረና ሴራ ካባሳሮ ኣን ቶታማታን። **10** ኣላንቴና ሴራ ዱባ ካኦራታራ እየሱን ጎእመን ሴራ ኮይ ካሀንዱዱፋታራ ጎግረ፡ ዱባና ባሳኖ ኣን ቶታማራ። **11** “ኣሮሻርሙጢተ” ካእመራ ጎታ ኡሱማለና “ኣሮላጋደና” አመራ። ጎሻርሙጣናዋተ፡ እየሱን ጎእመን ጎላጋደ፡ ሴራ ካባሳቶ ሌተታ። **12** እዬሳና ሌረ ፈላታ ጎግቴን ባልቐማ ካሰሳሮ ሴራ ሆረ ካፍርዳሮ እባዶ ኣን ሌን። **13** ኣላንቴና ሻጋ ካየሎን ዱባ ሻጋ ካላይ ፍርዳምናራ፡ ሻጋ ፍርዳ ጉት አታይናራ። **14** አቢላልቴ፡ እባዶት ኮ ኣን እማኖ እባ ጎእመ ፈሎ ኢድ ጎዋተ መ ላኦ አባ? ሂካ ኣንክክ እማኖ ፋይሰን ዳንዳራ? **15** አቢ ኮ ጎርቱን እባ ቶ ካሳርሳታራን ሳርሰና ሌረ ካእምራን ባቦ ዋይጎግሬን፡ **16** እሰን ኦሮኮ ኮ፡ “ኖሳዳ ሴዬን፡

አርአምቦሎቴን፡ ባራራ” ጎአመ፡ ማርክሶውን አደ ካዶትሳሮ ጎሰሱን፡ መ ላኦ አባ? **17** ኡሱማሌ ፈሎ ካላይክ አማኖ መተኬሳውን ካጎየያ፡ **18** እየሱን ጎአመን እባዶት ኮ “እት አማኖ አብታ፡ እን ፈሎ አባ” አማራ፡ አማኖካ ፈሎኮ ካለየልደ ቱስ፡ እንና አማኖኬ ፈሎይ ቱሰናራ፡ **19** እት “ዋ ኮ ግራኖ” አብዳታ፤ ካእዳንክያ፡ ዱርሳልና ሂካ አብዳታናን፡ አብሲና ሀራኣናን፡ **20** እት ጎዋክ እባዶት! አማኖ ፈሎ ካላይ ላኦ ካላይክ ላኖ አዳሰን አቶ ዶታታ? **21** አቦካን አብራመ ኤረኬሳ ይሳቃ ባንኤ ታጃርሶ ጉት ካኮካየረ ጎራታ ካኮቁሎየረ ፈሎይ ላኮየያ? **22** ሂካኒና አማኖ ፈሎኔ ዋታ ፈላ ግራኖ ድያታ፡ አማኖና ፈሎይ ካእማጋመ ሌ፡ **23** “አብራመ ዋይ አማን፡ ቁሉክና ሌ ቶታመ” ካእማራ ማጻፋ ቁሉክኮክ ሃፋራ ጉዳተ፡ ኡሱና ዋ ካጌላታሮ አማመ፡ **24** ጎርታ አማኖ ካላሊ ሀሌኖን ፈሎኦቴሳይ ጎጎቁሎየሮ ድያታን፡ **25** ኡሱማሊና ታሻርሙጣተ ራኡብ ኦህንዳረን ቆጶተደ ራ ካካለኔ ጎጎሴራውን ካኮየልተ ጎራታ ፈሎኦትሴይ ላኮቁሎይተቴያ? **26** ማር ኔፎ ካሊ ካጎየያ፤ ኡሱማሊና አማኖ ፈሎ ካሊ ካጎየያ፡

3 አቢላልቴ፡ እሰንኮ ካሞጋን ካእጋልሰሳሮ አሮሌኖ፡ አላንቲና ኦእጋልሰሳኖ ኦሌነና ኖ ዱባኮ ታሮርተ ፍርዲ ካእታይናኖ ካሳንዋ፡ **2** ዱባና እየሰ ካሞጋኒ ሀንዱዱፋታና፤ እዬሲ ካሀንዱዱፋኖን ማዮና ጎግረ ኡሱ ማርኬሳ ዱባ ኦራይን ካዳንዳሮ ልክኪ እባዶትያ፡ **3** ፋራዴል ጎጎአጃጃምሮን ብጣላ ሙንጀትሶይ ጎቱይንሰ፡ ማንኮጌላን ዱባ ገጌሰን ዳንዳና፡ **4** ጎርቱን ማርካፋጃል ዲያ፡ ማምሲ አሎ ካንጅንክና አንባል ታኦቲት ካሻፋማሮ ጎሌና ማርካፋ ካዱዳራ ክጫርክ ሞቶሬ ማንኮዶታተ ጌሳራ፡ **5** ኡሱማሊና ኤሬብ ክጫርክ ካማሬ ምክታ ላ ግራን ካጅንጂን እዬሲ ኮራራ፡ ጋ ታኦቲ ኤለን ትጫርት ምሲ ጉብተ ባሳቶ ሻዳ፡ **6** ኤሬብ ኤሌንያ፡ ካማሬ ክፍሊታን ኦሮ ካግሮ ካሜላን አላምያ፡ ማር ዱባ ባቶይሳራ፡ አደና ጋሃናመኮ ታበያቶ ኤለኒ እን አላታንኮክ ትያኖ ጉባራ፡ መተኬሳውና ታንባኖ ኤለኒ ጉባይናራ፡ **(Geenna g1067)** **7** ማምሰክ ግድ፡ ክምብርጃል ኡሱማሊና ኡል ጉት ካግታማራና፡ በከ ኦሮ ታግታ መጣ ዱባ አጃጅን ዳንዴራ፡ እባዶይና አጃጃመራ፡ **8** እየሱን ጎአመን ኤሬብ ኦራይን ካዳንዳራ ማዮና ላግሮ፡ ታላጋዳ ማርዚ ካኮአማጋንተቶ ፎልሲ ካላይክ ካሜላን እዬሰያ፡ **9** ኤሬብካን ዋ ኦዶካን ጋላታና፡ ኡሱ ኤሬብና ምዲ ታዋይ ካመጣመሮ እባዶ ቃንጋና፡ **10** ህኢ ቶኮ ሶማና ቃንጎና ብያራን፤ አቢላልቴ፡

ሃ ላኖ ላኮደትሳሮ። 11 ፋልቶ ኮኮ በከ እመጭማና ኦጎራ ብያራን? 12 እቢላልቴ፣ ባላስ ኤጀርሳ፣ ዋይኒና ባላስ ዱባምን ዳንዳራ? ኡሱማለና ኦጎራ በከኮ እኦኖዋታራን ብን ላኮዳንዳራን። 13 እስን ኦሮኮ ቃሮክና ካሻዳሮ ካሌራ እባዶት እየያ? ቃራማና ኢዳነይ ኦፈለሮ ፈሎኦቴሳ ግርኬሳ ሀቱሰ። 14 እየሱን ጎእመን ታኦኮካታ ጋቢና እስ ጌላንጀ ዋዳናትሰኒ ጎግቴ አሮኮርተን፣ ሩም ጉት ጣራ አሮእዬሴን። 15 ህታ ኣንትት ቃራማ ኤለኮ ላኮቶ፣ እየሱን ጎእመን አላምኮ፣ ሶኮና ዱርሳኮታ። 16 ጋቢና እስ ጌላታኖ ታኮግራን ኤሰ ባንኤ ሻላጋማኖና ፈሎ እማላን ዱባ ግራን። 17 ዳሩርኮ ታሌተታ ቃራማ እደ ሆራርጀ ታሙጭንተታ፣ ኤሰኮና ኖጎዳ ታጌላቶ፣ ታኦብሳቶ፣ ታኢዳንት፣ ሻጋና ኢል ታኢዳን ታኮእማጋንተቶ፣ ኡሉልሳኖና ኢፍሳዳናት ታኮግኖንታ። 18 ኖጎዳ ካጌላታራ ኖጎዳ ዉጣተረ ታቁሉማ ኢል ኩኩይሳታራ።

4 እስን ኦሮ ካግራ ጀሬና ኤንገ ኤትኮ ታኤማተቶታ? እስን ኦሮ ካኦላማራ ሀልቻክሰንኮ ላኮዮያ? 2 ኮኮ ሄላይን ሀልቻታን፣ እየሱን ጎእመን ላኮሄላይናታን፤ ላጋዳታን፤ ኣሎ ሀልቻታን፣ ሄላይና ላኮዳንዳታን። ኢንሰ ኢንጋማታን፣ ጀሬን ሻፋታታን፣ ላኮኤባታን ካዶታታን ኮኮ ላኮሄላይናታን። 3 ኤባይናታን፤ እየሱን ጎእመን ላኮኣታይናታን፣ ካኤባታና መተክሰኑን ገጌሎ ኦሶየት ቆፓ ካማላን ሀልቻ ማንኮሌ ማራንያ። 4 ኦሻርሙጣታን፣ አላምን ዋታ ጌላንጀ ካታኖ ዋኔ ዋታ ዲና ላኖ ላኮካሳንያ? ሃንሱን አላምን ዋታ ጌላንጀ ካይን ካዶታታራ ዱባ ዲና ካዋ ላራ። 5 ጎርቱን ኖ ኦሮ ዋ ካባሪሰራ እያና “ኣሎ ሀኡሳታራ” አማ ማጻፋ ቁሉክ ካእዬሰራ እዳ. ካሄሰሮ ኣን ላራ? 6 እየሱን ጎእመን ሰኖ ጂናሰ ሰሳራ፣ ማጻፋ ቁሉክና፣ “ዋ ኮራማሳጆል ዲዳራ፣ ፋያንካኒዕ ጎእመን ሰኖ ሰሳራ” ካኮንእመራ ሂካኑንያ። 7 ጎርታ እስኦትሰን ዋዉን ሰሳዬን፣ ዱርሳና ዲዳ፣ እስንኮና ፋክምሮዋ። 8 ዋ ቶሰ ጋባላማ፣ ኡሱና እስን ቶሰ ጋባላምሮዋ። እስን ጨባለሳል ገነኖኦትሰን ሙጭሳዬን፣ እስን ቆፋ ላማ ሀጋቶላ ኦላታን ዋዳናትሰን ሙጭሳዬን። 9 ጫናቃማ፤ ጋዳ፤ ኦዬን፤ ኦሶልክሰን ኦታን ቶሰ፣ ገጌሎኦትሰና ጋዳ ቶሰ ሀኢግልሳማን። 10 ጎታ ሆረ እስኦትሰን የራሳዬን፣ ኡሱና እስን ጦቂ ጦቂ እስሮዋ። 11 እቢላልቴ፣ እስእስኦሮ አሮህማቴን፣ እቢኬሳ ካህማታራና እቢኬሳ ጉቲና ካፍርዳራ ሴራ ጉት ታማላን አዬሳራ፣ ሴራ ጉቲና ፍርዳራ። ሴራ ጉት ጎፍርድተ ካፍርዳቶ ኳሬ ሴራ ካኦራቶ ላኮቶ። 12 ሴራ ካሰሳራና

ካፍርዳራ ዋ ኮ ካላልያ፡ ኡሱና ሃሰና ባሰን ካዳንዳርያ፡ እየሱን ጎአመን ኦላታ ጉት ካፍዳታ አት እዮታ? **13** እሰን “ህታር ጎርቱን ጌባር ህታ ጎርቱን እንት ካታማ ቶስ ሴይናና፡ ኤሴና ጌስ ኮ አዳላይናና፡ ዳዳላይናና፡ ዋሪኤ ሄላይናና” እእማታን ጎርታ ማላ። **14** ጌባር ካልናሮ ላካሳን። ግሪኪን መያ? ጎራታ ክጫሩን ሙተረ አባባተ ካባሮ ኢዮተ እንታን። **15** ሱረዋ፡ “ታጎታ ፈኢ ጎሌተ ግርናና፡ ሂካ ጎርቱን እንክ ፈልናና” እማኖ እሰኑን ዶትሳራ። **16** ግዳ አደ ኮራክሰኒ ዳዳታን፡ ሂካ እንክክ ኮራ ዱባ ካማላንያ። **17** ጎራታ ካእዳንክ እየሰ ፈልን አዳሳ ግራን ካፈሎን አባዶ ፈላናዋት ኡሱን ጨቦ ላራ።

5 ጎርታ እሰን ዱሬሳጆል ማላ፡ እሰን ታግናቶ ራኮውን ኦዬን፡ ዋ ዋ አማ። **2** ዱሩማትሰን ቡቅተታ፡ ሳርሰክሰና ቆቃና አመራ። **3** ዋርቂክሰና ማራጋደክሰን አዶዶተራ፡ አዶዶታኖና እሰን ጉት አቶታራ፡ ሶኦትሰና ኤላን እን አምናራ፡ ካጋቾ ጌሱን ዱሩማ ኩኩይሳተታን። **4** ዋዳና አባዬን፡ ኢራክሰን ታጋታ ኦሀዬራን አፈላታራውን ሀሙሮን ካግታን ዳሞዛ እሰን ጉት ኢያራ፤ ኦታጋታራንኮክ እያ ዱባ ካዳንዳሮ ካሌሮ ጎታኮት ነበ ቶስ ጌራ። **5** ኡል ጉቲና ታኡማኒ ቡራቃ ግቱን፡ ታኤኖኦ አሪን ዋዳናትሰን ኡኡራይሳቱን። **6** እሰን ካኔባኖን ቁሉክ አባዶት ጉት ሙርቲሰቲታን፤ ላጋዴታን። **7** ጎራታ አቢላልቲ፡ ጎታ ታኤማሮ ኡብሳ። ኦታተ ካባራረ ኤሬ ኢል ታኢዳንት ታሰሶን ሞሲ ኡብሳሮ፡ ካሆሬና ካሃረ ኢዳሞ ሞሲ ኦራታሮ ሻዳ። **8** እሰና ሂካማሌዋ ኡብሳ፡ ዋዳናትሰና አታይሳዬን፡ አላንቲ ታጎታ ኤመቶ ጋባላንተታ። **9** አቢላልቲ፤ እሰአሰኦሮ አሮጉንጉሞተን፡ ጎርቱን እሰን ጉት ፍርዳምሮዋ፡ ሂክማ ካፍርዳራ ጎጫ አሌራ። **10** አቢላልቲ፤ መገ ካጎታይ ካክዬሰራ ሄገሮል ራኮ ኡብሲ አታታኖይ ማሱሳ ላኖክሶ አዳሳ። **11** አደና ኡብሲ አክታቲራን ኦሶማሳማን የልነ ኖ ካቶታኖ ካሳንዋ፡ ኢዮብ ሞሲ ኡብሴረ አታተሮ ማልቲታን፤ ጎታና ጉድሳኖይ ካየለሮ ዴተታን። ጎታ አሎ ካኔኤይሳታሮና ሻጋ ካየላሮያ። **12** አቢላልቲ፤ ዱባንኮ ሮረ ዳሩሪ ጎርቱን ኡል ጎርቱን ማምሰክ አዬሰና ጎሌ አሮኦማቲን፡ “አ” ጎሌ አ ሀሌዋ፡ “ላ” ጎሌ ላ ሀሌዋ፡ ጎርቱን ሙርተሳምናራ። **13** እሰን ኦሮኮ ራኮ ኦሮ ካግራ ግሮ? ኡሱ ሀኤባተ፡ ካገገላተራ ግሮ? ካጋላታ ማዛሙር ሀዛማሮ። **14** እሰን ኦሮኮ ካሀዉአመራ አባዶት ጎግሮ? ምን ካዋክ ጃርሶላ ሀኡማተ፡ እሶና መገ ካጎታይ ዛይቲ ሸግድ ሀኤባተን። **15** አማኖኮ ካሌ ኡብ ካሀዉአመሮ አባዶት ፋይሳራ፤ ጎታና ኬሳራ፡ ጨቦ

ፈል ጎግረና፥ ሀሄሶ አማማራ። **16** ሃንሱን ጨቦክሰን እስእስኦሮ ቤሳየን፤
 ጎጎፋይታውና ኮ ካካለውን ሀኤባተ፤ ቁሉክ እባዶትኮክ ኤብ ሁና አባ፥ ካአቲ
 አዬሰና ፈላራ። **17** ኤላሳ ኖ ኣንክክ እባዶትዩ፤ ኢዳሞ ጎጎኡባኖንኮ አታይሰ
 ኤባተ፤ ኡል ጉቲና ጌሰ ሴንዳ ምናና ኢዳሞ ላኮኡባተሮ። **18** አደና ኤባተ፥
 ኢዳሞና ዳሩርኮ ኡባተ፤ ኤሬና ኢል ሰሴ። **19** አቢላልቴ፥ እሰንኮ ኮ ሩምኮ
 ጎሽርመ ካካለ ጎአባበ፥ **20** ሂካ ሻዳ፤ ጨባለሳ ካኮሽርመሮ ራኮ ካአባባራ
 እባዶ ኔፎቴሳ ጎይኮ ሃሳራ፥ ጨቦ ካሞጋና ሀሄሶ አምሰሳራ።

1 ጴጢሮስ

1 የሱሳ ክርስቶስ ዓፄ ካፋሪመሮ ጴጢሮስ፡ ባቃተን ሎጌታዊን ጸንጢዮሳይ፡
ጋላትያይ፡ ቅጽዶቅያይ፡ እስያይና፡ ብታንያይ ዳርኢንቴን ኦግታን ዋውን
ኦላሳባንቴታን፡ **2** ዋ ኦዶ ጣየ ጎሳደሰሮ፡ የሱሳ ክርስቶስን እጃጃምን
እግኬሳይ አራጫንቴዳን እያና ቁሉክ ሙጭንቴን ኦቁሎይተታን፡ ሰኖና ኖሳዳ
እስኩን ሀሌቶ፡ **3** የሱሳ ክርስቶስ ጎይኮ ካኬሰሮኮት ኣላንቲ አርዶት ታሌተቶ
አብድ ኖን ካሰሰራ፡ ካኦቲ ሻጋኬሳይ ካኡሱብክ ኡሙላማኖ ይሰኬሳ ካየለሮ፡
ጎታካን ካየሱሳ ክርስቶስ ኦዶ ዋ ሀጋላታመ፤ **4** ኡሱና ታባኖን፡ ታሻሞንና
ታኢግልሳሞን ርቲ ዳሩሪ እስኩን ኤካሰራ፡ **5** እስና ታጋቾ አሪ ካሙትናሮ ፋይና
ጋራ ካእማኖን ሁና ካዋይ ኦራንቴታን፡ **6** ማምሲና ሱረ ካለካለት ጫፍቲ ጎራታ
ክጫሩን እስን ታጠብዶ ጎሌተና ዋይ ገቤላየን፡ **7** ህት ጫፍቲ እስን ካኮንግናታ
ካካባጃ አማኖክስን ሩም አዳሰሰንያ፤ ካባራ ዋርቂ አደ ኤለኒ ጫፋማራ፤
ዋርቂኮ ካሮረ ካካባጃ አማኖክስን ሂካማሌ ጫፋሚን ደትሳራ፤ ህክና ካጫፋመ
አማኖክስን የሱሳ ክርስቶስ ካኮኤሜታሮ ጎራታ ጋላታ፡ ካባጃና ሄዶይሳታኖ
እስኩን ሄላምሰሳራ፡ **8** የሱሳ ክርስቶስ ካዳኖን ግታን ጎሌተና ኡሱ ጌላይናታን፤
ሃፋራይ ሰጋሚን ካዳንዳምን ኦካባጃሜን ገቤሎይ ገገላይናታን፡ **9** አማኖክስኒ
ታኦራታን ኔፎትስኩን ፋይና ሄላይናታን፡ **10** እስኩን ታሰሳምናቶ ሰኖ ማራን ሄገሮ
ኦአዬሰራን ካሄገሮል ሂካ ፋይናን ማዳሬን ቆቆራ ግረን፡ **11** እሶ ኦሮ ካግራ
ካክርስቶስ እያና ክርስቶስ ጉት ታግናቶ ራኮ አደና ራኮኮና ሃሬ ታኤሜይናቶ
ካባጃ ጣየ እዬሳ ካቱሰራ ጎራታ ጎሬና ምሲ ጉዳይናሮ ቆቆራ ግረን፡ **12** ግዳ
ዳሩርኮ ካፋሪመሮ እያና ቁሉክ ዋንጋላ ካላላበሮ እባዶን እስኩን ካሰጋመሮ
እየሰ ካኮአዬሰን ጎራታ እስኩን ኳሬ እስኦትሶውን ፈላታናዋት እሶን ሙተ፡፡
ኤርግቻልና ዱባ አሄሶን ሂካ እየሰ ሀልቻራን፡ **13** ሃንሱን ዋዳናትሰን ኤካሳየን፡
እስኦትሰን አዋዳዬን፤ የሱሳ ክርስቶስ ካላም ጎኤመተ እስን ታኦታይናታን ሰኖ
ዱባ ጉት አብድ የላዬን፡ **14** ካእጃጃማሮ ይሰ ጎሳሌተታንክ ማለ ጣይተን
ሀአዴሶን ግራን ካኮግቴን ሀልቻ ካሜላን አሮፈልቴን፡ **15** እየሱን ጎኤመን
እስን ካኡመራ ኡሱ ቁሉክ ማንኮሌ ማራን እስን ግርክሰን ዱባይ ቁሉለ
ላ፤ **16** ኣላንቲና “እን ቁሉክያ እስና ቁሉለ ላ” አማመ ጸፋመራ፡፡ **17** እባዶን
ሀኡሉልሶን ኦዶ ኦዶ ፈሎኦቴሳክ ማለ ካፍርዳሮ አቦካን አንቴን ካኡማታን

ጎሌተን ሂካ ኡሊ ማርትና ካኮግታን አብሲ ግራ። **18** ካሆሬ ኦዶላልክሰንኮ ካኤልቲታን ላኦ ካልክ ግርኮ ባልቼማ ካኮበተታን ካባሮ አዬሲ ብር ጎርቱን ዋርቂ ላናዋት እሰን ካሳንዋ፤ **19** አየሱን ጎአመን እሰን ባልቼማ ካኮቤተታን ካሙልሶን 44 ካላይክ ካኢዳዶ ኢግ፤ ካካባጃመ ካክርሰቶሳ ኢግያ። **20** የሱሳ ጣየ ካኮአዴሳመራ አላም አንመጣሞን ግራን ሆረን ጎሌሮ ግዳ አደ ካጋቾ ጌሲ እሰን ማራን ሙተራ። **21** ጋራኬሳነ፤ ጎይኮ ካኬሳሮና ካባጃ ካሰሰሮ ዋይ አብዳታን፤ ሃኑን አማኖክሰና አብድትሰን ዋ ጉቲያ። **22** ጎርታ ሩሚ አጃጃማኖ ኔፎታትሰን ማንኮሙጭሳቲን ማራን፤ አማኒሉን ታኢዳን ጌላንጀ ሀግርቶ፤ እስእስኦሮ ማዳራየን ዋዳናኮ ጌላየን። **23** ካላም ካኮአላተታን ታባቶ ሳኒኮ እንሌኖን ግራን ኔፎን ግረረ አርዶክ ካሌሮና አታይ ካግርናሮ፤ ሃፋራ ካዋኮክ ጋራነ ታንባኖን ሳኒኮያ። (aiōn g165) **24** አላንቲና ማጻፋ ቁሉክ ጎጎአማሮ፤ “ሶ ካሳርሳተራ ዱባ ኤስ አንያ፤ ካባጃ ዱባና ታጋዶ ዳራራ አንታ፤ ኤንሳ ቆራራ፤ ዳራራና ኡባታ፤ **25** ካጎታ ሃፋራ አደ ጅሩ ጅሮማን አታተ ግራራ።” እሰኑን ካላላባመሮ ካገጌሎ ሃፋራ ሂካያ። (aiōn g165)

2 ጎርታ ሜላነ ዱባ፤ ሶባኖ ዱባ፤ ኢፍሳዳኖ፤ ቃናተ፤ ማሞስት ሀም ዱባ ትራ፤ **2** ፋይናክሰኒ ጂናይን፤ ግዳ ካአላተሮ ይትት አን አሙጭመን አእያና ኤኖ ሀልቻ። **3** “ጎታ ካአዳንክ ላኖ አዴሰታን።” **4** አባዶ ዶሌ ካቱፋመ፤ ዋይ ዶሌ አደ ካአሳባመና ካካባጃመ ካሌሮ አርዶክ ኤኤሞ ቶሰ ጋባላማ፤ **5** እሰና አድ፤ የሱሳ ክርሰቶሳኮክ ጋራነ ዋ ካገጌላይሰሮ ካአያና ጃርሶ ጎጎሰሳኑን፤ ቁሉክ ቱቃሞል ሊን አርዶክ ኤኤሞል አን ካአያና ምን ሊን ማዳራማታን። **6** ማጻፋ ቁሉክ፤ “ሂክማ! “ካአሳባመ ካካባጃመና ምና አፋሩን መተ ካሌሮ ኤኤሞ ጽዮኒ ካይናራ፤ ኡሱ ካአማናራ ላኮሙላሮ ካአማራ ሃፋራ ጻፋመ ግራ።” **7** ጎርታ እሰን አአማናታኑን ሂክ ኤኤሞ ካካባጃመያ፤ አአማኖቱን አደ፤ “አግንባራን ቱፋተሬን ካሻፈራን ኤኤሞ ምና አፋሩን መተ ሌ።” **8** አደና፤ “አባዶ ካሀንዱዱፍሳሮና ካሉጉዳሮ ኤኤሞ ሌ፤ አሀንዱዱፋታራና ሃፋራን አጃጃማና ዋትታ፤ ካኮንካመራና ሂካኑንያ።” **9** እሰን አዴን ሙጉድኮ ካሳድሰሮ ኢፋ ቶሰ እሰን ካኤመሮ ኦአቲ ፈሎ ኦዋ ጎጎአዋጅታኑን ታአሳባንተ አላታንታን፤ ካዋኖ ቱቃሞል ቁሉክ ጎሳ ዋ ኡሱን ካዋዩይሳተሮ ጎሳታን። **10** እሰን ጣይተን ኡናቴሳ ላኮቴን፤ ግዳ አዴን ጎሳ ካዋታን፤ ጣይተን ሻጋ ላኮሄላቴተን ግዳ አዴን ሻጋ

ሄላቱታን። **11** ኦጌላታሮኦቲ! ሂካ አላም ማርትና ኡል ካካለክ እባዶ ማንኮሌተን ማራን ኔፎ ባሰን ጀሬን ካሻፋታሮ ሀልቻ ካሶየኮ ጎጎፋክአንታውን ኤባታራ። **12** ማምሲና ሜላን ኦፈላታን ኣን የልሬን እሰን ጎህማቴና ኡሱ ፊርዳን ካኮኤመተ ጎራታ ፈሎኦትሰን ኦኢዳን ዲጉረን ዋ ጎጎካባጅራኑን፤ አይዛብ ኦሮ ግር ካአዳን ግራ። **13** ጎታውን አማዴን ኦዶናቲ ኦባሪሳራን ዱባን አጃጃማ፤ ኦዶናት ኦአባን ማንኮሌን ማራን ዋኖን ጎሌና፤ **14** ጎርቱን ፈሎ ኦሜላን ኦፈላራን ሙርሰን፤ ፈሎ ኦኢዳን ኦፈላራን ጋላቲን ዋኖ ኦፋረሮ ሞትጆሉን አጃጃማ፤ **15** ኣላንቲና፤ ታኢዳን ፈላኖ ካካሶቱን ላኦ ካላይክ እየሰ ጎጎጫልኢሳኑን ፈኢ ታዋታ። **16** ዋወን ካሀንዳሮ እባዶ ኣን ላዴን ባልቹማ ግራ ኳሬ ባልቹማትሰን ሜላን ሆጎግ አሮየልቲን። **17** እባዶ ዱባውን ታዶትሳቶ ካባጃ ሰሳ፤ አቢላል ጌላየን፤ ዋና አብሳየን፤ ዋኖና ካባጃ። **18** እሰን ኦሀንዳታን! ጎቶሌትሰኑን ካባጃይ አጃጃማ፤ ካኮንአጃጃማታና ካኢዳኑና ፋያንካክ ካላሉን አንሌኖን ግራን ሜላን ኦፈላራውኔ ካባጃይ አጃጃማ። **19** ዋ ማራን አመረ ታግፈ ራኮ ካአታታራ እባዶ ጋላታ ሄላታራ። **20** ፈሎ ኦሜላን ፈልጉዴን ጎሙርሳንቴንና ጎኦብሰቴን ጋላታ ካሜ አብታን? እየሱን ጎአመን ፈሎ ኦኢዳን ፈልጉዴን ራኮ ጎአታቴና ጎኦብሰቴን ሂካኒ ዋይ ዶሌ ጋላታ ሄላይናታን። **21** ካኮንአማንቴታን ሂካኑንያ፤ ኣላንቲና ክርሰቶሳ እሰን ማራን ራኮ ካኮአታተራ ራኬሳ ጎጎሰሴታኑን ማሱሳ እሰኑን ቱሰን አመረያ። **22** “ኡሱና ጨቦ ላኮፈለሮ፤ ህኢቴሳኮና ምጌ ላኮቤተቶ።” **23** ኡሱ ጎህባሬና አባብ ላኮሰሰሮ፤ ራኮ ኡሱ ጎጌተና ላኮማንዴ፤ እየሱን ጎአመን ሩሚ ካፍርዳሮ ሄዶን እሰኦቴሳ ሮርሳተ ሰሳተ። **24** ጨቦን ጎይን ቁሉማ ጎጎግርኖን ኡሱ እሲ ሶኦቴሳይ ጨቦካን ማሰቃሊ ጉት ሰዳተ፤ ሜጋቴሳይ እሰን ፋይቲታን። **25** እሰን ካባየረ እዳድ ኣን ዉርቶዋ ግቲን፤ ግዳ እዴን ኔፎታትሰን ካፎፋሮና ካኦራሮ ቶሰ አባባቲታን።

3 ኡሱማለና እሰን ኦርጃል! ኤንተርጃልክሰኑን አጃጃማ፤ ሂካማሌ ኮኮ ሃፋራ ካዋቱን ካአጃጃማን ጎግረ ሃፋራ ካዋ ካላይ ግር ካኦርይ ቦጃም አባባሮዋ። **2** ህክና ሊን ካኮዳንዳራ ካቁሉየሮና እባዶ ካካባጃሮ ግርክሶ ጎዴራንያ። **3** ኢድታትሰን መተ ሀራታኖይ፤ ዋርቂ ካታኖና፤ ካካባጃመ ሳርሰ ሳርሳታኖይ ሳሬ ካሙታሮ ኢሳዱን አሮሌኖ። **4** እየሱን ጎአመን ኢሳድክሰን ዋይ ሆረ ኣሎ ታካባጃንተ ላኦ፤ ፋያንካና ካእሰል እያና ካአቦ፤ ማጎሬና ካባኖን፤ ካኦሮ ማር

ካኢደ ሀሌዎ። 5 ሆርኮሰኮ አብድትሶ ዋ ጉት ካካተራ፡ ቁሉክ ሄለል ካኮኢሳዳረ
 ሂካ ጋራየ፤ ኤንተርጃሉና አጀጃማ ግረ። 6 ኡሱማሌ ሳራና አብራመ “ጎታኬ”
 አማ አጀጃማ ግቱ፤ እሰና ኮና አንአብሳኖን ኢዳነ ጎፈልቴን ይሰክሰታን። 7 እሰን
 ኤንተርጃል፤ አዳ. ኤብክሰን ጎንሀንዱዱፋኖንኮ ግርክሰን ዱባ ኦርጃልክሰን
 ቆፓ፤ ላፋኒዕ ማንኮሌን ማራን ግርኮኒዕ ሶማና እሰኔ ዋታ ማንኮኤልናራን
 ማራን ካባጃ። 8 ጎርታ ዱባና ቆፋ ቶይ እስከታ፤ እስከሰ ሻዳ፤ አቢላል ኣን
 እስከሲጌላየን፤ ካነኤይሳታሮና ካእንጅራታሮ ላ። 9 ሜላነ ሜላነ ጎርቱን ሀባር
 ሀባር አሮአባብቴን፤ ሂካኮት ባንኤ ሶማሳየን፤ ኣላንቲና እሰን ካኡማንተታን ሂካ
 ፈላኖይ ሶማ ሄላይንያ። 10 ማጻፋ ቁሉክ፡ “ግር ካጌላታራና አሪ ታኢዳን ድን
 ካዶታታራ፡ ኤፊብኬሳና እየሰ ካሜላን ጎንአዬሶንኮ፡ ሀኢቲሳ ምጌ ጎንአዬሶንኮ
 ሀኢልሶ። 11 እየሰ ካሜላንኮ 4ክ ሀኢሞ፤ ፈሎ ኦኢዳን ሀፈሎ። ኖንዳና
 ሀዶታቶ፤ ካኖንዳ ራዲና ሀሰሴቶ፤ 12 ኣላንቲና ኢልኦ ኦዋ ቁሎለ ቶሰ ድያራን፤
 ነበቦኦቲሳና ኤብክሶ ማልን ኦባናሜንያን፤ ታጎታ በቤዲ አደ ፈሎ ኦሜላን
 ኦፈላራን ጉት ግታ” አማራ። 13 ፈሎ ኦኢዳን ፈልን ጎክታቴን ሚራኣ እሰን
 ካጌግሰራ እየያ? 14 ፈሎ ኦኢዳን ፈላኖይ ራኮ ጎክታቴና አድ ሶማ ሄላታንዋ፤
 ማንዳኖ ካእባዶ አሮአብሳቴን፤ አሮያዴን። 15 ክርሰቶሳ ዋዳናትሰኒ ካባጃ፤
 እሰኒ ታግቶ አብድ እሰን ካሆሳታሮ ዱባዉን አባብ ሰሰን አርጌቶ ካኤካሳቴን
 ላ። 16 አባብክሰን ኢዳነይና ካባጃይ ሀሌዎ፤ እሰን ካክርሰቶሳ ላኖይ ታክብታን
 ታኢዳን ያዳሊ ጉት ታሜላን ካኤሳራ እባዶ ካሜላን አዬሰኬሳ ጎንሙልሮን
 ታኢዳን ሳሙ እሰኑን ሀግርቶ። 17 ፈኢ ታዋ ሃ ጎሌተ፤ እሰን ካሜላን እየሰ
 ፈላኖይ ራኮ ካክታታንኮ ካኢዳን እየሰ ፈልጉዴን ራኮ ጎክታቴን ካኢዳንክያ። 18
 ክርሰቶሳ እሲ ኖ ዋ ቶሰ ጋባሊን ኡሱ ቁሉክ ሌ ግራን ቁሉማ ካላይኒዕ ኖን
 ጨቦካንኮት ኣላንቲ ታኮዳሞት ኮክ ራኮ አታተረ ጎየራ፤ ኡሱ ሶይ ጎየራ፤ እያናይ
 አደ አርዶክ ሌራ። 19 ሀሱ እያና ሴተጉረ ምን ካሻኖ ካግሮ አባዶን ላላበ። 20
 ሂክ ምን ካሻኖ ካግረ እያናጃል ጣየ ካኖሄ ጌሲ ማርካፋ ጎማዳራማረ ዋ ኦብሲ
 እሶ ኦራ ግራን ላኮአጃጃምኖ ኦአመረንያን። ኡሱ ማርካፋ ኦሮ ታበረ በከኮ
 ካሄሰረ እባዶ ቶቶይ ሰዴድ ካላልየ። 21 ሂኒዕ በከ ግዳ ካጥንቃታ ማሱሳ
 ሌንጉሬን ፋይሳራን፤ ሂክ ጥንቃታ ታማረ ጦርቀ ኬሳኖ አሌኖን ግራን ሙጭ
 ታኣንተ ሳሙ ታኢዳንኮ ዋ ቶሰ ካገያሮ ኤብያ፤ እሰን ካፋይሰናራና ጎይኮ ክያኖ

ካየሱሳ ክርስቶስክ ጋራነያ፤ **22** ኡሱና ዳሩር ቶስ ቤጉረ ዋ ኦዶኮት መርጌይ ግራ፤ ኤርግቻል ኦዶናትና ሁናጆል ኡሱ ሄገሊ ኢምናሜን ባራራ።

4 ጎርታ ክርስቶስ ሶይ ራኮ ማንኮኦታተሮ ማራን እስና ሂካ እዬሲ ሙዋየንጉደነ ክያ፤ አላንቲና ሶኦቴሳ ራኮ ካኦታታራ እባዶ ጨቦ ፈላኖ ኢሰራ። **2** ሂካኮ ካከይ ጎርታ ካሄሰናሮ ግር ካኡሌቱን ፈኢ ታዋክ ማለ ኳሬ ፈኢ ታሶየት ላኮግራሮ። **3** አይዛብ ጌላተረ ጎጎየላታሮ ማለ ራራጋታኖ፤ ሀልቻ ካሶየ፤ ሴታኖ፤ ዱዱራኖ፤ አካማሌ ጣማኖ፤ ኦሜላን ፈሎ ኦዱርሳ ካሰሰቲታን ካርረራ ጌስ ሌራ። **4** ሂካ ኣንክክ ካዳርኣመ ግሪ እሶነ ዎታ ማንኮትያናዋተን ማራን እሶን ማርት ለረ ሳዳ እሶ ሀባራራን። **5** አየሱን ጎአመን ኔፎነ ኦግራወና ኦጎየራን ጉት ፍርድን ካኤካሳተሮ ኡሱን አባብ ሰሰናራን። **6** ካጎየሮና አንሄሶቲ ዎንጋላ ካኮንላላባመራ ህታ አላንቲንያ። ሂካማሌ ሶኦትሶይ እባዶ ኣን ፍርዳምናራን፤ አያናክሶይ ጎአመን ዋ ካኮግሮ ግር ማለ ግርናራን። **7** ጎርታ አየሰ ዱባኮት ጋቾ ጋባላንተታ፤ አታይ ኤባይን ጎጎዳንዴታኑን ሳሙ እሰኑን ሀግርቶ፤ ልክ ግራ። **8** ጌላንጀ ጨቦ ካዎጋን ማንኮጎልሳቶ ማራን ዱባንኮ ሮርሳዴን እሰ እሰኦሮ አሎ ጌላየን። **9** ሀጉንጉምኖን እሰእሰኦሮ ማርት ኣን እሰ ቆጶጭን። **10** ካለካለት ሰኖ ታዋኮክ እላቦል አብዳማኖና ኦዶናቲ ባሪሳኖይ እሰኑን መተመቲ ካሰሳመሮ ካሰኖ እላቦሊ ካካለቱን ሀሃንዳዎ። **11** እሰንኮ ማኖና ካእዬሳራ ጎግረ፤ ሃፋራ ካዋ ማለ ሀእዬሶ፤ ካሃንዳራ ጎግረና፤ ዋ ካሰሳሮ ሁና ሀሃንዳዎ፤ ህክና ዋ የሱሳ ክርስቶስክ ጋራን ጎጎካባጃምሮንያ፤ ካባጃና ሁናና ኡሱን ጅሩ ጅሮማን ሀሌዎ ሀሚኒዕ። (aiōn g165) **12** ኦጌላታሮ ኦቴ! ኤለን ኣን ታጫፋቶ ራኮ ኦሮ ጎግቲን ካእዴሳምን ማርትክ አየሰ ካጌሮ ኣን የላይዴን አርሳዴን፤ **13** ሂካኮ ታክርስቶሳ ካባጃ ካኮሙተ ጎራታ አሎ ጎጎገጌላታኑን ራኮቴሳ ካኮኦታቲታንክ ጅልባይ ገጌላየን። **14** መገ ካክርስቶሳ ማራን ጎሀባራንቲን ካካባጃ አያና ካሌራ አያና ካዋ እሰን ጉት ማንኮዳገሮ ማራን ኦሶማሳንቲታን። **15** እሰንኮ ማኖና ራኮ ካኦታታራ ጎግረ፤ ኔፎ ካላጋዳሮ ጎርቱን ካሄታሮ ጎርቱን ካባሳሮ ጎርቱን አየሰ ካእባዶ ጠኤ ካታባሮ ልጉረ ራኮ እሮኦታኖ። **16** ዋ ካእማናሮ ላኖይ ራኮ ጎጌተና አደ ሂካ መገ ማራን ዋ ሀጋላቶ ኳሬ አሮሙልኖ። **17** ፍርዳ ምን ካዋኮ ኪረ ካኮሀጋኦብናራ ጎራታ ጌራ። ጎርታ ፍርዳ ካኮሀጋኦብናራ ኖ ጉት ጎሌ ዎንጋላ ካዋቱን ካእጃጃምን እባዶኮት ጋቾ ምስ ልናታ? **18** ማጻፋ ቁሉክ፤ “ቁሉክ

እባዶ ፋይን ካዳንዳራ ራኮይ ጎሌ፥ ዋ ካሄደይሳኖን እባዶ ምስ ሊን ግራ?”
እማራ። **19** ሃኑን ፈኢ ታዋ ማለ ራኮ ካእታታራ እባዶ እስክቲሳ ካመጠሮን
ሀዳራ ሰሳይረ ካእዳንክ እየስ ፈላናኮ ሃር አሮጋሎ።

5 ጎርታ እሶነ ዋታ ራቶ ምን ካዋክ ጃርሳ ካሌራ አን፥ ታክርስቶሳ ራኮውን
አቶ ካሌራ ኡሱማለና ሆረንባውን ሙትን ታግቶ ካባጃ ካእታይናራ፥ እስን
ኦሮ ታግቶ ምን ካዋኮት ጃርሶለ ጎርሰናራ። **2** ሀዳራ እስክን ታሰሳንተቶ ማተ
ታዋ ኦራ፥ ካፎፋታን ሁና እንሌኖን ግራን ዋ ጎጎዶታሮክ ማለ ፈኢ ሀሌዎ፤
ማራጋዴን ጋጺጋጸኖ አሌኖን ግራን ሀንዳይን ካእብታን ሀልቻ ማለ ሀሌዎ። **3**
ኡሱማለና ኦዶናትክስን ሄገሊ ኦግራን ሞይ ባርሳኖ አሌኖን ግራን ማቴውን
ማሱሳ ካእዳን ቱሳ ሀሌዎ። **4** ሂካ ጎፈልቲን ካእዳሳመ ኦዶ ፎፌ ካኮኤማተ
ጎራታ ካባኖን ካካባጃመ ካላቻ አታይናታን። **5** ኡሱማለና እስን ካእማል!
ጃርሶለውን አጃጃማ፤ ዱባና ኢዳነ ሳርስ አን ሳርሳየንጉዴን ኮ ካካለቲን ሀንዳ፤
“ዋ ኮራማሳክ ዲዳራ ካእዳንክን አደ ሰኖ ሰሳራ” አማመ ጸፋመራ። **6** ጎርታ
ኡሱ ጎራታኬሳይ ጎጎጠቂስሮን ታኦቲ ገነ ታዋኮ ሄገሌ እስክትስን የራሳዬን። **7**
ኡሱና እስክን ማንኩሻዳሮ ማራን እስን ካጫናቅሳሮ ዱባ ኡሱ ጉት ካየን።
8 ጅልባይ ግራ፥ ናባዳ! ዲናክስን ዱርሳ ካኤኔግሮ ዶታ ካሀርቃሮ ሉባን አን
ጎቦቢክስኒ ማራሙራራ። **9** አላም ዱባይ ታግታ አቢላልትስን ህታ ኣንትት
ራኮ ካእታይናቶ አዳሳይን አማኖ አታዬንዴን ኔባየን። **10** ጎራታ ክጫሩን ራኮ
ካኮእታቲን ጎራታ ክርስቶሳይ ጅሩ ጅሮማት ካባጃ ቶስ እስን ካኡማተራ ሰኖ
ዱባኮክ ሄዶ ኡሱ እስክን ታእታቲታን ራኮኮ ሃሰናራ፤ እስክሰናራ፤ አታይሰናራ፤
ጣቢሰናራ። (aiōnios g166) **11** ጅሩ ጅሮማን ሁናና ኡሱን ሀሌዎ! ሀሚኒዕ።
(aiōn g165) **12** ዋ ካእማናሮ ካእብዳማሮ አብያ አመ አን ካሄዳሮ ጋራ ካሰላሰነ
ሂካ ሀንዳ ጋባቢና እስክን ጸፈራ፤ ካኮንጸፈራና እስክን ጎርሰና ህት ሰኖ ታዋ
ታሩም ላኖ እስክን ሰግን አመረያ፤ ሃንሱን ህታ ሰኖ ታዋይ አታዬን አላ። **13** እስክን
አን ካእሳባመራ ባቢሎን ካግራ ምን ካዋ ኖጎዳ እስክን ፋራማራ፤ ኡሱማለና
አማኖ ኤረኬ ካሌራ ማርቆሳ ኖጎዳ እስክን ፋራማራ። **14** ዋ ካእማናሮ እባዶኮት
ጌላንጄ እስክስ አንጋታ ኖጎዳ አታ። ኦክርስቶሳ ኦሌቴታን እስክን ዱባን ኖጎዳ
እስክን ሀሌቶ።

2 ጴጢሮሳ

1 የሱሳ ክርስቶሳን ካህንዳሮና ካፋራመሮ ሰሞና ካእማመሮ ጴጢሮሳ፡
ሄዶካንና ዶብካን የሱሳ ክርስቶሳኮ ታሄላማቶ ቁሉማኮክ ጋራነ ኖ ካሄላነኖ
እማኖ እን ካካባጀመሮ እማኖ እሄላቴታኑን፤ **2** ዋና ጎታካን የሱሳ ማንኮአዴሴን
ማራን ሰኖና ኖጎዳ እስኑን ሀጂናቶ። **3** ካባጃቴሳይና ኢዳነቴሳ ኖ ካኡመሮ
ኡሱ አዳሳደይ ዋኖናትኮክ ሁናኬሳ ግርወና ዋ ሄዶይሳዪን ኖን ካዶትሳሮ ዱባ
ሰሰራ። **4** ካሜላን ሀልቻኮ ካከይ አላም ኦግራን ፈሎ ኦሜላንኮክ ግርኮ
ፋላዳይዴን ዋኖናትኬሳኮት ያዳሊ እሄዴዳማታን ጎጎሌታኑን ሂካ እዬሰኮክ
ጋራይ አሎ ታንጂንትና ካባጃ ታሌተቶ አብድ ኖን ሰሰራ። **5** ህታ አላንቲ
ካእማጋመ አታኒ እማኖ ጉት ኢዳነ አዳይን አጻማ፤ ኢዳነ ጉት ማላባኖ፤ **6**
ማላባኖ ጉት እስዳንዳኖ፤ እስዳንዳኖ ጉት አታታኖ፤ አታታኖ ጉት ዋ አን ላኖ፤ **7**
ዋ አን ላኖ ጉት ታኡብንቴይ እስ ሻዳኖ፤ ታኡብንቴ እስ ሻዳኖ ጉት ጌላንጀ አዳ።
8 ህት ያዳሊ እማጋም እስኑን ግቴዋ ጎታካካን የሱሳ ክርስቶሳ ማላቢን ፈሎ
ካላይክ ኢል ካላይክ ጎጎሌኖንኮ እስን ኦራንዋ። **9** ሂካ እየሰ ካላይክ ጎእመን
ፋክመ ካግሮ እየሰ ድን ካዳንዴኖን ጎርቱን ጀማያ። ጣየ ጨቦኮ ካሙጭመሮና
ኢሎተራ። **10** ሃንሱን አቢላልቴ፤ ኡማማኖክሰና አሳባማኖክሰን አታይሳዪን
ካጣዋኮ ሮራ አታዬን፤ ሂካ ጎፈልቴን ዱዶ ላኮህንዱዱፋታን። **11** ሂካ ጋራይ
ጎታካካንና ካፋይሳሮ የሱሳ ክርስቶሳ ቶስ ጅሩ ጅሮማክ ዋኖናቲ ታብን ፈኢ
እስኑን ሰሳምናታ። (aiōnios g166) **12** ሃንሱን ማምሲና ዱዶ እስን ሂካ እየሰ
ጎማላብተና ታአባቴታን ሩሚ ጎአታቴና፤ ሂካ እዬሰኮክ ጋራ አርጌቶ እን እስን
ሻድሳናኮ ዶና ላኮልናሮ። **13** ሂካ ኡሊ ኔፎን ግራን እስን ሻድሳ ከኬሳኖክ ኢን
ልክ አን ሌ ሙታራ። **14** አላንቲና ጎታካን የሱሳ ክርስቶሳ ኢን ጎጎቱሰሮ ሂካ
ካኡሌ ግርኮ ሳሜ. ጎይጉረ ካብናሮ ካሶዋ፤ **15** አን ግዳ ካኮን ዳፋራራ እን
ጎይረ እስንኮ ጎፋክመና አደ ሂካ እየሰ አርጌቶ እስን ጎጎሻዳኑንያ። **16** ጎታካን
የሱሳ ክርስቶሳኮክ ሁናና ኤሜቶቴሳኮክ እስኑን ካሰግነኔ ጋሻናኬሳ ኢልኦ
ኦታኒ ዴነኔያ ኳሬ፤ ቃሩማ ታአባዶይ ታመዳንተቶ ማማ ማልነነ ላኮዮ። **17**
አላንቲና ታኦቲ ካባጃቴሳይ፤ “ኡሱይ እን ካኮገገላታራና ካጌላታራ ኤረክ ሂካያ”
ታእማታ ያየ ኡሱን ካኮኤሜተ ጎራታ ዋ አቦኬሳኮ ካባጃና ጋሻናና አታተራ፤ **18** ኖ
መተካኑን ኡሱን ዋታ ቁሉት ዋዳሚ ታኮግኔ ህት ያየ ዳሩርኮ ኤመታኖ ማልነና።

19 ጎርታ ኦሃንጮል ካእዬሰራን ሃፋራ ኣሎ ኖን አዳሳመራ፤ ሃንሱን ታሙጉድ ባንኤ ካግሮ ኮሮንታን ክንትቢ አብቴን ጎንድያታኒ ኦሃንጮል ካእዬሰራኑና ክንትብ ሰሳ፤ ሂካና ካኮንየልናታን ኡል ታባርሮና ካባባርሴ ባካላ ዋዳናትሰኒ ታህንቃይሮያ። 20 ዱባንኮ ጣይ ሂካ ማላቢን አሰኑን ዶትሳራ፤ ማጻፋ ቁሉክ ካግሮ ካሃንጮክ ሃፋራ ዱባ ማዮና ፈኢቴሳይ ካፋራሮ ላኮዮ። 21 ማምሰኒዕ ሃንጮና ፈኢ ታአባዶቲ ዱዶ ላኮኤሜተራን፤ አየሱን ጎአመን ሃንጮ፤ አያና ቁሉክ ካሰሴታራ አባዶ ዋኮ አታተረ ካእዬሰሮያ።

2 አየሱን ጎአመን ካጣራ ካሃንጮል ጎሳ ኦሮ ጎጎግሬ ኡሱማሌ አሰን ኦሮ ጣራ ካአጋልሰሳራ ክናራ፤ እሶ ካዋዳተሮ ጎታ ካካተሬን ባሰ ካግሰሮ ካጣራ አጋልሰሰ ሄቶ ታብሳራን፤ ሂካኒና አሰኦትሶ ጉት ደራክ ባይ ኬናታራን። 2 ካሞጋን አባዶ ኦሙልሰራን ፈሎኦትሶ ዴበ ሰሴታራ፤ ኣላንቲ ትሶይ ካሩም ራ ሀባራማራ። 3 ሂኒዕ ጣራ ኦአጋልሰሳራን ጋጺጋጸ ታኤካሰና ጅርትቲሶይ እሶ ሳማራን። ሙርትቲሶ ጌሰ ካሞጋንኮ ሀጋአብተደ ኤካተ ግታ፤ ባይና ኦግራን እሶ ኦራታራ። 4 ዋ ጨቦ ካፈለሮ ኤርግቻል እሶን ሀንኤይሳኖን ታንባኖን ኤለን ቶሰ ጎሻፈና ሙጉድ ካሌሮ ቦላክ ጉምቢ ኦሮ ፍርዳን ጎካዩ። (Tartaroō g5020) 5 ቁሉማ ካላላባረ ኖሄ ካካለ አባዶ ቶዶባን ዋታ ሃሰረ ካሆርኮ አላምዉን ሀንኤይሳኖን ጨባለሳል ጉት በክ ኦባይ ጎኬነ። 6 አደና ጨቦ ካፈለሮ አባዶ ዱባን ማሱሳ ጎሳሮን ታሶዶምና ታጋምራ ካታማል ታ ቡሉሎ ሌሮን ጉበጉረ ጎሳባሮን ፍርዴ፤ 7 ሴራ ካሊክ አባዶና ኦሙሊሰራን ፈሎይ አቦሳማ ካግረ ቁሉክ ሎጠ ሃሰ። 8 ሀሱ ቁሉክ አባዶትና እሶ ኦሮ ካኮግሬ አርጌቶ ካደያረና ካማላረ አየሰ ኔፎቴሳ አሪ አሪ ኦሜላን ፈሎኦትሶይ ጎጫናቃንተና። 9 ጎታ ሩሚ ሄዶይሳታ ኦግራን ጫፍትኮ ምሲ ሃሰናሮና ኦሜላን ሙርሳ ታፍርዳ አርዉን ምሲ ኦር አዳላይሰናሮ ካሶዋ። 10 ካካለኮና ሀሱ ባቲክ ሀልቻ ካሶዩ ኦዶታታራና ኦዶናት ካዋ ኦቴፋታራን ፍርዳዉን ኦረ እሶ አዳላይሳራ። ሂኒዕ ጣራ ኦአጋልሰሳራን ጃቡ ኦአባና ኮራሜሳ ማንኮሌን ማራን ታዳሩረ ካባጃል ሀባርና ላኮአብሳታራን። 11 አየሱን ጎአመን ኤርግቻል እሶኮ ሁናይና ኦዶናቲ ኦሮራራን ጎሌና ጎታ ሆረ እሶ ላኮሀራራን። 12 ሂኒዕ ጣራ ኦአጋልሰሳራን ጎአመን ኮና ካካሶን አዬሲ ታቤረን ሀባራናን፤ እሶ አቢና ላጋዲን ጎሳአላቴን፤ አማላክሶ ካላሊ ካሰሴታሮ ሳሙ ካላይክ ግድ አንያን። ግድ ጎሳባሮን እሶና ዱዶ ባይናራን። 13 ሜላንትሶዉን ካዶትሳሮ ሙራ

አታይናራን። አሪ አሪትነ ፍርፍርኅአምራና ገጌሎ አን ቶታታራን፤ አሞ ጉት ግራን
 ሙላ ካላይኒዕና ባቲኒዕ ሌንጉሬን እስኔ ዎታ ካጌላንጃ አሞን ሀማጸራን። **14**
 እልኦ ኦትሶ ሻርሙጡማ ኦአማጋሜራን ማንኩሌን ማራን ጨቦ ፈላናኮ እስ
 ላኮቁሳታራን፤ አማኖ አታይ እልኖን ካግሮ አባዶ ሶባራን፤ ሶባኖ ታኦጋልሳተቶ
 ዎዳና አባን፤ እሶ ኦቃንጋሜንያን! **15** ቱኩልክ ራ ኢሴንጉሬን፤ ፈሎ ኦሜላንኮት
 ሙራ ካጌላታሮ ኤረ ካብኦርክ ካባላአም ራድ ሰተንጉረን ሽርመራን። **16** ባላም
 ኅአመን ጨቦ ማራን ሙርሳመራ፤ እየሰ ታካሶን ደሜርትት ህኢ ታእባዶይ አዬሰረ
 ካሄገሮት ኦፈለሮ ቆላማኒዕ ፈሎ ኔባተ። **17** ሂክ አባዶ ካኦንጋገሮ ካበከ ፋልቶና
 ኢርጋዶ ካዎዳማሮ ዱማንቻልያን፤ እሶ ካኦራታራና ጢልንጋክ ሙጉድያ። **18**
 ካማድኖን እየሰ ጢንጢራ ሽሬና ኦባራራን ኦሮኮ ፋላዳቲነ ኦኤሜተራን አባዶጃ
 ካሻርሙጡማ ሶኮክ ሀልቻይ ሶሶቤረን ሽርሳራን። **19** እሶ መተክሶውን ጨቦን
 ድይ ሌን ግራን፤ ኦካላኔ እስን “ባልቹማ ብናታን” አማ አብድ ሰሳራን፤ አባዶ
 ካኮንኢምናመሮ ሀሱ እየሱን ድይያ። **20** ጎታካንና ካፋይሳሮካን የሱሳ ክርሰቶሳ
 ማላባኖይ ኦአላም ባቲኒዕ ፈሎኮ ብጉሬን አባባይ ኅአዎዳሜን ካሆሬ ግርክሶኮ
 ካሃረ ግርክሶ ካሜላን ልናራ። **21** ካቁሉማ ራ ማላብጉሬን እሶን ካሰሳመሮ
 ካቁሉማ አጃጃኮ ሃር ካአባባታራንኮ፤ ጣይ ካቁሉማ ራ ሀአዳሶን ሄሴንዎ
 ኢዳረ። **22** “ከር ድድጎኦቲሳ ቶሰ አባባይናራ” ኡሱማሌ “ቦዬ ማር ኅአልተና
 አባባተ ጫዉዶ ጉት ጋንጋላታ” ካአማራ ካሩም ማሱሳ እሶ ጌራ።

3 ኦጌላታሮ ኦቲ! ሂክ ግዳ እን እስኩን ካጻፋራ ካላም ሀንዳያ። ሀንዳ ላማ
 ዱባና ካኮንጸፈራ ቱኩልት ዎዳናትሰን ኅኅከከሳታኑን ሻድሲንያ፤ **2** ሂታኮ ሆረን
 ቁሉክ ካሄገሮይ ካሰጋመረ ሃፋራ ኡሱማለና ኦፋራሜራኮክ ጋራን ጎታካንክና
 ካፋይሳሮካንኮክ አጃጃ ጎሳሻዳኑንያ። **3** ዱባንኮና ጣይ ሂካ ማላብ፤ ካጋቾ
 ጌሲ ሀልቻ ካሜላን ካክሶ ኦፈላታራን ኦቃጭፋታራን ኤሜይናራን። **4** እሶና፤
 “ጎታ የሱሳ ኤመይናራ አማመ አብድ ላ ሰሳንተ ግቲላ? ሀያ ሀጌ ግራ? ካሆሬ
 ኦዶጃላልካን ታኮሳየራንኮ ሀጋአበረ ካመን ዱባ መጣ ታሆራርጃኮ ሀጋአበረ
 ኅኅግሬዎያ” አማራን። **5** እየሱን ኅአመን ሂክ አባዶ ሆርኮሰኮ ካዬረን ዳሩር
 ሃፋራ ካዎይ መጣም ግራኖ፤ ኡልና በከ ጠኤይና በከይ ጉት ካመጣመሮ ላኖ
 ካካታራን። **6** ሀሱ ጎራታ ካግረ አላም ዱባ በከ ኤኔጋመ ባየ። **7** ሀሱ ሃፋራዎ
 አደ ግዳ ኦግራን ዳሩርና ኡልና፤ ጨባልዬል ታ ባራን ታሙርት አሪ ታጌቶ ኤሌኑን

ኦራምሬን አዳላይናራን። 8 ኦጌላታሮ ኦቴ፡ ዋይ ዶሌ አሪ ቶ ጌሰ ኩማ ኣን፡ ጌሰ ኩማና አሪ ቶ ኣን ላኖ ሂካ እየሰ አሮኢሎቴን። 9 አባዶ ኮኮውን ካአዳላተሮ ኣን ጎሳላሮ ጎታ ካአብዲ ሃፋራ ፈሎይ ሀይሲን ላኮአዳላይናሮ፤ አየሱን ጎአመን ማዮና ጎሳባኖንኮ ዶተረ፤ ዱባና ጉላ ጎሳጋሎ እሰን ማራን ኦብሳራ። 10 አሪ ታጎታ ሄቶ ኣን ኤመይናታ። ሀሴ አሪ ዳሩርጃል ያየ ታአቲይ ሮርናታ፤ መጣና ኤለኒ ጉባይ ባይናታ። ኡልና ኡል ጉት ታግታ መጣ ዱባና ጉባይናታ። 11 ጎርታ ካአመን ዱባ ሂካ ጋራይ ካባሮ ጎሌ፡ እሰን ምስክ አባዶ ሊን ዶትሳራ? እ፡ ቁሉማና ካሩም እያናይ ግርን ዶትሳራ፤ 12 እደና አሪ ታዋ ኦራታ ኤመቶቴሳ ጀጃርሰን ዶትሳራ። ሀሴ አሪ ዳሩርጃል ኤለኒ ጉባይደ ባይናታ፤ ታዳሩረ መጣና ካአቲ ጉባ ጉባይደ ጫክናታ። 13 ኖ ጎአመን ቁሉማ ታኮግቶ ታኡሱብት ዳሩርና ካኡሱብክ ኡል ካአብዲ ሃፋራክ ማለ ኦራታና። 14 ሃኑን ኦጌላታሮ ኦቴ፡ ሂካ እየሰ ዱባ ካኦርታን ማንኮሌተን ማራን፤ ህሎ ካሊ፡ ቱፍ ካሊ ጎታን ሀሴ አሪ እሰን ኖጎዳ ጎሳሄሎን አታዬን። 15 ጎታካንት ኦብሰ እሰኑን ፋይና ላኖ አዳሳ፡ ኡሱማለና አብካን ጳውሎሳ ኡሱን ታሰሳንተቶ ቃሩማክ ማለ እሰኑን ጳፈራ። 16 ኡሱ ሂካ አዬሰኮክ ጋራ ሀንዳልኬሳ ዱባይ ጳፈራ። ሀንዳኬሳ ኦሮ ኤነ አዳሰን ካጥባራ እየሰ ካሞጋን ግራ። ማላባኖ ኦኮንሀንቃተራና አታን ካላይኒዕ አባዶጃ ካካለ ቁሉክ ማጻፋጃል ጎሳዎጫጫራን፡ ካጳውሎሳ ሀንዳልና አደን ባሰክሶ ማራን ዎጫጫታራን። 17 ጎርታ ኦጌላታሮ ኦቴ፡ ሂካ ጣይተን ማንኮአዴሴን ማራን፡ አታቴነ ካኮአልተታን ኡኩምኮ ሜላነኮክ ሸርማኖይ ሶባምዴን ጎሳኢኖንኮ እሰኦራዬን። 18 አየሱን ጎአመን ጎታካንና ካፋይሳሮካን የሱሳ ክርሰቶሳይ ሰኖይና ኡሱ ማላባኖይ ጂናዬን። ኡሱን ግዳና፡ ጅሩ ጅሮማን ካባጃ ሀሌቶ! ሀሚኒዕ።

(aiōn g165)

1 ያንሳ

1 ሃፋራ ካግርኮክ ጋራ ሆራርጀዋ ካግረ፤ ካማልነኖ፤ ኢልኦ ኦታኒ ካዳነኖ እንዴ ትችንሰ ካዳነኖ ገነኦታንና ካድኔራን አዬሰናና። **2** ሂክ ግር ሙተራ፤ ኖና ዴነና፤ እስኩን አቶትናና። ኦዶ ዶሌ ካግረና፤ ኖና ካሙተሮ ጅሩ ጅሮማክ ግር እስኩን ሰግናና። (aiōnios g166) **3** እስና ኖኔ ዋታ ራቶናት ጎጎግሮ ካዳነኖና ካማልነኖ እስኩን ሰግናና። ራቶናትካን ኦዶነና፤ ኤረ የሱሳ ክርስቶሳን ዋታያ። **4** ገጌሎኦታን ልክኒዕ ጎጎሌራኩን ሂካ እን እስኩን ጻፍናራ። **5** ኡሱኮ ካማልነኖ እስኩና ካሰጋና ሀንዳ “ዋ ኢፋያ፤ ሙጉድና ኡሱ ዶሌ ዱዶ ላኮግሮ” ካእማሮያ። **6** ሙጉዱ ሰሴታ ኡሱን ዋታ ራቶናት አብና ጎአምኔ ጣራ አዬሳና፤ ሩምና ላግቶ። **7** አየሱን ጎአመን ዋ መተኬሳ ኢፋይ ጎጎግሮ፤ ኖና ኢፋ ጎሰሴን እስ እስኦሮ ኖ ኮ ላኖ አብና፤ ኡሱማለና ኤረኬሳክ ካየሱሳ ክርስቶሳ ኢግ ጨቦ ዱባኮ ኖ ሙጭእስናራ። **8** ጨቦ ላኮአብኖ ጎአምኔ እስኦታን ሶባታና፤ ሩምና ኖ ኦሮ ላኮግቶ። **9** ጨቦካን ኡሱን ጎሰጋን ጨቦካን ሀሄሶ አምን፤ ሜላን ዱባኮ ሙጭሰን ኡሱ ካአብዳመና ቁሉክያ። **10** ጨቦ ላኮፈልነኖ ጎአምኔ፤ ኡሱ ካጣራ የላና፤ ሃፋራና ኖ ኦሮ ላኮግሮ።

2 ይሰኬ! ሂካ ካኮንጸፈራ እስን ጨቦ ጎጎፈሎንኮ አመረያ፤ አየሱን ጎአመን ማምሰክ እባዶትና ጨቦ ጎፈለ ኦዶ ዶሌ ኖ ዋቢ አብና፤ ኡሱና ካሩም የሱሳ ክርስቶሳያ። **2** ኡሱ ጨቦካን ሻጋ የላራ፤ ጨቦካን ካላል አንሌኖን ግራን አላም ዱባክ ጨቦ ካኮባራ ኡሱያ። **3** አጃጃ ካዋ ካኦራታኖ ጎሌን ኡሱ ካካንሶ ላኖ ሂካኒ አዴሳና። **4** “እን ዋ ካሶዋ” አማ አጃጃኬሳ ካኦራኖን አባዶ ጎግረ ካጣራያ፤ ሩምና ኡሱ ኦሮ ላኮግቶ። **5** አየሱን ጎአመን ሃፋራ ካዋዉን ካአጃጃማራ ዱባ ዋዉን ታአባ ጌላንጀ ታአዴሳንተታ፤ ሩምና ኖ ኡሱን ግራኖ ካኮአዴሳማራ ሂካንያ። **6** ዋይ ግርናራ ካእማራ አባዶ ክርስቶሳ ጎጎግራ ግራኖ ዶትሳራ። **7** ኦኔላንቲታን! ሂክ እስኩን እን ካጸፋራ አጃጃ ሆራርጀዋ ካግረና ካሆርኮ አጃጃያ ኳሬ ካኡሱብክ ላኮዮ፤ ኡሱና ካሆርኮ አጃጃ እስን ካማልቲታን ሃፋራያ። **8** ሀሌዎ ኳሬ ክርስቶሳና ካክሰን ግሪ ዶሌ ሩም ሌ ካሙተሮ ካኡሱብክ አጃጃ እን ጻፍናራ፤ ሙጉድ ባየረ ካሩም ኢፋ ሀንቃ ግራ። **9** “እን እፋ ኦሮ ግራ” አማ አቢኬሳ ካዲዳራ ጋና ሙጉድ ኦሮ ግራ። **10** አቢኬሳ ካጌላታራ ዱባ ኢፋ ግራራ፤ ኡሱ ጉት አባዶ ካሀንዱዱፍሰራ አየሰ ላኮግሮ። **11** አየሱን

ጎአመን አቢኬሳ ካዲዳራ ሙጉዲ ግራራ፤ ሙጉዲና ሰሴታራ፤ ሙጉድና
 ኢልኦ ኦቴሳ ማንኮባሴሮ ማራን ማንኮሴታሮ ላኮካሶ። 12 ይሶ፡ ጨቦክሰን
 መገ ካየሱሳ እስኩን ሀሄሶ ማንኮአማመሮ ማራን እን እስኩን ጻፍናራ። 13
 እስን ኦዶላል፡ ሆራርጀ ካግረ ማንኮማላብቲን ማራን እን እስኩን ጻፍናራ።
 እስን ዴሌልና ዋዳላል፡ ጸላየ ማንኮአዋዴን ማራን እን እስኩን ጻፈራ። 14
 እስን ይሰ፡ ኦዶ ማንኮአዴሴን ማራን እን እስኩን ጻፈራ። እስን ኦዶላል፡ ባርዋ
 ካግረ ማንኮአዴሴን ማራን እን እስኩን ጻፍናራ። እስን ዴሌልና ዋዳላል፡ ኦኦቲ
 ማንኮሊተን ማራን ሃፋራ ካዋ ዋዳናትሰኒ ማንኮግሮ ማራን፡ ጸላየ ማንኮአዋዴን
 ማራን እን እስኩን ጻፈራ። 15 አላም ጎርቱን ካአላም አየሰ ዱባ አሮጌላተን፤
 ማዮና አላም ካጌላታራ ጎግረ፡ ዋ ኦዶኮት ጌላንጀ ኡሱን ላግቶ። 16 ኣላንቲና
 አላም ካግራ ሀልቻ ካሶየ፡ ሀልቻ ካኢሎኦ፡ ባሪሳኖኮክ ዳዳታኖ፡ አላምኮያ ኳሬ
 ዋ ኦዶኮ ላኮዮ። 17 አላምና ሀልቻና ሮራንዋ። ፈኢ ታዋ ካፈላራ አደ ጅሩ
 ጅሮማን ግራራ። (aiōn g165) 18 ይሶ! ህት ታጋቾ ሳቲታ፤ “ክርስቶሳ ካኔባታራ
 ኤመታራ” አማማ ግራን ማልቲታን፤ ሂክማ ግዳዋ ካዋጋን ክርስቶሳ ካኔባታራ
 ኬራ፤ ህታ ኣላንቲ ታጉዳተቶ ሳቲ ላኖ አዳሳና። 19 እሶ ካኮቤራን ኖ ኦሮኮያ።
 ሀሌዎ ኳሬ ባርዋ ኡናታን ላኮዬን። ኡናታን ሊ ግሬንዋ ኖኔ ዋታ አታይ ኣል
 ግራኔን። አየሱን ጎአመን ዱባና ታታን ኡናኮ ላናዋት ጎጎአዳሳምሮ ኖ ኦሮኮ ካለ
 ቤራን። 20 እስን አደ ክርስቶሳ አያና ቁሉክ ሸግደራ። ሃንሱን እስን ዱባና አየሰ
 ዱባ ካሳንዋ። 21 እን ካኮንጻፈራ እስን ሩም ማንኮካሳናዋተን ማራን ላኮዮ፤
 እስን ጎአመን ሩም ካሳንዋ፤ ሩምኮ ጣራ ሄላማናዋቲ ካሳንዋ። 22 ክርስቶሳ
 ላኮዮ አመረ የሱሳ ካካካታሮ ኳሬ ካጣራ አዮያ? ሂክ ኦዶና ኤረና ካካካታራ
 ክርስቶሳ ካኔባታሮያ። 23 ኤረ ካኔባታራ ዱባ ኦዶ ላኮአቦ፤ ኤረ ካአማናራ
 ዱባ ኦዶ አባ። 24 እስን ሆራርጀ ካማልቲታን ዋዳናትሰኒ አታይ ሀግሮ፤ እስን
 ሆራርጀ ካማልቲታን ሃፋራ ዋዳናትሰኒ አታይ ጎግረ ኤረና ኦዶን ዋታ ኮ ላኖ
 እስኩን ግሮዋ። 25 ሀክና ክርስቶሳ ኖን ታሰሰሮ አብዱ ጅሩ ጅሮማክ ግርያ።
 (aiōnios g166) 26 እስን ካሶባሮ አባዶ ማራን እን ሂካ እስኩን ጻፈራ። 27 እስን
 ክርስቶሳኮ ካኦታቲታን አያና እስን ኦሮ ማንኮግሮ ማራን ካካለ ካአጋልሰሰሮ
 እስኩን ላኮዶትሳሮ፤ ኡሱ ካአመን ዱባ እስን አጋልሰሰሮዋ፤ ካአጋልሰሰራና
 ሩምታ ኳሬ ጣራ ላኮቶ። ሃንሱን አያና ቁሉክ እስን ጎጎአጋልሰሰሮን ክርስቶሳ

ግራ። 28 ጎርታ ይሰ! የሱሳ እስኩን ካኮሙት ጎራታ ሀክብሳኖን ጃቡይ ኡሱ ጎጎደኖና ታኮኤማታሮ እሪ ኡሱ ሆረ ኖ ጎጎሙልኖንኮ ኡሱ ግራ፤ 29 ኡሱ ቁሉክ ላኖ ጎክዴሴን ቁሉማ ካፈላራ ዱባ ዋኮ ካኡሙላመሮ ላኖ አዴሳ።

3 ይሰ ካዋ አማም ጎጎኡማምኖን ኦዶ ምስት ጌላንጀ ኖን ሰሰሮ ዲያ! ኦግራን ይሰ ካዋና፤ አላም ዋ ካሳና ማንኮዋቲ ኖና እደ ላኮካሶ። 2 እን ኦጌላታሮኦቲ! ግዳ ይሰ ካዋና፤ ሆረንባቱን ኖ ምስ ልናኖ ጋና ላኮክዴሳመሮ፤ አየሱን ጎአመን ክርስቶሳ ካኮኤማት ጎራታ ታሩም ምዲተሳ ማንኮድናኖ ማራን ኡሱ እን ካልናኖ ኖ ካንሶዋ። 3 ሂክ ካልናሮ ክርስቶሳ አብድ ካየላታራ ዱባ ክርስቶሳ ሙጭ ካአመ ጎጎሌሮ ኡሱና እስኦቲሳ ሙጭሳታራ። 4 ጩቦ አማኖ ሴራ ካዋ ባሳኖ ማንኮሌ ማራን ጩቦ ካፈላራ ዱባ ሴራ ካዋ ባሳራ። 5 ክርስቶሳ ጩቦ ካእባዶ ባሰን ኤማታኖና ኡሱ ጩቦ ካሊክ ላኖ ካሳንዋ። 6 ሃንሱን ክርስቶሳ ያግራ እባዶ ዱባ ጩቦ ፈላ ላኮግራሮ። ጩቦ ካፈላራ እባዶ ዱባ ኡሱ ላኮዴሮ ጎርቱን ላኮማላበሮ። 7 ይሰ! ማኖና እሰን አሮሶቦ፤ ክርስቶሳ ቁሉክ ጎጎሌሮ ቁሉማ ካፈላራ ዱባ ቁሉክያ። 8 ጩቦ ካፈላራ ዱርሳኮያ። አላንቲና ዱርሳ ባርዋ ጩቦ ካፈላሮ። ኤረ ካዋ ካኮኤመተራና ፈሎ ኦዴርሳ ባሰንያ። 9 ዋኮ ካኡሙላመራ ዱባ ጩቦ ፈላ ላኮግራሮ፤ ያዳሊቲሳ ኡሱ ኦሮ ማንኮግቶ ማራና ዋኮ ካኡሙላመሮ ማንኮሌ ማራን ጩቦ ፈልን ላኮዳንዳሮ። 10 ይሰ ካዋና ይሰ ካዱርሳ ካለ ቤን ካኮክዴሳማራን ሂካንያ፤ ቁሉማ ካፈሎን፤ አቢኬሳ ካጌላኖን ዱባ ኤረ ካዋ ላኮኖ። 11 እሰን ሆራርጀ ካማልቲታን ሀንዳ፤ “እስኦሮ እስእስጌላና” ካአማሮያ። 12 ታጸላየ ኡና ካሌረና አቢኬሳ ካላጋዳተሮ ቃየል እን ላኖ ላኮዶትሳሮ፤ ኡሱ አቢኬሳ ሙን ላጋደ? ፈሎኦቲሳ ኦማላን ማንኮሌረና አቢኬሳኒዕ ፈሎ ጎአመን ልክኒዕ ማንኮሌሬን ማራንያ። 13 አቢላልቲ! አላም እሰን ጎዲደ አሮሳዴን። 14 ኖ አቢላልታን ማንኮጌላታኖ ማራን ጎይኮ ግር ቶሰ ካናቅነኖ ካንሶዋ። ጌላንጀ ካላይክ እባዶ ጎይ ኦሮ ግራ። 15 አቢኬሳ ካዲዳራ ዱባ ኔፎ ካላጋደያ፤ ኔፎ ካላጋዳራና ጅሩ ጅሮማክ ግር ካላይክ ላኖ ካሳንዋ። (aiōnios g166) 16 ጌላንጀ ሜቶ ካኮክዴሳና የሱሳ ክርስቶሳ ግርኬሳ ኖን ሮርሳተ ማንኮሰሳተ ማራንያ፤ ኖና ግርካን አቢላልታን ማራን ሮርሳይ ሰሳይን ዶትሳራ። 17 እባዶ ሂካ አላም ዱሩማ አባ ግራን ካራካተሮ ዲጉረ ጎኔኤይሳኖን እን ዋ ጌላታራ አምን ምሲ ዳንዳራ? 18 ይሰ! ጌላንጀታን

ሩምና ፈሎይ ታሙታቶ ኳሬ ሃፋራና እየሰ ካላሊ አሮሌኖ። **19** ሂካኒና ኖ ኦሩሚ ላኖና ዋይ ሆረ አብስ ካላይ አብዳም ጋባላሚን ካዳንዳኖ ላኖ ካንሶዋ። **20** ሂካ ጋራነ ዋዳናታን ኖ ጎዎቃስተና ዋ ዋዳናታንኮ ካሮረያ፤ ኡሱና ካመን ዱባ ካሳ። **21** ኦጌላታሮ ኦተ፥ ዋዳናታን ኖ ካዎቃስኖን ጎሌተ ዋይ ሆረ አብዳማኖ ዱባ ኖን ግሮዋ። **22** አጃጃ ካዋ ካኦራታኖና ኡሱ ካገጌላይሰሮ ማንኮፈላኖ ማራን ካኤባታኖ ዱባ ኡሱኮ ሄላይናና። **23** አጃጃ ካዋ ኤረኬሳክ ካየሱሳ ክርስቶሳ መገ ኖ ጎኦማኖና ክርስቶሳ ኖ ካአጃጃሮክ ማለ እስኦሮ እስእስ ጎጎጌላኖንያ። **24** አጃጃ ካዋ ካኦራታራ ዱባ ዋይ ግራራ፤ ዋና እሶ ግራራ። ዋ ኖ ኦሮ ግራኖ ካኮኦዴሳና ኡሱ ኖን ካስሰሮ አያናይያ።

4 አን ኦጌላታሮኦቲ! አያና ዱባ አሮአማንቴን፤ አየሱን ጎአመን አያናጃል ዋኮ ላኖ ቆቆራ፤ አላንቲና ካሞጋን ካጣራ ካሄገሮል አላም ቶስ ኤመተራ። **2** አያና ካዋ ሂካኒ ማላብናታን፥ የሱሳ ክርስቶሳ አባዶ ል ኤሜታኖኬሳ ካአታታራ አያና ዱባ ዋኮያ። **3** የሱሳ ካአታኖን አያና አደ ዋኮ ላኮኖ፤ ኤመይናራ አማማ እስን ካማልተቴን ክርስቶሳ ካኤባታራ አያና ሂካያ። ግዳና አላም ኦሮ ግራ። **4** ይሶ! እስን ዋኮታን፥ ካጣራ ሄገሮልና አዋዴታን፤ አላንቲና እስን ኦሮ ካግራ አላም ካግሮኮ ሮራራ። **5** እሶ አላምኮያን፤ ሃንሱን እሶ አላም ኣን አዬሳራን፤ አላምና እሶ ማላራ። **6** ኖ ዋኮና፥ ዋ ካማላባራ ኖ ማላራ፥ ዋኮ ካሌኖን አደ ኖ ላኮማላሮ፥ ሂካኒና ካሩም አያናና ካጣራ አያና ማላብናና። **7** ኦጌላታሮ ኦቲ! ጌላንጀ ዋኮ ማንኮሌተ ማራን እስእስኦሮ ኖ እስእስ ጌላኖ፥ ካጌላታራ ዱባ ዋኮ ካኡሙላመሮያ፤ ዋና ካሶዋ። **8** አባዶ ካጌላኖን አደ ዋ ላካሶ፥ አላንቲና ዋ ጌላንጀያ። **9** ዋ ጌላንጀ ኖ ኦሮ ካቱሰራ ሂካማሌያ፥ ኖ ጋራኬሳነ ኔፎ፤ ጎጎግሮኖን ዋ ኤረኬሳ ኮ ሂካ አላም ቶስ ፋረ። **10** ጌላንጀ ህታታ፤ ኖ ዋ ጌላነኔ አንሌኖን ግራን ኡሱ ኖ ጎጎጌላተሮና ጨቦካን ጎጎባሰሮን ኤረኬሳ ፋረ። **11** ኦጌላንተታን! ዋ ሃ ኖ ጎጌላተ፥ ኖና እስ እስኦሮ እስእስ ጌላይን ዶትሳራ። **12** ዋ ካዴራ ማዮና ዱዶ ላግሮ፤ እስ እስኦሮ እስእስ ጎጌላነ አድ ዋ ኖ ኦሮ ግራራ፤ ጌላንጀቴሳና ኖዬን ታአማጋንተ ልናታ። **13** ዋ አያናኬሳ ኖን ማንኮሰሰ ማራን፥ ኖና ኡሱ ግራኖ ኡሱና ኖዬን ካግሮ ላኖ ካንሶዋ። **14** ኦዶ ኤረኬሳ አላም ካፋይሳሮ ጎጎሌሮ ካፋረሮ ኖ ዴና፤ አቶትናና። **15** የሱሳ ኤረ ካዋ ላኖ አማኔረ ካአቶታሮ ዱባ፥ ዋና ኡሱይ ግራራ፤ ኡሱና ዋይ ግራራ። **16** ሃንሱን ዋ ኖን ታአቦ ጌላንጀ ካንሶዋ፤

ጌላንጀቴሳና ኖ አማናና። ዋ ጌላንጀያ፤ ጌላንጀ ካግራ ዋይ ግራራ፤ ዋና ኡሱ ግራራ። 17 ሂካ አላምና ክርስቶስ ኣን ላና። ታፍርዳ አሪ ጃቡ ኖን ጎጎግርቶ፤ ጌላንጀ ኖ ኦሮ ታአማጋንተ ሌተታ። 18 ጌላንጄ አብስ ላግቶ፤ ታአማጋንተ ጌላንጀ እደ አብስ ባሳታ፤ አብስ ሙሮን ዎታ ኢንስ ታአባተቶ ማንኮሌተ ማራን ካአብሳታሮ እባዶኮት ጌላንጀ ታአማጋንተ ላኮቶ። 19 ዋ ጣየ ኖ ጌላተራ፤ ኖና ኡሱ ጌላታና። 20 ማዮና፤ “አን ዋ ጌላታራ” አማ አቢኬሳ ጎዲደ፤ ኡሱ ካጣራያ፤ ካደያሮ አቢኬሳ ካጌላኖን ካዴኖን ግሮ ዋ ጌላይን ላኮዳንዳሮ። 21 ኡሱና፤ “ዋ ካጌላታራ ዱባ አቢኬሳ ጌላይን ዶትሳራ” ካአማሮ ሂካ አጀጃ ኖን ሰሰራ።

5 የሱሳ ኡሱ ክርስቶስ ላኖ ካአማናራ ዱባ ዋኮ ኡሙላመራ፤ ሉዶና ካጌላታራ ዱባ ኤረኬሳና ኡሱማሌዋ ጌላታራ። 2 ዋ ጎጌላና አጀጃኬሳ ጎኡራን ይስ ካዋ ካጌላታኖ ላኖ ሂካኒ አዴሳና። 3 ዋ ጌላታኖ አጀጃኬሳ ኦራታኖ ማንኮሌ ማራንያ፤ አጀጃኬሳና ካእስል ላኮዮ። 4 ኣላንትና ዋኮ ካኡሙላመራ ዱባ አላም አዋዳራ። ኖ አላም ካኮአዎድናናና አማኖካንያ። 5 የሱሳ ኤረ ካዋ ላኖ ካአማናሮ ኳሬ አላም ካአዎድራ አዮያ? 6 በከና ኢግ ካኤመተራ ሂክ፤ የሱሳ ክርስቶሳያ። ኡሱ በከና ኢግ ኳሬ በከ ኦላል ላኮኤማተሮ። ካአቶታራና አያናያ፤ አያናና ሩምያ። 7 ሃንሱን አቶ ሴዶ ግራ። 8 እሶና አያናኬሳ፤ በከና ኢግናያን፤ እሶ ሴዶ እስአታራን። 9 አቶ ካአባዶ ጎአታን፤ አቶ ላኖ ካዋ አደ ሂካኮና ሮራራ፤ ሂክ ኤረኬሳ ማራን ካሰሰሮ አቶናት ካዋያ። 10 ኤረ ካዋይ ካአማናራ ዱባ ዋዳናቴሳይ አቶ አባ፤ ዋ ካአማኖን ዱባ ዋ ኤረኬሳ ማራን ካሰሰሮ አቶናት ማንኮአማኖን ግሮ ማራን ዋ ኡሱ ካጣራ የለራ። 11 አቶናትኬሳና ሂካያ፤ ዋ ጅሩ ጅሮማክ ግር ኖን ሰሰ፤ ሂክ ግርና ካኮግራ ኤረኬሳያ። (aiōnios g166) 12 ኤረ ካዋ ካአባ ግር አባ፤ ኤረ ካዋ ካላይክ አደ ግር ላኮአቦ። 13 ኤረ ካዋኮክ መገ ኦአማናታን እስን፤ ጅሩ ጅሮማክ ግር ካአብታን ላኖ ጎጎማላብታኑን ሂካ እን እስኑን ጻፋራ፤ (aiōnios g166) 14 ዋ ቶስ ጋባላሚን ኖ ታአብና ጃቡ ህታታ፤ ማምስክ አዬንሳ ፈኢቴሳ ማለ ጎኤባነ ኡሱ ማሎዋ፤ 15 ኖ ካኤባታኖ ዱባ ኡሱ ማላኖ ጎአዴንሰ፤ ካኤባነኖ አየሰ ካአታንኖ ላኖ አዴሳና። 16 ማዮና አቢኬሳ ጎይን ካጌግሶን ጨቦ ፈላ ግራን ጎዴ ሀኤባቶ፤ ዋና ጎይን ካጌግሶን ጨቦ ካፈለሮን ግር ሰሳራ። ጎይን ካጌግሳራ ጨቦ ግራ፤ ሂካኮክ ጋራ እደ ሀኤባቶ ላኮአምናሮ።

17 ሜላነ ዱባ ጨቦታ፤ ጎይን ካጌግሶን ጨቦ ግራ። **18** ዋኮ ካኡሙላመራ ዱባ ጨቦ ካፈሎን፤ እየሱን ጎእመን ኤረ ካዋ ማንኮኦራታሮ ማራን፤ ካሜላና ኡሱ ካድኖን ላኖ ካንሶዋ። **19** ኖ ኦዋ ጎጎሌነኖ፤ አላም ዱባና ሜላነ ሄገሊ ካግሮ ካንሶዋ። **20** ኤረ ካዋ ኤሜታኖና፤ ካሩም ካሌሮ ኡሱ ጎጎእዴንሶን ሻዳኖ ኖን ካሰሰሮ ላኖ ካንሶዋ፤ ኖና ካሩም ካሌሮ ኤረኬሳ የሱሳ ክርሰቶሳ አብና። ኡሱ ካሩም ሄዶና ጅሩ ጅሮማክ ግርያ። (aiōnios g166) **21** ይሶ፤ ቶልቻልኮ እስኦትሰን ኦራዬን።

2 ያንሳ

1 ጃርሳት፡ ሩምና ኦቬላታሮ እን ካላል እንሌኖን ሩም እካሳን ዱባ ኦቬላታራን ታኣሳባንተቶ እምኔቱና ይሰክሴውን፡ **2** ህት ሩም ኖ ኦሮ ታግቶና ሆረንባን ጅሩ ጅሮማን ታግርናቶ ሩምኮ ካከይ፡ (aiōn g165) **3** ዋ ኦዶኮና ኤረ የሱሳ ክርሰቶሳኮ ሰኖና ሻጋ፡ ኖጎዳና ሩምና ጌላንጃይ ኖኔ ዋታ ሀሌቶ፡ **4** ይሰካኮ ኮኮ ኦዶኮ ኖን ካሰሳመሮ እጃጃክ ማለ ሩሚ እታቴን ኦሴታራን ማንኮዴ ማራን ኣሎ ገጌላየራ፡ **5** ግዳና እምኔ፡ ባርዋ ካግረ እጃጃ ኳሬ ካኡሱብ እጃጃ ኩን ላኮጻፍናሮ፤ ህክና እስእስኦሮ እስእሲ ጎጎጌላኖንያ፡ **6** ህት ጌላንጃ፡ እጃጃክ ማለ ጎጎሰሴኖንያ፡ እጃጃና ባርዋ እስን ጎጎማልቲታን “ጌላንጃ ግራ” ካኣማሮያ፡ **7** የሱሳ ክርሰቶሳ አባዶ ሌ ኤመታኖ ካኣማኖን ካሶባራ ካሞጋን ኣላም ቶስ ታበራ፡ ሂካ ኣንክክ እባዶ ካሶባሮና ክርሰቶሳ ካኔባታሮያ፡ **8** እስን ጎኣመን ካዳፋርቲታኑን ላኦ ጎጎዋኖንኮ ካኣማጋመ ባርኣራ እታይን እታዬን፡ **9** ኣጋልሰሰ ካክርሰቶሳይ ካግኖና ኣጋልሰሰኬሳኮ ሳር ካበያራ ዱባ ዋ ላኮኣቦ፤ ኣጋልሰሰ ካክርሰቶሳ ካግራ እደ ኦዶና ኤረና አባ፡ **10** ማዮና እስን ቶስ ኤመታ፡ ሂካ ኣጋልሰሰ አት ጎኤመኖን ምንክሰኒ ኣሮቆባቲን፤ ኖጎዳና ኣሮኣቲን፡ **11** ኖጎዳ ካእታራ አባዶ ጎግረ አደ፡ ፈሎ ኦሜላን ዋታ ካፈላሮ ላራ፡ **12** እን እስኑን ካጻፍናረ ካሞጋን አየሰ ግረ፤ ሀሌዋ ኳሬ ዋራቃታና ቃላምዬ ጎጎሌሮ ላኮዶታሮ፤ አየሱን ጎኣመን ገጌሎኦታን ኦኣዴሳሜን ጎጎሌራኑን እስን ቶስ ኤመይረ እስእስደያ አዬሰን አብድ የላታራ፡ **13** ታኣሳባንተቶ አባታታክ ይሰ ኖጎዳ ኩን ፋራማራን፡

3 ያንሳ

1 ሩምና እን ካጌላታሮ ካጌላመሮ ጋዮሲን። እን ጃርሳትኮ ካፍራመራ ሀንዳ፥ **2** እን ካጌላታሮኬ! ኔፎታ ታኢዳነት ጎግርቶክ ማለ ታኢዳን ፋያ ኩ ጎግርቶና እየሰ ዱባ ኩን ጎጎኤካሮን እን ኤባታራ። **3** ሩምዉን ካእብዳማቶ ላኖካና አት ካሰሳታ ራ ካሩም ላኖ አማኒል ኮኮ ኤመተዴ ጋራካካ ካኮአቶታተ ጎራታ እን አሎ ገጌላየራ። **4** ይሰካክ ሩሚ ካሰሰታሮ ላኖ ማላኖኮ ኦሮራራን ገጌሎ እን ላግራን። **5** ካጌላታሮኬ! ኩን ማርት ጎሌና አደ አማኒሉን ካፈላቶ ኮኮ ዱባ አት ካእብዳነተታ። **6** እሶና አት እሶን ታኡብቶ ጌላንጀ ዋ ካእማናሮ እባዶ ሆረ አቶቴራን፥ ራክሶይና ዋ ካኮገገላይሶ ጋራይ ጎጋርጋርተ ታኢዳን ፈላታ። **7** መገ ካክርሰቶሳ ማራን ኦቤራን አይዛብኮ ኮና ሀእታኖኒያ። **8** ጎርታ ራቶ ሩሚን ጎጎፈልኖን ሂካ ኣንክክ እባዶ ጋርጋራኖ ዶትሳራ። **9** ሂታኮ ሆረን ምን ካዋቱን ዳብዳቤ እን ጻፈራ፤ እየሱን ጎእመን ምን ካዋይ ሆረሃይ ፈልን ካዶታታራ ድዮትረፊሳ ቆፋቴ ላኮአታተሮ። **10** ሃንሱን እን ጎኤማየ ኡሱ ካሜላን እየሰ መገካን ባሰን ካፈላሮ ዱባ ዱዳ ቤሰናራ፤ ህክና ላኮሌሮ አመረ አማኒል ላኮቆጸታሮ፤ ቆጸይን ኦዶታታራና ትራራ፤ ምን ካዋኮና እሶ ቤሳራ። **11** ካጌላታሮኬ! ካእዳን ካእዳንክ ሌን ኳሬ ካሜላን እን አሮሌተ። ካእዳን ካሌሮ ካፈላራ ዱባ ዋኮያ፤ ካሜላን ካፈላራ አደ ዋ ላኮዴሮ። **12** ድመጢሮሳን፥ እባዶ ዱባ ጋራኬሳ አቶታራ፤ ሩም መተክሴዉን ኡሱን አቶታታ፤ ኖና አንዴ ኡሱን አቶታና፤ እሰና አቶናትካን ሩም ላኖ ካሳንዋ። **13** እን ኩን ካጻፍናረ ካሞጋን እየሰ ግረ፥ ሀሌዎ ኳሬ ቃላምይና ቢርይ ጎጎሌሮ ላኮዶታሮ፤ **14** እን ኤነ ኩ ድን አብድ የላታራ፤ እሰደያ እዬሰናና። ኖጎዳ ኩን ሀሌቶ፤ ኩ ኦጌላታራን ዱባ ኖጎዳ ፋራማራን፤ አትና ኖ ኦጌላታራዉን መተ መተ ኖጎዳ ፋራምና።

ይሁዳ

1 የሱሳ ክርስቶስን ካህንዳሮና ካያይቆባ አቢ ይሁዳ፥ ዋ ኦዶይ ኦጌላንቴታና የሱሳ ክርስቶስ ኡማንቴዴን ኦኦራንቴታን ዱባን፥ **2** ሻጋ፥ ፍጎዳና ጌላንጅ እስኩን ሀጂናቶ። **3** ኦጌላታሮ ኦቴ፤ ራቶክ ፋይናካንጫን እስኩን ጻፊን አሎ ዶታ ግረ፤ ግዳ ጎአመን ካአባባሮን ራድ ዋ ጎሳን ኮክ ካሰሰሮ አማኖ አታይ ዋ ጎጎአባታኩን ጎርሲን እን እስኩን ጎጎጻፊሮን ካሄሶን ሌ። **4** ጎራታ ካሞጋንኮ ሆረን ህታ ሙርቲን ካጻፋመራ ኮኮ እባዶ ሉቄ እስን ቶስ ታበራ፤ እሶና አብሰ ታዋ ካላይኒዕ፥ ዋ ሄዶካንት ሰኖ ባቲክ እያናይ ኦኢግልሳራና ኡሱ ካላል ዱባንኮ ካንጂንክ፥ ሞትካንና ጎታካን ካሌሮ የሱሳ ክርስቶስ ኦካካታራንያን። **5** ሂካ ዱባ ጣይቴኑ ኮይክ ካአዴሰታን ጎሌና፥ ጎታ ጎሳኬሳ ካግብጽ ኡልኮ ቤሰረ ጎጎሃሰሮና ኦአማኖን ግራን ሃር አባባተረ አደ ጎጎባሰሮ እን እስን ሻድሲን ዶታራ። **6** ኡሱማለና ጂንናትሶ ኦራታናዋቲ ካሄሰሮ ኤርግቻል ሻዳ፤ ዋ እሶ ታፍርዳ አሪ ታጌቶ ጅሩ ጅሮማክ ሻኖይና፥ ጠልንጋክ ሙጉዲ ኦሮ አዳላይሰራ። (aīdios g126) **7** ሂካማሌ ሶዶሚና ጋሞራይ፥ አደ ጎቦብክሶይ ካግራ ካታማል ሻርሙጡማን ካጃራሮ ሌ፤ ሴራኮ ሳር ቤረን እስእስኦሮ ሻርሙጡማ ፈለን፤ ሃንሱን እሶ ጅሩ ጅሮማት ኤለኒ ኦሙርሳማራኩን ማሱሳ ሌን። (aiōnios g166) **8** ኡሱማለና ሂክ እባዶ ህሰሎኦትሶ ካሰጋራን ራድ ሰሴታ እስኦትሶ ባቶይሳታራን፤ ኦዶናት ኦአባና ኔባታራን፤ ዳሩሪ ካባጃ ኦአባና ሀባራራን። **9** ኤርግቻሉን ዋይቻ ካሌራ ሞካኤል አደ ሬስ ካሙሴ ማራን ዱርሳን ዋታ ዶጋማግራን፥ “ጎታ ሀሃድሶ” አመራ ኳሬ ላኮሀባረሮ። **10** ሂክ እባዶ አደ እሶን ካአዴሳሞን እየሰ ዱባ ሀባራራን፤ ሳሙ ካላይክ ግድ እን ጎጎመጣመኒ ካካሳን እየሰ ባራን። **11** ኦኔ እሶን! ራ ካቃዬል ሰተራን፤ ማራጋዴን ጋጺጋጸ ሸሬና ታባላሚ እዬራን፤ ሜላን ታቆረይ ባየራን። **12** ሂኒዕ እባዶጃ ካጌላንጃ አሞክሰን ጉት ሙላ ኮና ካላይ እስኔ ዋታ ጋባላሜረን ኦአማራን ሳልናጃልያን፤ አደ እስኦትሶ ኦላሉን ኦአማራንያን፤ እሶና አምባሊ ካዋዳማሮ ኢዳሞ ካላይክ ዱማንቻልያን፤ ዉጣ ታኮኩኩአማሮ ድግኒ ኢል ካኮሄላሞን ህዲድኮ ታጋመረ ላማ ጋለ ካእንጋገ ጋ አንያ። **13** ኦሙልሳራን ፈሎኦትሶይ ሳንባ ኦጉዳራን፥ ጎሜላን ካከያሮ ጋሽማሎ አንያን፤ ጠልንጋክ ሙጉድ ጅሩ ጅሮማን እሶ ካኦራታሮና፥ አዳ. ካካፋፋሮ ባራጃልያን። (aiōn g165) **14** አዳመኮ ሀጋእበረ አላታን ታቶዶብ ካሌራ ሄኖክ አዬሳ “ሂክማ

ዋ ቶታም ካሄለላሞን ቁሉክ ኤርግቻልኬሳነ ዎታ ለረ ዱባ ጉት ሙርቲስን
 ኤመይናራ፤ **15** ሀሱ ዋ ካሄደይሳኖን እባዶ ካፈለሮ ካሜላን እዬስኮት አላንቲ
 ሙርሰናራ፡ ዋና ሩምና ሂናኣ ኡሱ ኦሄደይሳኖን ጨባልዬል ካእዬሰራን ካሜላን
 እየሰ ዱባ እሶ ፍርድናራ” አመራ። **16** ሂክ እባዶ አርጌቶ ኦጉንጉማራና ማምሰክ
 እዬሲና ኦገገላኖንያን፤ ካሜላን ራክሶይ ሀልቻ ኦስሴታራንያን፤ ህኢትሶ ካኮራ
 እዬሲ ታእማጋንተታ፡ ላኦትሶ ዶታታ እባዶ ሶሶባራን። **17** እየሱን ጎእመን
 ኦጌላታሮ ኦቴ፡ ጎታካን የሱሳ ክርስቶሳ ኦፋራሜረን ሂታኮ ሆረን ካእዬሰራን ሃፋራ
 ሻዳ። **18** እሶ “ካጋቾ ጌሲ ፈኢ ታዋኮ ኦፋክመራን እስኦትሶ ሀልቻ ካሜላን
 ኦስሴታራን ኦቃጭፋታራን ኤሜይናራን” አመን እሱን ሰጌረን። **19** እሶ እባዶ
 እባዶኮ ኦእሳባራን፡ ካሶየ ሀልቻ ኦፈላራን፡ እያና ቁሉክ ካላይኒዕ እባዶያን። **20**
 ኦጌላታሮ ኦቴ እሰን አዳ፡ ካካለኮና ካቁሎየ አማኖክሰኒ እስኦትሰን ቁሎይሳዬን
 አታዬን፤ እያና ቁሉክኮክ ሁና ኣሎ ኤባየን። **21** ጎታካን የሱሳ ክርስቶሳና
 ሻጋኬሳይ ጅሩ ጅሮማክ ግር ቶስ እሰን ጎጎጌግሰሮ ኦራታ እስኦትሰን ጌላንጀ
 ታዋይ ኦሮ ኦራዬን። (aiōnios g166) **22** ካሄዳታሮ እባዶን ነኔኤይሳዬን፤ **23**
 እባዶ ኮኮ ኤሌንኮ ቤሳዴን ሃሳ፤ ካካለቱን አብሲ ነኔኤይሳዬን፤ ጎሌና ጨቦ
 ካባቶየሮ ማርክሶ ካድን ሳርስ ዱባ ሀሄሶን ዲዳ። **24** እሰን ጎጎኢኖንኮ የልና
 ቱፍ ካላይኒዕ የልረ ገጌሎይ ካባጃቴሳ ሆረ እሰን አሊሰን ካዳንዳሮ፤ **25** ኡሱ
 ካላሊ ዶብካን ካሌሮ ሄዶ፡ ጎታካን የሱሳ ክርስቶሳክ ጋራን ሆርኮሰኮ ካየረ፤
 ግዳና፡ ጅሩ ጅሮማን ካባጃና ጋሻና፡ ሁናና ኦዶናትና ኡሱን ሀሌዎ! ሀሚኒዕ።
 (aiōn g165)

ራጋ ካያንሳ

1 ሂክ ራጋ ኤነ ካልናሮ ኮኮ ኡሱን ኦህንዳራውን ጎጥቱሰሮ ዋ የሱሳ ክርስቶስን ካሰሰሮያ፤ የሱሳ ክርስቶስና ኤርግቻኬሳ 4ረጉረ ኡሱን ካህንዳሮ ያንሳን ሂክ ራጋ ቱሰ። **2** ያንሳና ሃፋራ ካዋኮክ ጋራና የሱሳ ክርስቶስ ታኦጋልሰሰሮ ሩምኮክ ጋራ፤ ኡሱማለና ኡሱ ካቱሰሮ እየሰ ዱባኮክ አቶቴ። **3** ሂክ ዱባ ካኮልናራ ጎራታ ኤነ ማንኮሌ ማራን ሂክ ካሄገሮልኮክ ሃፋራ ካናባባራ ካሶማሳመያ! ኡሱማለና ካሄገሮልኮክ ሃፋራ ኦማላራና ሄገሮ ኦሮ ካጻፋመሮ ኦፈላራን ኦሶማሳመንያን። **4** ያንሳኮ እስያይ ኦሮ ባንኤ ቶዶባ ካግሮ አማኒሉን፤ ካግራ፤ ካግረና ካኤሜይናራ ኮርፍንጀኬሳ ሆረ ካግሮ አያናጆል ቶዶባኮ፤ ኡሱማለና ጎይኮ ከያኖይ ባርክ ካሌሮ ካኡሌ ዋኖላልኮክ ሞቲኮ፤ ካአብዳመ አቶ ካሌሮኮ፤ ኖ ካጌላታሮኮና አግካኬሳይ ኖ ጨቦካንኮ ባልቸማ ካቤሰሮ የሱሳ ክርስቶስኮ ሰኖና ኖጎዳ እስኩን ሀሌቶ። **6** ካየሱሳ ክርስቶስ ኦዶ ዋውን ጎጎህንዳይኖን ኖ ዋኖና ቱቃዋል ካየለሮ፤ የሱሳ ክርስቶስን ካባጃና ሁናና ጅሩ ጅሮማኮ ታ ጅሩ ጅሮማ ጌሮ ኡሱን ሀሌዋ! ሀሚኒዕ። (aiōn g165) **7** ሂክማ ኡሱ ዱማንቻይ ኤመይናራ፤ ኡሱ ካኤገራ እባዶና ሱረ እንሄሶኒ ዱባ ኡሱ ድናራ፤ ካኡሌ ጎሳ ዱባ ኣላንቲቴሳ ኦይናራ፤ እ ሂክ እየሰ ሩምያ፤ ሀሚኒዕ። **8** ካግራ፤ ካግረ፤ ካኤሜይናራና ዱባ ካዳንዳራ ጎታ ዋ፤ “ካሆሬና ካሃረ እንያ!” አማራ። **9** የሱሳ ክርስቶስ ራኮና ዋኖናትኬሳ ኡሱማሌ ኦብሰ እስኔ ዋታ ካኦታየራ እን እቢክሰን ያንሳ ሃፋራ ካዋይና የሱሳ አቶታኖኮት ኣላንቲ ፈጢሞ ታአማማቶ ኦዶላይ እን ሸያመ ግረ፤ **10** ታጎታ አሪ እን ቆፋ ታኦያና አማጋመ ግራን ታጡሩንባ ያየ እን ታላታ ታኦቲ ያየ እንኮ ባጋንደ ሃ አማ ግራን፤ **11** “ኡሱማለና ካሙታሮ ማጻፋይ ጻፍዴ እስያይ ኦሮ ባንኤ ቶዶባ ካግሮ አማኒሉን፤ ኤፈሶን ቶሰ፤ ሰምርነሰ ቶሰ፤ ጴርጋሞን ቶሰ፤ ትያጢሮን ቶሰ፤ ሰርዴሰ ቶሰ፤ ፍላደልፍያና ሎዶቅያ ቶሰ ፋሮ” አማ ግራን እን ማለ። **12** ኢነ ካእዬሰረ ማዮዮ አዴሰን ሃሮ ካምባል አመ፤ ሃሮ ካምባል ካኮአምሮ ጎራታ ቶዶባ ካዋርቂ ቦላንሶል እን ዴ። **13** ቦላንሶል ጠኤ ካሰሴታሮ ኤረ ካእባዶ እን ካላሮ እን ዴ፤ ኡሱ ሉቃ ሄገል ካገያሮ ሳርሰ ካሳርሳተ፤ ጌግዮቴሳይ ካዋርቂ ሞዋኖ ካሞዋተሮዮ። **14** መተኬሳና መተኬሳኮክ ብናና በለት እን ታላቶ ሱፊ እን ጉማራክየ፤ ኢልኦቴሳና ላጫ ካኤሌኔ እንዬን፤ **15** ሉቃኦቴሳና ካኤሌኔ ቦላል ኦሮ ካግሮ ካማርጮ ናሰ እንዬን፤ ያየቴሳና ላጋይ

ኦዲጋራን በከ እንጂንኮት ያየ አንተ፤ **16** ታመርገ ገነቴሳ ባራጃ ቶዶባ አበ ግረ፤ ምና ለማነ ካሌነናን ብቢር ህኢቴሳኮ ብያ ግረ፤ በቤድቴሳና ዋኣነተ ታህንቃቶ አርት አንተ። **17** ሂካ እን ካኮደያረ ጎራታ ካጎየ እባዶ ኣነ ሌጉረ ሉቃኦቴሳ ሄገሊ እዬ፤ ኡሱ አደ ታመርገ ገነቴሳ እን ጉት ካየጉረ ሃ አመ፤ “እሮአብሳተ፤ ካሆሬና ካሃረ አንያ፤ **18** እን እርዶክያ፤ ጎየ ግረ፤ እየሱን ጎአመን ሂክማ፤ ጅሩ ጅሮማን እርዶክያ፤ እን ጎይ ጉቲና ቦዋ ጉት ኦዶናት አባ፤ (aiōn g165, Hadēs g86) **19** ጎርታ አት ካዳተቶ፡ ግዳ ካግሮና ሃሬ ካሌማይናሮ ጻፍ። **20** ታመርገ ገነቴይ ካዳተቶ ባራጃል ቶዶባና ካዋርቂ ቦላንሶል ቶዶባ ሆልኮት ፋሬን ህታታ፤ ባራጃል ቶዶባ፡ ባንኤ ቶዶባ ካግሮ አማኒልኮክ ኤርግቻልያ፡ ቦላንሶል ቶዶባና፡ ባንኤ ቶዶባ ካግሮ አማኒልያ።”

2 “ካኤፈሶን አማኒልኮክ ኤርግቻትን ሃ አም ጻፍ፤ ሂክ እየሰ ባራጃል ቶዶባ ገነ ታመርገይ ካአባተራና ካዋርቂ ቦላንሶል ቶዶባ ጠኤ ካሰሴታራ ሃ አማራ፤ **2** ፈሎኦታ፡ ዉደታማኖካና ኡብስታ እን ካሶዋ፤ ኦሜላን አደ ኡብሲን ዳንዳና ካዋተቶ፡ ኦፋራመራን እንሌኖን ግራን ኖ ኦፋራምነኖና ኦአማራን ቆቆርተዴ ኦጣራ ኦሌራን ሄላኖካ እን ካሶዋ። **3** ኡብሲ አታታኖካና መገኬ ማራን አህፋኖን ራኮ አታታኖካ እን ካሶዋ። **4** እየሱን ጎአመን እን ኩ ካኮቴፋየሮ እየሰ አባ፤ ህክና አት ታጣዋ ጌላንጀ ኢስታ። **5** ጎርታ አት ኤራ አባባተ ኢተቶ ሻድ፤ ጨቦኮ ጉላ ጋል፤ ጣይተ ኦፈላተ ፈሎኦታ ፈላ፤ ሂካ ዱባ ፈላና ጎዋተ እን ኩ ቶስ ኤመይናራ፤ ጨቦኮ ጉላ ጋላናጎዋተ ቦላንሶካ ባንኤኮ ኬሰናራ። **6** እየሱን ጎአመን እን ኩ ካኮጋላታራ እየሰ ኮ ግራ፤ ህክና እን ኦኔባታሮ ካንቆላ አባዶኮኒዕ ፈሎ ዱደታ። **7** “እያና አማኒል ዱባን ካአማሮ ነበ ካአባ ሀማሎ! ‘ካአዋድናሮን ጋናተ ካዋይ ኦሮ ካግሮ ካግሮ ጋኮት ኢል ጎጎአምሮን እን ኡሱ የልናራ።’ **8** “ካሰመርነስ አማኒልኮክ ኤርግቻትን ሃ አም ጻፍ፤ ሂክ ካሆሬና ካሃረ ካሌሮ፤ ካጎየረና አርዶክ ካሌራ ሃ አማራ። **9** ራኮታና ህዩማታ እን ካሶዋ፤ ሀሌዎ ኳሬ አት ዱሬሳታ፤ አይሁድ እንሌኖን ግራን ኖ አይሁድና ኦአማራን ታጻላዬ ኡና ኦሌራን፡ መገካ ካባሰራን እን ካሶዋ፤ **10** ሆረንባን ኩ ታግናቶ ራኮዉን እሮአብሳተ፤ ግዳ እስን ጎጎጫፋንታኑን ዱርሳ እስንኮ ኮኮ ምን ካሻኖ ታብሰናራ፤ አሪ ቶሞኑን ራኮ አታይናታን፤ ታጎቶን ካአብዳንተ ሌ፤ ካግሮ ካላቻ እን ኩን ሰሰናራ። **11** “እያና አማኒል ዱባን ካአማሮ ነበ ካአባ ሀማሎ! “ካአዋዳይናሮ ጎይ ካላም

ላኮሚሮ።” **12** “ካጼርጋም አማኒልኮክ ኤርግቻትን ሃ አም ዳፍ፤ ህክና ምና
 ላማነ ካኤነናተሮ ሺፋ ካለበራ ሃ አማራ፤ **13** እት ካጸላየ ኮርፍንጀ ታኮግሮ ባንኤ
 ግራኖካ እን ካሶዋ፤ ሀሌዎ ኳሬ እት መገኬ አታይሳተ አባተታ፤ እት እዬ ካላብቶ
 አማኖ ላኮካካተቶ፤ ካላብዳመ አቶኬ ካሌረ አንትጳስ ጸላየ ታኮግቴ ካታማትሰኒ
 ካኮላጋዴረን ጎራታ እት እዬ አማኖካ ሱረ ላኮኢሰተ። **14** እየሱን ጎአመን እን
 ኩ ካኮቱፋታሮ እየሱ ኮኮ አባ፤ ህክና ካባላአም አጋልሰሰ ካአባተራ አባዶ ኮኮ
 እሰን ኦሮ ግራ፤ ሂክ ባላም ካእሰራኤል ጎሳ ቶልቻን ካጃርሳመሮ ባቦ ጎጎአምሮና
 ሻርሙጣኖይ ጎጎሀንዱዱፋራውን ባላቂን ማርካ ካሰሰሮያ። **15** ኡሱማለና
 ካንቆላ እባዶኮክ አጋልሰሰ ካአባ እባዶ እሰን ኦሮ ግራ፤ **16** ሃንሱን ጨቦኮ
 ጉላ ጋል፤ ጎርቱን እን ሳም ኩ ቶሰ ኤሜይጉረ ሀኢቱኮ ካበያሮ ሺፋይ እን እሶ
 ኤግናራ። **17** “አያና አማኒል ዱባን ካአማሮ ነበ ካአባ ሀማሎ! ካአዎዳይናሮን
 ሰያመ ካግሮ ማናኮ እን ኡሱን ሰሰናራ፤ ካኡሱብክ መገ ካኮጸፋመሮ ጉማራክ
 ኤኤም ሰሰናራ፤ ካአታይናሮ ኳሬ ሂካ ካካለ ማዮና ላካሶ።” **18** “ካትያጢሮን
 አማኒልኮክ ኤርግቻትን ሃ አምደ ዳፍ፤ ህክና ላጫ ካኤሌኔ እን ኦላራን ኢልኦ
 ካአቦኮና ቦላል ካኤሌኔይ ካዱባመሮ ታናሰ ማርጮ እን ኦላራን ሉቃ ካአቦ፤
 ኤረ ካዋኮ ካሰጋመሮያ፤ **19** ፈሎ ኦታና ጌላንጀታ፤ አማኖካና ሀንዳኖካ ኦብሲ
 አታታኖካ እን ካሶዋ፤ ኦሃሬ ፈሎኦታ ኦሆሬኮ ሮራኖ እን ካሶዋ። **20** እየሱን
 ጎአመን እን ኩ ካኮቱፋታሮ እየሱ ኮ አባ፤ ህክና ‘እን ካሄገሮያ’ ታአማተ ሄለልትቲ
 ኤልዛበል እት ዶና ሌተ ኦብሲተታ፤ ኤሰና ኢን ኦሀንዳራን ጎጎሻርሙጢራውና
 ቶልቻን ካኤካተሮ ባቦ ጎጎአምራውን አጋልሰሳኖይ እሶ ሶሶይሳታ። **21** ኤሰ
 ጨቦኮ ጉላ ጎጎጋልቶን እን ኤሰን አሪ ሰሰረ፤ ኤሰ ጎአመን ሻርሙጣኖ እሰደ
 ጨቦኮ ጉላ ጋልን ላኮዶታተቶ። **22** ሃንሱን አልጋይ ጉት ሁዱርሰረ ሀወአሚ
 ኤሰ አቦሰሰናራ፤ ኤሰን ዋታ ፈሎ ኦሜላን ኦፈላራን ኦሜላን ፈሎ ኦትሶኮ ጉላ
 ጎጋሌን ኳሬ ኤሰን ዋታ ኦሻርሙጢራን ዱባን ካአቲ አቦሳ እን እሶን ኬንናራ፤
23 ይሰክሴ ጎይ ሙርሰናራ፤ አማኒል ዱባና ታአባዶ ቆፋና ሀልቻ ካቆቆራራ
 እን ላኖ እሶ ካሳንዋ፤ መተመተክሶውን ፈሎኦትሶክ ማለ እን እሶን ሰሰናራ።
24 ትያጢሮን ሰግታኑና ሂካ ካሜላን አጋልሰሰ ኦአታታናዋቴታን እሰን ዱባን፤
 ኡሱማለና ኮኮ ‘ታጸላዬ ታኦሮ ሆልታ’ ኦአማራን ዋታ ዴበ ኦሰሰኖን እሰኑን ካካለ
 አጃጃ እን ላኮሰሰናሮ፤ **25** እየሱን ጎአመን እን ታ ኤሜሮን ካኡብታን አማኖ

አታይሳዬን አባዬን። 26 ካእዎዳይናሮና ፈሎኦቴይ ታ ጋሾ ጌሮ ካአታታሮን እን
እይዛብ ጉት ኦዶናት ሰሰናራ፤ 27 ‘ዳማ ታማርጮይ ኡሱ እስን ባሪሰናራ ኤሬኮ
ካፈላመሮ ሁ እን ጫንጫን ኡሱ እሶ ቡቱትሰናራ’ ሂክ ኦዶናትና እን አቦኬኮ
ካአታዮሮ ኦዶናት እንያ፤ 28 አዎዳኖኮክ ማላታ ካሌሮ ካባባርሴ ባካላ እን ኡሱን
ሰሰናራ፤ 29 እያና ቁሉክ አማኒል ዱባን ካአዬሳሮ ነበ ካአባ ሀማሎ!”

3 “ካሰርዳስ አማኒልኮክ ኤርግቻትን ሃ አም ጻፍ፤ ሂክ፡ እያናጆል ካዋ ቶዶባና
ባራጃል ቶዶባ ካአበራ ሃ አማራ፤ እን ፈሎኦታ ካሶዋ፤ መገን አርዶክታ፤ እየሱን
ጎአመን አት ጎተታ። 2 ናባድ፤ ጎይን ካጋባላመሮና ኩን ካሄሰሮ ክጫርክ ኮኮ
አታይሳ፤ ሄዶኬ ሆረ ሙጭ እአመን ፈሎኦታ እን ላኮዴሮ። 3 ጎርታ አት ምስክ
አጋልሰሰ አታተቶና ማልተቶ ሻድ፤ ኦራ፤ ጩቦኮ ጉላ ጋል፤ ጎናባዳናዋተ አድ እን
ሄቶ እን ደራኣ ኩ ቶስ ኤመይናራ፤ እን ኤቲ ሳቲ ኩ ቶስ ኤሜይናሮ አት ላካሶ።
4 እየሱን ጎአመን ሳርሰክሶ ጦርቀ ሀኣትሳኖን ኦግራን እባዶጂ ኡጫር ኩኔ
ዎታ ሰርዳስ ግራን፤ እሶና ጉማራክ ሳርሰ ሳርሳይን ኦኮንዶትሳሮ ማንኮሌን
ማራን ጉማራክ ሳርሰ ሳርሳይጉሬን ኢነ ዎታ ሴይናራን። 5 ካእዎዳይናራ
ሂካማሌ ጉማራክ ሳርሰ ሳርሳይናራ፤ መገኬሳና አቦኬይና ኤርግቻልኬሳይ ሆረ
እን ኡሱ እዳሰሰናራ፤ አርዶክ መገኬሳና ካኮማዛጋባመሮ ካግር ማዝጋባኮ
ላኮሻካርናሮ። 6 እያና ቁሉክ አማኒል ዱባን ካአዬሳሮ ነበ ካአባ ሀማሎ!”
7 “ካፍላደልፍያ አማኒልኮክ ኤርግቻትን ሃ አም ጻፍ፤ ሂክ፡ ቁሉክና ካሩም
ካሌሮ፤ ካዳዉተ ምንኮክ ቁልፍ ካአበራ ሃ አማራ፤ ኡሱ ካባናሮ ማዮና
ላኮጩፍሮ፤ ኡሱ ካጩፋሮ አደ ማዮና ላኮባኖ። 8 እን ፈሎኦታ ካሶዋ፤ ሂክማ
ማዮና ጩፍን ካዳንዴኖን ካባናመሮ ኡፋ እን ኩ ሆረ ካየራ፤ ሁናካ ክጫርክ
ላኖ እን ካሶዋ፤ ሀሌዎ ኳሬ ሃፋራኬ ኦራተታ፤ መገኬና አት ላኮካካቴቶ። 9
ጎርታ እይሁድ እንሌኖን ግራን እይሁድና እአማራን ሀኡኡ ታጻላዬ ኡና ኦሌራን
ኦጣራ ኤሜይጉሬን ሉቃኦታ ሄገሊ ጎጎኢራኑን የልናራ፤ እን ኩ ጌላታኖና እሶ
ጎጎአዳሰራኑን የልናራ። 10 አት ካኡብሳቶ ሌን እን ኩኔ ካአመሮ ሃፋራኬ
ማንኮኦራተቶ ማራን እን ሂካ ኡሊ ኦግራን ጫፍን አላም ዱባ ጉት ታኤማቶ
ታራኮ አርኮ እን ኩ ኦሮዋ። 11 እን ሳም ኤመይናራ፤ ካላቻካ ኩኮ ማዮና
ጎጎአቶንኮ ካኡብቶ አታይሳ አባ። 12 ካእዎዳይናሮ ሄዶኬክ ቁሉክ ምን ካዋይ
እን ኡሱ ልበ የልናራ፤ ኤሰኮና ሱረ ኡሱ ላኮብናሮ፤ ሄዶኬክ መገና ሄዶኬት

ካታማኮክ መገ ኡሱ ጉት እን ጸፍናራ፤ ህት ካታማ ዳሩርኮ ሄዶኬ ደለኮ ታዳገናታ ታኡሱብት እየሩሳሊምታ፤ ካኡሱብክ መገኬ ኡሱ ጉት እን ጸፍናራ።

13 እያና ቁሉክ እማኒል ዱባን ካኦዴሳሮ ነበ ካእባ ሀማሎ!” **14** “ካሎዶቅያ እማኒልኮክ ኤርግቻትን ሃ አም ጸፍ፤ ሂክ ሀማኒዕ ካሌሮ፤ ካእብዳመና ካሩም አቶ ካሌሮ፤ መጣ ታዋ ዱባ ካኮሄላማቶ ካሌራ ሃ አማራ፤ **15** እን ፈሎኦታ ካሶዋ፤ እት አምባልክ ጎርቱን ካጉባቶ ላኮቶ፤ አምባልክ ጎርቱን ካጉባቶ ሊ ግቴዋ ኩን ካእዳንክየ! **16** እት አምባልክ ጎርቱን ካጉባቶ እንሌኖኒ ኮልኮል ካእነተ ማንኮሌተ ማራን እን ሀኢቲኮ ኩ ቤስ ቱፍናራ፤ **17** ‘እን ዱሬሳያ፤ ኡራዎ አዋጋን አባ፤ ኢን ካሀንቃተራ ኮና ላግሮ አማታ፤ አየሱን ጎአመን እት ካዋተ፤ አጎየ፤ ሀየሳ፤ ጃማሰና ሀዉአይ ካግቶ ላኖካ ላካሶ፤ **18** ሃንሱን ዱረሳ ሊን ኤሊ ካጉባመሮ ዋርቂ እንኮ ጎጎአምናቶና፤ ሀዉአይ ላኖካኮክ ሙላ ጎልሳዬን ጉማራክ ሳርሰ ሳርሳይን እንኮ ጎጎአምናቶና ድን ካኮዳንደቶ ዶብ ካኢልኦ እንኮ አምናይደ ጎጎሽግዳቶን እን ኩ ጎርሳራ። **19** እን ካጌላታሮ ዱባ ጎርሰናራ፤ ሙርሰናራ፤ ሃንሱን አታ፤ ጨቦኮና ጉላ ጋል፤ **20** ሂክማ እን ጎጫ አልረ ኡፋ ባባሰናራ፤ ማዮና ያየቴ ማልረ ኡፋ ኢን ጎባነ ኡሱ ቶሰ ታብረ ኡሱነ ዋታ ባቦ እን አምናራ፤ ኡሱና ኢን ዋታ አምናራ፤ **21** እንና አዋደጉረ አቦኬነ ዋታ ኮርፍንጀ ጉት ጎጎሀማጽሮይ ኡሱማሌ ካአዋዳይናራና ኢን ዋታ ኮርፍንጃ ጉት ጎጎሀማጽሮን የልናራ። **22** “እያና ቁሉክ እማኒል ዱባን ካኦዴሳሮ ነበ ካእባ ሀማሎ!”

4 “ሂካኮ አባባየረና እን ዴ፤ ዳሩሪ ካባናመረ ኡፋ ግረ፤ እን ሆራርጀ ማለ ታግረ ታጠሩንባ ያየ እን ታላታ ያየ ሃ አንተ፤ ‘ኮይ ሂታራ ኤልዴ ቤ፤ ሆረንባን ሊን ካዶትሳሮ እየሰ እን ኩን ቱሰናራ፤’ **2** ባኔዋ እን እያና ቁሉክ አማጋመ፤ ሂክማ እን ዳሩሪ ኮርፍንጀ ዴ፤ ኮርፍንጃይ ካሀማጽራ አባዶት ኮ ግረ። **3** ኮርፍንጃይ ጉት ሀማጽ ካግረኮት ምዲ ካኢያሰጸድና ካሰርድኖ አዉአሎክ ኤኤሞ እን ካላርየ፤ ኮርፍንጃይ ማራሙረ ካመረግድ አዉአሎክ ኤኤሞ እንክክ ጀሬን ካኢዳሞ ግረ። **4** ኡሱማለና ኮርፍንጃይ ማራሙረ ላማታንኮ አፋር ኮርፍንጃል ግረ፤ ኮርፍንጃል ጉት ጉማራክ ሳርሰ ካሳርሳተራና መተክሶ ጉት ካዋርቂ ካላቻ ካካተራ ላማታንኮ አፋሮ ጃርሳ ሀማጽ ግረ። **5** ኮርፍንጀኮ ሀንቃና ያየና ድድዳናን ዋታ ብያ ግቴ፤ ኮርፍንጃ ሆረ ካቤባራ ዱብ ቶዶባ ግረ፤ እሶና ቶዶባ እያናጀል ካዋያን። **6** ኮርፍንጀ ሆረ ታሙጭንተ ማሰቶቲ እን ዋላ ዋላ

አንተ ታህንቃታ ላቡ ግቲ፤ “ኮርፍንጀ ጠኤይና ማራሙረ ሆረነና ሃሬ ኢልኦ ኦሞጋን ታኦብታ ኔፎ ታኦብታ መጣ አፋሮ ግቲ፤ 7 ታሆሬ ኔፎ ታኦብታ መጣ ሉባን ኣን ላቲ፤ ታላም ኦሪ ኣን ላቲ፤ ታሴድ ኔፎ ታኦብታ መጣና በቤድ ታኣባዶ ኣን ላቲ፤ ታኣፋር ኔፎ ታኦብታ መጣና ካቡባሮ ላቦባ ኣን ላቲ። 8 ኔፎ ታኦብታ መጣ አፋሮ መተመተይ ባላሎ ሌ ኣባናይተ፤ ኡቡ ማራሙረና ኦሮኦትሶይ ኢልኦ ኦማጋመሬን፤ አሪና ሄመን፤ “ቁሉክ፤ ቁሉክ፤ ቁሉክ ዱባ ካዳንዳራ ጎታ ሄዶ፤ ካግረ፤ ካግራና ካኤሜይናራ” ኦማኖ ላኮኢሳሬን። 9 ህት ኔፎ ታኦብታ መጣ ኮርፍንጀ ጉት ካህማጼሮና ጅሩ ጅሮማኮ ታ ጅሩ ጅሮማ ጌሮን ካግርናሮን ጂና፤ ካባጃና ጋላታ ካኮሰሳራን ጎራታ ዱባ፤ (aiōn g165) 10 ላማታንኮ አፋሮ ጃርሳ ጅሩ ጅሮማን ካግርናሮን፤ ኮርፍንጂይ ጉት ካህማጼሮ ሆረ ሆረ በቤዱ ኡል ኦዬሪን ሳጋዳራን፤ ካላቻክሶና ኮርፍንጂይ ሆረ ካዬንጉሬን፤ ሃ አመን፤ (aiōn g165) 11 “ጎታካንና ዋ ሄዶካን! አት ካመን ዱባ ማንኮመጢተቶ ማራን፤ ካመን ዱባ ካኮመጣመራና ካኮግርናራ (ግር ካሄላተራ) ፈኢታይ ማንኮሌ ማራን፤ ጂንና፤ ካባጃና ሁናና ኩን ዶትሳራ ኦማ ግረን።”

5 ኮርፍንጂ ጉት ካህማጼራ ሞና ታሳሬነና ታኦሮን ካጻፋመሮ ማታማል ቶዶባይ ካባሳመሮ ካዱባመ ካጋልባ ማጻፋ ገነ ታመርጌይ አበ ግራን አን ዴ። 2 ካኦቲ ኤርግቻት ኮ ታኦቲ ያዬይ፤ “ማታማል ፋርንና ካዱባመሮ ካጋልባ ማጻፋ ባንን ካዶትሳራ አዮያ?” አመ አዬሳ ግራን አን ዴ። 3 እየሱን ጎአመን ዳሩርና ሌሪ ኡሊ ጎርቱን ኡልኮ ሄገሌ ካዱባመሮ ካጋልባ ማጻፋ ኦሮ ባን ድን ካዳንዴ ማዮና ላኮግረ። 4 ካዱባመሮ ካጋልባ ማጻፋ ኦሮ ባን ድን ካኮንዶትሳሪ ማንኮዋታመ ማራን አን ኣሎ ኦዮ። 5 ህሱ ጎራታ ጃርሶለኮ ኮ ኢን፤ “አት አሮኦተ፤ ሂክማ ታይሁዳ ኣኒ ካሌራ ሉባን ታዳዉተ አላታንኮክ ህዲድኮ ካኬራ ኡቡ አዋደራ፤ ኡቡ ካዱባመሮ ካጋልባ ማጻፋና ማታማል ቶዶባ ባንን ዳንዳራ” አመ። 6 ሂካኮ አባባተረ ኔፎ ታኦብቶ መጣ አፋር ጠኤ፤ ኮከ ካጎሳመሮ ኣን ካላሮ ጃርሶለ ጠኤ ካኦሌሮ ኢዳዶ አን ዴ፤ ሂክ ኢዳዶትና ማሻ ቶዶባና ኢልኦ ቶዶባ አባናየ፤ እሶና ሂካ አላም ቶሰ ኦፋራመራን ካዋ አያናልያን። 7 ሂክ ኢዳዶ ኤመተጉረ ኮርፍንጀ ጉት ካህማጼሮኮት ገነ ታመርገኮ ካዱባመሮ ካጋልባ ማጻፋ አተ። 8 ካዱባመሮ ካጋልባ ማጻፋ ካኮኦታረ ጎራታ ኔፎ ታኦብታ መጣ አፋሮና ጃርሶለ ላማታንኮ አፋሮ ኡቡ ኢዳዶ ሆረ ግልቢሴን በቤዱ ኡል ኦዬን፤

እሶ መተመተይ በገና አባተን ግረን፤ ኡሱማለና ቁሎሌኮክ ኡብ ካሌራ ኢጣና ካኮአማጋመረ ካዋርቂ ሁይ ጃርሶ አባተን ግረን። **9** ካኡሱብ ማዛሙር ሃ አማ ዛማሬን፤ “ኢግካይ ኣኒ ኣኒኮ፡ ሄኢ ህኢኮ፡ ኡናኡናኮ፡ ጎሳጎሳኮ እባዶ ዋወን ዎዶ ሊ ኤካሰን፡ እት ማንኮኤናንተቶ ማራን ካዱባመሮ ካጋልባ ማጻፋ ኣትን ማታማልኬሳና ባንን ካዶትሳቶ ሌተታ፤ **10** ሄዶኬዉን ዎኖና ቱቃሞል ጎጎሌራኑን እት እሶ የልተታ፤ ኡሊ ጉቲና ሬድናራን።” **11** እን ኤሰራ ጎዳሮ ኮርፍንጃሊ፡ ኔፎ ካአባ መጣጆልና ጃርሶላይ ማራሙረ ካሞጋን ኤርግቻልኮት ያየ እን ማለ፤ ሞጋንክሶና ቶታም ካሄሌላሞንየ፤ **12** ታአቲ ያዬይና፡ “ኮከ ካጎሳመሮ ኢዳዶ ሁና፡ ዱሩማ፡ ቃሩማ፡ አታን፡ ጂናን፡ ካባጃና ጋላታ አታይን ካዶትሳሮያ” እመን። **13** ዳሩርና ኡሊ፡ ኡልኮ ሄገለና በከ፡ እሶ ኦሮ ታግታ መጣ ዱባ፡ “ኮርፍንጃ ጉት ካህማጼሮና ኢዳዶን ጋላታ፡ ጂናን፡ ካባጃና ሁና ጅሩ ጅሮማኮ ታ ጅሩ ጅሮማ ጌሮ ሀሌዎ!” እሶ አማ ግራን እን ማለ። (aiōn g165) **14** ኔፎ ታአብታ መጣ አፋሮና፡ “ሀማኒዕ!” አንተ፤ ላማታንኮ አፋሮ ጃርሶለና ግልቢሰንጉሬን በቤዲ ኡል ኦዬን ሳጋደን።

6 ሂካኮ አባባተረ ኢዳዶ ማታማል ቶዶባኮ ካሆራርጃ ባና ግራን እን ዴ። ኔፎ ካአቦ መጣጆል አፋርኮ ኮ ባንቃኖ እን ህዲድ ታአማቶ ያዬይ፡ “ኮያ!” አማ ግራን እን ማለ። **2** እን ፋራድ ጉማራክ ዴ፤ ፋራድ ጉት ካህማጼራ ዳዌ አባተ ግራን እን ዴ፤ ካላቻና ኡሱን ሰሳመ፤ ኡሱና ካአዎደሮ ለጉረ አዎዳኖኮ አዎዳኖ ቶሰ ሴይን ቤ። **3** እዳዶ ካላሞክ ማታማ ካኮባናረ ጎራታ፡ ታላሞት ኔፎ ታአብታ መጣ፡ “ኮያ!” አማ ግራን እን ማለ። **4** ካካለ ሄላክ ፋራድ ቤ፤ ፋራድ ጉት ካህማጼሮን ኖጎዳ ኡልኮ ጎጎባሰሮና አባዶ እሰእሰኦሮ ጎጎጉዳሮን የልን ኦዶናት ኡሱን ሰሳመ፤ ካአቲ ሺፋና ኡሱን ሰሳመ። **5** እዳዶ ካሴድ ማታማ ካኮባናረ ጎራታ ታሴድ ኔፎ ታአብታ መጣ፡ “ኮያ!” አማ ግራን እን ማለ፤ አንና ጋሞባላክ ፋራድ ዴ፤ ፋራድ ጉት ካህማጼራ ካኮሄረግሳራን ገነቴሳይ አባተ ግረ፤ **6** ኔፎ ካአቦ መጣጆል አፋርኮ ታበያቶ ያየ እን ታላቶ እን ማለ፤ ህት ያየና፡ ኪሎ ቶኮት ምና ግታት ዳርጋማ አሪ ቶክ ዳሞዛ፡ ኪሎ ቶና ምናና ካሌሮ “ሀኡር አሪ ቶክ ዳሞዛ ሀሌዎ፤ ዛይቲና ዎይኒ እሮምርተ!” አማ ግራን እን ማለ። **7** እዳዶ ካአፋር ማታማ ካኮባናረ ጎራታ ታአፋር ኔፎ ታአብቶ መጣኮት ያየ፡ “ኮያ!” አማ ግራን እን ማለ፤ **8** እን ሽርንዶክ ፋራድ ዴ፤ ኡሱ ፋራዲ ጉት ካህማጼሮኮክ መገ

ጎይ አማማረ፤ ቦዋና ኡሱ ዴበ ሰሴታ ግረ፤ ጎይና ቦዋና ታኡሌ ገነ አፋርኮ ቶ ጀሬኒ፤ ኡኢ፤ ዱኩባ ኡሊ ጉት ኔፎ ታኡብቶ መጣ ጎሳጋድራኑን እሱን ኦዶናት ሰሳመ። (Hadēs g86) **9** ካከን ማታማ ካኮባናማረ ጎራታ፤ ሃፋራ ካዋ ማራና እሶ ካሰሰራን አቶ ማራን ካጎየሮ እባዶኮት ኔፎ ታጀርሶ ባንኤ ሃገሊ እን ዴ፤ **10** እሶና ታኦቲ ያዬይ፤ “ዱባንኮ ጦቂ ካእንተ፤ ቁሉክና ካሩም ዋ! ኡሊ ካግሮ እባዶ ጉት ካኮንፍርድኖና ኢግካን ማራን ሀሎ ካኮብያናዋታ አት ሀጌ ታ ጌቶንያ? አማ ኦኬን።” **11** እሶን መተመቼ ጉማራክ ሳርሰ ሰሳመ፤ እሶ እን ጋና ኦጎይናራውን፤ እሶ እን ኦሀንዳራን ሳትላልትሶና እቢላልትሶኮት ቶቶ ታ አማጋምራን ጎራታ ክጫር ጎሳኡብሰራውን እሶን ሰጋመ። **12** ኤሰኮ አባባተረ ኢዳዶ፤ ማታማ ካሌይ ካኮባናረ ጎራታ እን እሶ ቶሰ ዴ፤ ሀሱ ጎራታ ኡልኮክ ሻላጋማኖ ሌ፤ አርቲ ጋምባላክ ሳርሰ ካሬሰሴ እን ጋምባላ ሌተ፤ ድግንና ኢግ እን ሄላ ሌተ። **13** ታኦቲ አምባል ኬተጉደ ካባላሰ ጋ ጎአኢሶ ታዱባንተታ ኢል ጋኮ ጎሳኡባቶ ማለ ዳሩርኮ ባራጃልና ኡባተ። **14** ዳሩርና ካዱባመሮ ማጻፋ እን ዱባንተ ባተ፤ ዋዳሚል ዱባና ኦዶላል ዱባ ባንኤትሶኮ ባዬን። **15** ካኡሌ ዋኖላል፤ ሞትጀል፤ ካጀረን ዋይቻል፤ ዱሬሳል፤ ኦኦቲ፤ ድይል ባልቻል ዱባ ላጋልና ዋዳሚል ኤኤሞል ኦሮ ሰያሜን፤ **16** ዋዳሚልና ኤኤሞል፤ “ኖ ጉት እያ! ኮርፍንጀ ጉት ካሀማጾሮ ሆረ፤ ታኢዳዶ ኤንገኮ ኖ ጎልሳ! አመን። **17** ታኦቲ ታኤንጌ እሪ ኤሜተታ፤ እዮያ እራሳይ አልን ካዳንዴራ?” አመን።

7 ኤሰኮ አባባየረ ኤርግቻል አፋሮ ኡሊ ጉት ምና አፋርን አሌ ካግሮ እን ዴ፤ እሶና ኡሊና ሌረ በከ ኦሮ ጎርቱን ጋ ጉት አምባል ሱረ ጎሳኤኖንኮ ኡሊ ጉት ምና አፋርኮ ታኤማቶ አምባል ኣልሴን። **2** አርዶክ ሄዶኮክ ማታማ ካአበራ ካካለ ኤርግቻ ምና ታብያንኮ ኤመታ ግራን እን ዴ፤ ኡልና በከና ጎሳሚራውን ኦዶናት ካኮሰሰሮ ኤርግቻ አፋሩን ያየ ጦቂሰረ፤ **3** “ሄዶካኒን ኦሀንዳራንኮት በቤድ ጉት ኖ ማታማ ታ ካይኖን፤ ኡልና ሌረ በከ ጎርቱን ጋዶል አሮምርቴን” አመ። **4** ማታማ ካኮካመሮ እባዶኮኒዕ ቶቶና ማለ፤ ታእሰራኤል ኣኒኮ ማታማ ካኮካመሮ እባዶኮኒዕ ቶቶ 144,000። **5** ታይሁዳ ኣኒኮ ማታማ ካኮካመራ 12,000፤ ታሮቤል ኣኒኮ 12,000፤ ታጋድ ኣኒኮ 12,000፤ **6** ታአሴር ኣኒኮ 12,000፤ ታንፍታሌም ኣኒኮ 12,000፤ ታሚናሰ ኣኒኮ 12,000፤ **7** ታሰሞና ኣኒኮ 12,000፤ ታዋሮሌ ኣኒኮ 12,000፤ ታይሳኮር ኣኒኮ 12,000፤ **8** ታዛብሎን

እነኮ 12,000፥ ታዮሴፋ እነኮ 12,000፥ ታብንያመ እነኮ 12,000ዬን። **9** ሂካኮ አባባዩ፤ ማዮና ቶት ካሄሌሎን እባዶ ዴ፤ እሶ ጎሳ ዱባኮና እኒ ዱባኮ፥ ኡና ዱባኮና ካለካለት ሄኢ ካአዬሳሮ ዱባኮ ካበቤሮየ፤ ሂኒዕ ጉማራክ ሳርሰ ሳርሳቲረን፤ ባላሎ ኦዛንባባ ገነትሶይ አባተንጉረን ኮርፍንጃይና ኢዳዳይ ሆረ አሌን ግረን፤ **10** ታኦቲ ያዬ ኦካ፥ “ፋይና ካኮሄላማራ ኮርፍንጃ ጉት ካሀማጼሮ ሄዶካንኮና ኢዳዶኮያ!” አማ ግረን። **11** ኤርግቻል ዱባ ኮርፍንጃይና ጃርሶለይ ኔሮ ታኦቶ መጣ አፋሪ ማራሙረ አሌ ግረ፤ ኮርፍንጃይ ሆረ ግልቢሴን በቤዲ ኡል ኦዬረን ዋዉን ሳጋደን፤ **12** ሃና አመን፤ “ሀሚኒዕ! ሳድሳማኖ፥ ጂናን፥ ቃሩማ፥ ጋላታ፥ ካባጃ፥ ሁና፥ አታን ሄዶካንዉን ጅሩ ጅሮማኮ ታ ጅሩ ጅሮማ ጌሮ ሀሌዎ! ሀሚኒዕ።” (aiōn g165) **13** ጃርሶለኮ ኮ እን ቶሰ ካምባል አመረ፥ “ሂኒዕ ጉማራክ ሳርሰ ኦሳርሳቲራን እዮሰያን? ሀጌኮ ኤመቴራን?” አመ። **14** እንና “ጎታ! አት ካሶዋ” አመ። ኡሱና ኢን ሃ አመ፤ “ሂኒዕ ታኦቲ ራኮ ኦሮማሬን ሮረን ኦኤማተራንያን፤ ሳርሰክሶና ካኢዳዶ ኢግ አልሳቴን ጉማራ የላተራን፤ **15** ሃንሱን ኮርፍንጃ ካዋይ ሆረ አሌረን አሪና ሄመን ቁሉክ ምን ካዋይ ኡሱን ሀንዳራን፤ ኮርፍንጃይ ጉት ካሀማጼራና እሶን ምን ልናራ። **16** ሂታኮ ሆረንባን እሶ ላኮኡኢናራን፥ ላኮሱጉባይናራን፥ አሪትና እሶ ላኮባሶ፤ ፋርሳና እሶ ላኮሄልቶ። **17** ኮርፍንጃይ ጠኤ ካግራ ኢዳዶ እሶ ካፎፋሮ ልናራ፤ ኦግር በከኮክ ፋልቶ ቶሰ እሶ ቃጃልሰናራ፤ ዋ ኢልም ዱባ ኢልኦ ኦትሶኮ ሻካርናራ።”

8 እዳዶ ማታማ ካቶዶብ ካኮባናረ ጎራታ ሳቲ ቶኮት ምና ዳሩር ጫልእንተ፤ **2** ዋይ ሆረ ካአልናሮ ኤርግቻል ቶዶባ ዴ፤ እሶና ማላካታ ቶዶባ ሰሳመ። **3** አጣና ካኮኢዮሳራን ካዋርቂ ሁ ካአባተራ ካካለ ኤርግቻት ኤመተጉረ ታጃርሶ ባንኤ ዶሌ አሌ፤ ኮርፍንጃይ ሆረ ካግሮ ካጃርሶ ካዋርቂ ሁይ ጉት ካቁሎሌ ኤብነ ዋታ ካሰሳምሮ ካዋጋን ኢጣና ኡሱን ሰሳመ። **4** ካኢጣና ኢይ ካቁሎሌ ኤብነ ዋታ ገነ ታኤርግቻትኮ ዋ ቶሰ ቤ። **5** ሂታኮ አባባተረ ኤርግቻት ኢጣና ካኮኢዮሳራን አበጉረ ታጃርሶ ባንኤኮ ኤለን ክበ አማገጉረ ኡል ቶሰ ሻፈ፤ ድዲዴና፥ ታኦቲ ያዬ፥ ባንቃኖ፥ ኡልኮክ ሻላጋማኖና ሌ። **6** ማላካታ ቶዶባ ካአባተራ ኤርግቻል ቶዶባ ማላካታክሶ ኡፋፋይን እሰ ኤካሳቴን። **7** ካሆራርጃ ኤርግቻት ማላካታኬሳ ኡፋፈ፤ ኢግ ታኮለለዳመሮ በሌትና ኤለን ሌ፤ ኡል ቶንሳ ሻፋመ፥ ኡልኮና ገነ ታሴድ ጉባተ፤ ጋኮና ገነ ታሴድ ጉባተ፤ ካጫሪደራ ኤሰ

ዱባና ጉባተ። **8** ካለም ኤርግቻትና ማላካታኬሳ ኡፋፈ፥ ታንጂንት ዎዳም እን ካላራ መመ ቤባ በከ ኦሮ እዬ፤ በከና ገነ ታሴድ ኢግ ሌን፤ **9** በከ ኦሮ ታግቶ ኔፎ ታኡብቶ መጣኮ ገነ ታሴድ ጎተ፤ ማርካፋልኮና ገነ ታሴድ ኤኤብተ። **10** ካሴድ ኤርግቻትና ማላካታኬሳ ኡፋፈ፤ ዱብ እን ካቤባራ ካንጂንክ ባራጃ ዳሩርኮ እዬ፤ ካኢዩራና ካዳጋሮ ማዳ ገነ ታሴድና ካበከ ፋልቶል ጉቲያ። **11** ባራጃኮክ መገና እሬቶ አማማራ፤ ታበከ ገነ ታሴድኮ ገነ ቶ ኦኦኮኮታራን ሌን፤ ኦኦኮኮታራን በከኮት ኣላንቲ ካሞጋን እባዶ ጎዩ። **12** ካእፋር ኤርግቻት ማላካታኬሳ ኡፋፈ፤ እርት ገነ ሰድኮ ገነ ቶ፥ ድግኒ ገነ ሰድኮ ገነ ቶ፥ ባራጃል ገነ ሰድኮ ገነ ቶ ባሳመ፤ ሃንሱን እሶ ዱባኮ ገነ ሰድኮ ገነ ቶ ሙጉድ ሌተ፤ ኡሱማሌ አሪ ገነ ሰድኮ ገነ ቶና ሄመን ገነ ሰድኮ ገነ ቶ ኢፋ ካላይት ሌተ። **13** ሂካኮ አባባይረ እን ካኮዴር ጎራታ ላቦባ ቶ ዳሩርኮ ቡባ ታኦቲ ያዬይ፥ “ኦሄሴራን ኤርግቻጃ ሴዶ ማላካታክሶት ያየ ካኮማልሰሳሬን ጎራታ ኡሊ ካግሮ እባዶን ኣኔ! ኣኔ! ኣኔ!” አማ ኦካ ግራን እን ማለ።

9 ካከን ኤርግቻት ማላካታኬሳ ኡፋፈ፤ ዳሩርኮ ሄገልዴ ኡሊ ካኢዩሮ ባራጃ ኮ ዴ፤ ቦላክ ጉምቢ ካኮባናራን ቁልፍ ኡሱን ሰሳመ። (**Abyssos g12**) **2** ኡሱና ቦላክ ጉምቢ ባነ፤ ኢይና ካኦቲ አባርኮ ካበያሮ ኢይ እን ሌ ቦላክ ጉምቢኮ ቤ፤ ጉምቢኮ ካበያሮ ኢይኮት ኣላንቲ አሪትና ዳሩሪ ሙጉድ ሌተ። (**Abyssos g12**) **3** እይ ኦሮኮ ከንተፋሮል ቤጉረ ኡል ጉት ዳገ፤ ኡሊ ጉት ጫጫቦን ካሰሳመሮ ሁና ኣንክክ ሁና እሶን ሰሳመ። **4** ኡሊ ካግሮ ኤንሳ ሌረ ማመና ጫሪዶክ ኮኮ ጎርቱን ማምሰክ ጋ ጎጎሚሮንኮ እሶን ሰጋመ፤ ሚራኣምን ካዶትሳራ ጎአመን በቤዲ ጉት ማታማ ካዋ ካኮዋታመሮ እባዶ ካላልዩ። **5** እሶና ጎሌና ድግኒ ከኑን አቦሰሰንያ ኳሬ ላጋዲን ፈኢ ላኮሰሳንተቶ፤ ከንተፋሮልና ካጌግሳራ አቦሳ ጫጫቦ እባዶ ጎአባሮ ጎጎሀዉኢሳሮክ ማሌያ። **6** ኤሰ አሪ እባዶ ጎይ ሀልቶናራ፤ እየሱን ጎአመን ጎይ እሶ ላኮሄልናሮ፤ ጎይን ሀልቶናራን፤ እየሱን ጎአመን ጎይ እሶኮ ባቃይናራ። **7** ከንተፋሮልና ጀሬኑን ካኤካተሮ ፋራድ እን ላረ፤ መተክሶ ጉት ካዋርቂ ካላቻ እን ካላራ ኮኮ ግረ፤ በቤድትሶና ታአባዶ በቤድ እን ላቲ፤ **8** መተ ካሄለለ እን ካላሮ መተ አባናየን፤ ኢልኮኦትሶና ኦሉባን ኢልኮ እን ላረን፤ **9** እሶ ካማርጮ ላላ እን ካላሮ ሁ ካጀሬን ላላ አባናየን፤ ባላሎኦትሶኮክ ሃፋራ ጀሬን ሻፋይን ካትያራ ፋራንዳ ኦሶርጋን ታማልሰሳራን ያየ እን ላቲ። **10**

ጫጫቦ እን ደቤና ካኤጋሮ ሌማ አባናየን፤ ደበትሶይ ኦሮ ድግኒ ከኑን እባዶ ካኮሚርአን ሁና አባናየን። **11** እሶ ዋኖ አባናየን፤ ኡሱና ቦላክ ጉምቢኮክ ኤርግቻትያ፤ መገኬሳና ታኢብራይሰጢ ሄኢ አባዶን፤ ታግሪክ ሄኢ አጽልዮን አማማረ። **(Abyssos g12)** **12** ታሆሬ አኔ ሮርተታ፤ ሂታኮ አባባይደ ታካለ አኔ ላማ ጋና ኤመይናታ። **13** ካሌይ ኤርግቻት ማላካታ ኡፋፈ፤ ዋይ ሆረ ካግሮ ዋርቂኮ ካፈላመሮ ካጃርሶ ማሻኮ ያየ ብያ ግራን እን ማለ። **14** ኤስ ያየና ማላካታ ካአበሮ ካሌይ ኤርግቻት፤ “ካንጂንክ ላጋ ካኤፍራጢሲ ኦሽያሜሬን ኤርግቻል አፋሮ ፋር!” እንተ። **15** ህታ ሳቲዉና ህታ አርዉን፤ ህታ ድግንዉና ሂካ ጌሱን ኦኤካተራን ኤርግቻል አፋሮ ሳኒ ታአባዶ ገነ ሰድኮ ገነ ቶ ጎሳላጋድራኑን ፋራሜን። **16** ካፋራዴል ዋታዳራልኮክ ዋጋን ላማ ቦሌ ሚሎን ላኖ እን ማለ። **17** ፋራዴልና ፋራዲ ጉት ካህማጼሮ አባዶ ራጋይ ካኮዴራ ሂካማሌየ፤ ጌግዮትሶይ ካግረ ካጀረን ላላ ካኤሌኔ ቦላል እን ሄላክ፤ ካካባጃመ ኤኤዋ ጋምባላክ ዳሩር እን ካላሮ፤ ላጫ እንና ሄኣክየ፤ ኡሱ ፋራዴልኮክ መተ ካሉባን መተ እን ላረ፤ ህኢትሶኮ ኤለን ኢይና ላጫ ብያረ፤ **18** እሶ ህኢትሶኮ ታቤሰራን ኤለን፤ ኢይና ላጫ ህታ ኤንገ ሴዲ ሳኒ ታአባዶኮ ገነ ታሴድ ጎተ። **19** ኡሱ ፋራዴልኮክ ሁና ህኢትሶይና ደበትሶይ ግረ፤ ደበትሶና ሀበሳ እን ላቲ፤ ካሀበሳ መተ አባናየን፤ አባዶና ካኮሚራራን ኡሱያ፤ **20** ህታ ኤንጌ ጎይኮ ታሄሰታ ሳኒ ታአባዶ ገነትሶኮኒዕ ፈሎኮ አባባቴንጉረን ጨቦኮ ጉላ ላኮጋሌን፤ ዱርሳና ዋርቂኮ፤ ብርኮ፤ ናሰኮ፤ ኤኤዋኮና ጋኮ ካፈላመሮ ድያኖ ጎርቱን ማላኖ ጎርቱን ሰሴይን ካዳንዴኖን ቶልቻ ሄዶይሳታኖ ላኮኢሴን። **21** ኡሱማለና እሶ ኔፎ ላጋዳናኮ፤ ዋራኖክሶኮ፤ ሻርሙጣኖኮ፤ ሄታታኖኮ፤ ሂካ ጨቦኮ ጉላ ላኮጋሌን።

10 ሂካኮ አባባተረ ዱማንቻ ካሳርሳተራ ካካለ ካአቲ ኤርግቻት ዳሩርኮ ዳጋ ግራን እን ዴ፤ መተኬሳኮ ጉንተ ጀሬን ካኢዳዋ ግረ፤ በቤድቴሳ አርት እን፤ ሉቃኦቴሳ ቱኩል አልተ ታቤባቶ ኤለን አንዬን፤ **2** ካባናመሮ ክጫርክ ካጋልባ ማጻፋ ገነቴሳይ አባተ ግረ፤ ሉክ ታመርገ በከ ጉት፤ ሉክ ታበተ ባጋ ካተ፤ **3** ካሀርቃሮ ሉባንኮት ያየ እንትት ታአቲ ያዬ ኦኬ፤ ካኮኦካረ ጎራታ ድዲዴና ቶዶባ ያየትሶ ማልሰሰ። **4** ህታ ቶዶባ ታድድዴና ያየትሶ ካኮማልሰሳሬን ጎራታ እን ጸፊን ቆፓየ፤ አየሱን ጎአመን “ድድዴናል ቶዶባ ካአዬሰራን ጎልሳ ዋዳና አባ ኳሬ አርጻፍተ!” ታአማቶ ያየ ዳሩርኮ እን ማለ። **5** ሂካኮ አባባተረ በከ ኦሮና ባጋ አሌ

ግራን እን ካዳረ ኤርግቻት ገነ ታመርገ ኤለዳሰ ዳሩር ቶሰ ኬሳተጉረ፤ **6**
 ጅሩ ጅሮማኮ ታ ጅሩ ጅሮማ ጌሮን ካግርናሮ፤ ዳሩርና ዳሩሪ ካግሮ፤ ኡልና
 ኡሊ ጉት ካግሮ፤ በከና በከ ኦሮ ካግሮ ካመጠሮኮክ መገይ እማተረ ኡሱ ሃ
 እመ፤ “ሂታኮ ሆረንባን ላኮአዳላይናሮ! (aiōn g165) **7** እየሱን ጎእመን ካቶዶብ
 ኤርግቻት ማላካታ ኡፋፈ ካኮማልሰሳሮ አርጂሊ ኡሱን ኦሀንዳራን ኦሄገሮሉን
 ጎጎሰጌሮክ ማለ ሆል ታዋ ፈሎ ሀይሰናራ።” **8** ኤስኮ አባባረ ሀሴ ዳሩርኮ
 እን ታማለራ ያየ፤ “በከና ባጋ ካኤሌሮ ኤርግቻት ቶሰ ሴጉዳ ገነቴሳይ ካግሮና
 ካባናመሮ ካጋልባ ማጻፋ አት” እማ አደ ኢን እዬሰ። **9** እን ኤርግቻት ቶሰ
 ሴየጉረ፤ “ክጫርክ ካዱባመ ካጋልባ ማጻፋ ኢን ሰሰ” እመ፤ ኡሱና “ኣትጉደ
 እም፤ ቦግካይ ካኦኮኮተ ልናራ፤ ሀኢታውን አደ ማላብ እን ኦኖሞይናራ” እመ።
10 እንና ክጫርክ ካዱባመሮ ካጋልባ ማጻፋ ታኤርግቻት ገነኮ አታየረ እመ፤
 ሀኢቴይ ማላብ እን ኦኖሞተ፤ እመ ካኮአባባታረ ጎራታ ቦግክ ካኦኮኮተ ሌ። **11**
 ኤስኮ አደ፤ “ታሞጋን ኡና ማራን፤ ጎሳ ማራን፤ ሄኢ ታሞጋን ካእዬሳሮ እባዶ
 ማራና ዋኖላል ማራን አድ እት ሄገሮ እዬሰን ዶትሳራ” እማመ ኢን ሰጋመ።

11 ሂካኮ አባባተረ ኮኮ ኤካሰን ታማዳቶ ዳማ ኣንክክ ፊቀ ኮ ኢን ሰሳመ፤
 ኢንና ሃ እመ፤ “ክንጉዳ ቁሉክ ምን ካዋና ጃርሶ ታኮሰሳራን ባንኤ ሀሰል ኦይ፤
 ኤሴና ዋ ኦሄዶይሳታራን ቶቲ፤ **2** ቁሉክ ምን ካዋኮ ሳሬ ታግቶ ሀላልት ባንኤ
 ጎእመን እሰ፤ ሀሴ እይዛብን ታሰሳንተቶ ማንኮሌተ ማራን ሀሰሊ አሮኦይተ፤
 እይዛብና ህታ ቁሉት ካታማ ድግኒ አፋርታምኮ ላማን ዳዳር ባሪሰናራን፤ **3**
 አቶጃ ላማ ኡት ካሬሰሴ ሳርሰ ሳርሳይጉሬን ኩማ ኮኔ ላማ ቦላኔ ሎታም
 አርጂል ሄገሮ ጎጎአየሰራውን እን እሶን ሁና ሰሰናራ።” **4** እሶ ካኡሌ ጎታይ ሆረ
 ኦአላራን ካኤጀርሳ ጋ ላማና ቦላንሶ ላማያን፤ **5** ማዮና እሶ ሚሪዕን ጎዶተ
 ኤለን ሀኢትሶኮ ብጉደ ዲናክሶ ጉብናታ፤ እሶ ሚሪዕን ካዶታራ ዱባ ካኮጎይናራ
 ሂካማሌያ። **6** እሶ ሄገሮ ታኮአዬሳራን ሀኡኡ አርጂሊ ኢዳሞ ጎጎኡባኖንኮ ዳሩር
 ጨፍን እሶ ኦዶናት አባን፤ ኡሱማሌ በከና ኢግ ቶሰ ኢግልሰና ካኮዶታቴን ጎራታ
 ዱባይ ማምሰት ኤንገና ኡሊ ጉት ኬኒን ኦዶናት አባን። **7** አቶታኖክሶ ጉድሴን
 ካኮአባባታራን ጎራታ ቦላክ ጉምቢኮ ካበያራ ሱላለት እሶን ዋታ ጀሬን ሻፋይጉረ
 እሶ አዋድናራ፤ ላጋድናራ፤ (Abyssos g12) **8** ሬሰክሶ ማሱሳኮት ኡምቱን ሶዶም
 ጎርቱን ግብጽ ታአማማቶ ታአቲ ካታማኮት አጋሪይ ሁዱርናራ፤ ህት ካታማ

ጎታክሶ ታኩሱዋመረታ። **9** ካለካለት ኡናና ኣኒ ካለካለት ሄኢ ካእዬሳራ እባዶና ጎሳ እሪ ሴንዳ ምናና ሬስክሶ ድናራን፤ ሬስክሶና ጎንቃማላሞንኮ ትርናራን። **10** ሂኒዕ ኦሄገሮል ላማ ኡሊ ካግሮ እባዶ ዱባ ማንኩጫናቅሰረን ማራን ኡሊ ካግራ እባዶ ሂካ ሄገሮልኮክ ጎይን ገጌላይናራን፤ ካገጌሎ ባላና ካባጃይናራን፤ እላቦና እስእስኦሮ ሰሳይናራን። **11** አየሱን ጎእመን ህት አሪ ሴንዳ ምናና ካኮሮራተ ጎራታ ግር ታሰሳታ ጌፎ ዋኮ ኤመተዴ ሬስጃሊ ታብተ፤ ሉቃኦትሶይ እሌን፤ እሶ ካዴራ እባዶና ኣሎ አብሳተ። **12** ሂታኮ አባባቴንጉረን ኦሄገሮል ላማ፡ “ሂታራ ኤልዳ ኮዬን!” ታእማቶ ታእቲ ያየ ዳሩርኮ እሶ ማለን፤ ዲናክሶ እሶ ድያግራን ዲማንቻይ ዳሩር ቶስ ቤን። **13** ጎርሰዋ ሀሴ ሳቲ ኡል ኣኤ፤ ኤስ ካታማይ ገነ ቶሞንኮ ገነ ቶ ባተ፤ ካእቲ ኡል አእኖኮት ኣላንቲ ኩማ ቶዶባ እባዶ ጎየ፤ ጎይኮ ኦሄሴራን ኣሎ አብሳተን፤ ካዳሩረ ሄዶ ጋላተን። **14** ታላም ራኮ ሮርተታ፤ አደ ታሴድ ራኮ ሳም ኤመይናታ። **15** ካቶዶብ ኤርግቻት ማላካታ ኡፋፈ፤ ዳሩርና፡ “ካእላም ዋኖናት ጎታ ሄዶካንክና ካክርሰቶሳ ሌራ፤ ኡሱ ጅሩ ጅሮማኮ ታ ጅሩ ጅሮማ ጌሮ ሬድናራ፤” ታእማታ ታእቲ ያየ ማልሳንተ። (aiōn g165) **16** ዋይ ሆሪ ኮርፍንጀክሶይ ጉት ታሀማጽተታ ጃርሶሊ ላማታንኮ አፋሮና በቤዲ ኡል ኦይተደ ዋዉን ሳጋይ፤ **17** ሃና አንተ፤ ካግታና ካግቲ፤ “ዱባ ካዳንዳታ ጎታ! ካንጂንክ ኦዶናትካ ገነታይ ማንኩአባተቶ ማራና፤ ማንኩሬደቶ ማራን ኖ ኩ ጋላታና። **18** እይዛብ ኢኦተራ፤ ኤንገታና ኤሜተታ፤ ካጎየራ ፍርዳ ካኮአታይናራ ጎራታ ጌራ፤ ኩን ካህንዳሮ ካሄገሮልካዉና ቁሎሌዉን መገካ ኦካባጃራኦን፤ ክጨጨሩና ካጂንጂኦን፤ ሙራትሶ እሶን ካኮሰሰናታ ጎራታ ጌራ፤ ኡል ኦባሳራን አት ካኮባሰናታ ጎራታ ጌራ።” **19** ዳሩሪ ካግራ ቁሉክ ምን ካዋና ባናመ፤ ካእማቶ ታቦታኬሳ ቁሉክ ምን ካዋይ ኦሮ ሙተ። ባንቃኖ፤ ያየ፤ ድዲዴና፤ ኡልኮክ ኣእኖና ታእቲ በለት ሌተ።

12 ሂካኮ አባባተረ ካጂንክና ካሳድሰራ ማላታ ዳሩሪ ሙተ፤ እርት ታሳርሳተታ፤ ድግኒ ሉቃኦትሴኮ ሄገሌ ታካተታ፤ ቶሞንኮ ላማ ባራጃል መተክሴይ ጉት ካላቻ ኣን ታካተታ ሄለልትቲ ቶ ሙተ። **2** ኤሰና ፋቶነ ግቲ፤ ኡሙልን ኡሙላይ አባንተደ ጫናቃማ እያ ግቲ፤ **3** ኡሱማለና ካካለ ማላታ ዳሩሪ ሙተ፤ መተ ቶዶባና ማሻ ቶሞን ካእባናየ ካንጂንክ ሄለክ ዶቦሰ ሙተ፤ መተኬሳ ጉት ካላቻ ቶዶባ ካመ ግረ። **4** ደበቲሳይ ባራጃ ገነ ሰድኮ ገነ ቶ ዳሩርኮ ናቲ ኡል

ሉጉደ፤ ደቦንሳ ሄለልትቲ ካኮሎሙልተ ጎራታ ዪትትክሴ ኤነግን ሄደረ ኡሙልን ታጋባላንተቶ ሄለልትቲ ሆረ አሌ። **5** ሄለልትቲና ጎሳ ዱባ ሁና ካባሪሰሮ ባባርትት ኡሙልተ፤ ኡኑክሰ ጎአመን ዋ ቶንሳ ኮርፍንጀ ቶስ አታመ፤ **6** ሄለልትቲና ባቃተ ቃሉላቶክ ኡል ቤተ፤ ኤስ ኩማ ኮኔ ላማ ቦለኔ ሎታም አሪ ኮኮባም አባምደ ታኮሀማጺቶ ባንኤ ዋ ኤስን ኤካሰረ። **7** ዳሩሪ ጀሬን ኬ፤ ሞካኤልና ኤርግቻልኬሳ ደቦንሰ ዎታ ጀሬን ሻፋቴን፤ ደቦንሳ ኤርግቻልና ዎታ አባባተን ጀሬን ሻፋቴን። ኤርግቻልኬሳን ዎታ ጀሬን ሻፋቴን፤ **8** እየሱን ጎአመን ደቦንሳ ኤርግቻልኬሳ አዎዳሜን፤ ኤስኮ አባባቲረን ዳሩሪ እሶን ባንኤ ላኮሄላንተ። **9** ካንጂንክ ደቦንሳ ሄገልዴ ኡል ሻፋመ፤ ኡሱ አላም ዱባ ካሶሶይሳሮ ዱርሳ ጎርቱን ጸላየ አማመ ካኡማማሮ ካጣዎ ሀበሳያ። ኡሱ ሄገልዴ ኡል ቶስ ሻፋመ፤ ኤርግቻልኬሳና ኡሱን ዎታ ሻፋመን። **10** ሂካኮ አባባየረ ታኦቲ ያየ ቶ ዳሩሪ ሃ አማ ግራን አን ማለ፡ “ሂክማ ፋይና፡ ሁናና፡ ዎኖናት ሄዶካንዉን ሌራ! ኦዶናትና ካክርሰቶሳ ሌራ! ኣላንቲና አቢላልታን አሪና ሄመን ሄዶካን ሆረ ዋታ ካግረ ሻፋመራ፤ **11** እሶና ካኢዳዶ ኢግና ካአቶቴራን ካአቶ ሃፋራ አዎዴራን፤ ኔፎትሶዉና ሀማራሮን እስኦትሶ ጎይን ሮርሳይ ሰሳይን ኤካሳቴን፤ **12** ሃንሱን ዳሩርጃልና ኤስ ኦሮ ኦግታን ዱባ ገቤላየን! አሪ ኡጫር ታላል ሄሳኖ ዱርሳ ማንኮካሶ ማራን ታኦቲ ኤንጌ እሰን ቶስ ዳገራ፤ ኡልና በከና ኣኔ እሰኑን!” **13** ደቦሰ ሄገልዴ ኡሊ ሻፋማኖ ካኮአዴሳታረ ጎራታ ባባርትት ታኡሙልተቶ ሄለልትቲ ዴጉረ ሆሮረ፤ **14** ሄለልትቲ ቃሉላቶክ ኡሊ ታኤካተቶ ባንኤ ቶስ ቡባ ጎንሴቶ ኦኦቲ ኦላቦባ ባላሎ ኣን ኦላራን ባላሎ ላማ ኤስን ሰሳሜን፤ ኤስ ሀበሳኮ ፋክ አንተጉደ ጌስ ሴንዳ ምናና ኮኮባም ጎንኦራንቶንያ። **15** በከ ኦላጋ ሄለልትቲ አት ጎንዳግራዉን አመረ ሀበሳ በከ ኦላጋ ግታኒዕ በከ ሀኢቴሳኮ ሄለልትቲኮ ሃር ሀይሰረ ኡበ። **16** እየሱን ጎአመን ኤሬ ሄለልትቲ ጋርጋርተ፤ ኤሬና ባናንተጉደ ደቦሰ ሀኢቴሳኮ ኦኡበረ በከ ጣንተ **17** ደቦንሳ ሄለልትቲ ጉት አማራተጉረ ታሄሰቶ ሳኒትሴን ዎታ ጀሬን ሻፋይን ሴተ፤ እሶና አጃጃ ካዋ ኦኦራታሬና የሱሳን አብዳሜን ኦአቶታራንያን።

13 ደቦንሳ ላቡ ግርዲ ጨካሌ ጉት አሌ። ሂካኮ አባባየረ አን ሱላለት ኮ በከ ኦሮኮ ብያ ግራን ዴ፤ ማሻ ቶሞና መተ ቶዶባ አባናየ፤ ማሻ ጉት ካላቻ ቶሞኖ ግረ፤ መተ ቶዶባ ጉት ካሀባር መገ ግረ። **2** አን ካዴራ ሱላለት ኬቤል ኣን ካላረየ፤ ሉቃኦቴሳ ድብ ካአማማሮ ሱላለት አኒዕዬን፤ ሀኢቴሳና ታሉባን ሀኢ

እን ላቲ። ዶቦንሳ ሁናኬሳና ኮርፍንጀኬሳ ካንጂንክ ኦዶናትኬሳ ሱላለቲን ሰሰ። **3** ኡሱ ሱላለትኮክ መተኮ ኮ ጎይን ታጌግሳቶ ሜጋ ካአቦ እን ካሌሮ ዴ፤ አየሱን ጎአመን ጎይን ታጌግሳታ ሜጋ ፋይተታ፤ አላም ካግራ እባዶ ዱባ ሳዳ ኡሱ ሱላለት ዴበ ሰሴተ። **4** ሱላለቲን ኦዶናት ማንኮሰሳመ ማራን እባዶ ዱባ ዶቦሱን ሳጋደ፤ “ሱላለት እን ካላራ አዮያ? ኡሱን ዋታ ጀሬን ሻፋይን ካዳንዴራ አዮያ?” አማ ሱላለቲን ሳጋደን። **5** ጮራ ታኮአዬሰራና ታኮሀባራ ህኢ ሱላለቲን ሰሳንተ፤ ድግኒ አፋርታምኮ ላማ ኦዶናትኬሳይ ጎጎፈሎን ፈኢ ኡሱን ሰሳንተ። **6** ዋና መገ ካዋ፤ ምንኬሳና ዳሩሪ ኦግራን ሀባራኖ ሀጋአበን። **7** ቁሎሌን ዋታ ጀሬን ጎጎሻፋርና እሶ ጎጎአዋድሮን ኦዶናት ኡሱን ሰሳመ። እኒና ኡናይ፤ ካለካለት ሄኢ ካአዬሳርና ጎሳ ዱባ ጉት ኦዶናት ሰሳመ። **8** አላም ታኮመጣመሮኮ ሀጋአበረ መገክሶ ኮክ ካጎሳመሮ ኢዳዶኮክ ካግር ማጻፋይ እንጻፋምን ካግራ ካአላም እባዶ ዱባ ሱላለቲን ሳጋደ። **9** ነበ ካአባ ጎግረ ሀማሎ! **10** “ቦጃሚን ካኤካተራ ቦጃምናራ፤ ሺፋይ ጎይን ካኤካተራ ሺፋይ ጎይናራ፤” ጎርታ ታቁሎሌ ኦብሲና አማኖ ካኮዶትሳራ ጎራታ ሂካያ። **11** ካካለ ሱላለት አደ ኡልኮ ብያ ግራን እን ዴ፤ እዳድ እን ማሻ ላማ አባናየ፤ አዬሰኬሳና ካዶቦሰ አየሰ አንየ፤ **12** ካሆሬ ሱላለትኮክ ኦዶናት ዱባ አታተረ ኡሱ ሆረ ኦዶናት ፈላ ግረ፤ ኡልና ኡሊ ጉት ካግራ ዱባ ካሆሬ ሱላለቲን ጎጎሳጋድሮ የልሰሰ፤ ሂክ ሱላለትና ሀሴ ጎይ ታጌግሳታ ሜጋ ካኮፋይተቶ ካሆሬ ሱላለትያ። **13** ሂክ ካላም ሱላለት እባዶ ሆረ ኤሊን ዳሩርኮ ታዳግሰሮ ጊን ካጂንጂን ባሳ ፈላ ግረ። **14** ካሆራርጃ ሱላለት ሆረ ባሳ ጎጎፈሎን ፈኢ ታኮሰሳንተቶ ኣላንቲ ኡል ካግሮ እባዶ ሶሶይሳ ግረ፤ ሺፋይ ሜጋተረ ካፋዬሮ ታሱላለትኮት ካባጃን ምሰሊ ጎጎፈላውን ኡሊ ጉት ካግሮ እባዶ አጃጃራ። **15** ካላምክ ሱላለት ካሆሬ ሱላለትኮት ምሰሊ ኔፎ ሰሰን ኦዶናት ሰሳመ፤ ኔፎ ሰሰን ኦዶናት ካኮሰሳመራና ህት ምሰሊ አዬሰን ጎጎዳንዴቶና ካሆሬ ሱላለትኮት ምሰሊውን ካሳጋዶን ዱባ ጎጎ ጎርን የልንያ። **16** ካላምክ ሱላለት ክጭጫርና ሌረ ካጅንጂን፤ ዱሬሳልና ሌረ ህየሳል፤ ጎቶሌና ሌረ ድይል፤ ዱባ ታመርገ ገነትሶይ ጎርቱን በቤድትሶ ጉት ማላታ ጎጎካናውን ሁኖመ። **17** ሂካማሌ ካሱላለቲ መገ ካቱሳራ ማላታ ጎርቱን መገኬሳኮኒዕ ቶቶ ካላይክ ማምሰክ እባዶትና ኮኮ አምናዬና ሌረ

ዳዳላይን ላኮዳንዳሮ። 18 ጎርታ ቃሩማ ካኮን ዶታማታ ሂካኒ ጉቲያ፤ ሳሙ ካእባ ቶቶ ኦሱላለቲ ሀቶቴ፤ ሂኒዕ ቶቶና ካቱሳራን እባዶያ፤ ቶቶና 666።

14 ሂካኮ እባባተረ እን ታጽዮን ዎዳሚ ጉት ካእሌሮ ኢዳዶ ዴ፤ ኡሱኒ ዎታ መገኬሳና ኣቦኬሳኮክ መገ በቤድትሶይ ጉት ካጸፋመራ እባዶ 144,000የ።

2 ዳሩርኮና ታኦቲ ያዬ ካዳጋሮ ማዳኮት ያየና ካኦቲ ድዲዴና ኣነትት ታኦቲ ያየ እን ማለ፤ እን ታማለራ ያየና ክራን ካባሳራ ክራን ባሳ ታማልሰሳሮ ያየ ኣነ ላቲ። 3 ኮርፍንጃይና ኔፎ ታኡብታ መጣ አፋሮ፤ ጃርሶለይ ሆረ እባዶ 144,000 ካኡሱብ ማዛሙር ዛማሬን፤ ሂካ ማዛሙር ኡልኮ ኦዎዶዎመራን እባዶ 144,000 ኳሬ ማዮና ኢጋልሳይን ላኮዳንዴ። 4 እሶ ሙመኒዕ ማንኮሌራን ማራን ሄለልኔ ዎታ ሁዱራኖይ ላኮባቶየራን፤ ኢዳዶት ማንኮሌታሮ ዱባ ዴበ ሰሴታራን። እሶ ዋወና ኢዳዶን እባዶ ዱባ ኦርኮ ሆራ ኣነ ሌን ኦሰሳሜራንያን።

5 እሶ ጣራ አዬሴን ላኮካሳን፤ ቱፍ ካላይኒዕያን። 6 ሂካኮ እባባተረ ኡሊ

ካግሮ ጎሳን፤ ኣኒውን፤ ካለካለት ሄኢ ካእዬሳሮና ኡና ዱባን ላላብን ጅሩ ጅሮማክ ዎንጋላ ካእበራ ካካለ ኤርግቻት ዳሩሪ ቡባ ግራን ኣነ ዴ፤ (aiōnios

g166) 7 ታኦቲ ያዬ “ዋ አብሳዬን! ኡሱ ካባጃ! ታፍርዳ ሳቲቴሳ ጌተታ፤ ኡልና

ዳሩርና፤ በከና በከኮክ ፋልቶ ካመጠሮ ሄዶን ሳጋዳ!” እሙ። 8 ካካለ ካላም

ኤርግቻት “ካሻርሙጡማ ኤንገኮክ ካዎይኒ ጣሞክሴ ጎሳ ዱባ ታጣምሰታ

ታንጂንት ባብሎን ኢተታ! ኢተታ” እማ ካሆሬ ኤርግቻት ዴበ ሰሴተ። 9 ካካለ

ካሴድ ኤርግቻት ያየ ጦቂሰረ ሃ እማ እሶ ዴበ ሰሴተ፤ “ሱላለይና ሞሰሊ

ኦሳጋዳራን፤ ማላታ በቤድትሶይ ጎርቱን ገነትሶይ ኦካታራን ዱባ፤ 10 ኤንገ

ታዋኮክ ካዎይኒ ጣሞ ጣማራን፤ ሂክ ካዎይኒ ጣሞ ኣንለለዳሞን ግራን

ታኤንጌ ጡጋይ ካሁሙሳመሮያ፤ ኡሱማለና ቁሉክ ኤርግቻ ሆረና ኢዳዶ ሆረ

ኤሌኒና ቦላል አቦሳምናራን። 11 እሶ ታኦባሰሳቶ ኤሌንኮ ካበያራ ኢይ ጅሩ

ጅሮማኮ ታ ጅሩ ጅሮማ ጌሮ ኤልዴ ብያራ፤ ሱላለቲና ሞሰሊቴሳውን ኦሳጋዳራን

መገኬሳኮክ ማላታ ኦካተራን ዱባ አሪና ሄመን ፎልሲ ላኮአባን።” (aiōn

g165) 12 አጃጃ ካዋ ኦኦራታራንኮና የሱሳ እማናኖይ ኦኦታታራን ቁሎሌኮ

ታኦራማታ ኡብሰ ሂካኒያ። 13 ዳሩርና ሃ ታእማቶ ያየ እን ማለ፤ ሂካ ጸፍ፤

“ሂታኮ ሆረንባን ኦጎታ ሌን ኦጎዋራን ኦሶማሳመንያን!” አያና ቁሉክና “እ! እሶ

ዳፋርክሶኮ ጎጎፎልሳውን ፈሎኦትሶ እሶ ዴበ ሰሴታራን” እማራ። 14 ሂካኮ

አባባሪ እን ዲማንቻ ጉማራክ ዴ፤ ዲማንቻ ጉት ኤረ ካእባዶ እን ካላራ ሀማጼራ፤ መተኪሳ ጉት ካዋርቂ ካላቻ ካተራ፤ ገነቴሳይ ታኤነናን ባጫ አባተራ፤

15 ካካለ ኤርግቻት ቁሉክ ምን ካዋኮ ቤጉረ ዲማንቻ ጉት ካሀማጼሮን ያየ ጦቂሰረ፡ “ካም ካኮኩኩይሳናን ጎራታ ማንኮጌሮ ማራን ባጫታይ ታካ፤ ካም እንጋገራ እመ ኦኬ።”

16 ዲማንቻ ጉት ካሀማጼረክና ባጫ ሄገልዴሰ ኡል ቶሰ ሉጉደ፤ ኡሊ ካግራ ካምና ታጋመ።

17 ካካለ ኤርግቻትና ዳሩሪ ካግሮ ቁሉክ ምን ካዋኮ ቤ፤ ኡሱና ታኤነናን ባጫ አባተ ግረ።

18 ኤለኒ ጉት ኦዶናት ካከባ ካካለ ኤርግቻት ታጀርሶ ባንኤኮ ቤጉረ ታኤነናን ባጫ ካእበሮ ኤርግቻትን፡ “ታዎይኒ ኢል ዲፋር ማንኮዲባንተቶ ማራን ታኤነናን ባጫታ ፋር፤ ታዎይኒ ኢል ዲባ ኡልኮ ጎሰደ ኩኩይሰ!” እማ ያየ ጦቂሰረ ኦኬ።

19 ኤርግቻትና ባጫ ሄገልዴሰ ኡል ሉጉደ፤ ታኡሌ ዎይንኮት ኢል ጎሰ፤ ታኦቲ ኤንገ ታዋኮት ዎይኒ ታኮሚጫማቶ ባንኤ ቶሰ ኦሮዴሰ ሉጉደ።

20 ካታማኮ ሳሬ ታግታ ዎይኒ ታኮሚጫራን ባንኤ ሚጫንተ፤ ዎይኒ ታኮሚጫራንኮ ብጣላ ካፋራዴ ታ ጌሮ ኤለ ጦቂ ካእመና ኤርና ሴድ ቦሌ ክሎ መትራ ካጌራ ኢግ ቤ ኡባተ።

15 ካካለ ካኦቲና ካሳዳምሮ ማላታ ዳሩሪ እን ዴ፤ ኤንገ ታዋ ፈሎይ ካኮሃታ ታጋቾ ታሌተቶ ኤንገ ቶዶባ ካእበሮ ኤርግቻል ቶዶባ እን ዴ።

2 ሂካኮ አባባሪ ኤለን ታኮላለዳንተቶ ማሰቶቲ እን ኦላራን በከ እንክክ ማመ እን ዴ፤ ኡሱማለና ሱላለትና ሱላለትኮት ምስሊ፡ መገኬሳኮኒዕ ቶቶና ማላታ ካእዎዴሮ እባዶ እን ዴ፤ እሱና ዋ ካሰሰሮ ክራን አበንጉረን ማሰቶቲ እን ኦላራን በከ ዶሌ አሌን ግረን።

3 ዋዉን ካሀንዳረ ካሙሴ ማዛመርና ካኢዳዶ ማዛመር ሃ እማ ዛማራ ግረን፡ “ዲባ ካዳንዳታ ጎታ ሄዶ! ፈሎኦታ ኦኦቲና ኦሳዳምራንያን፤ ካጎሳ ዋና! ራካና ቱኩልክና ካሩምያ፤

4 ጎታ! ኩ ካእብሳናና መገካ ካካባጂኖን እዮያ? እት ካላል ቁሉክታ፤ ካሩም ፍርዳካ ማንኮሙተሮ ማራን ጎሳ ዲባ ኤመይረ ኩ ሆረ ሳጋድናራ።”

5 ሂካኮ አባባሪ ታኦቶ ዳሰ ካኮግቶ ቁሉክ ምን ካዋ ዳሩሪ ባናመ ግራን እን ዴ፤

6 ኤንገ ቶዶባ ካእበራ ኤርግቻል ቶዶባ ቁሉክ ምን ካዋኮ ቤን፤ ሙጭ ካእመ ካሀንቃሮ ጉማራክ ሳርሰ ሳርሳቴን ግረን፤ ጌግዮትሶይና ካዋርቂ ሞዋኖ ሞዋቴን ግረን።

7 ኔፎ ታኡብቶ መጣ አፋርኮ ኮ ጅሩ ጅሮማኮ ታ ጅሩ ጅሮማ ጌሮን ካግርናሮ ዋኮት ኤንገ ካኮአማጋንተቶ ቶዶባ ታዋርቂ ጡጋል እሱን ሰሰ። (aiōn g165)

8 ቁሉክ ምን ካዋና ካባጃ ታዋኮና ሁናኮ

ካከይ ኢዪ እማጋመ፤ ኤርግቻል ቶዶባ ታክበራ ኤንገ ቶዶባ ታጉዳቶ ማዮና ቁሉክ ምን ካዋ ኦሮድ ታብን ላኮዳንዴ።

16 ሂካኮ አባባየረ ኤርግቻል ቶዶባ፤ “ሴዬን! ኤንገ ታዋ ካእበሮ ጡጋል ቶዶባ ኡሊ ኡባ!” ታኦማታ ጦቂ ታኢንተ ያየ ቁሉክ ምን ካዋኮ ብያ ግራን እን ማለ። **2** ካሆሬ ኤርግቻት ሴተጉረ ጡጋ ኡሊ ኡባ፤ ካሱላላቲ ማላታ ካእቦዉና ታሱላለት ምስሊ ካሳጋዳሮ እባዶ ጉት ታማላና ታክበሰሳ ሜጋ ቤተ። **3** ካላምክ ኤርግቻት ጡጋ በከ ኦሮ ኡባ፤ በከና ካጎዩ እባዶኮክ ኢግ ኣን ሌን፤ በከ ኦሮ ካግራ ኔፎ ካእባ ዱባ ጎዩ። **4** ካሴድ ኤርግቻት ጡጋ ላጋይና ፋልቶል ጉት ኡባ፤ እሶና ኢግ ሌን፤ **5** በከ ጉት ኦዶናት ካእባ ኤርግቻት ሃ እማ ግራን እን ማለ፤ “ካግቴና ካግታ ቁሉክ ጎታ! ሂካማሌ እት ማንኮፍርዲተቶ ማራን እት ጋራታ፤ **6** እባዶ ቁሎሌኮክና ካሄገሮልኮክ ኢግ ማንኮኤበሮ ማራን እት እሶ ኢግ ጣምሰ፤ ህክና እሶን ካዶትሳሮያ፤” **7** ታጀርሶ ባንኤይ፤ “እ! ዱባ ካዳንዳታ እት ጎታ ሄዶ! ፍርዳካ ሩምና ልክኪያ” ታኦማቶ ያየ እን ማለ። **8** ካእፋር ኤርግቻት ጡጋ እርት ጉት ኡባ፤ እሪትና እባዶ ጎጎጉብቶን ሁና ኤሰን ሰሳመ። **9** እባዶና ካእቲ ዋባና ካእሪቲ ጉባተ፤ ህታ ኤንገ ጉት ኦዶናት ካእባ መገ ካዋ ሀባራመ፤ ጨቦኮ ጉላ ላኮጋሌን፤ ዋና ላኮካባጄን። **10** ካከን ኤርግቻት ጡጋ ኮርፍንጀ ካሱላላቲ ጉት ኡባ፤ ዋናናት ካሱላላትና ሙጉድ ሌ፤ እባዶ አቦሳኮ ካከይ ሙንጀ ፎጫ ግረ። **11** ሀወአም ክሶኮና ሜጋትሶኮ ካከይ ካዳሩረ ሄዶ ቃንጌን፤ ፈሎ ኦትሶኮና ጉላ ላኮጋሌን። **12** ካሌይ ኤርግቻት ጡጋ ካኤፍራጢሰ ካእቲ ላጋ ኦሮ ኡባ፤ ምና ታብያንኮ ካኤሜታሮ ዋናላሉን ራ ኤካሰን በከ ኦላጋ አንጋጌን። **13** ታሱላለት ህኢኮና ታዶቦሴ ህኢኮ፤ ካጣራ ካሄገሮኮት ህኢኮ ጎጎ ኣን ካላራ ባቲክ እያና ሴዶ ብያግራን እን ዴ፤ **14** እሶ ባሳ ኦፈላራን ካዱርሳ ባቲክ እያናያን፤ ሂክ ባቲክ እያና ዱባ ካዳንዳሮ ሄዶኮት ታኢቲ እሪ ካክናሮ ጀሬኑን እባዶ ኩኩይሰን አላምኮክ ዋናላል ዱባ ቶሰ ሴይናራን። **15** “እን ሄቶ ኣን ደራኣ ኤመይናራ! ሀወአይ ጎጎሌኖንኮና ሙላኬሳ እባዶ ጎጎዴኖንኮ አዳሰረ ሳርሰ ካኦራታራ እባዶ ካሶማሳመያ!” **16** ባቲክ እያናና ዋናላል ሄኢ ታኢብራይሰጢ አርማገዶን ታኦማማቶ ባንኤ ኩኩይሰ። **17** ካቶዶብ ኤርግቻት ጡጋ አምባል ጉት ዳረኤ፤ ቁሉክ ምን ካዋ ኦሮ ካግሮ ኮርፍንጀኮ “ጉዳተዋ!” ታኦማታ ታኢቲ ያየ ቤተ። **18** ባንቃና፤ ያየ፤ ድዲዴና ካእቲ ኡልኮክ አኣኖ ሌ፤ ሂካ ኣንክክ ካእቲ ኡልኮክ

አኣኖ እባዶ ሂካ ኡል ጉት አረመጣመኩ ሀጋአበረ ሂካማሌ ሌ ላካሶ። **19** ታኦቲ ካታማ ባንኤ ሴድ ቤተ፤ ካእይዛብ ካታማልና ዲጋመ፤ ዋ ታንጂንት ባብሎን ሻደ፤ ታኦቲ ኤንጌ ካዎይኒ ጣሞ ታኮአማጋንተቶ ጡጋ ጎጎጣምራውን የለ። **20** እድላል ዱባ ቶላዴን ባቃተን፤ ዎዳሚልና ላኮሙተ። **21** መተመተይ አፋርታምኮ ከን ኪሎ ግራም ግታት በለት ዳሩርኮ እባዶ ጉት ኢተ፤ ኤንገ አሎ ታአበሰሳቶ ማንኮሌተተ ማራን እባዶ ታበለቲ ኤንገኮት አላንቲ ዋ ሀባረ።

17 ጡጋ ቶዶባ ካአበረ ኤርግቻል ቶዶባኮ ኮ እን ቶሰ ኤመተረ ኢነ ሃ አመ፡ “ኮይ! በከ እንጂ ጉት ታሀማጺተቶ ሻርሙጡማ ታአዳሳንተቶ ሄለልትቲ ጉት ካግናሮ ፍርዳ እን ኩን ቱሰናራ። **2** ካኡሌ ዎኖላል ኤሰነ ዎታ ሻርሙጠራ፤ ካኡሌ እባዶና ሻርሙጣኖኮክ ካዎይኒ ጣሞይ ሰቲራን።” **3** ሂካኮ አባባተረ ኤርግቻት እያናይ እን ቃሉላቶክ ኡል ቶሰ ቤሰ፤ ኡሱ ጉት ካሀባር መገ ካኮጸፋመረ መቴል ቶዶባና ማሻ ቶሞን ካአቦ ሄላክ ሱላለት ጉት ታሀማጺተቶ ሄለልትቲ ቶ እን ዴ። **4** ሀት ሄለልትቲና ዳማክና ሄላክ ሳርሰ ሳርሳተ ግቴ፤ ዎርቂይ፡ ካካባጃመ ኤኤሞና ኢንቁ ካአማማሮ ኢደ ግቴ፤ ገነትሴይ ካሙሊስሮ ኮኮና ሻርሙጣኖኮክ ባትናት ካኮአማጋመሮ ታዎርቂ ጡጋ አባተ ግቴ። **5** በቤድትሴይ ጉት “ሻርሙጣና ካኡሌ ባትጆልኮት አይ፡ ታንጂንት ባብሎን” ካአማራ ካሆል መገ ጸፋመ ግረ። **6** ሀሴ ሄለልትቲ ቁሎሌኮክ ኢግና የሱሳ ማራን ኦጎየራንኮክ ኢግ ታሰቲተቶ እን ዴ፤ ኤሰ ካኮድያረ ጎራታ እን አሎ ሳደ። **7** ኤርግቻት አደ ኢነ ሃ አመ፤ “እት ሙን ሳዳታ?” ታሄለልትቲ ሆልና ኤሰ ካኮሀማጺተቶ፡ መተ ቶዶባና ማሻ ቶሞን ካአቦ ሱላለትኮት ሆል እን ኩን ሰግናራ። **8** እት ካዴተታ ሱላለት ጣየ ግረዋ፤ ግዳ ላግሮ፤ ሃሬ እድ ቦዋክ ጉምቢኮ ብናራ፤ ባይ ቶንሳ ሴይናራ፤ አላም ታኮመጣመኩ ሀጋአበረ መገክሶ ካኮግረ ማዝጋባይ እንጸፋሞን ካግራ ካኡሌ እባዶ፡ ሱላለትና ጣየ ካግረ፡ ግዳ ካግኖን፡ ሃሬ እድ ካኤሜይናሮ ላኖ ጎዴን ሳድናራን። **(Abyssos g12)** **9** “ቃሩማ ታአብታ ሳሙ ካኮዶታማታ ሂካኑንያ፤ መቴል ቶዶባ ሄለልትቲ ካኮሀማጺተተ ዎዳሚል ቶዶባዬን፤ **10** ኡሱማለና ዎኖላል ቶዶባዬን፤ ከኖ እዬራን፤ ኮ ግዳ ግሮዋ፤ ካካለ ጋና ኤመይናራ፤ ኡሱ ካኮኤሜተ ጎራታ ክጫር ካላል አዳላይን ዶትሳራ። **11** ካሰዴድ ዎኖ ጣየ ካግረና ግዳ ካዋታመሮ ሱላለትየ፤ ኡሱ ሱላለል ቶዶባኮ ኮየ፤ ባይ ቶሰ ሴይናራ። **12** “እት ካዴተታ ማሻል ቶሞኖ ጋና እንሬዶኒ ካግሮ

ዎኖላል ቶሞንያ፤ እየሱን ጎአመን ሳቲ ቶ ታላል ሱላለትነ ዎታ ጎጎሬድናውን ሬዳኖኮክ ኦዶናት ሄላይናራን። **13** ሂኒዕ ዎኖላል ቶሞኖ ቆፋ ቶ አባናየን፤ እሶ ሁናክሶና ኦዶናትክሶ ሱላለቲን ሰሰናራን፤ **14** እሶ ኢዳዶ ጉት ጀሬን ሻፋይናራን፤ እየሱን ጎአመን ኢዳዶ ካጎቶሌ ጎታና ካዎኖላል ዎኖ ማንኮሌ ማራን ኡሱ እሶ አዎድናራ፤ ኡሱነ ዎታ ኦግራን ኦኡማማራን፤ ኦአሳባማራና ኦአብዳመንያን።” **15** ኤርግቻትና ኢነ ሃ አመ፤ “ሻርሙጣት ካኮሀማጸተት አት ኦዴተት በከጆል፤ ጎሳጆል፤ እባዶ፤ ኡናጆልና ካለካለት ሄኢ ኦአዬሳራንየን፤ **16** ሱላለትና አት ካዴተታ ማሻል ቶሞኖ ሻርሙጣት ዲዳራን፤ ሀላል ሀወአይ ሀሰናራን፤ ሶኦትሴና አምናራን፤ ኤስ ኤሌኒና ጉብናራን፤ **17** እሶ ሀልቻክሶ ጎጎፈላናውን ህታ ቆፋ ዎዳናትሶይ ካካየራ ዋያ፤ ሃንሱን ሃፋራ ካዋ ታ ፈሎ ሀይሮ እሶ ቆፋ ቶይ እስአትናራን፤ ሬዳኖኮክ ኦዶናትክሶ ሱላለቲን ሰሰናራን። **18** “አት ታዴተታ ሄላልትቲ ካኡሌ ዎኖላል ጉት ታሬድናቶ ታንጂንት ካታማታ።”

18 ሂካኮ አባባየረ ካአቲ ሁና ካአባናየ ካካለ ኤርግቻት ዳሩርኮ ዳጋ ግራን እን ዴ፤ ካባጃተሳኮክ ሀንቃኮ ካከይ ኡል ዱባ ሀንቃየ፤ **2** ጣቂ ታአንተ ያዬ ሃ አማ ኦኬ፤ “ታንጂንት ባብሎን ኢተታ! ኢተታ! ዱርሳኮክ ሞን ሌተታ፤ ባቲክ እያና ካኮባራሮ ሞን ሌተታ! ባቲክና እሊ ድን ካሜልላሮ ክምብር ካኮባራሮ ሞን ሌተ! **3** ካሴቲሳሮ ሻርሙጣኖክሴኮክ ካዎይኒ ጣሞ ጎሳ ዱባ ጣመራ፤ ካኡሌ ዎኖላልና ኤስነ ዎታ ሻርሙጣራ፤ ዳዳላተ ካባራረ ካኡሌ እባዶ ባሪሳኖኦትሴ ኦሎ ኤካታኖኮ ካከይ ዱረሳ ሌራ።” **4** ታካለ ያየ ዳሩሪ ሃ አማ ግራን እን ማለ፤ “ጎሳኬ! ጨቦክሴነ ዎታ ኡና አርሌተን፤ ኤስ ታግናቶ ኤንገ ኦሄዴዳማታን አርሌተን፤ ኤስ ኦሮኮ ብያ! **5** ጨቦክሴክ ቱላ ዳሩር ጌራ፤ ዋ ባሰክሴ ሻደራ፤ **6** ኤስ ካሰሰቶኮክ ጅልባ ማለ ኤስን ሰሳ፤ ኤስ ኦፈልተቶ ፈሎን አምባ ሙራ፤ ኤስ ጣሞ ካሞጋን ታኮለለደቶ ጡጋ ኦሮ አምባ ካአቲ የላዴን ለሌዳ፤ **7** ኤስ ካባጃትሴወና ባሪሳኖኦትሴ ኢድሳይን እስኦትሴወን ካሰሰቶ ግታክ አቦሳና ጋዳ ኤስን ሰሳ፤ ኤስ ዎዳናትሴይ ‘አን ኦር ዎኖ ኣን ሀማጼራ ጋልታንቴ ላኮኖ፤ ጋዳና ኢን ሱረ ላኮጌሮ’ አማ ጣዳተ። **8** ሃንሱን ኤስ ታግናታ ኤንገ ዱባ አሪ ቶይ ኤስ ግናታ ጎይና ጋዳ ኡኢና ኤስ ግናራ፤ ኤሌኒና ጉባይናታ፤ ኤስ ጉት ካፍርዳራ ጎታ ሄዶ ካአቲያ።” **9** ኤስነ ዎታ ካሻርሙጣራና ግር ካኢዳኒ ካግረ ዎኖላል ኤስ ጉባታ ግራን ኢይ ካብያሮ ካኮድያረን ጎራታ ኤስን ኦካ ኦታራን፤ **10**

አቦሳክሴ አብሳታናኮ ካከይ ኤባ አሌንጉረን “ተ እት ታንጂንት ካታማት፡ ተ እት ታእቲ ካታማ ባብሎን! ፍርዳ ሳቲ ቶይ ኦሮ ኩ ቶሰ ማንኮኤመተሮ ማራን ተ ኣኔ ኩን! ኣኔ ኩን!” አማራን። **11** ማርካፋክሶት ሰዳነ ሆረንባን ካእምናራ ማንኮዋታመሮ ማራን ኡሊ ጉት ዳዳላተን ኦባራራን ኦታራን፤ ኤሰን ጋዳራን፤ **12** ማርካፋክሶ ካሰደሮ ዋርቂ፡ ብር ታእማማቶ ማርጮ፡ ካካባጃመ ኤኤሞ፡ ኢንቁ፡ ካጭምን ሳርሰ፡ ዳማክ ሳርሰ፡ ካሀር ሳርሰ፡ ሄላክ ሳርሰና ታኢዳን ኡርት ካአቦ ጋ ዱባ፡ ታዳኖ ኢልክ፡ አዉኣሎክ ጋ፡ ነሃሰ ታእማማቶ ማርጮ፡ ማርጮኮና ጫቢቸኮ ካፈላመሮ ሁ ዱባ፡ **13** ያጋንዶ፡ ሳዎ፡ ካኡራሮ ጋ፡ ፋልፋሊሶ፡ ኢጣና፡ ካዎይኒ ጣሞ፡ ታኤጀርሳ ዛይቲ፡ ጣመ፡ ዳርጋማ፡ ሳዬ፡ እዳድ፡ ፋራዴል፡ ካኮጉሉፋራን ፋራድ፡ ድይና ካካለ አባዶነያ። **14** ዳዳላተን ኦባራራን “ተ እት ካሀልቻታ ካእዳን ኮኮ ዱባ ኩኮ ፋክመራ፤ ዱሩማታና ኩ ታኢድሳተ ካባጃታ ዱባ ባተታ፤ ጎርታ ሂታኮ ሆረንባን ሂካ ዱባ ሱረ ላኮሄላይናቶ!” አምናራን። **15** ሂካ ኮኮ ዱባ ኩኮ ኢምናታ ዱረሳ ኦሌረን ዳዳላተን ኦባራራን አቦሳክሴ አብሳታናኮ ካከይ ፋክም አልናራን፤ ኦታና ጋዳ፡ **16** “ካጭምን ሳርሰ፡ ዳማክ ሳርሰና ሄላክ ሳርሰ ሳርሳታ ታግቲ፡ ዋርቂና ካካባጃመ ኤኤሞ ኢንቁይና ታኢዳተ፤ ታንጂንት ካታማ ኣኔ ኤሰን! ኣኔ ኤሰን! **17** ሀኑኡ ግታኒዕ ኡራዎ ሳቲ ቶይ ባዬን፤” አማራን። ማርካፋ ኦእጃጃሬን ዱባ፡ ማርካፋይ ካሰሰታረ አባዶ ዱባ፡ ማርካፋይ ኦፈላታረን ዱባ፡ በከይ ሰሴተን ኦዳዳላታረን ዱባ ኤባ ፋክም አልናራን፤ **18** ኤሰ ጉባታ ግራን ካበያሮ ኢይ ካኮድያረን ጎራታ “ህታ ታንጂንት ካታማ ኣን ታላታ ታካለ ካታማ ሱረ ግቶ?” አማ ኦኬን። **19** አሰኦትሶ ጉት ጎራ ክክባቲን፤ ኦታና ጋዳ ሃ አማ ኢይናራን፤ “በከ ጉት ካሰሴታሮ ማርካፋ ኦአባን ዱባ ኡራዎኦትሰይ ዱረሳ ኦሌራን፡ ሀሴ ታንጂንት ካታማ ሳቲ ቶይ ኦሮ ማንኮኢተቶ ማራን ኣኔ ኤሰን! ኣኔ ኤሰን!” **20** ተ እት ዳሩሪ! ኤሰ ገጌላ! ዋ አሰን ማራን ኤሰ ጉት ማንኮፍርዳሮ ማራን አሰን ቁሎለ፡ ኦፋራንቴታና ሄገሮል ገጌላየን! **21** ሂካኮ አባባተረ ካአቲ ኤርግቻት ካንጂንክ ሪም ግታክ ኤኤሞ ኮ ኬሰጉረ ሃ አማ በከ ኦሮ ሉጉደ፤ “ታንጂንት ካታማ ባብሎን ሃ ሁናይ ሻፋም ኢናታ፤ ሂታኮ ሆረንባን ሱረ ላኮሄላንቶ፤ **22** ክራን ኦባሳራና ታዱዱሮ ያየ፡ ሱሱሌ ኦኡፋፋራና ማላካታ ኦኡፋፋራንኮት ያየ ካላም ኩዬ ኦሮ ላኮማልሳንቶ፤ ማዮና ፈሎ ኦገኔ ንፍርተ ሌ ካፈላራ ሎማሰ አባዶ ሂታኮ

ሆረንባን ኩ ኦሮ ላኮሃላምሮ፤ ካሪመ ኤኤሞኮት ያየ ኩ ኦሮ ላኮማልሳንቶ። 23 ካኮሮንታ ኢፋ ሂታኮ ሆረንባን ኩ ኦሮ ላኮሀንቃይሮ፤ ካማሻሼኮትና ታማሻሼት ያየ ሂታኮ ሆረንባን ኩ ኦሮ ላኮማልሳንቶ፤ ዳዳላተ ካባራረ እባደካ ካእላም እባዶ ካጂንጂንየ፤ ሙሩናካይ ጎሳ ዱባ ሸርሰታ። 24 “ኤስ ኦሮ ካሄገሮልኮክና ካቁሎሌ እባዶኮክ ኢግና፥ ኡሊ ካላጋዴራን እባዶ ዱባኮክ ኢግ ሃለመራ።”

19 ሂካኮ እባባየረ ሃ ታአማቶ እባዶ ካሞጋንኮት ያየ ኣን ታላቶ ታኣቲ ያየ ዳሩሪ ኣን ማለ፤ “ሀለ ሉያ! ፋይና ካባጃና ሁናና ሄዶካንክያ፤ 2 ፍርዳኬሳ ካሩሚና ልክኪያ፤ ኡል ሻርሙጡማ ታባቶይሳቶ ታንጂንት ሻርሙጣት ፍርዳይ ኡሱ ኤስ ሙርሰራ፤ ኤስ ሙርሳናይ ኡሱን ኦሀንዳራንኮክ ኢጉን ሀሎ ቤራ።” 3 እደና፤ “ሀለ ሉያ! ኤስኮ ካበያራ ኢይ ጅሩ ጅሮማኮ ታ ጅሩ ጅሮማ ጌሮ ኤልድ ብናራ!” እማ ኦኬን። (aiōn g165) 4 ላማታንኮ እፋሮ ጃርሶለና ኔፎ ታኣብታ መጣ እፋሮ ኮርፍንጄ ጉት ካሀማጼሮ ሄዶዉን በቤዲ ኡል ኦዬንጉረን “ሀሚኒዕ፥ ሀለ ሉያ!” እማ ሳጋደን። 5 ሂታኮ ሆረንባን፥ “ኡሱ ኦኣብሳታና ኡሱን ኦሀንዳታን ዱባ፥ ክጨጫርና ካጂንጂን ሄዶካን ጋላታ!” ታአማታ ያየ ኮርፍንጄኬሳኮ ቤተ። 6 እባዶ ካሞጋንኮት ያዬ፥ በከ ኦዳጋራንኮት ያየና ካኣቲ ድድዴናኮት ያየ፥ ኣን ታላታ ያየ ሃ እማ ግራን ኣን ማለ፤ “ሀለ ሉያ! ዱባ ካዳንዳራ ጎታ ሄዶካን ሬደራ! 7 ታኢዳዶ ሃሰኖ ማንኮጌተቶ ማራና ማሻሸቲሳ ማንኮእስኤካሳተቶ ማራን ገገላኖ! ገጌሎና የላኖ! ኡሱ ካባጅኖ! 8 ካሀንቃሮና ሙጭ ካእመ ካኢዳሮ ሳርስ ጎሳሳርሳቶን ኤስን ሰሳመ፤ ካጭሚንክ ሳርስ ኦቁሎሌ ቁሉኒዕ ፈሎያን።” 9 ሂካኮ እባባተረ ኤርግቻት ኢነ፥ “ታኢዳዶ ሃሰኖኮክ ጅላን ኦኡማማራን ኦሶማሳመንያን” እምደ “ጸፍ” እመ፤ እደና “ሂክ ካሩም ሃፋራ ካዋያ” እመ። 10 ኣንና ኤርግቻትን ሳጋድን ሉቃኦቲሳ ሄገሊ በቤድቲይ ኡል ኦየ፤ ኡሱ እደ “እሳግ! ሂካ ኢሮፈልተ! ኣን ኩኔ ዋታና ካየሱሳ እቶ ኦኣባን ኣብላልታን ዋታ ካሀንዳሮያ፤ ዋዉን ሳጋድ! ካየሱሳ እቶ ሄገርኮክ ኣያናያ” እመ። 11 ሂካኮ እባባየረ ታባናንተቶ ዳሩር ኣን ዴ፤ ፋራድ ጉማራክ ዴ፤ ፋራድ ጉት ካሀማጼረ ካእማናመና ካሩም ካእማማሮየ፤ ኡሱ ሩሚ ፍርድናራ፤ ጀሬና ሻፋታራ። 12 እልኦ ኦቲሳና ካኤሌኔ ላጫ ኣን ላራን፤ መተኬሳ ጉት ካሞጋን ካላቻ ግራ፤ ኡሱ ኳሬ ካካለ ማዮና ካካሶን ኡሱ ጉት ካጸፋመረ መገ ግረ፤ 13 ኡሱ ኢግ ካጨጸመሮ ሳርስ ሳርሳተ ግረ፤ መገኬሳና፥ “ሃፋራ ካዋ” ካእማማሮየ።

14 ጉማራክ ፋራዴሊ ጉት ከሀማዴራን፡ ጉማራክና ሙጭ ካለመ ካኢዳሮ ሳርስ እሳርሳቴራን ካዳሩረ ዋታዳራል ኡሱ ዴበ ሰሴታራ፤ 15 ካኬሳ ካሌኖን ጎሳጆል ካኮባስራ ካኤነናን ሺፋ ህኢቴሳኮ ብያራ፤ ሁና ባሪስናራ፤ ኡሱ ዱባ ካዳንዳሮኮት ታኡብሰሳቶ ታዋ ሙሮ ካቱሳሮ ካዋይኒ ጣሞ ካኮሙላራን ኡሱ ዳዳርናራ። 16 ሳርስኬሳይና ሬራቴሳ ጉት “ካዋኖላል ዋኖ፡ ካጎቶሌ ጎታ” ካለማራ መገ ጻፋመራ። 17 ሂካኮ እባባተረ እርት ጉት ካለሌሮ ኤርግቻት ኮ እን ዴ፤ ኡሱ ዳሩሪ ካቡባሮ ክምብርጃሉን ሃ እማ ታኦቲ ያዬ ኦኬ፤ “ካኦቲ እሞ ካዋ ቶስ ኮዬን! ኩኩማ! 18 ሶ ኦዋኖላል፡ ጀሬኑን ኦኦጃጃራንኮኒሳ ሶ፡ ካኦቲ ካጅሬኔ እባዶኮኒሳ ሶ፡ ኦፋራዴልና ፋራዲ ኦጉሉፋራንኮኒሳ ሶ፡ ኦጎቶሌልና ኦህንዳራንኮኒሳ ሶ፡ ካጨጫርኮኒሳና ካጂንጂኮኒሳ ሶ፡ ማምሰክ እባዶኮኒሳ ሶ ኮዬን እማ!” 19 ኡሱማለና ሱላለትና ካኡሌ ዋኖላል፡ ዋታዳራልክሶና ጉማራክ ፋራዲ ጉት ካሀማዴሮንና ዋታዳራልኔ ዋታ ጀሬን ሻፋይን ኦኩኩሜራን እን ዴ፤ 20 እየሱን ጎኦመን ሱላለት እባመ፤ ኡሱን ዋታ ኡሱ ሆረ ባሳ ፈላ ካግረ ካጣራ ካሄገሮት እባመ፤ ኡሱ ካሱላለቲ ማላታ ካኮንግረና ታሱላለት ምሰሊዉን ሳጋዳ ካግረ እባዶን ባሳ ፈላ እሶ ሶሶይሳ ግረ፤ ሂኒሳ ላማ ላጫ ካኤሌነኮት ባዲ ኔፎን ግራን ሻፋመን። (Limnē Pyr g3041 g4442) 21 ኦሄሴራን አደን ጉማራክ ፋራድ ጉት ካሀማዴሮኮት ህኢኮ ካበያሮ ሺፋይ ጎዬን፤ ክምብርጃል ዱባ ሶኦትሶ እመ ባራረ።

20 ሂካኮ እባባተረ ቦላክ ጉምቢ ካኮባናራና ሳንሳላታ ገነቴሳይ ካእባተራ ኤርግቻት ዳሩርኮ ዳጋ ግራን እን ዴ፤ (Abyssos g12) 2 ዶቦስ አበጉረ ጌስ ኩማ ሸየ፤ ሂክ ዶቦንሳ ዱርሳ ጎርቱን ጸላየ ታኦማማቶ ካሆሬ ሀበሳያ፤ 3 ሂክ ዶቦስ እባዶ ጎሳሶቦንኮ ጌስ ኩማ ታ ኦማጋምሮን ኤርግቻት ሂክ ዶቦስ ቦዋክ ጉምቢ ኦርዴስ ለጉደ፤ ጨፈጉረ ካካለ ማዮና ጎሳባኖንኮ ማታማ ካየ፤ ኤስኮ እባባይረ ጎራታ ክጫሩን ኡሱ ፋራሚን ዶትሳራ። (Abyssos g12) 4 ኤስኮ እባባየረ እን ኮርፍንጃል ዴ፤ ኡሱ ኮርፍንጃል ጉት ካኮፍርዲሮ ኦዶናት ካከቦ ካሀማዴሮ ዴ፤ ጋራ ካየሱሳ ማንኮኦቶቴራን ማራና ሃፋራ ካዋ ማራን መተክሶ ካኮጎሳመሮ እባዶኮት ኔፎ እን ዴ፤ እሶ ሱላለዉና ምዲ ታሱላለን ሳጋዶን ኦግራን ማላታኬሳ በቤድትሶይና ሌረ ገነትሶይ ጉት እንካኖን ኦግራንያን፤ እሶ ጎይኮ ኬንጉረን ክርስቶሳን ዋታ ጌስ ኩማ ሬደን። 5 ካሄሰረ ካጎየራ እባዶ

አደ ጌሰ ኩማ ታእማጋምሮ ጎይኮ ላኮኬራን፤ ህክና ካሆራርጃ ጎይኮ ከያኖያ፤ **6** ካሆራርጃ ጎይኮ ከያኖ ኦሄላቴራን ኦሶማሳሜና ቁሎሌያን፤ ካላም ጎይ እሶ ጉት ኦዶናት ላኮአቦ፤ እሶ ኦዋና ኦክርሰቶሳ ቱቃሞል ልናራን፤ ክርሰቶሳነ ዋታ ጌሰ ኩማ ሬድናራን። **7** ጌሰ ኩማ ካኮጉዳተ ጎራታ ጸላየ ሻኖኮ ፋራምናታ፤ **8** አላም ዱባ ጉት ካግሮ ጎሳ ጎግና ማጎግ ሶቢና ጀሬን ቶሰ ታብሰን ኤመይናራ፤ ሞጋንክሶና ላቡ ታግቶ ጨካለ አንያ። **9** እሶ ኡል ዱባ ጋምባሜን ካቁሎሌ ማማና ታጌላታንተቶ ካታማ ማራሙረን አበን፤ እየሱን ጎአመን ኤሊን ዳሩርኮ ዳይደ እሶ ጉብተ ባሰ። **10** እሶ ካሶበረ ዱርሳ፤ ሱላለትና ካጣራ ካሄገሮ ማንኮግሮ ሬሰ ታኮጉባታሮ ባድ ታኤሌነቲ ኦሮዴ ሻፋመን፤ ኤሰ አሪና ሄመን ጅሩ ጅሮማኮ ታ ጅሩ ጅሮማ ጌሮን አቦሳምናራን። (aiōn g165, Limnē Pyr g3041 g4442) **11** ሂታኮ አባባየረ አን ካንጂንክ ጉማራክ ኮርፍንጀና ኮርፍንጃ ጉት ካሀማጼሮ ዴ፤ ኡልና ዳሩርና ሆረቲሳኮ ባቃተን፤ ባንኤና እሶን ላኮሄላንተ፤ **12** ካጎየሮ አባዶ ካጨጫርና ካጂንጂ ኮርፍንጃ ሆረ ካአሌሮ አን ዴ፤ ማጸፋልና ባናመ፤ ካግሮ ማጸፋ ካሌራ ካካለ ማጸፋና ባናመ፤ ኦጎየራና ማጸፋ ፈሎኦትሶ ጸፋሜን ጎሳግራንክ ማለ ፍርዳ አታቴን፤ **13** በከና እሶ ኦሮ ካግሮ ካጎየሮ ሰሰን፤ ጎይና ቦዋና እሶ ኦሮ ካግረ ካጎየሮ አባዶ ሰሰን፤ አባዶ መተመቱ ፈሎኦቲሳክ ማለ ፍርዳ አታተ፤ (Hadēs g86) **14** ጎይና ቦዋና ባድ ቶሰ ሻፋመን፤ ህት ታኤሌነ ባድ ካላምክ ጎይያ፤ (Hadēs g86, Limnē Pyr g3041 g4442) **15** መገኬሳ ካግሮ ማዝጋባይ ጸፋም ካግኖን ዱባ ባድ ታኤሌኔ ቶሰ ሻፋመ። (Limnē Pyr g3041 g4442)


21 ሂታኮ አባባየረ አን ታኡሱብ ዳሩርና ኡል ካኡሱብ ዴ፤ ታሆራርጃ ዳሩርና ካሆራርጃ ኡል ሮረኔን፤ በከና ሂታኮ ሆረንባን ላኮግራን፤ **2** ቁሉት ካታማ፡ ታኡሱብት ኢየሩሳሌም፡ ኤንተሪ ኬሳምን ታሳርሳተቶ ማሻሻ አን እስ ኤካሳተደ ዳሩርኮ ዋ ዶለኮ ዳጋ ግራን አን ዴ፤ **3** ሃ ታእማታ ታኦቲ ያየ ኮርፍንጀኮ ብያግራን አን ማለ፤ “ሂክማ! ዋ ካኮባራራ ሞን አባዶነ ዋታ ግራ፤ እሶነ ዋታና ግርናራ፤ እሶና ጎሳኬሳያን፤ ዋ ኡሱን እሶነ ዋታ ሄዶክሶና ልናራ፤ **4** አልም ዱባ ኢልኦ ኦትሶኮ ሻካራራ፤ ካጣዎ ሴራ ማንኮሮረሮ ማራን ጎይ ጎርቱን ጋዳ ጎርቱን ኦታን ጎርቱን አቦሳ ሂታኮ ሆረንባን ላኮግሮ።” **5** ኮርፍንጃ ጉት ካሀማጼረና፡ “ግዳ አን ካመን ዱባ ኡሱባይሰናራ!” አመ፤ ደቤና፡ “ሂክ ሃፋራ ካአብዳመና

ሩም ማንኩሌ ማራን ኢነ ጻፍ” አመ። 6 ኤሰኮ አባባተረ ኢነ ሃ አመ። “ጉዳተዋ!
 ካሆሬና ካሃረ፡ እነያ፤ ካሰጉባተሮን ኦግር በከኮክ ፋልቶኮ ሙራ ካላይ ዳናባ እን
 ሰሰናራ። 7 ካአዋዳራ ሂካ ኤልናራ፤ እንና ኡሱን ሄዶ ልናራ፤ ኡሱና ኤረኬ ልናራ።
 8 እየሱን ጎአመን ኦአብሳታራን፤ አማኖ ካላይኒዕ፤ ባቶሌ፤ ኔፎ ኦላጋዳራን፤
 አሻርሙጣራን፤ ጎዮ ኦአባን፤ ቶልቻ ኦሄደሳታራን፤ ጣራ ካአዬሳራ ዱባ
 ኢድሊትሶ ሙራምደ ሬስ ታኮጉባታሮ ታኤሌነ ባዲ ኦሮ ግርናራ፤ ህክና ካላም
 ጎይያ።” (Limnē Pyr g3041 g4442) 9 ቶዶባ ታአቲ ሙሮ ካኮአማጋንተቶ ጡጋል
 ቶዶባ ካአበሮ ኤርግቻል ቶዶባኮ ኮ ኤመተረ፤ “ኮያ! ታኢዳዶ ኦር ታሌተቶ
 ማሻሻ እን ኩን ቱሰናራ” አመ። 10 አያናይ ታንጂንትና ታኤርት ዋዳም ቶሰ
 እን ቤሰጉረ ቁሉት ካታማ ኢየሩሳሌም ዳሩርኮ ዋ ዶለኮ ዳጋ ግራ ኢን ቱሰ።
 11 ካባጃ ታዋይ ሀንቃይሳ ግቴ፤ ኢፋኮክ ሀንቃ ኦሎ ካካባጃመ ኤኤም አንና፤
 ዳወኢቲ እን ሙጭ ካአመ አወኢሎክየ፤ 12 ጎጫ ቶሞንኮ ላማ ታአብቶ ታአቲና
 ታኤርት ታግምበ ኦል አባናይተ፤ ጎጫ ቶሞንኮ ላማይ ኤርግቻ ቶሞንኮ ላማ
 አሌ ኦራረ፤ ጎጫ ቶሞንኮ ላማይ ጉት ታአሰራኤል ኣኒኮክ መገ ጻፋመ ግረ። 13
 ምና ታብያንነ ጎጫ ሴድ፤ ምና ታኤሌነ ጎጫ ሴድ፤ ምና ታሄገሌነ ጎጫ ሴድ፤
 ምና ታኢያነ ጎጫ ሴድ አባናይተ። 14 ታካታማ አልኮክ ግምበ ኡኩም ቶሞንኮ
 ላማ አባናየ፤ ኡሱ ኡኩም ጉት ቶሞንኮ ላማ ኢዳዶን ኦፋራሜራንኮክ መገ
 ጻፋመ ግረ፤ 15 ኢነ ካአዬሰራ ኤርግቻት ካታማልና ጎጫልክሴ፤ ታግምበ ኦል
 ህሰል ካኮኦይራን ታዋርቂ ዳማ አባናየ። 16 ካካታማ ኤርናና ባላኣንክሰ ኤካ
 ካሌ ምና አፋር ኤካክ ቁንቡብ አባናይተ፤ ኤርግቻትና ካታማ ታኮኤካሳራን
 ዳማይ ኤካሰ ቶቴረ ኤርናክሰ ኩማ ላማነ አፋር ቦሌ ክሎ ሜትራ ግታት
 ሌተ፤ ባላኣንክሰና ጅፋትሰ ህታ ግታትዋ ሌተ፤ 17 ኤርግቻትና ታግምበ ኦል
 ህሰል ኦየ፤ ኤርግቻትና ህሰሊ ካኮኦዋረ ጎራታ ህሰል ቦልኔ አፋርታምኮ አፋር
 ሌ፤ 18 ግምበና ካኮፈላመራ እያሰጺድ ካአማማሮ ኤኤምኮየ፤ ኤሰ ካታማና
 ማሰቶቲ እን ሙጭ ካአመ ዋርቂኮ ታፈላንተቶተ፤ 19 ታካታማት ግምበኮት
 ኡኩምጃል ምዲ ታሞጋንክ ካካባጃመ ኤኤምይ ኢሳድሳ ግረን፤ ካሆራርጃ
 ኡኩም ታኢያሰጺድተ፤ ካላም ሰንፔር፤ ካሴድ ከልቀዶን፤ ካአፋር መረግድ፤ 20
 ካከን ሰርዶንክሰ፤ ካሌይ ሰርድዮን፤ ካቶዶብ ክርሰትሎበ፤ ካሰዴድ ብሬለ፤
 ካሳጋሊ ዌራዉረ፤ ካቶሞኒ ክርሰጸራሰሰ፤ ካቶሞኮ ኮይ ያክንት፤ ካቶሞንኮ

ላም እመተሰጢኖሰዬን። 21 ጎጫል ቶሞንኮ ላማ ካካባጀመ እኤሙ ቶሞንኮ ላማ አባናየ፤ ጎጫል መተመተይ ካካባጀመ እኤሙ ኮኮ ፈላመረ፤ ካካታማ ራ ዳዉኢቲ እን ኢፋ ካሮርሳሮ ሙጭ ካአመ ዋርቂኮ ካፈላመሮየ። 22 ዱባ ካዳንዳራ ጎታ ሄዶና ኢዳዶ ቁሉክ ምን ካዋክሴ ማንኮሌራን ማራን ካታማይ ኦሮ ቁሉክ ምን ካዋ እን ላኮዳሮ፤ 23 ካባጃ ታዋ ማንኮሀንቃቶ ማራና ኢዳዶ ኢፋክሴ ማንኮሌ ማራን ካታማ አርት ጎርቱን ድግኒ ኤሰን ጎንሀንቃይራኑን ላኮዶትሳሮ። 24 ጎሳ ኢፋክሴይ ሰሴታራ፤ ካኡሌ ዋኖላል ታአባን ዱሩማትሶ ኤሰ ቶሰ ኬናራን፤ 25 ኤሰ ካታማይ ሄመን ማንኮግኖን ማራን ማጎሬና ኡፋል ላኮጩፋማሮ። 26 ካካለ ጎሳና ታአባን ዱሩማን ኡራዋኦትሶ ኤሰ ቶሰ ኬናራን፤ 27 ካጢቃችሰራ ኮኮ ኤሰ ቶሰ ሱረ ላኮታባሮ፤ ፈሎ ኦባቶዬን ካፈላራና ጣራ ካአዬሳራ ኤሰ ቶሰ ሱረ ላኮታባሮ፤ ኤሰ ቶሰ ኦታባራን መገክሶ ካግር ማዘጋባይ ካኮንጸፋመሮ ኦላልያን።

22 ሂታኮ አባባተረ ኤርግቻት ዋኮና ካኢዳዶ ኮርፍንጀኮ ኦብያራን ዳዉኢቲ እን ኦላራን ኦግር በከ ኦላጋ ኢን ቱሰ፤ 2 ሂክ ላጋ ካካታማ ካባላእንክ ራ ጠኤ በልኤሰረ ሮራራ፤ ላጋይ በተነና መርገነ ድግኒ ድግኒ ዱባማ ጌሰ ኮይ ቶሞንኮ ላማ ጋለ ኢል ካዱባማረ ካግር ጋ ግረ፤ ኡሱ ጋኮኒዕ ባላሎ ጎሳ ፋይሳሬን። 3 ሂታኮ ሆረንባን ማምሰክ ቃንጎ ሱረ ላኮግሮ፤ ካዋና ካኢዳዶ ኮርፍንጀ ካታማይ ኦሮ ግርናራ፤ ኦሀንዳራና ኡሱ ሄዶይሳይናራን። 4 ሆረቱሳ ድናራን፤ መገኬሳና በቤድትሶይ ጉት ግርናራ፤ 5 ሂታኮ ሆረንባን ሄመን ላኮግርናቶ፤ ጎታ ሄዶክሶ እሶን ማንኮሀንቃይሳሮ ማራን ኮርንታ ጎርቱን ካእሪቲ ኢፋ ላኮዶትሳሮ፤ ጅሩ ጅሮማኮ ታ ጅሩ ጅሮማ ገራኒ እሶ ፊድናራን። (aiōn g165) 6 ሂታኮ አባባተረ ኤርግቻት ኢን ሃ አመ፤ “ሂክ ሃፋራ ካአብዳመና ካሩምያ፤ ካሄገሮል ካአዬሰሳራ ሄዶ ኤን ካለናር ኮኮ ኦሀንዳራውን ቱሰን ኤርግቻት ፋረ።” 7 ዩሱሳና “ሂክማ! እን ሳም ኤመይናራ! ሂካ ማጸፋኮክ ካሄገሮ ሃፋራ ካኡራታራ ካሶማሳመያ!” አመ። 8 ሂካ እየሰ ካማለራና ካዴራ እን ያንሳያ፤ ሂካ እየሰ ካኮማላረና ካኮደያረ ጎራታ ሂካ እየሰ ኢን ካቱሰሮ ኤርግቻትን ሳጋድን ሉክቴሳ ሄገለ እዬ። 9 ኤርግቻት ጎአመን “እሳግ ሂካ እርፈልተ! እን ኩኔ ዋታና አብላልታን ካሄገሮልን ዋታ ሂካ ማጸፋኮክ ሃፋራ ካፈላሮ እባዶን ዋታ ካሀንዳሮያ፤ ዋውን ሳጋድ!” አመ። 10 አደና ኢን ሃ አመ፤ “ጎራታ ማንኮገሮ ማራን ሂካ ማጸፋኮክ ካሄገሮ ሃፋራ

ማታማይ እሮጩፍተ፤ **11** ሂታኮ ሆረንባን ካሜላን ሜልላኖ ሆረድናራ፤ ባቲክና ሀባቶየ፤ ካሙጭመና ሙጭ ሀእመ፤ ቁሉክና ሀቁሎዮ።” **12** “ሂክማ! እን ሳም ኤመይናራ፤ እባዶን መተመቴ ፈሎኦቴሳክ ማለ ሙርን ሙራ እን አበራ፤ **13** ካሆሬና ካሃረ፤ ካሆራርጃና ካጋቾ አንያ።” **14** ካግር ጋኮት ኢል አምና ጎጫክሰነ ታብን ፈኢ እሶን ጎግርቶን ሳርሰክሶ ኦአልሳተራን ኦሶማሳመንያን። **15** ከሮር እን እስኦትሶ ኦባቶይሳታራና ኦሞራራን፤ ኦሻርሙጣራን፤ ኔፎ ኦላጋዳራን፤ ቶልቻ ኦሄዶይሳታራን፤ ጣራ ኦጌላታራና ካጣራ ራድ ኦሰሴታራን ዱባ ካታማኮ ሳሬ ግርናራን። **16** “እን የሱሳ ሂካ አቶ እስኩን ጎጎሰሰሮን ኤርግቻኬ ምን ካኤብ ዱባን ፋረራ፤ እን አላታኩን ካዳዉተ ህዲንዳ ሳኒያ፤ ካህንቃሮ ባካላ ካባባርሰያ።” **17** ቁሉክ እያናና ማሻሻ “ኮያ!” አምናራን፤ ካማላራ “ኮያ!” ሀእመ፤ ካሱጉባተራ ሀኤመተ፤ ካዶታታራና በከ ኦግር ሙራ ቶና ካላይ ዳናባ ሀጣመ። **18** እን፤ ሂካ ማጻፋይ ካጻፋመሮ ካሄገሮ ሃፋራ ካማላሮ ዱባ ሴራራ፤ ማዮና ሂካ ሃፋራ ጉት ኮኮ ኮ ጎአደ፤ ሂካ ማጻፋይ ኦጻፋመራን ሙሮ ዋ ኡሱን አድናራ። **19** ማዮና ሂካ ካሄገሮ ማጻፋ ካጻፋመሮ ሃፋራኮ ኮ ጎሀንቂሰ፤ ሂካ ማጻፋይ ካሰጋመሮ ካግር ጋኮት ኢልና ቁሉት ካታማኮት ቆባኮ ዋ ኡሱ ሀንቂሰናራ። **20** ሂካ እየሱን አቶ ካሌራ፤ “ኦግራን፤ እን ሳም ኤመይናራ!” አማራ። ሀሚኒዕ፤ ጎታ የሱሳ ኮያ! **21** ጎታ የሱሳኮት ሰኖ እሰን ዱባን ዋታ ሀሌቶ ሀሚኒዕ።



ቁሉት ካታማ፡ ታኡሱብት ኢየሩሳሌም፡ ኤንተሪ ኬሳምን ታሳርሳተቶ ማሻሽ እን እስ ኤካሳተደ ዳሩርኮ ዋ ዶለኮ ዳጋ ግራን እን ዴ፤ ሃ ታአማታ ታኦተ ያየ ኮርፍንጀኮ ብያግራን እን ማለ፤ “ሂክማ! ዋ ካኮባራራ ሞን እባደነ ዋታ ግራ፤ እሶነ ዋታና ግርናራ፤ እሶና ጎሳኬሳያን፤ ዋ ኡሱን እሶነ ዋታ ሄዶክሶና ልናራ፤ ራጋ ካያንሳ 21:2-3

Reader's Guide

Bayso at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Bayso at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aīdios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēse g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Baiso---Basio-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

ሉቃስ 8:31
ካሮም ቶስ 10:7
ራጋ ካያንሳ 9:1
ራጋ ካያንሳ 9:2
ራጋ ካያንሳ 9:11
ራጋ ካያንሳ 11:7
ራጋ ካያንሳ 17:8
ራጋ ካያንሳ 20:1
ራጋ ካያንሳ 20:3

aidios

ካሮም ቶስ 1:20
ይሁዳ 1:6

aiōn

ማቶላ 12:32
ማቶላ 13:22
ማቶላ 13:39
ማቶላ 13:40
ማቶላ 13:49
ማቶላ 21:19
ማቶላ 24:3
ማቶላ 28:20
ማርቆላ 3:29
ማርቆላ 4:19
ማርቆላ 10:30
ማርቆላ 11:14
ሉቃስ 1:33
ሉቃስ 1:55
ሉቃስ 1:70
ሉቃስ 16:8
ሉቃስ 18:30
ሉቃስ 20:34
ሉቃስ 20:35
ያንሳ 4:14
ያንሳ 6:51
ያንሳ 6:58
ያንሳ 8:35
ያንሳ 8:51
ያንሳ 8:52
ያንሳ 9:32
ያንሳ 10:28
ያንሳ 11:26
ያንሳ 12:34
ያንሳ 13:8
ያንሳ 14:16

እፋራሜራንኮኒዕ ፈሎ 3:21
እፋራሜራንኮኒዕ ፈሎ 15:18
ካሮም ቶስ 1:25
ካሮም ቶስ 9:5
ካሮም ቶስ 11:36
ካሮም ቶስ 12:2
ካሮም ቶስ 16:27
1 ቆሮንቶላ 1:20
1 ቆሮንቶላ 2:6
1 ቆሮንቶላ 2:7
1 ቆሮንቶላ 2:8
1 ቆሮንቶላ 3:18
1 ቆሮንቶላ 8:13
1 ቆሮንቶላ 10:11
2 ቆሮንቶላ 4:4
2 ቆሮንቶላ 9:9
2 ቆሮንቶላ 11:31
ጋላትያ 1:4
ጋላትያ 1:5
ኤፌሶን 1:21
ኤፌሶን 2:2
ኤፌሶን 2:7
ኤፌሶን 3:9
ኤፌሶን 3:11
ኤፌሶን 3:21
ኤፌሶን 6:12
ፍልጲስዮሳ 4:20
ቆላስያሳ 1:26
1 ጢሞቶላ 1:17
1 ጢሞቶላ 6:17
2 ጢሞቶላ 4:10
2 ጢሞቶላ 4:18
ቲቶ 2:12
ኦብራዊ 1:2
ኦብራዊ 1:8
ኦብራዊ 5:6
ኦብራዊ 6:5
ኦብራዊ 6:20
ኦብራዊ 7:17
ኦብራዊ 7:21
ኦብራዊ 7:24
ኦብራዊ 7:28
ኦብራዊ 9:26
ኦብራዊ 11:3
ኦብራዊ 13:8
ኦብራዊ 13:21
1 ጴጢኤሳ 1:23

1 ጴጢኤሳ 1:25
1 ጴጢኤሳ 4:11
1 ጴጢኤሳ 5:11
2 ጴጢኤሳ 3:18
1 ያንሳ 2:17
2 ያንሳ 1:2
ይሁዳ 1:13
ይሁዳ 1:25
ራጋ ካያንሳ 1:6
ራጋ ካያንሳ 1:18
ራጋ ካያንሳ 4:9
ራጋ ካያንሳ 4:10
ራጋ ካያንሳ 5:13
ራጋ ካያንሳ 7:12
ራጋ ካያንሳ 10:6
ራጋ ካያንሳ 11:15
ራጋ ካያንሳ 14:11
ራጋ ካያንሳ 15:7
ራጋ ካያንሳ 19:3
ራጋ ካያንሳ 20:10
ራጋ ካያንሳ 22:5

aiōnios

ማቶላ 18:8
ማቶላ 19:16
ማቶላ 19:29
ማቶላ 25:41
ማቶላ 25:46
ማርቆላ 3:29
ማርቆላ 10:17
ማርቆላ 10:30
ሉቃስ 10:25
ሉቃስ 16:9
ሉቃስ 18:18
ሉቃስ 18:30
ያንሳ 3:15
ያንሳ 3:16
ያንሳ 3:36
ያንሳ 4:14
ያንሳ 4:36
ያንሳ 5:24
ያንሳ 5:39
ያንሳ 6:27
ያንሳ 6:40
ያንሳ 6:47
ያንሳ 6:54
ያንሳ 6:68

ያንሳ 10:28
ያንሳ 12:25
ያንሳ 12:50
ያንሳ 17:2
ያንሳ 17:3
ኦፋራሜራንኮኒዕ ፈሎ 13:46
ኦፋራሜራንኮኒዕ ፈሎ 13:48
ካሮም ቶስ 2:7
ካሮም ቶስ 5:21
ካሮም ቶስ 6:22
ካሮም ቶስ 6:23
ካሮም ቶስ 16:25
ካሮም ቶስ 16:26
2 ቆሮንቶሳ 4:17
2 ቆሮንቶሳ 4:18
2 ቆሮንቶሳ 5:1
ጋላትያ 6:8
2 ተሰሎንቄ 1:9
2 ተሰሎንቄ 2:16
1 ጢሞቶሳ 1:16
1 ጢሞቶሳ 6:12
1 ጢሞቶሳ 6:16
2 ጢሞቶሳ 1:9
2 ጢሞቶሳ 2:10
ቲቶ 1:2
ቲቶ 3:7
ፍልሞኖ 1:15
አብራዊ 5:9
አብራዊ 6:2
አብራዊ 9:12
አብራዊ 9:14
አብራዊ 9:15
አብራዊ 13:20
1 ጴጢሮሳ 5:10
2 ጴጢሮሳ 1:11
1 ያንሳ 1:2
1 ያንሳ 2:25
1 ያንሳ 3:15
1 ያንሳ 5:11
1 ያንሳ 5:13
1 ያንሳ 5:20
ይሁዳ 1:7
ይሁዳ 1:21
ራጋ ካያንሳ 14:6

eleēsē

ካሮም ቶስ 11:32

Geenna

ማቶሳ 5:22
ማቶሳ 5:29
ማቶሳ 5:30
ማቶሳ 10:28
ማቶሳ 18:9
ማቶሳ 23:15
ማቶሳ 23:33
ማርቆሳ 9:43

ማርቆሳ 9:45
ማርቆሳ 9:47
ሉቃሳ 12:5
ያዴቆባ 3:6

Hadēs

ማቶሳ 11:23
ማቶሳ 16:18
ሉቃሳ 10:15
ሉቃሳ 16:23
ኦፋራሜራንኮኒዕ ፈሎ 2:27
ኦፋራሜራንኮኒዕ ፈሎ 2:31
1 ቆሮንቶሳ 15:55
ራጋ ካያንሳ 1:18
ራጋ ካያንሳ 6:8
ራጋ ካያንሳ 20:13
ራጋ ካያንሳ 20:14

Limnē Pyr

ራጋ ካያንሳ 19:20
ራጋ ካያንሳ 20:10
ራጋ ካያንሳ 20:14
ራጋ ካያንሳ 20:15
ራጋ ካያንሳ 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 ጴጢሮሳ 2:4

Questioned


None yet noted



እብራው ብኑረ ርተ ያላይ ታእታይና ርባኤ ገብሮን ካኩማው ገራታ ኤትራ ሴይና ኮና ሱረ ጎኤሰዋተና ሴይን ካኮኢጃመራ ኢማናኝ:- - እብራዊ 11:8



"When Pharaoh had let the people go, God didn't lead them by the way of the land of the Philistines, although that was near;
for God said, 'Lest perhaps the people change their minds when they see war, and they return to Egypt'" Exodus 13:17



Երևանի մարզի քաղաքացիական իրավունքների պաշտպանության ծառայություն - 09 00 00 00



ከሽቡት ክርስቶስ ድጋፍ ካፋራመሮ ለን ካሉማመርኮና ዋጋጋላ ካዋቱን ዋዩ ካሌሮ ጳውሎስ ካፋራመሮ ሆነዳያ፡፡ - ካሮም ቶስ 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophesies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Usher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis preaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

Where?

When?									
Innocence			Fallen			Glory			
Eternity Past	4000 BC Creation	Fall to Sin No Law	1500 BC Moses' Law	Advent of Christ 0-33 AD	Church Age Kingdom Age	Great White Throne	New Heaven and Earth		
God	God's Perfect Fellowship John 10:30	God's Perfect Fellowship with Adam in the Garden of Eden	Living in Unapproachable Light, 1 Timothy 6:16				God's Perfectly Restored Fellowship with All Mankind in the Holy City	All Restored Acts 3:21	
	Son	Pre-Incarnate, John 8:58	Incarnate, John 1:14	Paradise, Luke 23:43					
	Holy Spirit	Everywhere, Psalm 139:7		Indwelling Believers, John 14:17					
	Living Mankind	Serving the Savior or Satan on Earth, Ephesians 2:1-5							
	Deceased Believing Mankind	Blessed in Paradise, Luke 16:22							
	Deceased Unbelieving Mankind	Punished in Hades until the final judgment, Luke 16:23 and Rev 20:13							
Angels	Holy Angels	Serving Mankind at God's Command, Hebrews 1:14				Lake of Fire Prepared for the Devil and his Angels	Fallen Angels Forgiven?		
	Imprisoned Angels	Imprisoned in Tartarus, 2 Peter 2:4 and Jude 6							
	Fugitive Angels	Rebelling Against Christ							
	First Beast Demon	Accusing Mankind							
	False Prophet Demon	1 Peter 5:8 and Revelation 12:10							
	Satan	Abyss Revelation 20:2							

Who?

Destiny

Bayso at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. "*If the first fruit is holy, so is the lump*," Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



ሃኑን ሴዩንዴን ተሳ ዲባ ኦዲድ፡ ኤረድና ኢያና ቁላኩክ መገይ ጣማቃ እንኮ እኢጋልታራን የሉ። - ማቶሳ 28:19